


Teoso sãkire
amaneri



New Testament in Apurinã (BR:apu:Apurinã)

Teoso sãkire amaneri

New Testament in Apurinã (BR:apu:Apurinã)

copyright © 2004 Wycliffe Bible Translators, Inc.

Language: Apurinã

Translation by: Wycliffe Bible Translators, Inc.

Copyright Information

© 2004, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Apurinã

© 2004, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-21

PDF generated using Haiola and XeLaTeX on 21 Feb 2024 from source files dated 29 Jan 2022
253eac7-f0c7-5b49-b6be-65ee5354d0ed

Contents

Mateo	1
Marko	67
Arókasi	105
Xoão	174
Atosi	220
Homano	278
1 Korīto	305
2 Korīto	328
Karásia	344
Épeso	354
Pirīposi	364
Koroso	371
1 Tesarónika	377
2 Tesarónika	382
1 Tximótxio	385
2 Tximótxio	393
Txito	399
Piremō	403
Epireo	405
Txiako	424
1 Petro	431
2 Petro	438
1 Xoão	443
2 Xoão	450
3 Xoão	451
Xota	452
Apokorīpsi	455

MATEO

Xesosi Nirimaneakori Iua Apisapanika Auakani

(Arókasi 3.23-38)

¹ Xesosi Teoso mereëkiti itxaua. Uai aua Xesosi apika atokiriakorini uāka. Xosee inakori Xesosi iri atoko İkorapokoriti. Apraãoni, Taviini pakini Xesosi apika atokiriakorini atoko. Ininiã Xesosi Taviini, Apraãoni pakini imi atoko itxa.

² Ininiã ia atoko itxa:

Kitxakapirİka Apraão, Isaki iri.

Isaki, Xakoo iri.

Xakoo, Xotaa itariakorikata iri.

³ Xotaa, Péresi, Sera pakini iri. Inorona Tamara.

Péresi, Ésirõ iri.

Ésirõ, Arão iri.

⁴ Arão, Aminatapi iri.

Aminatapi, Nasoõ iri.

Nasoõ, Sáomõ iri.

⁵ Sáomõ, Póasi iri. Póasi inoro Haapi.

Póasi, Opetxi iri. Opetxi inoro Hotxi.

Opetxi, Xesee iri.

⁶ Xesee, Tavii iri. Tavii Isaeokini auİte itxaua.

Tavii, Saromão iri. Saromão inoro mitxi Oria İtanoro. Eereka Tavii takaro oa.

⁷ Saromão, Hopoão iri.

Hopoão, Apia iri.

Apia, Asa iri.

⁸ Asa, Xosapaa iri.

Xosapaa, Xorão iri.

Xorão, Osia iri.

⁹ Osia, Xotão iri.

Xotão, Akasi iri.

Akasi, Esekia iri.

¹⁰ Esekia, Manasee iri.

Manasee, Amõ iri.

Amõ, Xosia iri.

¹¹ Xosia, Xekonia itariakorikata iri. Iuasaaki İkorakanani kãkiti Isaeokini maİkaãka. Papirõnia tixinimoni anikaãkana.

¹² Papirõnia anikikona atoko,

Xekonia, Saratxieo iri.

Saratxieo, Soropapeo iri.

¹³ Soropapeo, Apiotxi iri.

Apiotxi, Eriakiİ iri.

Eriakiİ, Asoo iri.

¹⁴ Asoo, Satoki iri.

Satoki, Akİ iri.

Akİ, Eriotxi iri.

¹⁵ Eriotxi, Ereasa iri.

Ereasa, Mataã iri.

Mataã, Xakoo iri.

¹⁶ Xakoo, Xosee iri. Iua Xosee, Maria İtaniri. Xesosi, iuara Teoso Mereëkiti itxaua. Inoro Maria.

¹⁷ Apraão, iua äkiri, imekaniri, apika mekaniri, apika mekaniri äkiri, apika mekaniri apika mekaniri, apiko itxaãpota. Taviu auakasaaki, katosipeka pakini ninoa uäka. Eereka aua Tavii, Tavii äkiri, imekaniri, apika mekaniri, apiko itxaãpota. Katosipeka pakini ninoa uäka. Iuasaakiika Xoteoakori anikaäka Papirónia tixinimoni. Ninoa mekaniriakori katosipeka inakasaaki, Xesosi iponaniäpeka.

Xesosi İponaniini Pirena

(Arókasi 2.1-7)

¹⁸ İa atoko itxapaniko Xesosi. Teoso mereëkiti iponaniäkasaaki, Maria ominapatari Xosee. Oİtaniriuatini apisapanika, omotokiäri amarini Erekeri Matamatakoti sikakiti. ¹⁹ Xosee uäkatari Maria kamari maerekati ätikata. Atäo inakarinoka kamakari iua, ininiä kona inirekari käkiti imaropiretiniri oa kamixi onini. Käkiti sauaki osiniä, Xosee !inirekaro opëtauatini, kotxi erekeri kamakari iua. Ininiä inirekari itakanapiniro oa, ixika käkiti mi-marotakaniä. ²⁰ İkara atoko inini ixiniremoni, Teoso nitiri iaxitikiri apoka itaponemoni. Ininiä itxa:

—Xosee, Taviini apika mekaniri pite. Kona pipïkapero Maria papakapini pïtanoro İkapani, kotxi Erekeri Matamatakoti, iuara kamixipeka txïkitakaro. ²¹ Auako oa äkiri. Pitakauäkatarike Xesosi itxauako, kotxi imaktxakari käkiti maerekani —itxa Teoso nitiri.

“Xesosi” popïkari säkireë, iuatxikana, “Käkiti Maerekani Makatxakakari,” itxa.

²² Apikomoni Teoso nitiri txari:

—İkara atoko inakari auapeka, kotxi kitxakapirïka Teoso säkire säpiretakari säpiretpekari ikara säkiretxi. ²³ Kitxakapirïka ia atoko itxa:

Hïkenakotari. Sito kikikata masirïkato mixiuatoko. Auako oimi.

Itakauäkataäka Emanoeo inakori

—itxa Teoso nitiri Xoseemoni. “Emanoeo” popïkari säkireë “Teoso atekata aua.”

²⁴ Xosee merekasaaki, iua auikari Teoso nitiri säkire. Ininiä İtanorouata Mariakata. ²⁵ Eereka amarini iponaniäkasaaki, Xosee takauäkatari Xesosi itxaua. Amarini iponaniini apisa iua !isirïka Mariakata.

2

Atokatxi Pokïkinimoni Auakani

¹ Xesosi iponaniä Pereë inakori sitatxiti, Xotéia tōpa, Erotxi auİtetxi inakasaakiua. Iuasaaki atokatxi pokïkinimoni auakani sari Xerosareë sitatxiti-moni Pereë takote. İöriki imarotakani ninoa.

² Ininiä itxana kăkitimoni:

—Naniparari amarini Xoteo auİte inakariua? Ate itikapekaro İörkite atokatxi pokïkinimoni. Oa İöriki oerekaua auİtetxi Apiananiri iponaniäpeka. Ininiä ate apoka uai akapotoreëkiniua iua apisatoö, kotxi Apiananiri itxaua —itxana ninoa.

³ Erotxi ikara İkenakoenetakasaaki, kona erekaxinireri. Kona inirekari äti auİtetxi apokini. Ininiä İkinimane Xerosareë auakani kona erekax-inirena, kotxi ninoa pïkari Erotxi. ⁴ Ininiä iua apotiitana sasetotxi auİteakori, kaiökatsoparerini pakini. Ininiä Erotxi pimaäna:

—Nanipa Teoso Mereëkiti iponaniäko? —itxa.

⁵ Ninoa apakapapiretari:

—Pereë sitatxiti, Xotéia tōpa aua. Ia atoko itxapaniko Teoso sākire sãpiretakari iōkatsopatakiti kitxakapirīka:

⁶ Pereë sitatxiti auakani, Xotéia tōpa, hīte sitatxine poiāori, iuaritika kona hīpētautape, kotxi hīte sitatxineē iponaniāko Isaeokini auite. Kākiti mīkiikakari itxauako

—itxa ninoa auītetxiakori Erotximoni.

⁷ Ininiā Erotxi akiritana ninoa iōriki imarotakani, ninoanani imisākiretini ikapani. Ininiā ipimaāna:

—Mitxipitipanika kirisaakipa hītikataro oa iōriki? —itxa ninoamoni.

Ininiā ninoa sãpiretari. ⁸ Iposo atoko iokanatana Pereēmoni:

—Hīsako Pereēmoni amarini hinitini ikapani. Hãpokasaakiri, hīsãpiretano. Ininiā nota apaka sako, iua apisatoō nikapōtoreēkiniua ikapani —itxa Erotxi.

Txamari inirekari okiniri Xesosi, kotxi inirekari āti auītetxi auini.

⁹ Erotxi sākire ikenakotakana atoko, ipotorikana. Iōriki atokatxi pokīkinimoni itakakitona iikiika. Anikana Xesosi auinimoni. Iuaātaā oa iōriki iotoka. ¹⁰ Ninoa atamatakasaakiro iōriki, iteene ipoxokoniuatana.

¹¹ Ininiā apokana aapoko. Iroāna. Apokarina amarini inoro Mariakata. Ininiā ikapōtoreēkauana Xesosi apisatoō. Itxarina:

—Apiananiri pitxaua. Aauite pitxaua —itxana.

Iposo atoko itiina imakatzakana. Ininiā imakatzakarina erekari imīkitina auītetximoni isikakitina ikapani. Isikarina oro, Isēso inakori, miha inakori pakini. Isēso, miha pakini kamariāro peerekari. ¹² Ininiā eereka Teoso sãpiretana iōriki imarotakanimoni itaponeēna:

—Kona hīkanapiriāpe Erotximoni —itxa Teoso ninoa taponemoni.

Ininiā ninoa kanapiriākasaaki auinimoni, āti kimaporitimoni isana.

Exitomoni Xosee, Maria Pakini Sini

¹³ Iōriki imarotakani sipeka atoko, Teoso nitiri iaxitikiri sãpiretari Xosee itaponemoni:

—Paiamata. Pōkitikaua. Panikari amarini, inoro apaka Exito tixinimoni. Himiteka. Kona hīkanapiriāpe nota masãpiretakanisaakii, kotxi Erotxi nitari amarini okiniri ikapani —itxa Teoso Xoseemoni.

¹⁴ Ininiā Xosee:

—Nisapitikako —itxa.

Ininiā iua ikanōkatika Xosee ōkitikaua. Aiamata Exito tōpamoni isini, amarini anikini ikapani. Ininiā imimitekari amarini inorokata Exitomoni. ¹⁵ Erotxi ipinakasaaki, iusaaki ikanapiriāko. Kona ikanapiriā Erotxi ipinini apisa. Ia atoko itxapaniko kitxakapirīka Teoso sākire sãpiretakari sãpiretakiti: Nakiritariko namarite Exito tixini itakanapini.

Amarini Okiko Pirena

¹⁶ Erotxi imarotakasaakiri iōriki imarotakani sipe inakasaaki, ! imisākiretaikarina iua, ininiā iua omanākarauata. Ininiā amarini ipikananipeka inakanaua, apaka axapitipanika inakanaua, imakinikana okākitaka Pereë sitatxitiā auakani. Ikara atoko itxa, kotxi iōriki imarotakani sãpiretari ipikananipeka oa iōriki tokiā. ¹⁷ Kitxakapirīka Teoso sākire sãpiretakari Xeremia inakori sãpiretakiti iaōka auape iusaaki. ¹⁸ Iua txari: Hamaa sitatxiti ikenakotaākako ātsaātxi. Hakeo atoko sitoakoro txiapatakoi oimiakori matinani. !Onirekari kākiti mīkapiroinino oa, kotxi oimiakori kona auaika.

Exito Tixini Ikanapiriinina

¹⁹ Erotxi ipinaka atoko, Xosee Exito tixini auakasaaki, Teoso nitiri misākiretari iua itaponemoni. ²⁰ Itxari:

—Pōkitikaua, pimikanapiriāri amarini, inorokata Isaeo tixinimoni. Amarini kinirāo okaka inakani kona auaika —itxari.

²¹ Ininiā Xosee mikanapiriāri amarini, inorokata Xotéia tōpamoni, Isaeo tixinimoni. ²² Txamari imarotakasaakiri Akirao, Erotxi ākiri auītetxi ininiua irini tikini, Xosee pikari Xotéia tōpa auini. Ininiā Teoso nitiri iuaikana itaponemoni sāpiretari ātiātaā isini ĩkapani. Ininiā Xosee, Maria, Xesosi pakini sari Kariréia tōpamoni Isaeo tixini. ²³ Nasree sitatxiti kaikota itxana. Ia atoko itxa kitxakapiriĳka Teoso sākire sāpiretakani sāpiretakiti iaōka inini. Ninoa txari: Nimereēkiti, Nasareekiri itxauako.

3

Xoāo Kapatxisareri Sāpiretakiti

(Marko 1.1-8; Arókasi 3.1-20; Xoāo 1.19-28)

¹ Eereka Xesosi aneēpe. Iuasaaki Xoāo kapatxisareri, āparaā makipakaniātaā Xotéia tōpa aua. Iuaā iua oerekari Teoso sākire kākitimoni. ² Iua txa:

—Himaerekani hĳtakanapako, kotxi Teoso mereēkiti paĳitiki apokako iua ĩkinipoko auĳte ininiua ĩkapani —itxari Xoāo.

³ Kitxakapiriĳka Isaía inakori, Teoso sākire sāpiretakari, sāpiretapekari Xoāo pirena. Itxari:

Auako kiki āparaā makipakaniātaā. Isāpirenauatako. Itxariko: “Hōeretariko kimapori Apiananiri apokini apisapanika. Itĳkaāpo erekari hĳkamako iua napini ĩkapani,”

itxa Isaía kitxakapiriĳka.

⁴ Xoāo takari mākatxi kamero piti kamakori. Kamero kākiti pira. Ipakiot-sere aamata kamakori. Inikari txĳtxiri. Itximari mapaā ĩtopakero. ⁵ Kākiti Xerosareēkini, ĩkinimane Xotéia tōpakini, ĩkinimane Xotāo tinikata auakani pakini sari ĩkenakotinirina ĩkapani. ⁶ Iuaā ninoa sāpiretari Teosomoni maerekati ikamakitina, imaerekani imaktxakini ĩkapani. Eereka iua patx-isatana Xotāo uiniti.

⁷ Txama Xoāo atapakasaakina pariseoakori, satoseoakori pakini apokini iuamoni ipatxisatikona ĩkapani, iua txana:

—Imni katsiiri anaakorirai hĳte. Teoso misiritapitikai himaerekani xika. Himitekini ! auari. Hinirekari hĳpatxisatiko, txamari ! hinirekari hĳtakanapiniri himaerekani. ⁸ Hinirekiniāri himaerekani hĳtakanapini, ininiā hĳkamariĳko erekari. Ikara atoko ininiā, hōerekari Teoso atāo hĳtakanapiniri himaerekani. ⁹ Hāĳixiniremoni ! hĳxinikapiri: “Teoso apakapapitikuauako ate, kotxi ate atokirini Apraāoni txaua,” ! hĳtxapeko. Ari, nota sāpiretai hĳte, Teoso nirekiniāri, iposotari ia kai soroā Apraāoni mekaniriakori ikamini. Kona Apraāoni posotari anikinii Teosomoni. ¹⁰ Aamina maereka iriti atoko hĳtxa. Teoso iposopeka hĳte ixipokini. Kākiti auari ikitaite kauanari aamina maereka iriti itokini ĩkapani. ĩkinika aamina maereka iriti tokaākako. Xaminaā oka inaākanako. Teoso kamakiti iua atokokana itxa. Ininiā Teoso kitaite kauanapeka, aamina kotsa sauakiko tĳkane. Iua atokokana ininiā, Teoso aiamatapeka hĳte ixipokini ĩkapani.

¹¹ —Hĳte nipatxisata āparaā. Hĳpatxisatiko oerekari maerekati hĳkamakiti hĳtakanapeka. Nota tikini apoākari patxisataiko hĳte Erekari Matamatakotiā, xaminaā pakini. Apiatakari itxaua iua. !Apakata iua takote napokini ĩkiti mata nimaktxakini ĩkapani, kotxi iua apiata. Nota poiāoka. Imaktxakari himaerekani, itxiko metao āki auakari arikini atoko. ¹² Katakakereri āpokari ahoisi otāta imaktxakini ĩkapani. Otāta arikaāka. Oki nĳkataāka ĩkiena

nīkatikoātaā. Iua atokokana Teoso nīkatariko kākiti erekarini. Maerekati kamakani arikaākako xamina maxipoākatiā —itxa Xoāo.

Xesosi Patxisatiko Pirena

(Marko 1.9-11; Arókasi 3.21-22)

¹³ Iuasaaki Xesosi potorika Kariréia tōpa. Isari Xotāo uinitimoni, Xoāo patxisatiniri ikapani. ¹⁴ Txamari Xoāo txari Xesosi:

—Pite nirekatari nota patxisatinii? !Apakata, kotxi pitemoni maerekati ! auari. Notara nirekari pite patxisatinino nota —itxa Xoāo.

¹⁵ Xesosi apakapapiretari:

—Apakatapitika pipatxisatinino. Uatxa akamariko ikinika Teoso nirekaākiti —itxa.

Ininiā Xoāo:

—Ateeneka.

¹⁶ Eereka ipatxisataāka atoko ikanīkiita imiriī. Iuasaakipeka iaxiti takaka. Ininiā kākiti atapari Eekari Matamatakoti katxakaāpotini kamoā atoko inakari. Xesosimoni oāpoka. ¹⁷ Eereka Teoso sākirauata iaxiti:

—Pite namarite, nitiretakiti, napokaerekatai, kotxi ninirekakiti pikama — itxa Teoso.

4

Satanasi Nirekari Xesosi Kaminiri Maerekati

(Marko 1.12-13; Arókasi 4.1-13)

¹ Eekari Matamatakoti anikari Xesosi āparaā makipakaniātaā Satanasi atamakaerekatiniri ikapani. ² Iuaā Xesosi takanapari inipokotini Teoso imisākiretini ikapani. Koarēta pokamari, koarēta ikanōkati pakini itakanapari inipokotini. Ininiā inatxikatani iuani.

³ Ininiā iuasaakiika Satanasi apoka Xesosimoni. Iua katamakaerekareri itxaua. Itxari:

—Pite Teoso ākiri pininiāua, ininiā ere kai soro komiri pitxīkitaka —Satanasi txari Xesosi.

⁴ Xesosi apakapapiretari:

—Kona nīkamari pite paniātakiti, kotxi Teoso sākire iōkatsopatakori txari: Kona komirinanini txīkitakari kākiti ātipirika auini tīkane. Ikinika Teoso sākirera txīkitakari kākiti ātipirika auini tīkane —itxa Xesosi Satanasimoni.

⁵ Eereka Satanasi anikari Xesosi Xerosareēmoni. Iua sitatxi akiritaāka Teoso nakiti. Satanasi anikari Xesosi Teoso misākiretiko aikotimoni apiata otano tsokitiri nopini. ⁶ Ininiā Satanasi txari Xesosi:

—Teoso ākiri pininiāua, pokaua xiti. Ininiā ikinipoko kākiti imarotariko Teoso ākiri pininiāua, kotxi Teoso sākire iōkatsopatakori txari:

Teoso iokanatanako initiriakori iaxitiki pite inīkatinina tīkane. Ninoa maīkai pimapinakani tīkane, ininiā pikarouatini !auari. Kona kai soro karotari pikiti,

—itxa Satanasi.

⁷ Xesosi apakapapiretari:

—Teoso sākire iōkatsopatakori apaka txari: Kona patamakaerekatapiri Apiananiri piTeosone.

⁸ Eereka Satanasi anikari Xesosi ātiātaā iuaīkana. Itano xiratarimoni anikari. Iuaā Satanasi oerekari ikini itixiti, ikinika tiitxiti iuaā auakari pakini. ⁹ Ininiā itxa:

—Pikapotoreēkiniāua nota apisatoō piteosonetinino, ininiā ikinika nisikaiko —itxa Satanasi.

¹⁰ Xesosi apakapapiretari:

—Konapitini. Pisipeka Satanasi. Teoso sākire iōkatsopatakori txari:
Apiananiri piTeosone, iuanokara piteosoneta. Iua ĩkapaninokara
pipariĩkauatako
—itxa Xesosi.

¹¹ Ininiã Satanasi takanapa txari iua. Ininiã Teoso nitiriakori iaxitikini
apoka Xesosimoni inĩkatinirina ĩkapani, kotxi itapara !auaika.

Xesosi Mipotorikari Iparĩka Karirėia Tōpa
(Marko 1.14-15; Arókasi 4.14-15)

¹² Xesosi kenakoenetakasaakiri Xoão kapatxisareri kateia āki takiko, isari
Karirėia tōpamoni. Nasaree sitatxitimoni isa. ¹³ Ininiã eereka itakanapari
Nasaree sitatxiti. Kapanaoō sitatxitipeka aua itxa. Kapanaoō, Karirėia poa
takote, apaka Seporō, Natarii pakini tōpati takote. ¹⁴ ĩtxakapiriĩka Isaía,
Teoso sākire sāpiretakari sāpiretapekari, iuaã Xesosi auako. Ia atoko Teoso
sākire txapeka:

¹⁵ Seporō, Natarii pakini tōpati ipoa mitari takote, Xotāo uiniti ipiniã. Kākiti
takauākatarı iua itixi, Karirėia tōpa. Xoteo minakanıua tixine itxaua.
Iuaã Erekarı apokako. ¹⁶ Ninoa kākiti, ipiã auakani, ĩmarotari Teoso.
Ipĩkaniãtaã ninoa auanãta. Ninoa atamatarıko tirıkapi. ĩkamara
mitari. Iua tirıkapi iopinıpokotako ipiã auakani sauaki.
ĩkara atoko itxa Isaía ĩtxakapiriĩka.

¹⁷ Xesosi apokasaaki Kapanaoō sitatxiti, imipotorikari oerekarauatini. Ia
atoko itxa:

—Himaerekani ĩhtakanapa, kotxi iposope Teoso ĩhauĩte ininiua —Xesosi
txana ĩkinıpoko kākiti.

Xesosi Akiritari Ipi Ipi Pakini Kokatsaãriti
(Marko 1.16-20; Arókasi 5.1-11)

¹⁸ Xesosi Karirėia poa tiniã itĩpokotakasaaki, itikari ipi kiki, Simāo Petro
ınakori, itari Ātree ınakori pakini. Itakanãtarına hetxi. Kokatsaãriti itxauana.

¹⁹ Ininiã Xesosi akiritana ninoa:

—Masa notakata. ĩhtakanaparıko ĩhokatsaãtini parĩkatxiti. Noerekaiko ĩhte
Teoso sākire ĩhorekini ĩkapani, kākiti ĩmarotini ĩkapani —itxa Xesosi.

²⁰ Ininiã uusaakiika ninoa takanapari okatsaãtinına. Xesosıkata sa itxana.

²¹ Apıkomoni itĩpokotakasaaki, atamatana Txıako, Xoão pakini. Sepeteo
anaakori itxauana. Ninoa irıkata kanauaã auanãta. ĩhetxına ĩotsaãnãtana.
Ininiã Xesosi akiritana ninoa. ²² Iusaakiĩpeka itakanaparına ĩri, kanaua
pakini. Xesosıkata sa itxana imoianatinirına ĩkapani.

Xesosi Amianatakani Imakananıtini
(Arókasi 6.17-19)

²³ Xesosi sari ĩkini Karirėia tōpamoni. Aıko Xoteoakori apotiitiniãtaãua
ısa. Iuaã ısāpiretana Teoso iokanapirena erekari, Teoso kākiti auĩte ĩnini
pirena. Apaka erekapeka itxĩkitakana amianatakani. ²⁴ Xesosi kamakiti,
apaka ısāpiretakiti, iarıpiretapeka ĩkinıka Sırıa tixini. Ininiã kākiti minana
ıtomaneri amianatakani ĩuamoni. ĩkini sereti amianari auakini sari iua-
moni. Kākiti maerekati matamatakoti Satanasi nitiri auãtotakiti apoka iua-
moni. Apaka kākiti mapıtxiritakani apoka. Apaka titınanakakari amianariti
auakini apoka. Apaka kākiti maposotã tıpokotakani pakini apoka Xesosimoni.
ĩkinıkana erekape itxĩkitakana ninoa. ²⁵ Itomaneri sari iua tikini. Kākiti
Karirėiakini, tesı pakini sitatxitikini, Xerosareėkını, kākiti Xotėia tōpakini,
Xotāo uiniti ipiniãkını pakini sari iua tikini.

5

Xesosi Säkirauata Ixirata Auñte Nopini
(Kapítoro 5, 6, 7)

¹ Xesosi itomaneri kákiti atapakasaaki, ixirata nopini isa, topáka itxa oerekarauatini íkapani. Imoianariakori apotiítua iuamoni. ² Iuasaaki oerekana ia sáikiretxiti:

Kirimonipa Teoso Sikatari Erekeri?
(Arókasi 6.20-23)

³ –Teoso takari erekeri kákitimoni, ia atoko inakanimoni. Ninoa nirekeri Teoso nireékiti ikaminina, iuaritika imarotarina !iposotarina Teoso nireékiti ikaminina, ininiá amanaárina Teoso sikaposotiiretinina ninoa. Teoso takari erekeri kákiti ikara atoko inakanimoni. Ninoa sari Teoso auítetxi ininiátaáua.

⁴ –Teoso takari erekeri kákitimoni, ia atoko inakanimoni. Mitxi ninoa txiapata imaerekanina xika. Ininiá eereka Teoso mikapiritana ninoa, amarini mikapiritiko atoko.

⁵ –Teoso takari erekeri kákitimoni, ia atoko inakanimoni. Pataparax-inirena ninoa, iuaritika !itxitarina áti. Iamoníkarina áti. Teoso sika-panikariko ikinika itxi ikara atoko inakanimoni.

⁶ –Teoso takari erekeri kákitimoni, ia atoko inakanimoni. Ninoa iteene nirekeri erekarinoka ikaminina. Nipokori inirekinina atoko, áparaá inirekinina atoko, ninoa iteene nirekeri erekeri ikaminina. Ininiá Teoso sikana ninoa ikinípoko erekeri inirekakitina.

⁷ –Teoso takari erekeri kákitimoni, ia atoko inakanimoni. Ninoa amoníkarini ninoa misiritakani, ininiá iua atokotxikana Teoso amoníkanako ninoa kaa- moníkarerini.

⁸ –Teoso takari erekeri kákitimoni, ia atoko inakanimoni. Ninoa kamari Teoso nireékitinoka, ininiá ninoa aókitariko Teoso.

⁹ –Teoso takari erekeri kákitimoni, ia atoko inakanimoni, kauaírerinimoni. Ninoa paríkauata neenamtxi xipokini íkapani. Ininiá ninoa akiritaákako Teoso anaakori.

¹⁰ –Teoso takari erekeri kákitimoni, ia atoko inakanimoni. Ninoa kamari erekeri, ininiákara apanakini kákiti misiritana. Ninoa erekeri kamakani auako Teoso auítetxi ininiátaáua.

¹¹ –Teoso takari erekeri hñtemoni, apanakini misiritakasaakii, imisákipiretakasaakii, aápirena ikamakasaaki hñtemoni nota sákiere háuikini xika. ¹² Poxokonoka hñxako, kotxi Teoso sikai híparíka íki ito, itixine hápokasaaki. Hñte misiritiko atokokana Teoso sákiere sápiretakani kitxakapiríka misiritaáka, ininiá hípoxokoniuatoko –itxa Xesosi.

Iókira Pirena
(Marko 9.50; Arókasi 14.34-35)

¹³ Iuaíkana Xesosi sákirauata:

–Iókira erekaro atoko hñtxaua ikinimane íkapani. Iókira matxoatapeka onakasaaki, ininiá !apakata otxoa kanapiriini iuaíkana. Ininiá oókaáka. Kákiti kitakaro, kotxi kona otxaika.

Tirikapi Pirena

¹⁴ –Tirikapi atoko hñtxaua ikinimane kákiti íkapani. !Híposotari híkipatiniri sitatxi xirata nopini auakarí, kotxi ikinimane atamatari tirikapi. ¹⁵ Kákiti ! itakari tirikapi kopiti áki. Itakarina itano ikini aapokotxiti iopinikini íkapani. ¹⁶ Iua atokonanera hñxako, kotxi erekeri híkamakiti tirikapi kamara atoko itxa. Erekarinokara híkamako. Ininiá apanakini atamatari erekeri híkamakiti. Ininiára itxarina añri iaxitikirimoni: “Peerekai pite.”

Teoso Säkire Moisesi Apakapakiti

¹⁷ Iuaïkana Xesosi säkirauata:

—Kona hïtxape: “Xesosi xipokariko Teoso säkire Moisesini apakapakiti,” kona hïtxape. Apaka, “Kitxakapirïka Teoso säkire säpiretakani säpiretakiti Xesosi xipökako,” kona hïtxape. Kona ikara inakari !nixipoka. Nota ina ikinipoko ninoa säpiretakiti nikamini ïkapani. ¹⁸ Atãopitika ikinika Teoso säkire apokako. Kona xatiki Teoso säkire iökatsopatakori kona xipoka. Iaxiti, itixi pakini xipokini apisa Teoso säkire !ixipoka. Apokapitikako imakinika isäkire. ¹⁹ Teoso säkire ipaniãtakiti apiari aua, apaka poiãori aua. Käkiti makamakaniãri ikinika Teoso säkire, oerekiniãri apanakini ikinika Teoso säkire imakamakani ïkapani, poiãori itxaua Teoso auïtetxi ininiãtaãua. Åti kãkitipekana, ikaminiãri ikinika Teoso säkire, oerekiniãri apanakini ikinika Teoso säkire ikamini ïkapani, apiari itxaua Teoso auïtetxi ininiãtaãua. ²⁰ Ia nisãpiretai. Kaiökatsopareriakori, pariseoakori pakini !ikamari atão inakari Teoso nireëkiti. Ininiã hïte kaminiãri ninoa atokotxikana, !häuiritaãka hïïroini Teoso auïtetxi ininiãtaãua. Atão inakari Teoso nireëkiti hïkaminiã, hïïroãpitika iuaã.

Omanãkaretxi Pirena

²¹ —Hïte imarotari kãkiti kitxakapirïka säpiretaãka. Ia atoko inaãka: “Kona apanakini hõkape. Kokaniri anikaãkako imisiritikomoni,” inaãka kitxakapirïka. ²² Uatxa apikomoni nota säpiretaiko hïte. Maxikatiïka pomanatiniãri pitari, panikaãkako pimisiritikomoni. Pite napetiniãri pitari, ininiã auïtetxiakori misiritapitikai. Pakiritiniãri pitari: “Kïikitei,” ininiã pimisiritiko païtiki apokako. Nota txai hïte, kona erekari kokaniri. Iua atokokana kona erekari hinaperauatini. Hinaperauatiniã, ininiã maerekani misiritikoãtaã hïsapitikako.

²³ —Ininiã hïsikasaaki Teoso apisatoõ hïsikakiti hïsikini ïkapani, iusaaki hïxinikari hïtari homanatakiti. ²⁴ Iusaakiïka hïtakanapariko hïsikakiti iuaã hïsikiniri apisa. Hïsako katimaritika homanatakitimoni. Himisãkiretari, homanãkare hïxipokini ïkapani. Iposo atoko kanapiriã, hïsikakiti tïkane sika hïtxako Teosomoni —itxa Xesosi.

²⁵ Iuaïkana Xesosi säkirauata:

—Käkiti kinirão apoïtakiniãi, ininiã pimisiritiko mereëkarimoni iua anikinii apisapanika, katimariã pisa iuamoni. Pimisãkiretari iua, kotxi pimisiritiko mereëkari sikaiko pite pimisiritakirimoni. Ininiã eereka iua takai kateia äki. Iuaã pikaikotako. Ininiã apisapanika pimisãkiretariko iua pomanatakiri.

²⁶ Atão nisãpiretai, kona posipikari kateia ikinika pimisiritiko mereëkari paniãtakiti pimiïkitxitanisaaki —itxa Xesosi.

Kipa Txïkitakai Maerekati Pikamini?

²⁷ Xesosi apikomoni säkirauata:

—Hïte imarotapekari kitxakapirïka säpiretakori: “Pïtanoro minakotokatika kona pisirïkape.” ²⁸ Kitxakapirïka ikara atoko itxama. Nota säpiretaiko hïte apikomoni. Sito amatakari kinirão oakata sirïkaka inakari, iuara kamapekari maerekati äkixinireë. ²⁹ Kona pauiritapiri maerekati pikamini txïkitaãkari pitekata ikaitotini. Patamatakiti txïkitakiniãi maerekati pikamini, pimakatkakari poki, oka pitxari, kotxi maerekati pikaminiã, maerekani misiritikoãtaã pokaãkako. Apiaerekata Teosokata ätipirika pauini äti pokinoka pauini. ³⁰ Piuako pikikomoni auakari txïkitakiniãi maerekati pikamini, ininiã pisauaka, oka pitxa, kotxi maerekati pikaminiã, maerekani misiritikoãtaã pokaãkako. Apiaerekata mauakotikai pauini ätipirika Teosokata. Kona pauiritapiri maerekati kaikotini pitekata. Pitakanapariko maerekati.

Kiki Ītanorokata Itakanapakakini

(Mateo 19.3-9; Marko 10.2-12; Arókasi 16.18)

³¹ –Kitxakapirīka ia atoko itxa sākiretxi:

Pītanoro pitakanapiniā, aātsopa pisika oamoni Ītanorotxi takanapiko aātsopati. ³² Iuaritika nota sāpiretaiko hīte, !hītakanapaperoko pītanoro. Pitakanapiniāro, ininiā maerekati pikamapitika, kotxi eereka oa atxiīti nirekakari āti kiki. Ininiā iuasaaki oa kamari maerekati apaka pite xika. Apaka oa takakari kamari maerekati. Apakata pitakanapiniro pītanoro, ātikata osirīkiniā –itxa Xesosi sākire.

Atāopitika Inakari Sākiretxi

³³ Iuaīkana Xesosi sākirauata:

–Hīte imarotapekari kitxakapirīka sākiretxiti. Ia atoko itxapaniko: “Hīkamariko imakinika hīkamaenetakiti. Hīkamariko hīkamaenetakiti Teoso ĩkapani,” itxa. ³⁴ Notara sāpiretai hīte apikomoni: “Nikamapitikariko,” pinakasaaki, !pakiriūakatapiri Teoso tixine uāka, kotxi iuaā Teoso auītetxi ininiātaāua. “Nikamapitikariko,” pinakasaaki, kona apikomoni pakiritape. ³⁵ “Nikamapitikariko,” pinakasaaki, !pakiriūakatapiri itixi uāka, kotxi Teoso uai aua apaka. “Nikamapitikariko,” pinakasaaki, !pakiriūakatapiri Xerosareē uāka, kotxi auītetxi Apiananiri sitatxine itxa. ³⁶ “Nikamapitikariko,” pinakasaaki, !pakiriūakatapiri pikii uāka, kotxi !apakata pitxiitakiniri piāko pomama inini, kasarori inini. Ātika piāko kona piposotari pitxiitakiniri kasarori inini, pomamari inini. ³⁷ “Ari,” pinakasaaki, pikamapitikariko. “Kona,” pinakasaaki, kotxi kona piposotari pikaminiri. Kona āti sākiretxi !pikamape. Maxikatīka kamakori sākiretxiti Satanasi sākire itxaua –itxa Xesosi.

Xikatxitakaniua Pirena

(Arókasi 6.29-30)

³⁸ Xesosi oerekarauatapanika:

–Ia atoko kitxakapirīka sākiretxiti: “Neenamatzisaaki āti makatzakiniāri poki, pixikatxitariko. Iuasaaki pimakatzakariko iua oki apaka. Pitsiriī patakā āti kākiti xika, pixikatxitariko. Iuasaaki iua tsiriī apaka pimapatakako,” itxa sākiretxi kitxakapirīka. ³⁹ Txamari nota sāpiretaiko hīte apikomoni. Kona hīxikatxitapiri maerekati hītemoni auakasaaki. Āti aritiniāri pitoō, ininiā pikirioka ipinitoō iaritini ĩkapani. ⁴⁰ Atxiīti āti nirekari anikinii pimisiritiko mereēkarimoni, kotxi iua nirekari pite sikiniri pimāka iuamoni iua txineirote pimasikakani xika. Ininiā anikinii apisapanika, pisikariko pimāka inirekakiti, apaka apikomoni āti pimāka. Ikara atoko hīkamako. ⁴¹ Ia āti sākiretxiti: Āti paniātiniāi itii panikini āti ōti, ininiā ipi ōti panikari itii. Poerekariko pitiraōki. ⁴² Atxiīti āti amanaāi pitii, ininiā pisikariko iuamoni inirekakiti. Iua amanainiāi pitii “Akamoni iuaīkana !nisikai,” ininiā iuasaaki pisikariko iuamoni –itxa Xesosi.

Pomanatakini Pitiretini

(Arókasi 6.27-28, 32-36)

⁴³ Iuaīkana Xesosi sākirauata:

–Hīkenakotapekari ia sākiretxiti: “Hītiretariko hinirimane. Homanatariko himokaiakari.” Ikara atoko kitxakapirīka auari. ⁴⁴ Ikara atoko itxama. Nota sāpiretaiko hīte ipinimoni. Kona homanapiri himokaiakari. Hītiretariko iua apaka. Hamanaāri Teoso hīte omanatakani erekari isikini ĩkapani. ⁴⁵ Apakatapitika amokaiakarimoni erekari akamini, kotxi Teoso kamari atokatxi kākiti erekarini auiniātaā iopinikini ĩkapani, apaka maerekani

auiniãtaã iopinikini ïkapani. Iua iokanatarì ãparaã atão inakari kamakani-
moni, apaka atão minakati kamakanimoni. ⁴⁶ Hïte tiretakaninani hïtïretiniã,
kinirepa Teoso sikari erekari hïtemoni hinirïmanenokara hïtïretakasaaki?
Kotxi kãkiti maerekati kamakani apaka tiretari ninoa tiretakani. ⁴⁷ Hïte
misãkiretakaninani himisãkiretiniã, kãkiti Teoso mimarotakani atoko hïtxa,
kotxi ninoa misãkiretakani imisãkiretana. ⁴⁸ Ikinipoko hïri iaxiti auakari
kamakiti erekari, ininiã iua atokokana hïtxïkitakariko ikinipoko hïte kamakiti
erekari –itxa Xesosi.

6

Xesosi Oerekari Teoso Sikiko

¹ Iuaïkana Xesosi sãkirauata:

–Erepaniko. Erekarì pikamakasaaki, kona pikamapiri piuikiniua ïkapani,
erekari pikamakiti apanakini imarotini ïkapani. Pikaminiãri erekari
apanakini apokaerekätiniï ïkapani, kona papakapari piparïka ïki iaxiti,
ãri iaxiti auakari sikakiti. ² Aua kãkiti ia atoko inakari. Ikamakiti
atxïiti erekari, txamari ixinikakiti kona erekari. Kãkiti ikara atoko in-
akari sikarauatakasaaki minakati matiitimoni aiko Xoteo apotiitiniãtaãua,
apaka mapara kãkiti napiniãtaã, inirekarina ikinimane itikiniri erekari
ïkamakitina. Inirekarina kãkiti iuikinina. Ikara atoko !pitxape minakati
matiitimoni pisikarauatakasaaki. Pixinïkariko ia: Ninoa apakapapekari
ïkinika erekari kãkiti sikakiti, txamari !apakaparina erekari Teoso sikak-
iti. ³ Pisikarauatakasaaki minakati matiitimoni, kona pauiritapiri pi-
uako pisaneremoni auakari imarotiniï piuako pikikomoni auakari sikakiti.
⁴ Ikara atoko ininiã, pitenani imarotari pisiãkiti. Piri iaxitikirì, ikinipoko
atamatakari, ïlkitxitaiko kãkiti apisatoõ –itxa Xesosi.

Teoso Misãkiretiko Pirena (Arókasi 11.2-4)

⁵ Iuaïkana Xesosi sãkirauata:

–Teoso himisãkiretakasaaki, kona hïkamapiri kamisirienereri atoko hinini.
Ninoa potxitari itiminina aiko Xoteo apotiitiniãtaãua, kimaporiã apaka,
Teoso imisãkiretini ïkapani. Ininiã ikinimane itikana. Hïxinikari. Ninoa
apakapapekari poxokonitxi uai ïkorapokoriti auakari. Txamari ninoamoni
atão poxokonitxi !auari. ⁶ Teoso pimisãkiretakasaaki, pisa pitenani auiniãtaã.
Kona pauiritapiri ãti kaikotini pitekata Teoso pimisãkiretakasaaki. Iuaã
pimisãkiretari piri matamatakoti. Iuaã iua atamataiko pite. Eereka isikaiko
erekari iaxitikirì.

⁷ –Teoso pimisãkiretakasaaki, pimixinïkariko pisãkire. Maxikatïka kona
pisãkirauatape iuakata. Teoso sãkire mauïãkati xinikari Teoso kenakotiniri
isãkire kotxi kaiãori isãkire. ⁸ Ikara atoko !pikamape pimisãkiretakasaakiri iua,
kotxi pisãkirauatini apisapanika Teoso imarotapekari pinirekakiti. ⁹ Ia atoko
hïtxako Teoso himisãkiretakasaaki:

“ãri iaxiti auakari, ate nirekari piuãka paxitiko.

¹⁰ Anirekari ikini itixiti auakani auïtetiniï pite. Pite tixine pinireëkiti
kamiko atokokana, anirekari pinireëkiti kamiko ïkorapokoriti,

¹¹ Nïpokori ikiniõtïka pisikauako.

¹² Pimaxinïkaretariko maerekati akamakiti. Maerekati atemoni kamakori
amaxinïkaretini atokokana pimaxinïkaretariko.

¹³ Kona panikapeua aãtaarekatikomoni. Pisakauako ate, maerekati sauaki
ãuakasaaki. Ikara atoko pïposota, kotxi pitenanira auïtetxi txaua.

Pitenanira kaposotiire. ãtipirika peerekai pite. Ameë.”

Ikara atoko hïtxako Teosomoni.

¹⁴ –Pimaxinĭkaretiniāri maerekati āti kamakiti pitemoni, ininiā piri iaxiti auakari maxinĭkaretari maerekati pite kamakiti apaka.
¹⁵ Pimamaxinĭkaretakaniāri maerekati āti kamakiti pitemoni, ininiā piri iaxitikiri kona maxinĭkaretari maerekati pite kamakiti apaka –itxa Xesosi.

Nipokori Takanapiko Pirena

¹⁶ Iuaĭkana Xesosi sākirauata:

–Aua kākiti ia atoko inakari. Ikamakiti atxiīti erekari, txamari ixinikakiti kona erekari. Kākiti ikara atoko inakari takanapari inipokotini Teosokata isākirauatini ĭkapani. Txamari ninoa nirekari ikinimane imarotini itakanapirinina inipokotini, kākiti iuikinina ĭkapani. Ininiā ninoa matinaniuata itoōāna ikara kākiti imarotini ĭkapani. Atāo nitxai, ninoa apakapapekari ikinika erekari kākiti sikakiti, txamari !apakaparina erekari Teoso sikakiti. Kona ikara atoko !pitxape nipokori pitakanapakasaaki Teoso pimisākiretini ĭkapani. ¹⁷ Hĭte ikara atoko !hĭkamape. Hinipokotini hĭtakanapakasaaki Teoso himisākiretini ĭkapani, hārokatoōtaua. Hōeretari hiāko. ¹⁸ Ininiākara apanakini !imarotari hĭtakanapiniri hinikini. Ininiā hĭri matamatakoti, iuananira itikariko hĭkamakiti, apanakini mimarotakiniti, ininiā isikaiko hĭparĭka ĭki –itxa Xesosi.

Pitiretakiti

(Arókasi 12.33-34)

¹⁹ Iuaĭkana Xesosi sākirauata:

–Maxikatĭka kona papotiitapiri pitiretakiti uai auakari, kotxi atxiīti kamara nikari pitii. Atxiīti oerĕkata. Atxiīti kiĭtiriri ĭtirĭkari iua. ²⁰ Ikara atoko kona pikamape. Papotiitariko pitiretakiti Teoso tixineē, kotxi iuaā !auari kamara. Iuaā tiitxi !oerĕkata. Kona ixipoka. Kiĭtiriri ĭtirĭkari iua. ²¹ Pitiretakiti auiniātaā, iuaā pixinikapika. Iuaā pinirekari pauini –itxa Xesosi.

Tirikapi ĭtotxiākiri Pirena

(Arókasi 11.34-36)

²² –Poki tirikapi atoko itxa piĭto ĭkapani. Poki ereka inakasaaki, ipinikare aua pākixinireē, ininiā pinireĕkiti imakinika erekari. Erekarinokara patamatinā, erekari pixinire. ²³ Txamari poki oerekasaakii maerekati pikamini, ipiā apoka pākixiniremoni. Iuasaaki tirikapi kamara na xatiki !auari pitemoni –itxa Xesosi.

Ipi Auĭtetxi Pirena

(Arókasi 16.13; 12.22-31)

²⁴ Iuaĭkana Xesosi sākirauata:

–!Apakata kākiti parĭkauatini ipi iauĭtena ĭkapani, kotxi atxiīti āti omanata, āti itireta. Atxiīti āti apokaerekata, āti inorita. Iua atokokana kākiti kona posotari iparĭkauatini tiitxi ikinipoko iamotini ĭkapani, Teoso ĭkapani iparĭkauatakasaaki. !Apakata piauĭtetiniri Teoso, txineiro piauĭtetakasaaki.

Teoso Nĭkatiniua Ate

(Arókasi 12.22-31)

²⁵ –Ininiā nitxai: Pinirekari nipokori, iāriā pakini auāki pinini ĭkapani. Apaka pinirekari mākati piĭto ĭkapani. Ikara pinirekini xika maerekaxiniretika kona pitxape. Erekarini nipokori. Apiaerekata pixinire. Erekarini mākati. Apiaerekata piĭto. Ininiā ātipirika !pixinikapiri nipokori, mākati pakini pinitini. ²⁶ Kona pipĭkarauatape nipokori poiōa auakasaaki. Pixinikariko kotipiriki. Kona ninoa takarauata. Kona apotiitari ikiena. Kona ipotetari ikiena. Iuaritika piri iaxitikiri sikakienatana ninoa. Ininiā ninoa-moni nipokori !ixipoka. Teoso apia xinikai hĭte. Ininiā kona pipĭkarauatape.

²⁷ Kinirepa maerekaxiniretinoka pitxa? Pimaerekaxinirene ! itxikitakai apikomoni āti oara pauini.

²⁸ –Kinirepa maerekaxiniretinoka pitxa pimāka pinirekini xika. Aāui pixinikako. Kona aāui parīkauata. !Ikamari imāka, iuaritika aāui peereri. ²⁹ Kitxakapirīka auītetxi Saromāo inakori, iteene katiri itxaua. Kaiāori imāka ereri, iuaritika apia ereri ikinika aāui. ³⁰ Aāui !okanani aua. Uatxa aua. Katana ikatikata iotikaāka. Iuaritika Teoso nīkatari aāui. Ininiā apiata inīkakai hīte. Ikamamākatapitikai. Poiāonoka hīte auikari Teoso sākire. Ikara xika maerekaxiniretinoka hītxa.

³¹ –Ininiā maerekaxiniretinoka kona hītxape. “Kipa ninika? Kipa niāta? Nāpa napokari mākatxi?” kona hītxape. ³² Teoso sākire mauīākani maerekaxiniretinoka itxana ikara atoko. Piri iaxiti auakari imarotari pinirekaākiti. Ininiā maerekaxiniretika !pitxape. ³³ Merepitipanika pinirekariko Teoso piauīte ininiāua. Iua nireēkiti pinitako, ininiā atāo inakarino pika-mako. Ikara atoko inakari pikaminiā, pite nirekakiti apaka isikaiko.

³⁴ Maerekaxiniretinoka kona pitxape katana pinirekakiti pixinikini xika. Pinirekakiti auapitikako katana, iuaritika mitxipanika kona pixinikapiri ikara maerekaxiniretika, kotxi ikiniōtika aua ikara atoko inakari –itxa Xesosi.

7

Apōretxi Pirena

(*Arókasi 6.37-38, 41-42*)

¹ Iuaīkana Xesosi sākiraauata:

–“Kona erekari pikamakiti,” kona pitxape ātimoni, ininiākara Teoso kona txai pite: “Kona erekari pite kamakiti,” !itxai, ² kotxi Teoso misiritai pimaerekani xika, āti pite misiritini atokokana. Itene pimisiritiniāri āti imaerekani xika, itene Teoso misiritai pite, pite maerekani xika. ³ Ikara ia atoko. Pisāpiretari āti: “Aāsorō aua pōki āki,” txamari kona pimaākatari aātxirata pite oki āki auakari. Kinirepa ikara atoko inakari pikama?

⁴ !Apakata pisākire pitarimoni: “Pauiritano aāsorō pōki āki auakari ni-makātxakini.” Ikara atoko pininiā !erekari, kotxi aātxirata aua pite oki āki. ⁵ Maerekati kamakari pite, kotxi pikamakiti erekari atxiīti, txamari maerekatino pixinikakiti. Pimakatzakariko aātxirata pite oki āki auakari merepanika, ininiā eereka apakata patamatiniiri aāsorō pitari oki āki auakari pimakatzakini. Ikara oerekaua piteka maerekani auakasaaki, pitakanapariko piteka maerekani, ininiā eereka apakata pimoianatiniri āti iua maerekani itakanapini ikapani.

⁶ –Kākiti kona sikari Teoso nakiti anāpamoni, kotxi atxiīti iua anāpa kirioka, akatsata txai. Iua atokokana Teoso nakiti kona asika Teoso mapaxitakati-moni, kotxi iua anāpa atoko. Eereka iua misiritapitikai.

–Apaka kona pinoakitsa ereri kona pisika irarimoni, kotxi iua katxaritari. Iua atokanera Teoso mapaxitakanimoni kona hīsikari Teoso nakiti, kotxi eereka imisiritari Teoso nakiti noakitsatxi irari misiritini atoko –itxa Xesosi.

Kona Hītakanapapiri Teoso Himisākiretini

(*Arókasi 11.9-13*)

⁷ Iuaīkana Xesosi sākiraauata:

–Teosomoni pamanarauatakasaaki, papakapariko pinirekakiti. Pinitarauatakasaaki, papokapitikariko pinireēkiti. Ari iaxitiki pakiritiniā, iua apakapapiretai. Ia atoko itxako: “Pikanikauata. Piīroā,” itxako. ⁸ Ikinika amanarauatakari apakapariko inirekakiti. Nitarauatakari apokariko inī-takiti. Teoso akiritakari apakapaākapitikako. ⁹ Amarini amanainiāri

iri komiri, atauako kai sorokani isikatari imi? ¹⁰ Ximaki amanainiāri, atauako iminikani isikari? Konapitini. Irītxi kona kamari ikara atoko inakari. ¹¹ Kākiti maerekani apaka imarotari erekari isikini amaritenamoni. Aīri iaxitiki apiata imarotari isikiniri erekari iua anaakorimoni, ninoa amanaākasaakiri.

Āti Pitiretini Pirena

¹² —Pixinikariko. Natokopa pinirekari apanakini tiretini pite? Ininiā iua atokokana pitiretariko apanakini. Ikara atoko itxa ikinika Teoso paniātakiti aātsopaā auakari, apaka Teoso sākire sāpiretakani sāpiretakiti kitxakapirīka — itxa Xesosi.

Ipi Kimapori Pirena

(Arókasi 13.24)

¹³ Iuaīkana Xesosi sākirauata:
—Teoso tixine hīroā axapitiri ĩronakikoātaā. Mitari ĩronakikoātaā sikari sari maerekani misiritikoātaā. Iua kimapori mitari, kotxi itomaneri kākiti sari iuaā. ¹⁴ Axapitiri ĩronakikoātaā, kimapori axapitiri. Iua apo sari auapininiika inini tixinemoni. Iua kimaporiti axapitiki, kotxi poiāoka kākiti sari iua kimaporiti —itxa Xesosi.

Omina, Ori Pakini Pirena

(Arókasi 6.43-44)

¹⁵ Iuaīkana Xesosi sākirauata:
—Erepaniko. Auapitika Teoso sākire sāpiretakari, txamari iua na atāo isāpireta, kotxi isāpiretari iua sākire Teoso sākirekata. Ikoketari. Atāo inakari ikoketa maerekatikata. Erepaniko. Pamonōkoniri iua. Mapara patamatakasaakiri, soti auīte atoko itxa. Ākixiniremoni ākiti atoko itxa. ¹⁶ Pimarotari kākiti ikara atoko inakari, kotxi patamatari ninoa kamakiti maerekati. Inako mina kona iritari kīpaima. Aanaia kona iritari pama. Iua atokotxikana kākiti maerekati kamakani kona kamari erekari. ¹⁷ Ikinika aamina erekari, erekari iri. Aamina maerekati, ininiā maerekati iri. ¹⁸ Aamina erekari kona posotari maerekati iritini. Iua atokokana aamina maerekati kona posotari erekari iritini. ¹⁹ Aamina maereka iriti itoāka, arika inaāka. ²⁰ Ininiā aamina iriāra kākiti imarotari ereka inini. Iua atokokanera kākiti imarotaāka —itxa Xesosi.

Kākiti Teoso Tixine Īroākani

(Arókasi 13.25-27)

²¹ Iuaīkana Xesosi sākirauata:
—Apanakini txano nota: “Pite niauīte” inakani, ĩsapanina Teoso auītetxi ininiātaāua. Niri iaxiti auakari nireēkiti kamakarinanira sapaniko iuaā. ²² Itixi xipokini ōtisaaki, itomaneri kākiti maxikatiīka akiritano: “Pite aāuīte apiatakari. Papakapaua. Aōerekapekari pisākire apanakinimoni. Aōmitikapekari maerekati matamatakoti piuāka. Akamapekari posotiiretxi kaiōpokori,” itxanako ninoa. ²³ Txamari nitxanako: “Kona nimarotai hīte. Hīsipiniikaua. Maerekatira hīkama.” Ikara atoko nisāpiretanako ninoa, kotxi maerekati kamakani itxauana —itxa Xesosi.

Aapokotxi Kamakari

(Arókasi 6.46-49)

²⁴ Iuaīkana Xesosi sākirauata:
—Nisākire kenakotakari, nisākire nīkaenetakari, ia kiki kimaroreri atoko itxa. Ia kiki kamakasaakiri aapoko, iopitimita aapokotxi tsota. Otsomori ikama. ²⁵ Ininiā āparaā kīpakasaaki, uini apoātakasaaki, ĩtima apisatakasaaki,

aapoko kona irika, kotxi iua tsota itakapekari otsomori. Nisäkire kenakotakani nisäkire nikaenetakani, iua kiki kimaroreri atoko itxana.

²⁶ —Nisäkire kenakotakari, nisäkire miinikaenetakati, käkiti miikiteti atoko itxa. Iua kamari aapoko ikipatxiteē. ²⁷ Ikipakasaaki, uini apoatakasaaki, itima apisatakasaakiri, aapoko irika. Irika, kotxi aapokotxi ! otsomori. Poião tsoimikari. Irikasaaki, ikinika xipoka. Ikara atoko itxa nisäkire miinikaenetakati. Iua imarotapitikamari, txamari !ikamari. Ikara atoko nisäkire mapaxitakani —itxa Xesosi.

Xesosi Posotiire Pirena

²⁸ Xesosi oerekarauatini xipoka atoko, käkiti xinikari: “Paimatireri Xesosi. Iua imarotari atão.” ²⁹ Ikara atoko ixinikana, kotxi Xesosi imarotapitikari Teoso säkire oerekini. Kaposotiireri iua isäkirauatakasaaki. Kaiökatsoparerini atoko kona itxa. Ninoa kona imarotari Teoso säkire Xesosi imarotiniiri atoko.

8

Kiki Maere Matati

(*Marko 1.40-45; Arókasi 5.12-16*)

¹ Xesosi ixirata iokiriitaka atoko, itomaneri käkiti sari iua tikini. ² Iuasaaki amianatakari maere matati apoka iuamoni. Ikapotoreékaua iua apisatoō. Itxari:

—Nimarotari pinirekiniä, erekapeka pitxikitakano nota —itxa.

³ Xesosi maätakari iua. Ininiä itxa:

—Ari, ninirekapitikari. Erekapekai —itxari.

Iuasaakipeka erekapeka itxa. ⁴ Ininiä Xesosi:

—Kona ikora ! pisäpiretape apanakinimoni. Uatxa sasetotximoni pisa. Poerekaua iuamoni erekapeka pinini. Moisesini paniätakiti atoko pikama. Pikaminiäri ipaniätakiti atoko, ininiä ikinimane imarotari erekapeka pinini —itxa Xesosi.

Eereka isari Xesosi paniätakiti ikamini ikapani.

Sotato Auite Nitiri Makananitiko

(*Arókasi 7.1-10*)

⁵ Kapanaoō sitatxiti apokasaaki, sotatoakori auite sari Xesosimoni. Homano itxaua. Iua iteene amanaäri Xesosi:

⁶ —Xesosi, ninitiri iteene amianata naapoko. Ikikinanaka. !Itipokotaika. Inikoriätsiitari —itxari Xesosi.

⁷ Ininiä Xesosi:

—Iuañ nisako erekape inini ikapani —itxa Xesosi.

⁸ Ininiä iua Homano:

—Konapitini. Pite auitetxi apiatakari pitxaua. Nota poiäorino. !Apakata naapoko piirino. Pisäkirenani piokanata. Ininiä erekapeka itxako ninitiri.

⁹ Nimarotari ikaranani apakatako, kotxi nota kamari nota auite paniätakiti. Apaka sotato auite nitxaua nota. Nisäkirauatakasaaki, nisotatone kamapitikari nipaniätakiti. Nota txari: “Pisa.” Iuasaakipeka isa. Nitxari äti: “Pina.” Iuasaakipeka ina itxa. “Ia pikama,” nitxari ninitiri. Iuasaakipeka ikamari. Ininiä pisäkirenani apakatapitika —itxari Xesosi.

¹⁰ Isäkire Xesosi kenakotakasaaki, iteene ipotxitari isäkire. Iposo atoko itxa:

—Atão nitxai. Isaeo auakani poião auikari nisäkire. Ia Homano itxaua, iuaritika apiata iua auikari nota posotiire. Kona nitikapanikari käkiti Isaeo auakari auikiniri nisäkire ia kiki auikiniri atoko. ¹¹ Nota säpiretai hite, itomaneri käkiti äti uäka atokatxi pokikini tixinimoni auakani, atokatxi ereëkokini tixinimoni auakani apaka, itomaneri itixi auakani kiiniritauatako Teoso auitetxi ininiätaäua. Ninoa nipokotako anirimanekata kitxakapirika

auakanikata. Apraão, Isaki, Xakoo pakinikata inipokotana. ¹² Iuasaaki apanakini Apraão apika mekaniriakori kona sari iua Teoso kiiniritemoni, kotxi ninoa ! aukari Teoso sãkire. Piãkatximoni iokanataãkanako. Iuaã itxiapatanao, akatsakatsiriĩtauanao imisiritikona xika –itxa Xesosi sãkire.

¹³ Ininiã Xesosi txari sotatoakori auite:

–Pisa paapokomoni. Pite aukari niposotiire pinitiri erekape inini ìkapani. Uatxa auape pinirekakiti –itxa Xesosi.

Ininiã initiri iuasaakipeka erekape itxa.

Simão Petro Imakiro Makananitiko

(Marko 1.29-34; Arókasi 4.38-41)

¹⁴ Iposo atoko Xesosi sari Petro apokomoni. Iuaã apokasaaki, atamataro Petro imakiro. Osirimata nopini osiriĩkanãta. Oõpoomata. ¹⁵ Ininiã Xesosi takapiotaua ouako nopini. Iuasaakipeka apoomari xipoka. Ininiã oõkitikaua. Osikakienatana ninoa.

Xesosi Makananitana Amianatakani

¹⁶ Mapiãpeka inakasaaki, kãkiti anikana itomaneri maerekati matamatakoti auaitotakini iuamoni. Isãkireẽ omitikana maerekani matamatakoni. Imakananitana ikinikana amianatakani. ¹⁷ Ikara atoko itxa Xesosi, kotxi inirekari Isaia sãkire iaõka apokini. Kitxakapiriãka Teoso sãkire sãpiretakari Isaia inakori txari:

Iua tiretariko amianatakari. Imakatxakariko aamianare. Imakananitaua.

Iuaka atatsiirauata ate ìkapani.

Kãkiti Xesosi Imoianatinina Nireẽkani

(Arókasi 9.57-62)

¹⁸ Itomaneri kãkiti iuakata auakasaaki, Xesosi txari imoianariakori:

–Masa ipiniãmoni –itxana.

¹⁹ Iuasaakipeka ãti kaiõkatsopareri apoka Xesosimoni. Itxa:

–Koerekareri, nota iposope nisini pite nirekinimoni –itxa.

²⁰ Ininiã Xesosi:

–Atauako pinirekatari pisini notakata? Aripa aua auini iriko. Araãkani auari ikoa. Txamari notã kãkiti itari iaxitikirĩ ! auari nimakiniãtaã –itxa Xesosi.

²¹ Aטיפekana apoka Xesosimoni. Xesosi moianari iua. Itxari:

–Niauĩte, pauiritano niri nikanapanini merepanika, kotxi kiomãtxipekari iua. Eereka nisa pitekata –itxari.

Itene iua !inirekari isini Xesosikata. ²² Xesosi apakapapiretari:

–Notakata pisa uatxa. Nisãkire mauĩãkani ipikani atoko itxana. Ininiã pauiritana ipikani katiniri inirimane nisãkire mauĩãkani –itxa Xesosi.

Xesosi Iotokakiniri Ītima Pirena

(Marko 4.35-41; Arókasi 8.22-25)

²³ Iposo atoko, Xesosi imoianariakorikata iereẽtaua, ĩpiriãtinina ìkapani.

²⁴ Mokatanitika ĩtima kataparari apoãkata. Tsakati okari ãparaã kanaua ãki. Iuasaaki Xesosi imakanãta. ²⁵ Imoianariakori sari iuamoni. Ōpirĩkarina. Akiripoakatana:

–Apiananiri, ĩpauiritapiri apinini. Apinanapanoka –itxana.

²⁶ Ininiã Xesosi:

–Kinirepa hĩpĩkarauata? Poiãonoka hãuikari niposotiire –itxa.

Iposo atoko õkitikaua, pinita itxari ĩtima, tsakati pakini. Iuasaakipeka ĩtima, tsakati pakini iotoka. ²⁷ Ininiã imoianariakori tsoriãkaãta. Itxana:

–Natokopa inakaripa ia kiki? Ītima, tsakati pakini kenakotari isãkire –itxana imoianariakori.

Ipi Kiki Maerekani Matamatakoni Auaĩtotakini

(Marko 5.1-20; Arókasi 8.26-39)

²⁸ Ipinĩã apokasaakina Xerasa tōpamoni, itaōkitarina ipi kiki itomane maerekani matamatakoni auaĩtotakini. Akauariã auanãtana. Paneenamana. Ikara xika kãkiti pikari akauarimoni isinina. ²⁹ Xesosi inaãpotakasaaki, maerekani matamatakoni iĩtoãna auakani akiripoakata:

—Xesosi, Teoso ãkiri pitxaua. Kiripa pinirekaka atemoni? Pite ina uaimoni amisiritiko òti apisapanika pimisiritiniua ikapani atxiĩti? —itxarina.

³⁰ Ikara ininiãtaã takote auana itomane iriakori. Ikira atoko inipokonãtana. ³¹ Ininiã maerekani matamatakoni txari:

—Ate pomitikiniã, iriakorimoni piokanataua —itxarina.

³² Ininiã Xesosi:

—Hĩsipeka ninoamoni —itxa.

Iuasaakipeka iriakori Itoã Iroãna. Ininiã imakinikana iriakori miteẽkata. Iokiriĩkatana. Ipoamoni isana. Iuaã ikomokana, axãpoãta itxana. ³³ Ninoa iriakori nĩkatakani miteka sitatximoni. Iuaã ikinika isãpiretana irari ipinini pirena, kiki maerekani matamatakoni auaĩtotakini pirena apaka. ³⁴ Ininiã ikinimane sitatxikini sari Xesosi itaōkitinina ikapani. Iua itaōkitakasaakina, amanaãrina ninoa tixine itakanapini ikapani.

9

Matĩpokotakati Pirena

(Marko 2.1-12; Arókasi 5.17-26)

¹ Ininiã Xesosi iereẽtaua kanauaã. Ikanapiriã iua auinimoni Kapanaoõ sitatxitimoni. ² ãtikaka kikiakori minari matĩpokotakati Xesosimoni. Xesosi imarotari ninoa auikiniri iua sãkire. Ininiã itxari:

—Namarite, pipoxokoniuatako. Pimaerekani makatxakapeẽkaika —itxa.

³ Iuasaaki aua ãtikaka kaiōkatsoparerini iuaã. Ninoa ãkixinireẽ itxana:

—Kona erekari isãkire. Teosonanira posotari kãkiti maerekani imaktxakini —itxana ninoa.

⁴ Xesosi imarotari maerekati ixinikakitina ãkixinireẽna. Ininiã iua txa:

—Kinirepa hũuãkatari nisãkire maerekati inini? ⁵ Nitxari iua imaerekani nimaktxakini, txamari ! himarotari imaerekani atão nimaktxakini. “Põkitikaua. Pitĩpokota,” nininiã, himarotari nisãkire atão ininiãua, kotxi hĩtikari. Niposotiire imaerekani nimaktxakini ikapani, niposotiire iua nõkitikini ikapanitxikana. ⁶ Ininiã uatxaika noerekai hĩte, Teoso iokanatano nota hĩtari iaxitikiiri İkorapokoritimoni kãkiti maerekani nimaktxakini ikapani —itxa Xesosi.

Ininiã itxari matĩpokotakatimoni:

—Põkitikaua. Pisirimata pikoseka, sipe pitxa paapokomoni —itxa Xesosi.

⁷ Iuasaakipeka iua õkitikaua, aapokomoni sipe itxa. ⁸ Ikara inakari apanakini itikasaaki, ipĩkarauatana.

—Peerekari Teoso, kõtxi iua oerekari iposotiire kãkitimoni —itxana.

Mateo Pirena

(Marko 2.13-17; Arókasi 5.27-32)

⁹ Ikara inakari oereka atoko Xesosi sipeka. Isikasaaki, itaōkitari Mateo inakori. Auĩtetxiakori txineirote apotiĩtakari iua. Xesosi napakasaaki, iitopãkanãta txineiro apakapiniãtaã. Ininiã Xesosi txari:

—Masa notakata pimoianatinino ikapani.

Ininiã Mateo õkitikaua, Xesosikata sa itxa. ¹⁰ Eereka Xesosi imoianari-akorikata nipokota Mateo aapoko. Txineiro apotiĩtakani, apanakini kãkiti maerekati kamakani pakini apoka Xesosikata inikinina ikapani. Kãkiti

kona potxitari txineiro apotiitakani, kotxi ninoa sikaro oa txineiro āti uāka auñteakorimoni. !Neerekana ninoa. ¹¹ Pariseoakori itikari ninoa nipokotini, ininiā itxana Xesosi moianariakorimoni:

—Kinirepa hīauite nipokota txineiro apotiitakanikata, maerekanikata? — itxana.

¹² Ininiā Xesosi kenakotari ninoa sākire. Itxa:

—Maerekati kamakari amianatakari atoko itxa. Ninoa nirekari erekape ininina. Kākiti mamianatakani ! inirekari ipini sikakarimoni isinina. Amianatakaninoka nirekari ipini sikakarimoni isinina. Hīte ! inirekari nota makatxakiniri himaerekani, kotxi hīte uākatari ! auari himaerekani.

¹³ Hīxinikariko ia Teoso sākire iōkatsopatakori:

Hīsikarauata notamoni. Apiaerekata hiamonīkiniri apanakini.

Nota iua ikorapokoriti kona kākiti “atāo inakarinoa kamakarino nota” inakani iġapanini, kotxi ninoa uākatari erekarini ininiāuana, txamari kona erekana. Kākiti maerekati kamakani iġapanira nina nota uai imaerekanina itakanapinina iġapani —itxa Xesosi.

Nipokori Takanapiko Teoso Misākiretiko Iġapani

(Marko 2.18-22; Arókasi 5.33-39)

¹⁴ Eereka Xoāo kapatxisareri moianariakori apoka Xesosimoni. Itxana:

—Ate, pariseoakori pakini atakanapari anipokotini itokata Teoso amisākiretinini iġapani. Kinirepa pite moianariakori ! itakanapari inikinina Teoso imisākiretinina iġapani? —itxana.

¹⁵ Ininiā Xesosi apakapapiretana:

—Nota kiiniri kamakari atoko nitxa. Kiki nirekiniā iġanorouatini, ikamari kiiniri. Iuasaaki imoianariakori kona nirekari imatinaniuatinina, iua ninoakata auakasaaki. Ininiā kona itakanaparina inikinina Teoso imisākiretinina iġapani. Āti ōti nimaīkaākako. Nanikaākako ninoa mauakaniātaā. Iuasaakiko itakanaparina inikinina Teoso imisākiretinina iġapani —itxa Xesosi.

Mākatxi Tāpanatiko Pirena

¹⁶ —Kiomātxiakori kitxakapirīka auakani sākirekata kona hīkoketapiri nota sākire. Ikara hīkaminiā, ininiā mākatxi kitxakari amanerī hītāpanatini atoko itxa. Mākatxi kitxakari amanerī kona hītāpanatate, kotxi parokasaakiri, amanerī txikika, ininiā ikatsorākari mākatxi kitxakari. Ininiā mitari it-sorākare. Mākatxi amanerī nota oerekakiti atoko. Mākatxi kitxakari, kākiti kitxakapirīka oerekakiti atoko itxa. Hīkoketinīari kitxakapirīka oerekakiti, amanerī oerekakitikata, imakinika xipoka.

Sako Aamata Kamakori

¹⁷ —Kitxakapirīka kākiti takari iāriā sako aamata kamakori āki. Iuasaaki kona kākiti takari amanerī iāriā kitxakari mata āki, kotxi iāriā txiōkaātakasaaki, itiākaāpota. Ininiā omata kitxakari tsorakitako, kotxi paikori. Kona itiāka. Ininiā iāriā katxaka. Iāriā, aamata pakini xipoka. Amanerī matariā itakaāka iāriā amanerī. Ikara atoko ininiā, erekapitikari. Kona ixipokapaniko. Iua atokokana kona hīkoketapiriko kiomātxi kitxakapirīka oerekakiti nota oerekakitikata —itxa Xesosi sākire.

Xoteoakori Auñte Pirena

(Marko 5.21-43; Arókasi 8.40-56)

¹⁸ Xesosi sākirauatapanika, inakasaaki Xoteoakori auñte apoka iuamoni. Ikapotoreġkaua Xesosi apisatō. Itxa:

—Namarite opinanapanoka. Masa. Piuako pitaka oa nopini, ininiā kona opina —itxari Xesosi.

19 Ininiã Xesosi imoianariakorikata ôkitikaua, iuakata sa itxana.

Xesosi Māka Maātakakaro
(Mateo 9.20-22; Arókasi 8.43-48)

20 Isikasaakina, sito apoka iua porikimoni. Oamianare oārēka !iotokiniāro. Tosikanani oamianatini. Oāpokasaaki, omaātakari imāka imapotomatare.

21 Oākixinireē otxa:

—Imāka nimaātakiniã, erekape nitxako —otxa.

Ininiã otikakari imāka. 22 Iuasaakipeka Xesosi kirioka, atamata itxaro:

—Namarite, kataparaxinire pitxako. Pauikari niposotiire, ininiã erekapekai —itxaro.

Iuasaakipeka oa erekape.

Xáiro Ákero Ôkitikiko Pirena
(Marko 5.35-43; Arókasi 8.49-56)

23 Iposo atoko Xesosi sari Xoteoakori auíte aapokomoni. Iuaã apokasaaki, iĩroã. Itikari sokonaki xōkakani, itomaneri kākiti txiapatakani apaka. 24 Ininiã Xesosi:

—Mapara hīsa, kotxi oa amarini kona opina. Omakanāta —itxa Xesosi.

Ininiã ninoa napetari Xesosi:

—!Omakanāta. Opīpe. Pite !imarotari —inapetarina.

25 Ikinimane mapara isikasaakina, Xesosi sari oa ātokoromoni. Imaĩkaro ouako. Iuasaakipeka oōkitikaua. 26 Ikara ene iaripireta iua tōpa.

Xesosi Kōsiārepeka Txīkitakari Mōsiāreti

27 Iposo atoko Xesosi sipe. Iuasaaki ipi mōsiāreni sari iua tikini. Iuasaaki ninoa akiripoakata:

—Tavii apika mekanirii, piamonĩkaua ate —itxana.

28 Aapokotxi Xesosi iroākasaaki, ninoa iroã apaka. Ininiã Xesosi:

—Hāuikataru niposotiniri erekapeka nitxīkitakinii hīte? —itxa Xesosi.

Ininiã ninoa:

—Ari, Apiananiri —itxana.

29 Ininiã itakapiotaua ninoa oki nopini. Ininiã itxa:

—Ari, hāuikakiti iaōka itxako —itxa Xesosi.

30 Iuasaakipeka ninoa kōsiārepeka itxana. Ininiã Xesosi:

—Kona hīsāpiretapiri nikamakiti apanakinimoni —itxa Xesosi.

31 Eereka ninoa sipe. Txamari iaripiretarina ikamakiti ikinika iua tōpa.

Masākireti Pirena

32 Ninoa kiki potorikasaaki, masākireti anikaāka Xesosimoni. Iua kona kasākireri, maerekati matamatakoti auaītōtakiti xika. 33 Iuasaaki Xesosi omitikari iua maerekati matamatakoti. Iuasaakipeka iua kiki sākirauata. Itomaneri kākiti itikari. Iuasaakiika ninoa tikoka. Ininiã itxana:

—Ikinika Isaeo tixiniã auakani, mitxi !itikapanikari ikora atoko inakari —itxana.

34 Txamari pariseoakori txari:

—Xesosi omitikari maerekati matamatakoti Satanasi posotiireē —itxana.

Na atāo ninoa sākire.

Xesosi Ikini Sitatxiti Sini

35 Ininiã Xesosi sari ikini sitatxiti tōpa. Aapokotxi auiniātaã apaka isa. Oerekarauata aiko Xoteo apotiitiniātaāua. Isāpiretari Teoso iokanapirena erekari, Teoso auítetxi ininiãua pirena. Apaka erekapeka itxīkitakana ikinipoko amianatakani. Ikini sereti amianari aua kākitimoni. Ikinika imakananita. 36 Atamatakasaakina ninoa kākityokoni, iamoniãkana ninoa,

kotxi soti auîte minîkatakoni atoko itxana, kotxi !imarotarina isinimonina. Imaâkauana. ³⁷ Ininiâ itxari imoianariakori:

—Kaiâori kâkiti iposope auikiniri nisâkire, txamari !imarotarina nisâkire, kotxi !ikenakotapanirina. Ninoa kikiro erekari atoko itxana. Imakinika iposope iuaâ. Ininiâ iposope auikinirina nisâkire. Txamari, poiâoka parîkauatakani aua nisâkire isâpiretinina îkapani. ³⁸ Ininiâkara himisâkiretarikio Apiananiri iaxitikiri iokanatinina parîkauatakani iua sâkire auiâkani apotiitinina îkapani. Ikara atoko hîtxako Teosomoni —itxa Xesosi.

10

Xesosi Mereëna Tosi Imoianariakori (Marko 3.13-19; Arókasi 6.12-16)

¹ Xesosi mereëna tosi imoianariakori. Isikari iposotiire ninoamoni maerekati matamatakoti omitikinina îkapani. Isikari iposotiire ninoamoni amianatakani imakananitinina îkapani, îkinika amianari inokasaakina nino amianatakani. ² Naia imoianariakori uâka: Merepitipanika auari Simão Petro inakorima, apaka itari Âtree inakorima. Auari Txiakoma, apaka itari Xoâoma. Ninoa Sepeteo anaakori. ³ Auari Piripima, Patoromeoma, Tomeema. Apaka auari Mateoma, txineiro apotiitakari. Apaka âti Txiakoma, Aoepo âkiri. Aua Tateoma. ⁴ Aua Simâoma, Homano omanatakari. Apaka aua Xotasi Isikariotxi inakorima. Iua Xesosi mîkapiritakari itxaua. Ninoa Xesosi moianariakori itxauana.

Xesosi Iokanatana Imoianariakori Kâkitimoni (Marko 6.7-13; Arókasi 9.1-6)

⁵ Ininiâ Xesosi iokanatana ninoa isâkire isâpiretinina. Ia atoko ôtâkikana: —Kona hîsipeko Xoteo minakonimoni, apaka Samaria tôpa sitatxitimoni kona hîsipeko. ⁶ Hîsako kâkiti Isaeo tixinikinimoni. Hinirimanemoni, Xoteoakorimoni hîsako. Ninoa soti auîte pîpinanaâkani atoko itxana. ⁷ Hâpokasaaki kâkitimoni, hîtxariko: “Teoso ikinimane auîte ininiua manapi paîtiki apokako.” ⁸ Himakananitanako amianatakani. Maere matati erekapeka hîtxîkitakako apaka. Ipîkani hõkitikako. Homitarikiko maerekati matamatakoti kâkiti auaîtotakini. Ikara atoko hîkamako. Kona hîte îkititari Teoso hâpakapakiti îkapani. Ininiâ ikara atokokana hîtxako. Kona hinirekapiri kâkiti iiktititini hîte, hîte sikakiti îkapani. ⁹ Kona hanikapero txineiro oro kamakoro. Pirata kamakoro, âtiâo txineiro apaka, kona hanikape. ¹⁰ Uatxa hianaxititakasaaki, sako mata !hanikape. Âti himâka !hanikape. Âti hîkiti mata kona hanikape. Hîtsonere !hanikape. Kona himaâkapeua, kotxi parîkauatakani apakapariko nipokori. Hinirekakiti apokapitikako.

¹¹ —Sitatxi hâpokasaaki, hinitari kâkiti Teoso sâkire kenakotakani, hîte apakapakani. Hîkaikota ninoakata. Eereka kona hîsipe âti aapokomoni hîkaikotini îkapani. ¹² Aapokotxi âki hîiroâkasaaki, hîtxako: “Erekari Teoso sikakiti kaikotako hîtekata,” hîtxako. ¹³ Kâkiti ipoxokoniritika apakapiniâi, hîtxako: “Teoso takari erekari hîtemoni,” hîtxako. Imanirekakaniâi, hîtxariko: “Teoso kona takari erekari hîtemoni.” ¹⁴ Atxiîti aapokotxi hâpokasaaki, kâkiti iuaâtaâ !apakapai. Atxiîti !inirekarina hîsâkire, ininiâ iuasaaki hîsipeka. Hîtakanapariko iuaâtaâ. Hîpotorikasaaki, himakaxakari kipatxi hîkiti mataâ auakari. Ininiâ iuasaaki ninoa imarotari Teoso kona apokaerekatana. ¹⁵ Hîxinikariko ia nisâkire. Kâkiti misiritiko ôti apokasaaki, ninoa apiata misiritaâka. Sotoma sitatxiti auakani, Komoha sitatxiti auakani pakini misiritaâka poiâoka —itxa Xesosi.

*Misirikaretxi Pirena**(Marko 13.9-13; Arókasi 21.12-19)*¹⁶ Iuaĩkana Xesosi sákirauata:

—Erepaniko, pamonõkoniri. Híte soti auĩte atoko hĩtxa, kotxi !kaposotiirei hĩte, iuaritika niokanatai kákitimoni. Ninoa ákiti atoko, ininiã erepaniko. Ininiã kimarorei hĩtxako. Imini kimaroreri atoko hĩtxako. Ininiã maerekati ninoa auakiti kona misiritai. Iuasaakiika kamao atoko hĩtxako, kotxi kamao !misiritari kákiti.

¹⁷ —Erepaniko. Araõkire hĩtxako. Auako kákiti kinirão anikinii maxikatĩika kákiti misiritiko mereẽkanimoni. Apanakini xirokaiko hĩte maxikatĩika aiko áki Xoteo apotiitiniãtaãua. ¹⁸ Nota sáki hãuikini xika hanikaãkako auĩtetxiakorimoni himisiritiko himarotini ikapani. Ikara atoko ininiã, iuasaaki erekapitkari, kotxi hĩsãpiretariko nota sáki iuaã auakanimoni, Xoteo mikanimoni apaka.

¹⁹ —Kákiti misiritiko mereẽkarimoni hanikikosaaki, kona himaãkapeua hĩsákirauatini apisa. Teoso sikaiko hĩsãpirena tĩkane. ²⁰ Sáki retxi hĩsãpiretakiti kona hĩte sáki reni. Erekarĩ Matamatakoti, iuarako sikariko sáki retxi hĩsákirauatini ikapani iuasaaki.

²¹ —Áti õti hĩtari sikaiko hĩte homanatakinimoni okinii ikapani, kotxi hĩte auikari nota sáki. Iua atokokanerako irĩtxi sikariko imi átimoni okiniri ikapani, kotxi imi auikari nota sáki. Auako apaka imi omanatinina iri, inoro pakini, kotxi inoro, iri pakini auikari nota sáki. Iua sikanako átimoni okinina ikapani. ²² Ikinimane omanataiko hĩte nota sáki hãuikini xika, iuaritika hãuikiniãri nisáki hĩte átipirika, nimakatzakai himapinakani ikapani. ²³ Sitatxiã hãuakasaaki, himisiritkosaaki, áti sitatxitimoni himitekako. Atão nota sãpiretai hĩte. Kona hĩte xipokapaniri hĩparĩka ikini sitatxiti Isaeo tixini hĩtari iaxitikiri kanapiriini apisa —itxa Xesosi sáki.

*Apiatakari, Poiãori Pakini*²⁴ Iuaĩkana Xesosi sákirauata:

—Apaiaõkarauatakari poião. Koerekareri apiata. Apaka nitiritxi poião. Iauĩte apiata. ²⁵ Apakatapitka apaiaõkarauatakari koerekareri imarotakiti iaõka imarotini. Iua atokokanerã nitiritxi iua auĩte atoko inini. Apanakini akiritano nota “Peosepoo,” Satanasi inakori. Ininiã itakauãkatai hĩte hĩuãka apia maerekati, kotxi nota anaakorirai hĩte —itxa Xesosi.

*Kipatakori !Auari**(Arókasi 12.1-3)*

²⁶ —Ininiã kona ! hĩpĩkapena ninoa maerekati kamakani, kotxi nota kanapiriãkasaaki, kona kipatakori auapanika. Ikinika imarotaãkako.

²⁷ Hĩtemoni ikanõka nimaasakapiretakiti, ikara nisáki hãkiripoakatako aapokotxi nopini imakinika kákiti imarotiniri ikapani. Uatxa hĩtemoninani nisãpiretakiti áti õti ikinimanemoni hĩsãpiretako.

*Kipa Apĩka?**(Arókasi 12.4-7)*

²⁸ Kona hĩpĩkapena hĩito okakani, kotxi ! iposotarina hĩxinire okinina. Hĩpĩkariko Teoso, kotxi iuanokara posotari iokanatinii hĩte, hĩito, hĩxinire pakini maerekani misiritikoãtaã. Iuara hĩpĩkako.

²⁹ —Ipi kotipiriki iki poião, átika txineiro otanoka. Iuaritika hĩri iaxiti auakari tirtetana ninoa. Imauritakaniãri, kona átika ipina. ³⁰ Kipakinipa piãko pikiiã auakari aua? !Pimarotari. Teoso imarotapitikari, kotxi iteene inĩkatai, ininiãkara ! hĩpĩkarauatape. ³¹ Kotipiriki iki poião, iuaritika Teoso

tiretari kotipiriki. Ininiākara kona hīpīkarauatape. Kaiāopokori kotipiriki auiniā, iuaritika hīte īki apiata, ininiā Teoso tiretapitikai hīte –itxa Xesosi.

Xesosi Tiretakani, Xesosi Manirekakani Pakini
(Arókasi 12.8-9)

³² Xesosi sākirauatapanika:

–Apanakini apisatoō hīsāpiretiniāri: “Xesosi nakiti nitxaua nota,” iua atokokanerako nitxariko niri iaxiti auakari apisatoō: “Nota nakitipitikara iua,” nitxako –itxa Xesosi. ³³ Hīsāpiretiniāri apanakini: “Xesosi nakiti ! nitxaua nota,” iusaaki nisāpiretari niri iaxiti auakari: “Kona nota nakitini iua.”

Pinirekakiti Pirena

(Marko 8.34-35; Arókasi 12.49-53; 14.26-27)

³⁴ –Kona hīxinikapiri nota īkorapokoriti napokini neenamtxi nixipokini īkapani. Kotxi kākiti auakari nisākire, ininiā eereka apanakini omanatana. Kona neenamtxi xipokapanika, kotxi nota minari nīposotiire maerekati nixipokini īkapani. ³⁵ Nota apokini xika imi omanatana iri, inoro pakini, kotxi ninoā auakari nisākire. Tīīrotxi omanataro oimakiro, kotxi āto omanatano nota, āto tiretano nota. ³⁶ Iusaaki pinirimane pimokaiakarinarako itx-auanakō.

³⁷ –Poiāoka pitiretiniāno nota, apiata pitiretiniāna pinoro, piri pakini, kona erekari nimoianari pininiua. Apiata pitiretiniāna pamariteakori, kona erekari nimoianari pininiua. ³⁸ Nota kinirāo moianatana hinakasaaki, notakata hīsa. Himamīteenekakanisaakiri himisiritiko nota īkapani, ininiā ! apakata himoianatinino. ³⁹ –Pite ātipirika kaminiāri piteka nireēkitinoka, ininiā pinireēkiti xipokapitikako pitekata. Pite nireēkiti xipokiniā, nota sākire pauikini xika, pite auapininika txako Teosokata –itxa Xesosi.

Hīte Apakapakani Pirena

(Marko 9.41)

⁴⁰ Iuaīkana Xesosi sākirauata:

–Kākiti hīte apakapakani, apakapano nota apaka. Nota apakapakari apakapari nota iokanatakari apaka. ⁴¹ Papakapiniāri Teoso sākire sāpiretakari, kotxi iua sāpiretari Teoso sākire, ininiā papakapari erekari Teoso sikakiti iua apakapakiti iaōka. Papakapiniāri atāo inakari kamakari, kotxi iua kamari atāo inakari, ininiā papakapari erekari Teoso sikakiti iua apakapakiti iaōka. ⁴² Pisikiniāri āparaā nimoianari poiāorimoni iātini īkapani, kotxi nimoianari itxaua, Teoso iūkitxitapitikai pite –itxa Xesosi.

11

Xoāo Kapatxisareri Tikini Sikani

(Arókasi 7.18-35)

¹ Xesosi moianariakori tosi pakini isākire oerekini xipoka atoko, Xesosi sipe. Isa āti sitatxitimoni, eereka āti sitatxitimoni Kariréia tōpa itxaāpota oerekarauatakasaaki. Teoso sākire isāpiretari kākiti.

² Xoāo kapatxisareri, kateia āki auakasaaki, ikenakoenetari Xesosi kamakiti, ininiā iokanataro ipi imoianariakori Xesosimonikari.

³ Ininiā Xoāo txari imoianariakori:

–Hīpimaāri Xesosi: “Pitekani iaxiti īkari, kākiti iātapakiti pitxataua? Ātikani atxiūti aiātapakiti pitxataua?” hītxariko –itxa Xoāo.

Ininiā ninoā sipe. Ipimaārīna Xesosi Xoāo sākire iaōka. ⁴ Ininiā Xesosi apakapapiretana:

—Hīkanapiriā Xoõomoni. Hīsāpiretari hīkenakotakiti, hātamatakiti pakini. ⁵ Hīte atamatapekari mōsiāreti kōsiārepeka inini. Matīpokotakati tīpokotapeka. Hātamatapekari maere matati erekapeka inini. Makenakokiti kakenakokipeka. Ipīkani ōkitikapekaua. Teoso iokanapirena erekari sāpiretapekaika minakati mauapikinitinimoni. Pakini hātamatapeka. Ikara hīsāpiretako Xoõomoni. ⁶ Kākiti iteene auikiniāri nota sākire, Teoso takari erekari iuamoni. Ikara nisākire hīsāpiretari Xoõo —itxa Xesosi.

⁷ Ininiā ninoa sipe. Isikasaakina, Xesosi sāpiretari Xoõo pirena itomaneri kākitimoni. Ia atoko itxa:

—Kipa ikai hīte, Xoõo kapatxisarerimoni hīsikasaaki, āparaā makipakaniātaā iua auakasaaki? Hīte sari iuamoni, kotxi ātitxika isākire aua. Teoso sākirenoka isāpireta. Ītima āpokaxitikaasaaki, katsotati ipinimoni ipapīka, iuaikana ipinimoni ipapīka inini atoko kākiti, kotxi isākire kita āti, isākire uatxa ātiāo, isākire katana iuaikana ātiāo, itxaāpota isākire. Ikara atoko litxa Xoõo.

⁸ —Kipa ikai hīte Xoõomoni hīsikasaaki? Hīte sari iuamoni, kotxi !inirekari tiitxi, txineiro pakini. !Kakaroneri imāka, kotxi !ikaikota auitexi aapoko. Auitexi aapoko peereri mākatxi.

⁹ —Kipa ikai hīte iuamoni hīsikasaaki? Hīte sari iuamoni, kotxi iua Teoso sākire sāpiretakari itxaua. Atāopitika Teoso sākire sāpiretakari itxaua. Iua Xoõo Teoso sākire sāpiretakari apiari.

¹⁰ —Teoso sākire iōkatsopatakori kitxakapirīka txari:

Niokanatariko nisākire sāpiretakari kākitimoni pite apisa, papokini isāpiretini ikapani, kākiti iposope inini ikapani.

¹¹ Atāopitikara. Ikinimane sauaki Xoõo kapatxisareri apiatakari itxaua. Iuaritika Teoso auitetakari poiāori inakari apia imarotariko Teoso kamakiti tīkane. ¹² Xoõo auakasaaki Teoso auitetakani misiritaāka, kotxi kākiti kaneenamari naiatana ninoa. Ninoa nirekari ixipokinirina Teoso auitexi ininiua ikorapokoriti. Uatxapiima auapanika ikara atoko inakari. ¹³ Xoõo apokini apisapanika, ikinika Teoso sākire sāpiretakani, ikinika Teoso sākire iōkatsopatakani, sāpiretari Teoso auitexi ininiua pirena. Xoõo apokasaaki, iua apaka oerekari Teoso auitexi ininiua pirena.

¹⁴ —Kitxakapirīka Teoso sākire sāpiretakani sāpiretaua:

Āti Teoso sākire sāpiretakari Eriasi atoko inakari apokako, itxana. Iuakara Xoõo. Hāuikiniāri nisākire, hāuikariko iuara apokaheka.

¹⁵ Kakenakokii, ininiā hīkenakotariko nisākire —itxa Xesosi.

¹⁶ —Kanatokopa itxa kākiti ikorasaaki auakani? Amarini sarauatini atoko itxana ikorasaaki auakani. Ninoa amarini topāka tiitxi amotikoātaā. Apanakini amarini txitana apanakini amarini. Itxana: ¹⁷ “Ate xikarauata hīte serenini ikapani, txamari !hīserena. Kākiti pīkasaaki xikariti axikareta, txamari !hītxiapata.” Ninoa amarini sarauatini atoko itxana ikorasaaki auakani, ¹⁸ kotxi Xoõo kapatxisareri apoka ikorapokoriti. Itakanapari inikini Teoso imisākiretini ikapani. !Iātari ovaā. Iuaritika hīte txari: “Maerekati mata-matakoti auāitotari Xoõo,” hītxari. ¹⁹ Nota hītari iaxitikiri apoka ikorapokoriti. ! Nitakanapari ninikini. Ikiniōtika ninipokota. Niātari ovaā. Ininiā hīte txari: “Iua kiki ixori. Poātakari iua. Iua moianatana txineiro apakapakani, kākiti maerekati kamakani,” himisākirepirenātano. Kimaroreri atāo inakari kamari erekarinani. Kākiti atamatakasaakiri ikamakiti, imarotari kimaroreri atāo inakari ininiua —itxa Xesosi.

*Sitatxi Auakani Teoso Sākire Mauiākani
(Arókasi 10.13-15)*

²⁰ Ininiã Xesosi pinitana Korasiĩ sitatxiti auakani, Petsáita sitatxiti auakani pakini, kotxi kaláopokori iposotiire ikamapeka iuaátaã, iuaritika kona itakanaparina maerekati. ²¹ Xesosi txana ninoa:

—Kákiti Korasiĩ auakani himisiritaãkako. Kákiti Petsáita auakani híte apaka misiritaãkako. Kitxakapiríka Txiro, Sitoõ pakini sitatxitikini kamari maerekati, ininiã Teoso xipokana ninoa arikatxiã. Ninoa atamataãkamariko nota posotiire híte atamafiniri atokokana, ininiã ninoa mákatarariko sako mata. Itakamariko atapani iitoãna. Ikara atoko ininiã, ninoa oerekari maerekati itakanapinina. ²² Nisápiretai híte ia: “Kákiti misiritiko õtisaaki, Txirokini, Sitoõkini pakini misiritaãka poião. Híte apiata.” ²³ Híte Kapanaoõkinipekana, Teoso ákiri aua hítekata. Híte itikapekari ito posotiiretxi iaxitikiri. Txamari hókakatapeëkako maerekani misiritikoãtaã. Nikamakiti hítemoni Sotoma auakani sauaki nikamaãkamako, kona ninoa xipokamako. Auapanikamanako. ²⁴ Ininiã nitxai híte: “Himisiritikosaaki, apiata himisiritiãka. Poiãoka Sotomakini misiritaãka,” —itxa Xesosi.

Teoso Imarore Apakapakani

(Arókasi 10.21-22)

²⁵ Iuusaaki Xesosi misákiretari iri:

—Niri, pitixine auakani auíte pitxaua. Uai ikini itixiti auakani auíte apaka pitxaua. Peerekai pite, kotxi na poerekari pimarore kákiti kimarorerinimoni, iuikakanimoni. Pite oerekari pimarore kákiti poiãorinimoni, miuikakanimoni. ²⁶ Ari niri, ikara atoko pinireka. Ikara atoko papokaerekata —itxari iri.

²⁷ Eereka imisákiretari kákiti:

—Niri sikapekano ikinika. Kákiti !imarotano nota Teoso ákiri nininiua. Nirinokara atão imarotano nota. Apaka kákiti na atão imarotari niri. Notanokara imarotari niri, kotxi iua ákiri nitxaua. Kákiti nirekiniãri imarotiniri niri, nota oerekari niri iuamoni.

²⁸ —Iteene minari atoko itxa himaerekani. Hinireka hítakanapiniri iua, txama !hiposota hítakanapiniri. Hísápakiniã himaerekani xika, hina notamoni hítomatini íkapani. Iuusaaki nimakatzakari himaerekani. ²⁹ Hítakariko nipaniãtakiti hákixinireë. Hápaiaõkariko nota pirena. Erekapitikari hápaiaõkiniri ninirekakiti, kotxi kona kaneenamano. Kona nota napetari kákiti. Niuikiniua ! auari. Ikara atoko ininiã, híxinire tomatapitika.

³⁰ Híposotapitikari nipaniãtakiti híkamini, notakata híparíkautiniã. Nipaniãtakiti !kasápaniri. Kona kamimari. Peerekari nipaniãtakiti —itxa Xesosi.

12

Tomatiko Õti Pirena

(Marko 2.23-28; Arókasi 6.1-5)

¹ Mapaõti atoko tomatiko õtisaaki, Xesosi imoianariakorikata napaãpota triko takikoãtaã. Inatxitana. Inapaãpotakasaakina, imakatzakarona triko iki mapaki inikinirona íkapani. ² Pariseoakori ikara itikasaaki, itxarina Xesosi: —Patamata. Pimoianariakori kamari ate mauritakiniti. Ninoa paríkauata tomatiko õtisaaki —itxana.

³ Ininiã Xesosi:

—Atxiiti kona hátatsopatapanikari Taviini kamakiti imoianariakorikata kitxakapiríka inatxitakasaakina? ⁴ Iua íroã Teoso misákiretikoãtaã. Imoianariakorikata inikari komiri Teosomoni sikakori. Sasetotxinokara auiritaãka iua komiri inikinina. Apanakini !auiritaãka inikiniri. Iuaritika ninoa sasetotxiakori tiretari Taviini, imoianariakori pakini inatxitakasaakina. ⁵ Atxiiti

kona hātatsopatapanikari Moisesini iōkatsopatakiti. Iua auiritari sasetotxi parīkauatini tomatiko ōtisaaki, Teoso misākiretiko aikotiā. Iuasaaki ninoa ! ikamari maerekati, kotxi iparīkauatana Teoso misākiretiko aikotiā. ⁶ Atāo nisāpiretai, hīte paniātakiti poiāori. Nota paniātakiti apiari. ⁷ Teoso sākire iteene hāuikasaaki, kona hāpoitana kākiti maxikatiika, kotxi Teoso sākire txari: Nota nirekari apanakini hītiretini. Pimatiretakanisaakiri āti, !apakata pisikarautini notamoni. Iuasaaki kona ninirekari pisikakiti, itxa Teoso kitxakapirīka.

⁸ —Nota hītari iaxitikiri posotari ikinipoko ninireēkiti nikamini tomatiko ōtisaaki, kotxi Apiananiri nitxaua —itxa Xesosi.

*Motīkauakotakari Pirena
(Marko 3.1-6; Arókasi 6.6-11)*

⁹ Xesosi ikara inaāka atoko, isa aiko Xoteoakori apotiitiniātaāua. ¹⁰ Iuaā aua kiki motīkauakotakari. Iuaā aua apaka pariseoakori Xesosi kinirāo apoītaka inakani tomatiko ōtisaaki iparīkauatini xika. Ninoa amanaāri Xesosi:

—Atauako apakata atxiiti tomatiko ōtisaaki, erekape pitxīkitakiniri kākiti? — itxarina.

¹¹ Ininiā Xesosi pimaāna:

—Hīpira soti auīte tomatiko ōtisaaki aariko āki irikiniā, himaktxakatari? Atāopitikara Teoso sākire auiritapitikari kākiti maktxakiniri ipira tomatiko ōtisaaki. ¹² Soti auīte poiāori, kākiti apiari. Ininiā Teoso sākire auiritapitikari tomatiko ōti erekape nitxīkitakiniri kākiti —itxa Xesosi.

¹³ Ininiā itxari kiki motīkauakotakarimoni:

—Poerekauakotauako —itxa.

Oerekauakotakasaakia, erekapeka itxa, ipini uako atokopeka itxa.

¹⁴ Iuasaaki pariseoakori sipeka atoko, ninoakakarika misākiretakakauana:

—Natokopa atxtari Xesosi aōkini? —itxakakana.

Nitiritxi Teoso Mereēkiti

¹⁵ Xesosi imarotakasaakiri ninoa okaenetiniri iua, iuasaakipeka Xesosi sipeka. Itomaneri kākiti sa iuakata. Ikinika amianatani erekapeka itxīkitaka. ¹⁶ Xesosi ! auiritana isāpiretinirina ikamakiti apanakinimoni.

¹⁷ Ikara atoko itxa Xesosi, Teoso sākire sāpiretakari Isaia inakori sāpiretakiti iaōka apokini ikapani. Ia atoko itxa Teoso Isaiaamoni:

¹⁸ Ia ninitiri nimereēkiti. Ia nitiretakiti napokaerekatakiti. Nota sikariko Erekarī Matamatakoti iuamoni. Iua sāpiretariko nota sākire Xoteo minakonimoni.

¹⁹ !Katapasākireri ahoa kimaporiti itiniāpo isākirauatakasaaki. !Ineenamauata. !Itxitakaka apanakinikata kākiti napiniātaā.

²⁰ Apanakini Teoso sākire auīakani oiōkapeta ākixinireēna. Itapara ! auri. Ninoa aanaia katxitoākori atoko itxana. Iuaritika kona imapirinikari iua aanaia katxitoākori. Iua atokokana kona ixipokari iua sākire auīakani mataparani. Itiretana. Apanakini Teoso sākire auīakani, kona iteene auikari Teoso sākire. Ininiā ninoa tirikapi iopinikare xapitikiri atoko itxana, iuaritika kona iua oakari. Iua atokokana kona ixipokana Teoso sākire auīakani. Ikamaāpotari erekari, erekarinoka kāiatini ikapani.

²¹ Xoteo minakanuia auikariko iua sākire. Itxa Isaia sāpirena kitxakapirīka.

*Maerekani Matamatakoni Omitikiko
(Marko 3.20-30; Arókasi 11.14-23)*

²² Iuasaaki kākiti anikari kiki maerekati matamatakoti auaītotakiti Xesosi-moni. ! Isākirauata. Mōsiāreti itxaua iua, maerekati matamatakoti xika. Xesosi erekapeka txīkitakari iua. Iuasaaki kōsiārepeka, kasākirepeka itxa.

²³ Iuasaaki kaiōpokori kākiti iuaā tsorīkaāta. Ininiā ipimaākakauana:

—Atuauko ia kiki aūite Taviini apika mekanirikani? Atxiiti Teoso iokanatakitikani? —itxana.

²⁴ Pariseoakori ikara ikenakotakasaakina:

—Konapitini. Maerekati matamatakoti aūite Peosepoo inakori sikari iposotiire Xesosi-moni maerekati matamatakoti omitikini ikapani —itxana pariseoakori.

²⁵ Xesosi imarotari ikara ixinikakitina. Ininiā itxa Xesosi:

—Kākiti tixine auakani ninoakakarika inaiatakakiniāuana, ixipokakakauana. Iarikapenako. Iua atokokana kākiti aapokoā auakani inaiatakakiniāuana, ixipokakakauanako. ²⁶ Iua atokokana Satanasi nitiriakori, ninoakakarika inaiatakakiniāuana, ixipokoko Satanasi tapara.

²⁷ Hīte sākire, Peosepoo sikari iposotiire notamoni maerekati matamatakoti nomitikini ikapani. Ininiā nota pimaāi: “Kipa sikari posotiiretxi hīte moianariakorimoni, maerekati matamatakoti omitikinina ikapani?” Himoianariakori sāpiretai: “Teosonoka sikari posotiiretxi maerekati matamatakoti omitikakanimoni.” ²⁸ Teoso posotiireē nomitikari maerekani matamatakoni. Ikara atoko ininiā, Teoso oerekai iua apokapeka hītemoni hīaūite inini ikapani.

²⁹ —Kiki pataparari iua aapoko auiniā, kona kiītiriri Īroā Ītiriatini ikapani. Kiītiriri iaxirikiniāri iua kiki pataparari, iuasaakiua apakata Ītirikiniri itii.

³⁰ —Notakata maparīkauatakani omanatano nota. Imamoianatakaniāno, inirekari niparīka ixipokini. ³¹ —Ininiā nisāpiretai. Apakata Teoso makatxakiniri ikinipoko maerekati kākiti kamakiti, imaerekani Teoso imisākirepiretini pakini. Txamari Erekarī Matamatakoti misākirepiretakari maerekani makatxakiko kona auari. ³² Kākiti misākirepiretiniāno nota hītari iaxitikiri, eereka amanainiāri Teoso ikara imaerekani imakatxakini, ininiā Teoso makatxakapitikari. Kākiti misākirepiretiniāri Erekarī Matamatakoti, ! kimakatxakikori ikara maerekati ikamakiti —itxa Xesosi.

Aamina Iri Pirena

(Arókasi 6.43-45)

³³ Ininiā Xesosi sākirauata iuaīkana pariseoakorimoni:

—Aamina atoko hītxa. Aamina erekari ininiā, iri erekari apaka. Aamina maerekati ininiā, iri apaka ! erekari. Patamatiniāri amātiiri, pimarotari imina. ³⁴ Nimarotai hīte. Imini katiiri atoko hītxaua hīte. Hīte maerekati kamakanii. Ininiā !hīposotari erekari hīsāpiretini, kotxi hākixinire ! erekari. Hinamaā hīsāpiretakiti hākixinireē potoriākari itxaua. ³⁵ Kākiti erekari ininiā, erekarinoka isākire, kotxi iua ākixinireē erekarinoka aua. Kākiti maerekati ininiā, isākire maerekati apaka, kotxi maerekatinoka auari iua ākixinireē. ³⁶ Atāo nisāpiretai hīte. Ikinipoko kākiti sākire Teoso atamakaerekata xipokatxi ōtisaaki. Iuasaaki Teoso mereēri kākiti misiritiko. Maxikatūka hīsāpiretakiti kona apakata. Kona iua potxitari. Ininiā iuasaaki iua pimaāi: “Kinirepa ikara atoko pisākire?” itxako. ³⁷ Pisākire ereka ininiā, ixika ! auari Teoso misiritinii. Pisākire maerekati ininiā, pisākire maerekati xika Teoso misiritai —itxa Xesosi.

Pariseoakori Nirekari Xesosi Oerekiniri Iposotiire

(Marko 8.11-12; Arókasi 11.29-32)

³⁸ Ātikaka kaiōkatsoparerini, pariseoakori pakini txari:

—Koerekareri, takaõtxikari Teoso posotiire poerekaua ate, aãtamatiniri ìkapani, Teoso iokanatinii ìkorapokoriti aimarotini ìkapani —itxarina.

³⁹ Xesosi apakapapiretana:

—Kãkiti uatxarini !erekana. Itakanaparina Teoso. Hïte nirekari no-erekini Teoso takaõtxikare, iposotiire. Konapitini. Kona noerekai hïte. Kitxakapirika Teoso sãkire sãpiretakari Xonasini inakori auakasaaki, Teoso kamari posotiretxi. Ikara atoko inakari posotiretxi Xonasini auakasaaki, iuaïkana ikamapanikariko. Iua posotiretxi Teoso takaõtxikare itxapanikaua hïte ìkapani. Iua takaõtxikarinoka Teoso takaõtxikare hïte ìkapani. ⁴⁰ Xonasi kaikota ximaki mitari tikako ãki ipi ãti pakini õti. Iua atokokanerako hïtari iaxitikiri napako ipi ãti pakini õti ipïkanã auiniãtaã.

⁴¹ —Itixi xipokini õtisaaki, kãkiti Nïnivi sitatxiti auakani sãkirauatapitikako. Ninoa txai hïte: “Kona erekai hïte, kotxi ! hïtakanapari himaerekani. Ate takanapari amaerekani Xonasi sãkire akenakotakasaaki,” itxanako ninoa. Uatxa uai aua hïte apisatoõ Xonasi apiatakari. Imisãkiretai hïte, iuaritika kona !hïtakanapari himaerekani.

⁴² —Xipokatxi õtisaaki, sito Sapaa auakani auïte sãkirauatapitikako. Oa õtakoxiti auakaro, iuaritika osari Saromãomoni imaire okenakotini ìkapani. Uatxa apopeka Saromão apiatakari, iuaritika hïte !auikari nota sãkire —itxa Xesosi.

Maerekati Matamatakoti Kanapiriini Pirena

(Arókasi 11.24-26)

⁴³ Iuaïkana Xesosi sãkirauata:

—Maerekati matamatakoti kiki auaïtotakiti takanapakasaakiri iua kiki, iua maerekati matamatakoti saãpota ãparaã makipakaniãtaã, ikaikotiniãtaã inii-tini ìkapani, txamari !apokari. ⁴⁴ Ininiã itxa: “Nikanapiriãpiriko mitxi nauinimoni nipotorikinimonikari,” itxa iua maerekati matamatakoti. Ininiã ikanapiriã. Apokasaaki, ãti iuaã auakari !auari. Oeretapeëkaika. Iposope ãti auini ìkapani. ⁴⁵ Ininiã apana apikomoni setxi pakini maerekani matamatakoni apia maerekanitakani. Imakinikana aua iua kiki itoã. Ininiã iua kiki mitxi poiãoka imaerekani, eereka apia maerekanita. Ikara atoko itxako kãkiti uatxarini maerekani —itxa Xesosi.

Xesosi Inoro, Itariakori Pakini

(Marko 3.31-35; Arókasi 8.19-21)

⁴⁶ Xesosi sãkirauata itomane kãkitimoni, inakasaaki oãpoka inoro, itariakorikata. Iporikiti auana. Ipïkapiretarina. ⁴⁷ Ininiã ãti txari Xesosi:

—Pinoro, pitariakori kïraã iporikiti auana. Inirekakarina imisãkiretinii pite —itxa.

⁴⁸ Ininiã Xesosi:

—Keropa ninoro? Kiripa nitariakori? —itxa Xesosi.

⁴⁹ Ininiã imioakari imoianariakori:

—Hãtamata. Uai aua ninoro, nitariakori pakini. ⁵⁰ Niri iaxitikiri nirekaãkiti kamakanira, ninoara nitariakori, nitaroakoro, ninoro txaua —itxa Xesosi.

13

Katakareri Pirena

(Marko 4.1-9; Arókasi 8.4-8)

¹ Iua õtisaaki Xesosi takanapari iua aapokotxi. Ipoa tiniã isa. Iuaã ipoa tiniã iitopãka. ² Iuaã auana itomaneri kãkiti. Apotiitauana iua takote. Ininiã kanaua ãki iereëtaua, topãka itxa oerekarauatini ìkapani. Ninoa kaikota imiriã. ³ Ininiã itori sãpirenatxi atão inakari oerekiko isãpiretana ninoa Teoso imarotinina ìkapani.

Ia atoko itxa:

–Katakareri potorika itakarauatini ikapani. ⁴ Takari iki itakaāpotakasaaki, okaāpotakasaaki, ātikaka irika kimapori tiniāpo. Kotipiriki apoka. Inikari imakinika. ⁵ Apanakini irika kai auiniātaā. Poiāoka kipatxi auari, ininiā mokatanitika ipitxaka. ⁶ Txamari, atokatxi papatakari inakasaaki, arikari iua takari. Otxiaroka, kotxi kona kakotsari. ⁷ Apanakinipekana irika aanaia auiniātaā. Ininiā aanaia aneē takari takote. Aāpitsa iapinokari takari, oka txari. ⁸ Apanakinipekana irika kipatxi erekariātaā. Ininiā iriuata. Ātiātaā āti takari iriuata seī oki pakini. Ātiātaā takari iriuata sesēta oki pakini. Ātiātaā āti takari iriuata trīta oki pakini. ⁹ Kakenakokii, ininiā hīkenakotariko nisākire –itxa Xesosi.

Kākiti Mimarotakiniti Xesosi Sāpiretini Pirena

(Marko 4.10-12; Arókasi 8.9-10)

¹⁰ Imoianariakori apoka Xesosimoni. Ipimaārina:

–Kinirepa sāpirenatxi atāo inakari oerekiko pisāpiretari kākiti? –itxarina.

¹¹ Ininiā Xesosi:

–Kākiti xinikiniāri Teoso auītetxi ininiāua pirena, auapitika kaiāopokori nīnoa mimarotakiniti, kotxi Teoso kona oerekana nīnoa. Teoso oerekai hīte nīnoa mimarotakiniti. ¹² Teoso sākire auakiti, iua sākire kīpitakari, Teoso sikari apikomoni imaroretxi iuamoni. Txamari Teoso sākire kenakotakari, isākire makīpitakati, imarore xapiti iuamoni auakari makatxakaākako. ¹³ Nisākirauatakasaaki kākitikata, nisāpiretana sāpirenatxi atāo inakari oerekiko, kotxi kokiri kākiti, iuaritika ! atamatari Teoso kamakiti. Kakenakokiri kākiti, iuaritika ! imarotari Teoso sākire. ¹⁴ Ininiā apokapeka Isaia sākire kitxakapirīka, kotxi iua sāpiretari Teoso sākire:

Hīkenakotapiikamari nisākire, iuaritika ! himarotari. Hītikapiikamari nikamakiti, iuaritika ! himarotari,

¹⁵ kotxi ! hinirekari himarotiniri atāo inakari. ! Hinirekaikari nisākire hīkenakotini. ! Hinirekaikari nikamakiti hātamatini. Hinirekaākamari, hātamatamariko nikamakiti. Hinirekaākamari, hīkenakotamariko nisākire. Hinirekaākamari, himarotamariko nisākire. Hīkanapiriaākamako notamoni, nimakatzakamariko himaerekani,

itxa Teoso.

¹⁶ –Hītepekana, Teoso sikari erekari hītemoni, kotxi hōki atamatapitikari iua kamakiti. Hīkenakoki kenakotapitikari iua sākire. ¹⁷ Atāo nisāpiretai. Itomaneri Teoso sākire sāpiretakani, apanakini kiki atāo inakari kamakani pakini kitxakapirīka nirekari atamatini hīte atamatakiti, txamari kona atamatarina. Inirekarina ikenakotinirina hīte kenakotakiti, txamari kona ikenakotarina –itxa Xesosi.

Katakareri Pirena Oerekiko

(Marko 4.13-20; Arókasi 8.11-15)

¹⁸ Xesosi sākirauanātapanika:

–Hītakaōtxikari ikara sāpirenatxi atāo inakari oerekiko, katakareri pirena. Noerekai ikara. ¹⁹ Kākiti kenakotakasaakiri Teoso auītetxi ininiua pirena, imarotakaniāri ikenakotakiti, kimapori kākiti katxaratakiti ikotaxiti atoko itxa iua ākixinire, kotxi Satanasī apoka iuamoni. Imakatzakari Teoso sākire iua ākixinireē apokakari. Teoso sākire takariki atoko itxa.

²⁰ –Takariki kai auiniātaā iriākari, Teoso sākire ipoxokoniritika apakapari atoko itxa. ²¹ Itxama kona okanani aua, kotxi kona kakotsari. Omanatiko inakasaaki, inapetiko inakasaaki, Teoso sākire auikini xika, itakanapari Teoso sākire auikini.

²² —Āti kăkitipekana kenakotari Teoso săkire, txamari ixinikapikari tiitxi, nipokori, iparika pakini. Ikinipoko ixinikapika, ininiă maerekaxiniretinoka itxa. Txineiro ipotxitini xika !inirekaikari Teoso săkire. Takariki aanaia auiniătaă iriăkari atoko itxa iua. Takari mariti atoko itxa iua ākixinire.

²³ —Āti kăkitipekana ikenakotakasaakiri Teoso săkire, atăo iua auikari. Iua ākixinire kipatxi erekari atoko itxa. Takari mininiua atoko, iua kăkiti minari atxiiti sei pakini kăkiti Teosomoni isăkire auikinina ikapani. Atxiiti iminari seŝeta pakini kăkiti. Atxiiti iminari trita pakini kăkiti Teosomoni isăkire auikinina ikapani —itxa Xesosi.

Katsotati Ahoisi Atoko Inakaro

²⁴ Iuaikana Xesosi săpiretari āti săpirenatxi atăo inakari oerekiko. Ininiă ia atoko itxa:

—Teoso auitexi ininiua ia atoko itxa. Teoso katakareri atoko itxa. Iua katakareri takari erekari takariki ikikioteē. ²⁵ Āti İkanōkati ikinimane imakasaaki, imokaiakari apoka. Itakaro katsotati ahoisi atoko inakaro ahoisi sauaki. Kona !otxa. İposo atoko İkorape itxa. ²⁶ Takari aneēka atoko, oriua. İuasaaki kăkiti imarotapekari katsotati ahoisi atoko inakaro auapeka. Kona otxa. ²⁷ Ininiă katakareri nitiriakori apoka iauitemonina. “Auitexi, pite takaro takariki erekaro. Nanipa oina katsotati?” itxana ninoa.

²⁸ —“Amokaiakari takari,” itxa.

—“Pinirekatari amaporokiniri?” itxana initiriakori.

²⁹ —“Kona. Katsotati himaporokiniă, atxiiti himaporokaro nitakare apaka.

³⁰ Hĭtakanapari imakinika aneinina ikapani. Oamikosaakirako, omaktx-akaăka. Ininiă iuasaakiko nipaniătaiko hĭte: ‘Merepanika himaktxakaroko katsotati. Hăpotiitaro. Xaminamoni oka inaăkako. İposo atoko hăpotiitari ahoisi. Hĭtakari nikiena nĭkatiko aikoti āki.’”

Mostata Pirena

(Marko 4.30-32; Arókasi 13.18-19)

³¹ Iuaikana Xesosi oerekari āti săpirenatxi atăo inakari oerekiko. Ininiă ia atoko itxa:

—Teoso auitexi ininiua, kiki takiniro mostata iki ikikioteē atoko itxa.

³² Mostata iki axapitiki. Apanakini takariki apiata, iuaritika oaneēka atoko amananiikaro. Aamina otxaua. Ininiă kotipiriki ina. İkamari ikoa okatiă —itxa Xesosi.

Tirekakari Pani

(Arókasi 13.20-21)

³³ Xesosi iuaikana săpiretari săpirenatxi atăo inakari oerekiko. Ininiă ia atoko itxa Xesosi:

—Teoso auitexi ininiătaăua İkorapokoriti ia atokokana itxa. Sito kosekari tirekakari pani. Okoketari axapiti tirekakari pani kaiăopokori triko panikata, âparaăkata. Eereka ikinika ipe tirekaăpota otxa.

Săkiretxi Atăo Inakari Oerekiko

(Marko 4.33-34)

³⁴ Xesosi săkirauatakasaaki kăkitikata, isăpiretari săpirenatxi atăo inakari oerekiko. İkara săpirenatxinokara isăpiretari kăkiti. ³⁵ Ininiă kitxakapirika Teoso săkire săpiretakari săpiretakiti apokapeka, kotxi iua txari:

Nisăkirauatakasaaki kăkitikata, nisăpiretari săpirenatxi atăo inakari oerekiko.

İtixi kamikosaakipanika aua kăkiti mimarotakiniti. İkara noerekako kăkitimoni, itxa Teoso săkire.

Xesosi Săpiretari Katsotati Pirena

³⁶ Eereka Xesosi takanapana ninoa kăkitipokoni. Iiroã aapokotxi. Imoianariakori apoka iuamoni. Itxana:

—Poerekaua ate ikara sâpirenatxi atăo inakari oerekiko, katsotati pirena, mixikanani pisâpiretakiti. Ate !imarotari —itxana.

³⁷ Ininiã Xesosi:

—Hĭtari iaxitikiri, iua erekari oki taăkari itxaua. ³⁸ Itixi iua kikiio atoko itxa. Teoso auĭtetakani takariki erekari atoko itxana. Kăkiti Satanasi nakiĭiakori iua katsotati atoko itxana. ³⁹ Katsotati takakari Teoso nakitiakori mokaikari itxaua. Satanasi itxaua. Itixi xipokini ôti iua takari amiko ôti atoko itxa. Teoso nitiriakori iaxitikini ninoa takari amakani atoko itxana. ⁴⁰ Iua katsotati apotiitaăka, xaminamoni oka inaăka. Iua atokotxikana inaăka itixi xipokini ôti. ⁴¹ Hĭtari iaxitikiri iokanatanako inĭtiriakori itiximoni. Apotiitarinako maerekati oerekakani. Apotiitarinako ikinimane maerekati kamakani. ⁴² Iposo atoko Teoso nitiriakori okana ninoa xaminamoni. Iuaă iteene itxiapatana. Akatsatsiriĭtuana. ⁴³ Iuusaaki atăo inakarınoka kamakani aua iotximereena Teoso auĭtetxi ininiãtaăua. Atokatxi iotximere atoko itxa ninoa iotximere. Kakenakokii, ininiã hĭkenakotariko nisăkire —itxa Xesosi.

Txineiro Kipatakoru Pirena

⁴⁴ —Teoso auĭtetxi ininiua, txineiro itomanero kipatakoru atoko itxa. Oa txineiro kipataăka kikiio. Āti ôti kiki napaăpotakasaaki, apokaro, ininiã iuaĭkana ikipataro. Iteene ipoxokoniuaata, ininiã ivĕtxitari ikinika itii, iua kikiio iamotini ĭkapani. Eereka sa itxa iua kikiio iamotini ĭkapani. Ikara atoko itxa Teoso auĭtetxi ininiua.

Pĕrora Inakori Pirena

⁴⁵ —Teoso auĭtetxi ininiua, pĕrora iamotakari atoko itxa. Iua nitari pĕrora apia erekari. ⁴⁶ Pĕrora iteene erekari apokiniã, ikinika itii ivĕtxita iua pĕrora iamotini ĭkapani.

Hetxi Pirena

⁴⁷ —Teoso auĭtetxi ininiua hetxi ipoaă taăkari atoko itxa. Ikini sereti ximaki apotiita hetxi. ⁴⁸ Ixăpokasaaki kaiotaroariti kosekaăpotari itakoămoni. Iuaă kaiotaroariti iitopăka. Imereĕrina ximaki. Ximaki erekari kotariã itaka. Kăkiti maniăkiniti mapara oka. ⁴⁹ Xipokatxi ôtisaaki ikara atoko itxa. Teoso nitiriakori mereĕriko kăkiti. Mapara itakarına erekarini. Mapara itakarına maerekani. ⁵⁰ Ininiã xaminamoni okanako kăkiti maerekati kamakani. Iuaă itxiĭtana. Akerakitatsiriĭtuana, kotxi patsiiri.

Kitxakapirĭka Oerekakori, Amaneri Oerekakori Pakini

⁵¹ Xesosi pimaăna imoianariakori:

—Hĭte imarotatari ikara atoko inakari nisăpiretakiti? —itxa.

—Ari, aimarotapitikari —itxarina.

⁵² Ininiã Xesosi:

—Kaiôkatsopareri oerekikosaaki Teoso auĭtetxi ininiua imarotini ĭkapani, imarotari amaneri oerekakori, apaka kitxakari oerekakori. Kaapokori atoko itxa. Iua kaapokori makatxakari apokaerekatakiti mareta âki inĭkatakiti. Amaneri, kitxakari apaka imakatxaka.

Nasaree Auakani Kona Auakari Xesosi Săkire
(Marko 6.1-6; Arôkasi 4.16-30)

⁵³ Ikara sãpirenaxti atão inakari oerekiko ixipokapiretaka atoko, Xesosi sipe. ⁵⁴ Ikanapiriã Nasaree sitatxitimoni. Ininiã oerekarauata aiko Xo-teoakori apotiifiniãtaãua. Ininiã kãkiti tsorikaãta isãkire ikenakotakasaakina. Itxana:

—Kiripa sikatari iua imarore? Kiripa sikaposotiiretari iua? ⁵⁵ Aapokotxi kamakari ãkiri iua. Inoro Maria. Itariakori Txiako, Xoão, Simão, Xotasi pakini. ⁵⁶ Itaroakoro uai apaka aua. Nanipa apaiaõkari ikinika imarore? — itxana.

⁵⁷ Ininiã kona inirekarina iua. Ininiã Xesosi txari:

—Teoso sãkire sãpiretakari paxitaãka, txamari Teoso sãkire sãpiretakari itixineë auakasaaki, inirimane sauaki auakasaaki, !paxitaãka. Isãkire !auikaãka —itxa Xesosi.

⁵⁸ Ininiã Xesosi kona kamari itori Teoso posotiire iuaã Nasaree sitatxiti auakani ãkapani, kotxi kãkiti iuaãkini !auikari isãkire.

14

Xoão Kapatxisareri Ipinini Pirena

(Marko 6.14-29; Arókasi 9.7-9)

¹ Iuasaaki Erotxi Kariréia auakani auite txaua. Iuasaaki ikenakopiretari Xesosi pirena. ² Iuasaaki itxana iniritariakori:

—Iua Xoão kapatxisareri ipipekariika õkitapekaua. Iuakara Xesosi txaua. Ininiã uatxa apiata iposota ikamini —itxa Erotxi.

Txamari Xesospitikara. Kona Xoãoni iua. ³ Mitxi Erotxi paniãtari Xoão kapatxisareri iaxirikiko, itari Piripi ãtanoro xika. Ouãka Erotxia. Oomanatari Xoão, ininiã itakaãka kateia ãki. ⁴ Mitxi Xoão kapatxisareri txari Erotximoni:

—Kona erekari pitari ãtanorokata pisirikini. !Apakata pikamakiti —itxa.

⁵ Ininiã Erotxi nirekamari okiniri Xoão, iuaritika kona okari, kotxi ipikana Xoão sãkire auiaãkani. Ninoa uãkatari Xoão, Teoso sãkire sãpiretakari ininiua.

⁶ Erotxi kamari kiiniri auini õti pirena. Erotxia ãkero serena iua Erotxi apisatoõ, ikemaïtxitakini apisatoõ pakini. Ininiã oserenini kamari ninoa poxokoniuatini. ⁷ Ininiã Erotxi poxokoniutakasaaki itxa:

—Nisikai imakinika pinireëkiti pitemoni —itxaro oa.

Ininiã osari onoromoni. ⁸ Onoro nirekari Xoão okiko, ininiãkara oamanaãri Xoão kii prato nopini. Ininiã otxari Erotximoni:

—Xoão kapatxisareri kii ninireka prato nopini.

⁹ Ininiã Erotxi kona erekaxinireri. Kipa ikama? Kotxi ikinimane ikemaïtxitakini kenakotari isikaenetiniri oa nirekakiti oamoni. Ininiã iua paniãtari oa nirekakiti sikiko oamoni. ¹⁰ Ininiã iua iokanatarari sotatoakori kateiamoni Xoão kii tsotakiko ãkapani. ¹¹ Ininiã ninoa minari ikii prato nopini. Isikarina oamoni. Oa sikari onoromoni. ¹² Eereka Xoão moianariakori sari kateiamoni. Ninoa anikari iito akauarimoni. Iuaã ikatarina.

Eereka ninoa sari Xesosimoni. Isãpiretarina Xesosi Xoão ipinini pirena.

Siko Mio Kãkiti Xesosi Sikakienatini

(Marko 6.30-44; Arókasi 9.10-17; Xoão 6.1-14)

¹³ Xesosi kenakopiretakasaakiri Xoão okiko, ipotorika kanauaã. ãtiãtaã iuanani auini nire isa, txamari itomaneri kãkiti imarotari Xesosi sinimoni. Ininiã itakanaparina sitatxi. Isana imiriã iua sinimoni. ¹⁴ Iua kanikiãtakasaaki, atapari kãkiti apokaãpotini. Ininiã iua amoniãkana ninoa. Imakananitana amianatakani.

¹⁵ Mapiãpeka inakasaaki, imoianariakori apoka iuamoni. Itxarina:

—Mapiãpeka. Uai aapokotxi mauakaniãtaã, ininiã uai nipokori ! uari. Piokanatarì kãkiti aapokotximoni, ininiã iamotarina nipokori iuaãtaã — itxana imoianariakori.

¹⁶ Xesosi apakapapiretana:

—Nota kona iokanatanana isinina. Hïtekarako sikakienatana ninoa —itxa Xesosi.

¹⁷ Ininiã ninoa:

—Komiri ipi ipi ãti pakininokara aua atemoni. Ipi ximaki apaka aua. ! Apakata —itxana.

¹⁸ Ininiã Xesosi:

—Himina uai notamoni —itxa.

Ininiã imoianariakori minari Xesosimoni. ¹⁹ Eereka iua paniãtari kãkiti xiti topãkini. Eereka ikosekari komiri sïko, ximaki ipi pakini. Ininiã iua ionakaãta iaxiti. Itxari:

—Niri pisikakiti peerekari —itxa.

Ininiã imaxinïkaãpotari. Isikaãpotana imoianariakori. Ninoa sikaãpotana kãkiti. ²⁰ Ikinikana nipokota. Ikinimane:

—Kamitopekaua ate —itxana.

Eereka imoianariakori apotiitari itetakori. Ininiã xãpokaka itxarina tosi kotari. ²¹ Iuasaaki sïko mio kikiãkini nipokota. Sitoãkini, amarini pakini nipokota apaka.

Xesosi Ipoa Nopini Itïpokotini

(Marko 6.45-52; Xoão 6.15-21)

²² Eereka ipaniãtana imoianariakori kanauaã iereëtiniua iua apisa ïpiriãtinina ïkapani. Ninoa sipeka. Iua kaikota kãkiti itakapiretini nire. ²³ Kãkiti itakapiretanapaka atoko, Xesosi sari oxiratarimoni, Teoso imisãkiretini nire. ïkanõkapeka inakasaaki, iuanani iuaã aua. ²⁴ Iuasaaki kanaua ipoa aparïkakiãpeka. ïtima apiãkataro kanaua. Ininiã tsakati itene apoãkata.

²⁵ Imaropirïkatapeka inakasaaki Xesosi sari ninoamoni. Itïpokota ipoa nopini. ²⁶ Imoianariakori atapakasaakiri Xesosi ipoa nopini itïpokotini, ninoa pïkarauata.

—Kamiri napani —itxana.

Akiripoakatana. ²⁷ Iuasaakipeka Xesosi:

—Kataparaxinire hïtxako. Notara. Kona hïpïkarauatape —itxa.

²⁸ Ininiã Petro sãkirauata:

—Apiananiri. Xesosi pininiãua, pipaniãtano pitemoni napokini ipoa nopini —itxa Petro.

²⁹ Ininiã Xesosi:

—Uai pina —itxari.

Ininiã Petro katxaka. Iptorika ianini ipoa nopini Xesosimoni isini.

³⁰ Txamari kataparari ïtimati itikasaaki, ipïkarauata, ininiã ipatapiã itairakaãpota. Ininiã iua akirikata:

—Apiananiri. Pimaïkano.

³¹ Iuasaakipeka Xesosi maïkari iua. Itxari:

—Poiãoka pauikari niposotiire. Kinirepa kona atão pauikari? —itxa Xesosi.

³² Iuaïkana morõkoka itxauana kanaua ãki. Iuasaaki ïtima iotoka.

³³ Imoianariakori kapotoreëkaua Xesosi apisatoõ:

—Apiananiri pitxaua. Atãopitikara Teoso ãkiripitikarai —itxana.

Xesosi Makananitana Amianatakani Xenesareekini

(Marko 6.53-56)

³⁴ Ipoa ĩpiriātana, Xenesaree tōpamoni apoka itxana. ³⁵ Iuaā kākiti imarotari Xesosi, ininiā iokanapireta kākiti ninoa tixine takote auakanimoni:

—Amianatakani himina.

Ininiā kākiti minari itomane amianatakani Xesosimoni. ³⁶ Amianatakani amanaāri Xesosi:

—Pauiritaua pimāka mapotomatare atakapiotini —itxana.

Ikinimane imāka takapiotakani makananitaāka.

15

Xoteoakori ĩkite Pirena (Marko 7.1-13)

¹ Iuasaaki pariseoakori, kaiōkatsopareriakori pakini apoka Xesosimoni. Xesosareēkini ninoa. Ipimaārina Xesosi:

² —Kinirepa pimoianariakori kona kamari aātokiriakorini sākire iaōka, kotxi ĩnipokotakasaakina, kona arokauakotauana —itxana.

³ Ininiā Xesosi apakapapiretana:

—Hĩtepekana, kinirepa kona hĩte kamari Teoso sākire iaōka? Hĩte kamari hōereēkitinokara, ⁴ kotxi Teoso txari: “Pipaxitariko piri. Pipaxitaroko pinoro.” Apaka Teoso txari: “Piri, pinoro pĩmisākireporetiniā, pokaākako.”

⁵ Txamari hĩte oerekari kākiti: “Kākiti auakiti ĩri, inoro pakini nirekiniā, iua manirekakaniāri isikiniri ninoamoni, isāpiretana: ‘Ia nota auakiti nisika Teosomoni.’” Ininiā ĩsĩkari ninoa nirekakiti ninoamoni. ⁶ Ininiā hĩte oerekari kākiti mapaxitakinana ĩri, inoro pakini. Ininiākara hĩte sākire hōereēkiti kipatari Teoso sākire. ⁷ Hĩte txari: “Akamapitikari Teoso sākire iaōka,” txamari kona hĩte kamari. Atāopitikara Isaia sākire kitxakapirĩka. Iua sāpiretari Teoso sākire hĩte pirena. Teoso txari:

⁸ Kamisirienererini ninoa kākiti. Ninoa sākireēnanira ipaxitanona.

Ākixĩnĩreēna ĩnĩrekanona.

⁹ Maxĩkatĩka ninoa kapotoreēkaua nota apisatoō. Maxĩkatĩka ninoa txano: “Ateosone pitxaua,” kotxi ninoa !oerekari nota sākire. Ninoaka sākire oerekana, txamari “Teoso sākire asāpiretai” itxana.

Itxa Teoso Isaĩamoni kitxakapirĩka —itxa Xesosi.

Ākixĩnĩretxi Txiko Pirena (Marko 7.14-23)

¹⁰ Xesosi akĩritana kākiti, ininiā itxana:

—Hĩkenakota himarotini ĩkapani. ¹¹ Nĩpokori, piixirākakiti kona kamatxikotari pākixĩnĩre. Pĩsākire maerekati, pinamaā potoriākari, iuara txikotapitikari pākixĩnĩre —itxa Xesosi.

¹² Iuasaaki Xesosi moianariakori apoka iuamoni. Itxarina:

—Pĩmarotatari pariseoakori !apokaerekatari ikara pĩsākire ninoamoni?

¹³ Ininiā Xesosi:

—Kākiti takari atoko itxa. Ininiā ĩkinika takari niri ĩaxĩtikiri mataākĩniti maporokaākako. ¹⁴ Kona himaākatapena pariseoakori. ĩkĩikakani mōsiāreni atoko itxana. Mōsiāreti mĩkiĩkiniāri mōsiāreti, ĩkinipoko ĩrikako aariko āki. Iua atokokana maerekati ōtākĩkiniāri maerekati, imakinika ninoa sari ĩmisirĩtikoātaā —itxa Xesosi.

¹⁵ Ininiā Petro:

—Poerekaua ate ikara sāpirenatxi atāo ĩnakari oerekiko. Ate !imarotari —itxa.

¹⁶ Ininiā Xesosi:

—Hĩte apanakini atoko hĩtxa atxĩti? Kona himarotapanikari?

¹⁷ Himarotari. Nĩpokori hinamaā hĩixirākakiti hĩtikakomoni ĩsa.

Eereka h̄itkataksaaki, inapa. ¹⁸ H̄is̄ākire hinamaã pok̄ikakari potorika h̄āxixinireē. Iuara txikotari k̄ākiti ākixinire. ¹⁹ Kotxi h̄āxixinireē h̄ixinikakiti maerekati potorika. Okaniuatakatxi, āti k̄ākiti itanorokata sir̄ikiko nire, anokaretxi, itiriuatakatxi, misirieneretxi, āti mis̄ākirepiretiko pakini potorika h̄āxixinireē. ²⁰ Ikara atoko inakarananira txikotari k̄ākiti ākixinire. K̄ākiti marokauakotakanua kona txikotari ākixinire —itxa Xesosi.

*Xoteo Minakatoua Auikiniri Xesosi S̄ākire
(Marko 7.24-30)*

²¹ Ikara atoko inaāka atoko Xesosi sipe. Isipeka Txiro, Sitoō pakini t̄ōpamoni. ²² Iuasaaki sito Kanaaākero, iuaā auakaro, apoka Xesosimoni. Iteene oamanaāri:

—Apiananiri, Tavii apika mekaniri, piamon̄ikano. Maerekati mata-matakoti auaitotaro namarite. Iua iteene misiritaro oa —otxari.

²³ Txamari Xesosi kona apakapapiretaro oa. Imoianariakori apoka Xesosimoni. Itxana:

—Piokanataro, osipekako. Atemoni ātipirika oākiripoanāta —itxana.

²⁴ Xesosi apakapapiretaro oa:

—Niokanataāka Isaeokini nin̄ikatini ikapani. Ninoa soti auite p̄ipinanaākani atoko itxana. Txamari pite kona Isaeokero. Pite āto uāka —itxa.

²⁵ Iuaritika oa sito apoka iuamoni. Okapotoreēkaua iua apisatoō. Ininiā oa:

—Apiananiri, pimakananitaro namarite —otxari.

²⁶ Ininiā Xesosi:

—Isaeokini amarini atoko. Nota ninoa iri atoko. Kona erekari amarini komirite nimixirikini, anāpamoni nisikini ikapani —itxaro.

²⁷ Ininiā oa:

—Ari, atāōpitikara pis̄ākire. Anāpa atoko nitxaua, iuaritika anāpa nikari nipokori iriākari kaapokori patapi koa —otxa.

²⁸ Ininiā Xesosi:

—Atāōpitikara. Sito, pite iteene auikari niposotiire. Pinirekakiti nikamapitakoko —itxaro.

Iuasaakipeka oimi erekapeka otxa.

Xesosi Erekapeka Tx̄ikitakari K̄ākiti

²⁹ Eereka Xesosi sari Karir̄eia poatimoni. Iuaā oxiratari nopini topāka itxa.

³⁰ Itomane k̄ākiti iuamoni apoka. Ninoa minari iuamoni k̄ākiti m̄ōsiāreni, mas̄ākireni, mat̄ipokotakani, apanakini amianatakani itomaneri pakini. Xesosi makananitanana ninoa. ³¹ K̄ākiti iuaā auakani tsor̄ikaāta, kotxi itikarina Xesosi makananitinina amianatakani. K̄ākiti mas̄ākireti s̄ākirauatapeka. K̄ākiti mat̄ipokotakati t̄ipokotapeka. M̄ōsiāreti, k̄ōsiārepeka itxapeka. Ikinimane txari: —Peerekari Teoso, Isaeo auakani Teosone —itxana.

*Xesosi Sikakienatana Ipi Ipi Pakini Mio K̄ākiti
(Marko 8.1-10)*

³² Xesosi akiritana imoianariakori. Itxana:

—Nota amon̄ikana naia k̄ākiti. Ipi ōti, āti ōti pakini notakata auana. Uatxa kona minakati kona auari inikinina ikapani. Kona nota iokanatanana ninoa natxiritika, kotxi arikama ip̄itaxititamana, irika itxamana —itxa Xesosi.

³³ Ininiā imoianariakori txari:

—Nanipa ate apokari nipokori komiri naia k̄ākiti asikakienatini? —itxana.

³⁴ Ininiā Xesosi:

—Kipakinipa komiri aua h̄itemoni? —itxa Xesosi.

Ininiā ninoa:

—Setxi komiri, ātikaka ximaki axapitiri pakini —itxana.

³⁵ Ininiã Xesosi:

—Hĩpaniãtana kãkiti xiti topãkini —itxa Xesosi.

³⁶ Eereka imaĩkari ninoa setxi komiri, ximaki pakini. Itxari Teoso:

—Erekapitikari ia komiri, ximaki pakini pite sikakiti.

Mapixinika itxari komiri, ximakikata. Eereka xanakaãpota itxari imoianariakorimoni. Ininiã ninoa xanakaãpotari kãkitimoni. ³⁷ Ikinika nipokota. Kamitopeka itxana. Imoianariakori xãpokakari setxi kotari nipokori itetakori. ³⁸ Ipi ipi pakini mio kikiãkini nipokotapeka, apaka sitoãkini, amarini pakini. ³⁹ Eereka Xesosi iokanatana kãkiti aapokomonina. Iposo atoko iereẽtaua kanaua ãki. Makataã tãpamoni isa.

16

Teoso Takaõtxikare

(Marko 8.11-13; Arókasi 12.54-56)

¹ Pariseokori, satoseokori pakini sari Xesosimoni. Inirekarina Xesosi kerokiniri, ininiã itxarina Xesosi:

—Takaõtxikari, Teoso posotiire poerekaua ate, aãtaminiri ikapani, Teoso iokanatinii ikorapokoriti aimarotini ikapani —itxarina.

² Txamari Xesosi txana:

—Na noerekai. Mapiãnikata iaxiti pãkamarari inakasaaki: “Peereõtiri katana,” hĩtxa. ³ Iua atokokana ikanõkapanika iaxiti pãkamarari, piãkaxitita inakasaaki: “Ãparaãnapani. Kataparari itimatipani,” hĩtxa. Himarotapitikari takaõtxikari iaxiti aukari. Txamari kona himarotari Teoso kamããtakiti ikorakanani. Hisãkirauatakasaaki, kãkiti erekarini atoko hĩtxa, txamari maerekati hĩkama. ⁴ Kãkiti uatxarini !erekana. Itakanaparina Teoso. Hĩte nirekari noerekini Teoso takaõtxikare, iposotiire. Konapitini. Kona noerekai hĩte. Kitzakapirĩka Teoso sãkire sãpiretakari Xonasi inakori aukasaaki, Teoso kamari posotiiretxi. Ikara atoko inakari posotiiretxi Xonasi aukasaaki, iuaĩkana ikamapanikariko. Iua posotiiretxi Teoso takaõtxikare itxapanikaua hĩte ikapani. Iua takaõtxikarinoka Teoso takaõtxikare hĩte ikapani —itxa Xesosi.

Iposo atoko Xesosi takanapana, sipe itxa.

Pão Tireẽkari Pirena

(Marko 8.14-21)

⁵ Xesosi imoianariakorikata ĩpiriãtari ipoa. Ipinii apokasaakina, imoianariakori xinikaro pão imaxinĩkaretakitona. ⁶ Iuasaaki Xesosi õtãkikana ninoa:

—Erepaniko. Pariseokori, satoseokori pakini pãote tireẽkari pamonõkoniri —itxana imoianariakori.

⁷ Ininiã imoianariakori misãkiretakakaua:

—Pão amaxinĩkaretini xika Xesosi ikara atoko txaua ate —itxana imoianariakori.

⁸ Xesosi imarotari imisãkiretakakiniuana, ininiã iua:

—Kinirepa himisãkiretakakaua, pão himaxinĩkaretini xika? Kona iteene hãuikari ninĩkatini. ⁹ Atauako kona kiĩkitemanikai hĩte? Atauako himaxinĩkaretapekari pão sikonoka siko mio kãkiti nisikakienatini? Hĩxinikariko kipakinipa kotari hĩxãpokaka pão itetakoro? ¹⁰ Atauako kona hĩxinikatarĩ ãti õti ipi ipi pakini mio kãkiti setxinoka pãoã nisikakienatini? Hĩxinikariko kipakinipa kotari hĩxãpokaka pão itetakoro? ¹¹ Hĩte nõtãkikasaaki: “Erepaniko. Pariseokori, satoseokori pakini pãote tireẽkari pamonõkoniri,” ninakasaakii, kinirepa kona himarotatarĩ kona pãoni ikara atoko nitxai hĩte? —itxa Xesosi ninoamoni.

¹² Iuasaakiika imarotarina kona pão tireëkarini monõkori txaua. Imarotarina pariseoakori, satoseoakori pakini sãkirera, ninoa oereëkitira, monõkori txaua.

Petro Auikari Xesosi Teoso Ækiri Ininiãua
(Marko 8.27-30; Arókasi 9.18-21)

¹³ Xesosi sari Sesaréia-Piripi sitatxiti takote. Iuaã ipimaãna imoianariakori: —Kipa kãkiti uãkatano nota hõtari iaxitikiri?

¹⁴ Ininiã imoianariakori:

—Åtikaka uãkakai Xoõoni kapatxisarerini iuaïkana õkitikaua inakarii. Apanakini uãkakai Eriásini iuaïkana õkitikaua inakarii. Apanakinipekana uãkakai Xeremiani iuaïkana õkitikaua inakarii. Minakanisaaki åtikaka: “Åti Teoso sãkire sãpiretakarini iuaïkana õkitikaua inakarii,” itxaina —itxarina.

¹⁵ Ininiã Xesosi:

—Hitepekana, kipa hite uãkatano nota? —itxana ninoa.

¹⁶ Simão Petro apakapapiretari:

—Teoso mereëkitirai pite. Teoso mapïkati åkirirai pite —itxari iua.

¹⁷ Ininiã Xesosi:

—Simão Petro, Xoõo åkiri, Teoso takari erekari pitemoni, kotxi kona kãkitini sãpiretai Teoso åkiri nininiua. Niri iaxitikirira sãpiretai. ¹⁸ Nisãpirenauatapanika pitemoni. Piuãka Petro. Kai sorotxikana piuãka. Kai aapokotxiti kamakari mereëri kai kaikori xiti itakini ïkapani, aapokotxi iua kai nopini ikamini ïkapani, ininiã aapokotxi !irika, kotxi kaikori nopini aua. Aapokotxi kamakari takari kai kaikori xiti. Iua kai atoko itxa ikara Teoso sãkire, isãpiretakiti pitemoni. Kãkiti nota nakitiakori naapoko atoko, ninoa sauaki nauini ïkapani. Napotiinãtapanikari kãkiti naapoko ïkapani. Satanasi tapara kona posotapaniri ixipokiniri ia naapoko. ¹⁹ Nipaniãta Teoso sãkire pisãpiretini kãkitimoni. Xavi nisikiniã atoko itxa ikara, kotxi kãkiti auikasaakiri Teoso sãkire iïroã Teoso auïtetxi ininiãtaãua. ïkorapokoriti kãkiti kamakiti pimauiritakaniã, Teoso tixine apaka !auiritaãka. ïkorapokoriti kãkiti kamakiti pauiritiniã, apaka auiritaãka Teoso tixine —Xesosi txari Petro.

²⁰ Iposo atoko Xesosi:

—Teoso mereëkiti nininiua, apanakinimoni !kasãpirena hïtxapeko —itxana imoianariakori.

Xesosi Sãpiretari Ipinini

(Marko 8.31-9.1; Arókasi 9.22-27)

²¹ Iua õtisaaki Xesosi potorika isãpiretinina imoianariakori:

—Nisako Xerosareëmoni. Iuaã kiomãtxiakori, kaiõkatsoparerini, sasetotxi auiteakori pakini misiritanoko. Iposo atoko oka ninaãkako. Ipi åti õtisaaki iuaïkana nõkitikaãkako. Iuaïkana aua nitxako —itxana.

²² Ininiã Petro misãkiretari Xesosi iuanoka inakasaaki. Itapararitika itxari:

—Konapitini, kona ikara atoko inakari kona auapani pitemoni, Api-ananiri. Kona Teoso auiritapaniri ikara atoko piniko —itxari.

²³ Ininiã Xesosi kirioka Petromoni.

—Pisipiniũkava Satanasi. Nikimapore katokapareri atoko pitxa, kotxi pite nireëkiti kãkiti nireëkiti atokotxikana. Pite nireëkiti kona Teoso nireëkiti atokoni —itxari.

Xesosi Moianari Atão Inakari

(Marko 8.34-38; Arókasi 9.23-27)

²⁴ Iposo atoko Xesosi misãkiretana imoianariakori:

—Notakata kinirão sika pinakasaaki, piteka nireëkiti kona pinirekape. Notakata kinirão sika pinakasaaki, nota misiritiko atokokana pimisiritaãkako.

Ia atoko pinirekiniā, notakata pisapitikako. ²⁵ Pite ātipirika kaminiāri pite nireēkitinoka, ininiā pinireēkiti xipokapitikako pitekata. Pite nireēkiti pimanirekakaniā, nota sākire pauikini xika, Teoso iokanapirena erekari pisāpiretini xika, pite auapininiika txako Teosokata. ²⁶ Atxiiti papakapari ikinipoko tiitxi, ikini itixiti auakani tii, pinakiti ikapani. Atxiiti iua tiitxi xika kona pikipitari Teoso sākire, ininiā kona pikaikota ātipirika Teosokata. Ikara atoko ininiā, erekari atxiiti ikinipoko tiitxi auinii? Konapitini. Apiaerekata Teosokata ātipirika pikaikotini. !Apakata kākiti iiktitxiniri Teoso, iuamoni isini ikapani. ²⁷ Nota hītari iaxitikiri apokako ninitiriakorikata. Iuasaaki niri iotximeretxikana nota iotximeretako. Iuasaakirako erekari isika erekari kamakanimoni. Iparikana iki isika iparikana iaōka. Txamari imisiritanako maerekati kamakani. ²⁸ Atāopitikara nisāpiretai hūte. Uai uatxa aua kākiti, ninoā imarotapanikariko nota hītari iaxitikiri auītetxi nininiua. Ikara imarotina apisa kona ipinapanikana –itxa Xesosi.

17

Moisesi, Eríasi Pakini (Marko 9.2-13; Arókasi 9.28-36)

¹ Seisi ōti napaka atoko Xesosi anikana Petro, Txiako, Xoão pakini. Xoão Txiako itari. Ikanikana oxiratari nopinixiti. Ninoanani anika iuaā. ² Iuaā ninoā atamataru iua. Ipinimonipo itxapeka. Itoō iotximere atokatxi iotximere atoko itxa. Imāka serōka ipinikare atoko itxa. ³ Iuasaakipeka Moisesi, Eríasi pakini tokiā iuaā, misākireta itxarina Xesosi. ⁴ Ininiā Petro akiritari Xesosi:

–Apiananiri, erekapitikari uai aūuini. Pinirekiniāri, nota kamari ipi āti pakini papiri uai. Pite nakiti ikapani, Moisesi nakiti ikapani, Eríasi nakiti ikapani nikama.

⁵ Petro sākiranauātakasaaki, katxiāri pomēkoriri ninoā nopini apoka. Katxiāri āki Teoso txari:

–Ere namarite, nitiretakiti. Napokaerekataru iua, kotxi ikamari ninirekakiti. Hikenakotariko iua sākire.

⁶ Xesosi moianariakori ikara atoko inakari ikenakotakasaakina, iteene ipikarauatana, ininiā iriākatana xitipe. Itoōna ikipatana. ⁷ Xesosi sari ninoamoni. Itakaukotaua ninoā nopini. –Hōkitikaua. Kona hīpikarauatape –itxana.

⁸ Ininiā itikapokotana. Xesosinoka aua.

⁹ Oxiratari xirata iokiriiāpotakasaakina, Xesosi txana ninoā:

–Kona hīsāpiretapiri apanakinimoni hītikakiti. Nota hītari iaxitikiri nipina iuaikana naua ninaka atokoikarako hītikakiti mixikanani hīsāpiretako –itxana.

–Ateeneka –itxarina.

¹⁰ Xesosi moianariakori pimaāri iua:

–Kinirepa kaiōkatsoparerini oerekaua: “Eríasi apokako Teoso mereēkiti apokini apisa?”

¹¹ Ininiā Xesosi apakapiretana ninoā:

–Ari, atāopitikara ninoā sākire. Merepitipatika Eríasi apokapitika. Iua kamari imakinika iposope inini ikapani. ¹² Ari, nisāpiretai, Eríasi apokapeka. Txamari kākiti !imarotari iua. Imisiritarina iua inireēkitina iaōka. Iua atokotxikana itxanako nota hītari iaxitikiri. Imisiritanona –Xesosi txana Petro, Txiako, Xoão pakini.

¹³ Ininiā imoianariakori imarotari Xesosi sākire. Eríasi, Xoão kapatxisareri itxaua.

*Amarini, Maerekati Matamatakoti Auaĩtotakiti Pirena**(Marko 9.14-29; Arókasi 9.37-43)*

¹⁴ Ikanapiriákana atoko, itomaneri kákiti apotiitiniátaáua apokasaakina, kiki apoka Xesosimoni. Ikapotoreékaua iua apisatoó. ¹⁵ Itxari:

—Apiananiri, piamonikari namarite. Maerekati matamatakoti auaĩtotari iua. Atatsiirauata. Xaminaã irikapika. Káuaãriã ikomokapika.

¹⁶ Niminamari namarite pimoianariakorimoni. Ninoa kona posotari erekapeka itxĩkitakinirina.

¹⁷ Ininiã Xesosi txari:

—!Kauikarei hĩte. Maerekati kamakanii hĩte. Kipakinikananipa Teoso nirekatari hĩtekata nauini? Kipakinikananipa Teoso nirekatari hĩte nimĩteenekini? Himinari amarini notamoni —itxana.

¹⁸ Apokaãka atoko, Xesosi txitari iua maerekati matamatakoti:

—Pisipe.

Ininiã iua maerekati sipe. Iuusaakipeka iua amarini erekapeka itxa.

¹⁹ Eereka imoianariakori apoka Xesosimoni. Iuusaaki ninoanoka aua iuakata. Imisákiretarina:

—Kanatokopa ininiãpa ate kona posotari maerekati matamatakoti aomitikini?

²⁰ Ininiã Xesosi:

—Kona atãoni hãuikari nisãkire, ininiã kona hĩposotari homitikiniri iua. Atãoenepitikara nisãpiretai hĩte. Mostata iki axapitikiri. Axapitipitika nisãkire hãuikiniã, mostata iki atoko nisãkire hãuikiniã, hĩposotari iã õtanoxiratarari hĩpaniãtini: “Pite oxiratarari, uai posipika, ikaimoni pisa,” ininiã oxiratarari sapitikamako. Hĩte posotari ikinipoko hinireékiti hĩkamini. ²¹ Txamari himamisãkiretakaniãri Teoso, hinipokotini himatakanapakaniã Teoso himisãkiretini İkapani, ininiãra kona hĩposotari maerekati matamatakoti homitikini —itxa Xesosi.

*Xesosi Iuaĩkana Sãpiretari İpinini**(Marko 9.30-32; Arókasi 9.43-45)*

²² Kariréia tãpa apokasaakina, Xesosi misãkiretana imoianariakori:

—Nota, hĩtari iaxitikirino mĩkapiritaãkako. Nisikaãkako kikiakorimoni inirekaãkitina ikaminina tĩkane. ²³ Ninoa okano nota. İpi ãti pakini õtisaaki iuaĩkana nõkitikauako, iuaĩkana aua nitxako —itxana ninoa.

İkara inakari ikenakotakasaakina, imatinaniuatana.

Txineiro Teoso Misãkiretiko Aikoti İkapani

²⁴ Kapanaoõ sitatxiti apokasaakina, kikiakori sari Petromoni. Ninoa kiki apakaparo txineiro Teoso misãkiretiko aikoti nĩkatakani amanaãkito. İpi-mãarina Petro:

—Hĩte oerekakari sikataro txineiro Teoso misãkiretiko aikoti nĩkatakani amanaãkito? —itxarina iua Petro.

²⁵ Ininiã Petro:

—Ari, isikapitikaro —itxa.

Eereka Petro iroã aapokotxi ãki ikara sãkiretxiti Xesosi isãpiretini İkapani. Xesosi sãkirauata, Petro masãkirauatakani apisa:

—Petro, ikini itixiti kipa sikataro txineiro auĩtetxiakorimoni? Atauako auĩtetxi nirimane sikataro? Atauako kákiti ãtiãtaã İkanikani sikataro? —itxari.

²⁶ —Kákiti ãtiãtaã İkani sikaro txineiro auĩtetximoni —itxa Petro.

—Ari atãopitikara. Ininiã kona auĩtetxi nirimanenii sikaro txineiro iua-moni. Iuaritika asikapitikaro. ²⁷ Txineiro amasikaniã, txineiro apoti-itakani !apokaerekataua. !Anirekari ikara atoko inakari. Ininiã ipoa pisa. Pokatsaãta. Pimanamãkaro ximaki merepitipanika pimaĩkakito. Onamaã

papokaro txineiro ota aĩkitxirauatini ĩkapani. Oa txineiro ota apakata nota sikakito ĩkapani, pite sikakito ĩkapani apaka. Panika. Pisikaro oa txineiro Teoso misãkiretiko aikoti nĩkatakanimoni —itxa Xesosi.

Ininiã Petro kamari Xesosi sãkire iaõka.

18

Kiripa Kãkiti Apiatakari Txataua?

(Marko 9.33-37; Arókasi 9.46-48)

¹ Iuasaaki Xesosi moianariakori apoka iuamoni.

—Teoso auĩtetxi ininiãtaãua, kipa kãkiti apiatakari txataua? —itxana.

² Xesosi akiritari amarini axapitiri. Ninoa apisatoõ taka itxari.

³ —Atãopitikara nota sãkire. Himaerekani himatakanapanisaaki, Teoso nireẽkiti himakamakanisaaki, amarini axapitiri atoko himinakanisaaki, kona hĩsapani Teoso auĩtetxi ininiãtaãua. ⁴ Ia amarini axapitiri !iuikaua. Kãkiti ia amarini atoko inakarira, iuaka poiãotakiniãua, iuara apiatakari itxaua Teoso auĩtetxi ininiãtaãua. ⁵ Nota nireẽkiti pikamakasaaki, pipoxokonirika papakapiniãri amarini ia atoko inakari pinakasaaki, papakapano nota apaka —itxa Xesosi.

Maerekati Oerekakari

(Marko 9.42-48; Arókasi 17.1-2)

⁶ Xesosi sãpirenauatapanika:

—Kãkiti txĩkitakiniãri amarini, nota sãkire auĩãkari, maerekati ikamini, ! apakata. Erekamariko kai mitari iua kãkiti maerekati oerekakari iaixirikanokitaãkamako, iposo atoko ipoa apanĩkakiã okaãkamako ipinini ĩkapani. ⁷ Kãkiti ikini itixiti auakani misiritaãkako, kotxi auari kãkiti maerekati apanakini kamini txĩkitakakani. Auapika kãkiti ikara atoko inakani. Ninoa misiritaãkako. ⁸ Piuako txĩkitakiniãri maerekati pikamini, ininiã pitsotakari, oka pitxariko. Pikiti txĩkitakiniãri maerekati pikamini, ininiã pitsotakari, oka pitxariko. Kotxi maerekati pikaminiã arikatxi maxipokatimoni pokaãkako. Apiaerekata mauakotikai pauini ãtipirika Teosokata. Apiaerekata makititikai pauini ãtipirika Teosokata. Pauiritiniãri maerekati pikamini txĩkitaãkari pitekata ikaikotiniã, ininiã pite kamari maerekati apaka, ininiã arikatxi maxipokatimoni pokaãkako. ⁹ Iua atokokana poki txĩkitakiniãri maerekati pikamini, pimaporoka, oka pitxariko. Kotxi maerekati pikaminiã, arikatximoni maerekani misiritikoãtaã pokaãkako. Apiaerekata Teosokata ãtipirika pauini ãti pokinoka pauini. Kona paupiritapiri maerekati pikamini txĩkitaãkari pitekata ikaikotini —itxa Xesosi sãkire.

Soti Auĩte Pĩpinanaãkari

(Arókasi 15.3-7)

¹⁰ —Ikinipoko amarini pipaxitako, kotxi niri tixine aua niri nitiriakori. Ninoa nĩkatari amarini. Niri apisatoõ ãtipirika initiriakori auapika, ininiã kãkiti mapaxitakaniãri amarini, isãpiretarina niri. ¹¹ Nota hĩtari iaixitikiri napoka ĩkorapokoriti kãkiti pĩpinanaãkani atoko inakani napokini ĩkapani, kotxi ĩmarotarina Teoso kimapore.

¹² —Kiãtokopa itxa hĩxinikakiti? Kiki aua ipiraakori soti auĩte seĩ pakini. Txamari ãtika pĩpinanaka. Kiãtokopa itxa? Itakanapari ipiraakori novẽta novi pakini. Isari oxiratarimoni. Initari iua pĩpinanaãkari. ¹³ Ipiraaakori novẽta novi na pĩpinanaka, ininiã ipoxokoniuata. Apokasaakiri iua pĩpinanaãkari, iteene ipoxokoniuata. ¹⁴ Iua atokokana hĩri iaixitikiri kona nirekari amarini ãtika pĩpinanakini. Hĩri nirekari imakinika amarini imarotiniri ikimapore iuamoni sikari apo —itxa Xesosi sãkire.

Maerekati Pitemoni Kamakari

¹⁵ —Pitari nisäkire auiaäkari kaminiäri maerekati pitemoni, ininiä pisa iuamoni. Pitenoka pisa iuamoni. Iuanani pimisäkiretako. Põtäkikiniri ikõpitakasaaki, pimoianari iuaikana itxapekaua. ¹⁶ Põtäkikiniri imakõpitakanisaaki, ipi kãkiti panikako iuamoni. Ipi minakanisaaki ätika panika iuamoni. Ininiä iuaikana põtãkikari iua maerekati kamakari. Iuasaaki pitekata sikani apaka õtãkikari. Kotxi Teoso säkire iõkatsopatakori oerekaua kãkiti säkire kenakotakani, kãkiti kamakiti itikakani ipi äti pakini auiniä, apakata apanakini atão inakari imarotini ikapani. Ipi äti minakanisaaki, ipi apakata. ¹⁷ Ninoa pitekata sikani säkire imakõpitakanisaaki, pisãpiretana kãkiti Teoso misäkiretikoãtaã apotiitakaniua. Ninoa ikinipoko Teoso säkire auiaäkani õtãkikariko iua. Imakõpitakanisaakiri ninoa säkire, himarotari atão maerekati kamakari itxaua iua. Teoso säkire mauiaäkati atoko itxaua iua, kotxi kona inirekari õtãkikiko. Ate mokaiaäkari moianari atoko itxaua —itxa Xesosi säkire.

Pauritakiti, Pimauritakiniti Pakini

¹⁸ —Atãopitikara nitxai hite. Ìkorapokoriti kãkiti kamakiti himauritakiniti, Teoso tixine apaka lauritaãka. Ìkorapokoriti kãkiti kamakiti hãuritakiti, apaka auritaãka Teoso tixineã.

¹⁹ —Apikomoni ia nisãpiretai. Pite xinikakitixikana äti xinikiniä apaka, hinirekakiti hamanainiäri Teoso, niri iaxitikiri sikapitikai hamanaãkiti. ²⁰ Kãkiti apotiitakasaakiua nota ixinikinina ikapani, nota ninoakata aua. Atxiiti ipi ätinoka aua. Atxiiti ipinoka aua. Iuaritika nota aua ninoakata — itxa Xesosi.

Nitiritxi Äti Matiretakiti

²¹ Petro sari Xesosimoni, pimaã itxari Xesosi:

—Apiananiri, kipakinikatapa napakapari nitari, maerekati ikaminano ätipirika inakasaaki? Setxikata atxiiti?

²² Ininiä Xesosi:

—Kona, kona setxikatani papakapari iua. Setxikata setãta papakapari iua, ininiä ätipirika papakapariko.

²³ —Apikomoni noerekai papakapiniri kãkiti, maerekati ikamakasaaki pitemoni. Teoso auõttxi ininiua patrão ia atoko inakari itxa. Ia patrão nirekari initiriakori ikõkitixitini iua. ²⁴ Ininiä iua iaõtaro txineiro isikakitopeka. Iuasaaki initiri minaãka iuamoni. Mitxipeka iua patrão sikari tesi mirão txineiro ota iua initirimoni. Txineiropokoni. Oa txineiro isikasaaki, itxari initiri: “Äti õti iuaikana pisikano oia nitxineirote,” itxari initirimoni. Txamari, !isikaro, kotxi !oãuaika. ²⁵ Kona katxineiroteri. Ininiä ipatrãote paniätari ivõttxitiko iua, itanoro, imiakori, itii ikinipoko, ipatrãote ikõkitixitini ikapani. ²⁶ Iua initiri ikara inakari säkiretxiti ikenakotakasaaki, ipatrãote apisatoõ ikapotoreëkaua. Itxari iua: “Piãtataroko. Ikinika pitxineirote nisikaiko,” itxari ipatrãotemoni.

²⁷ —Ininiä ipatrãote amonikari. “Kona ninirekaikaro nitxineirote pisikinino.” Ininiä auritari isini.

²⁸ —Ininiä sipe itxa. Iua nitiritxi mitxi sikapekaro txineiro iua inakito seï ota äti ipatrãote nitirimoni. Poiãonoka oa txineiro. Iuasaaki, aapokomoni isikasaaki, aõkitari iua äti nitiritxi ipatrãote nitiri. Imaikari inoakiã. “Uatxa pisikano nitxineirote,” itxari.

²⁹ —Ininiä imoianari kapotoreëkaua iua apisatoõ. “Piãtataroko. Ikinika pitxineirote nisikaiko,” itxari.

³⁰ —Txamari mitxiri nitiritxi: “!Niãtapaikaroko,” itxari. Ininiã kateiamoni ieretakakitãkari imoianari txineiro xika. “Ikinika nitxineirote pisikasaakikanoko, pikatxakako,” itxari. ³¹ Ikara inakari ene apanakini iua patrão nitiriakori kenakotakasaaki, ninoa naiataua. Ininiã isana ipatrãotemonina. Isãpiretarina initiri iokanatiniri ãti initiri kateiamoni. ³² Ininiã iua patrão akiritari iua initiri: “Pite maerekati pitxaua, kotxi kita pite amanaãno nota niamonĩkini, ininiã pĩkitxitinino !niniãrekaika. ³³ Kinirepa kona pite amonĩkari pimoianari nota amonĩkini atokokana? Kona erekai,” itxari.

³⁴ —Ininiã ipatrãote iteene naiataua. Iokanatarari iua kateiamoni imisiritikomoni ipatrãote txineirote okinika imasikakanisaaki.

³⁵ Ininiã Xesosi xipokapiretari ia isãpirena:

—Niri iaxitikiri iua atokokana txaike hĩte, maerekati ãti kamakasaakii hĩtemoni himamaxinĩkaretakanĩã hãkixinireẽ —itxa Xesosi.

19

Kiki İtanorokata Itakanapakakini

(Mateo 5.31-32; Marko 10.1-12; Arókasi 16.18)

¹ Ikara inaka atoko Xesosi poterika Kariréia tõpa. Isa Xotéia tõpamoni uini Xotão ipiniã. ² Iuaã itomaneri kãkiti sari iuamoni. Erekapeka itxĩkitakana amianatakani.

³ Pariseoakori apaka sari iuamoni. Inirekarina Xesosi kerokiniri isãkire. Ininiã ipimaãrina Xesosi:

—Auiritaãka atxĩiti kiki takanapiniro İtanoro, itakanapiniro inirekasaaki? —itxarina.

⁴ Ininiã Xesosi:

—Hĩte imarotapekari ia Teoso sãkire iõkatsopatakori: Kitxakapirĩka merepitipanika ikinipoko Kamakari kamari kãkiti, kiki inini, sito onini apaka ikamari kãkiti.

⁵ Ikara atoko ininiã, kiki takanapari iri, inoro pakini, İtanorokata auni İkapani, ininiã ninoa ãtika atoko itxauana,

itxa Teoso sãkire iõkatsopatakori. ⁶ Ininiã kona ipi !itxaikauana. ãtika itxauana. Ikara atoko ininiã, !erekari kãkiti kaiarikiniri Teoso apotiitakini —Xesosi txana ninoa.

⁷ Ininiã ninoa pariseoakori pimaãri:

—Ikara atoko ininiã, kinirepa Moisesi paniãtari kiki iõkatsopatiniri aãtsopa, İtanoro itakanapini aãtsopate, ininiã eereka auiritari iua iokanatiniro oa?

⁸ Ininiã Xesosi apakapapiretana:

—Moisesi auiritai hĩtanoro hĩtakanapini, kotxi paikori hĩxinire. Teoso nireẽkiti himanirekakani xikara, Moisesi auiritai hĩtanoro hĩtakanapini. Txamari kitxakapirĩka merepitipanika kona kiki takanaparo İtanoro. ⁹ Ininiã nitxai hĩte, kiki takanapiniãro İtanoro, ãtikata masirĩkatoka, iua kamari maerekati. Itakinĩãro ãto sito, maerekati apiata ikama, kotxi !imaãkatari Teoso paniãtakiti. Oa itakanapakito taãkari apaka kamari maerekati —Xesosi txana ninoa.

¹⁰ Ininiã imoianariakori ikara ikenakotakasaakina, itxarina Xesosi:

—İtaniritxi, İtanorotxi !auiritaãka itakanapakakinina, ininiã erekapiimana imĩtaniriuatakanina —itxarina.

¹¹ Ininiã Xesosi:

—Erekapitikari kãkiti İtanorouatini. ãtikakanoka Teoso kona nirekari İtanorouatinina. ¹² İxika auapitika kãkiti mĩtanorouatakani. Kotxi ãtikaka kiki auakasaaki, iĩtona kona apakata ninoa takiniro sito. Apanakinipekana ikisauakatsikitiko xika kona ninoa posota itakinirona sito. Apanakinipekana

kona nirekari itanorouatini Teoso auñtetxi ininiãua ãtipirika isãpiretini ïkapani. Teoso manirekakaniãri pite itanorouatini, ininiã kona pñtanorouatape –itxa Xesosi.

Xesosimoni Amarini Apokini

(Marko 10.13-16; Arókasi 18.15-17)

¹³ Iposo atoko kãkiti minana amarini Xesosimoni. Inirekarina ninoa kii nopini iuako itakini. Inirekarina Xesosi misãkiretiniri Teoso amarini ïkapani. Txamari imoianariakori txitana. !Auiritana amarini anikinina Xesosimoni.

¹⁴ Ininiã Xesosi txana imoianariakori:

–Hãuiritanako amarini notamoni apokini. Kona hñotokakapena notamoni apokinina. Kotxi kãkiti Teoso auñtetakani amarini atoko itxauana –itxana.

¹⁵ Ininiã iuako itaka ninoa kii nopini. Iposo atoko ïkorape itxa.

Ãtokori Ito Txineiroteri

(Marko 10.17-31; Arókasi 18.18-30)

¹⁶ Ãtokori apoka Xesosimoni.

–Koerekareri erekariï, kiripa erekari nikama ãtipirika Teosokata nauini ïkapani? –itxari.

¹⁷ Ininiã Xesosi:

–Kininiãpa “erekari” pitxano? Kãkiti erekari !auari. Teosonanira erekari. Teosokata ãtipirika pauini pinirekiniã, pikamariko Teoso paniãtakiti.

¹⁸ –Ïkiripa? –itxa.

Ininiã Xesosi:

–! Pokaniuatape. ! Pisirñkape ãti itanorokata. ! Piñtiriuatape. Poxiene ! pikamape. ¹⁹ Piri, pinoro pakini pipaxitako. Pitiretanako apanakini, piteka pitiretiniua atokokana, pitxapaniko –itxari.

²⁰ –Nikamapitikari ïkara atoko pinakiti. Kiripa apikomoni nikamaã Teosokata ãtipirika nauini ïkapani? –itxari.

²¹ –Ikinika kinirão kamaka pinakasaaki, ikinika pitii pivñtxitako. Txineiro papakapakito pisika kãkiti matxineirotenimoni. ïkara atoko inakari pikaminiã, Teoso tixine papokasaaki ikinipoko erekari auiniiko pite. Pitii pivñtxitaka atoko, notakata sa pitxako –Xesosi txari.

²² Iua ãtokori ïkara ikenakotakasaaki, isipe. Imatinaninoka itxari ãtokori, kotxi kaiãori itii. !Nirekari itii ivñtxitini. ²³ Ininiã Xesosi txana imoianariakori:

–Atãopitikara ia nitxai hñte. Pamimari katxineiroterini auñtetiniri Teoso.

²⁴ Apikomoni nisãpiretai. Atauako kamero napatari ãtorike sonakiã? Apia mimari kãkiti katxineiroterini auñtetiniri Teoso –itxana.

²⁵ Xesosi moianariakori ïkara ikenakotakasaakina, itsorñkaãtana. Ninoa uãkatari katxineiroterinimoni txineiro aua, kotxi Teoso apokaerekatana ninoa, ininiã txineiro isika ninoamoni, ninoa uãkatakiti. Ininiã ninoa pimaãri:

–Katxineiroteri maposotakaniãri Teoso tixinemoni isini, kipa posotari iuaã isini? –itxanãtana.

²⁶ Xesosi atamatana. Apakapapiretana:

–Kãkitika kona posotari. Teoso posotari ikinipoko ikamini.

²⁷ Petro misãkiretari Xesosi:

–Atepekana, ate takanapapekari ikinipoko pitekata asini ïkapani. ïkara atoko aniniã, kiripa ate apakapako? –itxari.

²⁸ Ininiã Xesosi:

–Atãopitikara nitxai hñte. Nota, hñtari iaxitikiri niitopãkako auñtetxi itopanere nopini. Iuasaaki ikini itixiti amaneri itxauako. Ikinipoko atamatatanoko nota hñtari iaxitikiri iotximere. Iuasaaki hñte nisãkire Kñpitakanii apaka topãkako auñtetxi itopanere nopini. Iua iitopaneretxi tosi pakini.

Tosi nirimanetxi Isaeo tixine auakani auñteakori hñtxauako. ²⁹ Atxiñti nota ñkapani pitakanapari paapoko, pitariakori, pitaroakoro. Atxiñti nota ñkapani pitakanapari piri, pinoro, pamarite. Atxiñti pitakanapari pikikiote nota ñkapani. Ñkara pitakanapakasaaki nota ñkapani, apiata papakapariko. Itori papakapariko. Ñkara atoko pininiã nota ñkapani, ãtipirika paua Teosokata. ³⁰ Itori kãkiti apiarini uatxa, itixi xipokini õtisaaki poiãorini itxapekauana. Uatxa itori kãkiti poiãorini, apiarini itxapekauana itixi xipokini õtisaaki –itxa Xesosi sãkire.

20

Ova Takakoriãtaã Parĩkauatakani

¹ Xesosi txari:

–Teoso auñtetxi ininiua ia kakikioteri atoko itxa. Ia kakikioteri takapekari txipokori ova inakoro ikikioteẽ. Ovanoka itaka. Oiõpeka onakasaaki, iua kakikioteri potorika ñkanõkapanika. Initari parĩkauatakani ova amakani ñkapani. ² Aõkitakasaakina, ipimaãna: “Hinirekatari parĩkatxi?” itxa.

–“Ari, anirekapitikari,” itxana.

–“Atauako ãtoka txineiro ota pirata kamakori apakata ãti õti pokamara iparĩka ñki ñkapani?” itxana.

–“Ari, apakatapitika,” itxana. Kotxi ãtoka ota pirata kamakori iuasaaki atão parĩkatxi ñki ãti õti pokamara kãkiti parĩkauatini ñki. Ininiã itakaremoni iokanatana iparĩkauatinina ñkapani.

³ –Novi oarape inakasaaki iuañkana ipotorika. Nipokori vëtxitikoõtaãmoni isa. Iuaã atamatana kãkiti maparĩkauatakani. ⁴ Ininiã imisãkiretana: “Hñte apaka atxiñti nirekatari hñparĩkauatini nitakareãtaã, ininiã niñkitxitai atão inakari hñparĩka ñki,” itxa. Ininiã ninoa apaka sari.

⁵ –Apaniãxitipeka inakasaaki iuañkana iokanatana apanakini parĩkauatakani itakaremoni. Itinñkitakasaaki iuañkana iokanatana apanakini parĩkauatakani itakaremoni. Mitxi isãkire atokokana itxa isãkire ninoamoni. ⁶ Mapiãnikata takotepeka inakasaaki iuañkana isa parĩkauatakani initini. Apokapanikana maparĩkauatakani. Ipimaãna: “Kinirepa ia õti maparĩkauatanika hñtxa?” itxana.

⁷ –“Kotxi kona kãkiti sikaua parĩkatxi,” itxarina.

–“Nitakareãtaã hñsa. Iuaã hñparĩkauata. Hñte apakapariko hñparĩka ñki erekari,” itxana.

⁸ –Ñkanõkapeka inakasaaki kakikioteri akiritari initiri apiari: “Parĩkauatakani pakirita. Piñkitxitana. Merepanika piñkitxitana kãkata parĩkauatakani. Eereka piñkitxitana tinñkitika parĩkauatakani, pitxaãpotako,” itxari.

⁹ –Kikata parĩkauatakani imakinikana apakapari ãtoka txineiro ota pirata kamakori. ¹⁰ Kikiãkini ñkanõkapanika parĩkauatakani ikara itikasaakina, oãkatarina: “Ate apakaparoko apiatako aparĩka ñki,” itxamana. ãtoka txineiro ota pirata kamakoro imakinikana apakapana. ¹¹ Txineiro apakapakana atoko, omanãkarauatana. “!Erekari kakikioteri,” itxanãtana. ¹² Ininiã ninoa txari iua: “Naia kãkata parĩkauatakani poiãoka iparĩkauatana. ãto oaranoka iparĩkauanãtana. Ate parĩkauata ikiniõtika kapatakariã. Ate parĩkauatapitipo, txamari pite ikitxitaua ate naia piñkitxitini atokokana. Kona erekai,” itxarina.

¹³ –Iua kakikioteri apakapapiretana: “Nitiretakini, kona nota misiriene-tai hñte. Ñkanõkapanika nipimaã: ‘Atauako ãtoka txineiro ota pirata kamakori apakata ãti õti pokamara iparĩka ñki ñkapani?’ nitxai mixikanani. Ininiã hñte: ‘Ari, apakatapitika,’ hñtxa. Ininiã na nimisiriene-tai hñte. ¹⁴ Ininiã txineiro nisikakito hanikaika. Haãpokomoni hñsipeka. Nota nirekari niñkitxitinina hñte

tikini parĩkauatakani hĩte niĩkitxitini iaõka. ¹⁵ Atauako kona erekari nota txineirote ninirekakitimoni nisikini? Hĩte xikotano, erekari nikamini xika," itxana ninoa.

¹⁶ Xesosi xipokari isãpirena:

—Itori kãkiti apiarini uatxa, itixi xipokini õtisaaki poiãorini itxapekauana. Uatxa itori kãkiti poiãorini, apiarini itxapekauana itixi xipokini õtisaaki. Teoso aiatana kaiãopokori kãkiti itixine isinina ikapani, txamari poiãonoka iua mereẽ —itxa Xesosi.

Iuaĩkana Xesosi Sãpiretari Ipinini

(Marko 10.32-34; Arókasi 18.31-34)

¹⁷ Xesosi Xerosareẽmoni ikimaporitakasaaki, akiritana imoianariakori. Ninoanoka imisãkireta.

¹⁸ —Hĩkenakotari nisãkire. Xerosareẽmoni asako. Iuaã nota hĩtari iaxitikiri mikapiritaãkako. Sasetotxi auĩteakori, kaiõkatsoparerini pakinimoni nisikaãkako, ininiã ninoa apotiitaua. Iuasaakiko ninoa txari: "Okaãkapitikako." ¹⁹ Eereka ninoa sikano Xoteo minakonimoni. Ninoa napetano. Ixirokitatanona aãpitsaã. Iposo atoko aamina İpiriãmitakariã tokakita ninaãkako, oka itxanonako. İpi ãti õtisaaki nõkitikauako, iuaĩkana aua nitxako —itxa imoianariakorimoni.

Txiako, Xoão Pakini Amanaãkiti

(Marko 10.35-45)

²⁰ Eereka Sepeteo İtanoro apoka Xesosimoni. Ominana imi Txiako, Xoão pakini. Ninoa Txiako, Xoão pakini Xesosi moianariakori. Okapotoreẽkaua iua apisatoõ.

—Atauako ninirekakiti pikaminano? —otxari.

²¹ —Kipa pinireka? —itxaro.

—İkinimane auĩte pinakasaakiaua, ninirekari naia ipi namariteni auĩtetxiakori ininiãuana pitekata. Pauiritatana pitekata itopãkinina, ãti pikikomoni inini, ãti pisaneremoni inini? —otxari.

²² Ininiã Xesosi apakapapiretana ninoa:

—!Himarotari hamanaãkiti. Mapaõti napa atoko iteene nimisiritaãkako. Atauako hĩposotatari hãtatsiitiniri notakata? —itxana ninoa.

—Aposotapitika —itxarina.

²³ —Atãopitikara hãtatsiirauata notakata, txamari kona notani mereẽna kãkiti nikikomoni, nisanaremoni topãkakanı ikapani. Nirira mereẽpekana ninoa kãkiti notakata topãkini ikapani —itxana.

²⁴ Apanakini Xesosi moianariakori kenakoenetari Txiako, Xoão pakini amanaãri Xesosi auĩtetxi ininiuana ikapani, ininiã omanatana. ²⁵ Ininiã Xesosi akiritana ninoa imakinikana iuamoni.

—Himarotari Xoteo minakanıua auĩteakori paniãtari kãkiti ikinika auĩteakori nireẽkiti ikaminina ikapani. Kona atão itiretana kãkiti. Kãkiti kona kamari auĩtetxiakori mauiritakinıti. ²⁶ Kona ninoa auĩtetxiakori atoko ! hĩtxape. Atão apiari pinıniua pinirekiniã, pımoianariko apanakini.

²⁷ Apanakini auĩte pininiã pinirekiniã, nitiritxi pitxauako merepanika.

²⁸ İkara atoko nitxa nota hĩtari iaxitikiri İkorapokoriti napokasaaki. Ninitiri ! auari. İkorapokoriti napoka, kãkiti nitiri ninıniua ikapani, kãkiti nitiretini ikapani. İkorapokoriti napoka nipinini ikapani, kaiãopokori kãkiti mapınakani ikapani, kotxi nota iĩkitxırauata ninoa mapınakani ikapani —itxana ninoa.

İpi Mõsiãreni Xesosi Makananıtini

(Marko 10.46-52; Arókasi 18.35-43)

²⁹ Xerikoo sitatxiti ipotorikasaakina, itomaneri kākiti sari Xesosikata, imoianariakori pakinikata. ³⁰ Iuasaaki ipi mōsiāreni topākanāta kimapori tiniāpo. Xesosi napaāpotini ikenakotakasaakina, akiritana:

—Apiananiri, aūiŕte Taviini apika mekanirii, piamonīkaua ate —itxarina.

³¹ Kākiti iuaā pinitana:

—Himaātako —itxana.

Txamari apiata akirikatana:

—Apiananiri, aūiŕte Taviini apika mekanirii, piamonīkaua ate —itxarina.

³² Ininiā Xesosi iotoka. Akiritana ninoa mōsiāreni. Apokana iuamoni.

—Kipa hinireka nikaminii hīte? —itxa.

³³ —Apiananiri, aītikapokotini anireka.

³⁴ Ininiā Xesosi amonīkana. Okina nopini itakari iuako. Iuasaakipeka kōsiārepekana, sa itxana Xesosikata.

21

Xesosi Xerosareē Apokaāpotini

(Marko 11.1-11; Arókasi 19.28-40; Xoāo 12.12-19)

¹ Xesosi imoianariakorikata imatokoāpotari Xerosareē. Apokana Petxpaxee inakori aapokotxiti, ōtanoxiratari takote Oriya inakori xiratamoni. Iuaā Xesosi iokanātana ipi imoianariakori aapokotximoni.

² —Hīsa ikiraā kaixiti auakari aapokotxtitiā. Iuaxiti hāpokasaaki, hāpokaroko xomēta iaxiriākoru oimikata. Hīkoxirikana. Uaimoni mina hītxanako. ³ Āti misākiretakasaaki: “Kinirepa hīkaxirikatari pirātxi?” Ininiā hīte: “Apiananiri nirekana,” hītxako. Ininiā iua auiritai himinina —itxana ninoa.

⁴ Kītxakapirīka Teoso sākire sāpiretakari sāpiretakekari ikara atoko inakari. Ininiā iua sāpiretakiti kītxakapirīka atāo inakari apokapeka. ⁵ Iua txari:

Hītxariko Xerosareē auakanimoni: “Hātamata. Hīauite apokaāpota hītemoni.

! Kaneenamari. Xomēta nopini iitopākanāta. Xomēta ākiri nopini isaāpota,” hītxako ninoamoni,

itxa Teoso sākire sāpiretakari kītxakapirīkapeka.

⁶ Ininiā Xesosi moianariakori sari. Ipaniātakiti iaōka ikamana. ⁷ Ininiā iminaro xomēta oimikata. Itakarina imākana inopinina Xesosi topākini ĩkapani.

Ininiā Xesosi topāka xomēta ākiri nopini. ⁸ Itomaneri kākiti katamēkari imākana kimapori āpo. Apanakini sauakari aāxike. Ikasirīkaxikeāpotarina aāxike kimapori āpo. Ikara atoko ikamana, Xesosi paxitiko oerekinina ĩkapani. Imākana nopini, aāxike nopini, xomēta napaāpota. ⁹ Kākitipokoni ĩkiikakani. Kākitipokoni Xesosi tikini ĩkani. Imakinika saāpotakasaakina, akirikatana:

—Peerekari Tavii apika mekaniri. Teoso posotiierekata ĩkari, Teoso nireēkiti kamakari iua. Teoso sikariko erekari iuamoni. Peerekari Teoso, iaxiti apiko nopinixiti auakari. Apiananiri itxaua —itxaāpokatana.

¹⁰ Ininiā Xesosi apokapeka Xerosareē. Iuasaaki ikinimane Xerosareē auakani tsorīkaāta.

—Kirinapanipa ikira kiki inatari? —itxanātakakana.

¹¹ Kākiti Xesosikata ĩkani sāpiretana:

—Xesosikara ikira. Teoso sākire sāpiretakari, ikira. Nasaree sitatxitikiri, Kariréia tōpa auakari ikira —itxana.

Pirātxi Vētxitakani Omitikiko

(Marko 11.15-19; Arókasi 19.45-48; Xoāo 2.13-22)

¹² Xesosi İroã aiko ãki Teoso misãkiretikoãtaã. Omitikenatana tiitxi vëtxitakani. Amotiitakani Teoso misãkiretikoãtaã auakani omitikenata. İkitakari txineiro vëtxitakani mesate. Kamoa vëtxitakani topãkini apaka ikitaka.

¹³ Xesosi misãkiretana:

—Teoso sãkire iõkatsopatakori txari:

Ia naapoko, “Teoso misãkiretiko aikoti” akiritaãkako, itxa. Txamari hİte txİkitakari ia aiko kİtiririni iomaãtiniãtaã ininiua —itxa Xesosi.

¹⁴ Mokirini, kãkiti matİpokotakani pakini apoka Xesosimoni Teoso misãkiretiko aikotiã. Erekapeka itxİkitakana ninoa. ¹⁵ İuasaaki amarini Teoso misãkiretikoã auakani iteene akirikata:

—Peerekari aãuİte Taviini apika mekaniri —itxanãtana.

Sasetotxi auİteakori, kaiõkatsoparerini pakini itikari Xesosi posotiire, kãkiti erekapeka itxİkitakani. Ninoa kenakotari amarini akiritakiti:

—Peerekari aãuİte Taviini apika mekaniri.

İniniãkara ninoa omanãkarauata. ¹⁶ İniniã imisãkiretarina Xesosi:

—Pikenakotatari ikara amarini akiritakiti? —itxana.

—Nikenakotapitikari. Hİte atatsopatapekari ia Teoso sãkire iõkatsopatakori:

Åtokoriakori, amarini pakini, ninoapeka apaka txariko: “Peerekari iua,” itxanako,

itxa Teoso sãkire iõkatsopatakori. İniniã Teoso sãkire iaõka ninoa kamanãta. İniniã erekapitikari ninoa akiritakiti —itxa Xesosi.

¹⁷ İposo atoko itakanapana. İkorape itxa. İtakanapari Xerosareë. İsa aapokotximoni Petãnia inakorimoni. İuaã itxiaka.

Piko Mina Marito Pirena

(Marko 11.12-14, 20-25)

¹⁸ Katimatinİkara iuaİkana Xesosi sari sitatximoni. İpixinipokoriti inatxita.

¹⁹ Atamataro piko mina kimapori İtiniãpo. İsa oamoni txipokori itximini İkapani. Txamari otsopanani auaro. İuasaaki itxa:

—Kona kariİkaiko —itxaro.

İuasaakipeka otxiaroka.

²⁰ İmoianariakori ikara itikasaakina, itzorikitaãtana.

—İ natokopa otxape katimari otxiarokini? —itxanãtana ninoa.

²¹ İniniã Xesosi:

—Atão nisãpiretai. Teoso sãkire hãuikiniã, hİte posotari hİkaminiri mixikanani nikamakiti atoko inakari. Piko mina txiarokini nitxİkitakini atoko, hİposota hİkamini. Teoso sãkire iteene hãuikiniã, apiata hİkamako. Hİposotamariko hİpaniãtiniri ikira ixirata: “Põkitikaua. İpoamoni oka pitxaua.” İuasaakipekamako ixirata ipoamoni oka itxamauako. ²² Pite atão pauikiniãri Teoso sãkire, iua pimisãkiretakasaaki, İkinipoko pamanaãkiti Teoso sikai —itxa Xesosi.

Xesosi Paniãtakari Moerekakoni

(Marko 11.27-33; Arõkasi 20.1-8)

²³ Xesosi İroã Teoso misãkiretiko aikotiã. Kãkiti oerekasaaki, sasetotxi auİteakori, kiomãtxiakori pakini apoka iuaã. İpimaãrina Xesosi:

—Kipaniãpa pikamari İkora pikamakiti? Kİpa paniãtai? —itxarina.

²⁴ İniniã Xesosi:

—Nota apaka pimarauatako hİtemoni. Åtinoka nipimaãiko hİte. Nota pimaãkitiko hİtemoni hİsãporetiniãno, nota apaka sãpiretai hİte hİpimaãkiti notamoni, ininiã nisãpiretai nota paniãtakari uãka apaka. ²⁵ İa nipimaãi hİte: “Kİpa paniãtari Xoõoni ipatxisarauatini? Teosokani paniãtari Xoõo? Kãkitikani paniãtari Xoõo?” —itxana.

Ininiã ninoa misäkiretakakaua:

—“Teoso paniätari,” aniniã, “Kinirepa kona häuikataris isäkire?” Xesosi txamaueereka. ²⁶ “Käkkitira paniätari Xoão,” aniniã, apanakini omanatamaua, kotxi ninoa uäkataris Xoão Teoso säkire säpiretakari ininiua.

Ikara atoko itxana imisäkiretakakinuana. ²⁷ Ininiã apakapapiretana:

—!Aimarotari iua paniätakari.

Ininiã Xesosi:

—Nota apaka kona säpiretai nota paniätakari uäka.

Iri Säkire Kïpitakari, Iri Säkire Makïpitakati Pakini

²⁸ —Hïxinikariko ia nisäpiretakitiko: Kiki auari ipi imi. Akiritari anekari. “Namarite uatxa piparïkauata nitakare ova auiniãtaã,” itxari imi.

²⁹ —Ininiã imi anekari: “!Nisapani. !Ninirekari nïparïkauatini,” itxari. Eereka ixinïxaxitinãta. “Ari, nisapitïkako,” ininiã isa iri takaremoni.

³⁰ —Iua kiki akiritari imi maneritakari. Ipaniätari iua atokokana. Iua imi: “Ari, nisapitïkako.” Txamari, !isari.

³¹ —Ininiã ïkiripa kamataris iri paniätakiti? —itxa Xesosi.

Ininiã ninoa kiomãtxiakori, sasetotxi auïteakori pakini apakapapiretari:

—Anekarira.

Ininiã Xesosi:

—Atãopitika nisäpiretai hïte. Kïtiriri apokako Teoso auïtetxi ininiãtaãua hïte apisapanika. Kanokarero apokako Teoso auïtetxi ininiãtaãua hïte apisapanika. ³² Kotxi Xoão kapatxisarerini apoka hïtemoni. Oerekai erekari kimaporiti. Txamari kona hïte auikari isäkire. Kïtiriri, kanokarero pakini auikari isäkire. Iuasaaki himarotari ninoa maerekati kamakani takanapiniri imaerekantina. Ikamarina erekarinoka. Hïte itikapekari. Txamari hïte kona takanapari himaerekani. Kona häuikari Xoão säkire, ininiã iua kiki säkire makïpitakati atoko hïtxa, kotxi hïsäkire: “Akïpitapitïkari Teoso säkire,” txamari kona hïkïpitari —itxa Xesosi.

Parïkauatakani Maerekani

(Marko 12.1-12; Arókasi 20.9-19)

³³ —Äti säpirenatxi atão inakari oerekiko nisäpiretai. Hïkenakota —Xesosi txana.

—Kiki kakikioteri takaro txipokori ova inakoro. Ovanoka itaka. Iposo atoko ipiriketaro. Eereka iuaãtaã ikamari ova katsonakiko. Iposo atoko ikamari aapokotxi ôtanori, ikinipoko itakare atamatini ïkapani. Iposo atoko ïkitxitana kikiãkini itakare nïkatakani ïkapani. Ininiã ninoa nïkataris itakare. Eereka kakikioteri sari äti itixiti. ³⁴ Ova manapi inakasaaki, iokanataka iniritariakori itakare nïkatakanimoni, ova apakapinina ïkapani.

³⁵ —Txamari, ninoa maïkapena iniritariakori. Ixirokitatarina äti. Okapirina äti. Äti kai soroã ikiporonakana. ³⁶ Iuaïkana iua kakikioteri iokanataka iniritariakori. Iuasaaki ito iokanata. Mitxirini atokokana itakare nïkatakani txapena ninoani. ³⁷ Eereka imapotökire iokanataris imi ninoamoni. Iuãkataris: “Namarite iua, ininiã ninoa paxitaris iua,” itxa.

³⁸ —Txamari, imi atapakasaakina, imisäkiretakakana: “Erepani imi. Maökari, ininiã okinika itakare kaikotinua atemoni.” ³⁹ Ininiã imaïkarina imi. Kiki xiripirexiti anïkarina. Iuaã oka itxapirina.

Ininiã Xesosi pimaãri kãkiti iua takote auakani:

⁴⁰ —Ininiã iua kakikioteri ïkasaaki, kiãtokopa itxatanako ninoa kikiãkini? —itxa Xesosi.

⁴¹ Ininiã ninoa iua takote auakani apakapapiretari:

—Kakikioteri okanako ninoa maerekati kamakani. Iikixitanako apanakini itakare nīkatakani ĩkapani, ininiā ninoa sikipititaroko ova oiōkasaaki — itxarina Xesosi.

⁴² Ininiā Xesosi:

—Hīte atatsopatapekari ia iōkatsopatakori Teoso sākire:

Kai aapokotxi kamakani kona nirekari āti kai soro. Iua kai imanirekakiniti kai apiari itxapekaua. Apanakini kai soro maīkakari itxaua. Teosokara txīkitakari ikara atoko inini. Ikara peerekari atemoni.

Nota hītari iaxitikiri iua kai atoko nitxaua. Peerekari Teoso, kotxi nota hītari iaxitikiri kākiti manirekakiniti. Teoso txīkitakano nota apiananiri nininiāua.

⁴³ —Ininiā nisāpiretai hīte, Teoso kona hīauīte !itxaikauako. Iua mereēriko apanakini kākiti inakitiakori ĩkapani. Ninoa kamapitikari Teoso nireēkiti.

⁴⁴ Apikomoni Teoso sākire iōkatsopatakori sāpiretaua iua kai apiari atoko inakari. Itxari:

Kākiti iua kai nopini irikasaaki, ikarouata iua. Kai kākiti nopini irikiniā, !auaika kākiti,

—Xesosi txana ninoa.

⁴⁵ Sasetotxi auīteakori, pariseoakori pakini kenakotakasaakiri ikara sāpirenatxi atāo inakari oerekiko Xesosi sāpiretakiti, ninoa !apokaerekatarina isāpirena, kotxi imarotarina ninoa takari nīkatakani maerekani atoko inakani itxauana. ⁴⁶ Ininiā ia xika inirekarina imaīkinirina. Txamari !imaīkarina, kotxi ipīkarina kākiti iuaā apotiitakanuia. Kākitimoni Xesosi atāo Teoso sākire sāpiretakari itxaua.

22

Kiiniri Ītanorouatiko Pirena

(*Arókasi 14.15-24*)

¹ Iuaīkana Xesosi sākirauatakasaaki kākitikata, isāpiretari sāpirenatxi atāo inakari oerekiko. Itxari:

² —Teoso auītetxi ininiāua ia auītetxi atokokana. Ia auītetxi kamari kiiniri imi ĩtanorouatini ĩkapani. ³ Ipaniātari inītiriakori akiritinina ikemaītxitakini kiiniriā ininina ikapani. Txamari ikemaītxitakini linirekari ikiniriteē isinina.

⁴ Iuaīkana iokanatarī apanakini inītiriakori ikemaītxitakinimoni. “Hīttxanako: ‘Nīpokori iposopeka. Nokapekari kema auīte, kema auīte ākiri pakini. Paīpepokori. Imakinika nīposotapekari. Hīsapoka kiinirimoni,’ hīttxanako.” Ininiā ninoa kamari isākire iaōka.

⁵ —Txamari ikemaītxitakini !imaākapiretarina. Iparīkamoni isana. Ātikaka sari kikiomoni. Apanakini sari ātiātaā tiitxi ivētxitinimoni.

⁶ Apanakinipekana maīkapena inītiriakori, noropata, oka itxapena. ⁷ Iua auītetxi ikara inakariene ikenakotakasaaki, iteene inaiataua. Iokanatarī isotatoneakori ninoamoni. Ininiā okapena ninoa kokanirini. Iotikapirina ninoa aapoko.

⁸ —Eereka iua auītetxi akiritana apanakini inītiriakori: “Kiiniri namarite ĩtanorouatini pirena iposopeka. Txamari merepitipanika nikemaītxitakini !erekana. ⁹ Iua atoko ininiā, hīsa ahoaātaā, kākiti napanakiniātaā. Hīkemaītxitana ikinimane haōkitakini,” itxana ninoa.

¹⁰ —Ininiā isana ahoaātaā. Ikemaītxitana ikinimane aōkitakini. Apotiitarina kākiti itanapoko. Maerekani, erekarini pakini apotiitana. Anikana kiinirimoni, ininiā kākitiipokoni xāpoākata.

¹¹ —Iua auītetxi atamatana ikemaītxitakini. Atamatari kiki mākatxi ĩtanorouatikosaaki ieretaākori mieretaākati. ¹² Ininiā akiritari iua: “Nimoianari, kiātokopa piīroā naapoko, kotxi mākatxi ĩtanorouatikosaaki ieretaākori kona pieretaka?” Iua kona kasākireri.

13 —Ininiã iua auñtetxi paniãtari initiriakori: “Himañkariko. Hñaxirikariko iuako, ikitinota pakini, anika hitxariko mapara. Piãkatximoni hõkariko,” itxana initiriakori. Iuaãtaã kãkiti txiapatiniãtaã, kãkiti akerakitatsiriñtiniãtaã.

14 Xesosi xipokapiretari isãpirena.

—Itmaneri kemañxitakoni. Txamari poiãoka mereẽkoni —itxana ninoa-moni.

Homano Auñte Ñkitxitiko Pirena
(Marko 12.13-17; Arõkasi 20.19-26)

15 Ninoa pariseoakori sipeka. Eereka apotiitauana. Imisãkiretakakana. Ixinikaxitinãtarina:

—Anirekari Xesosi kerokiniri isãkire, aãpoñtini ñkapani. Ininiã kiãtokopa atxatari apimainiri ikerokiniri ñkapani? —itxanãtakakana.

16 Ininiã ninoa pariseoakori paniãtana ãtikaka ninoa oerekakini, apaka ãtikaka Erotxi sãkire auñãkani, Xesosimoni isinina ñkapani. Ininiã isana iua-moni. Imisãkiretarina. Pariseo sãkire iaõka isãpiretana.

—Koerekareri, aimarotari atãoenepitikara pisãkire. Atãoenepitikara pisãpiretari Teoso nireẽkiti akamini ñkapani. Pite na piãkarauata xatiki kãkiti sãkire xika. ãtinoka pisãkire pisãpireta ikinakariti kãkitimoni. Apanakinimoni pisãpiretakiti iuatxikana pisãpiretari apanakinapemoni.

17 Ininiã pisãpiretaua. Atãokani txineiro asikini Homanoakori auñtemoni, Sesa inakorimoni? Apakata amasikakaniri iuamoni? —itxarina iua.

18 Xesosi imarotari ninoa nirekari ikerokiniri isãkire. Ininiãkara itxana:

—Kinirepa hinirekari nikerokiniri nisãkire? Kona erekai hñte. Hñsãkirauatakasaaki, kãkiti erekarini atoko hitxa, txamari maerekati hñkama.

19 Hõerekano txineiro ota Homano auñte asikini ñkapani.

Ininiã iminarona txineiro ota.

20 —Kisanõkapa ia? Kiuãkapa aua uai? —itxana ninoa.

21 —Ari, Homano auñte —itxana.

—Ininiãkara hñsakariko Sesamoni iua nakiti. Hñsakariko Teosomoni iua nakiti —Xesosi txana ninoa.

22 Ñkara apakapapirenatxi ikenakotakasaakina itsoriãkaãtana.

—Paimatireri iua —itxanãtakakana.

Ininiã itakanaparina, sipeka itxana.

Ipñkari Õkitikiniua Mauikakoni
(Marko 12.18-27; Arõkasi 20.27-40)

23 Iua õtisaakipeka ãtikaka satoseo apoka Xesosimoni. Satoseo inakoni ! auikari ipñkani iuañkana õkitikiniua.

24 —Koerekareri, Moisesinira oerekari ia sãkiretxiti: “Kiki meenetipanika ipininiã, iua itari takaroko tikinitakoro. Iua itari keene ininiã, itakauãkatari amarini iua itarini ipñekarini uãka,” itxa Moisesini. 25 Setxi itaritxiakori aua mitxi ñkorapokoriti. Apia anekatakari ñtanriuata. Eereka ipñpe meenetika, ininiã itari takaro iuani tikinitakito. 26 Iua atokokana iua itari ipñpe meenetika. ãti itari iuañkana takaro iuani tikinitakito. Txamari iua atokokana ipñpe meenetika. Iua atokokana txaãpota ikinika itariakori.

27 Eereka oa sito apaka opñpe. 28 Ininiã ipñkani iuañkana õkitikasaakia iuañkana auãki ininina, ñkiripa õñtaniri aua oakata iusaaki? Kotxi ikinimane ninoa setxi itariakori takapekaro oa —itxarina iua.

29 Ininiã Xesosi:

—Hñte kerokari, kotxi !himarotari Teoso sãkire iõkatsopatakori. !Himarotari Teoso posotiire apaka. 30 Ipñkani iuañkana aua inakasaaki, kona ninoa ñtanriuataika. Teoso nitiriakori iaxitikini atokopeka itxanako. 31 Hñte !auikari

ipĭkani ōkitikiniua iuaĭkana auāki inini. Atauako kona hātatsopatanikari Teoso sãpiretakiti hĭtemoni? Iara isãpiretai:

³² Apraão, Isaki, Xakoo pakini Teosonekarano nota, itxa Teoso. Ininiã Apraão, Isaki, Xakoo pakini auãkipanika itxana, kotxi auãki inakani Teosonera iua. Ninoa uatxa auãki inakani, kotxi kona ipĭkani Teosoneni Teoso –itxa Xesosi.

Iuaasaaki kãkitipokoni kenakotari ikara Xesosi sãkire. ³³ Xesosi sãkire ikenakotakasaakina, itsorĭkaātana, kotxi paimatireri Xesosi apakapapiretakiti satoseoakorimoni.

Teoso Paniãtakiti Apiari Akamini
(Marko 12.28-34)

³⁴ Xesosi iĭkiteritika apakapapiretari satoseo pimainiri, ininiã satoseo lipimaruataika. Pariseoakori kenakotari ikara, ininiã apotiitauana. ³⁵ Pariseo, Moisesi sãkire oerekakari, iua nirekamari Xesosi kerokiniri isãkire. Ininiã ipimaãri:

³⁶ –Koerekareri, ĭkiripa Teoso paniãtakiti apiari txataua? Kipa apiaerekata Teoso nireĕkiti akamini? –itxa.

³⁷ Ininiã Xesosi apakapapiretari:

–“Pitiretariko Apiananiri piTeosone, ikinipoko pinireĕkitiã, ikini pãkixinireĕ, ikinipoko pixinikakitiã pakini.” ³⁸ Ikara atoko inakari Teoso merepitipanika paniãtaua akamini. Ia ipaniãtakiti akamini apiari itxaua. ³⁹ Iuaĭkana Teoso paniãtaua. Ia ipaniãtakiti apaka apiari. Merepanika ipaniãtakiti akamini atoko itxa. “Piteka pitiretiniãua atokotxikana, pitiretariko äti.” ⁴⁰ Iteene atiretiniãri Teoso, iteene atiretiniãri äti, ininiã akamapitikari apanakini Teoso paniãtakiti, Moisesinimoni isãpiretakiti. Iteene atiretiniãri Teoso, iteene atiretiniãri äti, ininiã akamapitikari Teoso sãkire sãpiretakani paniãtakiti apaka –Xesosi txari iua.

Teoso Mereĕkiti Tavii Apika Mekaniri
(Marko 12.35-37; Arókasi 20.41-44)

⁴¹ Pariseoakori apotiitapanikaua inakasaaki, Xesosi pimaãna ninoa:

⁴² –Teoso mereĕkiti pisãpiretano. Kiripa apika mekaniripa iua? –itxana ninoa.

Ninoa apakapapireta:

–Ari, Taviini apika mekanirira –itxana.

⁴³ Ininiã Xesosi:

–Ikara atoko ininiã, kinirepa Erekar Matamatakoti kamasãkiretari Tavii: “Teoso mereĕkiti niauĭte itxaua,” ina sãkiretini? ⁴⁴ Kotxi Tavii txari:

Apiananiri misãkiretari niauĭte: “Nota kikomoni piĭtopãkiniritika nixipokariko pimokaiakariakori. Nikamariko ninoa pikiti pitakiniãtaã atoko ininiua,” Apiananiri txari niauĭte,

itxa Taviini. ⁴⁵ Ininiã Tavii akiritari Teoso mereĕkiti “niauĭte.” Ikara atoko ininiã, kiãtokopa itxa Teoso mereĕkiti Taviini apika mekaniri ininiãua? –Xesosi txari pariseoakori.

⁴⁶ Kona imarotarina, ininiã kona kasãkirena ninoa. Ikara eereka kona kãkiti pimarauataika Xesosimoni, kotxi ipikarina Xesosi imarore.

23

Xoteo Auĭteakori Maerekani
(Marko 12.38-40; Arókasi 11.37-54; 20.45-46)

¹ Ininiã Xesosi misãkiretana imoianariakori, itomaneri kãkiti iuaã auakani apaka. ² Ia atoko isãpiretana:

—Kaiōkatsoparerini, pariseoakori pakini, Moisesini sākire oerekakani itx-auana. ³ Ininiāra ikinika kaiōkatsoparerini, pariseoakori pakini paniātakiti hīkamako, kotxi ninoa sāpiretari Moisesini sākire Teoso oerekakiti. Ikara erekari. Txamari kona ninoa kamari Moisesini paniōtakiti. Ikara !erekari. Ininiā ninoa kamakiti atoko !hīkamape. Kotxi isākirena erekari, txamari ikamakitina !erekari. ⁴ Ninoa kaiōkatsoparerini, pariseoakori pakini, kiki ia atoko inakari ninoa. Ia kiki takari iminani imoianariakori porikiā, txamari iuaka na xatiki nirekari iporikitiniri. Kaiōkatsoparerini, pariseoakori pakini, ikara kiki atoko itxana. Ninoa paniātakiti iua iminani atoko itxa.

⁵ —Pariseoakori kamari erekari apanakini atamatini ikapaninoka, ereka ininina apanakini uākatini ikapaninoka. Himarotari kākiti ieretakari Teoso sākire iōkatsopatakori aākoana xapitiki āki. Eereka iaxirikarina iteētaāna, iuakonotaāna pakini. Ninoa kaiōkatsoparerini, pariseoakori pakini takari aākoana mitari apanakini atamatini ikapaninoka. Paītanori itsarāpe imākana apanakini atamatini ikapani. ⁶ Kiinirisaaiki ninoa nirekari kākiti potxitiniātaā iitopākinina. Aiko āki Xoteoakori apotiitiniātaāua inirekarina kākiti potxitiniātaā iitopākinina. ⁷ Apokaerekatarina okapiretikona ipaxitikona kienatxi vēxtitikoātaā. Apokaerekatarina kākiti akiritinina: “Koerekareri” inikona.

⁸ —Txamari, ātinani hīte oereēkari txaua, Teoso mereēkitira iua. Koerekareri hiniko !hāuiritapeko, kotxi himakinikara hītaritakakaua. ⁹ Kona ikorapokoriti auakari “niri,” !hītape, kotxi ātinani aīri auari iaxiti auakari. ¹⁰ Apaka apanakini akiritinīi “aāuīte,” !hāuiritapeko, kotxi ātinani hāuīte. Teoso mereēkiti itxaua. ¹¹ Auītetxi pininiua pinirekiniā, apanakini nitiri atoko pitx-auako. ¹² Iua “Auītetxi nitxaua,” inakari, Teoso txīkitakariko nitiritxi itxauako. Iua “Nitiritxi nitxaua,” inakari, Teoso txīkitakariko auītetxi itxauako.

Xoteo Auīteakori Misiritaākako
(Marko 12.40; Arōkasi 11.37-44, 52; 20.47)

¹³ Iuaīkana Xesosi sākirauata:

—Erepaniko hīte kaiōkatsoparerinīi, pariseoakorīi pakini. Hīsākire atxiīti erekari, txamari kona hīkamari hīsākire iaōka. Kinirāo iroākari apisapanika aapokotxi tore totakani atoko hītixa, kotxi hīte iotokakari kākiti Teoso sākire atāo auikini, ininiākara hīte iotokakari kākiti iroini Teoso auītetxi ininiātaāua. Hīte kona iroā. Apaka kona hīte auiritana kinirāo iroākani. ¹⁴ Erepaniko hīte kaiōkatsoparerinīi, pariseoakorīi pakini. Hīsākire atxiīti erekari, txamari kona hīkamari hīsākire iaōka. Hīte mixirikari tikinitakoro aapoko. Himisirienetana. Teosokata hīsākirauatakasaaki, itori sākiretxi hīkama apanakini, “paimatirena” inini ikapaninokara. Ikara xika himisiritiko api-afako.

¹⁵ —Erepaniko hīte kaiōkatsoparerinīi, pariseoakorīi pakini. Hīsākire atxiīti erekari, txamari kona hīkamari hīsākire iaōka. Hīte sari ōtakoxiti. Hīpiriātari kōuaāri. Imiriī ōtakoxiti hīsa, hīsākire auikakari hinitini ikapani. Ātinoka hīsākire auikakari auiniā, iuaritika hīsa iuaxiti. Eereka hōerekari iua ipinipoko himarotakiti. Eereka hīte maerekani xika, iua kiki maerekani apiatako. Isapitika hītekata maerekani misiritikoātaā.

¹⁶ —Erepaniko hīte. Mōsiāreni atoko hītixa, iuaritika hinirekari hōekiniri Teoso kimapore apanakinimoni. !Hīposotari. Hīte oerekari apanakini ia hīsākire: “‘Ia nikamapitīkako’ pinakasaaki, Teoso misākiretiko aikoti pakiriuākatakasaaki, pimakamakaniāri, kona pimisiritaākako,” itxa hīte sākire. Iuaīkana hīte sākire: “‘Nikamapitīkariko,’ pinakasaaki, Teoso misākiretiko aikoti āki auakoro oro pakiriuākatakasaaki, pikamapitīkariko pikamaenetakiti. Ikara pimakamakanisaaki, pimisiritaākako,” itxa hīte sākire.

17 —Hīte mōsiāreni atoko. Kona kiūkitei hīte. Īkiripa apiari? Orokani? Teoso misākiretiko aikotikani? Teoso misākiretiko aikoti apiari, kotxi oa oro aiko āki aua, ininiā aiko txīkitakaro oro Teoso nakito oniniāua.

18 —Hīte oereari apanakini ia hīsākire apaka: “‘Nikamapitikariko’ pinakasaaki, Teosomoni sikakori takikoātaā pakiriuākatakasaaki, pikamaenetakiti pimamakaniā, kona pimisiritaākako. ‘Nikamapitikako’, pinakasaaki, Teosomoni sikakori takikoātaā nopini takakori pakiriuākatakasaaki, pikamapitikariko pikamaenetakiti. Pimamakakanisaakiri, pimisiritaākako,” itxa hīte sākire.

19 Hīte mōsiāreni atoko hītxa. !Kiūkitei hīte. Īkiripa apiata? Sikakorikani? Sikakori takikoātaākani? Sikakori takikoātaā apiata, kotxi sikakori inopini takikosaaki, iusaakipeka Teoso nakitipeka. Ininiā sikakori takikoātaā txīkitakari sikakori Teoso nakiti ininiāua. 20 Ininiā pisāpiretakasaakiri Teoso pikamaenetakiti, Teoso sikakori takikoātaā pakiriuākatiniā, iuatxikana iua nopini auakari pakiriuākata. 21 Pakiriuākatakasaakiri Teoso misākiretiko aikoti, iua atokotxikana pakiriuākatari Teoso, kotxi iua aiko āki aua. 22 Pakiriuākatakasaakiri Teoso tixine, ininiā iua atokotxikana pakiriuākatari Teoso topākini. Iua atokotxikana pakiriuākatari Teoso, kotxi Teoso topākini nopini iitopāka Teoso.

23 —Erepaniko hīte kaiōkatsoparerinii, pariseoakorii pakini. Hīsākire atxiūti erekari, txamari kona hīkamari hīsākire iaōka. Ipixini hinakiti hīsikari Teosomoni. Tesi hīti auiniāi, hīsikari āti Teosomoni. Tesi txineiro ota auiniāi, hīsikari āto Teosomoni, hītxaāpota. Ikara hīkamakiti erekari. Nipokori koke, oteraā, erva tosi, kominio, axapitikiri inakari, iuaritika ipixini hīsika Teosomoni. Ikara Teoso paniātakiti hīkamapitika. Txamari, Teoso paniātakiti apiari !hīkama, kotxi !hīkamari atāo apanakinimoni. !Hiamonīkana apanakini. Hīkamaenetakiti !hīkama. Ikinika Teoso paniātakiti hīkamako. 24 Mōsiāreni atoko hītxaua, iuaritika hinirekari hōerekiniri Teoso kimapore apanakinimoni. !Hiposotari. Himakatzakaro xikiri iāriā āki komokakaro, txamari hīxirapoataro kamero, kotxi Teoso paniātakiti poiāori hīkama, txamari ipaniātakiti apiari kona hīkama.

25 —Erepaniko hīte kaiōkatsoparerinii, pariseoakorii pakini. Hīsākire atxiūti erekari, txamari kona hīkamari hīsākire iaōka. Hōeretari hīto maparakiri, txamari hāxixinireē !erekari. Papotxinanii, patirenanii, paītiriri. 26 Hīte pariseoakorii, mōsiāreni atoko hītxa. Merepitipanika himakatzakariko maerekati hāxixinire auakari, ininiā hīto erekatxikana. Hāxixinire ereka ininiā, hīkamakiti ereka apaka.

27 —Erepaniko hīte kaiōkatsoparerinii, pariseoakorii pakini. Hīsākire atxiūti erekari, txamari kona hīkamari hīsākire iaōka. Kai auite iriko, ipikari takikoātaā atoko hītxa. Mapara txīta kasarori minapaākapeka, ininiā mapara peerekari. Txamari, iriko āki ipinakari api, arakapoakatakari aua. 28 Iua atokokanera hītxa. Kākiti uākatai hīte atāo inakarinnoka kamakani hininiua, kotxi hinopini ererini hītxaua. Txamari, hāxixinire !ereri, kotxi maerekatinoka hīkama. Hīsākire atxiūti erekari, txamari kona hīkamari hīsākire iaōka — itxa Xesosi sākire.

***Xoteo Auūteakori Misiritiko
(Arókasi 11.47-51)***

29 Iuaīkana Xesosi sākirauata:

—Erepaniko hīte kaiōkatsoparerinii, pariseoakorii pakini. Hīsākire atxiūti erekari, txamari kona hīkamari hīsākire iaōka. Hīkamari akauari Teoso sākire sāpiretakanini ikapani. Peereri akauari hīkama. Hīkamari akauari ipikani atāo inakarinnoka kamakani ikapani. Txīta himinapa akauariā. Aūi hītaka iuaātaā.

³⁰ Hítxari: “Kítzakapiríka aãtokiriakorini okana Teoso sãkire sãpiretakani. Atepitika auaãkamako iuasaaki, konimako ate okana ninoa,” hítxa. ³¹ Teoso sãkire sãpiretakanini okakani mekaniriakori hítxaua híte. Kotxi hítekara txari: “Aãtokiriakorini okana Teoso sãkire sãpiretakani.” Híte maerekati kamakani ninoa atokokana hítxa. ³² Hãtokiriakorini mipotorikari Teoso sãkire sãpiretakani okinina. Híte xipokapanikanako ãtikaka kãikotakani Teoso sãkire sãpiretakani.

³³—Imini atoko hítxa. Imini anaakori atoko hítxa híte. Himisiritaãkapitikako maerekani misiritikoãtaã. Himitekini !auari. ³⁴ Ininiã nisãpiretai híte. Niokanatanapanikari hitemoni Teoso sãkire sãpiretakani, Teoso iokanapirena imarotakani, koerekarerini pakini niokanata hitemoni. Txamari ãtikaka hõka, aamina ìpiriãmitakari nopini hítokakitana apanakini. Apanakinipekana hìxirokitata aiko Xoteo apotiñiniãtaãua. Eereka hãsikatikinitana ninoa ãti sitatxitimoni sikani, eereka ãti sitatxitimoni, eereka ãti sitatxitimoni hítxaãponãta ninoa hãsikatikinitini. ³⁵ Ininiã híte misiritaãkako ikinika atão inakari kamakani okiko xika. Kítzakapiríka Apeo inakorini okapeëka. Atão inakari kamakari iua. Ikinimane okapekoni tikinimoni okapeëka Sakariani, Parakia ãkiri. Iua Sakariani okapeëka sikakori takikoãtaã takote Teoso misãkiretiko aikoti ãki. ³⁶ Atãopitikara nisãpiretai híte. Kãkiti uatxa auakani apakapariko misirikaretxi ninoa erekarini okapekoni xika —itxa Xesosi sãkire.

Xerosareë Xesosi Tiretini
(*Arókasi 13.31-35*)

³⁷ Iuaãkana Xesosi sãkirauata:

—Xerosareë auakanii, Xerosareë auakanii, híte okapekana Teoso sãkire sãpiretakani. Kai soroã hìkiporonakana ninoa hitemoni Teoso iokanatakini. Kaiãokatani ninirekamari ninikatini, patari oimiakori omíkita patapi otakini atokokana nitxanakamaiko híte. Txamari !hãuiritano nota nĩkatini. ³⁸ Ikara atoko inakari xika haãpoko asikaãkako. Teoso !auaika hítekata. ³⁹ Nisãpiretai. Ia õti hãtamatano, eereka !hãtamataikano. “Teoso takari erekari uaimoni ìkarimoni, Apiananiri posotiireë ìkarimoni,” hinakasaaki, iuasaakinanirako hãtamatanoko nota —itxa Xesosi.

24

Teoso Misãkiretiko Aikoti Iríkiko
(*Marko 13.1-2; Arókasi 21.5-6*)

¹ Teoso misãkiretiko aikoti Xesosi potorikasaakipeka, imoianariakori apoka iuamoni.

—Patamata. Peerepokori aikoniri —itxarina.

² Ininiã Xesosi:

—Ari, hãtamatatari ere aikoniri? Atãopitikara nisãpiretai híte. Koniko kai kãikotapani ãti kai nopini. Imakinika kai irikaãkako —itxana.

Misirikaretxi Apokaenetini
(*Marko 13.3-13; Arókasi 21.7-19*)

³ Iposo atoko Xesosi sari oxiratarimoni, Oriva inakorimoni. Iuaã topãka itxa. Imoianariakori sari iuamoni. Ninoanoka auari iuaãtaã.

—Pisãpiretaua kirisaakiparako aiko Teoso misãkiretiko irikataãkako. Natokopa ininiãparako ate imarotatari pite kaiama kanapirikape pinini? Natokopa ininiãparako aimarotatari itixi xipokini õti kaiamapeka inini õti? —itxarina Xesosi.

⁴ Ininiã Xesosi:

—Erepaniko. !Hãuiritapena apanakini misirienetini. ⁵ Kotxi apokako kãkiti itomaneri “Teoso mereëkiti nitxaua nota,” inakani. Ninoa misirienetana

itomaneri. ⁶ Hīkenakopiretariko neenamatzī ene uaimoni, ōtakoxiti apaka. Iuaritika ! hīpīkarauatape. Kotxi auapitikako neenamatzī. Txamari itixi xipokini ōti ! apokapanika. ⁷ Ikara inakari apisapanika, āti uāka neenamauatoko āti uākakata. Apanakini auīte inirīmanekata neenamauatoko apanakini auītekata inirimane pakinikata. Ātiātaā kākiti inikoriāriko natxi. Ātiātaā amianari inokanako kākiti. Ātiātaā itixi iakeēkatakoko. ⁸ Ikara atoko itxako misirikaretxi potorikini. Sito amarini tsii atoko itxako iuasaaki.

⁹ —Iuasaaki hīte maīkaākako, himisiritiko ikapani. Iposo atoko oka hīnaākako. Nisākire hāuikini xika ikinimane omanataiko hīte. ¹⁰ Iuasaaki itomaneri ! auikaikari Teoso sākire. Itakanapapekarina Teoso kimapore. Imīkapiritakakanako. Omanatakakanako. ¹¹ Apokoko kākiti “Nota Teoso sākire sāpiretakari nitxaua,” inakari. Txamari kona atāo. Ninoa misirienetanako itomaneri kākiti. ¹² Kākiti tiretiko poiāotoko, kotxi maerekanitxi iarikako ikini itixitimoni. ¹³ Iuasaaki kākiti mīteenekiniāri misirikaretxi, imatakana-pakaniāri Teoso sākire, auapikako ātipirika Teosokata. ¹⁴ Teoso iokanapirena erekari, Teoso auītetxi ininiāua, sāpiretaākako ikini itixitari auakanī, ikini kākiti itimarotiniāri ikapani. Ikara inakari auāka atokoikarako itixi xipokini ōti apokoko.

Iteene Maerekanitxi Apokini

(Marko 13.14-23; Arókasi 21.20-24)

¹⁵ Xesosi sāpirenauatapanika:

—Hīte itikariko iteene maerekati kamakari timini aiko Teoso misākiretiko āki. Kitxakapirīka Tanieo inakori, Teoso sākire sāpiretakari, sāpiretapekari ikara ene. Hīte ia atatsopatakani, himarotariko ikara. ¹⁶ Ikara atoko inakari hītikasaaki hīte İkorapokoriti Xotēia auakanī, oxiratarimoni himitekako. ¹⁷ Ikara ōti apokasaaki haāpoko nopini hāuiniā, katima hītxako himitekini. ! Apakata haāpoko āki hītii himakatzakini. ¹⁸ Kikio hīparīkauanātakasaaki, hāapokomoni ! hīkanapiripe himāka hāpini ikapani. ¹⁹ Ikara ōti apokasaaki, kamixironi, kaxitakareroni pakini iteene atatsiitariko. Pasāpaniri ninoa mitekini. ²⁰ Hamanaāriko Teoso katxīkareri mauakanī himitekini ōtisaaki. Hamanaāriko tomatiko ōtisaaki ikara inakari mauakanī ikapani. ²¹ Kotxi ikara mitekatzī ōtisaaki kākiti iteene atatsiitariko imisiritiko. Ikara ōti apisa kākiti ! imarotari iteene imisiritiko. Itixi kamikosaakipapanika ! auari ikara atoko inakari misirikaretxi. Ikara mitekatzī ōti napaāka atoko kākiti ! imarotaikari iteene imisiritiko. Ikara ōti apiatoko kākiti misiritiko. ²² Teoso poiāotakari iua ōti ikinipoko kākiti mapinakanī ikapani. Ito ōti ininiā, kākiti ! auaika. Ipoiōtakari iua ōti, kotxi itiretana kākiti imereēkini.

²³ —Iuasaakiko āti: “Ia kiki Teoso mereēkiti aiātapakiti inakari,” inakasaakii, ! hāuikapiri. Ātipekana: “Ikira Teoso mereēkiti inakari,” inakasaakii, ! hāuikapiri. ²⁴ Kotxi apokoko kākiti paxirari kamakari, “Teoso mereēkiti hiātapakitino nota,” inakari, “Teoso sākire sāpiretakari nitxaua nota,” inakari. Ninoa kamariko posotiiretxi kākiti tsorikitaātini ikapani. Inirekarina kākiti Teoso mereēkini imisirienetinina. ²⁵ Hīkenakota. Nōtākikai hīte ikara inakari apokini ōti apisa.

²⁶ —Hīte sāpiretikosaaki: “Hīkenakota. Teoso mereēkiti aiātapakiti āparaā makipakaniātaāpekareri,” hinikosaaki, ! hīsipe iuaā. Hīsāpiretikosaaki: “Iriko ākirari iua,” hinikosaaki, kona hāuikapiri. ²⁷ Kotxi nota hītari iaxitikiri nikanapiriāksaaki, ! ikara atokoni nitxa. Mēkokari atoko itxa nota hītari iaxitikiri nikanapiriāksaaki, kotxi mēkokari atokatxi pokīkinimoni imēkoka, isapitipo atokatxi ereēkokinimoni, ininiā ikinimane itikariko. Iua atokokana nota hītari iaxitikiri napokini. Ikinimane itikanoko nota. ²⁸ Aātamatakasaakiri

maiori apotiitiniua, aimarotari ipikari iuaãtaã auini. Iua atokokana nota kanapiriãkasaaki, ikinimane imarotari napokini.

Käkiti Itari Iaxitikiri Kanapiriini
(Marko 13.24-27; Arókasi 21.25-28)

²⁹ Xesosi säpirenauatapanika:

—Apikomoni nisäpiretai nikanapiriini pirena. Iua inikoriãkari napaka atoko, atokatxi piãkako. Kasiri kona ponikaikako. Iõriki iaxitikero irikako. Iaxiti iõriki auiniãtaã auakari iakeëkatakako. ³⁰ Iuasaaki Teoso takaõtxikare auako iaxiti, nota hõtari iaxitikiri kaiamapeka uai nikanapiriini himarotini ikapani. Ikara atoko inakasaaki, ikini kãkitti itixi auakani txiap-atak, kotxi ninõa atapanoko nota kãkiti itari iaxitikiri katxiãri åki nikatx-akaãpotini. Nitapararitika napoãkatakako, kotxi ikinimane auite nitxauako iuasaaki. Niotximerekata nikatxakaãpota. ³¹ Okenakotaãkako koitxi mitaro, trõpeta inakoro. Iuasaakipekako niokanatanana ninitiriakori itixi iaõka kãkiti Teoso mereëkini apotiitakani ikapani.

Piko Mina Pirena
(Marko 13.28-31; Arókasi 21.29-33)

³² Xesosi säpirenauatapanika:

—Nisäpiretai säpirenatxi atão inakari oerekiko, piko mina pirena, nikanapiriini apiata himarotini ikapani. Pooõporipeka onakasaaki, otomorekasaaki, “Kamõ apokanapanoka,” hõtxa. ³³ Iua atokokana, ikara misirikaretxi mixikanani nisäpiretakiti hõtikasaaki, himarotapekariko nota kaiama kanapirikapeka ninini. ³⁴ Ia nisãkire atão. Itixi auakani !ixipoka ikinipoko nisäpiretakiti mapokakani apisa. ³⁵ Iaxiti xipokapitikako. Ìkoraxiti apaka xipokapitikako. Iuaritika nota sãkire lixipoka.

Käkiti !Imarotari Xesosi Apokini Manapi
(Marko 13.32-37; Arókasi 17.20-37)

³⁶ Xesosi säpirenauatapanika:

—Käkiti !imarotari ikara õti, nota hõtari iaxitikiri nikanapiriini õti. Teoso nitiriakori iaxitikini apaka !imarotari ikara õti. Niraninira imarotari. ³⁷ Nota hõtari iaxitikiri nikanapiriãkasaaki, kitxakapirõka Noee auakasaaki atoko itxako. ³⁸ Xirataãtxi apisa ikinimane nipokota, iãta itxa. Kiki, sito Ìtaniriuaata. Ikara atokokanera itxa Noee maporo åki iereëtini õti. ³⁹ Ikara apisa !imarotarina ipininina tãkane. Mokatanitika xirataãtxi apoka, ikinikana xipoka itxana. Nota hõtari iaxitikiri nikanapiriãkasaaki, iua atokokanerako itxa, ininiã iposope hõtXako.

⁴⁰ —Iuasaaki nikanapiriini õtisaaki, ipi kiki parõkauanãta kikio. Teoso nitiri iaxitikiri anikariko åti, åti kaikota itxako. ⁴¹ Ipi sito atarokiri kamakani, åto anikaãkako, åto takanapaãkako. ⁴² Ininiã iposope hõtXako, kotxi kona himarotari hãauite kanapiriini õti. ⁴³ Hixinikariko. Kaapokori imarotaãkamariko kãitiriri apokini õti, !imakamako. !Auritamariko kãitiriri anikiniri itii. ⁴⁴ Kãitiriri apoka kãkiti miãtapakinitipanika. Iua atokokanerako nota apokoko himimarotakinitipanikarako. Ininiã iposope hõtXako nota hõtari iaxitikiri hiãtapini —itxa Xesosi sãkire.

Nitiritxi Erekarì, Nitiritxi Maerekati Pakini
(Arókasi 12.41-48)

⁴⁵ —Ininiã Teoso nitiriakori erekarini hõtXauako. Nisäpiretai nitiritxi kimaroreri inakari, kotxi iua kãpitari ipatrãote sãkire. Iuakara ipatrãote paniãta, apanakini initiriakori inãkatini ikapani. Isikakienatanana ipatrãote nitiriakori, nipokori sikiko manapi. ⁴⁶ Iua initiri poxokoniuaata ipatrãote paniãtakiti

iaõka ikaminiã, ipatrãote apokasaaki iposope itxa. ⁴⁷ Atãopitikara nitxai hïte. Iua patrão paniãtariko iua inítiri ikinika inakíti inĩkatini ïkapani. ⁴⁸ Nitiritxi maerekatipekana xinikari: “!Katimari ikanapiriã nipatrãote,” itxa. ⁴⁹ Ininiã apanakini nitiritxi ixiroka. Inipokota, iãta poãtakanikata. ⁵⁰ Ininiã ipatrãote kanapiriãko imiãtapakinitipanika. Ikanapiriãko inítiri mimarotakinítipanika. ⁵¹ Ininiã ipatrãote xirokitatariko aãpitsãã. Iposo atoko imisiritaãkako maerekanikata, “Erekapitikaua ate,” inakanikata. Iuaã kãkíti txiapata, akatsatsiriãtaua ãtipirika. Ininiã ikara nitiritxi maerekati atoko kona hïtxape –itxa Xesosi sãkire.

25

Tesi ãtokoroakoro Pirena

¹ Xesosi sãpirenauatapanika:

–Ia nisãpirena oerekai Teoso auãttxi ininiãua. Tesi ãtokoroakoro kosekari tirikapi. Isana kimaporíã. Iãtaparina ipatrãotena. Iua inapanikako kiinirimoní ïtanorouatini ïkapani. ² Sïko ãtokoro kiĩkiterini, sïko miĩkiteni. ³ Miĩkiteni anikari tirikapi koana, txamari !anikarina tirikapiã. ⁴ Kiĩkiterini anikari tirikapi koana. Apaka txamarina tirikapiã. ⁵ Ipatrãotena !katimari apokini. Ininiã itaponoka ininiãna, imakanãtana.

⁶ –Apanĩkanõka ikenakotarina: “Apokanapanoka. Hïsapoka. Hãpiãkatari.”

⁷ –Ininiã ãtokoroakoro õkitikaua, tirikapi iopotokaka, sa itxana. ⁸ Ninoa miĩkiteni amanaãri kiĩkiterini tirikapiãte, kotxi miĩkiteni tirikapite oakaarita.

⁹ –Kiĩkiterini apakapapiretana: “Kona. Tirikapiã ate nakiti !apakata hïte ïkapani. Ate ïkapaninokara apakata. Hïsa tirikapiã vëtxitakarimoni. Hiamotariko.”

¹⁰ –Ininiã ninoa miĩkiteni sari tirikapiã iamotinina. Ninoa sikasaaki, ipatrãotena apoka. ãtokoroakoro iposope inakani ïroã iuakata aapokotxi ãki ïtanorouatakari kiiniritiã. Itore totaãka.

¹¹ –Eereka ãtokoroakoro tirikapiã amotakani kanapiriã. Ninoa akirita: “Patrão, patrão, pimatakakinaua itore aïroini ïkapani,” itxana.

¹² –Ipatrãotena apakapapireta: “Hïsipeka. Atão nisãpiretai. !Nimarotai hïte.”

¹³ Xesosi sãkirauata:

–Erepaniko. Iposope hïtxako, kotxi !himarotari nota hïtari iaxitikiri kanapiriini õti. !Himarotari amonikitaauako napokini –itxa Xesosi.

Ipi ãti Pakini Nitiritxiakori

(Arókasi 19.11-27)

¹⁴ Xesosi sãpirenauatapanika:

–Nikanapiriini ia atoko itxapaniko. Kiki aiamatapeka õtakoxiti ãti itixitimoni isini ïkapani. Ininiã akiritari iniritiakori. “Hĩnikatariko ikini nitii,” itxana. ¹⁵ Isikari inítiri apia imaroretakari txineiro ota siko mio. ãti inítiri isika txineiro ota ipi mio. ãti inítiri poiãoka imarotakari ãtika mio txineiro ota isikari iua. Eereka sipe itxa.

¹⁶ –Siko mio apakapakari amotari tiitxi, eereka vëtxita itxari. Ikara atoko ininiã apakaparo txineiro ota tesi mio. ¹⁷ Iua ipi ãti mio apakapakari iua atokokana itxa. Iua apakaparo ipi ipi pakini mio txineiro ota. ¹⁸ Iua ãtika mio txineiro ota apakapakari, ikisakari kipatxi, taka itxaro txineiro iua aariko ãki. Ikataro ipatrãote txineirote.

¹⁹ –Eereka okananixiti inaka atoko ipatrãotena kanapiriã. Akiritana: “Kiãtokopa hïtxataro nitxineirote?” itxana. ²⁰ Iua siko mio apakapakari

minari tesi mio. Iua sãpiretari ipatrãote: “Patrão, pite sikano sãko mio txineiro ota. Patamata. Napakapari apikomoni sãko mio txineiro ota pite ikapani,” itxa.

²¹—Ipatrãote apakapapiretari: “Erekapitikai pite. Erekarì nitiritxi pitxaua. Erekarì pinĩkatiniro nitxineirote. Erekapitikari pinĩkatiniro poiãoka nisikinii. Ininiã nauritaiko itomaneri pinĩkatini. Ininiã pipoxokoniuatoko notakata,” itxa.

²²—Iua ipi mio ota apakapakari apoka. Iminaro ipi ipi pakini mio. Isãpiretari ipatrãote: “Patrão, pite sikano ipi mio txineiro ota. Patamata. Apikomoni nota apakaparo ipi mio txineiro ota pite ikapani,” itxa.

²³—“Erekapitikai pite. Erekarì nitiritxi pitxaua. Erekapitikari nitxineirote pinĩkatini. Erekarì poiãoka pinĩkatini. Ininiã itomane nitakanapakoko pinĩkatini ikapani. Ininiã pipoxokoniuatoko notakata,” itxa.

²⁴—Eereka iua ãtika mio txineiro ota apakapakari apoka. Iua sãpiretari ipatrãote: “Patrão, nimarotai pite. Pataparaxinirei pite. Pite amotari pikiena, kotxi kona pite takarauata. Pite apari pikiena pimaparĩkauatakaniãtaã.

²⁵ Nipĩkarauatiniã, nikipataro pitxineirote kipatxi ãki. Patamata. Oia pitxineirote,” itxa.

²⁶—“Nitiritxi maerekati iereri pitxaua pite. Pimarotari niamotiniri nikiena, kotxi ! nitakarauata. Pimarotari nota apari nikiena nima-parĩkauatakaniãtaã. ²⁷ Ikara atoko ininiã, pimanirekakaniãri piparĩkauatini, kinirepa kona pisikatari nitxineirote pãkomoni? Pisikaãkamaroko, napakapamaroko apikomoni nitxineirote nikanapiriãkasaaki,” itxa.

²⁸ Ininiã ãti ipaniãta:

—“Pimakatzakariko iua mio ãtika mio auakiti. Tesi mio txineiro ota auakitimoni pisika. ²⁹ Kotxi apikomoni isiãkako iua itomaneri auakiti, ininiã apiata auinariko iua. Iua poiãoka auakiti, inakito mixirikaãkako. ³⁰ Ia ninitiri iereri hõka mapara piãkatximoni. Iuaã kãkiti txiapata. Akerakitatsiriãta itsii xika.”

Ikinimane Apotiãtaãkako Xesosi Apisatoõ

³¹ Apikomoni Xesosi sãpirenauata:

—Nota hitari iaxitikiri nikanapiriãkasaaki auĩtetxi ninakasaakiaua, ikinika Teoso nitiriakorikata, niitopãkako auĩtetxi itopanere nopini. Peerekari iuaasaaki. Ikinimane paxitanoko nota. ³² Ikini uãkati kãkiti apotiãtaãkako nota apisatoõ. Iuaasaaki nikaiarikitatanako ninoa. Soti auĩte, kapra pakini piratakari ipiraakori koketakaniua ikaiarikitatini atokokanera, nota hitari iaxitikiri kaiarikitatanana ikinimane kãkiti. ³³ Pirãtxi piratakari takiniri soti auĩte ikikomoni, itakiniri kapra isanaremoni, iua atokokanera nota hitari iaxitikiri takari kãkiti erekarini nikikomoni. Kãkiti maerekani nitaka nisanaremoni.

³⁴ —Eereka nota kãkiti auĩte txanako ninoa kãkiti erekarini nikikomoni auakani: “Niri sikari erekarì hitemoni. Hina. Hiĩroã auĩtetxi nininiãtaãua. Ia auĩtetxi nininiãtaãua maiamatapekaika hĩte ikapani itixi kamikosaakipeka. ³⁵ Mitxipeka ninatxitakasaaki, hĩte sikakienatapekano nota. Niposonatakasaaki, ãparaã hĩsikapekano. ãti itixiti nĩkasaaki, hĩte apakapapekano nota. ³⁶ Nimamãkanisaaki, mãkatxi hĩsikapekano. Namianatakasaaki, hinĩkatapekano. Kateia ãki nauakasaaki, himotikaẽtapekano. Ininiã hiĩroã,” nota kãkiti auĩte txanako kãkiti erekarini.

³⁷ —Ininiã kãkiti atão inakari kamakani apakapapiretari: “Apiananiri, kirisaaakipa pinatxitakasaaki, asikakienatai? Kirisaakipa piposonatakasaaki, ãparaã asikai? ³⁸ Kirisaakipa ãti itixiti pĩkasaaki, aãpakapai? Kirisaakipa pimamãkanisaaki, mãkatxi asikai? ³⁹ Kirisaakipa

pamianatakasaaki, anĭkakai? Kirisaakipa kateia āki pauakasaaki, amotikaētai?” itxanonako nota.

⁴⁰—Ininiā nota kākiti auĭte apakapapiretanako: “Atāopitikara nitxai hĭte. Kākiti poiāori, nisākire auĭākari, hĭtĭretiniā, iuasaaki nota hĭtĭretini atokokana hĭtĭretari,” nitxanako ninoo.

⁴¹—Iuasaaki nitxanako nisanaremoni auakani: “Hĭsipeka. Teoso misiritaike hĭte, kotxi ! hĭkĭpitari iua sākire. Hĭsipeka arikatxi maxipokatimoni. Teoso kamari iua arikatxi, Satanasi misiritikoātaā tĭkane, Satanasi nitiriakori misiritikoātaā tĭkane. Hĭsipeka iuamoni. ⁴² Kotxi ninatxitakasaaki nipokori ! hĭsikano. Niposonatakasaaki, āparaā ! hĭsikano. ⁴³ Āti itixiti nĭkasaaki, ! hinirekano haāpoko napokini. Nimamākanisaaki, kona mākatxi ! hĭsikano. Namianatakasaaki, ! hinĭkatano. Kateia āki nauakasaaki, ! himotikaētano,” itxanako kākiti maerekani.

⁴⁴—Ininiā ninoo apakapapiretariko: “Apiananiri, pinatxitakasaaki, piposonatakasaaki, pamianatakasaaki, pimamākanisaaki, kateia āki pauakasaaki, āti itixiti pĭkasaaki, kirisaakipa ate ! apakapai?” maerekani txanoko nota.

⁴⁵—Ininiā nota kākiti auĭte apakapapiretanako ninoo: “Atāopitikara nitxai hĭte. Himanirekakanisaakiri hĭtĭretiniri kākiti poiāori nisākire auĭākari, iuasaaki ! hinirekari nota hĭtĭretini,” nitxanako ninoo.

⁴⁶—Ininiā Teoso iokanatanako ninoo maerekani kamakani misiritikoātaā. Iuaātaā ninoo misiritaākapikako. Imisiritikona kona xipokaikako. Kākiti atāo inakarinoka kamakani auapininiika imaxipopekaniika Teosokata — itxa Xesosi.

26

Xesosi Okaenetiko Pirena

(Marko 14.1-2; Arókasi 22.1-2; Xoāo 11.45-57)

¹ Ikara inakari isāpiretaka atoko, Xesosi misākĭretana imoianariakori:

²—Hĭte imarotari ipi ōti napaka atoko aua Páskoa inakori kiiniriti. Iua kiiniriti auakasaaki nota hĭtari laxitiki nĭsikaākako nimokaiakariakorimoni. Aamina ĭpiriāmĭtakari nopini nitakaākako. Iua atoko ipina nitxako —Xesosi txana imoianariakori.

³ Iuasaaki sasetotxi auĭteakori, kaiōkatsopareriakori, kiomātxiakori pakini apotiitaua. Sasetotxi auĭte apiatakari Kaipasi inakori aapoko āki apotiitauana. ⁴ Imapapiretarina Xesosi imaĭkinina ĭkapani. Inirekarina Xesosi imaĭkinina apanakini mimarotakinitika. Imisākĭretakakana Xesosi okinina ĭkapani.

⁵—Kiinirisaaki !amaĭkapaniri. Amaĭkiniāri, apanakini kākiti naiatamaua ate —itxakakana.

Sito Kamariāro Mĭkaro

(Marko 14.3-9; Xoāo 12.1-8)

⁶ Xesosi auanāta aapokotxi Petānia inakoriātaā. Isari Simāo inakori aapokomoni. Iua Simāo mitxi amianatakari, maere matati. Eereka erekapekari. ⁷ Simāo aapoko Xesosi auakasaaki, sito apoka iuamoni. Om-inari kopitipaki kai kamakori, kai arapástiro inakori. Kopitipaki xāpoka kamariāro. Oa pakaronero. Xesosi nipokonātakasaaki, oā sito kitakaro kamariāro ikiā.

⁸ Imoianariakori itikari Xesosi kĭiā okitakiniro, ininiā ninoo naiataua: —Kinirepa oa ioanataro kamariāro? ⁹ Kinirepa kona ovētxitataro? Ovētxitākamaro oāpakapamaroko txineiro ito, matxineirotenimonikari osikini ĭkapani —itxakakana.

¹⁰ Xesosi imarotari ninoo ikara atoko ininina.

—Kinirepa homanataro oia sito? Erekarī okaminano notamoni.
 11 Auapikanako matxineiroteni hītekata. Kona nota auapani hītekata. 12 Oia kitakaro kamariāro nikiiā, nota iposope ninini nikatiko apisa. 13 Atāo nisāpiretai hīte. Teoso iokanapirena erekarī sāpiretikoātaā ikini itixiti, isāpiretaākako apaka oia sito kitakiniro kamariāro nikiiā, ininiā kākiti ikini itixiti auakani xinikapikaro oa —Xesosi txana ninoo.

Xotasi Sari Sasetotxi Auñteakorimoni
 (Marko 14.10-11; Arókasi 22.3-6)

14 Eereka Xesosi moianari Xotasi Isikariotxi inakori sari sasetotxi auñteakorimoni.

15 —Xesosi nisikiniāi hītemoni, kiripa hīte sikano nota? —itxana ninoo.
 Ininiā ninoo:

—Asikaiko trīta txineiro ota pirata kamakoro —itxana ninoo.

Ininiā iikixitarina. 16 Eereka Xotasi iātapari Xesosi poiāonoka kākitikata auakasaaki, imīkapiritiniri ikapani.

Páskoā Kiiniriti Kamiko
 (Marko 14.12-21; Arókasi 22.7-13)

17 Pāo miātiākati nikiko kiiniriti potorikini ōti, Xesosi moianariakori apoka iuamoni.

—Namonipa ate maiamatari Páskoā kiiniriti pite ikapani? —itxarina iua.

18 —Hīsa sitatximoni. Nisāpiretakiti iaōka hinitari kiki. Hāpokasaakiri, hītxariko iua: “Koerekareri txai, ipinini tīkane kaiamapeka. Ikamariko kiiniri Páskoā inakori pite aapoko imoianariakorikata,” hītxako.

19 Ininiā imoianariakori kamari Xesosi paniātakiti iaōka. Imaiamatari ikinika kiiniri ikapani.

20 Ikanōkapeka inakasaaki, Xesosi imoianariakorikata topāka inipokotinina ikapani. 21 Inipokotakasaakina, Xesosi txana:

—Atāo nisāpiretai hīte. Ātika hīte sauaki mīkapiritanoko nota.

22 Ininiā imoianariakori tsorīkaāta. Iteene imatinaniuatana. Āti pimaāri:

—Apiananiri, atauako notakani?

Iua atokokana ātipekana:

—Apiananiri, atauako notakani?

Ikara atoko itxanātana ikinikana, ipimaaāpotinirina Xesosi. 23 Ininiā Xesosi apakapapiretana:

—Ia tūtxiā notakata nikakari mīkapiritanoko. 24 Nota hītari iaxitiki okaākako. Teoso sākire iōkatsopatakori sāpiretapekari nipinini tīkane. Nota hītari iaxitiki mīkapiritakari iteene misiritaākako. Erekarariko maponaniākatika inaākamako.

25 Ininiā Xotasi kamīkapirireri misākiretari Xesosi:

—Koerekareri, atauako notakani?

Xesosi apakapapiretari:

—Ari, pitepitikara.

Xesosi Īto, Iarēka Pakini
 (Marko 14.22-26; Arókasi 22.14-23; 1 Korīto 11.23-25)

26 Inipokonātakasaakina, Xesosi kosekari komiri. Imisākiretari Teoso:

—Erekapitikari ia komiri pisikakiti atemoni —itxa.

Eereka imaxinīkitari, sika itxari imoianariakorimoni.

—Apakapa, nika hītxako. Ia niūto —itxana.

27 Eereka ikosekari iākoanatxi iāriā auini. Imisākiretari Teoso:

—Erekapitikari ia iāriā pisikakiti atemoni —itxa.

Eereka sika itxari iākoanatxi ninoamoni:

—Hikinika hiätariko. ²⁸ Ia niarêka xiketakari makatxakariko kaiãopokori kâkiti maerekani. Teoso sâpiretapekari kâkiti ikamaenetakiti amaneri kâkiti ïkapani. Ia niarêka oerekari kâkiti, Teoso kamapekari ikamaenetakiti. ²⁹ Atão nisâpiretai. !Niãtaikaroko ovapeë, Teoso auitexi ininiãtaãua nimapokakanisaaki. Iuaã napokasaaki niãtari. Amaneri iãriãti niãtako hitekata —itxana imoianariakori.

³⁰ Xipoka atoko ixikaretarina xikari Teoso ïkapani. Eereka isana oxiratari-moni Oriva inakorimoni.

Xesosi Sâpiretari Petro Kipatiniri Iua

(Marko 14.27-31; Arókasi 22.31-34; Xoão 13.36-38)

³¹ Iuaã Xesosi misâkiretana imoianariakori:

—Ia ïkanõkati hikinika hïte takanapanoko nota, kotxi Teoso sâkire iõkatsopatakori sâpiretapekari ikara atoko ïnakari. Itxari:

Nokariko soti auite piratakari, ininiã ikinika ipiraakori iarikitatako, itxa Teoso sâkire iõkatsopatakori. ³² Ininiã eereka nota nipinaãka atoko, iuaãkana nõkitikaãkaua atoko, nisako hïte apisa Kariréiamoni —itxa.

³³ Ininiã Petro apakapapiretari:

—Nota !nitakanapai pite. Atxiãti ikinimane takanapai, iuaritika kona nota takanapai —itxa.

³⁴ Ininiã Xesosi:

—Atão nisâpiretai. Ia ïkanõkati patari sâkirauatini apisapanikako, “!Nimaro-tari iua,” pitxanoko ipi ãti pakinikata.

³⁵ Ininiã Petro:

—Ikara atoko !nitxapanii pite. Nikipatinii apisapanikamako, nipinamako. Ikinika Xesosi moianariakori ikara atoko itxana.

Xesosi Misâkiretiniri Teoso Xetsémani Inakoriãtaã

(Marko 14.32-42; Arókasi 22.39-46)

³⁶ Eereka Xesosi sari imoianariakorikata Xetsémani inakoriãtaã. Xesosi:

—Uai hïitopãka. Ikiraã nisako Teoso nimisâkiretini ïkapani —itxa Xesosi.

³⁷ Anikari Petro, Sepeteo anaakori ipi pakini iuakata isinina. Iuaã Xesosi tsorïkaãnãta, imaromaxiretari. ³⁸ Imisâkiretana ninoa:

—Nixinire imaromaxiretari. Iteene nimaxire, ininiã okaaritano. Uai hïkaikota. Araõkire hïtxako —itxana ninoa.

³⁹ Apikomoni isa, pamaka itxa, misâkireta itxari Teoso:

—Niri, atauako apakata pimakatxakiniri nimisiritiko akamoni ïkari? Kona ninirekari natatsiãrauati. Iuaritika pite nirekiniãri, ininiã nota apaka nirekari —itxari Teoso.

⁴⁰ Iuasaaki ikanapiriã ipi ãti imoianariakori auiniãtaã. Ninoa imakanãta:

—Petro, atauako kona hïte mïteenekari hïtikapokotini ãto oaranoka?

⁴¹ Erepaniko. Hinirekasaakiri maerekati hïkamini, !hïkamapiri. Araõkire hïtxako. Himisâkiretariko Teoso, ininiã !hïkamari maerekati. Kâkiti xinire atxiãti linirekari maerekati ikamini. Txamari kâkiti ïto tapara poiãoka, ininiã ikamari maerekati. Ininiã erepaniko —Xesosi txari Petro.

⁴² Iuaãkana isa apikomoni Teoso imisâkiretini ïkapani:

—Niri, pinirekiniãri natatsiitiniri nimisiritiko akamoni ïkari, ininiã nikamapitïkariko pinirekakiti —itxari Teoso.

⁴³ Iuaãkana ikanapiriã imoianariakorimoni. Imakanãtapanikana. Itapanoka itxana. Kona iposotarina ikoatinina. ⁴⁴ Iuaãkana Xesosi takanapana, iuaãkana ikanapiriã iuaãtaãkana. Iuaãkana misâkireta itxari Teoso. Mitxi atokokana itxa isâkire.

⁴⁵ Iuaãkana ikanapiriã imoianariakorimoni:

—Himakanātapanika? Hītomanātapanika? Nisikiko manapi apopeka. Nota hītari iaxitikiri nimīkapiritaāka maerekanimoni nisikiko, inireēkitina ikaminina ikapani. ⁴⁶ Hōkitikaua. Masipeka. Hāta. Ikiraā ina nota mīkapiřitakari —itxana nino.

Xesosi Maīkiko Pirena

(Marko 14.43-50; Arókasi 22.47-53; Xoāo 18.1-11)

⁴⁷ Xesosi sākirauanātapanika inakasaaki, Xotasi, Xesosi mitxi moianari, apoka. Iuakata ina itomaneri kākiti, saasara mīkani, piriri mīkani pakini. Sasetotxi auīteakori, kiomātxiakori pakini iokanatana nino. ⁴⁸ Iua Xotasi kamīkapiřireri sāpiretapekana nino:

—Iuapitipaniarako napitxokapaniko. Himaīkariko iua napitxokakiti.

⁴⁹ Xotasi apoka. Xesosimonipitipo isa.

—Ereēkai koerekareri.

Eereka apitxoka itxari. ⁵⁰ Ininiā Xesosi txari Xotasi:

—Nitiretakiti, pikamariko pinirekakiti. Nauiritai —itxari.

Iuasaakipeka Xotasikata sikani sakata Xesosimoni, maīka itxarina. ⁵¹ Āti Xesosi moianari kosekaro saasara. Isauaākatari sasetotxi auīte apiatakari nitiri. Itsotakakīpitari.

⁵² Ininiā Xesosi txari:

—Pitaka saasara mitxi oāuiniātaā. ! Pineenamauatape. Ikeekotxi himaīkiniā, āti ōti hīpinako ikeekotxi xika. ⁵³ ! Pimarotari niposotiire. Nota nirekiniāri, nakiritari niri moianatinino nota. Nakiritiniāri, iuasaakipeka iua iokanatariko seī mio initiriakori nota imakatzakinina ikapani. ⁵⁴ Kona nakiritari niri, kotxi Teoso sākire iōkatsopatakori sāpiretapekari nimaīkiko tīkane ia atoko inakari.

⁵⁵ Iuasaaki Xesosi misākiretana iuamoni ikani:

—Kinirepa himinari saasara, piriri pakini himaīkinino ikapani? ! Kītirino nota. ! Kikeekono nota. Ikinioṭtika niūtopāka Teoso misākiretiko aikoti āki noerekinii hīte. Iuasaaki kona himaīkano. ⁵⁶ Ia atoko himaīkano, kotxi kitxakapiřika Teoso sākire sāpiretakani iōkatsopatekari ia atoko himaīkinino. Ininiā Teoso sākire iōkatsopatakori iaōka uatxa apokapeka —itxa Xesosi. Iuasaakipeka Xesosi moianariakori asikari iua, miteka itxana.

Xesosi Xoteo Auīteakori Apisatoō

(Marko 14.53-65; Arókasi 22.66-71; Xoāo 18.12-14, 19-24)

⁵⁷ Nino Xesosi maīkakani anikari Xesosi Kaipasi aapokomoni. Iua Kaipasi sasetotxi auīte apiatakari itxaua. Iuaātaā kaiōkatsopareriakori, kiomātxiakori pakini apotiitapekava iuasaaki. ⁵⁸ Nino anikasaakiri Xesosi, Petro sari Xesosi tikini. Ikira atoko auāāponāta. Sasetotxi auīte apiatakari aapoko takote isa. Iroā pirikere āki. Iitopāka Kaipasi nitiriakorikata. Kiatokopa inaākapani Xesosi, ininiāra isa Xesosi tikini imarotiniiri ikapani.

⁵⁹ Kaipasi aapoko āki Sasetotxi auīteakori, kiomātxiakori, ikinika Xoteo auīteakori pakini nitana kākiti aāpirena kamakani Xesosi okinina ikapani.

⁶⁰ Itori kākiti sāpiretari aāpirena Xesosi ikamapiretinina. Txamari ixika lauari Xesosi okinina ikapani.

Eereka apokana ipi aāpirena kamakani. ⁶¹ Nino txari:

—Ia kiki txari: “Nota posotari aiko Teoso misākiretiko nirikini. Ipi āti ōtisaaki niposotari iuaīkana nōkitikini,” itxa isākire.

Kona atō nino sākire. ⁶² Sasetotxi auīte apiatakari ōkitikaua.

—Kona papakapiretatari pitemoni apoīrauatakani? Atāokani piposotari ikara atoko pikamini? —itxari Xesosi.

⁶³ Xesosi !kasākireri. Ininiã sasetotxi auïte apiatakari iuaïkana misākiretari Xesosi:

—Uatxa nipimaãi Teoso mipïkati apisatoõ. Atãonani pisãpiretaua. Pite, Teoso mereëkiti pitxataua? Teoso ãkirikai pite? —itxari Xesosi, kotxi inirekari Xesosi kerokiniri isãkire.

⁶⁴ —Ari, iuapitkarano. Nisãpiretaiko hïte hïkinika. Hãtamatariko kãkiti itari iaxitikiri topãkini Kaposotiireri kikomoni. Hãtapariko kãkiti itari iaxitikiri uai apokaãpotini katxiãri ãki —Xesosi txana ninoa.

⁶⁵ Sasetotxi auïte apiatakari kenakotari ikara Xesosi sãkire. Iusaakipeka iua matsorãkari imãka, kotxi kona xatiki ipotxitari Xesosi sãkire.

—Maerekati isãkire: “Teoso ãkirirano,” itxa. !Anirekaikari apanakini kamapiretiniri Xesosi. Uatxaika hïkenakotapekari isãkire maerekati.

⁶⁶ Kiãtokopa atxatari Xesosi? —itxana ninoa.

—Ixika auapeka ipinini ïkapani ininiã uatxa okaãkapitikako —ninoa txari iua.

⁶⁷ Eereka ikiisokatoõtarina. Iãsokarina. Apanakini aritoõtari Xesosi.

⁶⁸ —Pite Teoso mereëkiti pininiãua, pisãpiretaua, kipa aritai? —itxarina iua. Inapetarina.

Petro Kipatari Xesosi Imarotini

(Marko 14.66-72; Arókasi 22.54-62; Xoão 18.15-18, 25-27)

⁶⁹ Iusaaki Petro topãkanãta mapara pirikeri ãki. Åtokoro Kaipasi nitero sari iuamoni.

—Pite Xesosi Kariréiakiri moianaripitkarai —otxari iua.

⁷⁰ Txamari iua kipatari ikinimane apisatoõ.

—!Nimarotari ikara atoko pinanãtakiti.

⁷¹ Ininiã isa pirikeri ïroãnakikomoni. Iuaã ãto ãtokoropekana Kaipasi nitero atamatari iua. Ininiã osãpiretana kãkiti iuaã auakani:

—Xesosi Nasareekiri moianaripitikara ikira —otxa.

⁷² Iuaïkana ikipatari:

—Teoso imarotari iua kiki nimimarotakani —itxa.

⁷³ Eereka païtiki atoko kikiãkini iuaã auakani sari Petromoni:

—Pite atãopitika iua moianaripitkarai, kotxi pisãkire ipinimoni. Kãkiti Kariréiakiri sãkire atokokana, Xesosi sãkire atokokana pitxa pite sãkire —ninoa txari Petro.

⁷⁴ Ininiã Petro apakapapiretana:

—Atão nisãkire minakaniãua Teoso misiritanoko. Nisãkire atãopitika. !Nimarotari iua kiki —itxana.

Iusaakipeka patari sãkirauata. ⁷⁵ Ikara ikenakotakasaaki, Petro xinikari Xesosi sãkire, kotxi mitxipe Xesosi txari iua: “Patari sãkirauatini apisapanikako, ïpi ãti pakinikata, ‘!Nimarotari iua,’ pitxanoko.” Ininiã Petro sipaka. Itxiapakata.

27

Xesosi Pirato Apisatoõ

(Marko 15.1; Arókasi 23.1-2; Xoão 18.28-32)

¹ Katimatiniãkata sasetotxi auïteakori, kiomãtxiakori pakini apotiitaua. Imisãkiretakana:

—Kiãtokopa atxatari Xesosi aõkini? —itxana.

² Eereka iaxirikãkitakarina Xesosi, anika itxarina Homano auïte Põsio Pirato inakorimoni, sikanapa itxarina.

Xotasi Ipinini

(Átosi 1.15-19)

³ Xotasi, Xesosi mīkapiritakari, kenakoenetakasaakiri Xesosi ipinini tīkane, maerekaxiniretinoka itxa, kotxi iuaka sikari Xesosi imokaiakariakorimoni okiko tīkane. Iuaīkana isipikaro trīta txineiro ota pirata kamakoro sasetotxi auīteakori, kiomātxiakori pakinimoni.

⁴ —Nota kamari maerekati. Nimīkapiritari Xesosi. Ixika !auari iua ipinini ikapani —itxana ninoa.

Ininiā ninoa:

—Pite kamakiti xikakara. Pitekara sikaua ate Xesosi.

⁵ Ininiā Xotasi okaro txineiro ota Teoso misākiretiko aikoti āki, eereka isipe ātiātaā. Iuaātaā iuaka iaxirikanokitapeua, aamina poria iaxirikaua, arōka, ipīpe itxa.

⁶ Teoso misākiretiko aikoti āki sasetotxi auīteakori kosekaro oa txineiro.

—Oia txineiro kiki okiko īki. Ia xika ate !auiritaāka aāpotiitiniro oia txineiro āto txineirotikata Teoso misākiretiko aikotiākero. ⁷ Kiātokopa atxataro oia txineiro? —itxakakana.

Eereka ninoa imarotape. Iamotarina kikio, tiitxi kamakari kikiote, Xoteo minakanuia ikatiko tīkane. ⁸ Oa txineiro kiki okiko īki xika, Xesosi okiko īki xika, iua akauari takauākataāka “Arēkatxi Akauariti” inaāka. Uatxa akir-itaākapanika iuaātaā “Arēkatxi Akauariti.” ⁹ Iua atoko ininiā, kitxakapirīka Teoso sākire sāpiretakari Xeremia inakori atāo txari:

Isaeo auakanī iikixitari trīta ota pirata kamakoro Teoso mereēkiti okiko ikapani.

¹⁰ Eereka isikarona oa txineiro ota tiitxi kamakarimoni, ikikiote iamotinina ikapani, kotxi Teoso nirekari ia atoko ikaminina, itxa Xeremia kitxakapirīka. Ininiā Xeremia sākire iaōka apopeka iuasaaki.

Xesosi Pirato Apisatoō

(Marko 15.1-5; Arókasi 23.1-5; Xoño 18.28-38)

¹¹ Iuasaaki Xesosi tima Homano auīte Pirato inakori apisatoō. Pirato pimaāri Xesosi:

—Pitekani Xoteoakori auīte txataua?

—Ari, iuapitikarano —itxari.

¹² Eereka sasetotxi auīteakori, kiomātxiakori pakini apoītari Xesosi. ! Kasākireri Xesosi iuasaaki. ¹³ Ininiā Pirato txari:

—Atauako kona pikenakotatari apoītiniina?

¹⁴ Xesosi !kasākireri, ininiā Pirato tsorīkaāta. Ākixinireē iua:

—Kininiāpa !kasākireri?

Xesosi Okiko Nirekiko

(Marko 15.6-15; Arókasi 23.13-25; Xoño 18.38-19.16)

¹⁵ Ikini kiiniriti Páskoa inakori, Homano auīte sikakari ātika kateia āki auakari kākiti nirekakiti. ¹⁶ Iuasaaki aua kateia āki auakari Pahapasi inakori. Ikinimane imarotari iua. ¹⁷ Itomaneri kākiti apotiitakasaakiaua, Pirato pimaāna ninoa:

—Īkiriapa kateia āki auakari hinireka nisikakini? Pahapasikani? Xesosi Teoso mereēkiti inakorikani? —itxana ninoa.

¹⁸ Pirato imarotari Xesosi isikinina iuamoni ixikotinirina xika.

¹⁹ Iuasaaki Pirato topākanāta kākiti misiritiko isāpiretini pakita āki. Iuasaaki itanoro iokanapireta iuamoni.

—Maerekati !pikamape iua kikimoni, kotxi ixika !auari pokiniri. Erekari iua. Minipani nitaponetari iua kiki, ininiā maerekaxiniretinoka nitxa —otxari.

²⁰ Mapara sasetotxi auñteakori, kiomãtxiakori pakini misãkiretana kãkiti iuaãtaã apotiitakaniaua:

–Piratomoni hñtxako: “Pisikakariko Pahapasi. Pokãkitakariko Xesosi,” hñtxariko –itxana kãkiti.

Ininiã ninoa auikari isãkirena. ²¹ Eereka Pirato pimaãna kãkiti iuaã apotiitakaniaua:

–Ïkiripa kateia äki auakari hinireka nisikakini?

Ininiã ninoa akirikata:

–Pahapasira.

²² –Kiãtokopa nitxatari Xesosi, Teoso mereëkiti inakorima? –itxa Pirato.

Ikinikana apakapapiretana:

–Aamina Ïpiriãmitakari nopini pitokakitariko.

²³ Ininiã Pirato:

–Kixikapa? Maerekati ñikama –itxa.

Iuasaakipeka ninoa iteene akiripoakatana:

–Aamina Ïpiriãmitakari nopini pitokakitariko.

²⁴ Ininiã Pirato kona sãpiretaikari Xesosi isikakini, kotxi ninoa neenamauatanapanoka. Ikosekari äparaã. Arokauakotaua ninoa apisatoõ.

–Nã nota xikani ia kiki Ïpinako. Hñte xikakara ia kiki Ïpina –Pirato txana ninoa.

²⁵ Ikinimane apakapapiretari:

–Atãopitikara. Misirikaretxi auiniã okiko xika, ate, aamariteni pakini apakapariko iua misirikaretxi –itxana.

²⁶ Iuasaakipeka Pirato sikakari Pahapasi. Eereka Ïpaniãtari Xesosi xirokitatiko aãpitsã. Eereka isikari Xesosi Ïsotatonemoni aamina Ïpiriãmitakari nopini itokakitinirina ñikane.

Sotatoakori Napetiniri Xesosi

(Marko 15.16-20; Arókasi 22.63-65; Xoão 19.2-3)

²⁷ Ininiã sotatoakori anikari Xesosi ninoa auñte aapokomoni. Iuaã akiritarina apanakini sotatoakori, ininiã ikinimane sotatoakori äkitari Xesosi.

Inapetarina. ²⁸ Imakatzakarina Xesosi mãka. Mãkatxi pökamarari ieretaka itxarina. ²⁹ Eereka itakarina saporïeta kotipiaro kamakori ikiiã. Iuako ikikomoni taka itxari aãke. Ininiã itxñkitakarina Xesosi auñtetxi atoko ininiãua.

Eereka ikapotoreëkauana iua apisatoõ, napeta itxarina Xesosi:

–Aãuñte –itxarina Xesosi inapetinina.

–Xoteo auñtekai pite –itxarina.

³⁰ Ikiisokarina. Iua aãke ikosekana, arikiita itxapikarina. ³¹ Inapetarina, eereka imakatzakarina mãkatxi pökamarari. Iua nakiti imãka iuañkana ieretaka itxarina. Eereka mapara anika itxarina, aamina Ïpiriãmitakari nopini itokakitinirina ñikapani.

Xesosi Tokakitaãka Aamina Ïpiriãmitakari Nopini

(Marko 15.21-32; Arókasi 23.26-43; Xoão 19.17-27)

³² Xesosi anikaãpotakasaakina, aõkitarina Sireni sitatxitikiri, Simão inakori. Ninoa paniãtari iua, Xesosi anikakiti aamina Ïpiriãmitakari, anikini ñikapani, kotxi Xesosi ! iposotakari anikiniri. Ininiã Simão anikari. ³³ Apokana Kóokota inakoriãtaã. Apanakini akiritari “Kiitãtãtxi” inaãka akiritiko. ³⁴ Iuaã iãriãmoni ikoketarina pinñtxi kipixiãri, sika itxarina Xesosimoni, Xesosi iãtini ñikapani, imakini ñikapani. Atapixiãtaãka atoko, ñiãtari. ³⁵ Ininiã itokakitarina Xesosi aamina Ïpiriãmitakari nopini. Inaãka atoko ikamarina sarauatxi kai soroã. Sarauatxi kãiatakani apakapari Xesosi mãka. Kitxakapirika Teoso sãkire sãpiretakari sãpiretãpekari ñkara atoko inini ñikane. Iua txari:

Ixanakarina nimāka. Sarauatxi ikamana nimāka apakapakani imarotininna ikapani.

Itxa Teoso sākire sāpiretakari kitxakapirika. ³⁶ Sarauatxi xipoka atoko iitopākana. Imoiaārina Xesosi, kākiti manikakaniri ikapani. ³⁷ Aamina İpiriāmitakariā ikii nopini itakarina iōkatsopatakori: “Xesosi, Xoteoakori Auīte,” itxa iōkatsopatakori. İkara xika okaāka Xesosi.

³⁸ Xesosi takote itokakitarina ipi kiitiririni aamina İpiriāmitakari nopini, āti Xesosi kikomoni, āti Xesosi sanaremoni. ³⁹ Kākiti iuaā napakani napetari, nokonoko itxa kiitana. Maerekaeneti isākirepiretarina Xesosi:

⁴⁰ —Pite txari: “Aiko Teoso misākiretiko niriāka atoko, ipi āti ōtisaaki iuaikana nōkitikari,” pitxa. Piteka pimakatxakaua. Pite Teoso ākiri pinakasaak- iua, pikatxaka. İkara atoko itxa sākiretana kākiti iuaā napakani. ⁴¹ İua atoktxikana itxana sasetotxi auīteakori, kaiōkatsoparerini, kiomātxiakori pakini ikara atoko inapetarina Xesosi:

⁴² —İua makananitapekari apanakini. Txamari iuaka ! iposotari imakananitinua. İua İsaao auakani auīte ininiāua, iuaka imakatxaka- mauako. İkatxakiniā, ate auikari iua sākire. ⁴³ İua auikari Teoso sākire. Maiātapari. Atauako Teoso nirekari imakatxakiniri iua uatxa, kotxi iua txari: “Teoso ākirirano nota,” itxa —itxana.

⁴⁴ Kiitiririni iuakata tokakitakoni apaka maerekaeneti isākirepiretarina Xesosi.

Xesosi İpinini Pirena

(Marko 15.33-41; Arókasi 23.44-49; Xoāo 19.28-30)

⁴⁵ Apaniāxiti itixi piāka. İpi āti pakini oara ipiāka. ⁴⁶ İpi āti pakini oarape kikatamonipeka Xesosi iteene akirikata:

—Erii, Erii, aremaa sapatatanii.

İkara Epireo sākire. İa atatsopatakari sākireē, “NiTeosone, niTeosone, kinirepa pitakanapano?”

⁴⁷ Kākiti iuaā auakani kenakotari Xesosi sākire. Ninoa uākatari akirinātiniiri Eríasi.

⁴⁸ İniniā āti miteka, mapoa atoko inakari iāka itxari iāriā katxioārimoni. Aāke mapotōkire taka, isirika itxamari Xesosi iātini ikapani. ⁴⁹ Txamari apanakini:

—Kona pisikapiri. Atxiiti Eríasi makatxakari iua —itxana.

⁵⁰ İuaikana Xesosi iteene akirikata. Eereka iokanatarı ixinire Teosomoni, eereka ipipe.

⁵¹ İuaasaakipeka mākatxi mata Teoso misākiretiko aikoti āki arōkakari tso- rakita. İtano İtsorakita. İxitipeka apoka. Mitxi iua mākatxi mata !auritari kākiti İroi ni Teosonani Auini Pakitaātaā. İtsorakitakasaaki, itixi iakeēkata. Kai mitari xoreka iuaasaaki. ⁵² Apanakini akauari xoreka. İtomaneri kākiti ipikani Teoso nakitiakori iuaikana ōkitikapekaua. ⁵³ Osipikarına akauari. Xesosi iuaikana ōkitikaākaua atoko, isana Xerosareēmoni, Teoso nakiti sitatx- itimoni. İuaā itomaneri kākiti itikana ninoa iuaikana ōkitikakanıua.

⁵⁴ Sotato auīte, sotatoakori Xesosi moiaākani apaka, itikarına Xesosi ip- inini. İmarotarına itixi iakeēkatini, ininiā iteene ipikarauatana.

—Atāopitikara Teoso ākiri itxaua —itxana.

⁵⁵ İtoro sitoākini ikira atoko atamanātari Xesosi. Kariréia tōpa Xesosi potorikasaaki ninoa sitoākini moianatarı iua. ⁵⁶ Maria Matarena inakoro iuaā aamina İpiriāmitakari ikira atoko auanāta apaka. Txıako, Xosee pakini inoro, Maria inakoro iuaā aua. Sepeteo anaakori inoro iuaā auanāta apaka.

*Xesosi Ikatiko Pirena**(Marko 15.42-47; Arókasi 23.50-56; Xoão 19.38-42)*

⁵⁷ Íkanõka katxineiroteri Xosee inakori, Arimateia sitatxitikiri, apoka. Iua apaka Xesosi sãkire auĩãkari itxaua. ⁵⁸ Isa Piratomoni. Xesosi ïto amanaã. Ininiã Pirato paniãtari isikiko. ⁵⁹ Ininiã Xosee anikari Xesosi ïto. Mãkatxi mataã iapirika itxari. Mãkatxi mata amaneri arinio inakoriã iapirikari. ⁶⁰ Eereka taka itxari akauari ãki. Iua akauari amaneri, Xosee kisakakiti kai auĩte iriko. Ikamari iua akauari ipĩkasaaki ikatiko ïkapani. Xesosi ïto iriko ãki itaka atoko ikakanapiritari kai meraminapoari, itota itxari akauari iriko, sipe itxa. ⁶¹ Iuasaaki Maria Matarena inakoro, ãto Maria inakoro apaka topãkanãta akauari apisatoõ.

Imoiaãrina Xesosi Akauari

⁶² Iua õti sesta veira, tomatiko õti apisã. Iua õti Xoteoakori parĩkauatapitipo, tomatiko õti imaparĩkauatakani ïkapani. Katimatinĩkata sasetotxi auĩteakori, pariseoakori pakini sari Piratomoni. ⁶³ Ninoa txari:

—Ate xinikari iua kamisirienereri sãkire. Iua txari: “Nipĩkasaaki eereka ipi ãti pakini õtisaaki iuaĩkana nõkitikauako.” ⁶⁴ Pipaniãtana pisotatoneakori ipi ãti pakini õti akauari imoiaĩnina. Imamoiaãkaniãrina, imoianariakori íkanõka sari iuaã ïito ïtirĩkinina. Ininiã eereka isãpiretarina kãkiti: “Teoso õkitikapekari iua. Iuaĩkana auãki itxapeka,” itxamana ninoa imoianariakori. Ininiã ikara misirieneretxi apiatama eereka. Mitxiri misirieneretxi poiãoka —itxarina Pirato.

⁶⁵ —Ininiã hanikari sotatoakori akauari moiaãkani tĩkane. Hĩsa. Hĩtotariko akauari sona —Pirato txana.

⁶⁶ Ininiã isana iuaã. Akauari sona iteene itotinina ïkapani. Itakarina Pirato takaõtxikare itore nopini. Sotatoakori iuaã kaikota. Imoiaãrina akauari.

28*Xesosi Iuaĩkana Auãki Inini**(Marko 16.1-8; Arókasi 24.1-12; Xoão 20.1-10)*

¹ Tomatiko õti xipoka atoko, tomĩko íkanõkapanika Maria Matarena, oa ãto Maria pakini sari akauarimoni.

² Ninoa saãpotakasaaki, katimaritika itixi iakeẽkata itapararitika. Iuasaaki Teoso nitiri iaxitikiri katxaka. Ikatapakiritari kai akauari tore, topãka itxa iua kai nopini. ³ Itoõ atokatxi iotximere atoko itxa. Imãka mapoa saro atoko itxa. ⁴ Sotatoakori, akauari moiaãkani, kikinanaãkata, ipĩkarauatinina. Irikana xitipeka. Ipĩkani atokopeka itxana.

⁵ Eereka ninoa sitoakoro apoka akauari. Teoso nitiri misãkiretana:

—!Hĩpĩkarauatape. Nimarotari hĩte nitanãtiniri Xesosi, aamina ipiriãmitakari nopini tokakitakori. ⁶ !Auaika uai. Teoso õkitikapekari iua. Ikara iua sãpiretapekai hĩte. Uai hina. Hãtamatarĩ ïto mitxi auiniãtaã.

Ininiã ninoa atamatari.

⁷ —Katima hĩtxako imoianariakorimoni hĩsini ïkapani. Hĩsãpiretana: “Iuaĩkana auapeka itxa Xesosi. Teoso õkitikapekari iua. Iua sari hĩte apisapanika Kariréiamoni. Iuaã haõkitariko iua,” hĩtxako ninoamoni. Ikara atoko nitxa nisãpirena hĩtemoni —itxa Teoso nitiri.

⁸ Ininiã ninoa takanapari akauari. Ipĩkareritikana, ieneniritikana isana. Imitekana Xesosi moianariakorimoni õkitikiniua isãpiretini tĩkane. ⁹ Ninoa mitekaãpotakasaaki, ipixinipokoriti Xesosi tokiã ninoamoni:

—Hĩtepinĩ ina —itxana.

Ininiã ninoa kapotoreẽkaua iua apisatoõ, maĩkakitita itxarina.

—Peerekai. Apiananiri pitxaua —itxanātana.

¹⁰ Ininiā Xesosi:

—Kona hīpīkarautape. Nitariakorimoni hīsa. Hīsāpiretana Kariréiamoni isinina. Iuaā aōkitanonako nota —Xesosi txana ninoa Mariaakoro.

Ininiā ninoa sipe.

Sotatoakori Xesosi Akauare Moiaākani

¹¹ Sitoākini sikasaaki, ātikaka sotatoakori akauari moiaākani kanapiriā sitatximoni. Isāpiretarina itikakitina sasetotxi auīteakorimoni. ¹² Ininiā sasetotxi auīteakori, kiomātxiakori pakini apotiitaua ikara ene ixinikinina Īkapani. Eereka isikarina itoro txineiro sotatomoni, atāo imasāpiretakanina Īkapani apanakinimoni. ¹³ Ininiā sasetotxi auīteakori, kiomātxiakori pakini txana:

—Hītxariko apanakinimoni: “Xesosi moianariakori apoka Īkanōka aimakasaaki. Ītirīkarina Xesosi Īto,” hītxako. ¹⁴ Hīauīte Pirato imarotakasaakiri himakini, ininiā ate misākiretariko iua, ininiā kona himisiritaāka himakini xika —itxarina sotatoakorimoni.

¹⁵ Ininiā sotatoakori apakaparo txineiro, sāpireta itxarina kākiti Xesosi moianariakori Ītirīkiniri Xesosi Īto. Ikara aāpirena iaripireta Xoteoakorimoni. Uatxa apaka ikara aāpirena auīākapanika.

Xesosi Apoka Imoianariakorimoni

(Marko 16.14-18; Arókasi 24.36-49; Xoāo 20.19-23; Átosí 1.6-8)

¹⁶ Ōsi pakini Xesosi moianariakori sari oxiratarimoni Xesosi paniātanimoni Kariréia tōpamoni. ¹⁷ Ninoa atamatari Xesosi. Ikapotoreēkauana iua apisatoō. —Peerekai. Apiananiri pitxaua —itxanātana.

Txamari ātikaka kona iteene auikari iua Xesosi ininiāua. ¹⁸ Xesosi apoka ninoa takote, misākireta itxana ninoa:

—Teoso txīkitakano itixine auakani auīte nininiāua. Itxīkitakano Īkoraxiti auakani auīte apaka nininiāua. Ininiā ikinika posotiiretxi aua notamoni.

¹⁹ Ininiā nīpaniātai. Hīsako ikini uākati kākitimoni ikini itixitika. Hōerekana ninoa nisākire. Hīpatxisatana nisākire kīpitakani niri uākaā, imi uākaā, Erekarī Matamatakoti uākaā pakini hīpatxisatanako. ²⁰ Hōerekana ninoa ikinika nīpaniātakiti ikaminina Īkapani. Hīxinikariko ia. Nota ātipirika auako hītekata. Hītekata nauiniritika itixi xīpokako —itxa Xesosi sākire.

MARKO

Xoão Kapatxisareri Sãpiretakiti

(Mateo 3.1-12; Arókasi 3.1-20; Xoão 1.19-28)

¹ Ia Xesosi Kristo iokanapirena erekari. Teoso äkiri itxaua Xesosi.

² Teoso säkire säpiretakani iökatsopataru ia:

Niokanatariko niokanapirena aniäkari käkitimoni kimapori oeretini ikapani pite uai apokini apisa.

³ Iua auako äparaã makipakaniãtaã. Isãpirenauatoko: “Hõeretariko kimapori Apiananiri apokini apisapanika. Itikaãpo erekari hikamako iua napini ikapani,” itxa iua.

Itxa Teoso säkire iökatsopatakoru kitxakapirika.

⁴ Ikara atoko Xoão kapatxisareri äparaã makipakaniãtaã auu. Ipatxisa-takasaakiri käkiti, isãpiretari ia pirena:

—Hitakanapariko maerekati hikamakiti. Hipatxisataäkako. Ininiã Teoso makatxakariko maerekati hikamakiti —itxa Xoão kapatxisareri.

⁵ Ikinimane käkiti Xotéia auakani Xerosareë sitatxiti auakani pakini sari Xoãomoni isãkire ikenakotinina ikapani. Ninoa säpiretakasaakiri maerekati ikamakitina, ipatxisatana uini Xotão inakoriãtaã.

⁶ Xoão takari imãka kamero piti kamakori. Itakari ipakiomatare pirãtxi mata kamakori. Inikari txitxiri. Mapaã itxima. ⁷ Iua txari käkitimoni:

—Nota poiãori. Nota tikini apokako apiatakaru. !Apakata nikapotoreëkinuua iua takote ikiti mata nimakatxakini ikapani, kotxi nota poiãoka. Iua apiata.

⁸ Nota patxisatai äparaãnokara. Iua patxisataiko Erekari Matamatakotiã. Iuasaaki hite apakapariko Erekari Matamatakoti.

Xesosi Patxisatiko Pirena

(Mateo 3.13-17; Arókasi 3.21-22)

⁹ Iuasaaki Xesosi apoka Nasaree sitatxiti, Kariréia tãpamoni. Iuasaaki Xoão kapatxisareri patxisatari iua uini Xotão inakoriãtaã. ¹⁰ Xesosi kanikãtakasaaki, iua itikari iaxiti takakini. Iuasaaki Erekari Matamatakoti katxaka kamoã katxakini atoko. Iua nopini apoka. ¹¹ Iuasaakipeka Teoso iaxitikiri txari:

—Pite namarite, nitiretakiti, napokaerekatai, kotxi ninierekakiti pikama.

Satanasi Atamakaerekatini Xesosi

(Mateo 4.1-11; Arókasi 4.1-13)

¹² Iuasaaki Erekari Matamatakoti iokanataru Xesosi äparaã makipakaniãtaã. ¹³ Iuaãtaã ikaikota koarëta õti. Iuasaaki Satanasi atamakaerekatari iua. Iuaãtaã auari kaxipirini kaneenamarini. Ininiã Teoso nitiriakori iaxitikini nãkatari Xesosi.

Xesosi Mipotorikiniri Iparika Kariréia Tõpa

(Mateo 4.12-22; Arókasi 4.14-15)

¹⁴ Xoão kateia äki takikosaaki, Xesosi sari Kariréia tãpamoni. Iuaãtaã isãpiretari Teoso iokanapirena erekari, Teoso auãtetxi ininiãua pirena.

¹⁵ Itxari:

—Teoso keto apopeka. Iua auãtetxi ininiãua apokaãpotapeka. Ininiã hitakanapariko himaerekani. Häuikariko Teoso iokanapirena erekari —itxa Xesosi.

¹⁶ Xesosi tīpokota Kariréia poati tiniā. Iuasaaki atamatana ipi hetxi takakani, Simão Petro, itari Ātree pakini. Iua atamatana itakinirina hetxi.

¹⁷ Ininiā Xesosi txana:

—Uatxa masa notakata. !Himaikaikariko ximaki. Ātiāo hīparīka auako. Nisākire hīsāpiretako kākitimoni —itxa.

¹⁸ Ininiā iuasaaki ninoa takanapari hetxi, sa itxana Xesosikata.

¹⁹ Apikomoni ninoa saāpota. Itikana Txiako, itari Xoāo pakini. Ninoa Sepeteo anaakori. Kanaua miramaneri āki auanātana iuasaaki. Hetxi iotsaānātana. ²⁰ Iuasaaki iua akiritana ninoa. Ininiā ninoa takanapari iri, iri nitiriakori pakini kanaua āki. Eereka isana Xesosikata.

Kiki Maerekati Matamatakoti Auaītotakiti

(Arókasi 4.31-37)

²¹ Xesosi imoianariakorikata apoka Kapanaoō sitatxiti. Ininiā tomatiko ōtisaaki Xesosi sari aiko Xoteo apotiitiniātaāua oerekarauatini īkapani. ²² Iua sākire kenakotakani tsorīkaāta, kotxi kona kaiōkatsoparerini atokoni !itxa. Iua oerekakiti sākiretxiti pataparari, kotxi !isāpiretari āti koerekarerini sākire apanakini kaiōkatsoparerini atoko. Iuaka sākirekara isāpireta.

²³ Iuasaaki aiko āki Xoteo apotiitiniātaāua aua kiki maerekati matamatakoti auakiti. Iua akiripoakata:

²⁴ —Xesosi Nasaree sitatxitikiri. Kipa pinireka atemoni? Pite ina ate pīxipokini īkapanikani? Erekarinoka kamakarii. Teoso nakiti pitxaua —itxa. Ikara atoko iua akiripoakata, kotxi iua maerekati matamatakoti pīkari Xesosi.

²⁵ Ininiā Xesosi itapararitika txari:

—Piotoka. Pitakanapariko ere kiki īto.

²⁶ Iuasaaki maerekati matamatakoti iōkokaītotari. Ikatxakasaaki, akiripoakata.

²⁷ Kākiti iuaātaā auakani tsorīkaāta. Iuasaaki imisākiretakakauana:

—Kīripa? Atxiīti oerekakori sākiretxiti amaneri apopeka? Iua sākire kaposotiireri. Ipaniātakiti maerekati matamatakoti kamapeka —itxanātana.

²⁸ Ininiā ikara pirena iaripireta ikini Kariréia tōpati.

Xesosi Makananitiniro Simão Petro Imakiro

(Mateo 8.14-15; Arókasi 4.38-39)

²⁹ Ininiā Xesosi, Txiako, Xoāo pakini takanapakasaakiri aiko Xoteo apotiitiniātaāua, isana Simão, Ātree pakini aapokomoni. ³⁰ Iuasaaki Simão imakiro apoomata. Osirīkanāta. Ininiā ninoa sāpiretari Xesosi oamianare. ³¹ Ininiā Xesosi sari oamoni. Imaīkaro ouako. Ōkitikaro. Iuasaakipeka oāpoomare ! auaika. Ininiā opotorika oparīkauatini, ninoa kiena okamini īkapani.

Xesosi Makananitinina Amianatakani

(Mateo 8.16-17; Arókasi 4.40-41)

³² Ininiā mapiānikata kākiti minana ikinipoko amianatakani, maerekati matamatakoti auaītotakini pakini iuamoni. ³³ Ininiā ikinimane iua sitatxi auakani apotiitaua aapokotxi tore takote. ³⁴ Ininiā Xesosi makananitana itomaneri amianatakani. Kaiāopokori amianari auakini imakananita. Apaka omītikana itomaneri maerekani matamatakoni. Iuasaaki !auiritana ninoa sākirauatini, kotxi ninoa imarotari Teoso ākiri ininiua Xesosi.

Xesosi Sāpiretiniri Teoso Sākire

(Arókasi 4.42-44)

³⁵ Īkanōkapanika mapiāpanika Xesosi ōkitikaua. Itakanapari aapokotxi. Iuanoka sari kākiti mauakaniātaā iri iaxitikiri imisākiretini īkapani.

³⁶ Eereka Simão imoianariakorikata sari Xesosi initinina İkapani. ³⁷ Ninoa apokasaakiri, itxana:

—İkinimane nitai —itxarina.

³⁸ Xesosi apakapapiretana:

—Masa ätiätaä kâkiti aapokomoni. Iuaâ nisâpiretariko Teoso säkire, kotxi ikara atoko itxa nıparıka kâkitimoni. ³⁹ Xesosi sari ikini Kariréia tōpa. Aiko Xoteo apotiitiniätaâua isâpiretari Teoso säkire. Apaka omitikana maerekani matamatakoni kâkiti İtoâ auakani.

Kiki Maere Matati

(Mateo 8.1-4; Arókasi 5.12-16)

⁴⁰ Amianatakari maere matati apoka Xesosimoni. İkapotoreêkaua iua apisatoö. Iua iteene amanaäri:

—Nimarotari, pinirekiniäri pıposotari erekape pitxıkitakinino —itxa.

⁴¹ İniniä iuaasaaki Xesosi iteene tiretari iua. İtakari iuako iua nopini. İtxari: —Ari, ninirekapıtıkari. Erekapekai uatxa.

⁴² İuaasaakipeka amianari !uaıka. Erekapekari iua.

⁴³ Xesosi iokanatarı iua. İuaasaaki isâpiretari iua:

⁴⁴ —Kona pisâpiretapıri apanakini pıtemoni nikamakiti. Uatxa merepanika pısa sasetotxiakorimoni. Poerekari pıto ninoamoni. Eereka pikamarıko Moisesini paniätakiti. İkara atoko oerekari kâkiti atâo erekapeka pinini —itxari.

⁴⁵ İuarıtıka isâpiretapıkarı Xesosi kamakiti. İniniä iarıpireta ikara pırena. İkara xıka Xesosi !ıposotaıka isini aapokotximoni. İkaıkota kâkiti mauakaniätaâ. İuarıtıka kâkiti sari uamoni.

2

Matıpokotakati Pirena

(Mateo 9.1-8; Arókasi 5.17-26)

¹ Eereka mapaötıpeka inaka atoko iuaıkana Xesosi Kapanaoö sıtatxiti apoka itxa. İarıpireta Xesosi inirimane aapoko apokini. ² İuaasaakipeka mırikıniı kâkiti apoka uamoni, ininiä iua aapokotxi xâpoka. Apotiıtıauana İronakikoätaâ apaka. İniniä !apakata apanakini kâkiti İroini aapokotxi äki. İuaasaaki Xesosi säpiretari Teoso säkire kâkitimoni. ³ İuaasaaki ipi ipi pakini kikiakori minari matıpokotakati. ⁴ Kâkiti itomaneri İronakikoätaâ aua, ininiä kona iposotarına Xesosi takote apokinına. İniniä aapokotxi nopini, Xesosi manarı ninoa sonatarı iua matıpokotakati iokatxakinına İtkane Xesosi-monıkarı. İposo atoko isıkakaâpotarına iua manarı. ⁵ Xesosi imarotari ninoa atâo auıkinıri iua säkire. İniniä Xesosi txari matıpokotakatimoni:

—Namarıte, pımaerekani makatxakapeêkaıka —itxa.

⁶ İuaasaaki ätkaka kaiökatsopareriakori topâkanäta iuaâ. İtsorıkaänätana. İxinıremonınani:

⁷ —Kınırepa ia kiki ikara atoko itxa? Maerekati isâpiretakiti, kotxi Teosonanıra posotari imakatxakinıri kâkiti maerekani —itxa ninoa säkire.

⁸ İuaasaakipeka Xesosi imarotari ninoa xinıkakiti äkixınıreêna. İniniä Xesosi txana ninoa:

—Kınınıäpa ikara atoko İhtxa xinırepa? ⁹ Nıtxari iua imaerekani nımakatxakini, txamari !himarotari imaerekani atâo nımakatxakini. “Pökıtkıaua. Pısırımata pıkoseka, sıpe pıtxa,” nınınıä, iuaasaaki himarotari nisäkire atâo inınıäua, kotxi İhtıkarı. Nıposotıire imaerekani nımakatxakini İkapani, nıposotıire iua nökıtkıni İkapanıtxıkana. ¹⁰ İniniä uatxaıka noerekai İhte, Teoso iokanatanı nota İhtarı İaxıtıkıri İkorapokoritimoni kâkiti maerekani nımakatxakini İkapani —itxana kaiökatsopareriakori.

¹¹ Ininiã mat̄ipokotakatimoni itxa:

—Põkitikaua. Pisirimata pikoseka, sipe pitxa paapokomoni —itxa.

¹² Iuasaakipeka iua õkitikaua. Ikosekari isirimata. Ìkorape itxa ikinimane okiãtã. Imakinika kãkiti tikoka.

—Peerekari Teoso kamakiti. Kona mitxi ate itankari ìkora atoko inakari — itxanãtana kãkiti.

Mateo Pirena

(Mateo 9.9-13; Arókasi 5.27-32)

¹³ Ininiã iuaĩkana isari ipoamoni. Kaiãopokori kãkiti apotiitaua iuakata. Iuasaaki oerekana ninoa. ¹⁴ Isaãpotakasaaki, atamatarì Arevii inakori. Æti iuaĩka Mateo inaãka. Aopeo inakori ãkiri itxaua iua. Iitopãkanãta auĩtetxiakori txineirote apakapiniãtã. Ininiã Xesosi txari:

—Masa notakata.

Iuasaakipeka õkitikaua, Xesosikata sa itxa.

¹⁵ Eereka Xesosi nipokota Arevii aapoko. Itori auĩtetxiakori txineirote apakapani, itori apanakini maerekani, topãkanãta Xesosi takote, imoianariakori takote pakini. Kaiãopokori kãkiti iua iuasaaki, kotxi kaiãopokori kãkiti Xesosikata sikani. ¹⁶ Pariseoakori, kaiõkatsopareriakori pakini itikari Xesosi auĩtetxiakori txineirote apakapakanikata, apanakini maerekanikata pakini inipokotini. Ininiã kaiõkatsopareriakori, pariseoakori pakini pimaãna Xesosi moianariakori:

—Kinirepa hinipokota auĩtetxiakori txineirote apakapakanikata, maerekanikata? —itxana.

¹⁷ Xesosi ikara ikenakotakasaaki, itxana:

—Kãkiti mamianatakani kona nirekari kãkiti pinĩtxi imarotakari. Amianatakaninokara nirekari pinĩtxi imarotakari. Nota uai apoka maerekani nakiritini ìkapani, imaerekanina itakanapinina ìkapani. Kona nakiritari kãkiti “atão inakari kamakani” uãkatakaniua —itxa Xesosi.

Nipokori Takanapiko Teoso Misãkiretiko Ìkapani

(Mateo 9.14-17; Arókasi 5.33-39)

¹⁸ Æti õti Xoão moianariakori, pariseoakori pakini takanapari inikinina Teoso imisãkiretinina ìkapani. Iuasaaki kãkiti pimaãri Xesosi:

—Kinirepa Xoão moianariakori, pariseoakori pakini takanapari inikinina Teoso imisãkiretinina ìkapani, txamari pite moianariakori kona ikara atoko ! itxana.

¹⁹ Ininiã Xesosi:

—Kiiniri kãkiti ìtanorouatakasaaki, ìtanorouatakari aua iuaã, ininiã kona kãkiti takanapari inikini iuasaaki. Kona iua ìtanorouatakari nirekari kãkiti natxitini. Ininiã iua auakasaaki ninoakata, ikinimane nipokota.

²⁰ Ininiã nota ìtanorouatakari atoko nitxa. Nota auakasaaki nimoianariakorikata, kona itakanaparina inikinina Teoso imisãkiretinina ìkapani. Æti õti nota !auaika nimoianariakorikata. Iuasaakiikarako itakanaparina inipokotinina Teoso imisãkiretinina ìkapani.

Amaneri Mãkatxi Pirena

²¹ Kona kãkiti tãpanetari mãkatxi kitxakari mãkatxi mata amaneriã. Mãkatxi mata amaneri itxikika, ininiã kitxakari tsorakita.

Amaneri Sako Aamata Kamakori

²² Kona kãkiti takari iãriã amaneri sako kitxakari aamata kamakori ãki. Itakinãri, koanatxi kitxakari aamata kamakori tsorakita, ininiã iãriã xikepoata, ininiã koanatxi !kikeikari. Sako amaneri ãki itakaãka iãriã amaneri. Iua atokokana kona hĩkoketari kitxakari sãkiretxiti amaneri sãkiretxitikata.

*Tomatiko Ôti Pirena**(Mateo 12.1-8; Arókasi 6.1-5)*

²³ Tomatiko ôti Xesosi imoianariakorikata napaãpota kikio triko takikoãtaã. Ininiã ninoa makatxakaro triko iki mapaki inikinirona ikapani.

²⁴ Pariseoakori atamatana, ininiã itxarina:

—Kinirepa ninoa parĩkauata tomatiko ôtisaaki? —itxana.

²⁵ Ininiã Xesosi apakapapiretana:

—Kona hãtatsopatapanikari Taviini kamakiti? Iua, imoianariakorikata natx-itakasaaki, kona himarotatari ikamakiti? ²⁶ Iua Ìroã Teoso misãkiretikoãtaã. Apiataa inakori sasetotxi auĩte apiatakari iusaaki. Iuaã Tavii nikari kómiri Teosomoni sikakori. Sasetotxinokara auritaãka iua komiri inikinina. Apanakini !auritaãka inikiniri. Txamari Tavii sikari imoianariakori inikinina ikapani.

²⁷ —Tomatiko ôti kamaãka, kãkiti Ìto ereka inini ikapani. Kona kãkiti kamaãka tomatiko ôti auini ikapani. ²⁸ Nota hĩtari iaxitikiri posotari ikinipoko ninireẽkiti nikamini tomatiko ôtisaaki, kotxi Apiananiri nitxaua —itxa Xesosi.

3*Motĩkauakotakari Pirena**(Mateo 12.9-14; Arókasi 6.6-11)*

¹ Iuaãkana Xesosi imoianariakorikata Ìroã aiko Xoteoakori apotiitiniãtaãua. Iuaã apokari kiki motĩkauakotakari. ² Ininiã iuaã auakani txari

—Atxiiti iua erekapeka txĩkitakari motĩkauakotakari uatxa tomatiko ôtisaaki?

Ninoa xinikari ikara atoko inini, kotxi ninoa kinirão apoĩtaka txari Xesosi.

³ Ininiã Xesosi akiritari iua motĩkauakotakari:

—Uaimoni pina —itxari.

⁴ Iposo atoko ipimaãna iuaã auakani:

—Kipa atão Teoso paniãtaua akamini tomatiko ôtisaaki? Maerekati akaminikani? Erekarari akaminikani? Ipaniãtataua ãti amakananitini? Ipaniãtataua ãti aõkini?

Txamari ninoa !kasãkirena. ⁵ Xesosi atamatana. Iusaaki inaiataua, iuaritika imatinianuata, kotxi ninoa !inirekarari atão imarotinina. Ininiã Xesosi txari iua motĩkauakotakari:

—Pisirĩkauakota —itxari.

Ininiã itamẽkauakota. Erecape itxa iuako. ⁶ Ininiã pariseoakori potorika iuaã. Isana Erotxi sãkire auĩãkanimoni. Iuaãtaã ninoa xinikari Xesosi okaenitina.

Itori Amianatakani Sari Xesosimoni

⁷ Ininiã Xesosi sari Karirẽia poamoni. Iusaaki itori kãkiti Karirẽia tixinikini, Xotẽia tixinikini pakini sari iuamoni. ⁸ Xerosareẽ sitatxitikini, Itomẽiakini, Xotão ipiniãkini, Txirokini, Sitoõkini pakini sari iuamoni. Ninoa kenakoenetari ikamakiti, ininiã iuamoni isana. ⁹ Ininiã ipaniãtana imoianariakori:

—Kanaua himina, kotxi kaiãopokori kãkiti katikaãpotano. Ininiã kanaua ãki niereẽtaua —itxa Xesosi.

¹⁰ Iusaaki kaiãopokori kãkiti erekapeka itxĩkitakapeka. Apanakini amianatakani nirekakari imaãtakinirina Xesosi, erekapeka ininina ikapani. Ininiã ikatikaãpotarina Xesosi, kotxi kaiãori kãkiti. ¹¹ Maerekati matamatakoti auakini atamatakasaakiri Xesosi, irikana Xesosi apisatoõ. Akiripoatana:

—Teoso ãkiripitikai pite.

¹² Ininiã Xesosi kona auritana ninoa: “Teoso ãkiripitikai,” ininina.

Xesosi Mereēna Tosi Imoianariakori

(Mateo 10.1-4; Arókasi 6.12-16)

¹³ Iposo atoko Xesosi sari ōtanoxiratarimoni, akirita itxana inirekaākini. Ininiā ninoa sari iuamoni. ¹⁴ Ininiā iua mereēna tosi kikiakori iuakata kaiko-takani tīkane, Teoso sākire sāpiretakani ĩkapani. ¹⁵ Iua sikari iposotiire ninoamononi, amianatakani erekapeka itxĩkitakinina ĩkapani, apaka maerekati mata-matakoti omitikinina ĩkapani. ¹⁶ Ininiā akiritari Simāo. Xesosi takauākatar Simāo āti iuāka. Petro itxaua. ¹⁷ Akiritana Txiako, itari Xoāo pakini. Sepeteo anaakori itxauana. Xesosi takauākataka ninoa Poanexi. Poanexi Popĩkari sākireē “Ikarokirauari anaakori.” ¹⁸ Akiritana Ātree, Piripi, Patoromeo, Mateo, Tomee, Txiako pakini. Aoepo ākiri itxaua iua Txiako. Akiritana Tateo, Simāo pakini. Homano omanatakari iua Simāo. ¹⁹ Akiritari Xotasi Isikariotxi inakori apaka. Xesosi mĩkapiritakari itxaua iua Xotasi Isikariotxi. Pakini Xesosi akiritakini imoianariakori ininiuana ĩkapani.

Maerekani Matamatakoni Omitikiko

(Mateo 12.22-32; Arókasi 11.14-23; 12.10)

²⁰ Iuaĩkana āti aapokotxitimoni isa Xesosi, imoianariakorikata. Iuasaaki mirikiniti kākiti iuaĩkana apotiitaua. Ikara atoko ininiā kona ninoa nipokota. !Apakata inipokotinina, kotxi mirikiniti kākiti aua iuaā. ²¹ Xesosi nirimane kenakotari kākiti apotiitiniua iuakata. Ininiā isana iua apinina ĩkapani.

—Imapitxiritapeka —itxana.

²² Kaiōkatsopareriakori Xerosareē ĩkani apoĩtari Xesosi maerekati ikamini. Ninoa sākire:

—Peosepoo inakori auaĩtotari iua. Ininiā Peosepoora omitikari maerekati matamatakoti —itxana.

Peosepoo Satanasi itxaua. Apanakini sākire:

—Maerekani matamatakoni auĩte sikaposotiiretari Xesosi maerekati matamatakoti omitikini.

²³ Ininiā Xesosi akiritari kākiti isākire ikenakotinina ĩkapani. Sāpirenatxi atāo inakari oerekiko isāpiretana ninoa. Ipimaāna:

—Natokopa itxa Satanasi omitekiniua? ²⁴ Auĩtetxi tixine auakani na-iatakakiniāua, ixipokaākanako. ²⁵ Kākiti aapoko āki auakani ninoakakarika neenamauatiniā, ixipokaākanako apaka. ²⁶ Iua atokokana, Satanasi nitiri-akori, ninoakakarika naiatakakiniāua, Satanasi tapara xipokako.

²⁷ —Kona kākiti ĩroā kiki mitapoari aapoko āki ĩtiriuatini ĩkapani. Kinirāo ĩtiriuatana, ininiā iaxirikari mitari mitxi. Iposo atoko inirekaākiti ĩtiriāka.

²⁸ —Ari, atāopitkara nota txai hĩte. Apakata Teoso makatxakiniri ikinipoko maerekati kākiti kamakiti, imaerekani Teoso imisākirepiretini pakini. ²⁹ Txamari ātipekana maerekati kamakari aua. Erekar Matamatakoti misākirepiretakari maerekani makatxakiko kona auari. Ikara atoko inakani inikoriāriko imisiritiko maerekani misiritikoātaā —itxa Xesosi.

³⁰ Xesosi ikara atoko itxa, kotxi pariseoakori txari: “Iua auari maerekati matamatakoti.”

Xesosi Inoro, Itariakori Pakini

(Mateo 12.46-50; Arókasi 8.19-21)

³¹ Iuasaaki itariakori inorokata apoka porikiti. Ipaniātarina āti akiritiniri Xesosi. ³² Iuasaaki itori kākiti topākakani ākitari Xesosi. Isāpiretarina:

—Pitariakori, pinoro apaka porikiti aua. Initanātai —itxarina.

³³ Ininiā Xesosi apakapapireta:

—Kiripa nitariakori, ninoro pakini?

³⁴ Iua atamatana itakote topākakani:

—Hātamata, uai aua ninoro, nitariakori pakini. ³⁵ Teoso nireēkiti kamakani nitariakori, nitaroakoro, ninoro pakini itxauana —itxa Xesosi.

4

Katakareri Pirena

(Mateo 13.1-9; Arókasi 8.4-8)

¹ Iuaĭkana Xesosi oerekarauata ipoa takote. Kākiti mirikiniti, ininiā imorōkokaua kanaua āki. Iitopāka. Ninoa aua imiriī, ininiā iua kanauaā oerekarauata. ² Itori Teoso sākire oerekana ninoa sāpirenatxi atāo inakari oerekikoā. Itxana:

³—Hīkenakota. Katakareri takarauata. ⁴ Itakarauatakasaaki itakareki irika kimapori tiniāpo. Ininiā kotipiriki nikari itakareki.

⁵—Apanakini itakareki irika kai auiniātaā, kipatxi mauakaniātaā. Atāoka ipitxaka. ⁶ Kipatxi poiāoka auiniā atokatxi pataka apokasaaki itxarika. Omakotsani xika osonāka. ⁷ Apanakini irika inako sauaki. Inako aneēkasaaki, okari takari. !Iriuata. Ipina.

⁸—Apanakini irika kipatxi auiniātaā. Ininiā iriuata. Āti poiāoka iriuata, trītakata. Āti apiata iriuata, sesētakata. Āti kaiāopoko iriuata, seĭkata.

⁹—Kakenakokii, ininiā hīkenakotariko nisākire —itxa Xesosi.

Kākiti Mimarotakiniti Xesosi Sāpiretini Pirena

(Mateo 13.10-23; Arókasi 8.9-15)

¹⁰ Iuanani imoianariakorikata auakasaaki, ipimaārina Xesosi:

—Poerekaua mixikanani sāpirenatxi atāo inakari oerekiko pisāpiretakiti? — itxarina.

¹¹ Ininiā isāpiretana:

—Teoso sākire mauīākani !imarotari Teoso auĭtetxi ininiua. Teoso oerekai hīte ninoa mimarotakiniti. Teoso oerekana ninoa isākire sāpirenatxi atāo inakari oerekikoā. ¹² Atxiīti ninoa iteene atamatari Teoso oerekakiti, iuaritika !imarotarina atamatakitina. Atxiīti iteene ikenakotarina Teoso sākire, iuaritika !imarotarina ikenakotakitina. Imarotaākamariko, akiritaākamariko Teoso, ininiā Teoso maktaxakamariko ninoa maerekani.

¹³ Ininiā Xesosi txari:

—Himarotatari ikara sāpirenatxi atāo inakari oerekiko?

—!Aimarotari —itxana.

—Ininiā natokopa ininiāparako himarotatari apanakini sāpirenatxi atāo inakari oerekiko?

¹⁴ Ininiā imimarotakinitina oerekana:

—Iua takarauatakari takari Teoso sākire. ¹⁵ Aua kākiti kimapori tiniāpo takarekitxi irikiniātaā atoko inakani. Ininiā Teoso sākire ikenakotakasaaki Satanasi apoka. Ininiā imaktaxakari Teoso sākire ākixinireēna apokakari.

¹⁶ —Aua kākiti kai auiniātaā atoko inakani. Ninoa kenakotakasaakiri Teoso sākire, iusaakipeka apakaparina ipoxokoniritikana. ¹⁷ Itxamana, kona kakotsari. Imaxikiko apokiniā, imisiritiko Teoso sākire auikinina xika apokiniā, iusaaki itakanaparina Teoso sākire.

¹⁸ —Aua kākiti aanaia auiniātaā atoko inakani. Ninoa kenakotapitikari Teoso sākire. ¹⁹ Txamari maerekaxiniretinoka itxana. Txineironoka inirekana, ininiā ikara misirienetana ninoa. Kaiāopokori inireēkitina, Teoso manirekakiniti. Maerekaxiniretinoka ininina, txineiro, inireēkitina pakini inako atoko itxa, ininiā !ixinikaikarina Teoso sākire, ininiā kona iriuata.

²⁰ Aua kākiti kipatxi erekari auiniātaã atoko inakani. Ninoa auikari Teoso sākire. Iriuatana. Āti iriuata poiãoka, trītakata. Āti iriuata apiata, sesētakata. Āti iriuata ito, seíkata.

Tirikapi Pirena

(Arókasi 8.16-18)

²¹ Xesosi pimaãna ninoa:

—Nanipa hītakari tirikapi? Kopiti ākikani hītakatari? Amesapaatapikani hītakatari? Konapitini. Hītakari itano imakinika iopinikini ĩkapani.

²² Iomaãtakori āti ōti oerekaãkako. Kipatakori oerekaãkako, kotxi nota imarotapitikari hīkamakiti. ²³ Kakenakokii, ininiã hīkenakotariko nisākire —itxa Xesosi.

²⁴ Xesosi sākirauatapanika:

—Hītakaōtxikariko nisākire. Imakinika hīkenakotako. Erepaniko pikamakiti ātimoni, kotxi pite kamakiti txikana kamaãka pitemoni. Erepaniko, kotxi apiata ikamaãka pitemoni. ²⁵ Teoso sākire auakiti, iua sākire kīpitakari, Teoso sikari apikomoni imaroretxi iuamoni. Txamari Teoso sākire kenakotakari, isākire makīpitakati, imarore xapiti iuamoni auakari makatxakaãkako.

Takariki Pirena

²⁶ Apikomoni Xesosi txari:

—Teoso auñtēxi ininiãua kiki takariki taãkari atoko itxa. ²⁷ Itakarauata. Imaka ĩkanōka. Āti iparĩka ikama pokamara. Iuasaaki itakare pitxakapeka. Kona iua imarotari otomorekini. ²⁸ Merepanika otomoreka. Iposo atoko opitxaka. Eereka opa aua. ²⁹ Oaneẽpeka onakasaaki katakareri makoap-ataro, kotxi oamiko manapipeka itxa.

Ikara atoko itxa Teoso auñtēxi ininiãua.

Mostata Pirena

(Mateo 13.31-32; Arókasi 13.18-19)

³⁰ Xesosi sākirauatapanika. Itxari:

—Natokopa itxa Teoso auñtēxi ininiãua? Īkiripa sãpirenatxi atão inakari oerekiko oerekaua? Ia atoko itxa: ³¹ Teoso auñtēxi ininiãua mostata oki atoko itxa. Axapitikiro oa. Apanakini iki apiata. ³² Otakaãka atoko opitxaka. Eereka oaneẽ. Apanakini takari ĩtano apiata oa. Amaripokoro okati. Kotipiriki takari okoa ōkatiã. Iua atokotxikana Teoso auñtēxi ininiãtaãua.

Merepanika poião kākiti. Eereka apiata. Eereka kaiãopokori kākiti auñtetari Teoso. Txamari iuasaaki Satanasi apoka ninoamoni kotipiriki apokini atokokana.

³³ Kaiãopokori sãpirenatxi atão inakari oerekiko isãpiretana, Teoso sākire imarotinina ĩkapani. Ninoa imarotakasaakiri isākire, apiata isãpiretana. Im-imarotakanisaakiri isākire, poiãonoka isãpiretana. ³⁴ Teoso sākire oerekasaakina ninoa, sãpirenatxi atão inakari oerekikonoka isãpireta. Eereka imoianari-akorinoka auakasaaki iuakata, oerekana ikara imarotinina ĩkapani.

Xesosi Iotokakiniri Ītima

(Mateo 8.23-27; Arókasi 8.22-25)

³⁵ Iua ōtipanika mapiãnikata itxana imoianariakori:

—Maĩpiriãta ipoa. Īpiniãmoni masa —itxana.

³⁶ Ininiã itakanapana itomaneri kākiti. Iuasaaki imoianariakori anikari Xesosi kanauaã. Apanakini kanaua axapitiri apaka sari ninoakata.

³⁷ Īpiriãtakasaakina ĩtima kataparari apoka ninoamoni. Tsakati kataparari, ininiã ãparaã ierepeẽpokataua kanaua āki. Kanaua sakikaariãpotape.

³⁸ Iuasaaki Xesosi ikapokiãmoni imakanãta. Isirimata nopini imakanãta. Ninoa õpirĩkari iua:

—Kona pimaãkataua ate. Kona pitiretataua? Apinanapanoka —itxana.

³⁹ Ininiã imereka. Ipinitari ãtima:

—Piotoka. Auapika pitxako —itxari ipoa.

Ininiã itsorĩkaxitita. ãtima iotoka. Tsakati iotoka apaka. ⁴⁰ Ininiã Xesosi: —Natokopa ininiãpa kapĩkarei hĩte? Kinirepa hĩte kona auikano nota? —itxana ninoa.

⁴¹ Apiapĩkareta ninoa. Ininiã ninoa:

—Kinakaripa ia kiki, kotxi ãtima, tsakati pakini auikari iua sãkire —itxana.

5

Kiki Maerekani Matamatakoni Auãtotakiti

(Mateo 8.28-34; Arókasi 8.26-39)

¹ Xesosi imoianariakorikata apoka ãtiãtaã Xerasa tõpa, Karirẽia poa ipiniã. ² Xesosi kanĩkiĩtakasaaki, kiki ina iuamoni. Iua akauariãtaã auakari. ³ Iuaãtaã iua auanãta. Kãkiti !iposotari iĩtxikiniri iua. Iĩtxikare metao kamakori karakitapekata. ⁴ Kaiõokotani kãkiti iĩtxikari iuako, ikiti pakini metaoã, txamari ikakarakitsatari metao. !Apakata kãkiti nĩkatiniri iua. ⁵ ãkanõka, pokamara pakini ixirataãtaã akiripoanãta akauari auiniãtaã. Kai soroã iuaka ikisauakitataua. ⁶ Õtakopanika atapari Xesosi inini. Ininiã imiteẽkata iuamoni. Ikapotoreẽkaua iua apisatoõ.

—Apiananiri pitxaua —itxa.

⁷ Akiripoakata:

—Xesosi, Teoso ãkiri pitxaua. Apiananiri ãkiri pitxaua. Kipa pinireka nota ikapani? Teoso uãkaã namanaãi pite, kona pimisirritapeno —itxa maerekati matamatakoti. ⁸ Ikara atoko itxa kotxi Xesosi paniãtari:

—Maerekati matamatakoti pisipeka. Pitakanapari ere kiki —itxari.

⁹ Xesosi pimaãri:

—Kipa piuãka? —itxari.

Iua apakapapiretari:

—“Itori” ninaãka niuãka. Kotxi itori maerekani matamatakoni ate.

¹⁰ Iteene iua amanaãpotari Xesosi:

—Kona piokanatapeua ãtiãtaã.

¹¹ Iuasaaki auari kaiõopokori irari ixiratamoni nipokonãtakani.

¹² Maerekati matamatakoni iteene amanaãri Xesosi:

—Piokanataua ate irarimoni. Pauiritaua ate sini ninoamoni —itxanãtana.

¹³ Ininiã Xesosi iokanatana. Iuasaakipeka maerekani matamatakoni takanapari iua kiki, iroã itxana irari itomoni. Iuaãtaã auari ipi mio irari. Ninoa iroãkasaaki, irari miteẽkata oiokiriĩtini ipoamoni. Komoka, axãpoãta itxana iuasaaki.

¹⁴ Irari nĩkatakani miteka sitatximoni, aapokotxi poião auinimoni pakini. Isãpiretana kãkiti itikakitina. ¹⁵ Eereka isana Xesosimoni. Iuasaaki atamatarina kiki mitxi maerekati auãtotakiti. Iitopãkanãta. Mãkatxi auapekari. Atão iĩkitapeka auari. Iuaritika ninoa pĩkarauata. ¹⁶ Itikakani sãpiretari apanakini iua kiki pirena, irari pirena pakini. ¹⁷ Kãkiti iuaãtaã auakani paniãtari Xesosi osipikiniri iuaãtaã.

¹⁸ Xesosi iereẽtakasaakiaua kanaua ãki, iua kiki amanaãri iuakata isini ikapani. ¹⁹ Xesosi !auiritari. Itxari:

—Pisa pinirimanemoni. Pisãpiretana Apiananiri kamakiti pite ikapani. Pisãpiretana iua iteene iamoniãki pite. ²⁰ Ininiã iua sipe. Iuaãtaã auari sitatxi

tesi pakini. Iua kiki sari ninoa tesi sitatxitimoni. Isāpiretari kākiti Xesosi kamakiti iua ikapani. Iuaātaā auakani tsoriākaāta:

—Anekani, peerekari Teoso —itxana.

Xáiro Amanaākiti Pirena
(Mateo 9.18-19; Arókasi 8.40-42)

²¹ Ininiā eereka Xesosi ipiriāta ipoa. Ininiā ipoa itiniā kaiāopokori kākiti apotiitaua iuakata. ²² Aiko Xoteo apotiitiniātaāua sikani auite apoka iuamoni. Akiritaāka Xáiro iua. Iua kapotoreēkaua Xesosi apisatoō. ²³ Iua iteene amanaāri Xesosi:

—Namarite opinanapanoka. Masa notakata. Pitakari piuako oa nopini erekape onini ikapani.

²⁴ Ininiā Xesosi sari iuakata. Kākiti kinapokope itxakata isinina.

Xesosi Māka Maātakakaro
(Mateo 9.20-22; Arókasi 8.43-48)

²⁵ Iuasaaki sito amianataro apoka. Tosikanani oa arēka ! iotoka. ²⁶ Okinika otxineiroteē oikixitapekari oamianare imarotakani. Kaiāopokori ipitamaro. Txamari ninoa ! iposotari imaktxakinirina oamianare. Kona erekaro. Apiata oamianare. ²⁷ Okenakoenetakasaakiri Xesosi napini, osari iuamoni. Omaātakari imāka, ²⁸ kotxi oamoni: “Nimaātakiniāri imāka, iuasaakiika erekapekano,” otxanāta oxinikakiti. ²⁹ Ininiā omaātakasaakiri, oarēka iotoka. Iuasaakiika oimarotari erekape onini.

³⁰ Iuasaakiika Xesosi potsotiire sari oamoni. Ininiā ikirioka kākiti sauaki. Eereka ipimaāna:

—Kipa maātakatari nimāka? —itxa.

³¹ Iuasaaki imoianariakori apakapapiretari:

—Apiananiri, patamata. Itomaneri kākiti kinapokopeka, iuaritika pite pimaāri kākiti: “Kipa maātakatano?” pitxa —itxana.

³² Iuaritika Xesosi nitari imāka maātakakari. ³³ Iuasaaki oa sito imarotari erekape onini, ininiā okapotoreēkaua iuamoni. Opikarauata. Okikinanaka. Eereka osāpiretari ikinika oamianare iuamoni. ³⁴ Ininiā Xesosi txaro:

—Namarite, pite erekapekai uatxa, kotxi pauikari niposotiire. Pispini-ikaua, erekaxinirepekai —itxa Xesosi.

Xáiro Ākero Ōkitikiko
(Mateo 9.23-26; Arókasi 8.49-56)

³⁵ Xesosi sākirauatakasaaki oakata, apanakini Xáiro nitiriakori apoka. Itxari: —Pamarite Iuaika. Opipeka. Pauiritari Xesosi kanapiriini.

³⁶ Ininiā Xesosi !imaākatari ikara pirena. Itxari Xáiro:

—Kona pipikarauatape. Pauikano —itxari.

Ininiā ninoa sari Xáiro aapokomoni. ³⁷ Xesosi auiritana Petro, Txiako, Txiako itari Xoão pakini sini iuakata. !Auiritana apanakini sini iuakata. ³⁸ Ninoa apokasaaki Xáiro aapoko, kākiti iuaātaā auakani ! imarotarina ikamakitina. Ikinipoko kākiti txiapanāta, akiripoakanāтана. ³⁹ Xesosi Iroā. Itxana:

—Kinirepa iteene hītxiapanāta? Kinirepa hākiripoanāta? Amarini !ipina. Oimakanāta —itxa.

⁴⁰ Ininiā inapetarina iua. Ininiā iokanatanana ninoa mapara. Oīri, onoro, Xesosi moianariakori pakini Iroā amarini auiniātaā. ⁴¹ Imaīkaro ouako. Iuasaaki isāpiretaro oa isākireē:

—Taritaa komii.

Popikari sākireē: “Amarini pōkitikaua.”⁴² Iuasaakipeka oōkitikaua. Otīpokota. Oa amarini aua tosi anokanani. Iuasaaki ninoa iteene tsorīkaāta.⁴³ Ininiā Xesosi paniātana:

—!Hīsāpiretapiri apanakini nimakananitiniro oa.
Apaka ipaniātana isikakienatiniro oa.

6

Nasaree Auakani Kona Auikari Xesosi Sākire
(Mateo 13.53-58; Arókasi 4.16-30)

¹ Xesosi imoianariakorikata potorika iuaā. Nasaree sitatxitimoni isana. Iuaātaā mitxi Xesosi aneē. ² Tomatiko ōtisaaki iua oerekari kākiti aiko Xoteo apotiitiniātaāua. Xesosi sākire kenakotakani tsorīkaāta. Itxana:

—Nanipa apaiaōkarauata, ikara atoko imarotini? Kipa oerekari imarore? Ikamakiti oerekari apiata imarore aua. Kininiāpa ĩkora atoko itxa posotiireta? ³ Ate imarotari iua, kotxi aapokotxi kamakari itxaua iua. Maria ākiri iua. Iua itariakori Txiako, Xosee, Xota, Simāo pakini itariakori itxauana. Itaroakoro apaka aua uai, ininiā ate imarotari iua —itxana.

Ikara xika kona ninoa auikari isākire.

⁴ Ininiā Xesosi txana ninoa:

—Teoso sākire sāpiretakari paxitaāka, txamari Teoso sākire sāpiretakari itixineē auakasaaki, iuaā auakani, inirimane, iua aapoko āki auakani pakini ! ipaxitari. !Auikarina iua sākire —itxa.

⁵ Ininiā iuaā kona ikamari iposotiire apiari. Iuako itaka ātikaka amianatakani nopini, ininiā amianatakani erekapeka itxīkitaka. ⁶ Itsorīkaāta, kotxi iuaā auakani !auikari isākire. Ininiā iua tōpa isari aapokotximoni. Oeekarauata iuaā. Eereka isari apanakini aapokotxitimoni. Iuaīkana oekarauata. Itxaāpota iuaātaā.

Xesosi Iokanatana Imoianariakori Kākitimoni.
(Mateo 10.5-15; Arókasi 9.1-6)

⁷ Xesosi akiritana imoianariakori tosi pakini. Ipi iokanata ātiātaā, iuaīkana ātiātaā iokanatana ipi. Ikara atoko iokanaāpotana imoianariakori. Iposotiire isikana ninoa maerekani matamatakoni omitikinina ĩkapani.

⁸ Itxana:

—Kona minakati hanikape. Hītsonerenoka hanika. Kona hītii, kona auatxi, kona txineiro !hanikape. ⁹ Hīkiti mata hīeretaka. Ātika kasipiri himāka hanika. ¹⁰ Sitatxi hāpokasaaki, ātika aapokotxinanirako hāua. Iua sitatxi hāuakasaaki, hīkaikota iua kākiti aapoko. Kona hāuape āti kākiti aapoko. ¹¹ Kākiti mapakapakanisaaki, hīsākire imakenakotakanisaakina, ininiā hītakanapana. Hīpotorikasaaki, hīkaxipokari kipatxi hīkiti mataā auakari, ininiā ikara atoko hōerekana ninoa maerekani ininiuana. Kākiti misiritiko sāpiretiko ōti apokasaaki, Sotoma sitatxiti auakani misiritiko auapitika. Iuasaaki Komoha sitatxiti auakani misiritiko auapitika. Iuaritika sitatxi auakani hīte mapakapakani misiritaākako apiata iuasaaki.

¹² Ininiā isana. Isāpiretari kākiti imaerekani itakanapini.

¹³ Mirikiniti maerekani matamatakoti iokanatana. Iitxiā itakana amianatakani nopini. Ininiā erekapeka itxīkitakana amianatakani.

Xoāo Kapatxisareri Ipinini
(Mateo 14.1-12; Arókasi 9.7-9)

¹⁴ Auītetxi Erotxi inakori kenakopiretari Xesosi pirena. Xesosi uāka iaripireta ikini tōpati. Ininiā Erotxi xinikanāta:

—Ikara Xesosi, Xoão kapatxisareri itxaua. Uatxa iua õkitikapekaua. Iuakara Xesosi itxa. Ininiäkara iposotiire aua iuamoni.

¹⁵ Ätikaka uäkatarı Xesosi Eriasi ininiua. Ätikaka uäkatarı Xesosi Teoso säkire säpiretakari kitxakapirika ininiua.

¹⁶ Ikara Erotxi kenakopiretakasaaki, itxari: —Xoõokara nitsotakakiitaktikara iua Xesosi txa. Ipipekariika iuaikana õkitikapekaua —itxa.

¹⁷ Mitxi Erotxi takaro itari Piripi İtanoro. Ouäka Erotxia inakoro. Oa xika Erotxi maikari Xoão. Iaxiriiıotari, kateia äki taka itxari. ¹⁸ Xoão takaäka kateia äki, kotxi itxari Erotximoni:

—!Erekari pitari İtanoro pitakini —itxari.

¹⁹ Ikara xika Erotxia apaka omanatari Xoão. Oa iteene kiniräo okaka otxamari Xoão. Kona oposotari oõkiniri iua, ²⁰ kotxi Erotxi pikari Xoão. Iua imarotari, atäo inakarinoka kamakari, erekarinoka kamakari ininiua Xoão. Xoão säkire ikenakotakasaaki, İiteene İmarotari isäkire, iuaritika iua apokaerekatari ikenakotiniri isäkire.

²¹ Erotxi kamari isaiä kiiniriti. Iua kemaİtxitana sotato auİteakori, Kariréia auakani auİteakori, apanakini auİteakori pakini. ²² Ininiä Erotxia äkero apoka iua kiiniritiä. Iuasaaki oserenapirıkata Erotxi apisatoõ, ikemaİtxitakini apisatoõ pakini. Ninoa potxitari oserenini. Ininiä Erotxi txaro oa ätokoro:

—Pinirekakiti pamanaäno, ininiä nisikai. ²³ Atäopitikara nisikai pamanaäkiti. Nİtxine pinirekiniä, ipixini nisikai —itxaro.

²⁴ Ininiä oa miteka onoromoni. Oa pimaä txaro onoro:

—Kiripa namanaätari? —otxaro.

Ininiä onoro txaro:

—“Xoão Kapatxisareri kii prato nopini ninireka,” pitxari. Ikara atoko pamanaäri iua —otxaro.

²⁵ Ininiä katimariä okanapiriä kiiniri auiniätaä iuaikana. Katimariä auİtetximoni osa. Oamanaäri iua:

—Ninirekari Xoão kapatxisareri kii prato nopini —otxa.

²⁶ Ininiä Erotxi maerekaxiniretinoka itxa, kotxi mitxi iua säpiretaro oa amanaäkiti isikiniro oa ikemaİtxitakini apisatoõ. Ininiä ! apakata imasikakaniäri isikaenetakiti. ²⁷ Ininiä katimariä ipaniätari sotatoakori okiniri Xoão:

—Ikii himina —itxa.

Ininiä isana kateiamoni. Itsotakakiitarina Xoão. ²⁸ Pirato nopini itakarina İkii, sika itxarona ätokoro. Ininiä oa sikari onoromoni.

²⁹ Ininiä Xoão moianariakori kenakopiretakasaakiri Xoão okiko pirena, isana kateiamoni. Aparina İto. Itakarina İto kai iriko äki.

Sİko Mio Käkiti Xesosi Sikakienatini

(Mateo 14.13-21; Arókasi 9.10-17; Xoão 6.1-14)

³⁰ Ininiä Xesosi iokanatakini kanapiriä iuamoni. Apoka itxana Xesosi-moni. Isäpiretarina ikamakitina, oerekakitina pakini. ³¹ Iuasaaki kaiäopokori käkiti aua iuaätaä, ininiä !apakata inipokotinina. Ininiä:

—Amasipeka käkiti mauakaniätaä atomatini İkapani —itxana.

³² Ininiä kanauaä iereëtauana. İpiriätarina ipoa. Isana käkiti mauakaniätaä.

³³ Käkiti itikari Xesosi inapaäpotini, ininiä ninoa miteka. Iopiriärina ipoa koropoa, apoka itxana Xesosi apisapanika. ³⁴ Iua kanİkİtakasaaki apisamoni mirikiniti käkiti, ininiä İamonİkana, kotxi soti auİte ipitikiri mauakiniti atoko itxana. Iuasaaki Xesosi oerekana kaiäori Teoso säpiretakiti.

³⁵ Ininiä mapiäpeka inaäpotiniä, Xesosi moianariakori iuamoni apoka. İtxarina:

—Kona kākiti aapoko auari uai. Uatxa mapiaāpopeka. ³⁶ Ininiā pipaniātana kākiti isinina ikapani nipokori iamotinina tīkane.

³⁷ Ininiā Xesosi:

—Hītekarako sikakienatana ninoa —itxana.

Ininiā ninoa:

—Pinirekatari asini komiri aamotini ikapani? Oito kasiriti kākiti parīkauatini ūki anireka komiri ūki naia kākiti nikini ikapani —itxana.

³⁸ Ininiā Xesosi pimaāna ninoa:

—Kipakinipa komiri katari aua? Hātariko —itxa.

Ninoa imarotakasaakiri, apoka iuamoni. Itxana:

—Sīko pakini komiri katari, ipi ximaki pakini aua —itxarina.

³⁹ Xesosi paniātana ikinika kākiti topākini katsotati nopini. ⁴⁰ Ātiātaā iitopākana sīkoēta, ipinimoni iitopākana seī. Imakinikana ikara atoko itxaāpotana iitopākinina.

⁴¹ Ininiā Xesosi kosekari sīko pakini komiri, ipi ximaki pakini. Iuasaaki ionakaāta iaxiti:

—Erekapitikari pisikakiti —itxa.

Eereka imaxiōpekarī komiri. Isikari imoianariakori. Imoianariakori-ripekana sikaāpotana apanakini. Iuaīkana imapirinikari ximaki, xanaka itxari imakinikana. ⁴² Ikinimanekana nipokota, kamitopeka itxana. ⁴³ Ininiā imoianariakori apotiitari ximaki itetakori, komiri itetakori pakini. Tosi pakini kotari xāpoka itetakori. ⁴⁴ Iuasaaki sīko mio kikiakori nipokotani.

Xesosi Ipoa Nopini Itīpokotini

(Mateo 14.22-33; Xoāo 6.15-21)

⁴⁵ Xesosi takapiretakasaakiri kākiti, iuasaaki iokanatana imoianariakori ĩpiriātinina iua apisa, Petsāita tixinimoni isinina ikapani. ⁴⁶ Xesosi takapiretanapaka atoko, mitaxiratarī nopini isa Teoso imisākiretini ikapani. ⁴⁷ Mapiāpe inakasaaki kanaua ipoa apanīkakiāxitipeka aua. Iuasaaki Xesosi imiriīpanika aua.

⁴⁸ Xesosi atamatana ninoa, itaparanoka itxana imekoātinina, kotxi ĩtima, tsakati pakini anikaāpotana ninoa. Ininiā ikatimaāpotakasaaki, Xesosi apokaāpota ninoamoni. Itīpokota ipoa nopini. Inapaāpoaritana imoianariakori. ⁴⁹ Ininiā ninoa atapakasaakiri ipoa nopini itīpokotini, ninoa uākatari kamiri. Ininiā ninoa akiripoakata. ⁵⁰ Ininiā iua misākiretana:

—Kataparaxinire hūtxako. Notakara. Na !hīpīkarauatape —itxana imoianariakori.

⁵¹ Eereka kanauaā iereētaua. Iuasaaki ĩtima iotoka itxa. Ininiā itikokitatana ninoa. Itsorīkaātana:

—Kiripa atxiiti? —itxana.

⁵² Ikara atoko isākirena, kotxi kona ixinikaikarina Xesosi posotiire komiri ixanakasaaki. Paikoxinirena ninoa iuasaaki.

Xesosi Makananitana Amianatakani Xenesareekini

(Mateo 14.34-36)

⁵³ Xesosi imoianariakorikata ĩpiriātari ipoa. Isari Xenesaree tixinimoni.

⁵⁴ Ikanīkītakasaakina apanakini itikari Xesosi.

—Xesosira —itxana.

⁵⁵ Ininiā imitekana kākiti auinimoni amianatakani apinina ikapani. Anikana isirimatana nopini Xesosimoni. ⁵⁶ Ikini sitatxiti kākiti amianatakani sirīka kimapori tiniāpo. Amanaārīna Xesosi auiritinina ninoa imāka itikakinina. Ikinikana imāka tikakakani erekepeka itxīkitaka.

7

*Xoteoakori Ikite Pirena
(Mateo 15.1-9)*

¹ Ininiã pariseoakori, kaiõkatsopareriakori pakini, Xerosareë ikani, apotitaua Xesosikata. ² Iuusaaki itikarina Xesosi moianariakori marokapiotakaniua nipokori inikinina apisa. Ininiã itxana:

—!Erekari imarokapiotakanianuana —itxana.

³ Pariseoakori, imakinikana Xoteoakori apaka kamari ikiomaneakori kitxakapirĩkarini sãkire iaõka. Inipokotinina apisapanika arokapiotauana.

⁴ Nipokori amotikoãtaã Xoteoakori sikasaaki, eereka apokasaakina aapokona imarokapiotakaniãuana kona inipokotana. Tiitxi iãkoanaxi, kopiti, apanakini itina pakini arokasaakina ikiomaneakorini oerekakiti iaõka arokana.

⁵ Ininiã pariseoakori, kaiõkatsopareriakori pakini pimaãri Xesosi:

—Kinirepa pimoianariakori kona kamatariki kitxakapirĩka atoko ininina? Kinirepa marokapiotakanikaua inikarina nipokori? —itxarina.

⁶ Ininiã Xesosi apakapipireta:

—Mĩtxipitipinika Isaia sãpiretai hĩte. Atão iua sãkire, kotxi hĩsãkire atxiĩti erekari, txamari kona hĩkamari hĩsãkire iaõka. Iua txari:

Kamisirienererini ninoa kãkiti. Ninoa sãkireñanira ipaxitanona. Åkixinireẽna !inirekanona.

⁷ Maxikatiĩka ninoa kapotoreẽkaua nota apisatoõ. Maxikatiĩka ninoa txano: “Ateosone pitxaua,” kotxi ninoa !oerekari nota sãkire. Ninoaaka sãkire oerekana, txamari “Teoso sãkire asãpiretai” itxana.

Ikara atoko Isaia iõkatsopatakiti Teoso sãkire.

⁸ —Ininiã hĩtakanapapekari Teoso sãkire, kãkiti oereẽkiti hĩkamini ikapani. ⁹ Hĩtakanapapikari Teoso paniãtakiti, hinirekaãkiti hĩkamini ikapani.

¹⁰ Kitxakapirĩka Moisesi txari:

Pipaxitarĩko piri. Pipaxitaroko pinoro. Piri, pinoro pimisãkirepiretiniã, pokaãkako,

itxa Moisesi sãkire. ¹¹ Txamari hĩte oerekari kãkiti: “Kãkiti auakiti iri, inoro pakini nirekiniã, iua manirekakaniãri isikiniri ninoamoni, isãpiretana: ‘Ia nota auakiti nisika Teosomoni.’ ” Ininiã !isikari ninoa nirekakiti ninoamoni. Ikara atoko inakari kãkiti sikakiti Teosomoni, hĩte takauãkatari “Kopaã.”

¹² Ininiãkara hõerekari kãkiti imatiretakanina iri, inoro pakini. !Apakata hõerekakiti. ¹³ Ikara hõerekakiti xika kona hĩte maãkatari Teoso sãkire. Apiata hinirekari kãkiti oereẽkiti. Auapanika itori hõereẽkiti sãkiretxiti ikara atoko inakari —itxa Xesosi.

*Åkixiniretxi Txiko Pirena
(Mateo 15.10-20)*

¹⁴ Xesosi iuaĩkana akiritana ikinimane kãkiti. Itxana:

—Hĩkinika hĩkenakota. Hĩtakaõtxikariko nisãkire. ¹⁵ Imakinika hinikakiti, mapara auakari. !Ikamari ate maerekani. Hĩxinireẽ potoriãkarira kamari maerekaniitxi. ¹⁶ Kakenakokii, ininiã hĩkenakotariko nisãkire —itxa Xesosi.

¹⁷ Ikinimane kãkiti itakanapaka atoko, aapokotxi åki ãroã. Iuusaaki imoianariakori pimaãri:

—Pisãpiretaua mixikanani pisãpiretakiti —itxana.

¹⁸ Ininiã iua txari:

—! Kĩkĩte hĩte. Kona hĩte imarotatariki hinamaã ãroãkari kona kamari maerekaniitxi. ¹⁹ Kotxi ãroãkari !isari hĩxiniremoni. Hĩtikako åki isa. Iposo atoko hĩtikatakasaaki inapa. Ikara atoko ininiã, erekari ikinipoko kãkiti niãkiti.

20 –Ixinireë potoriäkari iuara kamari kākiti maerekani. 21 Kākiti ākixinire ipotorika ixinikakiti maerekati, anokaretxi, itiriuaatkatxi, okaniuaatkatxi, āti kākiti itanorokata isirīkini nire pakini. 22 Kākiti ākixinireë ipotorika itirenani, maerekati Satanasi oerekakiti, misirieneretxi, pētauatkatxi kamakari, xikotaktxi, āti misākirepiretiko, iuikiniua, mīkiteti inini pakini. 23 Ikinika ikara maerekati kākiti ākixinire auakari txikotari kākiti xinire –itxa Xesosi.

Xoteo Minakatoua Auikiniri Xesosi Sākire
(Mateo 15.21-28)

24 Xenesaree tixini Xesosi potorika. Txiro sitatxiti tōpa, Sitoõ tixini pakimonni isa. Iuaā kākiti aapoko iroā. Kona inirekari kākiti imarotiniri iua auiniātaā. Txamari !iposotari iomaātiniua. Kākiti imaroāpotari iua auiniātaā. 25 Sito apoka Xesosimoni, kotxi oa kenakopiretari Xesosi pirena. Maerekati matamatakoti auaitotaro oimi. Oāpokasaaki Xesosimoni, okapotoreēkaua iua apisatoõ.

26 Oa sito sākiretari Kreko sākire. Āto uāka oa. Siropenisia tixinikero oa. Okapotoreēkasaakia Xesosi apisatoõ, oamanaāri Xesosi:

–Pomitikenatariko maerekati matamatakoti namarite itoā auakari –otxari.

27 Ininiā Xesosi:

–Xoteo !pitxaua. Maparakerorai. Pite nirekakari nisikini Xoteoakori nakiti. Amarini mitxi nikini atāo. !Erekari nokiniri amarini kiena anāpamoni –itxaro oa.

28 Oa apakapapireta:

–Atāopitikara ikara atoko pitxa, kotxi nota maparakerero, anāpa atoko Xoteoakorimoni. Iuaritika kākiti auiritari anāpapiki nikiniri nipokori katxakakari amarini nipokotiniātaā patapi –otxari Xesosi.

29 Ininiā Xesosi apakapapireta:

–Erekari papakapapiretini, ininiā paapokomoni pisa. Maerekati matamatakoti !auaika pamarite itoā –itxaro.

30 Oaāpoko oāpokasaaki, oāpokaro oamarite sirīkanāta. Erekapekaro oa. Maerekati matamatakoti asikapekaro.

Makenakoreti Pirena

31 Eereka Xesosi takanapari Txiro sitatxiti tōpa. Īpirixititari Sitoõ tixini. Sitatxi tōpa tesi pakini Īpirixitita. Apoka Kariréia poamoni. 32 Ātikaka kākiti minari makenakoreti Xesosimoni. !Iposota atāo isākirauatini. Ninoa iteene amanaāri Xesosi:

–Piuako pitaka iua nopini kakenakorepeka inini ikapani –itxana.

33 Xesosi anikari iua kiki kākiti mauakaniātaā. Itakari iuakoki ikīpita āki. Eereka ikiisoka, taka itxari ienemaā masākireti nini nopini. 34 Eereka ionakaāta iaxiti, oōka itxa:

–Epataa –itxa.

Popīkari sākireē, “Piauāka.” 35 Iuasaakipeka ikenakoki auāka, ininiā kak-enakorepeka itxa. Iuasaaki inini poiōpeka apaka. Eereka erekapeka itxa isākirauatini. 36 Ininiā Xesosi txana ninoa:

–Kona hīsāpiretapiri apanakini nimakananitiniri iua.

Txamari apiata ninoa sāpirenauata. 37 Kākiti tsorīkaāta:

–Ikinika ikamakiti peerekari. Makenakoreti kakenakorepeka itxa. Mimatasaākiretakati, kasākirepeka itxa –itxana.

8

*Xesosi Sikakienatana Ipi Ipi Pakini Mio Kākiti
(Mateo 15.32-39)*

¹ Eereka mapaōti itomaneri kākiti apotiitaua Xesosimoni. Nipokori xipokapeka, ininiā Xesosi akiritana imoianariakori. Itxana ninoa:

² —Nota amonīkana naia kākiti, kotxi ipi ōti, āti ōti pakini ōtipeka auana notakata. Ininiā uatxa nipokori ! auaika. ³ Niokanatiāna auinimoni manipokotakatipanikana, ininiā ipixiniāpo iōkapetana. Irikana. Ātikaka ōtako ĩkani kona apakata manipokōtakanika isinina —Xesosi txana imoianariakori.

⁴ Imoianariakori apakapipireta:

—Uai aapokotxi mauakaniātaā, ininiākara nāpa aāpokari nipokori ito naia kākiti asikakienatini ĩkapani? —itxana.

⁵ Ininiā Xesosi:

—Kipakinipa komiri katari hītemoni aua?

—Setxinokara komiri aua atemoni —itxana.

⁶ Ipaniātari kākiti topākini ixti. Imaīkari iua komiri setxi.

—Ērekari pisiākiti —itxari Teoso.

Iposo atoko imaxiōpekari komiri, sika itxana imoianariakori. Imoianariakori sika itxana apanakinimoni. ⁷ Ninoamoni aua ātikaka ximaki axapitiri. Ininiā Xesosi txari:

—Ia erekari —itxa Teosomoni.

Eereka ipaniātana imoianariakori sikiniri kākitimoni. ⁸ Ininiā ikinipoko kamitopeka itxana. Iposo atoko apotiita itxarina itetakori. Xāpokaka itxarina setxi kotarina. ⁹ Ninoa komiri nikakani ipi ipi pakini mio kākiti. Kamitopeka itxana.

Ininiā itakapiretanapana ninoa. ¹⁰ Iposo atoko imoianariakorikata iereētaua kanaua āki. Taomanota tōpamoni isana.

*Pariseoakori Nirekari Xesosi Oerekiniri Iposotiire
(Mateo 12.38-42; 16.1-4; Arókasi 11.29-32)*

¹¹ Pariseoakori apoka Xesosimoni. Inirekarina Xesosi kerokiniri, ininiā itxarina Xesosi:

—Takaōtxikari, Teoso posotiire poerekaua ate, aātamatiniri ĩkapani, Teoso iokanatinii ĩkorapokoriti aimarotini ĩkapani —itxarina. ¹² Ininiā Xesosi oōka. Itxari:

—Kinirepa kākiti uatxarini nirekari noerekiniri Teoso takaōtxikare, iposotiire? Atāopitikara nota txai hīte, kona noerekai hīte.

¹³ Ininiā itakanapana. Iereētaua kanaua āki. Ikanapiriā ipoa ipiniāmoni iuaīkana.

*Pāo Tireēkari Pirena
(Mateo 16.5-12)*

¹⁴ Xesosi moianariakori maxinīkaretari pāo. Ātika pāo porii kanaua āki aua.

¹⁵ Ininiā Xesosi ōtākikana:

—Erepaniko, pamonōkoniri pariseoakori, Erotxi pakini pāote tireēkari —itxa Xesosi.

¹⁶ Xesosi moianariakori misākiretakakaua:

—Īkara atoko itxaua, kotxi amaxinīkaretari pāo.

¹⁷ Xesosi imarotari ninoa sākire, ininiā itxana:

—Kinirepa hīsākirauanāta pāo mauakani xika? Kona himarotatapanikari niposotiire? Kona hīkitetapanikari? Kona hinirekatari hāuikiniri nisākire?

¹⁸ Kokimai, txamari, ! hātamatarī. Kakenakokimai, txamari ! hīkenakotari

nisäkire. ¹⁹ Kona hīxinikapanikari iusaaki nimaxiōpekitekiti sīko komiri, sīko mio kākiti nisikakienatini? Kipakinipa kotari itetakori hīxāpokaka? – ipimaāna.

Ininiā ninoa apakapapireta:

–Tosi kotari axāpokaka.

²⁰ Xesosi txana ninoa:

–Eereka āti ōti nimaxiōpekari setxi komiri porīi. Nisikari ipi ipi pakini mio kākiti. Itetakori hāpotiitakiti, kipakinipa kotari hīxāpokaka? –ipimaāna.

Ininiā ninoa:

–Setxi kotari axāpokaka.

²¹ Ininiā Xesosi:

–Ininiā kinirepa kona hīkitetapanikari?

Mōsiāreti Petsáita Aapokotxitikiri

²² Xesosi Petsáita aapokotxitimoni apoka. Iusaaki kākiti minari mōsiāreti iuamoni. Amanaārina Xesosi maātakiniri iua mōsiāreti. ²³ Ininiā iua anikaāpotari iuakoā kākiti mauakanimoni. Iuaā iminapari ienemaā mōsiāreti okiā. Eereka taka itxari iuako iitoā. Iumaāri iua:

–Kōsiārepekai? –itxari.

²⁴ Ininiā iua atamata.

–Nota itikapokotapeka, txamari nitikari kākiti tūpokotakari aamina atoko –itxa.

²⁵ Iposo atoko Xesosi iuaīkana takari iuako mōsiāreti nopini. Eereka mōsiāreti atāo itikapokotapeka. Ikinipoko atamata. ²⁶ Ininiā Xesosi iokanatarī:

–Pisipeka paapokomoni. Kona pisipe Petsáita aapokotxitimoni, kotxi kona ninirekari pisāpiretiniri nikamakiti kākitimoni –itxa Xesosi.

Petro Auikari Xesosi Teoso Mereēkiti Ininiāua

(Mateo 16.13-20; Arókasi 9.18-20)

²⁷ Eereka Xesosi imoianariakorikata sari kākiti poiāoka auinimoni, Sesaréia-Piripi sitatxiti takote isana. Ipixiniāpo Xesosi pimaāna imoianariakori:

–Kiripa kākiti uākatano nota? –itxa.

²⁸ Ninoa apakapapireta:

–Xoāo kapatxisareri iuākataina. Apanakini “Eríasi inakori” iuākataina. Ininiā apanakini “Teoso sākire sāpiretakari” iuākataina –itxana Xesosi moianariakori.

²⁹ Iuaīkana Xesosi pimaāna:

–Hitepekana, kipa hīte uākatano? –itxana.

Ininiā Petro apakapapiretari:

–Teoso mereēkiti, kākiti iātanātakiti pitxaua –itxari.

³⁰ Ininiā Xesosi txana imoianariakori:

–Teoso mereēkiti nininiua !hīsāpiretapiri apanakini –itxa.

Xesosi Sāpiretari Ipinini

(Mateo 16.21-28; Arókasi 9.22-27)

³¹ Ininiā ia atoko oerekarauata:

–Nota hītari iaxitikirī iteene atatsiirauatako. Kiomātxiakori, sasetotxi auēteakori, kaiōkatsoparerini pakini kona nirekapanino nota. Nokaākako. Eereka ipi āti pakini ōtisaaki iuaīkana nōkitikauako.

³² Ikara isāpireta ikinimane kākitimoni. Ininiā Petro anikari iua maparamoni. Itxari:

—Kona ikara atoko !pitxape. Kona erekari pisākire ikara atoko pinini —itxa Petro.

³³ Ininiā Xesosi kirioka imoianariakorimoni. Iua txitari Petro:

—Pisipiniikaua Satanasi. Pite nireēkiti kākiti nireēkiti atokotxikana. Pite nireēkiti kona Teoso nireēkiti atokoni —itxa Xesosi.

*Xesosi Moianari Atāo Inakari
(Mateo 16.24-28; Arókasi 9.23-27)*

³⁴ Xesosi akiritana kākiti imoianariakori apaka. Itxana ninoa:

—Notakata kinirāo sika pinakasaaki, piteka pinireēkiti kona pixinikape. Notakata kinirāo sika pinakasaaki, nota misiritiko atokokana pimisiritāakako. Ia atoko pinirekiniā, notakata pisapitikako. ³⁵ Pite ātipirika kaminiāri piteka nireēkitinoka, ininiā pinireēkiti xipokapitikako pitekata. Pite nireēkiti xipokiniā, nota sākire pauikini xika, Teoso iokanapirena erekari pisāpiretini xika, pite auapininiika txako Teosokata.

³⁶ Atxiiti papakapari ikinipoko tiitxi, ikini itixiti auakani tii, pinakiti ikapani. Atxiiti iua tiitxi xika kona pikipitari Teoso sākire, ininiā kona pikaikota ātipirika Teosokata. Ikara atoko ininiā, erekari atxiiti ikinipoko tiitxi auini? Konapitini. Apiaerekata Teosokata ātipirika pikaikotini, kotxi tiitxi iki poiāoka, pixinire karone apiata. ³⁷ !Apakata kākiti iikitxitiniri Teoso, iuamoni isini ikapani.

³⁸ Īkorasaaki kākiti !inirekari Teoso. Inirekari maerekatnoka. Īkorasaaki pipētatiniano nota, pipētatiniani nota sākire, ininiākara nota kākiti itari iaxitikirino pētataiko pite, uai nikanapiriākasaaki. Nikanapiriākasaaki, niri iotximere aua notamoni. Nina niri niūriakorikata, erekarinikata.

9

¹ Xesosi txana ninoa:

—Hixinikariko ia nisākire. Apanakini hīte uatxa uai auakanii, hīpinini apisapanika himarotari Teoso auūtetxi ininiāua. Auūtetxi kaposotiireri itxaua —itxa Xesosi.

*Moisesi, Eríasi Pakini
(Mateo 17.1-13; Arókasi 9.28-36)*

² Seisi pakini ōti napaka atoko Xesosi anikana Petro, Txiaiko, Xoāo pakini oxiratarimoni, mitaxiratarimoni. Iuasaaki ninoanani aua iuaā. Iuaā auakasaakina, Xesosi ūto ipinipo itxa. ³ Imāka kasarori itxaua. Iotximere apaka auari. Ikara imāka saro atoko inakari, !auari. Kākiti iteene arokiniāri mākatxi, iuaritika ikara isaro atoko !auari. ⁴ Iuasaaki Eríasi, Moisesi pakini tokiā iuaā. Isākirauatana Xesosikata. ⁵ Ininiā Petro txari Xesosi:

—Koerekareri, erekapitikari uai aūuini. Makamari papiri ipi āti pakini, pite ikapani, Moisesi ikapani, Eríasi ikapani —itxa.

⁶ Ikara atoko itxa Petro, kotxi !imarotaikari isākire, iteene ipikarauatiniā.

⁷ Iuasaaki katxiāri apoka ninoamoni. Katxiāri āki auana. Katxiāri āki Teoso txari:

—Ere namarite, nitiretakiti. Hikenakotariko iua sākire —itxa.

⁸ Katimaritika Xesosi moianariakori sapotorika. Itikapokotana. Mitxi Xesosikata sākirauatakani !auaika iuaā. Xesosinokara kaikota ninoakata.

⁹ Ōtanoxirataro iokiriāpotakasaakina, Xesosi txana:

—Mixikanani hītikakiti !hīsāpiretapiri apanakini. Nota hītari iaxitikiri nipinaka atoko iuaākana nōkitikaākaua atokoikaraka, hīsāpiretariko mixikanani hītikakiti —itxana.

¹⁰ Ininiā lisāpiretarina apanakinimoni. Ninoanoka isākirauanātana:

—Natokopa itxa kākiti ipikaripeka iuaākana ōkitikiniāua —itxanātana.

¹¹ Ipimaärina Xesosi:

—Kinirepa kaiökatsoparerini säkire: “Teoso mereëkiti apokini apisapanikarako Eriasi apokako.” Kinirepa ikara atoko itxana?

¹² Ininiã Xesosi:

—Inipitikara Eriasi apoka merepanika, kãkiti iposope inini ikapani. Teoso säkire iökatsopatakori txari: “Kãkiti itari iaxitikiri iteene atatsiirauatako. ! Inirekaãkako.” Kinirepa ikara atoko itxa Teoso säkire iökatsopatakori?

¹³ Nisãpiretaiko Eriasi apokapeka. Kãkiti misiritapekari iuani. Inireëka iaõka imisiritarina. Teoso säkire iökatsopatakori säpiretapekari ikara ene —itxa Xesosi.

*Amarini Maerekati Matamatakoti Auaïtotakiti
(Mateo 17.14-21; Arókasi 9.37-43a)*

¹⁴ Ninoa apokaãpotakasaaki apanakini imoianariakorimoni, atamatana kãkitipokoni. Ninoa ákitana Xesosi moianariakori. Iuasaaki kaiökatsoparerini kãkitikata itaparakienetakakaua. ¹⁵ Iuasaaki kãkiti atapari Xesosi. Ipoxononiritikana itxana:

—Xesosi napani.

Ininiã imitekana iuamoni, okapireta itxarina:

—Piteni?

¹⁶ Ininiã Xesosi:

—Ari, notara.

Ipimaãna:

—Kininiãpa hïtxitakakaua? —itxa.

¹⁷ Ininiã kiki kãkiti sauaki auakari apakapapiretari:

—Nota minamari namarite pitemoni. Maerekati matamatakoti auaïtotari iua. ! Auiritari namarite säkirauatini. ¹⁸ Iua maïkasaakiri, okaïtotari iua xiti. Iuasaaki namarite sorikipeta. Akatsakatsiriüttau. Itorõkaïtota. Ininiã nimisãkiretamana pimoianariakori omitikiniri maerekati matamatakoti, txamari ninoa liposotari.

¹⁹ Xesosi txari:

—!Kauikarei hïte. Maerekati kamakanii hïte. Kipakinikananipa Teoso nirekatari hïtekata nauini? Kipakinikananipa Teoso nirekatari hïte nimïteenekini? Himinari amarini notamoni —itxana.

²⁰ Ininiã ninoa anikari iua amarini Xesosimoni. Iuasaakipeka maerekati matamatakoti atamatarari Xesosi. Iuasaakipeka maerekati matamatakoti txïkitakari amarini okaratiniua. Ininiã iua amarini iriãkata. Ikanapirikata, isorikipekata, itxïkitakari amarini. ²¹ Xesosi pimaãri iri:

—Krisaakipa ipotorika ikora atoko inini?

—Axapitipanikara ipotorika ikora atoko inini. ²² Itokata maerekati matamatakoti okaïtotari xaminamoni. Itokata okaïtotari kãuaãrimoni. Inirekari okiniri iua. Piposotiniãri, pomitikariko maerekati matamatakoti. Piamonikauako atepaniko —itxa iri säkire.

²³ Ininiã Xesosi:

—Nota posotatari? Teoso säkire auiaãkari posotari ikaminiri ikinika —itxari.

²⁴ Iuasaaki iua kiki apakapapiretari iaïtsaritika:

—Nauikapitakari piposotiire. Axapitikinoka !nauikari, ininiã pisikaposotiiretano iteene pisãkire nauikini ikapani.

²⁵ Isãkirauanãtakasaakina, kãkitipokoni miteëkata ninoamoni Xesosi kamakiti imarotinina ikapani. Ininiã Xesosi itapararitika txitari maerekati matamatakoti:

—Pite maerekati matamatakoti. Pitxïkitakari kãkiti masãkireti inini. Pitxïkitakari kãkiti makenakokiti inini. Nota omitikai pite. Pipokïka. Iuaïkana !piïroãpinikako iua ïtoã —itxa Xesosi.

²⁶ Iua maerekati matamatakoti akiripoakata. Okaraĩtokatari atoko, sipe itxa. Iua amarini ipĩkari ĩto atokopeka itxa. Ininiã apanakini kãkiti:

–Ipĩpeka –itxarina.

²⁷ Ininiã Xesosi maĩkauakatari. Ōkitikari iua, ininiã itima.

²⁸ Xesosi aapokotxi ãki auakasaaki, iuanoka inakasaaki, imoianariakori pimaãri:

–Natokopa ininiãpa kona ate posotatari maerekati matamatakoti aomikitini? –itxana iuamoni.

²⁹ Ininiã Xesosi:

–Teoso pimisãkiretakasaaki, iusaaki pimanipokotakaniãra, iusaaki pipo sotari ikara atoko inakari maerekati matamatakoti pomitikini –itxa Xesosi.

Xesosi Iuaĩkana Sãpiretari Ipinini

(Mateo 17.22-23; Arókasi 9.43b-45)

³⁰ Iuaã ipotorikana. Īpirixititarina Kariréia tõpa. Xesosi linirekari apanakini kenakenetiniri iua auiniãtaã. ³¹ Kotxi inirekari oerekinina imoianariakori noka ipinini pirena. Ininiã Xesosi:

–Nota hĩtari iaxitikiri mĩkapiritaãkako. Nisikaãkako kikiakorimoni inirekaãkitina ikaminina tĩkane. Ninoa okano nota. Ipi õti ãti õti inakasaaki iuaĩkana nõkitikauako –itxa.

³² Ninoa limarotari Xesosi sãkire. Ninoa pĩkari ipimainirina iua.

Kiripa Kãkiti Apiatakari Txataua?

(Mateo 18.1-5; Arókasi 9.46-48)

³³ Kapanaoõ sitatxiti apokana. Aapokotxi ãki auakasaakina, Xesosi pimaãna ninoa:

–Natokopa itxa hĩsãkire, uaimoni aĩkasaaki hĩtaparakienatakakasaakia? –itxa.

³⁴ Masãkirenika itxana, kotxi kimaporiãpo ninoa sãkire: “Īkiripa ate apiatakari?” itxana. ³⁵ Xesosi, iitopãka atoko, akirita itxana imoianariakori tosi pakini.

–Hĩkinika uaimoni hiĩtopãka. Apiatakari pininiãua pinirekiniã, piteka poiãotakaua. Ikinimane nitiri pitxauako.

³⁶ Xesosi kosekari amarini, mina itxari imoianariakori sauaki, katarata itxari.

³⁷ –Papakapiniãri amarini pipoxokoniritika, papakapano nota apaka. Papakapiniãno nota, na notananini papakapa. Iusaaki papakapari iua uaimoni niokanatakiri –itxa Xesosi.

Maerekani Matamatakoni Omitiãkari

(Arókasi 9.49-50)

³⁸ Xoão sãpiretari Xesosi:

–Koerekareri, ate kenakotari kiki omitikinina maerekani matamatakoni pite uãkaã. Kona pimoianarini iua. Ininiã ate: “Ikara atoko !pitxape,” atxari.

³⁹ Ininiã Xesosi:

–!Hĩotokakapiri ikara ikamini. Kãkiti nota uãkaã maerekati matamatakoti omitiãkari, kona imisãkirepiretano. ⁴⁰ Iua ate mokaiakari minakatua. Atiretakiri itxaua. ⁴¹ Nota atãopitikara nitxai hĩte. Atxĩiti kãkiti sikai ãparaã, kotxi Teoso mereẽkiti nakiti pitxaua. Iua kamakiti erekari, ininiã apakapapitkariko ikamakiti ĩki.

Maerekati Oerekakari

(Mateo 18.6-9; Arókasi 17.1-2)

⁴² !Erekari kākiti mitari oerekiniāri amarini nota sākire auiaākari maerekati ikamini. !Erekari. Erekamariko kai mitari iaxirikaākamakako iua kākiti mitari nokiā, eereka okaākamakako ipoamoni ipinini ikapani. ⁴³ Piuako maerekati ikamākitakiniāi, pitsotakari. Erekamariko ātinani piuako Teosokata ātipirika pauini ikapani, kotxi maerekati pikaminiā, pisa maerekani misiritikoātaā. Iuaā xamina tirinapika. !Oakaāka. Atxiīti piuako ipi aua, txamari pite sari iuaātaā. !Erekari. ⁴⁴ Iuaā kītxi piītoā auakaro !opina. Xamina !oakaāka. ⁴⁵ Pikiti maerekati ikamākitakiniāi, pitsotakari. Erekamariko ātinani pikiti Teosokata ātipirika pauini ikapani, kotxi maerekati pikaminiā, pisa maerekani misiritikoātaā. Iuaā xamina tirinapika. !Oakaāka. Atxiīti pikiti ipi aua, txamari pite sari iuaā. !Erekari. ⁴⁶ Iuaā kītxi piītoā auakaro !opina. Xamina !oakaāka. ⁴⁷ Poki maerekati ikamākitakiniāi, pimakatxakari. Erekamariko ātinoka poki auini Teoso auētētxi ininiātaūa pisini ikapani, kotxi maerekati pikaminiā pisa maerekani misiritikoātaā. Iuaā xamina tirinapika. !Oakaāka. Atxiīti poki ipi aua, txamari pite sari iuaā. !Erekari. ⁴⁸ Iuaā kītxi piītoā auakaro !opina. Xamina !oakaāka.

⁴⁹ Iōkira nīpokorimoni takiko atokokana xamina tirinakari takaākako ikinimane kākitimoni. Ikara atokokana ikinimane ataerekataākako. ⁵⁰ Iōkira erekaro. Txamari iōkira koketikosaaki kipatxikata, !erekaikaro. !Apakata xinitxi piōkiratini ikapani. Atāo iōkira atoko hītako. !Hītxitakakapeua.

10

Kiki Ītanorokata Itakanapakakini

(Mateo 5.31-32; 19.1-12; Arókasi 16.18)

¹ Xesosi potorika iuaā. Xotéia tōpa isa. Īpiriākitari Xotāo kāuāāriti. Iuaīkana kākiti apotiūtaua iuamoni. Kaiāopokori kākiti, ininiā oerekarauata, mitxi oerekarauanātini atokokana.

² Kikiakori, pariseo inakaniua, apoka Xesosimoni. Ninoa nirekari Xesosi kerokiniri isākire, ininiā ipimaārina:

—Atāokani erekari kiki takanapiniro Ītanoro?

³ Ininiā Xesosi:

—Kiatokopa itxa Moisesi paniātakiti?

⁴ Ininiā ninoa:

—Moisesi paniātari kiki iōkatsopatini aātsopa, Ītanoro itakanapini aātsopate, ininiā eereka auiritari iua iokanatiniro oa —itxana.

⁵ Ininiā Xesosi:

—Moisesi auiritai hītanoro hītakanapini, kotxi paikori hīxinare. Teoso nirekiti himanirekakani xikara, Moisesi auiritai hītanoro hītakanapini.

⁶ Kotxi merepitiapanika Teoso ikinipoko ikamakasaaki, ikamari kiki, sito pakini. ⁷ Ikara atoko ininiāpitikara, kiki takanapari iri, inoro pakini, Ītanorokata auini ikapani. ⁸ Ininiā ātika atoko itxauana. Ininiā ipi kākiti !itxaikauana. Ātinokara itxapekauana. ⁹ Ikara atoko ininiā, !erekari kākiti kaiarikiniri Teoso apotiitakini —itxa Xesosi.

¹⁰ Eereka Xesosi imoianariakorikata kanapiriā aapokomonina. Iuaā apokasaakina, imoianariakori pimaāri iua ikara sākiretixi iuaīkana oerekiniā ikapani. ¹¹ Ininiā isāpiretana:

—Kiki Ītanoro takanapakari, āto sito itaka inakari, maerekati ikaminaro Ītanoro. ¹² Iua atokokana sito ōtaniri takanapakaro, āti ōtanirita inakaro maerekati okaminiri ōtaniri —itxa Xesosi.

Xesosimoni Amarini Apokini

(Mateo 19.13-15; Arókasi 18.15-17)

¹³ Iposo atoko ätikaka kâkiti anikari amarini Xesosimoni. Inirekarina Xesosi misâkiretiniri Teoso ninoa amarini îkapani. Txamari imoianariakori txitana. !Aurirana amarini anikinina Xesosimoni. ¹⁴ Xesosi ikara ikenakotakasaaki, lapokaerekatari. Ininiâ iua:

—Hâuiritariko amarini notamoni apokini. !Hîotokakapiri, kotxi kâkiti Teoso auîtetakani amarini atoko itxauana. ¹⁵ Ia atâo: Kâkiti mapakapakaniâri Teoso, amarini apakapiniri atoko iminakanîâ, kona isa Teoso auîtetxi ininiâtaâua — itxa Xesosi.

¹⁶ Ininiâ Xesosi kataratari amarini. Itakari iuako ikiina nopini. Amanaâri Teoso erekari itakini amarinimoni.

Ātokori Ito Txineiroteri

(Mateo 19.16-30; Arôkasi 18.18-30)

¹⁷ Xesosi iuaîkana potorika. Iuasaaki âtokori miteka iuamoni. Ikaporeêkâua Xesosi apisatoô.

—Koerekareri erekari, kiripa nikama Teosokata âtipirika nauini îkapani? — itxa.

¹⁸ Ininiâ Xesosi:

—Kininiâpa “erekari” pitxano? Teosonanira erekari. ¹⁹ Pite imarotari Teoso paniâtakiti. !Pokaniuatape. !Pisîrîkape âti îtanorokata. !Pîitiriuatape. Poxiene ! pikamape. Apanakini ! pimisîrienetape. Piri, pinoro pakini pipaxitako — itxa Xesosi.

²⁰ Iua âtokori txari:

—Noereêkiri, axapitipanikara ninakasaaki, nikîpitari ikara Teoso paniâtakiti — itxari.

²¹ Ininiâ Xesosi apokaerekatari iua.

—Auapanika âtinoka pikamini tîkane. Pisa. Tiitxi ikinika pinakiti pivêtxitako. Txineiro papakapakito pisikako matxineirotenimoni. Eereka pimoianatanoko nota. Ikarâ atoko inakari pikaminiâ, Teoso tixine papokasaaki ikinipoko erekari auiniiko pite — itxari iua.

²² Ikara Xesosi sâkire ikenakotakasaaki, imatinanuata. Isipe. Maerekax-iniretinoka itxa, kotxi kaiâori itii.

²³ Xesosi sapotorika, misâkireta itxana imoianariakori:

—Pamimapaniri katxineiroteri sini Teoso auîtetxi ininiâtaâua — itxa.

²⁴ Imoianariakori:

—Anekani? — itxana.

Iuaîkana Xesosi txari:

—Pamimapaniri katxineiroteri sini Teoso auîtetxi ininiâtaâua. ²⁵ Atauako kamero napatari âkorike sonakiâ? Apia mimari kâkiti katxineiroterini auîtetiniri Teoso — itxana.

²⁶ Imoianariakori iteene tsorîkaânâta.

—Ininiâ kipa sari Teoso auîtetxi ininiâtaâua? — itxana imoianariakori.

²⁷ Ininiâ Xesosi apakapapiretana:

—Teoso posotari ikinipoko ikamini. Kâkiti ! iposotari. Teoso posotari anikiniri katxineiroteri itixinemoni — itxa.

²⁸ Petro txari:

—Ate takanapapekari ikinipoko pite amoianatini îkapani — itxari Xesosi.

²⁹ Ininiâ Xesosi:

—Atâo nitxai. Paapoko pitakanapiniâ, pitariakori, pitaroakoro, piri, pinoro, pîtanoro, pamariteni, pikikiote, pitakanapiniâ notakata pisini îkapani, Teoso iokanapirena erekari pisâpiretini îkapani, ³⁰ pitakanapakiti iua apiata nisikaiko. Îkorasaaki nisikaiko itomaneri aapokotxi, itomaneri pitariakori,

itomanero pitaroakoro, itomanero pinoroakoro, itomaneri pamariteni, itomaneri pikikiote, nisikaiko. Txamari uusaaki patatsitari pimisiritiko. Iuaritika eereka Teosokata pauapika ätipirika. ³¹ Uatxa apiari inakari, uusaakiko minakati itxauako. Uatxa minakati inakari, uusaakiko apiari itxauako – itxa Xesosi säkire.

Iuaïkana Xesosi Säpiretari Ipinini
(Mateo 20.17-19; Arókasi 18.31-34)

³² Xesosi imoianariakorikata Xerosareë kimaporite iäpotakasaakina, Xesosi iikiika. Iuusaaki ninoa maerekaxiniretinoka itxana. Apanakini ninoa tikini sikani pïkarauata. Ininiä Xesosi iotoka. Akiritana imoianariakori tosi pakini. Isäpiretana päitiki käkiti kamakiti uamoni tïkane. ³³ Ininiä iua:

–Hïkenakota. Xerosareëmoni asa uatxa. Iuaä nota hïtari iaxitiki sikaäkako sasetotxi auïteakorimoni, kaiökatsopareriakorimoni pakini. Ninoa paniätariko nota okiko. Iposo atoko Xoteo minakonimoni sika ninaäkako.

³⁴ Inapetanonako. Inoropatanonako aäpitsaä. Ikiisokanonako. Iposo atoko oka ninaäkako. Ipi äti pakini öti inakasaaki iuaïkana nökitikauako –itxa imoianariakorimoni.

Txiako Xoão Pakini Amanaäkiti
(Mateo 20.20-28)

³⁵ Iposo atoko Txiako, Xoão pakini sari Xesosimoni. Ninoa Sepeteo anaakori.

–Koerekareri, ate nirekari aamanaäkiti pikamini –itxana.

³⁶ Ininiä Xesosi pimaäna:

–Kipa hinireka nikaminii hïte? –itxana.

³⁷ –Pite ikinimane auïte pinakasaakiua, pauiritaua pitekata aïtopäkini, pikikomoni, pisaneremoni aïtopäkini –itxana.

³⁸ Ininiä Xesosi:

–!Himarotari hamanaäkiti, kotxi mapaöti napa atoko nota apakapariko iätatxi tsïtxiä niätini ikapani. Hïposotari ikara hiätini? Nipatxisataäkako tsïtxiä. Hïposotari ikara atoko hïpatxisatiko?

³⁹ –Aposotapitika –itxana ninoa.

Xesosi txana ninoa:

–Inipitikara hiätariko nota iätakiti. Inipitikara hïpatxisataäkako nota patxisatiko atokokana. ⁴⁰ Txamari !niposotari nauiritinii hïte nikikomoni, nisanaremoni hiïtopäkini, kotxi Teoso mereëpekana käkiti nikikomoni, nisanaremoni topäkakani tïkane –itxa Xesosi.

⁴¹ Xesosi moianariakori tesi pakini kenakopiretakasaakiri Txiako, Xoão pakini amanaäkiti, ininiä ninoa omanatana. ⁴² Ininiä Xesosi akirita txana imoianariakori:

–Uaimoni hina. Hiïtopäka notakata –itxana ninoa.

–Hïte imarotari Xoteo minakaniua auïteakori pataparana. Ninoa auiritari käkiti kaminiri ninoa paniätakitinoka. ⁴³ Ninoa atoko ! hïtxape. Apiari pininiua pinirekiniä, pimoianatana apanakini. ⁴⁴ Apanakini auïte pininiä pinirekiniä, nitiritxi pitxauako merepanika. ⁴⁵ Ikara atoko nitxa nota hïtari iaxitiki iïkorapokoriti napokasaaki. Ninitiri !uari. Iïkorapokoriti napoka, käkiti nitiri nininiua ikapani, käkiti nitiretini ikapani. Iïkorapokoriti napoka nipinini ikapani, kaiäopokori käkiti mapinakani ikapani, kotxi nota iïkitxirauata ninoa mapinakani ikapani –itxa Xesosi.

Mösiäreti Patximeo Inakori
(Mateo 20.29-34; Arókasi 18.35-43)

⁴⁶ Xesosi imoianariakorikata apoka Xerikoo sitatxiti. Eereka iporikasaaki imoianariakorikata itomaneri kăkitikata, iusaaki mōsiāreti Patximeo inakori kimapori itiniāpo iitopăkanāta. Tximeo inakori ākiri iua. Iua mōsiāreti amanaānataro txineiro. ⁴⁷ Iua kenakotari Xesosi Nasareekiri inapaenetini, ininiā akirināta:

–Xesosi, Taviini apika mekanirii, piamonīkanoko –itxa.

⁴⁸ Ininiā apanakini kăkiti pinitari:

–Maātako. !Pakirinātape –itxarina mōsiāreti.

Iuaritika apiata akirinānikata:

–Taviini apika mekani. Piamonīkanoko nota –itxanāta.

⁴⁹ Ininiā Xesosi iotoka itxa.

–Hăkiritari iua mōsiāreti –itxa.

Ininiā ninoa:

–Pipoxokoniuatoko. Pōkitikaua. Akiritapekai –itxarina iua mōsiāreti.

⁵⁰ Ininiā Patximeo okanapari imăka inopini auakari. Pakoteri ōkitikaua, sa itxa Xesosi akiritiniri manapi.

⁵¹ Ininiā Xesosi:

–Kipa pinireka nota kaminii pite? –itxari.

–Apiananiri, nōsiārera ninireka –itxari.

⁵² Ininiā Xesosi:

–Pisa. Erekapekai, kotxi pite aukari niposotiire –itxari.

Iusaakipeka Patximeo kōsiārepeka itxa. Xesosikata sa itxa kimaporiā.

11

Xesosi Xerosareē Apokaāpotini

(Mateo 21.1-11; Arókasi 19.28-40; Xoão 12.12-19)

¹ Xesosi imoianariakorikata imatokoāpotari Xerosareē. Ōtanoxiratarari, oriva mina takikoātaā takote apokana. Iuaā aua aapokotxi Petxipaxee inakori, Petánia inakori apaka. Iuaā Xesosi iokanatanana ipi imoianariakori.

² –Hīsa ikiraā kaixiti auakari aapokotxiā. Iuaā hăpokasaaki, hăpokari xomēta ākiri iaxiriākori. Kăkiti ! iitopăkapanika iua nopini. Hīkoxirikari. Uaimoni mina hītxari. ³ Kăkiti pimaākasaakii hīte: “Kinirepa hīkoxirikatari xomēta ākiri?” hinikosaakiko: “Apiananiri nirekari iua. Iuaīkana akamoni aminariko,” hītxako.

⁴ Ininiā eereka isana. Apokarina iua xomēta ākiri iaxiriākori kimaporiā aapokotxi tore takote. Ininiā ikoxirikarina. ⁵ Ātikaka kăkiti iuaā auakani:

–Kinirepa hīkoxirikatari xomēta ākiri? –itxana Xesosi moianariakorimoni.

⁶ Ininiā Xesosi paniātini iaōka apakapapiretana. Ininiā kăkiti iuaā auakani:

–Ininiā hanikaikari –itxana.

⁷ Ninoa anikari xomēta ākiri Xesosimoni. Ininiā imăkana āti imăkana nopini auakari itakarina xomēta ākiri nopini Xesosi topăkini ikapani. ⁸ Apanakini kăkiti matameēkari imăkana āti imăkana nopini auakari kimaporiā Xesosi napini tīkane. Apanakinipekana sauakari aāxike. Kimaporiā itakaāpotarina. ⁹ Ninoa Xesosi tikini ikani, iua apisa sikani pakini akiriāpokatana ipoxokonir-itkana imakinikana:

–Peerekari Teoso, Apiananiri. Iua iokanatai pite atemoni. Anirekari erekari isikinii pite. ¹⁰ Peerekari Teoso, aātokirini Tavii aūite ininiua atokokana iuaīkana apoka. Peerekari Teoso, iaxiti apiko nopinixiti auakari. Apiananiri itxaua –itxaāpokatana.

¹¹ Xesosi apoka Xerosareē. Teoso misăkiretiko aikotimoni isa. Iuaā iroā itxa. Ikinika iroko āki itikapokota. Iua atoko mapiāpe, ininiā isari Petánia aapokotxitimoni tosi imoianariakorikata.

Piko Mina Marito Pirena

(Mateo 21.18-19)

¹² Ikati matakasaaki ipotorikana Petánia. Iuasaaki Xesosi natxita. ¹³ Ikira atoko atamataro piko mina. Ito otsopa aua. Isari oamoni kariro iuákatiniáro, kotxi piko mina tsopa auakasaaki, ori auapitika. Txamari apokasaaki, otsopanani auari, kotxi kona ori manapini. ¹⁴ Ininiá Xesosi:

—Kákiti !itximaikaiko piri —itxari piko mina.

Imoianariakori kenakotari isákire.

Pirátxi Vēxitakani Omitikiko

(Mateo 21.12-17, 20-22; Arókasi 19.45-48; Xoño 2.13-22)

¹⁵ Xesosi imoianariakorikata apoka Xerosareē. Xesosi iroá Teoso misákiretiko aikotiá. Omitikana kákiti iuaátaá amotiitakani, sikatiitakani. Ikapakitikari amesa ninóa txineiro apakapakani amesane. Ikapakitikari kamao vēxitakani topákini apaka. ¹⁶ Iua !auiritana kákiti anikiniri tiitxi aiko ipirikoatinina. ¹⁷ Xesosi oerekana kákiti iuaá auakani:

—Teoso sákire iókatsopatakori txari:

Ia naapoko. “Teoso misákiretiko aikoti” akiritaákako, ikini itixiti auakani misákiretinino ikapani, itxa. Txamari híte txíkitakari ia aiko kütiririni iomaátiniátaá ininiua —itxa Xesosi.

¹⁸ Sasetotxi auíteakori, kaiókatsoparerini pakini kenakotari Xesosi sákire. Ininiá ninóa tsoríkaáta. Ixinikaxititana.

—Kanatokopa atxatari Xesosi aókini? —itxanátana.

Ikinimane iteene apokaerekatari Xesosi sákire, ininiákara sasetotxi auíteakori, kaiókatsoparerini pakini píkari Xesosi.

¹⁹ Ipiákapokotapeka Xesosi takanapari sitatxi imoianariakorikata.

²⁰ Katimatiníkata kimaporíá isaápotakasaakina, atamatarona oa piko mina. Opípe. Okotsapekara ipinakepeta apaka. ²¹ Petro xinikari iua apisapanika Xesosi sákire, ininiá akiritari Xesosi:

—Koerekareri, patamataro piko mina. “Kákiti litximaikaiko piri,” pinakito. Oa piko mina ipípeka —itxari.

²² Ininiá Xesosi:

—Pauikapiretariko Teoso sákire. ²³ Atáoenekara nisápiretai. Pauikiniári Teoso sákire, piposotari pipaniátiniri ikira ótanoxiratarí: “Pókitikaua. Pokakataua potxoari uinitimoni.” Pákixinireē iteene pauikiniári pisákire iaóka apokini, ininiá apokapitikako pamanaákiti. ²⁴ Ikara atoko ininiá nota txai híte, Teoso pimisákiretakasaaki, pamanaákasaakiri pinirekakiti, pauikariko iposope Teoso sikinií, ininiá papakapanarikariko. ²⁵ Teoso pimisákiretakasaaki, áti pomanatiniá, pitakanapariko pomanákare. Pimaxiníkaretiniári maerekati ikaminií, ininiá piri iaxitikiri maxiníkaretari maerekati pite kamakiti. ²⁶ Pimamaxiníkaretakaniári maerekati áti kamakiti pitemoni, ininiá piri iaxitikiri kona maxiníkaretari maerekati pite kamakiti apaka.

Xesosi Paniátakari Moerekakoni

(Mateo 21.23-27; Arókasi 20.1-8)

²⁷ Iuaíkana apokana Xerosareē. Xesosi tīpokota aiko Teoso misákiretiko pirikere áki tiníkata. Itīpokonátakasaaki, sasetotxi auíteakori, kaiókatsoparerini, kiomátxiakori pakini apoka iuamoni. ²⁸ Ininiá ninóa txari:

—Kipaniápa pikamari íkora pikamakiti? Kipa paniátari? —itxarina Xesosi.

²⁹ Ininiá Xesosi apakapapiretana:

—Nota apaka pimarauatako hitemoni. Átinoka nipimaáiko híte. Hīsápiretiniáno, nota sápiretai híte niokanatakiri uáka apaka. ³⁰ Kipa paniátari

Xoõoni ipatxisarauatini? Teosokani paniātari Xoõo? Kākitikani paniātari Xoõo? Hisāpiretano –itxana.

³¹ Ininiā ninoa xinikaxitināta. Imisākiretakakana. Ipimaākakana:

–Natokopa itxa aāpakapapiretiniri iua? Aāpakapapiretiniāri: “Teoso paniātari iua,” ininiā iua: “Kinirepa kona hāuikatari iuani sākire?” itxapemaua.

³² Aāpakapapiretiniāri: “Kākiti paniātari iua,” ikinimane omanataua – itxanātana.

Ninoa pīkari kākiti kotxi ikinimane auikari Xoõoni atāo Teoso sākire sāpiretakari ininiua. ³³ Ikara atoko ininiā ninoa apakapapiretari Xesosi:

–Ate !imarotari.

Ininiā Xesosi:

–Ikara atoko ininiā, nota !nisāpiretai hīte nipaniātakiri uāka.

12

Parīkauatakani Maerekani

(Mateo 21.33-46; Arókasi 20.9-19)

¹ Eereka Xesosi sāpiretana ninoa sāpirenatxi atāo inakari oerekiko. Itxari:

–Kiki takarauata. Txipokori ova inakoronoka itaka. Ipiriketari. Ikamari ova maōkiko. Iposo atoko itakare apanīkakixitika ikamari aapokotxi axapitiri ōtanori ikikiotē imakinetini ikapani. Iposo atoko ipaniātana ātikaka kikiākori itakare inīkatinina ikapani, kotxi iua sariko ōtakoxiti. Ninoa apakapamaroko ipixini ova iparīkana iki. Iposo atoko katakareri sipe. ² Ova manapi, iua katakareri iokanatarini inītiri ninoa kikiakorimoni ova ipixini apakapini ikapani. ³ Txamari iua apokasaaki ninoa maīkari iua. Ixirokītatarina. “Pisipeka,” itxarina. Miketika ikanapiripe.

⁴ –Iuaīkana katakareri iokanatarini āti inītiri ninoamonikana. Txamari ninoa kikiākori misiritari iua. Kai soroā ikiporonakarina, karota itxapirina ikiā. ⁵ Iuaīkana katakareri iokanatarini āti ninoamonikana, txamari ninoa okapiri iuani. Kaiāopokori inītiriakori iokanata ninoamoni. Apanakini inoropatana. Apanakini okana. Itxaāpotana.

⁶ –Iua katakareri auapanika ātinoka iokanatinini ikapani, imi iteene itiretakiti. Imapotōkire iokanatarini imi ninoamonikana. “Notamoni ninoa paxitariko namarite” itxa. Ininiā imi apoka ninoamoni. ⁷ “Katakareri ākiri napani. Maōkari. Aōkiniāri, itakare imakinika kaikotināua ate,” itxakakana kikiākori.

⁸ –Ininiā ninoa maīkari katakareri ākiri, oka itxapirina, kikiā xiripire oka itxarina iito.

⁹ –Ininiā kiripa ikama katakareri? –itxa Xesosi.

–Iua kanapiriā. Okanako ninoa kikiākori. Ipaniātana apanakini itakare imakinetinina ikapani –itxa Xesosi.

¹⁰ Hīte atatsopatapekari ia Teoso sākire iōkatsopatakori:

Aapokotxi kamakani kona nirekari ātika kai soro. Iua kai imanirekakiniti kai apiari itxapekaua. Apanakini kai soro maīkakari itxaua.

¹¹ Teosokara txīkitakari ikara atoko inini. Ikara peerekari atemoni, itxa Teoso sākire iōkatsopatakori.

¹² Xoteo auīteakori imarotarina Xesosi sākire. Ninoa imarotari ikamakitina takari makinetakani kamakiti atokokana, ininiā ninoa omanākarauata Xesosi sāpiretakiti xika. Ninoa kinirāo maīkaka itxarina Xesosi, txamari ! maīkarina iua, kotxi ipīkarina kākiti. Ininiā itakanaparina Xesosi, sipe itxana.

Homano Auīte Īkitxitiko

(Mateo 22.15-22; Arókasi 20.19-26)

¹³ Eereka Xoteo auīteakori iokanatana ātikaka Erotxi sākire auīākani, ātikaka pariseokori pakini Xesosimoni. Inirekarina Xesosi kerokiniri isākire, kotxi

ninoa nirekari Xesosi kaminiri maerekati imaikinirina İkapani. ¹⁴ Ninoa apokasaaki, imisäkiretarina Xesosi:

—Koerekareri, ate imarotari pite säkire atäonani ininiäua. Poerekari atäonani Teoso nireëkiti käkiti kamini İkapani. !Pipikari käkiti. Käkiti poiäori pimisäkiretini atokokana käkiti apiari pimisäkireta apaka. İkara atoko ininiä, pisäpiretaua. Atäokani txineiro asikini Homanoakori auitemoni, Sesa inakori-moni? ¹⁵ Atäokani asikiniri iuamoni? Apakata amasikakaniri iuamoni? —itxana.

Xesosi imarotari isäkirena. İmarotari ninoa pimarauatini isäkire ikerokini İkapani. !Nirekarina atäo inakari imarotininä. Ininiä Xesosi txana ninoa:

—Kinirepa hätamakaerekatano nota? Himinaro txineirota. Ninirekari natamatiniro —itxa.

¹⁶ Ininiä iminarona.

—Kisanöka ia? Kiuäka aua uai? —itxana.

Ininiä ninoa:

—Sesa sanöka, iuäka pakini —itxana.

¹⁷ Ininiä Xesosi:

—İkara atoko ininiä, hısikariko Sesamoni iua nakiti. Hısikariko Teosomoni iua nakiti —itxana.

Ininiä kasäkirena ninoa, kotxi peerekari Xesosi apakapapiretakiti.

İpikari Ökitikiniua Maukakoni

(Mateo 22.23-33; Arökasi 20.27-40)

¹⁸ Kikiakori satoseo inakoni, !auikari käkiti ipikaripeka iuaikana ökitikiniua iuaikana auäki inini İkapani. Ninoa satoseo apoka Xesosimoni.

¹⁹ —Koerekareri, Moisesini iökatsopatarı ia ipaniätakiti: “Kiki meenetipanika ipininiä, iua itari takaroko tikinitakoro. Iua itari keene ininiä, itakauäkatari amarini iua itarini ipipekarini uäka,” itxa Moisesi. ²⁰ Setxi itaritxiakori aua İkorapokoriti. Apiä kiomanetakari takaro sito. Txamari ipikasaaki meenetopanika itikinitaro. ²¹ Ininiä äti itari takaro oakana. İpikasaaki !keenepanikaro oa. Iua atokokana itxape äti itari. ²² Ininiä imakinikana ninoa takapiimaro oa. İkinikana ninoa meenenipanika ipipena. Eereka oanipekana apaka opipe. ²³ İpikani ökitikasaakiua, kiriiänoropa otxtatauako? Kotxi ikinikana setxi takapekaro oa —itxana.

²⁴ Ininiä Xesosi:

—Hite kerokari, kotxi !himarotari Teoso säkire iökatsopatakori. Teoso posotiire apaka !himarota. ²⁵ İpikani iuaikana ökitikasaakiua, Teoso nitiriakori iaxitikini atoko itxapekauana. !İtanorouataikako. ²⁶ Hite !auikari ipikani ökitikiniua. Hite atatsopatapekari Moisesi iökatsopatakiti aanaia tirinakari pirena. İuasaaki Teoso misäkiretari Moisesi: “Apraäo, İsaki, Xakoo pakini Teosonekarano nota,” itxari Moisesimoni. ²⁷ İkara atoko ininiä Apraäo, İsaki, Xakoo pakini ökitikapekaua iuaikana, kotxi auäki inakani Teosonera iua. Kona ipikani Teosoneni itxaua Teoso. Amananini hıkerokari —itxa Xesosi satoseoakorimoni.

Teoso Paniätakiti Apiari Akamini

(Mateo 22.34-40)

²⁸ İuaätaä aua kaiökatsopareri. İkenakotana ninoa misäkiretakiniua. İkenakotari Xesosi apakapapiretakiti erekari ene. Ininiä iua pimaäri Xesosi:

—İkiripa Teoso paniätakiti apiari txataua? Kipa apiaerekata Teoso nireëkiti akamini?

²⁹ Xesosi apakapapiretari:

–Teoso paniätakiti apiari ia: “Isaeo tōpa auakani, hīkenakota. Ateosone Apiananiri iua. Iuananira Teoso txaua. ³⁰ Pitiretariko Apiananiri piTeosone, ikinipoko pinireēkitiā, ikini pākixinireē, ikinipoko pixinikakitiā, ikini pita-paraxinireē pakini.” ³¹ Ātipekana Teoso paniätakiti apiari ia: “Piteka pitiretiniāua atokotxikana, pitiretariko āti.” Iuananira Teoso paniätakiti ipi apiari txaua –itxa Xesosi.

³² Ininiā iua kaiōkatsopareri apakapapiretari Xesosi:

–Inipitikara pisākire, koerekareri. !Auari āti Teoso. Iuanokara auari.

³³ Ininiā atiretamariko Teoso ikinipoko anireēkitiā, ikinipoko axinikakitiā, ikini ataparaxinireē. Atiretamanako apanakini aītoka atiretini atokokana. Ikara Teoso paniätakiti ipi apiari txaua. Teoso paniätakiti pirātxi aōkini iua ĩkapani poiāori –itxa Xesosimoni.

³⁴ Xesosi kenakotakasaakiri isākire ereka inini, itxari iua:

–Pite auĭtearitari Teoso.

Iposo atoko apanakini ĩkataparaxinireika apikomoni ipimainirina.

Teoso Mereēkiti Tavii Apika Mekaniri (Mateo 22.41-46; Arókasi 20.41-44)

³⁵ Xesosi Teoso misākiretiko aikoti oerekaruanātakasaaki, ipimaāri:

–Kinirepa kaiōkatsoparerini sākire: “Tavii apika mekanirako Teoso mereēkiti txauako?” itxana. ³⁶ Erekari Matamatakoti kamasāpirenatakari Tavii:

Apiananiri misākiretari niauĭte: “Nota kikomoni piitopākinititika nixipokariko pimokaiakariakori. Nikamariko ninoa pikiti pitakiniātaā atoko ininiua,” Apiananiri txari niauĭte, itxa Tavii. ³⁷ Tavii akiritari iua Teoso mereēkiti “Niauĭte.” Ikara atoko ininiā, natokopa itxa iua Tavii apika mekani ininiua? –itxa Xesosi.

Iuaaaki ikinimane kākiti iuaā apitiitakaniua potxitari Xesosi sākire.

Kaiōkatsoparerini Maerekani Pirena (Mateo 23.1-36; Arókasi 20.45-47)

³⁸ Xesosi oerekaruanātakasaaki, otākikana kākiti:

–Kaiōkatsoparerini moianari !hĭtxapeua. Ninoa potxitari mākatxi ereri ieretakinina kākiti apisatoō inapinina ĩkapani, kākiti atamatatinina ĩkapani. Ninoa apokaerekatari imisākiretikona ipaxitikona nipokori sikikoātaā inapaāpotakasaakina. ³⁹ Ninoa potxitari kākiti topākini apiaerekatarkari nopini iitopākiniua aiko Xoteo apotitiniātaāua. Kiiniriā ninoa potxitari kakiiniriteri topākiniimoni iitopākiniua. ⁴⁰ Ninoa mixirikari tikinitakoni aapoko, iuaritika okanani imisākiretarina Teoso kākiti apisatoō, ininiā kākiti uākatari ninoa erekarini atoko ininiāuana. Teoso iteene misiritanako kākiti ikara atoko inakani.

Tikinitakoro Matxineiroto Sikakito (Arókasi 21.1-4)

⁴¹ Xesosi topāka txineiro Teoso ĩkapani apakapikoātaā. Xesosi itikari kākiti ieretakiniro txineiro kaixa āki. Ītori katxineiroterini okaro txineiro mirikinoto kaixa āki. ⁴² Eereka tikinitakoro matxineiroto apoka iuaā. Otakoro ipi txineiro otaki kaixa āki. Poiāonoka txineiro. ⁴³ Ininiā Xesosi akiritana imoianariakori.

–Inipitikara nisāpiretai hĭte. Ōkora tikinitakoro matxineiroto sikakito apiata. Apanakini sikakito poiāoka. ⁴⁴ Kotxi ninoa sikaro txineiro itetakoro. Oa matxineiroto sikari okinika onakito –itxa Xesosi.

13

Teoso Misäkiretiko Aikoti Irikiko
(Mateo 24.1-2; Arókasi 21.5-6)

¹ Teoso misäkiretiko aikoti Xesosi pokíkasaaki, imoianari misäkiretari iua:
—Koerekareri, patamata ia kai aapokotxiti itomaneri. Amaripokori. Ia aikoteoso misäkiretiko peerekari.

² Ininiã Xesosi:

—Hätamatari ia aikote mitari. Äti öti imakinika irikaãkako. Kona kai kaiko-taikako äti kai nopini —itxa Xesosi.

Misirikaretxi Apokaenetini
(Mateo 24.3-14; Arókasi 21.7-19)

³ Xesosi topãka oxiratarini nopini Teoso misäkiretiko aikoti apisatoö. Iuaã aua oriva minanape. Iuasaaki Petro, Txiako, Xoöo, Ätree pakini apoka iuamoni. Ninoanoka aua iuaã. ⁴ Ipimaãrina Xesosi:

—Kirisaakipa aikoteoso misäkiretiko irikaãka? Natokopa itxa aimarotini ikara öti apisapanika?

⁵ Ininiã Xesosi:

—Erepaniko. ! Häuiritapiri apanakini misirienetini hite. ⁶ Itopaniriko kãkiti, “Xesosikarano,” inakanipaniko. Ninoa misirienetari kaiãopokori kãkiti. ⁷ Neenamatzhi hikenakoenetakasaaki, neenamatzhi ene hikenakoenetakasaaki, ! hïpïkaruatape. Ikara auapitikako, iuaritika kona xipokatxhi ötipanikani. ⁸ Äti uãka neenamauata äti uãkakata. Äti tixini auakani neenamauatako äti tixini auakanikata. Ätikaka itixi iakeëkatoko. Kaiãopokopaniri natxi. Amarini auini tsi atoko itxapaniko.

⁹ —Erepaniko hite. Himaãkaãkako, auëttximoni hïsiãkako. Hinoropataãkako aãpitsaã aikote äki Xoteo apotiitiniãtaãua. Nota säkire häuikini xika hite anikaãkako poiãori auëttximoni. Apiari auëttximoni apaka hanikaãkako. Iuasaaki hite säpiretanako ninoa Teoso iokanapirena erekari. ¹⁰ Itixi xipokini apisapanika Teoso iokanapirena erekari säpiretaãkako ikinimanemoni ikini itixitikinimoni. ¹¹ Kãkiti maïkasaakii hite, anikasaakii hite auëttxiakorimoni, ! hïxinikapiri hïsäkire tïkane hïsäkirauatini apisapanika. Hïsäkirauatakasaaki, iuasaakipeka himarotari hïsäkire. Erekari Matamatakoti txïkitakai iuasaaki hïsäkire himarotini. ¹² Kãkiti sikanapariko atão itariakori auëttximoni okiko tïkane. Iriakoritxhi sikanapanako imiakori auëttximoni okiko tïkane. Eenetxiakori omanatana iriakori, inoroakoro pakini. Eenetxiakori xika ninoa okapeëka. ¹³ Nota säkire häuikini xika, ikinimane omanatai hite, iuaritika himatakanapakaniãri nisãkire häuikini, hanikaãkako Teoso tixinemoni —itxa Xesosi imoianariakorimoni.

Iteene Maerekanitxi Apokini
(Mateo 24.15-28; Arókasi 21.20-24)

¹⁴ Iuaïkana Xesosi säpiretana:

—Hïtikariko Maerekati Apiatakari Teoso misäkiretiko aikote äki. Kitxakapiriãka Teoso säkire säpiretakari Tanieo inakori säpiretapekari ikara pirena. (Ininiã hite ia atatsopanãtakanii, hïkenakotariko Xesosi ötäkikiniua.) Maerekati Apiatakari Teoso misäkiretiko aikote äki hïtikasaaki, hite Xotéia töpa auakanii, himitekapoka mixaxiratarimoni. ¹⁵ Iuasaaki hite haãpoko nopini auakanii, katima hitxako hitatxakini. Haãpoko ! hïiroãpe hïtïi himakatxakini ikapani. ¹⁶ Hite kikiö auakanii, ! hïkanapiriãpe haãpokomoni himãka hãpini ikapani. ¹⁷ Ikarasaaki ! erekapaniri sito kamixiromoni, sito kaxitakakareromoni. ¹⁸ Teoso hamanaã himitekini kamoïsaaki, kotxhi himitekini mitaãsaaki !

erekari. ¹⁹ Iuasaaki atatsiiri auakatapitikako. Ia atatsiiri apiata atatsi-itaākako. Kitxakapiriġka itixi Teoso kamakasaaki kākiti atatsiirauata poiāoka. Ikara atatsiiri ōti apisa kākiti atatsiirauata poiāoka. Ikara atatsiiri ōti napa atoko !ikara atoko inakari atatsiiri !auaikako. ²⁰ Teoso mapoiāotakaniāri iua ōti kākiti atatsiirauatini ōti, !auaikamako kākiti. Ikinipekamako ipīpemanako. Teoso iotokakariko ĩkora atatsiiretxi, imereēkini mapinakani ĩkapani.

²¹ —Apanakini sāpiretiniāi hġte: “Xesosi Teoso mereēkiti ia,” hinikosaaki, ! hāuikapiri. “Xesosi Teoso mereēkiti ikiraātaā,” hinikosaaki, ! hāuikapiri. ²² Kotxi Teoso mereēkiti minakanua apokapitikako, “Xesosikarano nota,” inakari. Apaka apanakini apokapitikako, “Teoso sākire sāpiretakarikarano nota,” inakari. Paxirari ninoā sākire. Kākiti ikara atoko inakani kamariko posotiiretxi, kākiti itikiniri ĩkapani. Ninoā nirekamari Teoso mereēkini imisirienetinina. ²³ Erepaniko. Ikara ōti apokini apisapanika nōtāġikai hġte —itxa Xesosi imoianariakorimoni.

Kākiti Itari Iaxitikiri Kanapiriini
(Mateo 24.29-31; Arōkasi 21.25-28)

²⁴ —Iua misirikaretxi napa atoko atokatxi iuakapeka. Kasiri !iponikaika. ²⁵ Iōriki iaxitikero irikako. Ikinipoko kaikori iaxiti auakari ioġketaākako. ²⁶ Iuasaakipekako ikinimane atapariko kākiti itari iaxitikiri apokaāpotini katxiāri āki. Itapararitika apoka. Kaiotximereri itxaua iuasaaki. ²⁷ Iuasaaki iokanataka iniritiakori iaxitikini ĩtinixitimoni, ipinimoni ĩtinixitimoni, atokatxi pokġkinimoni, atokatxi ereēkokinimoni. Iokanataka iniritiakori ikini itixitimoni kākiti imereēkini apitiitininina ĩkapani —itxa Xesosi imoianariakorimoni.

Piko Mina Pirena
(Mateo 24.32-35; Arōkasi 21.29-33)

²⁸ Iuaġkana Xesosi sākirauata.
—Nisāpiretai sāpirenatxi atāo inakari oerekiko, piko mina pirena, nikanapiriini apiata himarotini ĩkapani. Pooġoporipeka onakasaaki, otomorekasaaki, “Kamoġ apokanapanoka,” hġtxa. ²⁹ Iua atokokana ikara misirikaretxi mixikanani nisāpiretakiti hġtikasaaki, himarotapekariko nota kaiama kanapirikapeka ninini. ³⁰ Ia nisākire atāo. Itixi auakani ! ixipoka ikinipoko nisāpiretakiti mapokakani apisa. ³¹ Iaxiti xipokapitikako. ĩkoraxiti apaka xipokapitikako. Iuaritika nota sākire !ixipoka —itxa Xesosi imoianariakorimoni.

Kākiti !Imarotari Xesosi Apokini Manapi
(Mateo 24.36-44)

³² Iuaġkana Xesosi sākirauata:
—Kākiti !imarotari ikara ōti manapi apokini. Teoso nitiriakori iaxitikini apaka !imarotari ikara ōti. Nota Teoso ākirikanera !imarotari ikara ōti. Nġrinanira, Teosonanira, imarotari. ³³ Hiāatapapariko. Hiġkoatapikako. Teoso himisāġkiretapikako. Kotxi !himarotari ikara ōti apokini.

³⁴ —Nikanapiriākasaaki, kiki ōtako sikari kanapiriini atoko nitxa. Iua kiki poterikasaaki, ipaniātana iniritiakori aapoko inġkatininina. Ikininape isikanapana parġkatxi ĩkaminina. Ipaniātari iniriti aapoko toreātaā kaikotakari, “Araōkire pitxako,” itxari. ³⁵ Nota hġtari iaxitikiri iua kiki ōtako sikari atoko nitxako. Ātipirika hiātapapikanoko, kotxi !imarotari nota apokini ōti. !Himarotari mapiātġkikauako napoka. !Himarotari apanġkanōkauako napoka. Imaropiriġkatauako napoka. ĩkanōkapanġkikauako napoka !himarotapaniri. ³⁶ Atxiġti patimari napokini, ininiā hiġkoatapikako, mimakatika hinini

Īkapani nota apokasaaki. ³⁷ Ininiã ätipirika hiätapapikanoko. Ikininapemoni apaka ikara nitxa –itxa Xesosi imoianariakorimoni.

14

Xesosi Okaenetiko Pirena

(Mateo 26.1-5; Arókasi 22.1-2; Xoão 11.45-53)

¹ Iuasaaki kãkiti apotũitaua ipi kiiniriti auakasaaki. Pãskoã kiiniriti, pão miãtiãkati nikiko kiiniriti pakini aua. Ipi õti kiiniri potoriãkini apisapanika sasetotxi auĩteakori, kaiõkatsoparerini pakini xinikaxitita:

–Natokopa atxatariko Xesosi amaĩkini aõkini ĩkapani? ² ! Amaĩkapaniri kiinirisaaki, kotxi amaĩkiniãri, kãkiti naiatamaua eereka –itxanãtana.

Sito Kamariãro Mĩkaro

(Mateo 26.6-13; Xoão 12.1-8)

³ Xesosi auanãta Petãnia aapokotxiti Simão inakori aapoko. Iua Simão akiritaãka “Maere Matati.” Simão aapoko Xesosi nipokonãtakasaaki, sito apoka. Oa minari kopitipaki kai kamakori, kai arapãstiro inakoro. Kopitipaki ãki aua kamariãro, nato inakoro. Pakaronepokoro. Oãpokasaaki Xesosimoni, opakauanakari kopitipaki. Okitakaro kamariãro Xesosi kiiã. ⁴ Iuasaakipeka apanakini iuaã auakani omanãkarauata.

–Kinirepa oioanataãka kamariãro? ⁵ Ovẽtxitamaroko, ininiã kaiãopokomaniko txineiro oãpakapamako. Tresẽtosi txineiro ota prata kamakori oãpakamako. Txineiro mauakinitimoni osikiniã erekamariko –itxana.

Iteene ikapatitana. ⁶ Ininiã Xesosi:

–Ikara atoko !hĩtxapero. !Homanatapero. Erekarĩ okaminano. ⁷ Kãkiti matxineiroteni auapikako hĩtekata. Hinirekasaakiriko hĩsikaro txineiro ninoãmoni. Nota !auari ätipirika hĩtekata. ⁸ Oia sito kamari ikinipoko oimaro-takiti nota ĩkapani. Nipinini apisapanika oina notamoni. Omaritari niĩto, niĩto iposope inini nikatiko ĩkapani. ⁹ Atão nisãpiretai hĩte. Teeso iokanapirena erekarĩ sãpiretikoãtaã ikini itixiti, osãpiretaãkako apaka oia sito kitakiniro kamariãro nikiã, ininiã kãkiti ikini itixiti auakani xinikapikaro oa –itxa Xesosi.

Xotasi Mĩkapiritiniri Xesosi

(Mateo 26.14-16; Arókasi 22.7-16, 21-23; Xoão 13.21-30)

¹⁰ Tosi pakini Xesosi moianariakori. Imoianari Xotasi inakori sari sasetotxi auĩteakorimoni. Imisãkiretana ninoã Xesosi imĩkapiritini ĩkapani, ninoãmoni isikiniri ĩkapani. ¹¹ Ikenakotakasaakirina Xotasi sãkire, ipoxokoniutana. Isikaenatarona txineiro iuamoni. Eereka Xotasi iãtapari Xesosi imĩkapiritini õti.

Pãskoã Kiiniriti Kamiko

(Mateo 26.17-25; Arókasi 22.7-13)

¹² Pãskoã kiiniriti potoriãkini õti, soti auĩte anaakori okiko õti, Xesosi moianariakori misãkiretari iua:

–Namonipa pinirekatari Pãskoã kiiniriti akamini?

¹³ Ininiã Xesosi iokanatanã imoianariakori ipi.

–Hĩsa sitatximoni. Iuaã kiki ãparaã kopitiã anikakari hãpiãkata. Iua kikikata hĩsa. ¹⁴ Iua sinimoni kaapokori himisãkireta. Hĩtxariko iua: “Koerekareri nirekari imarotiniri, namonipa erekarĩ imoianariakorikata inopokotini Pãskoã kiiniriti ikamakasaakina?” hĩtxariko. ¹⁵ Ininiã iua oerekaiko hĩte itanokiri koã mitapoari. Auapeka kãkiti topãkini. Imakinika oeretapeãkaika –itxana.

¹⁶ Ininiã imoianariakori sari. Sitatxi apokasaakina Xesosi sãkire iaõka aua. Ininiã ninoa kamari nipokori Pãskoã kiiniriti ìkapani.

¹⁷ Ìkanõkapeka inakasaaki Xesosi apoka tosi imoianariakorikata.

¹⁸ Inipokonãtakasaakina, Xesosi txana:

—Atão nisãpiretai. Æti hũte notakata nipokotakari mĩkapiritanoko nota —itxa.

¹⁹ Ininiãkara Xesosi moianariakori matinaniuata. Ipimaãrina Xesosi:

—Notakani atxiĩti?

Ætipekana:

—Notakani atxiĩti?

Ininiã imakinikana ikara atoko itxana. ²⁰ Ininiã Xesosi:

—Ætika hũte notakata auakari mĩkapiritano. Notakata komiri iopitiãtakarikaroko sikano nimokaiakariakorimoni. ²¹ Nota hũtari iaxitikiri okaãkako. Teoso sãkire iõkatsopatakori sãpiretapekari nipinini tĩkane. Nota hũtari iaxitikiri mĩkapiritakari iteene misiritaãkako. Erekarariko maponaniãkatika inaãkamako.

Xesosi Ìto, Iarẽka Pakini

(Mateo 26.26-30; Arõkasi 22.14-23; 1 Korĩto 11.23-25)

²² Xesosi imoianariakorikata nipokonãtakasaaki, Xesosi kosekari komiri. Imisãkiretari Teoso:

—Erekapitikari ia komiri pisikakiti atemoni —itxari.

Imapopeẽri komiri, xanaka itxari imoianariakorimoni.

—Apakapa, nika hũtxako. Ia niũto —itxana.

²³ Iposo atoko koseka itxaro iãkoanãtxi. Imisãkiretari Teoso:

—Erekapitikari ia iãriã pisikakiti atemoni.

Ininiã iãkoanãtxi isikana imoianariakori. Ikinikana iãtarina iãriã. ²⁴ Ininiã Xesosi:

—Ia niarẽka xiketakari makãtxakariko kaiãopokori kãkiti maerekani. Teoso sãpiretapekari kãkiti ikamaenetakiti amaneri kãkiti ìkapani. Ia niarẽka oerekari kãkiti, Teoso kamapekari ikamaenetakiti. ²⁵ Atão nisãpiretai. ! Niãtaikaroko ovapeẽ, Teoso auĩtetxi ininiãtaãua nimapokakanisaaki. Iuaã napokasaaki niãtari. Amaneri iãriãti niãtako —itxa Xesosi.

²⁶ Eureka ninoa xikarauata Teoso ìkapani. Iua atoko isana oriva mina auiniãtaã, oxiratari nopini.

Xesosi Sãpiretari Petro Kipatiniri Iua

(Mateo 26.31-35; Arõkasi 22.31-34; Xoão 13.36-38)

²⁷ Xesosi misãkiretana imoianariakori:

—Ia ìkanõkati hĩkinika hũte takanapanoko nota, kotxi Teoso sãkire iõkatsopatakori sãpiretapekari ikara atoko ìnakari. Itxari:

Nokariko soti auĩte piratakari, ininiã ikinika ipiraakori iarikitatoko, itxa Teoso sãkire iõkatsopatakori. ²⁸ Ininiã eureka nota nipinaãka atoko, iuaĩkana nõkitikaãkaua atoko, nisako hũte apisa Karirẽiamoni —itxa Xesosi.

²⁹ Ininiã Petro:

—Nota !nitakanapai pite. Atxiĩti ikinimane takanapai, iuaritika kona nota takanapai.

³⁰ Ininiã Xesosi:

—Atão nisãpiretai. Ia ìkanõkati patari ipikata sãkirauatini apisapanikako, ipi ãti pakinikata, “!Nimarotari iua,” pitxanoko —itxari Petro.

³¹ Petro apakapapiretari itaparaxinireritika:

—Atxiĩti pitekata nokaãka, iuaritika kona nota sãpiretari apanakini nimirrotakanii pite.

Ìkininape Xesosi moianariakori Petro sãkire iaõka ikamana.

*Xesosi Misäkiretiniri Teoso Xetsémani Inakoriätaã**(Mateo 26.36-46; Arókasi 22.39-46)*

³² Xesosi imoianariakorikata apoka ätiätaã kãkiti akiritakiti Xetsémani inakoriätaã. Iuaã Xesosi paniätana imoianariakori:

—Uai hĩttopãka. Teoso nimisäkiretako —itxana.

³³ Anikari Petro, Txiako, Xoão pakini iuakata apikomoni. Iuaã Xesosi iteene matinaniuata. Maerekaxiniretinoka itxa. ³⁴ Ininiã iua:

—Nixinire imaromaxiretari. Iteene nimaxire, ininiã okaaritano. Uai hĩkaikota. Araökire hĩtxako —itxana.

³⁵ Apikomoni isa. Ipamaka xitimoni, misäkireta itxari Teoso. ³⁶ Itxari iri:

—Papai, pite posotari ikinipoko pikamini. !Pauritapeno pañtiki natat-siirauatini, iuaritika ninirekari pite nirekakiti nikamini. Nota nirekakiti nikamini kona ninireka —itxari iri.

³⁷ Eereka ikanapiriã Petro, Txiako, Xoão pakinimoni, txamari ninoa imakanãta. Xesosi akiritari Petro:

—Simão, himakanãta? Kona hĩposotari äti oaranoka hĩkoatini?

³⁸ Erepaniko. Hinirekasaakiri maerekati hĩkamini, !hĩkamapiri. Araökire hĩtxako. Himisäkiretari Teoso, ininiã !hĩkamari maerekati. Kãkiti xinire atxiiti !nirekari maerekati ikamini. Txamari kãkiti ïto tapara poiãoka, ininiã ikamari maerekati. Ininiã erepaniko —itxana ninoa.

³⁹ Iuaĩkana isa Teoso imisäkiretini ïkapani. Teoso imisäkireta, mitxi isäkire atokokana itxa. ⁴⁰ Iposo atoko ikanapiriã. Txamari iuaĩkana ninoa imakanãtapanika. !Iposotarina ikoatinina. Ipëtauatana, ininiã !kasäkirena.

⁴¹ Iuaĩkana ikanapiriã Petro, Txiako, Xoão pakinimoni.

—Himakanãtapanika? Hĩtomanãtapanika? Iaõpe. Hãtapana. Hĩtari iaxitiki uatxa sikaãkako maerekati kamakanimoni. ⁴² Hõkitikaua. Masa. Hãtapana. Apokaãpota kiki nimĩkapiritakiri —itxana.

*Xesosi Maĩkiko Pirena**(Mateo 26.47-56; Arókasi 22.47-53; Xoão 18.1-11)*

⁴³ Xesosi säkirauanãtakasaaki, Xotasi apoka. Iua Xotasi Xesosi moianarika-mara. Iminana ito kiki, saasara mĩkani, piriri mĩkani. Sasetotxi auñteakori, kaiõkatsoparerini, kiomãtxiakori pakini iokanatarari Xotasi kikiakorikata Xesosi imaĩkinina ïkapani. ⁴⁴ Xotasi mitxipeka säpiretari kikiakori:

—Nota apitxokakiti Xesosipitkarako iua. Iuusaaki himaĩkapekariko. Erepaniko hanikasaakiri, imamitekakani ïkapani —itxa.

⁴⁵ Xotasi apokasaaki, isakatapitipori Xesosimoni. Akiritari:

—Koerekareri.

Inakasaakipeka apitxoka itxari.

⁴⁶ Inakasaakipeka kikiakori maĩka, anika itxarina Xesosi. ⁴⁷ Kiki iuusaaki iuaã auakari kosekaro saasara. Iua sauaãkatari sasetotxi auñte apiatakari nitiri. Itsotakakipitari. ⁴⁸ Iuusaakipeka Xesosi:

—Hĩte ina himaĩkinino ïkapani, saasarakata, piririkata. Kĩitiriri atoko hĩtxapeno nota himaĩkinino. ⁴⁹ Ikiniõtika nota auanãtari hĩteka Teoso misäkiretiko aikoti äki, noerekarauatakasaaki. Iuaã hĩte !imaĩkano nota, kotxi Teoso säkire iõkatsopatapeëkaika hĩte maĩkinino kĩitiriri himaĩkini atoko —itxana ninoa.

⁵⁰ Iuusaakipeka ikinika Xesosi moianariakori miteka, asika itxarina iua.

⁵¹ Iuusaaki ätokori sari Xesosi tikini. Iua mäka ätinoka aua ïtoã pirikakari. Kikiakori maĩkamari iua. ⁵² Imãkanoka kaikota iuakoãna. Kasarapeka imiteka iua ätokori.

*Xesosi Xoteo Auñteakori Apisatoõ**(Mateo 26.57-68; Arókasi 22.54a, 63-71; Xoão 18.12-14, 19-24)*

⁵³ Ninoa anikari Xesosi sasetotxi auñte apiatakari aapokomoni. Iuaã ikinika sasetotxi auñteakori, kiomãtxiakori, kaiõkatsoparerini pakini apotiitaua.

⁵⁴ Petro ikira atoko isaãpota Xesosi anikakani tikini. Iroã sasetotxi auñte aapoko piriketakoriã. Iuaã iitopãka sasetotxi auñte apiatakari nitiriakoriakata. Iroka xamina tinipoki.

⁵⁵ Aapokotxi ãki sasetotxi auñteakori, ikinika Xoteo auñteakori pakini pimaãna kãkiti:

—Kipa imarotatari maerekati Xesosi kamini?

Ninoa nirekari Xesosi okiko imaerekani xika. Txamari ! apokarina imaerekani imarotakani, kotxi ! ikamari maerekati. ⁵⁶ Kaiãopokori kãkiti sãpiretari maerekati Xesosi kamakiti, txamari paxirari ninoa sãkire, kotxi ãti sãpiretakiti ipinimoni, ãti sãpiretakiti ipinimoni, itxaãpotana.

⁵⁷ Apanakini kiki õkitikaua, sãpireta itxarina ia aãpirena Xesosi ikamapiretinina. ⁵⁸ Ninoa:

—Ate kenakotari isãpiretiniri: “Nirikariko ia aiko Teoso misãkiretiko aikoti kãkiti kamakiti. Ipi ãti pakini õti inakasaaki nikamariko ãti aiko kãkiti makamakiniti,” itxa isãkire.

⁵⁹ Txamari ikara sãkiretxi ãti sãpiretakiti ipinimoni, ãti sãpiretakiti ipinimoni, itxaãpota.

⁶⁰ Iposo atoko sasetotxi auñte apiatakari tima ikinimane apisatoõ. Iua pimaãri Xesosi:

—Kininiãpa na papakapapiretari ninoa sãkire? Kixikapa ninoa ikara atoko txanãtai? —itxari.

⁶¹ Txamari ! kasãkireri Xesosi. ! Apakapapiretari. Ininiã sasetotxi auñte apiatakari iuaikana pimaãri:

—Pitekani Teoso mereẽkiti txataua? Pitekani Teoso ãkiri txataua? —itxari.

⁶² Ininiã Xesosi:

—Ari, iua ãkiripitikarano. Hãtamariko kãkiti itari iaxitikiri topãkini Kaposotiireri kikomoni. Hãtapariko kãkiti itari iaxitikiri uai apokaãpotini katxiãri ãki —itxa.

⁶³ Iuasaakipeka sasetotxi auñte apiatakari matsorãkari imãka, kotxi iuãkari Xesosi sãkire maerekati ininiua.

—! Anirekaikari Xesosi kamakiti sãpiretakani. Atokopeka. ⁶⁴ Kotxi hñte kenakotapekari isãkire maerekati, “Teoso ãkirirano” inini. Natokopa atxatari iua? —itxana.

Ininiã ninoa apakapapiretari:

—Okaãkapitikako —itxarina.

⁶⁵ Apanakini kiisokari Xesosi. Mãkatxi mataã iapirikarina ikiã oki manapi imatamatakani ãkapani. Iposo atoko iãsokarina.

—Pisãpiretaua, kipa ãsokai? —itxarina.

Sasetotxi auñte nitiriakori apaka ãsokari iua iuakoãna.

Petro Kipatari Xesosi Imarotini

(Mateo 26.69-75; Arõkasi 22.54b-62; Xoão 18.15-18, 25-27)

⁶⁶ Iuasaaki Petro ixiti aua aapokotxi piriketakori ãki. Sasetotxi auñte apiatakari nitero ãtokoro apoka iuaã. ⁶⁷ Oãtamataro Petro irokanãtini xamina tinipoki. Oa mixinitari iua. Ininiã oa:

—Xesosi Nasareekiri moianarikai pite apaka —otxa.

⁶⁸ Ininiã:

—Kona, nota limarotari pisãkire —itxaro.

Iuasaaki pirikere Ironakikoãtaã isari. Iuasaakipeka patari sãkirauata. ⁶⁹ Oa sasetotxi auñte nitero atamataro iua iuaã.

—Ere kiki iua moianaripitikara —otxana ninoa Petro takote auakani.

⁷⁰ –Kona iuano nota –itxa.

Pañtiki ninoa iuaã auakani:

–Iua moianaripitkarai. Pite Kariréiakirikarai. Pisákireëra ate imarotai –itxarina.

⁷¹ Ininiã Petro:

–Nota !imarotari kiki ikara atoko hinanãtakiti. Atãoene nimasãpiretakaniã, Teoso misiritamanoko. Teoso imarotari nota sákire atãoka nisãpiretinii –itxana.

⁷² Ikara atoko Petro inakasaaki, iuaĩkana patari sákirauata. Ininiã Petro xinikari Xesosi sãpiretakiti iuamoni. “Ipíkata patari sákirauatini apis-apanikako, ipi ãti pakinikata, ‘!Nimarotari iua,’ pitxanoko.” Ikara inakari ixinikasaaki, itxiapata.

15

Xesosi Pirato Apisatoõ

(Mateo 27.1-2, 11-14; Arókasi 23.1-5; Xoão 18.28-38a)

¹ Katimatinĩkata sasetotxi auñteakori, kiomãtxiakori, kaiõkatsoparerini, ikinimane Xoteo auñteakorikata xinikaxitinãta. Ipaniãtarina Xesosi iaxirikiko. Iposo atoko anika, sika itxarina Piratomoni. ² Pirato pimaãri Xesosi:

–Pitekani Xoteoakori auñte txataua? –itxari.

Ininiã Xesosi:

–Ari, pisákire atãopitikara.

³ Sasetotxi auñteakori apoiãpotari Xesosi, txamari Xesosi !kasákireri. ⁴ Ininiã Pirato:

–Na papakapapiretari? Ninoa iteene misákirepiretai –itxari.

⁵ Iuaritika Xesosi !apakapapiretari. Ininiã Pirato ákixinireë:

–Kinirepa kona apakapapiretari? –itxa.

Xesosi Okiko Nirekiko

(Mateo 27.15-26; Arókasi 23.13-25; Xoão 18.38b-19.16)

⁶ Páskoa kiiniriti auakasaaki, Pirato itotari isikakiniri kateia áki auakari kãkiti nireëkiti. ⁷ Iuasaaki Xesosi maĩkikosaaki, Pahapasi inakori aua kateia áki. Iua Pahapasi apanakini kateia áki auakanikata okaniuat-apeka Homanoakori inaiatakasaakina. ⁸ Pirato sákirauatakasaaki Xesosikata, kãkitipokoni apoka Piratomoni.

–Kateia áki auakari pisikaka –itxarina.

⁹ Ininiã Pirato pimaãna:

–Hinirekatarini nisikakiniri Xoteo auñte hñte ãkapani? –itxana.

¹⁰ Pirato iteene imarotari sasetotxi auñteakori sikari Xesosi iuamoni Xesosi ixikotinina xika. ¹¹ Sasetotxi auñteakori maasakana ninoa iuaã apotiitakania:

–Hamanaãri Pirato Pahapasi isikakinini ãkapani –itxana kãkitimoni.

¹² Pirato iuaĩkana pimaãna:

–Natokopa nitxatari ia kiki Xoteo auñte inakori? –itxa.

¹³ Akiripoakatana:

–Aamina ãpiriãmitakari nopini hñtokakitari –itxana.

¹⁴ Ininiã Pirato:

–Kixikapa? Maerekati !ikama –itxa.

Apiata akiripoakatana:

–Aamina ãpiriãmitakari nopini hñtokakitari –itxakatana.

¹⁵ Ininiã Pirato sikakari Pahapasi ninoa ãkapani, kotxi inirekari ikamapox-okonitinina ninoa kãkiti. Eereka ipaniãtari Xesosi xirokitatiko aãpitsã.

Eereka Pirato paniātari sotatoakori tokakitiniri Xesosi aamina ĩpiriāmitakari nopini.

Sotatoakori Napetiniri Xesosi

(Mateo 27.27-31; Arókasi 22.63-65; Xoão 19.1-3)

¹⁶ Ininiā sotatoakori anikari Xesosi Pirato aapoko āki. Akiritarina ikinika sotato. ¹⁷ Iposo atoko ieretakarina mākatxi pōkamarari Xesosi ĩtoā. Ikamarina saporiēta kotipiario kamakori, taka itxarina Xesosi kiiā.

¹⁸ —Aāuīte —itxarina Xesosi inapetinina.

—Xoteo auītekai pite —itxarina.

¹⁹ Iaritakiitarina aākeē. Ikiisokarina. Ikapotoreēkauana Xesosi apisatoō.

—Aāuīte —itxarina Xesosi inapetinina.

²⁰ Inapetakarina atoko imakatzakarina mākatxi pōkamarari. Xesosi māka iuaīkana ieretaka. Eereka anikarina Xesosi aamina ĩpiriāmitakari nopini itokakitinirina ĩkapani.

Xesosi Tokakitaāka Aamina ĩpiriāmitakari Nopini

(Mateo 27.32-44; Arókasi 23.26-43; Xoão 19.17-27)

²¹ ĩpixinipokoriti itaōkitarina kiki Simāo inakori. Sireni sitatxitikiri iua. Iua anaakori Arexātri, Hopo pakini. Iuasaaki Simāo apoka Xerosareē. Sotatoakori paniātari iua:

—Ia aamina ĩpiriāmitakari panikinari —itxana.

²² Anikarina Xesosi ixirataā, Kóokota inakoriātaā. Xoteo sākire “Kóokota.” Apanakini akiritari iua oxiratarari uāka “Kiitātatxi,” inaāka akiritiko. Iuaā apokana. ²³ Isikamarina iāriā pinītxikata, miha inakorokata, Xesosi iātini ĩkapani, itsiū imimarotakani ĩkapani, txamari ! inirekaro iātiniro. ²⁴ Ininiā itokakitarina aamina ĩpiriāmitakari nopini. Eereka ikamarina sarauatxi, Xesosi māka apakapanani imarotinina ĩkapani. Ikara atoko apanakini anikari Xesosi māka. ²⁵ ĩkanōkapanika novi oara itokakitapeēka Xesosi aamina ĩpiriāmitakari nopini. ²⁶ Aaminaā auari iōkatakita, apoītiko pirena, “Xoteoakori Auīte” itxa. ²⁷ Ninoa tokakitana ipi kiitiririni apaka aamina ĩpiriāmitakari nopini, ikikomoni āti, isanaremoni āti. ²⁸ Kitxakapirīka Teoso sākire iōkatsopatakori txari:

Okapeēkako iua, kokaniri okiko atoko inapeēkako.

Ininiā Xesosi okikosaaki ia Teoso sākire iōkatsopatakori iaōka auapeka iuasaaki.

²⁹ Ninoa iuaā napakani misākirepiretapikari Xesosi:

—Kiīkitei. Pite sākire: “Nirikariko Teoso misākiretiko aikoti. Ipi āti pakini ōti inakasaaki nikamari iuaīkana,” pitxama. ³⁰ Ikara atoko piposotiniā, piteka pimakatzakauako, ininiā pikatxaka aamina ĩpiriāmitakariā —itxarina Xesosi inapetinina.

³¹ Sasetotxi auīteakori, kaiōkatsoparerini pakini napetari Xesosi:

—Iua makananitapekari apanakini. Txamari iuaka liposotari imakananiniua —itxakakana.

³² —ĩkatxakiniārako ate auikari Teoso mereēkiti ininiāua. ĩkatxakiniā, aāuikari Isaeo auakani auīte ininiāua —itxakakana.

Kiitiririni iuakata tokakitakoni apaka misākirepiretari.

Xesosi ĩpinini Pirena

(Mateo 27.45-56; Arókasi 23.44-49; Xoão 19.28-30)

³³ Iuasaaki apaniāxiti ipiāka. ĩkini itixitika piāka. Ipi āti pakini oara ipiāka.

³⁴ Ipi āti pakini oara napa atoko Xesosi akiripoakata:

—Erii, Erii, aremaa sapakatani —itxa.

Ia atatsopatakari sākireē: “NiTeosone, niTeosone, kinirepa pitakana-pano?” itxa.

³⁵ Kākiti iuaā auakani kenakotari akirinātini.

—Hikenakota. Akirinātari Eríasi —itxana.

³⁶ Iuasaakipeka kiki ina katimariā. Iākari mapoa atoko inakari iariā katxioārimoni, aāke mapotōkire taka itxari, sika itxari Xesosi iātini ikapani.

—Mítxipanikako. Maiātapari. Atauako Eríasi makatxakatapaniri Xesosi —itxana.

³⁷ Xesosi itapararitika akiripoakata, eereka ipípe itxa. ³⁸ Iuasaakipeka mākatxi mata Teoso misākiretiko aikoti āki arōkakari tsorakita. Itano itso-rakita. Ixitipecta apoka. Mítxi iua mākatxi mata ! auiritari kākiti ĩroini Teosonani Auini Pakitaātaā. ³⁹ Sotatoakori auíte aua aamina ĩpiriāmitakari apisatoō. Ikenakotari Xesosi akiritini. Itikari ipinini.

—Atāopitikara Teoso ākiri itxaua ia kiki —itxa.

⁴⁰ Ātokaka sitoakoro ikira atoko atamanātarina Xesosi, Maria Matarena-ma, Saromeema, āto Mariama, apanakini sitoakorokata. Xesosi, Txi-ako pakini inoro oa Maria. Iua Txiako maneripatika inakari. ⁴¹ Xesosi Kariréia auakasaaki, ninoa sitoakoro moianatari iua. Imiparīkatarina. Xesosi ipíkasaakikanera apanakini sitoakoro kaiāopokoro aua iuaātaā. Ninoa apoka Xerosareē Xesosikata.

Xesosi Ikatiko Pirena

(Mateo 27.57-61; Arókasi 23.50-56; Xoāo 19.38-42)

⁴² Ikara ōti, Xesosi ipinini ōti, kākiti parīkauatini ōti, kākiti tomatini ōti apis-apanika, iuasaaki kikatatikipeka. ⁴³ Iuasaaki Xosee inakori, Arimateia si-tatxitikiri, sari Piratomoni. Iua Xosee Xoteo auíte apanakinikata. Ikinimane paxitari iua. Iua apaka iātapari Teoso ikinimane auíte ininiua ōti apokini. Itaparaxinireritika Piratomoni isa, amanaā itxari Xesosi ĩto. ⁴⁴ Ininiā Pirato ākixinireē:

—Atauako patimari Xesosi ipinini? —itxa.

Ininiā ipīkapiretari sotatoakori auíte. Iua apokasaaki Pirato pimaāri:

—Atauako Xesosi ipípeka? —itxa.

⁴⁵ Ininiā iua:

—Ari, ipinapitipeka —itxari.

Ininiā Pirato:

—Panikaikari ĩto —itxari Xoseemoni.

⁴⁶ Iuasaaki Xosee amotari mākatxi mata erekari, arínio inakori. Eereka imakatxakari Xesosi ĩto. Iapirikari ĩto mākatxi mataā, anika itxari akauari irikomoni. Kai kisakakori āki ieretakari Xesosi ĩto. Eereka kai mitapoari ikatika, tota itxari iriko. ⁴⁷ Ipi Maria itikanātari Xesosi ĩto takikoātaā, Maria Matarena, Maria, Xesosi inakori inoroma pakini.

16

Xesosi Iuaĩkana Auāki Inini

(Mateo 28.1-8; Arókasi 24.1-12; Xoāo 20.1-10)

¹ Tomatiko ōti xipoka atoko mapiānikata, ipi āto pakini sito amo-taro kamariāro, Xesosi ĩto ikamamaritininina ikapani, Maria Matarena, Saromeema, Maria Txiako inoroma pakini. ² Katimatiniĩkata, tomĩkosaaki, ĩkanōkapanika, atokatxi pokĩkasaaki, ninoa sari akauarimoni. ³ Kimaporiā isikasaakina, isākirauaāpotana:

—Kipa makatxakinaua kai auíte iriko tore? —itxaāpotana.

Amaripokori iua kai. ⁴ Iuaã apokasaakina, atamatarina. Kai makatx-akapeëkaika. ⁵ Ininiã Iroãna iriko ãki. Atamatarina ãtokori topãkanãta ikikomoni. Imãka ãtanori, kasarori. Ininiã ninoa tikoka.

⁶ Ininiã iua:

—! Hítikokape. Híte nitanãtari Xesosi Nasareekiri, aamina ãpiriãmitakari nopini tokakitakori. Õkitikapekaua iua. !Auaika uai. Hãtamata. Mitxi itakarina iito uai. ⁷ Hísipeka. Hísãpiretari Petro, apanakini Xesosi moianariakori pakini: “Xesosi sapanikako híte apisa Kariréiamoni. Iuaã híte aõkitari iua, kotxi ipinaka apisapanika isãpiretapekari ikara hõtemoni,” —itxana ninoa.

⁸ Itimaritikana ninoa pokika. Imitekana. Ikikinanakana, ipikarena xika. ! Isãpiretarina apanakini, kotxi ipikarauatana.

Xesosi Oerekaua Maria Matarenamoni
(Mateo 28.9-10; Xoão 20.11-18)

⁹ Xesosi õkitikasaakia ipinaka atoko ãkanõkapanika semana potorikini õti, tomõkosaaki, oerekaua merepitipanika Maria Matarenamoni. Mitxipe Xesosi aõkitakasaakiro oa Maria, omitikari maerekani matamatakoni setxi pakini oa itoã auakani. ¹⁰ Xesosi õkitikasaakia, iua oaõkitaka atoko, osari merepanika Xesosi moianariakorimoni. Iuasaaki iteene imatinaniuatana. Itxiapanãtana. Osãpiretana ninoa:

¹¹ —Xesosi iuaãkana auãki itxapeka. Nota aõkitari iua —otxana.

Txamari ninoa kona auikari osãkire.

Xesosi Oerekaua Ipi Imoianariakorimoni
(Arókasi 24.13-35)

¹² Eereka iuaka oerekaua ipi imoianariakorimoni, kimaporiã isikasaakina aapokotxi mauakaniãtaã. Iuasaaki itoõ ipinipo itxa. ¹³ Eereka ninoa kanapiriã. Isãpiretana apanakini imoianariakori, txamari !auikarina isãkirena.

Xesosi Oerekaua Imoianariakorimoni
(Mateo 28.16-20; Arókasi 24.36-49; Xoão 20.19-23)

¹⁴ Eereka Xesosi oerekaua õsi imoianariakorimoni inipokotakasaakina. Xesosi õtãkikana:

—Kinirepa híte !auikatarini nota iuaãkana auãki ninini? Kinirepa !hãuikatarini nota aõkitakani sãkire? !Kaioakarekii —itxa.

¹⁵ Iposo atoko Xesosi txana:

—Ikini itixiti hísako. Hísãpiretariko Teoso iokanapirena erekari ikini-manemoni. ¹⁶ Teoso sãkire auãkari patxisatakori, iuarako sari Teoso tixinemoni. Teoso sãkire mauikakati, Teoso misiritapikariko. ¹⁷ Teoso sikaposotiiretanako isãkire auãkani, ininiã apanakini imarotari Teosokara sikari iposotiire ninoamoni. Ia atoko Teoso sikaposotiiretana. Omitikarina maerekani matamatakoni nota uãkaã. Isãkirauatana imimarotakininitina sãkiretxitiã. ¹⁸ Imaãkiniãrina imini, !ipinana. Iãtiniãrina ãkianari, !ami-anatana. !Ipinana. Itakauakotaua amianatakani nopini, ininiã ami-anatakani makananitaãka —itxa Xesosi sãkire.

Xesosi Anikaãka Teoso Tixinemoni
(Arókasi 24.50-53; Atosi 1.6-11)

¹⁹ Imoianariakori imisãkiretanapaka atoko, Xesosi anikaãka Teoso tixinemoni. Iuaã iua topãka Teoso kikomoni. ²⁰ Xesosi moianariakori eereka isipekana, Teoso sãkire ikini aapokotxiti auakani isãpiretinina ãkapani. Api-ananiri moianatana. Apiananiri sikaposotiiretana ninoa, ininiã apanakini imarotari ninoa sãpiretakiti atão inini. Ameë.

ARÓKASI

Arókasi Iōkatsopata Teópiro Inakorimoni

¹ Nota Arókasi iōkatsopata pite Teópiromoni. Iteene nipaxitai. Kākiti ito iōkatsopatapekari ikinipoko Xesosi kamakiti Xoteoakori sauaki auakasaaki. ² Ninoa, nota pakini imarotari ikinipoko Xesosi kamakiti, kotxi Xesosi kamakiti atamatakani, isākire oerekakani, sāpiretapekaua ate. ³ Nota apaka apaiaōkapekari ikinipoko Xesosi sākire, ikamakiti pakini. Ininiā nota apokaerekatari ikinipoko Xesosi pirena niōkatsopatini pite Teópiromoni. Merepitipanika ikamakiti nisāpiretai. Ininiā eereka ikamakiti nisāpiretai. Ininiā eereka ikamakiti nisāpiretai, nitxaāpotako. ⁴ Koerekarerini oerekapekai Xesosi pirena, ininiā uatxa pimarotari ninoa oerekakiti atāo inini.

Xoāo Kapatxisareri Iponaniini Sāpiretiko

⁵ Erotxi inakori Xoteoakori auite inakasaakia Xotéia tōpa, iusaaki auanāta sasetotxi Sakaria inakori. Sakaria auite, apanakini sasetotxiakori auite apaka, Apia inakori. Sakaria tanoro ouāka Isapeo otxaua. Oīri, oātokiri, oātokiri iri imakinikana sasetotxi itxauana. Oātokiri kitxakapirīkari Moisesi itari Arāo inakori. Iua apaka sasetotxi itxaua. ⁶ Teoso nirekaākitinaira ikamana Sakaria, Isapeo pakini. Ninoa kamari ikinipoko iua paniātakiti, Apiananiri paniātakiti. Atāo inakarinoka ikamana. !Īkerokariña ikamakiti. ⁷ Txamari !keenena. Isapeo !oposotari kamixi onini. Iusaaki ikiomaneēpekana.

⁸ Āti ōti Sakaria, apanakini sasetotxiakorikata, parīkauanāta Teoso misākiretiko aikoti āki. Iusaaki ninoatene iuaā parīkauata. ⁹ Sasetotxiakori itotari sasetotxi imereinina Apiananiri misākiretiko aikoti Īroini kamariāro arikini Īkapani, ininiā iusaaki ninoa mereēri Sakaria. Ininiā iua Īroā. ¹⁰ Sakaria aiko āki kamariāro arikanātakasaaki, mapara kākiti apotiitakaniua misākiretari Teoso.

¹¹ Iusaakipeka Teoso nitiri iaxitiki tokiā Sakariamoni kamariāro arikikoātaā takote. ¹² Sakaria atamatakasaakiri, itikoākata, pīkarauata itxa. ¹³ Teoso nitiri misākiretari iua:

–Sakaria, kona pipīkarauatape. Teoso sikipitikaiko pamanaākiti. Ininiā pītanoro Isapeo keenepitīkaroko. Pitakauākatariko pamarite Xoāo. ¹⁴ Iua auakasaaki ikamapoxokonitaiko pite, itori kākiti apaka. ¹⁵ Apiananirimoni apiri itxauako iua Xoāo. Kona Xoāo iātaniroko kapoāro. Erekarī Matamatakoti auariko iua ākixinireē. Inoro irokota ākipanika auakasaaki, Erekarī Matamatakoti auako iua ākixinireē. ¹⁶ Iua Xoāo anikanako itomaneri kākiti Isaeo auakani Teosomoni. Apiananirimoni iua anikana. Ininiā iuaīkana ninoa kanapiriā iTeosonemonina, isākire auikinina Īkapani. ¹⁷ Xoāo apokako Apiananiri apokini apisapanika. Erekarī Matamatakoti sikipataratari Erīasi kitxakapirīka. Iuatxikana Erekarī Matamatakoti sikipataratari Xoāo. Ikara atoko ininiā, iua oerekariko irītxi iuaīkana amaritena itiretinina Īkapani. Iua Xoāo oerekariko kākiti Teoso paniātakiti makamakani, imaerekanina itakanapinina, erekarinoka ikaminina Īkapani. Paimatirenako ninoa iusaakiko. Iua Xoāo oerekariko kākiti iposope ininina Apiananiri apokini apisapanika –itxa Teoso nitiri Sakariamoni.

¹⁸ Ininiā Sakaria pimaāri:

—Kiätokopa nitxa uatxa keenepeka ninini, kotxi nota, nītanoro apaka kiomaneēpeka —itxa.

¹⁹ Teoso nitiri apakapapireta:

—Niuāka Kapirio. Nota auari Teosokata ipaniātakiti nikamini īkapani. Teoso iokanatano pitemoni pite nimisākiretini īkapani, ia erekari pirena niminapiretini īkapani. ²⁰ Txamari na pauikari nisāpiretakiti. Ia xika ! kasākireikaiko, kotxi nisāpiretakiti atāopitika. Teoso sikaenetakiti apokapitakiko. Apokasaaki, pimarotariko nisākire atāo ininiua. Iuasaakiikarako piposotari pisākirauatini —itxa Teoso nitiri Sakariamoni.

²¹ Iuasaaki kākiti mapara auakani iāpapanātari Sakaria.

—Kiripa ikamanāta Sakaria aiko āki? !Katimari —itxanātana.

²² Ipokīkasaaki lkasākireikari. Ninoa kākiti imarotari Teoso misākiretiniri iua aiko āki itaponeē, kotxi lkasākireikari. Iuakoānokara imisākiretana ninoa.

²³ Mapaōti iparīka xipoka atoko aapokomoni isipeka. ²⁴ Eereka Isapeo kamixipeka otxa. Onapari ipi ipi āti pakini kasiriti oaāpoko. !Osari ātiātaā.

²⁵ —Apiananiri sikano namarite. Erekari ikaminano notamoni. Uatxa ! nipētautaika kākiti apisatoō. Keenepekanano —otxa.

Kapirio Iokanataāka Mariamoni

²⁶ Isapeo seisi pakini kasiriti kamixi onakasaaki Teoso iokanatarini itiri iaxitukiri Kapirio Nasaree sitatxitimoni, Karirēia tōpamoni. ²⁷ Iuaā iokanatarini iua ātokoromoni Maria inakoromoni. Oa kona sirīkapanika kikikata. Osāpiretapekari ātokori Xosee inakori iuakata oitaniriuatini īkapani. Xosee atokiri kitxakapirīka Xoteoakori auīte Tavii inakori. ²⁸ Teoso nitiri apokasaaki oamoni, akiritaro Maria:

—Ereēkai. Apiananiri pitekata aua. Iua mereēi pite. Itoro sitoakoro ikini itixiti aua, iuaritika pitenanirako Teoso sika iteene erekari —itxaro oa.

²⁹ Maria pīkarauata Teoso nitiri sākire okenakotakasaaki.

—Kinirepa ikara atoko itxa sākireta? —otxa oākixinireē.

³⁰ Teoso nitiri txaro:

—!Pipīkarauatape, Maria. Teoso apokaerekatai pite. ³¹ Pimixiuatako, keene pitxako. Pitakauākatari pamarite Xesosi. ³² Iua Apiatakarini itxauako. Apiananiri ākiri akiritaākako. Teoso Apiananiri kamariko iua auītetxi ininiāua. Kitxakapirīka Xoteoakori auīte Taviini. Taviini auītetxi ininiua atokokana, Teoso txīkitakariko Xesosi Xoteoakori auīte ininiua. ³³ Ātipirika Xoteoakori auīte, Xakooni apiko mekaniriakori auīte, itxauako. Iua auītetxi ininiua ! ixipoka —itxaro oa.

³⁴ Ininiā oa:

—Kiätokopa nitxa kikikata masirīkatokano, keenepe ninini? —otxa.

³⁵ Teoso nitiri apakapapiretaro:

—Erekari Matamatakoti apokako pākixinireē. Apiananiri posotiere ākitaiko pite, ininiā amarini auakari Teoso ākiri akiritaākako. ³⁶ Pinoromane Isapeo kiomātxipe, iuaritika kamixiro oa. Kākiti sākirema: “!Oposotaikari kamixi onini” iuaritika seisi pakini kasiritipe kamixi onini. ³⁷ Kotxi Teoso posotari ikinipoko ikamini —itxaro oa.

³⁸ —Nikamapitkariko Apiananiri nirekaākiti. Pisāpiretakiti iaōka ninirekapitika —otxa Maria.

Iuasaakipeka Teoso nitiri sipeka.

Maria Isapeomoni Motikini

³⁹ Mapaōti napa atoko Maria katimariā sari oxiratarimoni, Xotēia tōpamoni. Iuaā osari sitatximoni. ⁴⁰ Oīroā Sakaria aapoko. Oākiritaro Isapeo: —Ereēkai —otxa.

⁴¹ Isapeo kenakotakasaakiri Maria akiritiniro oa, iusaaki amarini otikakoákiri oákika. Iusaakipeka Erekarí Matamatakoti itapararitika apoka Isapeo ákixinireé. ⁴² Iusaaki otapararitika otxaro Maria:

—Kaiáopokoro sito itixi auakani, iuaritika pitenokara Teoso sika apia erekari. Apaka Teoso sikariko erekari pamaritemoni. ⁴³ Erekarí Teoso kaminano nota, kotxi niauíte inoro motikaétano. Kinirepa ia erekari Teoso kaminano, kotxi nota minakato nitxaua. ⁴⁴ Nikenakotakasaakiri “Ereékai” pininino, namarite nitikakoákiri oákika, ipoxokoniuatiniá. ⁴⁵ Teoso sikari erekari pitemoni, kotxi pite aukari isákire. Pite aukari isikaenetakiti atáo isikinií —otxa Isapeo Mariamoni.

Maria Xikaretakiti

⁴⁶ Maria txari:

“Erekapitikari Apiananiri notamonikari.

⁴⁷ Nipoxokoniuata, kotxi Teoso nimaerekani makatxaákari itxaua.

⁴⁸ Nipoxokoniuata, kotxi ixinikano nota. Initero poiáoro nitxaua.

Íkorakanani eereka auakani kákiti txanoko: ‘Teoso kamapoxokonitaro, erekari isikiniro,’ txanoko nota.

⁴⁹ Nipoxokoniuata, kotxi Teoso Apiananiri kaminano posotiiretxi. Maerekati !auari iuamoni.

⁵⁰ Iua amonikari kákiti iua paxitakani, kitxakapiríkarini, íkorakanani auakani, eereka auakani apaka iamoniá.

⁵¹ Pataparari iua, ininiá ikamari posotiiretxi. Teoso txíkitakana kákiti iuikakaniua minakani ininiáuana, kotxi ákixinireé iuikauana.

⁵² Teoso makatxakapekari auítetxi pataparari inakaníua. Eereka auítetxi ! itxaikauana ninóa. Kákiti poiáorini inakaníua Teoso kamari auítetxi ininiáuana.

⁵³ Isikakienatari natxitakani. Iokanatarí katxineiroteri sini. Kona xatiki isikari iuamoni.

⁵⁴ Imoianatapékana Xoteoakori, iua íkapani paríkauatakani. !Imaxiníketarari iamoniákinina ninóa.

⁵⁵ Kitxakapiríka Teoso xinikari Apraáoni iamoniákinini. Apaka iua tikini auakani átipirika iamoniáka, kotxi: ‘Nimoianataiko híte,’ itxa anirimanemoni kitxakapiríkarinimoni,”

otxa Maria.

⁵⁶ Okaikota ipi, áti pakini kasiriti Isapeokata. Eereka oaápokomoni kanapiriá otxa Maria.

Xoão Kapatxisareri Iponaniini

⁵⁷ Amarini auini óti apopeka. Isapeo auákitakari amarini kiki. ⁵⁸ Oaápokotakote auakani, onirimane pakini kenakotari erekari Teoso kaminaro oa, ininiá ninóa, Isapeo pakini poxokoepaka itxana ninóa.

⁵⁹ Oito ótisaaki, onirimane motika oamoni, Teoso takaótxikare amarini-moni itakinina íkapani. Inirekarina iuáka Sakaria itakauákatinirina, kotxi iri uákatxikana ninóa nireka itakauákatinirina. ⁶⁰ Txamari inoro:

—Kona Sakariani iuáka. Xoáorako akiritaákkako —otxa.

⁶¹ Ininiá ninóa txaro:

—Pinirimane átika kona Xoão txa uákataua.

⁶² Ninóa pimaári amarini iri Sakaria iuakoána amarini uáka inirekaákiti.

⁶³ Ininiá Sakaria amanaári iókatsoapatiko. Iókatari: “Imi uáka Xoão.” Ininiá ikinimane tsoríkaáta. ⁶⁴ Iusaakipeka Teoso sikaposotiiretari isákirauatini:

—Peerekari Teoso —itxa Sakaría.

⁶⁵ Kákiti iua aapoko takote auakani píkarauata. Teoso posotiire ipíkana. Ikara inakariene Sakaria, Xoão pakini pirena iaripireta oxiratari Xotéia tópa,

ininiã kãkiti iuaãtaã sãpirenauanãta ikara pirena. ⁶⁶ Kãkiti ikara inakariene kenakotakani tsorïkaãta:

—Kanatokopa inakaripa itxatapaniua ia amarini? —itxana.
Ikinimane ïmarotari Apiananiri nïkatiniri iua amarini.

Sakaria Xikaretakiti

⁶⁷ Iuasaaki Erekarï Matamatakoti sikaposotiiretari Xoão iri Sakaria, ininiã Sakaria sãpiretari Teoso sãkire:

⁶⁸ “Peerekari Apiananiri aTeosone, ikinimane Xoteoakori Teosone, kotxi iua apoka inakitiakorimoni imakatzakinina ïkapani, imapinakanina ïkapani.

⁶⁹ Teoso iokanatarï kãkiti maerekani makatzakakari kaposotiireri atemoni. Teoso nitiri Taviini mekanirira iua.

⁷⁰ Kitxakapirïka Teoso sãkire sãpiretakani erekarini sãpiretari ikara Teoso sãkire.

⁷¹ Teoso txari: ‘Nimakatzakaiko hïte himokaiakari mokakanii tïkane, homanatakini mokakanii tïkane.’

⁷² Isãpiretari aãtokiriakorini kitxakapirïkarini: ‘Niamonïkai. Nikamariko nikamaenetakiti hïte ïkapani,’ itxa ninoamoni. Ikara Teoso kamaenetakiti erekari.

⁷³ Kitxakapirïka Teoso txari aãtokiri Apraãoni: ‘Kona nimaxinïkaretari nisikaenetakiti.

⁷⁴ Nimakatzakapitikaiko hïte himokaiakari mokakanii tïkane, ininiã hïparïkauata nota ïkapani mapïkaretika.

⁷⁵ Ininiã hïte auini erekari. Kona hïkamari maerekati hãuapanika hinakasaaki,’ Teoso txari Apraãoni.

⁷⁶ Pitepekana namarite Xoão, Teoso sãkire sãpiretakari pitxauako. Teoso Apiananiri iaxitikiri sãkire sãpiretakari pitxauako. Pite sari Apiananiri apisa. Ikinika pimaiamatako iua apokini apisa, ikinika iposope inini ïkapani.

⁷⁷ Pisãpiretariko kãkiti Teoso nakitiakori, Teoso makatzakiniri maerekanitxi kãkiti kamakiti. Ininiã ninoa ïmarotariko ikara.

⁷⁸ Katiraökiri aTeosone. Kaamonïkareri iua. Ininiã iua tixinekiri apokako atemoni. Atokatxi pokïkini atoko itxako. Iuasaaki ipiã !auaika, kotxi iua makatzakari amaerekani.

⁷⁹ Ininiã iua iopinikari kãkiti xinire, ipinini pïkakani xinire. Ipiaã auakani atoko ninoa. Ininiã iua iopinikari axinire Teoso kimapore aimarotini ïkapani, aãuini ereka inini ïkapani.”

Itxa Sakaria xikare.

⁸⁰ Iua amarini aneë. Teoso sãkire iaõka ikamapika. Teoso sãkire Xoteoakorimoni imasãpiretakani apisapanika ãparaã makïpakaniãtaã aua Xoão.

2

Xesosi Iponaniini Pirena

(Mateo 1.1-25)

¹ Iuasaaki Homanoakori auïte Sesa Akósito inakori. Iua paniãtana iniritiakori iaõtïniri ikininape kãkiti iua auïtetxi ininiãtaãua tãpa auakani, ikini aapokotxitikini uãka imakatzakini ïkapani. ² Mitxi Sesa Akósito ! ikamapanikari kãkiti iaõtïko. Iuasaaki Síria tixini auakani auïte Sirénio inakori.

³ Iuasaaki ikinimane sari sitatximoni iponaniiniãtaãna. Iuaã isikarina iuãkana.

⁴ Ininiã Xosee apaka sari iuãka isikini ïkapani. Ininiã ipotorika Nasaree sitatxiti Kariréia tãpa. Xotéia tãpamoni isa, Pereë sitatxifimoni. Iuaã isa,

kotxi iuaã auítetxi Taviini kitxakapiríka aua. Taviini nirimane itxaua Xosee.
⁵ Isa Mariakata. Ítanoro tíkane oa. Iuasaaki !itakapanikaro. Kamixipeka
 otxa iuasaaki. ⁶ Pereë apoka itxana. Iuaã auakasaakina, aua itxa amarini.
⁷ Oãuãkitakari merepitipanika oimi kiki. Ininiã mãkatxi mataã oiapirikari,
 pirãtxi nipokotini tiitxitiã taka otxari amarini, kotxi kãkiti imakanakiniãtaã
 imakinika xãpokapeka, ininiã ninoa auanãta pirãtxi auiniãtaã.

Soti Auíte Piratakani Pirena

⁸ Iuaãtaã Pereë sitatxiti mapotõkire íkanõka kikiakori soti auíte piratakani
 nĩkanãtari ipiraakorina. ⁹ Iuasaaki katimaritika Apiananiri nitiri iaxitikiri
 tokiã ninoamoni. Iuasaaki Apiananiri lotximere iopinikari ninoa auiniãtaã,
 ininiã imarotarina Teoso apokini iuaãtaã. Ininiã iteene ipĩkarauatana ninoa.

¹⁰ Ininiã Teoso nitiri txana ninoa:

—! Hĩpĩkarauatape. Nota minapiretari erekari pirena ikinimane kãkiti
 enenĩkini íkapani, ¹¹ kotxi ia õti kãkiti maerekani makatxaãkari iponaniãpeka
 Taviini auini sitatxitiã. Iua Teoso mereëkiti. Apiananiri iua. ¹² Himarotariko
 nisãkire atão inini, kotxi hãpokariko ia amarini mãkatxi mataã iapirikiko
 pirãtxi nikini tiitxitiã —Teoso nitiri txana ninoa.

¹³ Iuasaakipeka itomaneri Teoso nitiriakori iaxitikini tokiã iuaãtaã. Ninoa
 xikarauata Teoso íkapani. ¹⁴ Ixikaretarina:

—Peerekari Teoso, iaxiti apiko nopinixiti auakari. Iua kamaerekaxinire-
 tari kãkiti iua apokaerekatakini —itxana ixikarena.

¹⁵ Teoso nitiriakori kanapiriã itxana Teoso tixinemoni. Iuasaaki ninoa
 pirãtxi nĩkatakani misãkiretakakaua:

—Masa Pereëmoni. Maãtamari ikara Apiananiri sãpiretakiti —itxana.

¹⁶ Ininiã katimaritika isana Pereëmoni. Iuaã apokasaakina, initarina
 amarini. Apokana Xosee, Maria pakini. Ininiã atamatarina amarini pirãtxi
 nikini tiitxitiã. ¹⁷ Ikara atamataãkana atoko, isãpirenãtarina Teoso nitiri
 sãpiretakiti amarini pirena ikinimanemoni. ¹⁸ Kãkiti kenakotakasaakiri soti
 auíte nĩkatakani sãpiretakiti, ikinimane tsorĩkaãta iuasaaki. ¹⁹ Maria kenako-
 takasaakiri soti auíte nĩkatakani sãpiretakiti, oa ãkixinireë onĩkatari ikara ene. !
 Omaxinĩkaretari ninoa sãpiretakiti. Oxinikapikari. ²⁰ Eereka pirãtxi nĩkatakani
 kanapiriã ipiraakori auinimoni. Imisãkiretakakana:

—Peerekari Teoso. Apiananiri iua, kotxi erekapitikari aĩtikakiti. Ereka-
 pitikari initiri iaxitikiri sãpiretakiti. Isãpiretakiti atãopitika, kotxi aãtamari
 isãpiretakiti iaõka —itxanãtana ninoa soti auíte nĩkatakani.

Xesosi Takauãkatiko

²¹ Xesosi oito õti auakasaaki, inirimane kamari Teoso takaõtxikare iĩtoã.
 Iuasaaki inirimane takauãkatari Xesosi, kotxi iua iaõka Teoso nitiri iaxitikiri
 sãpiretakekaro Maria oa kamixi oinini apisapanika.

Xesosi Anikiko Teoso Misãkiretiko Aikotimoni

²² Moisesini ketotiniri manapi Xosee, Maria pakini kamari Moisesini
 paniãtakiti iaõka amarini auakasaaki, Xosee, Maria pakini maerekani Teoso
 makatxakini íkapani. Ikara xipoka atoko anikarina Xesosi Xerosareë sitatx-
 itimoni Apiananirimoni isikinirina íkapani, ²³ kotxi Apiananiri paniãtakiti
 iõkatsopatakori txari:

Merepitipanika iponaniãkari sikaãkako Teosomoni, kotxi Teoso nakiti iua.

²⁴ Apaka Apiananiri paniãtakiti iõkatsopatakori txari:

Amarini iponaniãkasaaki, ipi kamoã pisika Teosomoni. Iminakaniã, ipi
 kamoã ãkiri pisika Teosomoni,
 itxa Teoso. Ininiã Xosee, Maria pakini sari Xerosareë kamoã isikinina
 íkapani.

²⁵ Iuasaaki kiki Simião inakori aua Xerosareë. Iua erekari kamakari. Ikinipoko Teoso paniãatakiti ikama. Erekari Matamatakoti auari ãkixinireë. ãkixinireë iãtapanãtapikari Teoso Mereëkiti apokini, kotxi Isaeo auakani maerekani makatxaãkari itxaua. ²⁶ Erekari Matamatakoti sãpiretapekari iua: “Pipinini apisa paõkitapanikariko Apiananiri Mereëkiti,” itxari Simião. ²⁷ Erekari Matamatakoti sikanireõtari Simião aiko Teoso misãkiretiko aikoti ãroini. Iuasaaki Xosee, Maria pakini ãroã iuaãtaã, Apiananirimoni Xesosi isikinina ãkapani, Teoso paniãatakiti ikaminina ãkapani. ²⁸ Iuasaakipeka Simião apakapari Xesosi:

—Peerekari Teoso. ²⁹ Niauãte Apiananiri, uatxa apokapeka ia amarini pisikaenetakiti. Nota pite ãkapani parãkauatakarino. Uatxa niposotari nipinini erekaxinirepeka ninini, ³⁰ kotxi nota atamataria ia amarini piokanatakiti atemoni, amaerekani imakatzakini ãkapani, amapinakani ãkapani. ³¹ Pite iokanatapekari ia ãkorapokoriti ikini itixiti auakani maerekani imakatzakini ãkapani. ³² Ia amarini tirikapi atoko, kotxi iopinikariko pikimapore, pisãkire Xoteo minakanuia imarotini ãkapani. Ia amarini tirikapi apiatakari atoko Xoteoakorimoni pinakitiakorimoni, kotxi oerekai pite ninoamoni —itxa Simião sãkire Teosomoni.

³³ Xosee, Xesosi inoro apaka tsorãkaãnãta ikara Simião sãkire ikenakotakasaakina. ³⁴ Simião amanaãri Teoso ikinipoko erekari ninoamoni isikini ãkapani. Ereka imisãkiretaro Maria, Xesosi inoro:

—Teoso mereëri ia amarini Xoteoakorimoni iokanatiniri ãkapani. Ia apakapakari Teoso apakapa apaka. Ia mapakapakati Teoso !apakapari. Imisiritããkako. Ia amarini oerekari Teoso kãkitimoni, txamari itori kãkiti !auikari isãkire. ³⁵ Ikara atoko ininiã, itori kãkiti xiniãkiti kipatakori ãkixinireë, imarotaãkako. Pitepekana pite matinaniuatako. Pãkipa iouata iorotini tsiã atoko itxako —itxa Simião sãkire Mariamoni.

³⁶ Iuasaaki oãua sito Teoso sãkire sãpiretakaro Ana inakoro. Panoeo ãkero oa. Oãtokiri kitxakapirãka Asee inakori. Iuasaaki kiomãtxipekaro oa. Oãua setxi ano õtanirikata. Ereka ipipe. ³⁷ !Oitaniriuataika. Oitãta koatrokananipeka oãuini. Oa auapika Teoso misãkiretiko aikoti ãki. Iuaã ikini õti, ikini ãkanõkati pakini omisãkiretapikari Teoso. Itokata otakanapari onipokotini Teoso omisãkiretini ãkapani. ³⁸ Xosee, Maria pakini Simião misãkiretaka atoko Ana apaka. Omisãkiretari Teoso:

—Erekapitikari ia amarini pimereëkiti kãkiti iãtapakiti piokanatinini atemoni —otxa.

Ereka osãpirenauata Xesosi apokini pirena Xerosareë auakanimoni kãkiti maerekani makatxaãkari iãtapakanimoni.

Nasaree Sitatxitimoni Ikanapiriinina

³⁹ Xosee, Maria pakini Apiananiri paniãatakiti iõkatsopatakori imakinika ikamaãkana atoko, kanapiriã itxana Karirãia tõpamoni. Iuaã isana aapokomonina Nasaree sitatxitia. ⁴⁰ Iua amarini aneë. Itapara auaãpotari. Kimaroreri itxaua. Teoso iteene tiretari iua Xesosi.

Xesosi Misãkirenãtari Koerekarerini

⁴¹ Ikinikanani Xosee, Maria pakini sari Pãskoa kiiniritimoni Xerosareë sitatxitimoni. ⁴² Xesosi tosi anopeka inakasaaki, isana Xerosareë auakari kiiniritimoni mitxi isanãtinina atokokana. ⁴³ Kiiniri xipoka atoko Xosee, Maria pakini potorika aapokomonina isinina ãkapani. Iuasaaki Xesosi kaikota Xerosareë. Txamari ninoa !imarotari ikaikotini. ⁴⁴ Ninoa uãkatamari apanakini inirimanekata isini. Ikara atoko ininiã, ikimaporitana ãti õtipeka. Mapiãnikata ipixinipokoriti initamarina inirimanemoni, aõkimaneremoni. !

Apokarina. ⁴⁵ Ininiã ikanapiriãna Xerosareẽmoni iuaĩkana initinirina ĩkapani. ⁴⁶ Ipi, ãti pakini õti initapiimarina. !Apokarina Xesosi. Eereka apokarina Teoso misãkiretiko aikoti ãki. Moisesi sãkire oerekakanikata iitopãkanãta. Xesosi kenakonãtari ninoa sãkire. Apaka ipimarauata. ⁴⁷ Ninoa Xesosi sãkire kenakotakani tsorĩkaãnãta, kotxi paimatireri iua. ⁴⁸ Xosee, Maria pakini apokasaakiri iua, kona imarotarina Xesosi parĩka. Inoro txari:

—Namarite, kinirepa pimisiritaua ate? Piri, nota pakini pikamamaxirex-iniretaua ate. Anitapiimai. Kona aãpokai —otxari Xesosi.

⁴⁹ Ininiã Xesosi:

—Kinirepa hinitanãtano? Kona himarotatari uai niri aapoko ninirekari nauini, ipaniãtakiti nikamini ĩkapani —itxa.

⁵⁰ Txamari ninoa !imarotari Xesosi sãkire.

⁵¹ Ikara atoko ininiã, Xesosi kanapiriã ninoakata Nasaree sitatxitimoni. Ikinika Xosee, Maria pakini sãkire ikĩpita. Inoro xinikapikari Xesosi sãkire oãkixinireẽ. Opotxitari oxinikiniri Xesosi sãkire. ⁵² Xesosi aneẽ. Imatire apaka aneẽ. Teoso apokaerekatari Xesosi. Kãkiti apaka apokaerekatari Xesosi.

3

Xoão Kapatxisareri Sãpiretakiti

(Mateo 3.1-12; Marko 1.1-8; Xoão 1.19-28)

¹ Homa sitatxitii Homanoakori auĩte Txiperio inakori iua. Kĩsi anokanapeka iua auĩteti ininiua iuasaaki. Iuasaaki Xotẽia tõpa auakani auĩte Põsio Pirato inakori. Karirẽia tõpa auakani auĩte Erotxi inakori. Erotxi itari Piripi inakori. Itoreia tixini auakani auĩte, Takonitxi tixini auakani auĩte apaka itxaua Piripi. Iuasaaki Apireni auakani auĩte Arisãnia inakori. ² Iuasaaki Anasi inakori, Kaipasi inakori pakini sasetotxi auĩteakori apiatakani itx-auana ninoa. Iuasaaki Teoso sãpiretari isãkire Xoãomoni Sakaria ãkirimoni, ãparaã makipakaniãtaã auakasaaki. ³ Ininiã Xoão sari ikininape kãkitimoni, uini Xotão takote auakanimoni. Isãpiretari Teoso sãkire:

—Hĩtakanapariko himaerekani. Eereka patxisata hinaãkako. Ikara atoko hininiã, Teoso makatxakinii himaerekani —itxanãta Xoão ikininape kãkitimoni.

⁴ Kitxakapirĩka Teoso sãkire sãpiretakari Isaia inakori iõkatsopatar:

Auako kiki ãparaã makipakaniãtaã. Isãpirenauatako. Itxariko: “Hõeretariko kimapõri Apiananiri apokini apisapanika. Itĩkaãpo erekari hĩkamako iua napini ĩkapani.

⁵ Kipatxiã ixãpokakaãkako ikini isauana. Ixirata mirii oerekataãkako. Kimapõri ikitokare oerekataãkako. Kimapõri pakota totaãkako.

⁶ Ikinimane kãkiti itixi auakani imarotariko Teoso makatxakiniri kãkiti maerekani imapinakani ĩkapani,” itxanãta.

Ikara atoko itxa Isaia iõkatsopatakiti Xoão pirena. Kimapõri kãkiti oerekatini atokokana, auĩteti apokini apisa, iua atokokana Xoão nirekari kãkiti iposope inini Apiananiri apokini apisa, imaerekanina itakanapinina ĩkapani.

⁷ Itomaneri kãkiti sari Xoãomoni ipatxisatikona ĩkapani. Ininiã Xoão:

—Imini kãsiiri anaakorirai hĩte. Teoso misiritapitĩkai himaerekani xika. Himitekini !auari. Hinirekari hĩpatxisatiko, txamari !hinirekari hĩtakanapiniri himaerekani. ⁸ Hinirekiniãri himaerekani hĩtakanapini, ininiã hĩkamariko erekari. Ikara atoko ininiã, hõerekari Teoso atão hĩtakanapiniri himaerekani. Hãkixiniremoni !hĩxinikapiri: “Teoso apakapapitikuauako ate, kotxi ate atokirini Apraãoni txaua,” !hĩtxapeko. Ari, nota sãpiretai hĩte, Teoso nirekiniãri, iposotari ia kai soroã Apraãoni mekaniriakori ikamini. Kona Apraãoni posotari anikinii Teosomoni. ⁹ Aamina maereka iriti atoko hĩtxa. Teoso iposopeka hĩte

ixipokini. Kākiti auari ikitaite kauanari aamina maereka iriti itokini ĩkapani. Ikinika aamina maereka iriti tokaākako. Xaminaā oka inaākanako. Teoso kamakiti iua atokokana itxa. Ininiā Teoso kitaite kauanapeka, aamina kotsa sauakiko tĳkane. Iua atokokana ininiā, Teoso aiamatapeka hĳte ixipokini ĩkapani –itxa Xoāo ninoamoni.

¹⁰ –Ikara atoko ininiā, kipa akama Teoso mamisiritakanuia ĩkapani? – itxarina.

¹¹ Ininiā Xoāo apakapapireta:

–Pimāka kauanata ipĳ auiniāi, āti pisika mākatxi kauanata mauakiniti-moni. Nipokori auiniāi, pisikari nipokori mauakinitimoni –itxa Xoāo sākire.

¹² Kikiākini, txineiro apakapakani Homano auĳte nitiriakori, apoka apaka ipatxisatikona ĩkapani.

–Koerekareri, atepékana, kipa ate kama Teoso mamisiritakanuia ĩkapani? –itxarina.

¹³ Ininiā Xoāo:

–Kākiti txineirote himakatzakakito, Homano auĳte nireĳkito iaōka himakatzakako. Apikomoni !himakatzakapero –itxana.

¹⁴ Ātikaka sotatoakori apaka pimaāri:

–Atepekana, kipa ate kama amaerekani atakanapini ĩkapani?

Ininiā Xoāo:

–!Himaĳkapiri kākiti, itxineirote himixirikini ĩkapani. Kona āti maxikatiĳka ! hāpoĳtape. Hipoxokoniuatako txineiro hāpakapakitoā hĳparĳka ĳki. !Hinirekapero apikomoni –itxa sotatoakorimoni.

¹⁵ Iuasaaki kākiti iāpapanāteri Teoso mereĳkiti apokini. Ininiā Xoāo sāpiretakiti ikenakotakasaakina, ākixinireĳna ixinikarĳna:

–Xoāokani Teoso mereĳkiti txataua atxiĳti? –itxanāтана ixinikanātakitina.

¹⁶ Ininiā Xoāo:

–Āparaaānokara nipatxisatai hĳte. Nota tikini apoākari patxisataiko hĳte Erekarĳ Matamatakotiā, xaminaā pakini. Apiatakari itxaua iua. !Apakata iua takote napokini ikiti mata nimakatzakini ĩkapani, kotxi iua apiata. Nota poiāoka. Imakatzakari himaerekani, itxiko metao āki auakari arikini atoko.

¹⁷ Katakakereri āpokari ahoĳi otāta imakatzakini ĩkapani. Otāta arikaāka. Oki nĳkataāka ikiena nĳkatikoātaā. Iua atokokana Teoso nĳkatariko kākiti erekarini. Maerekati kamakani arikaākako xamina maxipoākatiā.

¹⁸ Ikara atokora itxa Xoāo sāpirena otākikinina kākiti. Isāpiretari erekari pirena Teoso pirena kākitimoni. ¹⁹ Āti otĳ Xoāo pinitari Erotxi, Karirĳia auakani auĳte:

–Pitakiniāro pitari Piripi ĳtanoro Erotxia inakoro, maerekati pikama. Apaka apikomoni maerekati pikamapitipo –itxa Xoāo.

²⁰ Ininiā iuasaaki iuaĳkana Erotxi kamari maerekati, kotxi itakari Xoāo kateia āki isākire imapokaerekatakani xika.

Xesosi Patxisatiko Pirena (Mateo 3.13-17; Marko 1.9-11)

²¹ Xoāo Erotxi maĳkini apisapanika ikinimane kākiti ipatxisatakasaaki, Xesosi apaka patxisataāka. Iuasaaki Xesosi sākirauatakasaaki Teosokata, iaxiti takaka. ²² Erekarĳ Matamatakoti katxaka Xesosi nopini. Kamao katxakini atoko itxa ikatzakini. Iuasaaki ikenakotaāka iaxitikiĳi sākire:

–Pite namarite, nitiretakiti, napokaerekatai, kotxi ninirekakiti pikama – itxa.

Xesosi Nirimaneakori Iua Apisapanika Auakani (Mateo 1.1-17)

²³ Iuasaaki Xesosi potorika iparĩkauatini Teoso ĩkapani. Trĩta anokana-nipeka itxaua iuasaaki Xesosi. Kãkiti uãkatari iua Xosee ãkiri ininiãua.

Xosee iri Erii.

²⁴ Erii iri Matatxi.

Matatxi iri Arevii.

Arevii iri Meokii.

Meokii iri Xanai.

Xanai iri Xosee.

²⁵ Xosee iri Matatxia.

Matatxia iri Amosi.

Amosi iri Naoõ.

Naoõ iri Esirii.

Esirii iri Nakai.

²⁶ Nakai iri Maatxi.

Maatxi iri Matatxia.

Matatxia iri Semei.

Semei iri Xosee.

Xosee iri Xota.

²⁷ Xota iri Xoanaã.

Xoanaã iri Hesa.

Hesa iri Soropapeo.

Soropapeo iri Saratxieo.

Saratxieo iri Nerii.

²⁸ Nerii iri Meokii.

Meokii iri Atxii.

Atxii iri Kosaã.

Kosaã iri Eomataã.

Eomataã iri Eri.

²⁹ Eri iri Xosoe.

Xosoe iri Eriesa.

Eriesa iri Xoriĩ.

Xoriĩ iri Matatxi.

Matatxi iri Arevii.

³⁰ Arevii iri Simião.

Simião iri Xotaa.

Xotaa iri Xosee.

Xosee iri Xonaã.

Xonaã iri Eriakiĩ.

³¹ Eriakiĩ iri Mereaa.

Mereaa iri Mena.

Mena iri Matata.

Matata iri Nataã.

Nataã iri Tavii.

³² Tavii iri Xesee.

Xesee iri Opetxi.

Opetxi iri Póasi.

Póasi iri Sáomõ.

Sáomõ iri Nasoõ.

³³ Nasoõ iri Aminatapi.

Aminatapi iri Átximĩ.

Átximĩ iri Anii.

Anii iri Esirõ.

Esirõ iri Péresi.

Péresi iri Xotaa.

³⁴ Xotaa iri Xakoo.

Xakoo iri Isaki.

Isaki iri Apraão.

Apraão iri Tera.

Tera iri Nakoo.

³⁵ Nakoo iri Seroki.

Seroki iri Hakaao.

Hakaao iri Pareki.

Pareki iri Epi.

Epi iri Sara.

³⁶ Sara iri Kainaã.

Kainaã iri Apaxatxi.

Apaxatxi iri Seĩ.

Seĩ iri Noee.

Noee iri Arameki.

³⁷ Arameki iri Metosareẽ.

Metosareẽ iri Enoki.

Enoki iri Xaretxi.

Xaretxi iri Marereo.

Marereo iri Kainaã.

³⁸ Kainaã iri Enosi.

Enosi iri Setxi.

Setxi iri Adão.

Adão iri Teoso. Imapotökirepe.

4

Satanasi Nirekari Xesosi Kaminiri Maerekati

(Mateo 4.1-11; Marko 1.12-13)

¹ Xesosi ipatxisatiko atoko, Erekarı Matamatakoti iteene sikaposotiiretari iua. Erekarı Matamatakoti txĩkitakari Xesosi uini Xotão itakanapini, ãparaã makipakaniãtaã isini ikapani. ² Iuaã koarẽta õti auakasaaki, Satanasi atamakaerekatari Xesosi. Koarẽta õti manipokotakatatinoka itxa Xesosi. Ininiã natxinoka itxa Xesosi.

³ Ininiã Satanasi txari:

—Pite Teoso ãkiri pitxaua, ininiã ia kai soro komiri pitxĩkitaka —itxari Xesosi.

⁴ Ininiã Xesosi apakapapiretari:

—Kona, kotxi Teoso sãkire iõkatsopatakori txari:

Kona komirinanini txĩkitakari kãkiti ãtipirika auini tĩkane. Ikinika Teoso sãkirena txĩkitakari kãkiti ãtipirika auini tĩkane.

⁵ Ininiã iuasaaki Satanasi anikari Xesosi ixirata nopinixiti. Iuaã pakoteri oerekiniri ikinimane tixine. ⁶ Ininiã Satanasi:

—Nota posotari nisikinii ikinimane auĩtetxiakori posotiire. Ikinipoko ninoa txineirote apaka niposotari nisikinii. Merepitipanika notamoni isikaãka ia posotiiretxi, ininiã nota sikari ninirekaãkitimoni. ⁷ Ikara atoko ininiã, piteosonetiniãno, ia posotiiretxi nisikai pite —Satanasi txari Xesosi.

⁸ Ininiã Xesosi:

—Konapitini. Pisipeka Satanasi. Teoso sãkire iõkatsopatakori txari:

Apiananiri piTeosone. Iuanokara piteosoneta. Iua ikapaninokara pi-parĩkauatako.

⁹ Eereka Satanasi anikari Xesosi Xerosareẽmoni, aiko Teoso misãkiretiko nopinixiti. Itanoxiti paĩtanori. Pamonõkoniri. Iuaã itxari:

—Teoso ákiri pininiáua, pokaua xiti. Ininiá ikinipoko kákiti imarotariko Teoso ákiri pininiáua, ¹⁰ kotxi Teoso sákiere iókatsopatakori txari: Teoso iokanatanako iniritiakori iaxitikiñi pite iníkatiniña tíkane.

¹¹ Ninoa maí kai pimapinakani tíkane, ininiá pikarouatini !auari. Kona kai soro karofari pikiti, itxa Teoso sákiere —Satanasi txari Xesosi.

¹² Ininiá Xesosi:

—Teoso sákiere iókatsopatakori apaka txari: Kona patamakaerekatapiri Apiananiri piTeosone, —itxari.

¹³ Iuasaakipeka Satanasi atamakaerekatiniñi Xesosi xipope. Ininiá itakanapari Xesosi áti óti iuaíkana ikanapiriñi iuamoni íkapani.

Xesosi Mipotorikari Iparíka Kariréia Tõpa

(Mateo 4.12-17; Marko 1.14-15)

¹⁴ Ikara inaáka atoko Xesosi kanapiriá Kariréia tõpa auakanimoni. Paposotiireri, kotxi Erekarí Matamatakoti auari iuakata. Iua pírena iaripireta íkini Kariréia tõpa auakanimoni. ¹⁵ Iua oerekarauata aiko áki Xoteo apotiitiniátaáua. Ininiá ikinimane txari:

—Peerekari iua, kotxi erekapitikari iua sápiretakiti —itxana.

Nasaree Auakani Kona Auikari Xesosi Sákiere

(Mateo 13.53-58; Marko 6.1-6)

¹⁶ Eereka Xesosi sari Nasaree sitatxitimoni. Iuaá Xesosi aneé mitxi. Xoteo tomatini ótisaaki Xesosi itotapekari aiko Xoteo apotiitiniátaáua isini. Ininiá iuasaaki, Xoteo tomatini ótisaaki isari iuaá. Iuaátaá itima Teoso sákiere iókatsopatakori atatsopatini íkapani. ¹⁷ Teoso sákiere sápiretakari Isaía iókatsopatakiti tsopa isikaáka. Ininiá imatakireéeri aátsopa. Ia Teoso sákiere inita, atatsopata itxa:

¹⁸ —Erekari Matamatakoti notakata aua, ininiá Apiananiri mereéno nota matxineirotenimonikari erekari pírena nisápiretini íkapani. Iokanatano kateia áki auakani nisikakini íkapani. Iokanatanano mósiárenimoni iuaíkana atamarauatinina íkapani. Iokanatanano misiritakonimoni, ninoa misiritakani nixipokini íkapani.

¹⁹ Ipaniátano kákiti nisápiretini: “Íkorakanani Teoso apokapeka kákiti maerekani imaktxakini íkapani, imapinakanina tíkane.” Ikara atatsopata Xesosi.

²⁰ Aátsopa iapirikaáka atoko, sika itxari sasetotxi nitirimoni. Ikara inaáka atoko Xesosi topáka. Imakinika kákiti aiko Xoteo apotiitiniátaáua áki auakani, imakinikana atamatari Xesosi, isápiretakiti kinírão kenakotaka inakani.

²¹ Ininiá Xesosi sápiretana:

—Ikara Teoso sákiere híkenakotakiti apokapeka uatxa —itxa ninoamoni.

²² Ikinimane kákiti sápirenauata Xesosi ereka inini. Itsoríkañátana isákiere erekari íkenakotakasaakina:

—Kiátokopa ininiápa imarotatari ikara atoko inakari isápiretini? Kotxi Xosee ákirira iua, minakati ákirira iua —itxanátana.

²³ Ininiá Xesosi txana ninoa:

—Atxiíti híte txanoka nota imatiretxi kitxakapiríka kiomátxiakori sákiere. Ninoa txari: “Pinítxi imarotakari pininiáua, piteka pipitaua.” Atxiíti híxinikanátari: Kapanaoó sitatxiti nauakasaaki, nikamari posotiiretxi iuaátaá. Kinirepá na nikamatari posotiiretxi uai nauiniátaá? Ikara atoko atxiíti híxinikanáta. ²⁴ Atáo nisápiretai, kákiti Teoso sákiere sápiretakari inirimane sauaki auakasaaki, inirimane !auikari isákiere. Ia xika kona nikamari posotiiretxi uai. ²⁵ Atáopitika nisápiretai híte. Kitxakapiríka Teoso

sãkire sãpiretakari Eríasi inakori auakasaaki, ipi áti pakini ano ipixini ano pakini áparaã !ikipa. Iuaã Isaeo tixini natxinoka auã. Iuasaaki kaiãopokoro sitoakoro tikinitakoro auari iuaãtaã. ²⁶ Iuaritika Teoso !iokanatarí Eríasi ninoa ikininapemoni. Iokanatarí átoka sitomoni tikinitakoromoni, nipokori isikiniro íkapani. Oa sito auã Sarepita sitatxiti Sitoõ tõpa, Isaeo tixini takote. Xoteo !otxaua oa.

²⁷ —Íkara atokotxikana itxa Teoso sãkire sãpiretakari Eriseo inakori. Iua auakasaaki, kaiãopokori amianatakani maere matati Isaeo tixini auakani auã. Kona imakinikani erekapeka inaãkana. Kiki Naamaã inakori Síria tixini auakari, iuanokara erekapeka itxíkitakaãka. Iua Naamaã kona Xoteo !itxaua iua —itxa Xesosi ninoamoni.

²⁸ Ikinimane aiko áki apotiitakaniua, ikara ikenakotakasaakina, iteene inaiatauana. ²⁹ Ininiã ikosekaãtatarina Xesosi sitatxi mapotõkiremoni. Anikarína ixirata nopini sitatxi auiniãtaã. Iuaã inirekarina Xesosi okinina ixiratamoni ipinini íkapani. ³⁰ Txamari Xesosi napari ninoa sauaki, íkorape itxa.

*Kiki Maerekati Matamatakoti Auaãtotakiti
(Marko 1.21-28)*

³¹ Eereka Xesosi sari Kapanaoõ sitatxitimoni Kariréia tõpa. Iuaã tomatiko õtisaaki oerekana kãkiti Teoso sãkire. ³² Kãkiti iuaã auakani tsoríkaãnãta oerekakiti ikenakotakasaakina, kotxi paimatireri iua. Isãpiretakiti atãonoka itxa isãkire. ³³ Iuasaaki aiko áki kãkiti apotiitiiniãtaãua, auã kiki maerekati matamatakoti auaãtotakiti.

³⁴ Iua kiki ákixinire auakari akiripoakata:

—Xesosi Nasarekiri, kipa íkai uai? Kíãtokopa pitxataua ate? Atxiiti papoka ate pixipokini íkapani? Nõta imarotai pite. Pite maerekati mauakiniti pite. Teoso nakiti pitxaua pite —itxa maerekati matamatakoti Xesosimoni.

³⁵ Ininiã Xesosi txitari iua. !Auiritari isãkirauatini:

—Maãtako. Posipikari ere kiki —itxari.

Ininiã maerekati matamatakoti iriãkatari iua kiki ikinimane okiãtaã. Ininiã itakanapari iua, makarotika itxa kiki. ³⁶ Kãkiti iuaãtaã tsoríkaãnãta. Imisãkiretakauana:

—Íkora kiki paposotiireri isãkire. Itapararitika ipaniãtari maerekati matamatakoti sini, ininiã nõkorape itxapena maerekani matamatakoni.

³⁷ Ininiã Xesosi pirena iua tõpa iaripireta.

*Xesosi Makananitaro Simão Petro Imakiro
(Mateo 8.14-17; Marko 1.29-34)*

³⁸ Eereka Xesosi potorika aiko Xoteoakori apotiitiiniãtaãua. Simão aapokomoni isa. Iuasaaki Simão imakiro iteene oãpoomata. Ininiã amanaãrina Xesosi oa erekape iníkitakini. ³⁹ Ininiã ipapíka oamoni:

—Nipaniãtari apoomari iotokini —itxa.

Ininiã apoomari iotoka. Iuasaakipeka oa õkitikaua, nipokori osikana ninoa.

*Xesosi Makananitana Amianatakani
(Mateo 8.16-17; Marko 1.32-34)*

⁴⁰ Atokatxi ereëkokaãpotapeka inakasaaki, kãkiti anikana amianatakani ikinipoko amianari auakini, Xesosimoni. Itakari iuako amianatakani nopini. Iuasaakipeka ninoa erekapeka itxana. ⁴¹ Omitikari maerekati matamatakoti kãkiti itõã auakari apaka. Osipikasaakina, akiripoakatana:

—Pite Teoso ákiri pitxaua.

Ininiã Xesosi txitana ninoa. !Auiritaikana akiritinina, kotxi ninoa imarotari Teoso mereëkiti ininiãua Xesosi.

*Xesosi Sāpiretari Erekarī Pirena**(Marko 1.35-39)*

⁴² Katimatiniŋkata Xesosi sari kākiti mauakaniātaā. Iuasaaki kākiti nitanātari iua. Apokasaakirina, amanaārina Xesosi:

—Pikaikota atekata —itxarina.

⁴³ Txamari Xesosi txari:

—!Apakata uai nikaikotini, kotxi ātiātaā apaka nisāpiretariko erekari pirena Teoso auītetxi ininiāua pirena. Ikinimanemoni ikara nisāpiretini ikapanira, Teoso iokanatano kākitimoni.

⁴⁴ Ikara atoko ininiāra, isāpirenauata ikininape aiko āki Xoteoakori apotitiniātaāua ikinipoko Xoteoakori tixine.

5*Merepitipanika Xesosi Moianariakori**(Mateo 4.18-22; Marko 1.16-20)*

¹ Āti ōti Xesosi auanāta Xenesaree inakori poa tinikata. Xenesareetxikana Kariréia poa. Ipi iuāka aua. Iuasaaki kākkitipokoni ākitari iua Teoso sākire ikenakotinina ikapani. Iuakatapeka xāpoka itxana. ² Iuasaaki Xesosi atamatari ipi kanaua ioporoko. Kokatsaāriri kanauate. Ninoa imiriī arokanātari hetxi.

³ Xesosi iereētua Simāo kanauate āki:

—Pikatika pikanauate amaātiki apanīkakiā —itxa Simāomoni.

Eereka iitopāka kanaua āki. Iuaātaā isāpiretari Teoso sākire kākitimoni imiriī apotiitakanimoni.

⁴ Isāpirenauataka atoko itxari:

—Apanīkakiā pimekota. Iuaātaā pitakari hetxi kāuaāriā —Xesosi txari Simāo.

⁵ Ininiā Simāo:

—Koerekereri, hetxi atakapikama iŋkanōka. Iteene aōkatsaākatapiikama. Txamari na xatiki ximaki amaīka. Kona ātika amaīka. Iuaritika pite paniātiniāno, iuaritika nitakapitikariko hetxi —itxa Simāo.

⁶ Hetxi ninoa takasaaki kāuaāriā, ximakipokoni imaīkana, ininiā hetxi tsorakiarita. ⁷ Ikara xika akiritana imoianariakori āti kanauate āki auakani: —Āpina. Himoianataua ate. Hetxi tsorakiāpotanapanoka.

Ininiā ninoa ina. Ikinimane kosekari hetxi. Ximakipokoni. Ipi kanaua xāpoākata ximakinoka. Ximaki xika kanaua sakikaarita. ⁸ Simāo Petro atamatakasaakiri ximakipokoni, ikapotoreēkaua Xesosi apisatoō:

—!Pikaikotape nota takote, kotxi erekai pite. Maerekati kamakarino nota —itxa.

⁹ Ikara atoko itxa Simāo sākire, kotxi iua, imoianariakori apaka tsorīkaāta kaiāopokori ximaki ninoa maīkakiti xika. ¹⁰ Simāo moianariakori Txiaiko, Xoāo pakini, ninoa apaka tsorīkaāta. Txiaiko, Xoāo pakini Sepeteo anaakori. Ininiā Xesosi txari Simāo:

—!Pipīkarauatape. !Pimaīkaikari ximaki. Ātiāo piparīka auako. Nisākire pisāpiretako kākitimoni —itxa.

¹¹ Eereka ninoa apokitaāka atoko, ikinika itiina itakanapana, Xesosikata sa itxana imiparīkatinirina ikapani.

*Kiki Maere Matati**(Mateo 8.1-4; Marko 1.40-45)*

¹² Āti ōti Xesosi auanāta āti sitatxitiā. Iuaā auakasaaki, aua kiki maere matati. Atamatakasaakiri Xesosi, ikapotoreēkaua, iāka Xesosi apisatoō. Iteene amanaāri Xesosi:

—Apiananiri, pinirekiniāri, piposotari nota ereka pitxīkitakini —itxari.

¹³ Ininiã Xesosi maãtakari iua:

—Ari ninirekapitikari. Erekapekai —itxari.

Iuasaakipeka erekapekai itxa. ¹⁴ Ininiã Xesosi paniãtari:

—! Pisãpiretapiri apanakini ereka nitxikitakinii. Pisa sasetotximoni. Po-
erekari piito uamoni, ininiãkara itxai: “Atãopitika erekapekai pite.” Eereka
pisikari Teosomoni Moisesi paniãtakiti iaõka. Ikara atoko pikaminiã, ikini-
mane imarotari pite atão ereka pininiãua —itxa Xesosi.

¹⁵ Xesosi paniãtari iua apanakini imasãpiretakani, uaritika Xesosi pirena
apikomoni iaripireta. Ininiã kãkitipokoni sari uamoni isãkire ikenakotin-
ina ìkapani, amianari imaktxakini ìkapani. ¹⁶ Ininiãkara Xesosi itotapekari
iuanoka isini kãkiti mauakaniãtaã Teosokata isãkirauatini ìkapani.

Matïpokotakati Pirena

(Mateo 9.1-8; Marko 2.1-12)

¹⁷ Åti õti Xesosi sãpirenauata. Iua takote pariseoakori, kaiõkatsoparerini
apaka topãkanãta. Ninoa Kariréia tõpakini, Xotéia tõpakini, Xerosareë sitatx-
itkini pakini. Iuasaaki Xesosi sãpirenauatakasaaki, Apiananiri sikaposotiire-
tari Xesosi amianatakani erekapeka itxikitakini ìkapani.

¹⁸ Iuasaaki kikiakori apoka iuaã. Iminarina kiki matïpokotakatinoka in-
akari. Isirimata nopini iminarina. Inirekarina aapokotxi åki ìroinina, Xesosi
apisatoõ iua matïpokotakati itakinina ìkapani. ¹⁹ Txamari ! apakata ninoa
ìroini, kotxi kãkitipokoni xãpoka. Ininiã ikanikana kanikoatxiã aapokotxi
nopini. Imaktxakarina itano auakari kipatxi kai kamakori, eereka
isikakaãpotarina iua matïpokotakati isirimata nopini Xesosi manapi kãkiti
sauaki. Xesosi apisatoõ apoka. ²⁰ Ininiã Xesosi imarotari ninoa auikiniri iua
posotiire. Ininiã itxari matïpokotakati:

—Namarite, pimaerekani makatxakapeëkaika.

²¹ Iuasaaki pariseoakori, kaiõkatsoparerini pakini tsorikaãnãta. Åkixinireëna
ninoa:

—Teosonokara posotari amaerekani imaktxakini. Maerekati Xesosi
kama Teosomoni —itxana.

²² Xesosi imarotari ninoa xinikakiti åkixinireëna, ininiã Xesosi txana:

—! Erekeri hãkixinireë ikara hixinikakiti. ²³ Nitxari iua imaerekani
nimaktxakini, txamari ! himarotari imaerekani atão nimaktxakini.
“Põkitikaua. Pitïpokota,” nininiã, ininiã himarotari nisãkire atão ininiãua,
kotxi hitikari. Niposotiire imaerekani nimaktxakini ìkapani, niposotiire iua
nõkitikini ìkapanitxikana. ²⁴ Ininiã uatxaika noerekai hite. Teoso iokanatano
nota hitari iaxitikirino ìkorapokoritimoni kãkiti maerekani nimaktxakini
ìkapani.

Ininiã ipaniãtari matïpokotakati:

—Põkitikaua. Pisirimata pikoseka, sipe pitxa paapokomoni —itxari.

²⁵ Iuasaakipeka õkitikaua. Ikinimane kãkiti okiãtaã õkitikaua. Ikosekari
isirimata, sipe itxa aapokomoni. Isikasaaki ipoxokoniuaata.

—Peerekari Teoso —itxaãpota iua.

²⁶ Ikinimane kãkiti tsorikaãta. Ipikarauatana.

—Peerekari Teoso. Mitxi ! aitikari matïpokotakati erekapeka txikitaãkari.
Peerekari uatxa aitikakiti —itxanãtana ninoa.

Mateo Pirena

(Mateo 9.9-13; Marko 2.13-17)

²⁷ Eereka Xesosi tipokoãponãatakasaaki, atamatarì kiki Arevii inakori.
Iitopãkanãta iparìkauatiniãtaã. Iuaã apakapari txineiro Homanoakori auite
paniãtakiti kãkiti åtiãtaã tiitxi anikini ìkapani. Xesosi akiritari Arevii:

—Åpina, uatxa nimoianari pitxaua —itxari.

²⁸ Iuasaakipeka Arevii òkitikaua. Ikinika itii itakanapa, Xesosikata sa itxa, Xesosi imiparĩkatini ĩkapani. ²⁹ Eereka Arevii kamari kiiniri aapokoã Xesosi ĩkapani. Kiinirisaaki aua ĩkamanere kaiãopokori. Txineiro apakapakani aua kiiniriã. Ninoa apanakinikata nipokota Xesosikata Arevii aapokoã. ³⁰ Pariseokori, ninoakata parĩkauatakani, kaiòkatsopãrerini pakini txitana Xesosi moianariakori, Xesosi txineiro apakapakanikata nipokotini xika. Ininiã ninoa txari:

—Kinirepa hĩte nipokota txineiro apakapakanikata, maerekati kamakanikata? —itxana.

³¹ Xesosi apakapapiretana:

—Kãkiti mamianatakani ! inirekari pinĩtxi siãkarimoni isinina. Amianatarinoka nirekari pinĩtxi siãkarimoni isini. ³² Iua atokokana, nota ina ĩkorapokoriti kona kãkiti “Atão inakaranoka kamakarino” ĩkapanini, kotxi ninoa uãkatarĩ atão inakaranoka ikaminina, txamari ĩkamarina atão. Kãkiti maerekati kamakani ĩkapanira nina nota uai imaerekani itakanapini ĩkapani. Nota pinĩtxi siãkari atoko inakarino nota —itxa Xesosi sãkire iusaaki.

*Nipokori Takanapiko Teoso Misãkiretiko ĩkapani
(Mateo 9.14-17; Marko 2.18-22)*

³³ Kãkiti txari Xesosi:

—Xoão kapatxisareri moianariakori itokata takanapari inikinina Teoso imisãkiretinina ĩkapani. Iua atokotxikana itxa pariseokori moianariakori. Txamari pite moianariakori ! itakanapari nipokori, iãriã, Teoso imisãkiretinina ĩkapani. Kinirepa? —itxana kãkiti.

³⁴ Ininiã Xesosi apakapapiretana:

—Kiki ĩtaniriuatini pirenasaaki erekari atxiĩti kemaĩtxitakoni manikakaniãri nipokori? ! Erekari. Ninoa poxokoniuata imoianari ĩtaniriuatini, ininiã ĩnipokotapitikana. ³⁵ Txamari ãti õti ninoa moianari maĩkaãkako, oka inaãkako. Iuasaakiko ninoa takanapari ĩnipokotini, kotxi imatinaniuatana. Iua atokotxikana nota. Nota auapanika nimoianariakorikata. ãti õti nokaãkako. Iuasaakiko ninoa takanapari ĩnipokotini Teoso imisãkiretinina ĩkapani —itxa Xesosi.

³⁶ Eereka Xesosi sãpiretari sãpirenatxi, atão inakari oerekiko.

—! Píkĩsorãkitari mãkatxi amaneri, kitxakari pitãpanetini ĩkapani. Ikara atoko pikaminiã, mãkatxi amaneri pioanata. Mãkatxi mata amaneri ĩsapekata piotsainiã, mãkatxi kitxakari tsorakita iuaĩkana. ³⁷ Kãkiti kitakari ovaã sako aamata kamakori ãki. Ovaã amanero auiniã, !otakaãka aamata kitxakari ãki. Pitakiniãro aamata kitxakari ãki, aamata tsorakita. Ovaã xikepoatamako. Sako !otxaika. ³⁸ Ovaã amanero pikitakako aamata amanero ãki. ³⁹ Ovaã kitxakaro auiniã, kãkiti ĩnirekaro amanero, kotxi: “Ovaã kitxakaro apiaerekata,” itxa.

Ikara atoko Xesosi txari kãkitimoni. Ikara sãkiretxiti Xesosi sãpireta, kotxi apanakini kãkiti itotapekari Moisesini sãkire, Teoso sãkire kitxakapirĩka isãpiretakiti, ininiã !inirekari Xesosi sãkire amaneri inakari. Ninoa mãkatxi kitxakari atoko. Sako kitxakari atoko ninoa. Ovaã kitxakaro atoko ninoa. Xesosi sãkire mãkatxi amaneri atoko. Ovaã amanero atoko itxa Xesosi sãkire.

6

*Tomatiko Õti Pirena
(Mateo 12.1-8; Marko 2.23-28)*

¹ Xoteokori tomatini õtisaaki Xesosi imoianariakorikata motipetari kikiotakari triko auiniãtaã. ĩpiripetakasaakirina, imoianariakori makatxakaãpotari

triko oki. Iuakoã ikotxokarona, ixõka itxarona otãta katxakini ìkapani, okinoka nika itxana. ² Ætikaka pariseoakori itikana imakatzakinirona:

—Kinirepa triko hìkotxoka tomatiko õtisaaki? !Auiritaãka tomatiko õtisaaki parìkauatiko —itxana.

³ Ininiã Xesosi apakapapiretana:

—Himarotari Taviini kamakiti kitxakapirìka, iua imoianariakorikata natx-itakasaaki. ⁴ Iua ìroã Teoso misãkiretikoãtaã. Iuasaaki imakatzakari komiri Teosomoni sikakori. Inikari, sika itxari imoianariakorimoni. Ninoa nikari apaka. Sasetotxinokara auiritaãka iua komiri inikinina. Apanakini !auiritaãka inikiniri. Iuaritika iua Taviini nikari. ⁵ Nota hìtari iaxitikiri posotari ikinipoko ninireèkiti nikamini tomatiko õtisaaki, kotxi Apiananiri nitxaua — Xesosi txana ninoa pariseoakori.

Motìkauakotakari Pirena
(Mateo 12.9-14; Marko 3.1-6)

⁶ Æti tomatiko õtisaaki Xesosi ìroã aiko äki Xoteoakori apotiitiniãtaãua. Oerekarauata. Iuasaaki iuaãtaã aua kiki iuako ikikomoni motìkauakotakari.

⁷ Kaiõkatsoparerini, pariseoakori apaka aua iuaã. Atamatapikarina Xesosi, atauako erekapeka itxìkitakapaniri motìkauakotakari tomatiko õtisaaki. Inirekarina Xesosi kerokiniri. Tomatiko õtisaaki iparìkauatiniã, ninoa apoitari iua. ⁸ Xesosi imarotari äkixinireëna ixinikakitina, ininiã ipaniãtari kiki motìkauakotakari:

—Põkitikaua. Äpina ikinimane okiãtaã.

Ininiã iua kiki õkitikaua, sa itxa Xesosimoni. ⁹ Ininiã Xesosi pimaãna kaiõkatsoparerini, pariseoakori pakini:

—Natokopa itxa Moisesini paniãtakiti iõkatsopatakiti tomatiko õtisaaki atão akamini? Ipaniãtataua maerekati akamini tomatiko õtisaaki? Ipaniãtataua erekari akamini tomatiko õtisaaki? Inirekatari amoianatiniri äti imap-inakani ìkapani tomatiko õtisaaki? Inirekatari aõkaniuatini tomatiko õtisaaki? —itxa Xesosi ninoamoni.

¹⁰ ! Kasãkirena ninoa kaiõkatsoparerini, pariseoakori pakini. Xesosi atamatana ikinimane.

—Piuako poerekata —itxari iua kiki.

Oerekatari iuako. Iuasaakipeka iuako erekapeka itxa. ¹¹ Pariseoakori, kaiõkatsoparerini pakini omanãkarauata. Imisãkiretakakauana Xesosi okinina ìkapani.

Xesosi Mereëna Tosi Imoianariakori
(Mateo 10.1-4; Marko 3.13-19)

¹² Æti õti Xesosi kanìka oxiratari nopini, Teoso imisãkiretini ìkapani. Ìkanõka ìkaikota iuaãtaã Teosokata isãkirauatini ìkapani. ¹³ Katimatiniãkata akiritana itomaneri imoianariakori iuamoni apokinina ìkapani. Apokasaakina, imereëna kikiakori tosi pakini kãkitimoni iokanatakini tìkane. ¹⁴ Imereëna Simãoma, (Iuãka Petro apaka.)

Ätreema, (Simão itari)

Txiakoma,

Xoãoma,

Piripima,

Patoromeoma,

¹⁵ Mateoma,

Tomeema,

Txiakoma, (Aopeo äkiri)

Simãoma, (Homano omanatakari)

¹⁶ Xotasima, (Txiako äkiri, äti Txiakoti)

Xotasi Isikariotxima (Xesosi mīkapiritakari tīkane) pakinima.
Ninoa kikiakori tosi pakini Xesosi mereēkini imoianariakori ikapani.

Xesosi Amianatakani Imakananitini
(Mateo 4.23-25)

¹⁷ Eereka oxiratarari iokirriāpotana. Ipitexitimoni apokana. Iuaā aua kaiāopokori imoianariakori. Apanakini kākiti iuaātaā aua apaka. Xotēia tōpa ikani, Xerosareē sitatxiti ikani pakini auari iuaā. Apaka auari Txiro sitatxiti ikani, Sitoō sitatxiti ikani apaka. Txiro, Sitoō pakini potxoari uiniti itinikata aua. ¹⁸ Ninoa kākitypokoni sari Xesosimoni isākire ikenakotinina ikapani, amianarena imakatzakini ikapani. Ninoa maerekati matamatakoti auaītotakini sari Xesosimoni maerekati imakatzakini ikapani. ¹⁹ Ikinimane nirekari imaātakiniri Xesosi, kotxi imaātakiniārina, apakapari Xesosi tapara amianarena sini ikapani. Ininiā ikinimane amianatakani Xesosi maātakakani iuaīkana erekape itxana.

Kirimonipa Teoso Sikatari Erekeri?
(Mateo 5.1-12)

²⁰ Eereka Xesosi misākiretana imoianariakori:
—Hīte matxineiroteni Teoso sikai erekeri. Teoso hīauite itxaua. Iua nakitiakori hītxaua.
²¹ —Hīte ikorapokoriti natxitakani Teoso sikai erekeri. Himitouatapanikako.
—Hīte ikorapokoriti txiapatakani Teoso sikai erekeri. Hāpiapoxokonitapanikako. Hīsiroatapanikako.
²² —Apanakini omanatiniāi hīte, hītari iaxitikiri sākire hāuikini xika, Teoso sikai erekeri. Atxiiti apanakini !nirekai. Atxiiti apanakini misākirepiretai. Atxiiti ninoa akiritai “maerekati kamakari” nota hītari iaxitikiri sākire hāuikini xika. Ikara atoko hinaākako.
²³ —Ninoa misiriāpotakasaakii, hīpoxokoniuatako. Himīteenekariko hīpoxokoniritika, kotxi erekeri Teoso nīkatini iaxiti itixine. Inīkatakiti hīte ikapani peerekari. Apanakini misiritinii atokokanera, ninoa atokiriakorini misiritari Teoso sākire sāpiretakani kitxakapirīka.
²⁴ —Hīte ikorapokoriti katxineiroterini misiritaākako. Mitxi papoxokonii hīte. Uatxa hīpoxokoni !auaika.
²⁵ —Hīte ikorapokoriti ikiniōtika mitouanātakanii misiritaākako. Hinatxita-panikako.
—Hīte ikorapokoriti siroatakanii misiritaākako. Himatinaniuatapanikako. Hītxiapatapanikako.
²⁶ —Ikinimane: “Peerekai pite,” ininiā, himisiritaākako, kotxi ninoa nirimane kitxakapirīkarini sāpiretari ikara atoko inakari Teoso sākire atō masāpiretanimoni —itxa Xesosi.

Kākiti Mokaiakari Tiretiko
(Mateo 5.38-48)

²⁷ Iuaīkana Xesosi sāpirenauata:
—Nōtākikai hīte nisākire kenakotakanii. Hītiretanako himokaiakari. Erekeri hīkaminana hīte omanatakani. ²⁸ Himisākiretariko Teoso erekeri hīte misākirepiretakani isikini ikapani. Himisākiretariko Teoso hīte misiritakani ikapani. ²⁹ Kākiti aritiniāi pikakota, ipinimoni pikakota iuaīkana pisikana. Kākiti anikiniāri pimāka ōtanominari, pauiritari iua pimāka kauanata apaka anikini. ³⁰ Pitii amanaākarimoni pisika inirekakiti. Kākiti anikiniāri pitii, ! pamanaāpiri iuaīkana imikanapiriiniri. ³¹ Āti tiretinii pinirekini atokotxikana, pitiretari āti.

32 —Pite tiretakaninani pitiretiniã, kinirepa Teoso sikari erekari pitemoni, pinirimanenokara pitiretakasaaki? Kotxi kãkiti maerekati kamakani apaka tiretari ninoa tirketani. 33 Pimoianatiniãna pite moianatakaninani, !apakata, kotxi iua atokotxikana maerekati kamakari moianatana iua moianatakaninani. 34 Pisikiniãro pitxineirote, pitxineirote mikanapiriãkarimoninani, !apakata, kotxi iua atokotxikana maerekati kamakani sikaro itxineirotena apanakini maerekati kamakanimoni äti öti iuaãkana imikanapiriiniro ikapani. 35 Iua atokokana na pitxape. Pitiretariko pimokaiakari. Erekari pikaminariko. Inirekiniãri pitii ipariãkauatini ikapani, pisika iuamoni. !Pimaãkapeua, pitii iuaãkana imasikakaniã. Iua atokokana hikaminiã, Teoso sikai hite iteene erekari. Iua atokokana hikaminiã, Apiananiri iaxitikiri anaakori hitxauako, kotxi iua amoniãkari kãkiti maerekati kamakani. Ninoa !isãpiretari Teoso iua ereka inini, iuaritika Teoso amoniãkana. 36 Piamoniãkariko äti, aãri Teoso amoniãkaruatini atokokana —itxa Xesosi.

Apoãretxi Pirena (Mateo 7.1-5)

37 —!Papoãtapiiri äti. Papoãtiniãri äti, ininiã pite apaka apoãtaãkako. !Pisãpiretapiiri äti ikamakiti maerekati inini, ininiãkara Teoso !isãpiretai pite pikamakiti maerekati inini. !Pixinikapinikari maerekati äti kamakiti pitemoni, ininiã Teoso !ixinikaikari maerekati pite kamakiti. 38 Piskarauatoko ätimoni, ininiã Teoso sikarauata ito pitemoni. Kaiãopokori papakapa. Atarokiri arata äki takakori atokokana papakapa. Atarokiri iõkokakori, kaiãakakori kinapakopeka iuaãkana atarokiri inopini takaãka. Xãpoãkata, ininiã katxapoãpota. Iua atokotxikana Teoso sikai kaiãopokori, ätimoni piskarauatiniã. Ätimoni piskarauatini atokotxikana, Teoso sikarauata pitemoni —itxa Xesosi.

39 Xesosi säpiretari ia säpirenatxi atão inakari oerekiko:

—Apakata äti mõsiãretii anikiniri äti mõsiãretii? !Apakata. Ninoa ipi irikako aariko äki. Ininiã nota säkire himimarotakanisaaki, kona apakata hõerekiniri äti. Hõerekiniãri äti, hikerekari. Ninoa mõsiãreni aariko äki irikakani atoko hitxa. 40 Apaiaõkarauatakari !imarotari koerekareri imarotakiti atoko. Poiãonoka imarota. Apaiaõkaruatini ixipokasaaki, iusaaki koerekareri imarotakiti atoko imarotape.

41 —Pisãpiretari äti: “Aãsoro aua poki äki,” txamari kona pimaãkatari aãtxirata pite oki äki auakari. Kinirepa ikara atoko inakari pikama? 42 Kinirepa pitxari pitari? “Nitari, notã makatxakinii aãsoro pokiã auakari,” kotxi !piposotari patamatiniiri aãtxirata piteka pokiã auakari. Pisãkire atxiiti erekari, txamari pikamakiti kona erekari. Merepitipanika pimakatxakari aãtxirata piteka pokiã auakari. Eereka piposotari patamatiniiri aãsoro pitari okiã auakari pimakatxakinii. Maerekati pite kamakiti apiata atxiiti iua aãtxirata atoko. Maerekati äti kamakiti poiãoka atxiiti iua aãsoro atoko. Iuaritika !pimaãkatari maerekati piteka kamakiti. Põtãkikari äti imaerekani itakanapini. Ikara atoko !apakata. Merepitipanika pite takanapariko pite maerekani, eereka põtãkikari äti imaerekani itakanapini —itxa Xesosi säkire.

Amãtiiri Pirena (Mateo 7.15-20; 12.33-35)

43 —Amãtiiri erekari kona iritari matximakoti. Amãtiiri matximakoti kona iritari erekari. 44 Patamatiniãri amãtiiri, pimarotari imina. Txipokori piko inakoro pinirekiniã, kona pisa inakomoni. Ova pinirekiniã, kona pisa inakomoni. 45 Kãkiti erekari amãtiiri erekari atokokana itxa. Iua erekari, ininiã erekarinoka ikama, kotxi iua äkixinireë erekarinoka aua. Kãkiti maerekati

amãitiiri matximakoti atoko itxa. Iua maerekati, ininiã ikamakiti maerekati apaka, kotxi maerekatinoka auari iua ãkixinireẽ. Iua ãkixinire ereka, ininiã isãkire ereka apaka. Iua ãkixinire maerekati, ininiã isãkire maerekati apaka, kotxi isãkire pоторика ãkixinireẽ —itxa Xesosi sãkire.

Aapokotxi Kamakari

(Mateo 7.24-27)

⁴⁶ Xesosi sãkirauatapanika:

—Kinirepa pakiritano nota “Apiananiri,” nipaniãtakiti pimakamakanisaaki? ⁴⁷ Kãkiti notamoni ìkari, nisãkire kenakotakari, nisãkire kípítakari, aapokotxi kamakari atoko itxa. ⁴⁸ Iua kamari aapokotxi. Iksakari kipatxi. Otsomori aapoko tsota ikama. Iua apokari kai, ininiã iopitìkari aapoko tsota iua kai nopini. Ininiã aapokotxi ikamakiti paikori. Áparaã apoãtakasaaki, itoròkani inokasaakiri iua aapoko, ìlakea, kotxi iua kiki atão ikamari aapoko. Iua kiki atoko kãkiti nisãkire kípítakari.

⁴⁹ —Áti kiki aapokotxi kamakari, iua iopitìkari aapoko tsota motsomotika popaiape ininiãtaã. Áparaã apoãtakasaaki, itoròkani inokasaakiri iua aapoko pakitika. Xipoka itxa. Iua kiki atoko kãkiti nisãkire kenakotakari, nisãkire mauíakati —itxa Xesosi.

7

Xesosi Makananitiniri Sotato Auíte Nitiri

(Mateo 8.5-13)

¹ Ikara sãkiretxiti isãpiretaka atoko, Kapanaoõ sitatxitimoni isa Xesosi. Iuaãtaã apoka. ² Kapanaoõ auari kiki áti uãka Homano inakori. Sota-toakori auíte itxaua iua Homano. Ipaniãtana sotatoakori seì pakini inireëkiti amaminina. Xesosi apokasaaki Kapanaoõ, iua Homano nitiri iteene itiretakiti amianata. Ipinanapanoka.

³ Iua Homano kenakopiretari Xesosi. Ininiã ipaniãtari Xoteoakori kiomãtxiakori Xesosimoni isinina.

—Hítzariko: “Homano nirekai iuamoni pisini, inítiri pimakananitini ìkapani.”

⁴ Ininiã ninoa sa itxana Xesosimoni, aõkita itxarina.

—Masa sotatoakori auítemoni. Inítiri amianata. Masa, pimakananitiniri ìkapani. Iua Homano erekari itxaua, ininiã erekapitìkari pimoianatiniri iua. ⁵ Itiretari Xoteoakori. Aiko aãpotiitiniãtaãua ikaminau ate, ininiã iua Homano erekari itxaua —itxana ninoa.

⁶ Ininiã Xesosi sari ninoakata. Iua Homano aapoko takote apokasaaki, iua Homano iokanatarì imoianariakori Xesosimoni, isãpiretinirina ìkapani:

—Apiananiri, apikomoni !pisi, kotxi minakati nota. Pite Apiananiri txaua. Nota apakapiniã naapoko ãki !apakata. ⁷ Nota pitemoni napokini !apakata, kotxi pite Apiananiri, nota poiãori. Ininiãkara ereë píotoka. Ereëkarako pitxìkitakariko ninitiri ereka inini. ⁸ Nota auíte paniãtiniãno nota ipaniãtakiti nikamini ìkapani, ininiã nikamapitìkariko. Nota auítetxi nitxaua apaka. Nota paniãtakiti sotatoakori kamapitika. Áti nipaniãta: “Pisa,” ininiã iua sa. Áti nipaniãta: “Uai pina,” ininiã iua ina. Ninitiri nipaniãta: “Ia pikama,” ininiã iua kamari. Ininiã nimarotari ereë pite paniãtiniãri ninitiri ereka inini, ereëkarako erekapeka pitxìkitakari ninitiri —itxa Homano sãkire Xesosimoni.

⁹ Iua Homano sãkire ikenakotakasaaki, Xesosi tsoríkaãta. Isapotorika, misãkireta itxana kãkiti iuakata sikani.

—Iua Homano iteene auikari nisäkire. Peerekari. Mitxi Inaõkitari nisäkire auïäkari iua Homano atoko inakari. Na naõkitapanikari Xoteo iua Homano atoko inakari —itxa.

¹⁰ Eereka ninoã Homano iokanatakini kanapiriã Homano aapokomoni. Iuaã apokasaakina, atamatarina Homano nitiri. Erekapeka itxa.

Xesosi Txïkitakari Ipïkari Iuaïkana Auãki Inini

¹¹ Mapaõti napaãka atoko Xesosi sari Naïi sitatxitimoni. Imoianariakori, kãkitipokoni apaka sari iuakata. ¹² Imatokoã potakasaakiri sitatxi pirikere tore kãkiti Ironakikoãtaã, ipïkari imipokïkaãka sitatxi mapara. Sito imatonõkari oimi ipïpe. Oa sito tikinitakoro. Kaiãopokori kãkiti sitatxi auakani pokïka oakata sikani. ¹³ Apiananiri atamatakasaa ki ro, iamoniãkaro oa, ininiã:

—!Pitxiapatape —itxaro.

¹⁴ Isa ipïkarimoni. Imaãtakari ipïkari auini kaixati, ininiã iua kaixa anikakani iotoka. Iuasaaki iua akiritari:

—Åtokori, nipaniãtai põkitikaua —itxa Xesosi.

¹⁵ Iuasaakipeka iua åtokori topãka, sãkirauata itxa. Ininiã Xesosi sikari iua inoromoni.

¹⁶ Ikinimane pïkarauata.

—Peerekari Teoso. Teoso iokanatarari isäkire sãpiretakari apiatakari atemoni. Teoso apokapeka ïkorapokoriti ate inakitiakori imoianatini ïkapani — itxanãtana ninoã.

¹⁷ Ia Xesosi pirena iaripireta ikini tõpati Xotéia tõpa. Apaka apikoxiti Xesosi pirena kenakopiretaãka.

Xoão Kapatxisareri Pimaãkiti Sãkiretxiti (Mateo 11.2-19)

¹⁸ Xoão kapatxisareri moianariakori minapiretari Xesosi pirena Xoãomoni. Eereka Xoão akiritari imoianariakori ipi:

¹⁹ —Hïsa Xesosimoni. Hïpimaãri: “Teoso mereëkitikai pite? Kãkiti iãtapanãtakitikai pite? Kãkiti iãtapanãtakiti åtikani atxiiti?” Ikara atoko hïtxako Xesosimoni —Xoão txana ninoã.

²⁰ Ininiã ninoã ipi sari Xesosimoni. Iuamoni apoka itxana.

—Xoão kapatxisareri iokanataua ate pitemoni. Ipimaãri: “Teoso mereëkitikai pite? Kãkiti iãtapanãtakitikai pite? Kãkiti iãtapanãtakiti åtikani atxiiti?” itxai —itxana.

²¹ Iuasaaki ninoã Xesosimoni apokasaaki, amianatakani kaiãopoko erekapeka itxïkitaka Xesosi. Iua omitikari maerekani matamatakoni kãkiti ïtotaã auakani. Mõsiãreni kõsiãrepeka itxïkitaka. ²² Ininiã Xesosi apakapapiretana Xoão moianariakori:

—Hïkanapiriã Xoãomoni. Hïãpiretari mixikanani uai hïtikakiti, hïkenakotakiti pakini. Hïãpiretari mitxi mõsiãreni uatxa kõsiãrepeka nitxïkitaka. Hïãpiretari mitxi matïpokotakani tïpokotapeka uatxa. Mitxi maere matati erekapeka uatxa. Mitxi makenakokini uatxa kakenakokipeka. Mitxi ipïkani iuaïkana auãki itxapekana. Hïãpiretari Xoão, nota sãpiretari Teoso iokanapirena erekari minakati mauakinimoni. ²³ Kãkiti iteene auikiniãri nota sãkire, Teoso takari erekari iuamoni. Ikara nisäkire hïãpiretari Xoão —itxa Xesosi.

Xoão Kapatxisareri Pirena

²⁴ Ininiã ninoã Xoão moianariakori sipe. Eereka Xesosi sãpiretari Xoão pirena kãkiti iuamoni apotiitakanianua.

—Kipa ïkai hïte Xoão kapatxisarerimoni hïsikasaaki åparaã makipakaniãtaã iua auakasaaki? Hïte sari iuamoni, kotxi isäkire åtinoka, Teoso sãkirenoka. Kãkiti katsotati ïtima anikakiti atoko itxa. Isäkire kita åti, isäkire uatxa åtião,

isäkire katana iuaikana ätiäo, itxaäpota isäkire. Ikara atoko litxa Xoão. ²⁵ Kipa ikai hite Xoãomoni hñsikasaaki? Hite sari iuamoni, kotxi ! inirekari tiitxi, txineiro pakini. !Kakaroneri imãka, kotxi !ikaikota auñteti aapoko. Auñteti auiniätaã kãkiti mãka peereri. ²⁶ Kipa ikai hite iuamoni hñsikasaaki? Hite sari iuamoni, kotxi iua Teoso sãkire sãpiretakari itxaua. Atão inakari Teoso sãkire sãpiretakari itxaua. Apiata iua Xoão. ²⁷ Apiata iua, kotxi kitxakapirika Teoso sãkire iõkatsopatakari sãpiretapekari Xoão pìrena:

la kiki nisäkire sãpiretakari. Niokanatarì iua kãkitimoni, pite nimereëkiti sini apisa, papokini isãpiretini ikapani, kãkiti iposope inini ikapani, itxa Teoso sãkire iõkatsopatakari.

²⁸ Iuaikana Xesosi txana kãkiti:

—Atão nisãpiretai, äti Xoão atoko inakari ! auari. Xoão apiata. Iuaritika kãkiti Teoso auñtetakari poiãori inakari apia imarotariko Teoso kamakiti ùkane —itxa Xesosi.

²⁹ Ikinimane kãkiti, txineiro apakapakani apaka kenakotakasaakiri Xesosi sãkire, imarotarina Teoso nireëkiti kãkiti kamini ikapani atão inini, kotxi ninoa sari Xoãomoni ipatxisatikona ikapani. ³⁰ Txamari pariseoakori, Teoso paniãtakiti oerekakani pakini ! inirekari Xoão patxisatinina ninoa, ininiãkara Teoso nireëkiti iaõka ! inirekana ikaminina.

Kãkiti Ìkorasaaki Auakani

³¹ Xesosi sãpirenauatapanika:

—Kiãtokopa itxana kãkiti Ìkorasaaki auakani? ³² Amarini sarauatini atoko itxana Ìkorasaaki auakani. Ninoa amarini topãkanãta tiitxi amotikoãtaã. Ipxini amarini tsoanãta. Itxana apanakinimoni: “Ate xikarauata hite serenini ikapani, txamari ! hñserena. Kãkiti ipikasaaki xikariti axikareta, txamari ! hñtxiapata.” Ninoa amarini sarauatini atoko itxana Ìkorasaaki auakani,

³³ kotxi Xoão kapatxisareri apoka Ìkorapokoriti. Itakanapari inikini Teoso imisäkiretini ikapani. ! Iãtari ovaã. Iuaritika hite txari: “Maerekati mata-matakoti auaiõtari Xoão,” hñtxari. ³⁴ Nota hñtari iaxitikiri apoka Ìkorapokoriti. ! Nitakanapari ninikini. Ikinioñtika ninipokota. Niãtari ovaã. Ininiã hite txari: “Tua kiki ixori. Poãtakari iua. Iua moianatana txineiro apakapakani, kãkiti maerekati kamakani,” himisäkirepiretano. ³⁵ Paimatireri Teoso. Iua nakitiakori imarotari isäkire atão ininiua —itxa Xesosi.

Sito Arokari Xesosi Kiti Oãtsaã

³⁶ Äti õti pariseo Simão inakori aiatarì Xesosi inipokotini iuakata, ininiã Xesosi sari iua aapoko. Iuaã apoka atoko iitopãka inipokotini ikapani. ³⁷ Simão auini sitatxiti oãua sito kanokarero. Oa kenakopiretari Xesosi iua pariseo aapoko inipokotini, ininiã oa anikaro kamariãro iuamoni. Kopitipaki kai arapãstiro kamakori ãki oãua kamariãro. Xãpoka. ³⁸ Otima Xesosi kiti takote. Otxiapanãta. Oãtsaã oãrokari ikiti. Okaxipokari oiãkoã. Ikiti oãpitxoka. Eereka okitakari kamariãro ikiti nopini.

³⁹ Iua Simão atamatakasaakiro Xesosi kiti oãrokini, ãkixinireë ixinikari:

—Xesosi atão Teoso sãkire sãpiretakari inaãkamako, imarotamaroko oa sito iua mãatakakaro. Imarotamaroko maerekati kamakaro oa —itxa ãkixinireë.

⁴⁰ Ininiã Xesosi:

—Simão, ninirekari nimisäkiretinii —itxa.

—Ei, koerekareri, pisãkirauata —itxa Simão.

⁴¹ Ininiã Xesosi:

—Ipi kiki apakapari txineiro sikakari txineirote. Imikanapiriãpanikaroko txineiro isikakito. Äti apakapari isikakito txineiro kaiãopokoro, kiëtosi txineirota. Ätipekana apakapari isikakito poiãonoka, sikoëta txineirota. ⁴² Ninoa ipi liposotaiakarina iuaikana txineiro isikinirina txineiro sikakarimoni, kotxi

!oãuauka. Iuaritika iua xipokari ninoa kôtane. !Inirekaikaro itxineirote. Ininiãkara ìkiripa ninoa kiki ipi apia apokaerekatari iua txineiro sikakari? – Xesosi pimaãri Simão.

⁴³ Ininiã Simão:

–Niuãkatari kiëtosi txineirota apakapakari. Iua apia apokaerekatari txineiro sikakari, kotxi iua apakaparo kaiãopokoro txineiro –itxa.

–Iuapitikara –itxa Xesosi.

⁴⁴ Iuasaaki Xesosi saporika sitomoni. Itxari Simãoomoni:

–Patamatataro oia sito? Niïroã pite aapoko, txamari kona pite sikano ãparaã nikiti narokini ìkapani. Oia arokapekari nikiti oãtsaã. Oiãkoã okaxipokari. ⁴⁵ Uai napokasaaki kona pite apitxokano. Oia !iotoka nikiti oãpitxokini. ⁴⁶ Pite na takari iïtxi nikiiã. Oia kitakari kamariãro nikitiã.

⁴⁷ Oia iteene turetano, ininiã aimarotari omaerekani kaiãopokori makatxakaãkapeka. Kãkiti poiãonoka turetakasaakino, aimarotari imaerekani poiãonokari makatxakaãkapeka –itxa Xesosi.

⁴⁸ Iuasaaki Xesosi sãpiretaro:

–Nimakatxakapekari pimaerekani –itxaro oa sito.

⁴⁹ Xesosikata nipokonãtakani ãkixinireëna ixinikanãtarina:

–Kiripitipa ia kiki atxiiti? Iua makatxakatari kãkiti maerekani? – itxanãtana ninoa.

⁵⁰ Iuasaaki Xesosi txaro oa sito:

–Atão pauikari nisãkire, ininiãkara pimaerekani makatxakaãkapeka. Pispiniikaua erekaxinirepeka pinini –itxaro oa.

8

Sitoãkini Xesosi Moianatakani

¹ Mapaõti napaãka atoko Xesosi sari ãti sitatxitimoni, ininiã eereka ãti sitatxitimoni isa, itxaãpota. Isãpiretari erekari pirena Teoso auïtetxi ininiãua. Imoianariakori tosi pakini sari iuakata. ² Sitoakoro apaka sari iuakata. Mitxipe Xesosi erekapeka txìkitakana ninoa sito. Mitxipe ãtikaka amianata. Mitxipe maerekati matamatakoti auaïtotana ãtikaka. Maria Matarena inakoro sari iuakata. Mitxipe Xesosi omitikana maerekani matamatakoni setxi pakini oiãoã auakani. ³ Xoana inakoro, Kosa inakori tanoro, oa apaka sari Xesosikata. Kosa parìkauata auïtetxi Erotxi inakorikata. Erotxi paniãtakiti ikama. Sosana inakoro apaka sari Xesosikata. Apanakini sitoakoro apaka sari iuakata. Ninoa sikari itxineirotena Xesosimoni, imoianariakori pakimoni nipokori iamotinina ìkapani.

Katarereri Pirena

(Mateo 13.1-9; Marko 4.1-9)

⁴ Kãkitipokoni apokaãpota Xesosimoni, ãti sitatxitikini, iuaikana ãti sitatxitikini, iuaikana ãti sitatxitikini txaãpota apokinina Xesosimoni. Kãkitipokoni apotiitakasaakia Xesosikata, Xesosi sãpiretana ninoa sãpirenatxi atão inakori oerekiko.

⁵ –Kiki sari ikikiote itakarautini ìkapani. Triko oki itaka. Okaãpotari. Okaãpotakasaakiro, kimaporiã apaka oãpoka oki okakiti. Eereka oki katxarataãka. Apanakini kotipiriki nika. ⁶ Oki apoka kai nopini. Kai auiniãtaã kipatxi poiãonoka auari. Eereka ipitxaka, txamari pitxakakaro kotsa imiti masikaniã, ãparaã mauakaniã, opina. ⁷ Triko oki apoka inako sauaki apaka. Eereka inako aneë takarikata, txamari inako matxorotakaro takari, ininiã opina. ⁸ Oki apoka kipatxi erekari nopini apaka. Eereka takari pitxaka, aneë otxa. Eereka ominaua kaiãopokori. Triko katiã seï oki aua.

Xesosi sãkirauata iuaikana:

–Kakenakokii, ininiã hïkenakotariko nisãkire –itxa Xesosi.

Kãkiti Mimarotakiniti Xesosi Sãpiretini Pirena
(Mateo 13.10-23; Marko 4.10-20)

⁹Xesosi moianariakori pimaãri iua:

–Poerekaua ikara sãpirenatxi atão inakari oerekiko pisãpiretakiti. !Aimaro-tari mixikanani pisãpiretakiti.

¹⁰Ininiã Xesosi:

–Nisãpiretapitikaiko hïte Teoso auïtetxi ininiãua, ininiã hïte imarotari. Apanakini !imarotari hïte imarotakiti Teoso auïtetxi ininiãua. Ninoa apanakinimoni nisãpiretari sãpirenatxi atão inakari oerekiko. Ninoa kenakotari, txamari !imarotarina nisãpiretakiti sãkiretxiti, kotxi kitxakapirïka Teoso sãkire sãpiretakani sãpiretari:

Kokiri kãkiti, txamari !atamatari Teoso kamakiti. Karokokenakokiri kãkiti, txamari !ikenakotari Teoso sãkire.

¹¹–Noerekai hïte ikara sãpirenatxi atão inakari oerekiko, kiki takarauatini pirena. Triko oki atoko itxa Teoso sãkire.

¹²Apanakini kãkiti kimapori atoko itxa. Ninoa kenakotari Teoso sãkire, kimapori nopini oki apokini atoko itxa. Txamari Satanasi apoka kotipiriki apokini atoko. Imaktxakari Teoso sãkire ãkixinireëna apokakari, ininiã ninoa !auikaikari Teoso sãkire, ininiã Teoso !makatzakari ninoa maerekani.

¹³–Apanakini kãkiti kai auiniãtaã atoko itxa. Ninoa kenakotari Teoso sãkire, ininiã ipotxitarina. Txamari oki kipatxi poião nopini apokini atoko, Teoso sãkire !ïroã ninoa ãkixinireë. Mapa kasiriti ninoa auikari Teoso sãkire atxiiti. Eereka imisiritaãkana Teoso sãkire aukinina xika, ininiã itakanaparina Teoso sãkire.

¹⁴–Apanakini kãkiti inako auiniãtaã atoko itxa. Ninoa kenakotari Teoso sãkire. Eereka ninoa maerekaxinirenoka itxana. Inirekarina txineiro, tiitxi pakini. Inirekarina isarauatinina. Inako atoko itxa txineiro, tiitxi, isarauatinina, maerekaxinirenoka ininina pakini. Ininiã !ixinikaikarina Teoso. Oki inako sauaki pitxakakaro !ominaua. Iua atokokana, ninoa kãkiti !ikamari erekari Teoso !kapani.

¹⁵–Apanakini kãkiti kipatxi erekari atoko itxa. Ninoa kenakotari Teoso sãkire. Teoso sãkire !roã ninoa ãkixinireë ikaikotini !kapani. Erekari ninoa ãkixinire. Ninoa nirekari Teoso paniãtakiti ikaminina ikiniõtika. Eereka ninoa kamapitikari erekari Teoso !kapani.

Tirikapi Pirena
(Marko 4.21-25)

¹⁶–Tirikapi ipotokaãkari iomaãtatari tirikapi kopiti ãki atxiiti? Isïkatatxi patapi itakatarari atxiiti? Konapitini. Itano itakari tirikapi, ininiã iopinikari aapokotxi ãki !roãkani atamarauatini !kapani. ¹⁷Ikinika iomaãtakori atamataãkako. Ikinika ipatakori apokaãkako, iopinikaremoni anikaãkako.

¹⁸–Erepaniko. Iteene pikenakotariko Teoso sãkire, kotxi isãkire auakiti, Teoso sãkire kïpitakari, Teoso sikari apikomoni imaroretxi iuamoni. Txamari Teoso sãkire kenakotakari, isãkire makïpitakati, imarore xapiti iuamoni auakari makatzakaãkako –itxa Xesosi.

Xesosi Inoro, Itariakori Pakini
(Mateo 12.46; Marko 3.31-35)

¹⁹Xesosi sãpirenauanãtakasaaki, inoro, itariakori pakini apoka iuaãtaã. Inirekamarina Xesosimoni apokinina, txamari kãkitipokoni ãkitari iua.

²⁰Iuasaaki kãkiti txari Xesosi:

–Pinoro, pitariakori porikiti auanãta. Inirekarina imisãkiretinii –itxana.

²¹Ininiã Xesosi sãpiretari ikinimane:

—Teoso sākire kenakotakani, isākire kīpitakani, ninoro atoko itxauana. Nitariakori atoko itxauana —itxa Xesosi.

Xesosi Iotokakiniri Ītima
(Mateo 8.23-27; Marko 4.35-41)

²² Āti ōti Xesosi iereētaua kanaua āki imoianariakorikata. Aiatana:

—Masa ipoa ipiniā —itxana imoianariakori.

Ininiā ĩpiriātana. ²³ ĩpiriātakasaakina, Xesosi imaka. Mokatanitika ĩtima inataparata. Kataparari ĩtima apokasaaki, tsakati kataparari apaka, ininiā ierepeēpokataua. Iuasaaki kanaua āki āparaā xāpokaāpokata. Pamonoākoniri.

²⁴ Xesosi moianariakori ōpirīkari.

—Apiananiri, Apiananiri, pimereka. Apinanapanoka.

Ininiā Xesosi ōkitikaua. Ipaniātari ĩtima, tsakati pakini iotokini:

—Hīotokako —itxa.

Iuasaakipeka ĩtima, tsakati pakini iotoka. Itsoriākaāta. ²⁵ Iuasaaki Xesosi txari imoianariakori:

—Kinirepa hīte !auikano nota?

Itsoriākaākatana, ipīkarauakatana. Ninoakakarika isākirauatana:

—Kinakaripa ia kiki? Iua paniātari ĩtima, tsakati pakini iotokini, ininiā ninoa kīpitari isākire —itxakakana.

Kiki Maerekani Matamatakoni Auātotakiti
(Mateo 8.28-34; Marko 5.1-20)

²⁶ Eureka ipoa ipiniā apokana Xesosi imoianariakorikata. Ninoa porikiniātaā Karirēia tōpa. Ninoa apokiniātaā Xerasa tōpa. ²⁷ Xesosi kanikīitakasaaki, kiki apoka iuamoni. Xerasa sitatxitikiri iua. Maerekani matamatakoni auaitotari iua. Okananipe !itakaikari imāka. !Inirekari aapoko āki ikaitotini. Akauariā auanāta. ²⁸ Atamatakasaakiri Xesosi, akiripoakata. Iriākata Xesosi apisatoō. Maerekati matamatakoti akiritari Xesosi:

—Xesosi, Teoso ākiri, Apiananiri ākiri, kiatokopa pitxanoko? Namanaāi !pimisiritapeno —itxa.

²⁹ Ikara atoko itxa isākire, kotxi Xesosi paniātana maerekani matamatakoni takanapiniri iua kiki. Mitxi inirimane ĩtxikapiimari ĩto imasikani ĩkapani. ĩtxikarina iuako, ikiti kohētxiā. Txamari maerekati matamatakoti ito-tapekari imaīniri, ininiā iua kiki kapatakari kohētxi. Maerekati matamatakoti txīkitakari iua kiki mitekini kākiti mauakaniātaā.

³⁰ Xesosi aōkitakasaakiri iua kiki, ipimaāri:

—Kipa piuāka?

Ininiā maerekati matamatakoti txari:

—Nota uāka “Itori,” ninaāka —itxa.

Ikara atoko iuāka, kotxi itori maerekani matamatakoni auaitotari iua kiki.

³¹ Maerekati matamatakoti amanaāri Xesosi:

—Aariko mamapotōkire irikotimoni !piokanatapeua ate —itxa.

³² Iuaātaā auari kaiāopokori irariakori piratakoni. Inipokonātana oxiratarini nopini. Maerekati matamatakoni amanaāri Xesosi:

—Pauiritaua irariakori āki aīroini —itxana.

Ininiā Xesosi auiritana. ³³ Ininiā ninoa takanapari iua kiki. Irariakori ĩto āki ĩroāna. Iuasaakipeka ĩkinika irari miteēkata. Iokiriīkatana oxiratarini. Kāuaāriāmoni ikomoākatana, ipīpe itxana irariakori.

³⁴ Kikiakori irari piratakoni itikari irari mitekini, ininiā imitekana sitatximoni. Anikapiretarina itikakitina sitatxi auakanimoni, sitatxi mapara auakanimoni apaka. ³⁵ Ininiākara kākiti sari Xesosimoni ikamakiti imarotinina ĩkapani. Ninoa apoka iuamoni. Atamatarina iua kiki

mitxi maerekani matamatakoni auaítotakiti. Iitopákanāta Xesosi apisatoõ. Kamákepekari. Kiíkitepekari apaka. Ininiā iusaaki ninoa kákiti pikari Xesosi posotiire. ³⁶ Xesosi kamakiti itikakani sápiretari ninoa kákiti, Xesosi erekepeka itxíkitakiniri iua kiki. ³⁷ Eereka ikinimane kákiti Xerasa tōpa auakani paniátari Xesosi átiátaā isini ipíkarena xika. Ininiā Xesosi iereētaua kanaua áki ipoa iuaíkana ípiriátini íkapani. ³⁸ Iua kiki mitxi maerekani matamatakoni auaítotakiti amanaári Xesosi:

—Pauritano pitekata nisini.

Txamari Xesosi iokanatarari aapokomoni.

³⁹ —Pikanapiriā paapokomoni. Pisápiretari kákiti Teoso kamakiti pitemoni —itxa Xesosi.

Ininiā iua sari ikini aapokotxitimoni. Isápiretari ikinimane kákiti Xesosi kaminiri iua erekepeka inini.

Xáiro Amanákiti Pirena
(Mateo 9.18-19; Marko 5.25-34)

⁴⁰ Xesosi kanapiripe, ipoa ípiriátini. Apokitakasaaki, kákitipokoni apakapari Xesosi ipoxokoniritikana. Ninoa iátapanátari iua, ipiniā iua auakasaaki. ⁴¹ Iusaaki kiki Xáiro inakori apoka iuaā. Iua auítetxi itxaua aiko Xoteo apotiitiniátaāua. Apoka Xesosimoni. Ikapotoreékaua Xesosi apisatoõ.

—Masa naapoko. ⁴² Nota ákero imatonōkaro, tosi ano auakaro, opinanapanoka —itxari Xesosi.

Iuakata Xesosi sikasaaki, kákitipokoni ákitari iua, ininiā ikaiarikaāpotana kákiti.

Xesosi Māka Maātakakaro
(Mateo 9.20-22; Marko 5.25-34)

⁴³ Kákiti sauaki oāua sito amianataro. Tosi ano oamianata oārēka ! iotokinaro. Otxineirote ! auaika, kotxi okinika otxineiroteē oíkitxitapekari pinítxi siákani, txamari erekepeka otxíkitakakiri ! auari. ⁴⁴ Kákiti sauaki oāpoka Xesosi porikimoni. Omaátakari imāka mapotomatare. Omaátakasaakipeka, oārēka iotoka. ⁴⁵ Ininiā Xesosi pimaári kákiti:

—Kipa maātakano?

Ikinimane kákiti:

—!Ateni —itxana.

Ininiā Petro:

—Apiananiri, kákitipokoni ákitai. Ikinimane kákiti tikakai.

⁴⁶ Txamari Xesosi:

—Kákiti maātakapitikano, kotxi iusaaki nitapara sari iuamoni.

⁴⁷ Iusaaki oa sito imarotari Xesosi imarotiniro oa maātakiniri. Ininiā osa Xesosimoni otitinanakiniritika. Okapotoreékaua iua apisatoõ. Ikinimane okiátaā osápiretari Xesosi:

—Notara maātakai namianatiniā. Nimaátakasaakii, iusaakipeka erekepekano —otxari.

⁴⁸ Ininiā Xesosi:

—Namarite, pauikari niposotiire, ininiākara erekepekai. Pisipiniikaua erekaxinirepeka pinini —itxaro.

Xáiro Ákero Ōkitikiko
(Mateo 9.23-26; Marko 5.35-43)

⁴⁹ Xesosi sákirauanátakasaaki, Xáiro aapoko potoriákari apoka Xáiromoni.

—Pamarite !oāuaika. Pauritari Xesosi kanapiriini —itxa.

⁵⁰ Xesosi kenakotari iminapiretakiti, ininiā Xesosi txari:

—!Pipīkarauatape. Pauikari nisākire, ininiã iuaĩkana oãuapanikako pamarite
—Xesosi txari Xáiro.

⁵¹ Xesosi apokasaaki Xáiro aapoko, auiritana Petro, Xoão, Txiako, Xáiro, Xáiro İtanoro pakini İroini iuakata.

⁵² Iuaãtaã ikinimane kãkiti txiapanãta. İmatinaniuatana amarini ipinini xika. İniniã Xesosi:

—!Hĩtxiapatape. !Opina. Oimakanãta —itxa.

⁵³ İniniã ninoa napetari Xesosi, kotxi imarotarina amarini ipinini.

⁵⁴ İniniã Xesosi paniãtana ninoa porikiti ipokĩkinina. Eereka Xesosi maĩkaro oa ãtokoro uako, akirita itxaro:

—Ãtokoro, põkitikaua.

⁵⁵ Iuasaakipeka iuaĩkana oa auãkipeka otxa. Oõkitikaua. Xesosi paniãtana oĩri, onoro pakini nipokori isikinirona. ⁵⁶ Oĩri, onoro pakini tsorĩkaãta. Xesosi sãpiretana apanakini imasãpiretakanina İkapani.

9

Xesosi İokanatana İmoianariakori Kãkitimoni

(Mateo 10.5-15; Marko 6.6-13)

¹ Xesosi akiritana imoianariakori tosi apotiitiniuana İkapani. Iuasaaki isikataparatana. Isikaposotiiretana maerekani matamatakoni iokanatinina İkapani, amianari imakatzakinina İkapani. ² Eereka iokanatana imoianariakori kãkitimoni Teoso auĩtetxi ininiãua isãpiretinina İkapani, amianatakani erekapeka itxĩkitakinina İkapani. ³ Xesosi txana ninoa:

—Hĩsikasaaiki, !hanikapiri hĩtii. Na hĩtonere !hanikape. Na sakora, na nipokori, na txineiro, na ãti himãka, !hanikape. ⁴ Kãkiti apakapakasaakii, iuaã ninoa aapoko hĩkaikota iua sitatxiti hãuakasaaki. ⁵ Kãkiti mapakapaniãi, hĩtakanapari iua sitatxiti. Hõsipikasaakiri, hĩkaxipokariko kipatxi hĩkitiãkiri. İkara oerekana iua sitatxiti auakani Teoso misiritanako ninoa, kotxi !inirekarina ikenakotinirina Teoso sãkire —itxa Xesosi imoianariakorimoni.

⁶ Eereka imoianariakori potorika. Ninoa sari ikinipoko aapokotxiti. Isãpiretarina Teoso iokanapirena erekari aapokotxiã auakanimoni. Erekapeka itxĩkitakana amianatakani ikini aapokotxiti auakani.

Erotxi Nirekari Xesosi Aõkitini

(Mateo 14.1-12; Marko 6.14-29)

⁷ Erotxi Karirẽia tõpa auakani auĩte kenakopiretari Xesosi pirena. Maerekaxiniretinoka itxa, kotxi kãkiti sãpiretari:

—Xoão kapatxisarereri iuaĩkana auãki itxapekaua. Iuara Xesosi txaua —itxana.

⁸ Apanakini sãpiretari:

—Erĩasi iuaĩkana uatxa auãki itxapekaua. Iuara Xesosi txaua —itxana.

Apanakinipekana:

—Teoso sãkire sãpiretakari kitxakapirika auakari iuaĩkana uatxa auãki itxapekaua. Iuara Xesosi txaua —itxana.

⁹ Erotxi txari:

—Notara paniãtari Xoão nopi tsotakiko, ininiã Xesosi kona Xoõoni. Kiripitipa Xesosi? ãtipirika nikenakopiretari iposotiire —itxa Erotxi.

Kinirão aõkitaka itxari Xesosi.

Sĩko Mio Kãkiti Xesosi Sikakienatini

(Mateo 14.13-21; Marko 6.30-44; Xoão 6.1-14)

¹⁰ Ninoa Xesosi iokanatakini kanapiripeka iuamoni. Ikinika ikamakitina isāpiretarina Xesosi. Eereka Xesosi anikana ninoa kākiti mauakaniātaā, Petsāita sitatxiti takote. Ninoanoka sari iuaā. ¹¹ Txamari apanakini kenakopiretari Xesosi sinimoni, ininiā kākityokoni sari iua tikini. Ninoa apokasaaki Xesosimoni, Xesosi apakapana ipoxokoniritika. Isāpiretana Teoso auñetxi ininiāua. Erekapeka itxikitakana amianatakani.

¹² Tinñitikita imoianariakori tosi pakini apoka iuamoni:

—Piokanatanana kākiti aapokotxi imatokotinimoni inipokotinina ikapani, imakinina ikapani, kotxi uai aapokotxi mauakaniātaā —itxarina Xesosi.

¹³ Txamari Xesosi txana:

—Hñtekarako sikakienatana ninoa.

Ininiā ninoa:

—Poiāonoka nipokori aua atemoni, sikonoka komiri, ipinoka ximaki pakini nokara aua. !Apakata aiomotiniri nipokori kaiāopokori kākiti asikakienatini ikapani —itxarina Xesosi.

¹⁴ Iuaātaā kikiakorinoka siko mio auakata. Xesosi paniātana imoianariakori:

—Hñpaniātari kākiti topākini, uai sikoēta, apikomoni iuaikana sikoēta, apikomoni iuaikana sikoēta, txaāpokata kākiti —itxa. ¹⁵ Ininiā imoianariakori paniātari kākiti ikara atoko iitopākinina. Ininiā ninoa topāka. ¹⁶ Iuasaaki Xesosi kosekari komiri siko, ximaki ipi pakini. Iaxiti ionakaāta, misākireta itxari Teoso:

—Peerekari ia nipokori pisikakiti —itxa.

Iuasaaki ixanakari komiri, ximaki pakini, sika itxari imoianariakorimoni, ininiā ninoa sikari kākityimoni. ¹⁷ Ikinimane nikari, kamitopeka itxana. Eereka Xesosi moianariakori amari nipokori itetakori. Ixāpokakarina kotari tosi pakini.

Petro Auikari Xesosi Teoso Mereēkiti Ininiāua

(Mateo 16.13-20; Marko 8.27-30)

¹⁸ Āti ōti Xesosi iuanani misākiretari Teoso. Eereka imoianariakori apoka iuamoni. Ipimaāna:

—Kiripa kākiti uākatano nota? —itxa.

¹⁹ Ininiā ninoa:

—Apanakini xinikakiti pite Xoño kapatxisareri pitxaua. Apanakinipekana xinikakiti pite Erāsi pitxaua. Apanakinipekana xinikakiti pite Teoso sākire sāpiretakari kitxakapirīka auakari iuaikana auāki inakari pitxaua —itxarina Xesosi.

²⁰ Ininiā Xesosi:

—Hñtepekana, kipa hñte uākatano nota? —itxa.

Petro apakapiretari:

—Pite Teoso mereēkiti kākiti iātapanātakiti pitxaua —itxa.

²¹ Ininiā Xesosi iteene pinitari ikara apanakinimoni imasāpiretakani.

Xesosi Sāpiretari Ipinini

(Mateo 16.21-28; Marko 8.31-9.1)

²² Ininiā Xesosi:

—Nota hñtari iaxitikiri iteene natatsiitariko nimisiritiko. Kiomātxiakori, sasetotxi auñteakori, kaiōkatsoparerini pakini ! inirekano nota, ininiā nokaākako. Ipi āti ōtisaaki Teoso ōkitikanoko nota iuaikana auāki ninini ikapani —itxari imoianariakori.

Xesosi Moianari Atāo Inakari

(Mateo 16.24-28; Marko 8.34-38)

²³ Eereka isāpiretari ikinimane:

—Notakata kinirāo sika pinakasaaki, piteka pinireēkiti kona pixinikape. Notakata kinirāo sika pinakasaaki, nota misiritiko atokokana pimisiri-taāka. Ia atoko pinirekiniā ikiniōtika, notakata pisapitikako. ²⁴ Pite ātipirika kaminiāri piteka nireēkitinoka, ininiā pinireēkiti xipokapitikako pitekata. Pite nireēkiti xipokiniā, nota sākire pauikini xika, Teoso iokanapirena erekari pisāpiretini xika, pite auapininiika txako Teosokata. ²⁵ Atxiiti papakapari ikinipoko tiitxi, ikini itixiti auakani tii, pinakiti ikapani. Atxiiti iua tiitxi xika kona pikūpitari Teoso sākire, ininiā kona pikaikota ātipirika Teosokata. Ikara atoko ininiā, erekari atxiiti ikinipoko tiitxi auinii? Konapitini. Api-aerekata Teosokata ātipirika pikaikotini. ²⁶ Pipētatiñāno nota, pipētatiñāri nisākire, nota kākiti itari iaxitiki pētataiko pite uai nikanapiriākasaaki. Peerekari iusaaki uai nikanapiriini ōti. Iusaaki kākiti imarotariko niposotiire, niri posotiire, initiriakori iaxitiki posotiire apaka. Teoso nitiriakori erekarini itxauana. ²⁷ Atāo nisāpiretai, apanakini hīte uatxa uai auakanii, hīpinini apisapanika himarotari Teoso auitexi ininiāua —itxa Xesosi.

*Moisesi, Eríasi Pakini Xesosi Aōkitini
(Mateo 17.1-3; Marko 9.2-13)*

²⁸ Āti semanati napaka atoko, Xesosi anikana Petro, Xoōo, Txiako pakini. Ikanīkana oxirataro nopini Teoso imisākiretini ikapani. ²⁹ Teosokata isākirauanātakasaaki, itoō ipinipo itxa, imāka ponika, kasarori. ³⁰ Iusaaki ipi kiki tokiā iuaā, Moisesi, Eríasi pakini. Isākirauatana Xesosikata. ³¹ Ninoa iotximere aua, kotxi ipotorikana Teoso tixine. Isākirauatana Xesosikata, Xesosi ipinini pirena, mapa semanati napaka atoko Xerosareē ipinini Teoso paniātakiti ikamini ikapani. ³² Iusaaki Petro, Xoōo, Txiako pakini imakanāta. Eereka imerekana. Atamatarina Xesosi iotximere. Atamatarina ninoa ipi kiki iuakata itiminina. ³³ Moisesi, Eríasi, takapiretakasaakiri Xesosi, Petro akiritari Xesosi:

—Koerekareri, erekari uai akaikotini. Makamari papiri ipi āti pakini, pite ikapani, Moisesi ikapani, Eríasi ikapani —itxa.

Txamari maxikatīika isākirauata. !Imarotari amanaākiti.

³⁴ Petro sākirauanātakasaaki, katxiāri apoka. Xesosi moianariakori pīkarauata katxiāri āki auakasaakina. Katxiāri ākitana. ³⁵ Katxiāri āki ikenakotaāka sākiretxi:

—Ere namarite, nitiretakiti. Hīkenakotariko iua sākire —itxa.

³⁶ Isākirauatata atoko Xesosi moianariakori atamatarini Xesosinani. Eereka isāpiretarina itikakitina apanakinimoni. Masākirenika itxana.

*Amarini Maerekati Matamatakoti Auañtotakiti
(Mateo 17.14-20; Marko 9.14-29)*

³⁷ Katimatiniakata iokiriitana. Iusaaki kākutipokoni apoka Xesosimoni.

³⁸ Ninoa sauaki kiki akiritari Xesosi:

—Koerekareri, patamatarini nota ākiri imatonōkari namarite. ³⁹ Ātipirika maerekati matamatakoti māikari iua. Iusaaki akiripoakata, okarakataua. Isorikipakata inamamoni. Maerekati matamatakoti kamatsiitari namarite. Poiāonoka itakanapari. ⁴⁰ Iteene namanaāpekari pimoianariakori omi-tikiniri, txamari liposotarina —itxa Xesosimoni.

⁴¹ Ininiā Xesosi txari kākitimoni:

—!Kauikareni hīte. Maerekati kamakanii hīte. Kipakinikananipa Teoso nirekatari hītekata nauini? Kipakinikananipa Teoso nirekatari hīte nimīteenekini? —itxa.

Eereka ipaniātari iua kiki:

—Pamarite pimina uai.

⁴² Iua amarini apokaãpotakasaaki, maerekati matamatakoti irikari ixiti. Amarini okarakataua. Xesosi paniätari maerekati takanapiniri amarini. Erekepeka itxĩkitakari amarini, ininiã isika iua iuaĩkana irimoni. ⁴³ Ikinimane tsoriãaata Teoso posotiire itikasaakina.

Xesosi Iuaĩkana Sãpiretari Ipinini
(Mateo 17.22-23; Marko 9.30-32)

Ikinimane tsoriãaatakasaaki, Xesosi misãkiretari imoianariakori.

⁴⁴ —! Himaxinĩkaretapiri uatxa nisãpiretakiti. Nota hĩtari iaxitikiri mĩkapiritaãkako. Nisikaãkako kãkitimoni ninoaka nirekakiti ikaminina ĩkapani —Xesosi txana ninoa.

⁴⁵ Imoianariakori kenakotari Xesosi sãkire, txamari ! imarotarina isãpiretakiti. Teoso ! nirekari ninoa imarotiniiri Xesosi sãpiretakiti iuasaaki. Ninoa pĩkari Xesosi ipimainina isãkire oerekinina ĩkapani.

Kiripa Kãkiti Apiatakari Txataua?
(Mateo 18.1-5; Marko 9.33-37)

⁴⁶ Äti õti Xesosi moianariakori ! auikakauana isãkirena, kotxi inirekarina imarotiniirina apiatakari ninoa sauaki auakari. ⁴⁷ Xesosi imarotari ninoa xinikakiti, ininiã iminari amarini ninoamoni. Xesosikata tima itxa amarini.

⁴⁸ Iuasaaki Xesosi txana:

—Papakapiniãri amarini ia atoko inakari, papakapano nota apaka. Papakapiniãno nota, papakapari niokanatakiri apaka. Iuaka poiãotakakariua hĩte sauaki, iuarako apiatakari txauako —itxa Xesosi.

Kiki Maerekani Matamatakoni Omitiãkari
(Marko 9.38-41)

⁴⁹ Xoão sãpiretari Xesosi:

—Koerekareri, ate kenakotari kiki omitikinina maerekani matamatakoni pite uãkaã. Ate sãpiretari iua kiki ikara atoko inakari imakamakani, kotxi kona pimoianarinĩ iua —itxa.

⁵⁰ Ininiã Xesosi:

—!Hĩotokakapiri ikara atoko inakari ikamini, kotxi iua kiki !omanataua ate. Iua apamonikaua ate —itxa.

Samaria Auakani !Apakapari Xesosi

⁵¹ Teoso tixine iuaĩkana Xesosi kanapiriini õti apokaãpota, ininiã Xesosi äkixinireẽ txari:

—Nisapitikako Xerosareẽmoni.

⁵² Iokanatarĩ kãkiti iua apisa, imakiniãtaã initinina ĩkapani. Ipininipokoriti ninoa kãkiti nitari imakiniãtaã aapokotxi Samaria auakani auiniãtaã.

⁵³ Txamari kãkiti iuaãtaã ĩnirekarina Xesosi apakapinina, kotxi iua nirekari Xerosareẽmoni isini. Samaria auakani omanatana Xerosareẽ auakani.

⁵⁴ Txiaiko, Xoão pakini kenakopiretari ikara ene. Iuasaaki ipimaãrina Xesosi: —Apiananiri, pinirekatari aamanainiri Teoso xamina iaxitikiri iokanatinĩ ninoamoni ixipokinirina ĩkapani?

⁵⁵ Txamari Xesosi pinitana, isãkirena maerekani xika.

⁵⁶ —Nota, hĩtari iaxitikiri kona kãkiti nixipokini ĩkapanini napoka uai. Kãkiti maerekani nimakatzakini ĩkapanira uaimoni nina —Xesosi txari Txiaiko, Xoão pakini.

Eereka ninoa sari apikoxiti apanakini kãkiti auiniãtaãmoni.

Kãkiti Xesosi Imoianatinina Nireẽkani
(Mateo 8.18-22)

⁵⁷ Xesosi imoianariakorikata saãpotakasaaki kimaporiã, kiki txari Xesosi:
—Apiananiri, pite sinimoni nota apaka sako.

⁵⁸ Ininiã Xesosi:

—Karikori aripa auini. Kakoari kotipiriki auini, txamari nota hĩtari iaxitikiiri nimakiniãtaã !auari. Pimoianatiniãno, ikara atoko pimisiritiko pinireka atxiiti? —itxa Xesosi.

⁵⁹ Xesosi txari ãti kiki:

—Notakata pisako.

Txamari iua kiki:

—Koerekareri, merepanika ninirekari niãtapiniri niri ipinini —itxa.

⁶⁰ Ininiã Xesosi:

—Ikara piparĩka pauiritari ãti kamini. Piparĩka apiari uatxa aua. Pite sari kãkitimoni. Pisãpiretanako Teoso auĩtetxi ininiãua —itxa Xesosi iuamoni.

⁶¹ ãti kikipekana txari Xesosi:

—Koerekareri, nota pimoianari nitxamauako. Mitxi pauiritano nikanapiriini nauinimoni. Nitakapiretanapana ninirimane —itxari.

⁶² Ininiã Xesosi:

—Teoso kimaporeẽ potoriãkari nirekiniãri mitxi ikamakiti iuaĩkana ikamini, !apakata iparĩkauatini aãũte Teoso ikapani —itxa Xesosi.

10

Xesosi Iokanatana Setẽta Pakini Kãkiti

¹ Ikara inaãka atoko Apiananiri mereẽna setẽta pakini kãkiti. Iokanatana ipi, iuaĩkana ipi, iuaĩkana ipi, itxaãpotana iokanatinina. Iokanatana iua sini apisapanika ikini aapokotxitimoni. Ninoa ikiiika. Apokana Xesosi apisa.

² Xesosi txana ninoa:

—Kaiãori kãkiti iposope auikiniri nisãkire, txamari !imarotarina nisãkire, kotxi !ikenakotapanirina. Ninoa kiki erekari atoko itxana. Imakinika iposope iuaã. Txamari, poiãoka parĩkauatakani aua nisãkire isãpiretinina ikapani. Ininiãkara himisãkiretariko Apiananiri kakikioteri iokanatinina parĩkauatakani iua sãkire auĩãkani apotiitinina ikapani. ³ Hĩsa. Soti auĩte anaakori ãkitimoni iokanatiko atoko, niokanatai hĩte kãkitimoni, kotxi pamonõkonina ninoa. ⁴ Txineiro !hanikape. Tiitxi !hanikape. ãti hĩkiti mata !hanikape. Kimaporiãpoã kãkiti akiritakasaaki, !hĩotokaãpotape kãkitikata hĩsãkirauatini ikapani. Hĩsapitiporiko niokanatinimoni. ⁵ Kãkiti aapoko hãpokasaaki, merepitipanika hĩtxariko: “Namanaãri Teoso, ikamaerekaxiniretinina kãkiti uai auakani,” hĩtxako. ⁶ Kaapokori nirekiniãri Teoso ikara atoko inakari ikaminana ninoa, Teoso kamapitikari hamanaãkiti. Kaapokori manirekakaniãri, hĩsãpiretana Teoso kona kamaerekaxiniretana ninoa. ⁷ Kaapokori apakapiniãri hĩte, hĩkaikotako iua aapokonoka. ãti aapoko, eereka ãti aapoko kona hĩtxaãpotapeko iua sitatxiti hãuakasaaki. Iuaã ninoa sikakiti hinikini ikapani, hiãtini ikapani hãpakapariko. !Hĩpẽtautape hãpakapiniri, kotxi hĩte nota ikapani parĩkauatakani hĩtxaua. Apakatapitika hãpakapiniri hĩparĩka ikii.

⁸ —Aapokotxiãtaã hãpokasaaki hãpakapikoã, iuaã hĩsikiko hinikako, hiãta hĩtxaãpotako. !Hĩxinikapiri ninoa sikakiti mapitxiri ininiua. Hinikariko.

⁹ Erekapeka hĩtxĩkitakanako amianatakani iuaã auakani. Hĩsãpiretana ninoa, kaiaamapekari Teoso ninoa auĩte ininiua tĩkane. ¹⁰ Aapokotxiãtaã himapakapakoniã, hĩsa kãkiti napaãporetxiã. Hĩsãpiretana kãkiti iuaã auakani:

¹¹ “Hãuiniãkiri pani akitiãkiri akaxipoka, kotxi !erekari uai, kotxi maerekati hĩkama ate himapakapakaniã. Hĩxinikariko, ate apoka uai Teoso auĩtetxi ininiãua asãpiretinii ikapani, txamari !hinirekari.” Ikara atoko hĩtxa sãkiretako

ninoamoni. ¹² Kākiti misiritiko òtisaaki Teoso misiritanako kākiti Sotoma sitatxiti auakani ninoa maerekani xika, txamari Teoso apia misiritanako iua aapokotxiti auakani hīte mapakapakani, kotxi hīte sãpiretana Teoso sãkire, iuaritika !auikarina. Kitxakapirīka Teoso sãkire sãpiretakani !isana Sotoma sitatxitimoni –itxa Xesosi.

*Kākiti Sitatxi Auakani Maerekati Matakanapakani
(Mateo 11.20-24)*

¹³ –Hīte Korasiī sitatxiti auakani inipitika atatsiitariko misirikaretxi. Hītepekana Petsáita sitatxiti auakani apaka atatsiitariko misirikaretxi, kotxi nota kamapekari posotiiretxi hīte sauaki, txamari !hítakanapari himaerekani. Ikara posotiiretxi Sitoõ sitatxiti, Txiro sitatxiti pakini auaaákamako, kākiti iuaã auakani uatxakapokoikamani itakanapamarinako maerekati ikamakitina. Ninoa sako mata ieretakamanako, atapani iitoãna itakamanako, imaerekana itakanapinina oerekinina. ¹⁴ Kākiti misiritiko òti apokasaaki, Teoso misiritariko Txiro sitatxiti auakani, Sitoõ sitatxiti auakani pakini, txamari iua apia misiritaiako hīte Petsáita sitatxiti auakani, hīte Korasiī sitatxiti auakani apaka. ¹⁵ Hītepekana Kapanaoõ sitatxiti auakani apiarini hinireka hininiãua, txamari maerekani misiritikoãtaã iuamonirako hõkapeëkako –itxa Xesosi.

¹⁶ Xesosi misãkiretana imoianariakori:

–Hīte sãkire kenakotakani kenakotari nota sãkire apaka. Hīte mapakapakani !apakapano nota apaka. Nota mapakapakani !apakapari nota uaimoni iokanatakari apaka –itxana imoianariakori.

Setëta Pakini Kākiti Kanapiriini

¹⁷ Ninoa setëta pakini kākiti kanapiriã. Poxokonoka itxakatana.

–Apiananiri, maerekani matamatakoni apaka kīpitari asãkire, pite uãkaã aiokanatakasaakina –itxarina Xesosi.

¹⁸ Ininiã Xesosi:

–Ari, nitikapekari Teoso patimari iokanatiniri Satanas, okaratxirari patimari imëkokini atoko itxa. ¹⁹ Hīkenakota. Nota sikaposotiiretai hīte imini, kaxpiro pakini hīkatxaratini. Kona ioãkai hīte. Amokaiakari Satanas pataparari, iuaritika hīposota hīokanatiniri iua, kotxi nota sikataparatai hīte. !Auari hīte karotakani. ²⁰ Hīpoxokoniuata, kotxi maerekani matamatakoni kamari hīpaniãtakiti. Apia hīpoxokoniuatako, kotxi hīuãka Teoso tixine aãtsopteë iõkatsopapeëkaika iuaã hīsini ikapani –Xesosi txana ninoa.

Xesosi Iri

(Mateo 11.25-27; 13.16-17)

²¹ Iuasaaki Erekar Matamatakoti kamapoxokonitari Xesosi, ininiã Xesosi misãkiretari Teoso:

–Niri, pitixine auakani auite pitxaua. Uai ikini itixiti auakani auite apaka pitxaua. Peerekai pite, kotxi kimarorerini, iuikakanua kona poereka pimarore. Poiãorini, miuikakanua poereka pimarore. Ari niri, ikara atoko pinireka. Ikara atoko papokaerekata –itxari iri.

²² Eereka imisãkiretari kākiti:

–Niri sikapekano ikinika. Kākiti !imarotano nota Teoso ãkiri nininiua. Nirinokara atão imarotano nota. Apaka kākiti na atão imarotari niri. Notanokara imarotari niri, kotxi iua ãkiri nitxaua. Kākiti nirekiniãri imarotini niri, nota oerekari niri iuamoni –itxa Xesosi.

²³ Eereka Xesosi aua imoianariakorikata. Ninoanani aua iuakata. Imisãkiretana:

–Teoso sikari erekari hītemoni, kotxi hīte atamatari nota kamakiti, hīte kenakotari nota sãpiretakiti. ²⁴ Nota sãpiretai hīte. Kitxakapirīka Teoso sãkire

sāpiretakani, auñtetxiakori pakini kinirāo atamataka txari hñte atamatakiti, txamari ninoa !atamatarì. Ninoa nirekari hñte kenakotakiti ikenakotinina, txamari !ikenakotarina —Xesosi txari imoianariakori.

Kiki Karotakori Tiretakari

²⁵ Kiki Moisesi sākire oerekakari apoka Xesosimoni. Inirekamari Xesosi kerokiniri isākire.

—Koerekareri, kiripa nikama Teosokata ātipirika nauini ìkapani? —itxa.

²⁶ Ininiā Xesosi:

—Kiripa patatsopata Teoso aātsopateē? Pisāpiretano Teoso paniātakiti —itxari.

²⁷ Ininiā iua kiki apakapapireta:

—Teoso paniātaua: “Pitiretariko Apiananiri pìTeosone, ikinipoko pinireēkitiā, ikini pākixinireē, ikini pitaparaxinireē, ikinipoko pixinikakitiā pakini.” Apaka Teoso paniātaua: “Piteka pitiretiniāua atokotxikana, pitiretariko āti,” itxa.

²⁸ —Atāopitikara papakapapiretano. Ikara pikaminiā, pauapika ātipirika Teosokata —itxa Xesosi.

²⁹ Txamari iua kiki !inirekari ikara atoko inakari ikamini, ininiā iua pimaāri Xesosi:

—Kiripa āti nitiretini ìkapani?

³⁰ Xesosi apakapapiretari, ia sāpirenatxi atāo inakari oerekiko isāpiretini:

—Kiki potorika Xerosareē. Inirekari Xerikoo sitatxitimoni isini. Ipixinipokoriti kītīririni maīkari iua. Iitīrīkarina imāka, itii pakini, noropata, karota, itxarina. Mauākixiniretinoka itakanaparina iua kiki. ³¹ Iuasaaki sasetotxi iāpota iua kimaporiti. Iua atamatarì iua kiki karotakori, txamari !imaākatari. Iopiriāri, napa, ìkorape itxa. ³² Eereka kiki Arevii apika mekaniri, sasetotxiakori moianatakari apoka. Iua apaka atamatarì iua kiki karotakori, txamari iua sasetotxi atokokana !imaākatari. Iopiriāri, napa, ìkorape itxa. ³³ Eereka kiki Samaria tōpakiri iāpota iua kimaporiti. Iua apoka iuaā. Atamatarì iua kiki maīkapekari, ininiā iua amonīkari. ³⁴ Iuamoni isa. Arokari ikaro ipiniā. Ipitari ikaro iitxiā. Mākatxi mataā iapirika itxari ikaro. Eereka òkitika itxari, ipira poho nopini taka itxari. Anikari kākiti imakiniātaā aikotimoni. Iuaā imoiaāri. ³⁵ Katimatinīkata isikari txineiro kaapokorimoni. Ipi ota pirata kamakori isika. “Nisipekako. Pite moiaāriko ia kiki. Apikomoni-panika txineiro pinirekiniā ikiena ìkapani, nikanapiriākasaaki niīkitxitai,” itxa Samariakiri, —itxa Xesosi Moisesi sākire oerekakarimoni.

³⁶ Xesosi pimaāri iua:

—Ipi āti kikiakori iāpota iua kimapori. Ìkiripa iua kiki kītīririni maīkakiti tiretakari? —itxa.

³⁷ Ininiā iua Moisesi sākire oerekakari:

—Ari, Samariakirinokara tiretari iua —itxa.

Ininiā Xesosi:

—Pisipe. Samariakiri kamakiti atoko inakari pikamako, kotxi iua tiretari āti.

Xesosi Motikaētarō Mata, Maria Pakini

³⁸ Xesosi imoianariakorikata sipeka. Apokana aapokotxiātaā. Iuaā sito Mata inakoro apakapana oaāpoko. ³⁹ Oītarō Maria inakoro topāka Apiananiri takote isākire okenakotini ìkapani. ⁴⁰ Mata maerekaxiniretonoka otxa oparīka ito inini xika. Ininiā osari Xesosimoni.

—Apiananiri, nitaro topākanāta ereē. Notanani parīkauanāta. Pitemoni erekari atxiiti? Pipaniātaroko notakata nipokori okamini —otxa.

⁴¹ Ininiā Xesosi:

—Mata, Mata, maerekaxiniretonokai pitxa, kotxi piparíka ito inini xika.
 42 Átinoka pikamini tükane ninireka. Maria mereëri ikara. Omereëri nota sákire okenakotini. Oa mereëkiti apiaerekata, ininiã Iniotokakaro oa nisákire okenakotini —itxa Xesosi.

11

Teoso Misákiretiko Pirena (Mateo 6.5-15; 7.7-11)

1 Áti õti Xesosi misákiretari Teoso. Ixipoka atoko átika imoianari txari:

—Apiananiri, Xoão oerekari imoianariakori Teoso imisákiretinina. Iua atokokana poerekaua ate Teoso amisákiretini. Natokopa itxa Teoso amisákiretini?

2 Xesosi apakapapireta:

—Teoso himisákiretakasaaki, ia atoko hñtxako:

“Áiri, iaxiti auakari, ate nirekari piuãka paxitiko. Anirekari ikini itixiti auakani auñtetinii pite. Pite tixine pinireëkiti kamiko atokokana, anirekari pinireëkiti kamiko ìkorapokoriti.

3 Nipokori ikiniõtika pisikauako.

4 Pimaxinikaretariko maerekati akamakiti. Maerekati atemoni kamakori amaxinikaretini atokokana, pimaxinikaretariko. Kona panikapeua aãtaerekatikomoni. Pisikakauako ate, maerekati sauaki aãuakasaaki.”

Ikara atoko hñtxako Teoso himisákiretini —itxa Xesosi.

5 Eereka Xesosi oerekana imoianariakori:

—Atxiiti apanãkana pisa pimoianari aapokomoni nipokori pamanaini ìkapani. Ininiã pakiritari iua: “Nimoianari, ipi áti pakini komiri pisikano.

6 Naõkimanere iãpotakari uatxaika apoka naapoko. Natxinoka itxape. Nipokori !uari nisikiniri,” atxiiti pitxari iua.

7 —Atxiiti pimoianari iroko ãki apakapapiretai: “!Pakirinãtapeno. Naapoko tore katoreri. Nota, namariteni apaka imakanãtape. !Niposota nõkitikiniua, nipokori nisikini.”

8 —Pimoianari itxaua iua, iuaritika atxiiti !inirekari õkitikiniua. Iuaíkana, iuaíkana pakiritiniãri pimoianari, iua õkitikapitikaua. Ikini nipokoriti pinirekakiti isikaiko, iuaíkana imakini ìkapani. Iua pimoianari na atoko itxa Teoso. 9 Ininiãkara pamanaãriko pinirekakiti, ininiã Teoso sikapitikai. Pinitariko pinirekakiti, ininiã papokapitikari. Pakiritariko Teoso, ininiã iua apakapapiretai. 10 Amanarauatakari apakapapitikari amanaãkiti. Nitarauatakari apokapitikari initakiti. Teoso akiritakari apakapapiretaãkapitika.

11 —Híte irñtxiakori, hamariteni amanainiã komiri, kaikani hñsikatana hamariteni? Ximaki amanainiãna, iminikani hñsikatana hamariteni?

12 Patari naki amanainiãna, kaxipirokani hñsikatana hamariteni? Konapitini.

13 Híte maerekati kamakani hñtxaua, iuaritika himarotari erekari hamaritenimoni hñsikini, ininiã hñri iaxiti auakari, erekarinani kamakari, iua sikapitikariko Erekari Matamatakoti hñtemoni hamanainiãri iua —itxa Xesosi.

Maerekani Matamatakoni Omitikiko (Mateo 12.22-32; Marko 3.20-30)

14 Áti õti Xesosi omitikari maerekati matamatakoti masákireti. Iua maerekati matamatakoti sipeka atoko, iua kiki mitxi maerekati matamatakoti auañtotakiti posotari iuaíkana isákirauatini. Kãkiti Xesosi kamakiti ititakani tsoríkaãña. 15 Átikaka ninoa txari:

—Satanasi, maerekani matamatakoni auñte, iuakara sikataparatarari Xesosi maerekani matamatakoni omitikini.

¹⁶ Apanakinipekana nirekari Xesosi kerokiniri, ininiã itxarina Xesosi:

—Takaõtxikari, Teoso posotiire poerekaua ate, aãtaminiri ikapani, Teoso iokanatinii ikorapokoriti aimarotini ikapani —itxarina.

¹⁷ Xesosi imarotari ninoa xinikanãtakiti, ininiã iua txana:

—Kãkiti tixine auakani, ninoakakarika inaiatakakiniãuana, ! apakata. Ixipokakakauana. Iua atokokana kãkiti aapokoã auakani inaiatakakiniãuana, ninoakakarika ixipokakakauana. ¹⁸ Iua atokokana Satanasi nitiriakori, ninoakakarika inaiatakakiniãuana, Satanasi tapara xipokako. Ikara atoko ininiã, kona atão hïte sãkire, nota iokanatinina Satanasi nitiriakori, maerekani matamatakoni, Satanasi taparaã. Ikara hïssãkire kona atãoni. ¹⁹ Hïte sãpiretano, maerekani matamatakoni Satanasi taparaã nomitika, ininiãkara kitaparaãpa hïte moianariakori omitikana maerekani matamatakoni? Ninoa omitikana maerekani matamatakoni Teoso taparaã, ininiã ninoakara oerekari !atão hïssãkire nota pirenã. ²⁰ Teoso posotiireẽ nomitikari maerekani matamatakoni. Ikara atoko ininiã, Teoso oerekai iua apokapeka hïtemoni hïauïte inini ikapani.

²¹ —Kiki pataparari ikeeko iposope inakari moiainiãri aapoko, kona kiitirikikori itii. ²² Txamari ãti kiki apiataparata inaiatiniãri, iriãkata, ininiã anikapitikari kaapokori ikeeko. Mitxi iua kaapokori sãkire: “Nikeeko auiniã, kona kamakaxakikori nitii,” itxama, iuaritika kiki apiataparatakari ïtirïkari itii. Eereka imoianariakorimoni ixanakari tiitxi.

²³ —Notakata maparïkauatakani omanatano nota. Imamoianatakaniãno, inirekari niparïka ixipokini —itxa Xesosi.

Maerekati Matamatakoti Kanapiriini Pirena

(Mateo 12.43-45)

²⁴ Iuaïkana Xesosi sãpirenauata:

—Maerekati matamatakoti omitikikosaaki, kãkiti itakanapakasaaki, isaãpota ãparaã makipakaniãtaã auiniãtaã initini ikapani. Imapokakaniãri, “Iuaïkana nikanapiriãko mitxi nauinimoni,” itxa. ²⁵ Iuaã apoka. Iua aapoko mitxi inakari iusaaki peereri. Oeretapeëkaika. ²⁶ Ininiã apana apikomoni setxi pakini maerekani matamatakoni, apia maerekanitakani. Ninoa ikinikana ïroaitotari iua kiki. Iua ïtoã aua itxana. Iusaaki oitope maerekani matamatakoni misiritari iua kiki, ininiã apiata itsii inikoriã. Mitxipe ãtinoka maerekati matamatakoti paniãtari iua maerekati ikamini. Eereka oito paniãtari iua —itxa Xesosi.

²⁷ Xesosi sãkirauataka atoko, sito iuaã kãkiti sauaki auakaro txari Xesosi:

—Pite auãkïtakakaro, pite axitakakaro, poxokoniuata, kotxi Teoso sikari erekari oamoni —otxa.

²⁸ Xesosi apakapapiretaro oa:

—Ari, inipitikara. Iuaritika Teoso sãkire kenakotakani, isãkire auïãkani, apia poxokoniuatako, kotxi Teoso sikari apikomoni erekari ninoamoni —itxa Xesosi.

Xonasi Pirena

(Mateo 12.38-42; 16.1-4; Marko 8.11-13)

²⁹ Kaiãopokori kãkiti apokaãpota Xesosi takote. Iusaaki Xesosi txari:

—Kãkiti uatxarini !erekana. Hïte nirekari noerekiniï Teoso takaõtxikare, iposotiire. Konapitini. Kona noerekai hïte. Kitxakapiriãka Teoso sãkire sãpiretakari Xonasini inakori auakasaaki, Teoso kamarã posotiiretxi. Ikara atoko inakari posotiiretxi Xonasini auakasaaki, iuaïkana ikamapanikariko. Iua posotiiretxi Teoso takaõtxikare itxapanikaua hïte ikapani. Iua takaõtxikarinoka Teoso takaõtxikare hïte ikapani. ³⁰ Kitxakapiriãka Nïnivi sitatxiti auakani imarotari Teoso iokanatiniri Xonasi ninoamoni. Iua

atokokana kākiti uatxa auakani imarotariko Teoso iokanatinino nota kākiti itari iaxitikiri ninoamoni.

³¹ —Kitxakapirika sito Sapaa auakani auite sari õtakoxiti auitexi Saromão inakorimoni imarore okenakotini ikapani. Kākiti misiritiko õti apokasaaki, oa sito txitanako kākiti uatxa auakani, kotxi uatxa uai aua Apiatakari. Iua Saromão auitexi itxaua, iuaritika uatxa uai aua auitexiakori auite. Txamari kākiti uatxa auakani !nirekari ikenakotinirina nota sākire.

³² —Kākiti misiritiko õti apokasaaki, kākiti Nínivi sitatxiti auakani txitaiko hite ìkorasaaki auakani, kotxi ninoa kenakotari Xonasi sākire. Iuasaaki itakanaparina maerekati ikamakitina. Uatxa uai aua Apiatakari. Xonasi poiãoka. Hite kenakotapekari nota sākire, txamari himaerekani !hitakanapa —itxa Xesosi.

Tirikapi Ìtotxiãkiri Pirena

(Mateo 6.22-23)

³³ Iuaikana Xesosi sãpirenauata:

—Kākiti iopotokakasaakiri tirikapi, itano itaka ikinimane ìroãkani atamarauatini ikapani. !Ikipatari tirikapi. !Iomaãtari tirikapi kopiti ãki.

³⁴ Poki tirikapi atoko itxa piito ikapani. Poki ereka inakasaaki ipinikare aua pãkixiniree. Poki maerekanisaaki, pãkixiniree mapiãriko. ³⁵ Erepaniko. Atxiiti piuãkari ipinikare pãkixiniree auini, txamari atxiiti ipiãnoka auari pãkixiniree. ³⁶ Ipinikarenoka pãkixiniree auiniã, ipiã na xatiki auinii, tirikapi iopinikinii atoko itxa —itxa Xesosi.

Pariseoakori Maerekani

(Mateo 23.1-36; Marko 12.37-40)

³⁷ Xesosi sãkirauataka atoko pariseo aiataro Xesosi:

—Manipokota naapoko —itxari.

Ininiã Xesosi sari iuakata. Apokaãka atoko, iitopãka inipokotini ikapani.

³⁸ Iua pariseo tsorikaãnãta Xesosi marokauakotakaniãua inipokotini apisa, kotxi iuasaaki Xesosi ! ikamari Xoteo kiomanekorini oerekakiti iaõka.

³⁹ Ininiã Xesosi:

—Hite pariseoakori arokari hũto, txamari hãkixinire patxikopiiri, kotxi maerekatnoka hĩkama. Kapotxinaniri hĩtxaua. Iãkoanatxi inopininoka arokiko atoko hĩtxa. Pirato inopininoka arokiko atoko hĩtxa. ⁴⁰ !Kiĩkitei hite, Teoso hũto kamakari kamari hãkixinire apaka. ⁴¹ Iãkoanatxi ãki auakari iãriã hĩsikako matxineirotenimoni. Hĩpratone ãki auakari nipokori hĩsikako matxineirotenimoni. Hĩtaretariko apanakini. Ikara atoko hĩkaminia, Teoso atamataro hãkixinire ereka inini.

⁴² —Hite pariseoakori misiritaãkako. Hite sikari ipixini hitakare kizio auakari Teosomoni Moisesi paniãtakiti iaõka. Apikõmoni hĩkama, kotxi ipixini takari kanaua ãki hitakakiti apaka hĩsika Teosomoni, oteraã, seporã hĩsika. Erekapitikamari hite sikakiti Teosomoni, txamari himisirienetari kākiti. Teoso ! hĩtireta. Erekaro ipixini hĩti hĩsikiniri Teoso. Iuakatikana erekari atão hĩkaminari kākiti. Erekaro atão hĩtoretiniri Teoso.

⁴³ —Hite pariseoakori misiritaãkako. Hite potxitari hĩtopãkini kākiti apisatoõ, aiko ãki Xoteo apotiitiniãtaãua kākiti atamatinii ikapaninoka. Nipokori sikaretikoãtaã hãuakasaaki, hite apokaerekatari kãkitipokoni paxitini hite koerekareri hininiãua.

⁴⁴ —Hite pariseoakori misiritaãkako. Akauari matakaõtxiãkoti atoko hĩtxa. Iua nopini kākiti napa imimarotakoniã, kotxi hũto peerekari, txamari hãkixinire !erekari. Akauari ãki arakakari atoko itxa hãkixinire —itxa Xesosi.

Moisesi Paniãtakiti Oereekani Maerekani

⁴⁵ Ikara sākiretxiti kiki Moisesi paniātakiti oereēkari kenakotakasaaki, omanākarauata. Itxari Xesosi:

—Koerekareri, ikara atoko pisākirauatiniā, ate apaka “maerekati kamakani” pitxataua ate —itxari.

⁴⁶ Ininiā Xesosi:

—Hīte Moisesi paniātakiti oereēkanii hītekanerako misiritaākako. Hīte paniātari kākiti hīteka paniātakiti ikaminina. Ninoa ! iposotari ikinika hīpaniātakiti ikaminina. Iminani ninoa porikiā hītakini atoko hīkamanāta hīte. ! Iposotarina anikinirina. Hīte apaka ! hīkamari hīteka paniātakiti.

⁴⁷ Hīte misiritaākako. Hīte kamari takaōtxikari peereri Teoso sākire sāpiretakanini ikatikoātaā hītakini. Txamari hīte atokiriakorinikara okapena ninoa Teoso sākire sāpiretakanini. ⁴⁸ Iuaritika hīte sāpiretari ikinimane hāpokaerekatiniri hīte atokiriakorini kamakiti. Txamari ninoara okana Teoso sākire sāpiretakanini. Hītera takari takaōtxikari peereri ninoa Teoso sākire sāpiretakanini akauariātaā, ininiā kākiti uākatari hīpaxitinina ninoani, txamari !hīkamari ninoani paniātakiti.

⁴⁹ —Paimatireri Teoso, kotxi mitxipe imarotari ninoa kamakiti tīkane. Mitxipe iua txari: “Nota iokanatanako nisākire sāpiretakani, niokanapirena aniākani pakini ninoamoni, txamari ninoa okapanikana apanakini. Imisir-itapanikana apanakini,” itxa Teoso. ⁵⁰ Kākiti uatxa auakani misiritaākako, Teoso sākire sāpiretakanini okiko xika. Teoso itixi ikamakasaakipeka ipotorika Teoso sākire sāpiretakani okiko. ⁵¹ Merepitipanika Apeo inakori okapeēka. Eereka apanakini okaāpotapeēka. Imapotōkire okakori Sakaria inakori. Teosomoni sikakori takikoātaā takote, Teoso Auini Pakitaātaā takote apaka, iuaā okapeēka Sakaria. Inipitikara nota sāpiretai hīte, uatxa auakani misiritaākako ninoa Teoso sākire sāpiretakani okiko xika.

⁵² —Hīte Moisesi paniātakiti oereēkani misiritaākako. Hīte kipatari atāo inakari Teoso iokanapirena. Hīte apaka !auikari ikara. !Hāuiritari apanakini auikiniri —itxa Xesosi.

⁵³ Ikara Xesosi sākire xika, Moisesi paniātakiti oereēkani, pariseoakori pakini tsoata, Xesosi omanatinina. Ātipirika ipimaānātapikarina Xesosi. ⁵⁴ Inirekarina Xesosi kerokiniri isākire, imaīkiko ikapani.

12

Kipatakori !Auari (Mateo 10.26-27)

¹ Kākitipokoni apotiitaua kinapokopeka, ininiā ikatxarakititakakauana. Iuasaaki Xesosi merepanika otākikana imoianariakori:

—Erepaniko pariseoakori sākire. Pamonōkoniri isākirena, kotxi ! ikamarina isākirena iaōka. Ikara imaerekanina kipataua pāo tireēkari pani koketakori atoko itxaua. Eereka imarotaāka imaerekanii. ² Ikinika seretakori oerekaākako. Ikinika kipatakori imarotaākako. ³ Ininiā ipiāpokoā pisāpiretakiti, pokamara imarotaākako. Aapokotxi katoreri āki pimaasakapiretakiti aapokotxi nopini akiritaākako iknimane imarotiniri ikapani.

Kipa Apīka? (Mateo 10.28-31)

⁴ —Nimoianariakori nōtākikapanikai hīte. !Hīpīkapiri hīte okakani tīkane. Hītonanira iposotana okinina. Hīxinire ! iposotana okinina. ⁵ Nisāpiretai hīpīkakiti tīkane. Teosora hīpīkako. Iuara posotari hīito okini, eereka iposotari iokanatinii maerekani misiritikoātaā. Ari, iuara hīpīkako.

6 –Kiripa ipi ipi āti pakini kotipiriki karone? Poiāonoka txineiro, ota ipinoka. Iuaritika Teoso ! imaxinīkaretari ātika kotipiriki. 7 Kipakinipa piāko pikiiā auakari aua? !Pimarotari. Teoso imarotapitikari, kotxi iteene inīkatarī, ininiākara !hīpīkarauatape. Kotipiriki īki poiāo, iuaritika Teoso turetari kotipiriki. Kaiāopokori kotipiriki auiniā, iuaritika hīte īki apiata, ininiā Teoso turetapatikai hīte –itxa Xesosi.

Xesosi Nakitiakori

(Mateo 10.32-33; 12.31-32; 10.19-20)

8 Xesosi sāpirenauatapanika:

–Apikomoni nisāpiretai. Kākiti ikinimanemoni: “Xesosi nakiti nitxaua nota,” inakari, iua atokokana nota hītari iaxitikiri txako Teoso nitiriakorimoni: “Nota nakitipitikara iua,” nitxako. 9 Kākiti ikinimanemoni: “Xesosi nakiti !nitxaua nota,” inakari, iua atokokana nota hītari iaxitikiri txako Teoso nitiriakorimoni: “Kona nota nakitini iua,” nitxako.

10 –Kākiti misākireporetiniāno nota hītari iaxitikiri, eereka amanainiāri Teoso ikara imaerekani imakatzakini, ininiā Teoso makatzakapitikari. Kākiti misākireporetiniāri Erekarī Matamatakoti, ! kimakatzakikori ikara maerekati ikamakiti.

11 –Hanikikosaaki aiko Xoteo apotiitiniātaūa hāpoitikoā, hanikikosaaki auītetxiakorimoni hāpoitikoā, mitxi !hīxinikapiri hīte apoitakani hāpakapapiretini. Maerekaxiniretinoka ! hītẓape. 12 Iuaaaki ninoa apoitakasaakii, Erekarī Matamatakoti sāpiretaiko hīte hāpakapapiretini īkapani –itxa Xesosi sākire.

Kiki Katxineiroteri Mīkiteti

13 Kiki kākitipokoni sauaki misākiretari Xesosi:

–Koerekareri, pipaniātari nitari sikinino nota ipixini āirini tii ipīkasaaki itakanapakiti –itxa.

14 Ininiā Xesosi:

–Naōkimanere, kona nota parīkani pirini tii nixanakini –itxa Xesosi.

15 Ininiā Xesosi misākiretana ikinimane:

–Erepaniko. ! Erekarī tiiṭxi iteene pinirekini. Kapotxinani ! hītẓape. Itomaneri tiiṭxi !itxīkitakai okanani pauini –itxa Xesosi.

16 Ininiā Xesosi sāpiretari ia sāpirenatxi atāo inakari oerekiko:

–Kiki katxineiroteri aua kikiō mitari. Itakare peerekari, kaiāopokori.

17 Ixinikaxitita ākixinireē: “Nāpa ninīkatarī nikiena? Nikiena nīkatikoātaā xapitiki. !Apakata itomaneri nikiena īkapani. Kipa nikama? 18 Ari, nimarotari nikamakiti tīkane. Nōtikariko nikiena nīkatikoātaā. Iuaīkana nikamari āti mitari. Iuaā ikinika nikiena, nitii apaka ninīkata. 19 Eereka notaka nitxauako: ‘Peerekano nota. Kaiāopokori nīkiena. Kaiāopokori nitii. Apakatapitikako kaiāopokori anokanani īkapani. Ininiā !niparīkauataika. Ninipokotako, niātako, nipoxokoniuatoko nitxako,’ ” itxa iua kiki. 20 Txamari Teoso misākiretari iua: “Kīkitei pite. Uatxa ia īkanōkati pipinako, ininiā kipa apakapatari ikinipoko pikiena, pitii apaka?” itxa Teoso.

21 –Ikara atoko itxa kākiti tiiṭxinoka xinikakari, Teoso maxinikati –itxa Xesosi ikara sākiretixiti ixipokini.

Teoso Nīkatiniua Ate

(Mateo 6.25-34)

22 Ininiā Xesosi misākiretari imoianariakori:

–Ininiākara nota sāpiretai hīte, maerekaxiniretinoka !hītẓape, hiniākiti nire, mākatxi hīretaākiti nire. 23 Nipokori, mākatxi pakininoka kona txīkitakari pauini ereka inini. Nipokori, mākatxi pakini poiāoka. 24 Hātamatarī kotipiriki. Ninoa !itakarauata. !Amarina ikiena. !Ipotetarina ikiena. Iuaritika Teoso sikakienatana ninoa. Teoso nīkatiniāri kotipiriki, inīkatapitikai hīte apaka.

Híte ĩki apiata. ²⁵ Kinirepa maerekaxiniretinoka pitxa? Pimaerekaxinirene !itxĳikitakai apikomoni āti oara pauini. ²⁶ Pimaerekaxinirene kona txĳikitakai axapitiki apikomoni pauini, ininiā kinirepa maerekaxiniretika pitxa?

²⁷ —Aāui pixinikako. Kona aāui parĳkauata. !Ikamari imāka, iuaritika aāui peereri. Kitxakapirĳka auĳteti Saromāo inakori, iteene katiiri itxaua. Kaiāori imāka ereri, iuaritika apia ereri ĩkinika aāui. ²⁸ Aāui !okanani aua. Uatxa aua. Katana ikatikata iotikaāka. Iuaritika Teoso nĳkatari aāui. Ininiā apiata inĳkakai híte. Ikamamākatapitikai. Poiāonoka híte auikari Teoso sākire. ĩkara xika maerekaxiniretinoka hĳtxa. ²⁹ Ininiākara maerekaxiniretinoka !hĳtxape. !Hĳxinikanātapiri nipokori mauakanisaaki, iāriā mauakanisaaki. ³⁰ Kākiti Teoso sākire mauiākani ĩkiniōtika maerekaxiniretinoka itxana imākana ixinikinina xika, inipokore ixinikinina xika. Hĳri imarotari himāka hinirekini, hĳkiena hinirekini. ³¹ Merepitipanika pinirekariko Teoso piauĳte ininiāua. Iua nireĳkiti pikamako, ininiā, himāka, hĳkiena apaka Teoso sikaiko híte —itxa Xesosi sākire.

Hĳparĳka ĩki Nĳkatiko

(Mateo 6.19-21)

³² —Ininiā híte ninakitiakori ! hĳpĳkarauatape, kotxi hĳri apokaerekatari isikinĳi ĩkinipoko erekari iua auĳteti ininiātaāuakiri. ³³ ĩkinika hĳti hĳvĳtxitako. Txineiro hĳsikako matxineirotenimoni. ĩkara atoko hĳkaminiā, hĳparĳka ĩki auapitika Teoso tixine. Iuaā hĳparĳka ĩki !ixipoka. Kĳtiriri !itirĳkari. Kĳiriki !inikari. Iuaā hinĳkatari hĳparĳka ĩki. ³⁴ Erekari hĳparĳka ĩki Teoso tixine auiniā, ininiākara iuaā pixinikapika. Iuaā pinirekari pauini —itxa Xesosi.

Nitiritxi Erekarini

³⁵ Xesosi sāpirenauatapanika:

—Himerekako, kamāka hĳtxako. Tirikapi hĳopotokakako. Iposope hĳtxako nĳparĳka hĳkamini ĩkapani. ³⁶ Nitiritxi ipatrāotena iātapakani atoko hĳtxako. Ipatrāotena sari ĩtanoruatakari kiiniritemoni. Initiriakori iātapari ĩkanapiriini. Apokasaaki, akiritakasaaki, pakoteri initiriakori matakakari itore ipatrāotena ĩroini ĩkapani. Ninoa nitiritxi atoko hĳtxako. ³⁷ Patrāo apokasaaki initiriakori merekapanika inakasaaki, iāpapanātakasaakiri iua, ininiākara erekapitikari. Himarotatari patrāo kamakiti? Iua ieretakari imāka iparĳkauatini ĩkapani. Ipaniātana ninoa topākini. Eereka isikakienatana initiriakori. ³⁸ Erekapitikari ipatrāotena apokasaaki imirekiniāna. Atxiĳti apanĳkanōka apoka ipatrāotena. Atxiĳti imaropirĳkata apoka ipatrāotena, iuaritika iposope itxana, ininiā erekapitikari.

³⁹ —Hĳxinikari ia. Kaapokori imarotaākamarike kĳtiriri apokini, !auiritamariko iua aapoko ĩroini itii ĩtirĳkini ĩkapani. ⁴⁰ Hĳtepekana, híte apaka iposope hĳtxako, kotxi nota hĳtari iaxitiki kanapiriāko. Iuasaaki, “!Apoka uatxa,” hinakasaaki, iua ōtipitika nota kanapiriā uai —itxa Xesosi.

Nitiritxi Erekarini, Nitiritxi Maerekati Pakini

(Mateo 24.45-51)

⁴¹ Petro misākiretari Xesosi:

—Apiananiri, ĩkara sāpirenatxi atāo inakari oerekiko pisāpiretakiti, atenani poerekini ĩkapanikani? ĩkinimane poerekini ĩkapanikani ĩkara pisāpireta? —itxa Petro Xesosimoni.

⁴² Ininiā Xesosi:

—Nitiritxi kimaroreri ipatrāote paniātakiti kamakari ia atoko itxako. Iuara apanakini nitiritxi auĳte itxaua. Iuara sikakienatana apanakini nitiritxi

nipokotiko manapi. ⁴³ Nitiritxi ipatrāote paniātakiti iaōka kamakari poxononiua ipatrāote apokasaaki, kotxi ipatrāote paniātakiti iaōka ikama. ⁴⁴ Ipatrāote auiritariko iua ikinika itii, aapoko, ikikiote pakini inīkatini.

⁴⁵ —Txamari atxiiti āti patrāo nitiri !inirekari ipatrāote paniātakiti iaōka ikamini, ipatrāote auapokotini xika. Atxiiti inoropatari apanakini ipatrāote nitiriakori, apanakini ipatrāote niteroakoro apaka. Atxiiti inipokota, kapoāro iāta, ipoāta. ⁴⁶ Ipatrāote apoka initiri mimarotakanisaaki, ininiākara initiri !iposopanika ipatrāote apakapini. Ikara xika ipatrāote misiritari iua. Eereka iokanatarari iua Teoso sākire mauīākani misiritikoāta.

⁴⁷ —Nitiritxi ipatrāote nireēkiti imarotakari makamakaniāri ipatrāote paniātakiti iposope inini ikapani, ixirokitataākako aāpitsaā. ⁴⁸ Nitiritxi ipatrāote nireēkiti mimarotakati kaminiāri maerekati, ixirokitataākako, txamari poiāonoka. Teoso sikari parīkatxi, imaroretxi pakini kākitemoni. Kaiāopokori parīkatxi, kaiāopokori imaroretxi isikiniāi pitemoni, ininiā Teoso nirekari pite iteene parīkauatini iua ikapani. Apikomoni parīkatxi, apikomoni imaroretxi isikiniāi pitemoni, ininiā Teoso nirekari pite apiata piparīkauatini iua ikapani —itxa Xesosi sākire.

Neenamtxi Xesosi Sākire Auikiko Xika (Mateo 10.34-36)

⁴⁹ Xesosi sākirauatapanika:

—Teoso misiritariko kākiti imaerekani xika. Xamina tirinini atoko itxa kākiti misiritiko. Ia itixi napoka ikara xamina tirinini nitxikitakini ikapani. Ninirekari ikara niparīka nixipokini. ⁵⁰ Nota atatsiirauatako. !Erekaxinireno. Ninirekakari natatsiirauatini katima xipokaka inini. ⁵¹ Kona neenamtxi niotokakini ikapanini napoka ikorapokoriti. Nota sākire auikiko xika neenamtxi auapitikako. ⁵² Aapokotxi āki auakani sīko. Atxiiti ipi āti pakini naiatarari ipi, atxiiti ipi naiatarari ipi āti pakini, nota sākire auikiko xika. ⁵³ Irītxiakori omanatana ninoa ākiri nota sākire auikiko xika. Ninoa ākiri omanatana iriakori. Inorotxiakoro omanatana ninoa ākero. Ninoa ākero omanatana inoroakoro. Imakirotxiakoro omanatana otiroakoro. Otiroakoro omanatana oimakiroakoro nota sākire auikiko xika —itxa Xesosi sākire.

Iaxiti Imarotiko (Mateo 16.1-4)

⁵⁴ Xesosi iuaīkana misākiretari kākiti:

—Atokatxi ereēkokinimoni ipiākaāpotakasaaki, “Āparaānapani,” hītxa. Ari, ikipapitikako. ⁵⁵ Ītima ikiitaā ikari apokasaaki ikorapokoriti, hīte: “Kamoīpani,” hītxa. Ari, kapatakapitikariko. ⁵⁶ Kamisirienererini hītxaua. Hātamatarari iaxiti, itixi pakini, ininiā himarotapitikari āparaā, kamoī pakini. Kinirepa kona hātamataro nota? Kinirepa kona hīkenakotari nisākire Teoso kamaenetakiti himarotini ikapani? —itxa Xesosi sākire.

Pimisiritiko Mereēkarimoni Pimasikani Īkapani (Mateo 5.25-26)

⁵⁷ —Kinirepa hīteka na xinikari atāo inakari hīkamini tīkane? ⁵⁸ Maerekati pikamakasaaki, āti nirekari anikini pimisiritiko mereēkarimoni. Iua anikini apisapanika, pisākiraauata iuakata atāo pikamini ikapani, ininiā iua !anikaikai pimisiritiko mereēkarimoni. Pimamisākiretakaniāri, iua anikaiko pimisiritiko mereēkarimoni. Eereka pimisiritiko mereēkari sikaiko sotatomoni. Eereka sotato takai kateia āki. ⁵⁹ Atāo nisāpiretai, kona posipikari kateia ikinika pimisiritiko mereēkari paniātakiti pimīikitxitanisaaki —itxa Xesosi.

13

Himatakanapakaniári Himaerekani, Hīpinako

¹ Xesosi sākiraauatakasaaki, kākiti iuaā auakani sāpiretari iua Kariréia auakani okiko pirena. Ninoa Teoso misākiretiko aikotiā auakasaaki, ninoa okari ipirana imaerekanina Teoso makatxakini ikapani. Ininiā iuasaaki Pirato sotatone apoka iuaā. Iuasaaki ninoa okana. ² Xesosi imarotari kākiti ākixinire xiniākiti. Ininiā ia atoko itxa:

—Hīte uākatari ninoa Kariréia auakani maerekani apiata. Ininiā, “Ikara atoko inapeēkana ninoani,” hītxa. ³ Konapitini. Nota sāpiretai hīte, himaerekani himatakanapakanisaaki, hīpinako ninoa atokokana hinaākkako — itxa Xesosi.

⁴ Ininiā Xesosi sāpiretana ninoa apanakini ipinini pirena:

—Xerosareē aua Siroee inakori aapokotxiti. Iua aapokotxi itanori irika. Irikasaaki, tesoito kikiakorini ipīpe. Hīte uākatana iuaā auakani apia maerekani itxauana? ⁵ Konapitini. Hītekanera himaerekani himatakanapakanisaaki, ninoa atokokanera hīpina — itxa Xesosi.

Piko Mina Mariti Pirena

⁶ Ininiā Xesosi sāpiretari āti sāpirenatxi atāo inakari oerekiko:

—Aua kiki. Initirikata isari ikikiote atini ikapani. Iuaātaā aua amāitiiri piko inakori mina. Iuaā apokasaaki, maritoka otxa itakare. ⁷ Ininiā itxari: “Ipikanani ātikanani pakini ninapiima. !Kariro. Ininiā erekari otokiko, kotxi kona oīriuata. Ininiā kona erekari uai okaikotini, kotxi oxipokari takari kiena kipatxi āki auakari,” itxari initiri. ⁸ Ininiā initiri: “Kona pitokapero. Nota oeretariko opatapi. Āti kipatxi erekari patari tikakata nitakapatapitaroko. ⁹ Ātikanani inakasaakiua karipeka oniniā, ereē oāua. Erekari okaikotini. Omiriuatakanisaaki, iuasaaki erekapekari otokiko,” itxa initiri — itxa Xesosi.

Tomatiko Ōtisaaki Xesosi Makananitiniro Sito

¹⁰ Tomatiko ōtisaaki Xesosi auari aiko Xoteo apotiitiniātaāua. ¹¹ Iuasaaki sito apoka. Tesoito anokananipeka ina amianaretakaro. Ia atoko otxa amianareta. Okomīkaāpota, kotxi maerekati matamatakoti amianari kamakari iroātotaro. Kona oposota oōkitikaītotiniāua. ¹² Xesosi amatakasakaikiro, itxaro:

—Sito, erekapitikaiko uatxa — itxaro.

¹³ Ininiā itakari iuako onopini. Iuasaakipeka oōkitikaītotaūa. Ininiā iuasaaki otxa:

—Peerekari Teoso. Erekari imakinika ikamakiti — otxa.

¹⁴ Iuasaakipeka Xoteo apotiitiniātaāua aikotiā auakani auīte naiataua, kotxi tomatiko ōtisaaki Xesosi makananitaro amianataro. Ininiā iua txitari kākiti:

—Auari seisi pakini ōti kākiti parīkauatini ikapani. Ininiā ikora seisi ōti hina iua makananitinii ikapani. Kona hinape tomatiko ōti erekapeka hītxīkitakiko ikapani — itxana.

¹⁵ Ininiā Xesosi txari iua:

—Hīsākire atxīiti erekari, txamari kona hīkamari hīsākire iaōka. Tomatiko ōtisaaki hīte tīretari hīpiraakori, kotxi hanikari hīpiraakori, kema auīte iaāmoni āparaā iātinina ikapani. ¹⁶ Oia sito Apraōni apika mekaniro otxaua. Satañasi kamaamianaretaro oa tesoito anokananipeka. Iaōpe. Apakatapitika tomatiko ōtisaaki nitiretiniro oa, nimakananitiniro oa — itxa Xesosi.

¹⁷ Xesosi apakapapiretakasaakina, imokaikariakori pētaua. Iuasaaki apanakini iuaā auakani poxokoniuata, kotxi imarotarina erekari Xesosi kamakiti.

Mostata Pirena*(Mateo 13.31-32; Marko 4.30-32)*¹⁸ Ininiã Xesosi pimaãna:

—Natokopa itxa Teoso auñttxi ininiãua? Kiãtokopa itxa axinikiniri? ¹⁹ Teoso auñttxi ininiãua mostata iki atoko itxa. Kiki takaro mostata ikikioteë. Oa aneë. Mitape onakasaaki kotipiriki kamari ikoa okatiã. Ikara atoko itxa Teoso auñttxi ininiãua —itxa Xesosi.

Merepanika poião kãkiti auñttxitari Teoso. Eereka kaiãopokori kãkiti auñttxitari iua. Txamari iusaaki Satanasi apoka ninoamoni kotipiriki apokini atokokana.

Pão Tirekakari Pirena*(Mateo 13.33)*²⁰ Iuaĩkana Xesosi pimaãna:

—Natokopa itxa ìkorapokoriti Teoso auñttxi ininiãua? ²¹ Ia atokokana itxa: Sito kosekari pão tirekakari pani. Okoketari axapiti pão tirekakari pani kaiãopokori triko panikata, ãparaãkata. Eereka ikinika ipe tirekaãpota otxa.

Axapitiri Ironakikoãtaã*(Mateo 7.13-14, 21-23)*

²² Ikara inaka atoko Xesosi potorika Xerosareë sitatxiti isini ìkapani. Isaãpotakasaaki, isãpiretari Teoso sãkire. Isãpiretari ãti sitatxitiã, ãti aapokotxitiã, ãti sitatxitiã, itxaãpota isãpiretiniri Teoso sãkire kãkitimoni.

²³ Oerekarauanãtakasaaki, kiki pimaãri:

—Niauñte, poiãokani satako Teoso auñiãtaã?

²⁴ Ininiã Xesosi apakapapiretari:

—Teoso tixine ìronakikoãtaã axapitiri. Hinirekariko iuaã hiĩroini. Kaiãopokori kãkiti nirekari ìroinina. Txamari, !iposotarina. ²⁵ Kaapokori totiniri aapoko tore atoko itxa. Itotakasaakiri, kãkiti iporikiti aritari itore: “Pimataakariko itore ate ìkapani.” Iusaaki iua kaapokori txako: “Kona nimarotai hñte,” itxanako ninoamoni. ²⁶ Ininiã ninoa: “Ate nipokota pitekata. Sitatxi ate auñiãtaã pauakasaaki, pitekara oerekaua,” itxanako ninoa. ²⁷ Ininiã iuaĩkana itxako ninoamoni: “!Nimarotai hñte. Namonipa hãua hñte? Hiĩsipiniikaua. Imakinika hñkamakiti !erekar.”

²⁸ —Hãtamatakasaakina Apraão, Isaki, Xakoo, ikinimane Teoso sãkire sãpiretakani pakini Teoso auñttxi ininiãtaãua, iusaaki hñtxiapatapitikako. Apanakini ìroãpeka. Txama hñtenoka kaikotape iporikiti himaerekani xika.

²⁹ Teoso auñttxi ininiãtaãua apokako kaiãopokori kãkiti, ikini itixiti ìkani. Atokatxi pokìkinimoni ìkani, atokatxi ereëkokinimoni ìkani, atokatxi pokìkini sanaremoni ìkani, atokatxi pokìkini kikomoni ìkani pakini apokako Teoso kiiniritimoni. ³⁰ Merepitipanika Xoteoakori kenakotari Teoso sãkire, txamari !imaãkatari. Eereka Xoteo minakanuia kenakotari Teoso sãkire, ininiã auikarina. Ininiã Xoteo minakanuia apokako Teoso auñttxi ininiãtaãua Xoteoakori apokini apisa —itxa Xesosi sãkire.

Xesosi Tiretari Xerosareë Auakani*(Mateo 23.37-39)*

³¹ Ikarasaakipeka ãtikaka pariseoakori apoka. Itxarina Xesosi:

—Pisipiniikaua, kotxi Erotxi okaenetai —itxarina.

³² Ininiã Xesosi apakapapiretana:

—Hñsa iuamoni. Hñtxariko iua aripa kamisirienereri: “Nota omitikari maerekati matamatakoti, apaka amianatakani erekapeka nitxikitaka. Uatxa, katana pakini niparĩkauatako. Ipi ãti õtisaaki nixipokariko niparĩka ìkorapokoriti.” Ikara atoko hñtxariko iua. ³³ Ininiã uatxa niparĩkauatako. Katana

niparīkauatako. Ininiā katana eereka nisa Xerosareēmoni, kotxi ātiātaā Teoso sākire sāpiretakani okikoātaā !auari. Xerosareēnanira ninoa ipina. Ininiā nota sako iuaā.

³⁴—Xerosareē auakanii, Xerosareē auakanii, hīte okapekana Teoso sākire sāpiretakani. Kai soroā hīkiporonakana ninoa hītemoni Teoso iokanatakini. Kaiōkatani ninirekamari ninīkatini, patari oimiakori omīkita patapi otakini atokokana nitxanakamaiko hīte. Txamari !hāuiritano nota nīkatini. ³⁵ Ikara atoko inakari xika haāpoko asikaākako. Teoso !uaika hītekata. Nisāpiretai. Ia ōti hātamatano, eereka ! hātamataikano. “Teoso takari erekari uaimoni īkarimoni, Apiananiri posotiireē īkarimoni,” hinakasaaki, uusaakinanirako hātamatano nota —itxa Xesosi.

14

Xesosi Erekapeka Txīkitakari Amianatakari

¹ Tomatiko ōtisaaki Xesosi sari pariseokori auītemoni, iuakata inipokotini īkapani. Iuaā auakani mixinitari iua apoītinirina īkapani. ² Iuusaakipeka apoka kiki amianatakari. Ikanoke, itāpīke, imakinika ananaītota. Iua apoka Xesosimoni. ³ Ininiā Xesosi pimaāna Moisesini sākire oerekakani, pariseokori pakini. Ipimaāna:

—Erekari atxiīti tomatiko ōtisaaki amianatakari erekapeka nitxīkitakini? —itxa Xesosi.

⁴ Ininiā ninoa tsorīkaānāta. !Apakapapiretarina. Ininiā iusaaki Xesosi erekapeka txīkitakari iua amianatakari.

—Pīsipeka paapokomoni —itxa Xesosi.

⁵ Eereka ipimaāna pariseokori:

—Hīpira kema auīte, hīpira poho apaka aariko āki irikiniā tomatiko ōtisaaki, iusaaki himakatzakatarī? Ari, himakatzakapitikari hīpira tomatiko ōtisaaki. Ininiā kinirepa kona hinirekatari erekari nikamini tomatiko ōtisaaki? —itxa Xesosi.

⁶ Txamari kona ninoa apakapapiretari, kotxi atāo Xesosi sākire.

Kiiniri Kamakari Pirena

⁷ Iusaaki Xesosi itikana kākiti. Apanakini mereēri kākiti apiatakari takote iitopākini. Ininiā isāpiretari ia sāpirenatxi atāo inakari oerekiko.

⁸ Kākiti ītaniruatini kiiniriti pirena isāpireta:

—Kiiniriā hīsikasaaki, kona himereēpiri kākiti apiatakari topākiniātaā hīitopākini, kotxi atxiīti eereka kemaītxitakori apiatakari apoka. ⁹ Ininiā iua apiatakari apokasaaki, kakiiniriteri txaiko pite: “Ikiraā piitopāka. Ia kiki topāka nota takote.” Iusaaki pipētauata. Ininiā pitakanapari iuaā. Ma-parapeka apanakinikata topāka pitxa. ¹⁰ Kiiniriā hīsikasaaki, apanakinikata hīitopāka. Ikara atoko ininiā, kakiiniriteri akiritai: “Nitari uaimoni pina. Piitopāka uai. Uaira erekari.” Ikara atoko pininiā, apanakini iuaā auakani imarotariko pite apiatakari pininiāua. ¹¹ Ātikaka kākiti txari: “Nota apiari nitxaua.” Txamari Teoso txariko: “Poiāori itxaua.” Ātipekana txari: “Nota poiāori nitxaua.” Txamari Teoso txariko: “Iua apiari itxaua.”

¹² Xesosi txari ikemaītxitakiri:

—Kiiniri pikamakasaaki, kona pikemaītxitapiri pinirimane, pitariakori, paōkimaneri, paapoko takote auakani, katxineiroteni pakini, ninoa iuaīkana kemaītxitini pite īkapani. Ininiā ikara atoko ninoa ikitxitai. ¹³ Apiaerekata kiiniri pikamakasaaki, pikemaītxitari kākiti minakati mauakini, mikirini, matīpokotakati pakini. ¹⁴ Ikara atoko pininiā, Teoso sikari erekari pitemoni, kotxi ninoa !iposotari kiiniri ikaminina, iuaritika kākiti erekarini iuaīkana ōkitikasaakia, iusaaki Teoso ikitxitaiko pite —itxa Xesosi sākire.

*Kiiniri Mitari Pirena**(Mateo 22.1-14)*

¹⁵ Ininiã äti Xesosikata nipokotakari kenakotari ikara Xesosi säkire. Ininiã iua txari:

—Teoso auñtetxi ininiãtaãua sikani nipokotako iuaã. Ininiã iuasaaki Teoso sikapoxokonitana —itxari.

¹⁶ Ininiã Xesosi apakapapireta. Ia atoko itxa:

—Kiki kiiniri kamakari kemañxitari itomaneri kãkiti. ¹⁷ Nipokori iposopeka inakasaaki, iokanatari initiri ikemañxitakinimoni: “Masa kiinirimoni. Iposopekari imakinika nipokori,” itxa.

¹⁸ —Txamari ikemañxitakini kamari äti säkiretxi kiinirimoni imasikanina ñkapani. Ininiã kemañxitakori txari: “Nota amotari itixi. Iua ninireka natini. Ininiã !niposotari nisini kiiniriã,” itxa.

¹⁹ —Ininiã äti: “Nota amotari tesi kema auñte parñkauatakani. Ininiã nota sari ninoamoni. Ninireka nimarotiniiri ninoa parñka. Pauiritano nisini ninoamoni,” itxa.

²⁰ —Ätipekana: “Nota ñtanorouatape. Nñtanoro auano nota. Ininiã kona niposota nisini pikiiniritemoni,” itxa.

²¹ —Ininiã initiri kanapiriã iauñtemoni. Ikinipoko ikemañxitakini säkire isãpireta iuamoni. Ininiã iuasaaki iua auñtetxi naiataua. Ininiã ipaniãtari initiri: “Sitatxi auakari kimaporitiã pisa. Katima pitxako. Piminana kãkiti minakati mauakini, mañpokotakani, mokirini pakini pimina,” itxari. ²² Ininiã katimaritika ikamari ikinika auñtetxi paniãtakiti. “Nikamapekari ikinika pipaniãtakiti, txamari auapanika nipokori. Apakatapanika kãkiti nikini ñkapani,” itxa.

²³ —Ininiã iuañkana, iua auñtetxi paniãtari sitatxi mapara òtako isini. “Iuaã pakiritana kãkiti inini, naapoko kãkiti xãpokini ñkapani. ²⁴ Atãopitikara nitxai: ‘Mitxi nikemañxitakini !inikapaniri nikiena,’ ” itxa.

*Xesosi Moianari Pininiua**(Mateo 10.37-39)*

²⁵ Äti òti itomaneri kãkiti moianatari Xesosi. Ininiã ikirioka säpireta itxana ia säkiretxiti:

²⁶ —Nota kinirão moianataka hinakasaaki, apiata hñtiretanoko nota. Merepanika hñtiretanoko nota, eereka hñtiretanoko hñiri, hinoro, hñtaniri, hñtanoro, hñtari, hñtaro, hamarite pakini. Hñteka apaka poião hñtiretauako. ²⁷ Nota kinirão moianataka hinakasaaki, notakata hñsa. Himamñteenekakanisaakiri himisirititoko nota ñkapani, ininiã ! apakata himoianatinino.

²⁸ —Hñnirakiñari aapokotxi mitari sitatxi auakari atoko hñkamini, merepanika hñxinikarokò txineiro aapokotxi kamiko karone. Atxiñti ! apakata hñtxineirote. Atxiñti apakata. Ikara atoko hñxinika merepanika.

²⁹ Ikara maxinikati merepanika !ixinikari, ininiã atxiñti itakari itsota, ininiã eereka txineiro ! auaika, ininiã kona apakata imakinika ikamini. Ininiã apanakini napetari iua. ³⁰ Ininiã ninoa txari: “Hñtamatariko ikamakiti. Iua kiki poterikamari ñkora aapoko, txamari ! iposotari imakinika ikamini.” Ikara atoko itxanako. Ininiã pikamakiti apisapanika iteene hñxinikariko.

³¹ Ininiã eereka Xesosi säpiretari äti säkiretxi:

—Auñtetxi auari tesi mio sotato. Iua nirekari neenamatzu ikamini äti auñtetxikata. Txamari äti auñtetxi auari vñtxi mio sotato. Iua tesi mio sotato auakiti merepanika xinikari, atxiñti iposota ineenamauatini vñtxi mio sotatokata? Atxiñti auñtetxi vñtxi mio sotato auakiti xipokari iua? Ininiã apisapanika ixinikari. ³² Imaposotakaniãri, vñtxi mio sotato òtakapanika

auakasaaki, iua auítetxi tesi mio auakiti iokanapireta áti auítetximoni isákirauatinina íkapani, neenamatzí xipokini íkapani.

³³ —Erekari iua auítetxi neenamatzí takanapakari atoko hinini. Ininiá merepanika hákixinireé híxinikariko: “Nota nirekatari nimoianatiniri Xesosi, kotxi pasápaniri?” hítxa. Atáo hinirekiniári himoianatinino, ininiá imakinika hítakanapako notakata hísiní íkapani. Himanirekakaniári hítakanapiniri imakinika, ininiá íapakata himoianatinino. Ininiá híxinikariko merepanika —itxa Xesosi.

Iókira Matxoato Pirena
(Mateo 5.13; Marko 9.50)

³⁴ —Iókira peerekaro. Omatxoaniá, !otxaika. Aua kákiti iókira potxoaro atoko inakani, ininiá erekapítikana ninoa. Apanakini kákiti iókira matxoato atoko itxana. !Kakamarena ninoa. ³⁵ Iókira matxoato ininiá, !apakata takari sikakienatiko íkapani. !Apakata híkoketiniri kipatxikata, pírátxi tikakata takari sikakienatiko íkapani. Kona erekaro. Maparamoni oókapeékaika. Ikara atoko itxa apanakini, kotxi ninoa !kakamarena.

—Kakenakokii híte, ininiá híkenakotariko ia nisákiere.

15

Soti Auíte Ereékokakari
(Mateo 18.10-14)

¹ Áti óti auítetxiakori txineirote apakapakani, apanakini maerekati kamakani apaka apotiitaua Xesosi sákiere ikenakotínina íkapani. Ninoa kaiáopoko. ² Iuasaaki pariseoakori, kaióksatopareriakori pakini misákierepiretari Xesosi. Itxana:

—Iua apakapari maerekani. Maerekanikata inipokota —itxana.

³ Ikara isákiarena xika Xesosi sápiretari ípi, áti pakini sápirenatxi atáo inakari oerekiko. ⁴ Ia atoko itxa Xesosi:

—Atxiíti pite aua seí soti auíte. Áti pípinanakiníá, kipa pikama? Pitakanapari apanakini mapara inipokotiniátaá apanakini níkatini íkapani. Ininiá eereka písari pípinanakakari pinitini íkapani. ⁵ Papokasaakiri iua pípinanakakari, pípoxononiua. Píporikiápotari pípira paapokomoni. ⁶ Papokaáka atoko pakiritana paókimaneriakori, apanakini kákiti pakini. Pítxana ninoa: “Hípoxokoniuatoko notakata, kotxi napokapekari nípira pípinanakakari,” itxa soti auíte pitikiri.

⁷ —Nisápiretai híte, átika maerekati kamakari takanapakasaakiri imaerekani, iaxiti Teoso auiniátaá auakani poxononiuatapítikako. Atxiíti novéta novi kákiti iuikakaníua txari: “Peerekaua ate. !Akamari maerekati,” itxana. Txama kona atáo isákiarena. Ninoa sákiere kona kamari iaxitikini poxononiuatini —itxa Xesosi.

Ota Pirata Kamakoro Ereékokakaro

⁸ Apikomoni Xesosi txari:

—Sito aua tesi ota pirata kamakoro. Pakaronero. Áto ereékokiniá, ininiá onitakasaakiro oiopotokakari tirikapi. Oiatíikaápotari oaápo ota onitaápotini íkapani. ⁹ Oa apokasaakiro, apanakini oákirita: “Hípoxokonauatoko notakata. Napokapekaro ota ereékokakaro,” otxa.

¹⁰ —Kákiti poxononiua ota pirata kamakoro apokikosaaki. Nisápiretai, iaxiti Teoso nitiriakori apiapoxokoniua, áti maerekati kamakari imaerekani itakanapakasaaki —itxa Xesosi.

Imi Ereékokakari Pirena

¹¹ Apikomoni Xesosi txari:

—Aua kiki. Ipi imiakori. ¹² Maneri takari amanaãri iri. Itxari: “Ninirekari pitakanapakito pipíkasaaki pisikini notamoni uatxa,” itxa. Ininiã iri xanakari inakiti imiakorimoni. ¹³ Eereka mapaõti inaka atoko, iua âtokori apotiitari iri sikakiti. Ininiã eereka isipeka. Ôtakoxiti âti tixini isa. Iuaã maerekati ikama. Iuaã xipoka itxari iri sikiniri.

¹⁴ —Ikinika xipoka iuaã. Iuasaaki âparaã ! ikipa. Natxipokoni auari. Nipokori ! auari. Ininiã iuasaaki iua minakati ! auari. Imakinika xipope. ¹⁵ Ininiã iuaxiti auakarimoni isa, parikatxi amanaini ikapani. Ininiã ipatrãote paniãtari irariakori isikakienatini. ¹⁶ Irariakori isikakienatakasaaki, natxinoka itxa. Iuasaaki iua nirekari irariakori kiena inikini, kotxi iua sikakienatakari ! auari.

¹⁷ —Iuasaakiika ixinikari iri aapoko: “Niri nitiriakori aua nipokori. Nipokori itetakori auapitika. Uai natxinoka txapeno nota. ¹⁸ Nikanapiriãko niri aapokomoni. Nitxariko niri: ‘Maerekati nikamapeka Teosomoni, pitemoni apaka. ¹⁹ Kona pamarite na pitxaikanoko, kotxi !erekano. Pitxikitakano pinitiri nininiua.’ Ikara atoko nitxariko niri,” itxa. ²⁰ Ininiã iua aiamata, kanapiriã itxa iri aapokomoni. Iuasaaki iri iãtapanãtari iua ikiniõtika.

—Ininiã iua apokaãpotakasaaki, õtakopanika, iri atapari iua. Ininiã iri miteëkata iuamoni. Ininiã iteene ipoxokoniuaata. ²¹ Iuasaaki imi txari iri: “Niri, maerekati nikamapeka Teosomoni, pitemoni apaka. Kona pamarite na pitxaikanoko, kotxi !erekano.”

²² —Iuasaakipeka iri akiritari initiriakori: “Katima hĩtxako, mãkatxi ereri himinin. Aneo ereri hĩtakako iuakokimoni. Ikiti mata hĩtakako ikitiã. ²³ Kema auõte kiiri hõkako. Kiiniri makamako. Manipokota. Mapoxokoniuaata, ²⁴ kotxi ia namarite ipĩkari atokepeka, uatxa iuaikana ikanapiripeka. Mitxi pĩpanakakari atoko itxa, uatxa apokapeëkaika,” itxa.

—Ininiã iuasaaki ninoamoni ipoxokoniuatini apopeka.

²⁵ Ninoã kiiniritauatakasaaki, imi aneëkari tokoriã iparĩkauanãta. Ikanapiriãkasaaki aapokomoni, ikenakotari xikari, serëkatxi ene pakini. ²⁶ Ininiã akiritari iri nitiri: “Kiripa ikara?” itxari. ²⁷ Iri nitiri apakapireta: “Pitari apoka. Ininiã piri paniãtari kema auõte okiko, kotxi erekapanikari pitari. Kona monõkori apoka iuamoni. Erekari ikanapiriini,” itxari.

²⁸ —Ininiã ikara ikenakotakasaaki, inaiataua. Kona inirekari ñroini kiiniriã. Ininiã iri iuamoni sa itxa. Akiritari: “Pĩroã,” itxari. ²⁹ Ininiã iua apakapiretari: “Itori mitaãti niparĩkauatinapekai. Txama kona nota sipikapiretari pisãkire. Iuaritika kona pisikano potxi ãkiri nimoianariakorikata kiiniri nikamini ikapani. ³⁰ Iua pamarite xipokari pitxineirote. Sitokata isirĩka. Txama ikanapiriãkasaaki, pokari kema auõte. Kiiniri pikama iua ikapani.” Ikara atoko itxitari iri.

³¹ —Iri apakapireta: “Namarite, âtipirika pauapika notakata. Ikinika nota nakiti pite nakiti txaua. ³² Erekapitikari kiiniri nikamini apoxokoniuatini ikapani, kotxi pitari ipĩkari atokepeka itxa. Uatxa auapanika. Pĩpanakakari uatxa apokapeka,” itxari.

16

Nitirixi Kamisirienereri

¹ Xesosi sãpiretana imoianariakori:

—Kiki ito tiitxi aua. Iua nitiri nĩkatari ikinika ipatrãote nakiti. Apanakini sãpiretari iua kiki, initiri iouanatiniri itxineirote. ² Ikara atoko ininiã, iua

akiritari inítiri: “Nikenakopiretari pite misirienetinino nota. Ininiã pimi-nari títixi piamotiitini tsopa. Ikara pisikasaakino, niokanatai pisini. Kona apikomoni piparíkauataika nota íkapani,” itxa.

³—Ininiã inítiri ákixinireë: “Kipa níkama uatxa, kotxi nípatrãote paítiki iokanatanano. !Kataparano nota, ininiã ! níposotari atokatxi patapi níparíkauatini. Nípêtauata txineiro maxikatíika namanainiri kákiti. ⁴Uatxaika nímarotari níkamakíti tíkane. Ininiã níparíka xipokasaaki uai, kákiti apakapaníkanano nota ninoa aapokoã,” itxa.

⁵—Ininiã akiritana kákiti ípatrãote maíkitxitakani. Ininiã ípimaãri áti: “Kipakinípa !píikitxitapaníka nípatrãotemoni?”

⁶—“Seí kopíti ítxi auakíti kona níikitxitapaníka,” itxari.

—Ininiã íua nítrítixi txari: “Píkosekari pímaíkitxitakíniti tsopa. Pítakari síkoëta kopítinoka,” itxari.

⁷—Ininiã áti ípatrãote maíkitxitakari ípimaã: “Kipakinípa kona píikitxitapaníka nípatrãote?”

—Íua apakapapíretari: “Seí atarokíri kotarína,” itxa.

—Ítxari íua: “Pímaíkitxitakíniti tsopa píkoseka. Oitêta kotarínoka pítaika,” itxa. Ikara atoko íkama ninoa íkapani, ininiã íparíka ítakanapaká atoko, ninoa apakapari íua ninoa aapokoã.

⁸—Ininiã íua patrãote íkara ímarotakasaaki, ítsoríkaáta: “Ari, nínitíri páimatíreri. Maerekati íkama, íuarítika íkamakasaakíri, páimatíreri íua,” itxa.

—Teoso sákire mauiákani ímarotapítikari íxiníkinírína paríkatxi katana íkamakítina. Atxiíti Teoso sákire auíákani !ímarotari íxiníkinírína paríkatxi katana íkamakítina. ⁹Nísápiretai híte, íkorapokorítí háuakasaaki, híxiníkari íkara nítrítixi. Hísikari hítií, hítxineirote pakíni Teoso paríka íkapani, Teoso mímarotakáni atão ínakari ímarotínína íkapani. Eereka atxiíti Teoso mímarotakáni moíanatai. Eereka ninoa apaka ímarotari áiri íaxítikíri. Eereka áti ôti haókitana ninoa íaxíti.

¹⁰—Axapítiki paríkatxi atão píkaminiã, ininiã kákiti auíkaríko píposotíniri paríkatxi apíatakari píkamíni apaka. Axapítiki píítíríuata mítxi, ininiã eereka kaiãori píítíríuata. ¹¹Txineiro uaimoníporítí auakari hímmarotakániári híníkatíni, ininiã kona híposotari híníkatíniri eerekari Teoso síkakíti. ¹²Apanakíni tíi pímaníkatakaniã, ininiã kona kákiti síkai títixi pínakíti iníni íkapani.

¹³—!Apakata kákiti paríkauatíni ípi íauíténa íkapani, kotxi atxiíti áti omanata, áti ítírefa. Atxiíti áti apokaerekata, áti ínorita. Íua atokokana kákiti kona posotari íparíkauatíni títixi íkínípoko íamotíni íkapani, Teoso íkapani íparíkauatakasaaki. !Apakata píauítetíníri Teoso, txineiro píauítetakasaaki—ítxa Xesosi.

Teoso Sákire Maxípokakani

(Mateo 11.12-13; 5.31-32; Marko 10.11-12)

¹⁴Pariseoakori íkara íkenakotakasaakina, ínapetarína Xesosi, kotxi ninoa íteene potxítaro txineiro. ¹⁵Ininiã Xesosi sákíruauata ninoamoni:

—Híte txa apanakínimoni: “Ate !íkeroka. Peerekaua ate,” hítxa hísákire. Txama Teoso ímarotari hákíxinire. Kákiti uákatarí eerekari híkamíni, txama Teoso omanatarí híkamakíti.

¹⁶—Kítzakapíríka kákiti auíkarí Teoso sákire Moisesimóni síkakorí, Teoso sákire sápiretakáni sákire pakíni. Xoão kapatxísareri apoka. Íuasaaki Teoso íokanapíríena eerekari auítetxi ininiãua sápiretaãka. Ítomanerí íteene nírekari ísíní Teoso auítetxi ininiãtaãua íróini.

¹⁷—Teoso sákire líxípoka. !Íxípoka axapítí. Auapíka ímakíníka ísákire. Ítíxi, íaxítí pakíni xípokapítíkako, íuarítika Teoso sákire !íxípoka.

18 –Teoso sãkire iõkatakori kitxakapirĩkari auapanika uatxa. Ininiã itanorotxi asikakari ãto itakini ikapani inakari, maerekati ikama. Apaka sito takanapakoro takakari maerekatikanera ikama. Ikara Teoso sãkire auapanika. Kona ixipoka ikara –itxa Xesosi.

Katiiri, Arásaro Pakini

19 Xesosi sãkirauatapanika. Ia atoko itxa:

–Aua kiki katiiri. Peereri imãka. Põkamarari imãka. Apiaerekata imãka. Ikiniõtika peerekari ikiena. Imakinika iua auakiti peerekari. Iua aapoko ikiniõtika kiinirisaaki auakari atoko itxapika ikiena.

20 –Ãti kiki Arásaro inakori. Pamatinaniri. Minakati !auinari iua. Iua sirĩka katiiri aapoko patapi koa. Amianari aua iuamoni. Ininiã iito imakinika kakaro. 21 Kinirão nika inakasaaki, ixiti okakorinoka inika. Iuaã anãpa amerokari ikaro.

22 –Ikara atoko ininiã, eereka ipĩpe. Ininiã eereka Teoso nitriakori iaxitikini anikari iua Teoso auinimoni. Kitxakapirĩka Apraão sari iuaã. Iuaã iua Arásaro aõkitari Apraão.

–Eereka iua katiiri apaka ipĩpe. Ikataãka. Isari maerekani misiritikoãtaã. 23 Iuaã maerekani misiritikoãtaã auakasaaki, õtakoxiti atamatari Apraão, Arásaro pakini. 24 Ininiã akiritari Apraão: “Toti Apraão, piamonĩkano. Pipaniãtariko Arásaro iãkiniri iuakoki iaã, tapikaka itxa ninamamoni. Ia xamina sikatsiitapitipono,” itxa.

25 –Apraão apakapapireta: “Pixinikariko kãkitikata pauakasaaki, kaiãori pitii aua pitemoni. Arásaro auakasaaki, kona minakati auari iua. Arásaro auakasaaki, amianarinani, natxinani pakini auari. Uatxa iua poxokoni-uanãtakasaaki, pite atatsiitari pimisiritiko. 26 Patamata ereẽ sauana auĩte. Kona ate posotari hĩtemoni asini. Hĩte apaka kona posota uaimoni hãpokini,” itxa Apraão.

27 –Iuaĩkana katiiri: “Toti, pikenakotano. Pipaniãtariko Arásaro niri aapokomoni isini. 28 Iuaã aua sĩko nitariakori maneripanika inakaniua. Isãpiretanako: ‘Kona erekari uai. Erekari ia misirikaretxi auiniãtaã imĩkanina. Ininiã uatxa ikamarinako Teoso sãkire paniãtakiti,’ itxa katiiri.

29 –Ininiã Apraão: “Ninoamoni auape Teoso sãkire, Moisesini sãpiretakiti, apanakini Teoso sãkire sãpiretakani sãpiretakiti apaka. Ininiã pitariakori posotari ikenakotinirina ninoã sãkire,” itxa Apraão.

30 –Ininiã katiiri txari: “Toti Apraão, ikara atokonani !apakata. Ipĩkari kanapiriiniã ninoamoni, iuaasaakiikarako itakanaparina imaerekanina.”

31 –Ininiã Apraão: “Pitariakori !auikari Moisesini sãkire, apanakini Teoso sãkire sãpiretakani sãkire pakini. Ipĩkari kanapiriiniã ninoamoni, iuaritika ninoã !auikari Teoso sãkire. Ikara atoko ininiã, kona nipaniãtari Arásaro isini ninoamoni,” itxa Apraão.

Ikara atoko itxa Xesosi sãpiretakiti.

17

Maerekati Oerekakari

(Mateo 18.6-7, 21-35; Marko 9.42)

1 Xesosi txari imoianariakorimoni:

–Aua maerekati oerekakani. Ninoã kãkiti kamari maerekati. Ikara atoko inakani apokapitikako. Ninoã xika kãkiti kamari maerekati. Maerekati oerekakari misiritaãkapitikako. 2 Teoso omanatari kãkiti maerekati oerekakani. Kãkiti txĩkitakiniãri amarini nota sãkire auĩãkari maerekati ikamini !apakata. Erekamariko iua kãkiti maerekati oerekakari

kai mitariã iaxirikanokitaãkamako, ipoa apanĩkakiã okaãkamako ipinini ìkapani. ³ Erepaniko. !Pikamapiriko maerekati. Pitari Xesosi sãkire auĩãkari kaminiãri maerekati pitemoni, põtãkikariko, imaerekani itakanapini ìkapani. Itakanapiniãri, !pixinikapinikari ikara maerekati ikamakiti. ⁴ Atxiĩti ãti òti iua kamari maerekati pitemoni. Eereka iua pitemoni apoka. “!Erekari nikamakiti pitemoni. Pimaxinĩkaretariko maerekati nikamakiti. !Nikamaikari,” itxa. Ininiã ìkora òti iuaĩkana maerekati ikama pitemoni. Iuaĩkana amanaãi imaerekani pimaxinĩkaretini tĩkane. Atxiĩti ìkora òti setzikata ikara atoko ikama pitemoni, ininiã pimaxinĩkaretariko ikinika maerekati ikamakiti —itxa Xesosi.

Xesosi Sãkire Auĩkiko

⁵ Xesosi iokanatakini txari Xesosi:

—Pitxĩkitakaua ate apikomoni aũuikiniri Teoso sãkire —itxana.

⁶ Ininiã Xesosi txana:

—Mostata iki axapitiki. Mostata iki atokokana nisãkire poião hãuikinĩã, iuaritika hĩposotapitikari hĩpaniãtiniri ia uasini aamina: “Pikotsakatika pima-porokauako. Ipoamoni pitakauako.” Ininiã ikamapitikariko pisãkire iaõka —itxa Xesosi.

Nitiritxi Parĩka Pirena

⁷ Xesosi txari:

—Pinitiri tokoriã parĩkauatakari, pipiraakori inĩkatakari, apokasaaki paapoko, kona pitxa: “Pinipokota, pitomata.” Kona ikaraatoko pitxa. ⁸ Pitxari: “Auapanika parĩkatxi. Nipokori pikaminano. Xipoka atoko pisikakienatano. Piãtapari nota nipokotini, ininiã eereka pite nipokota.” Ìkara atoko pitxa pinitiriakorimoni. ⁹ Pipaniãtakitinanira ikama, ininiã kona pitxa: “Erekapitikari piparĩka,” kotxi pipaniãtakitinani ikama.

¹⁰ —Ininiã iua atokokanera itxa ikinipoko Teoso paniãtakiti pikamakasaaki. Kona apakata: “Erekapitikano nota,” pinini. Ia atoko atão pinini: “Nitiritxinani nitxaua. Poiãori nitxaua, kotxi niauĩte paniãtakitinani nikama.”

Xesosi Makananitinina Paiaka Matatakani

¹¹ Xerosareẽmoni Xesosi sikasaaki, inapari Samaria tõpa. Ipinimoni auari Karirẽia tõpa. ¹² ãti aapokotxi apokaãpotakasaaki, aõkitana tesi kikiakori amianatakani paiaka matatakani. ¹³ Ìkira atoko akiritarina:

—Xesosi, koerekareri, piamonĩkaua ate —itxana.

¹⁴ Xesosi atamatakasaakina, ipaniãtana ninoa Moisesini paniãtakiti iaõka ikaminina, sasetotximoni isinina, iĩtona oerekinina ìkapani.

—Sasetotximoni hĩsako. Hõerekariko hĩito iuamoni —itxa Xesosi.

Iuamoni isaãpotakasaakina, ikinipoko ninoa erekapeka itxana. ¹⁵ Ninoa amianatakani erekapeka, txamari ãtinani kanapiriã Xesosimoni. Itapararitika akirita:

—Peerekari Teoso —itxa iua paiaka matatakari.

¹⁶ Ininiã ikapotoreẽkaua Xesosi apisatoõ.

—Notamoni pikamakiti peerekari —itxa.

Samaria tõpakiri iua kiki. ¹⁷ Ininiã Xesosi txari:

—Nota makananitana tesi kikiakori. Ìtapari apanakini? Auapanika novi kikiakori nimakananitakini. ¹⁸ Ia kiki Samariakiri. Ianokara kanapiriã, “Peerekari Teoso,” inini ìkapani. Ninoa Xoteo iua atoko ìtxana —itxa Xesosi sãkire.

¹⁹ Ininiã itxari iua Samariakiri:

—Pōkitikauako. Pisako. Pite auikari nisākire, ininiākara erekapekai —itxa Xesosi.

Kanatokopa Itxa Teoso Auītetxi Ininiātaāua?
(Mateo 24.23-28, 35-44)

²⁰ Āti ōti pariseokori pimaāri Xesosi:

—Kirisaakipa Teoso ikinimane auite inini ōti apokatako? —itxana.

Ininiā Xesosi apakapapiretana:

—Teoso auītetxi inakasaakiua, kākiti !atamatari iua apokini. Teoso kākiti auite inakasaaki, iua kākiti ākixinireē apoka. ²¹ Iuasaaki kākiti !akiritari: “Uaikarari Teoso auītetxi ininiātaāua. Ikiraārari Teoso auītetxi ininiātaāua.” Ikara atoko !itxana, kotxi hīxinire ākirari Teoso auītetxi ininiātaāua —itxa Xesosi.

²² Ininiā itxa imoianariakorimoni:

—Apokako āti ōti nota hītari iaxitikiri iteene kinirāo hātamatini. Txamari !hātamatano. ²³ Apanakini sāpiretaiko hīte: “Ikiraārari iua.” Āti sāpiretari: “Uaikarari iua.” Iuasaaki kona himaākatapiri ikara atoko inakari sākiretxiti. !Hāuikapiri ikara atoko inakari. ²⁴ Hītari iaxitikiri kanapiriākasaaki, mēkokari ātiātaā potorikini, ātiātaā apokini, iua atokokana nikanapiriini. Katimaritika napokako. Mēkokari atoko nitxako napokini. Iuasaakiua ikinimane kākiti atamatano. ²⁵ Nikanapiriini apisapanika, nota hītari iaxitikiri iteene ninikoriāriko nimisiritiko, kotxi kākiti uatxa auakani kona nirekano. ²⁶ —Nota hītari iaxitikiri kanapiriākasaaki, Noee auakasaaki atokokana itxapaniko. ²⁷ Noee auakasaaki, ikinimane nipokota. Iāta. Ītanorouata. Ikara atoko itxapikana. Āti ōti Noee, inirmanekata maporo āki iiroāna. Eereka imaiātapakinitipanika āparaā kipakata. Xāpoākata. Ininiā xirataātxi xipopena ikinimane. Ikara atokotxikana itxako nota kanapiriākasaaki.

²⁸ —Aroo inakori auakasaaki atokokana itxako nota kanapiriākasaaki. Iuasaaki ikinimane nipokota. Iātana. Iamotiitana. Isikatiitana. Itakarauatana. Aapokona ikamana. ²⁹ Sotoma sitatxiti Aroo potorikini ōti, iuasaakipeka xamina āparaā kipini atoko itxa ikatxakini. Xamina miniki katxaka. Ininiā ikinipoko iuaātaā ariākata.

³⁰ —Iuasaaki kākiti !imarotari xamina katxakini ōti. Iua atokokana kākiti !imarotari nota hītari iaxitikiri apokini ōti. ³¹ Napokini ōti haāpoko mapara hāuiniā, kona hīkanapiripe haāpokomoni hīti hāpini ikapani. Tokoriā hāuiniā, kona !hīkanapiripe haāpokomoni. !Apakata hīkanapiriini iuaā. ³² Hīxinikaroko Aroo Ītanoro. Kona oa atoko hītxape, kotxi oa ipina, kotxi !onirekari otakanapirini sitatxi maerekani auiniātaā.

³³ —Pite ātipirika kaminiāri piteka nireēkitinoka, ininiā pinireēkiti xipokapitikako pitekata. Pite nireēkiti xipokiniā, nota sākire pauikini xika, pite auapininiika txako Teosokata.

³⁴ —Nikanapiriākasaaki, ia atoko itxako. Nikanapiriini ikanōkati atxiiti ipi kākiti imakanāta imakiniātaāna. Iuasaaki Teoso sākire auīākari sari notakata. Teoso sākire mauīākati kaikota.

³⁵ —Iuasaakiko atxiiti ipi sito kamanātari atarokiri. Teoso sākire auīākaro sari notakata. Teoso sākire mauīākato kaikota.

³⁶ —Iuasaakiko atxiiti ipi kiki kicio parīkauata. Āti sa notakata, āti kaikota —itxa Xesosi.

³⁷ Ininiā imoianariakori pimaāri:

—Namoniparako? —itxana.

Ininiā iua apakapapiretana:

—Aãtamatakasaakiri maiori apotiitiniãtaãua, ikinimane imarotari ipĩkari iuaãtaã auini. Iua atokokana ikinimane atamatariko kãkiti apotiitiniua notakata nikanapiriãkasaaki —itxa Xesosi.

18

Sito, Kãkiti Misiritiko Mereẽkari Pakini

¹ Xesosi misãkiretari imoianariakori ãti sãpirenatxi atão inakari oerekiko, Teoso misãkiretiko pirenã. Ikara inakari oerekari kãkiti ãtipirika imisãkiretiniri Teoso, Teoso misãkiretiko imatakanapakani ĩkapani. ² Xesosi sãpiretari ia sãkiretxiti:

—Sitatxi auari kãkiti misiritiko mereẽkari. Iua kona paxitari Teoso. Kona ipaxitari kãkiti apaka. ³ Iuaã sito apaka aua. Ôtaniri ipĩpe. Tikinitakoro otxaua. Oa nirekari iua atão ikamini oa misiritakarimoni. Txamari iua kãkiti misiritiko mereẽkari !ipotxitari omokaiakari pirenã ikenakotini. Osãpiretapikari iuamoni: “Pikenakotariko nisãkire. Pikamariko atão nota misiritakarimoni. !Nimĩteenekaikari nota misiritakari apikomoni misiritinino,” otxa.

⁴ —Isãpakapekari ãtipirika osãkire ikenakotini. Ininiã eereka ixinikari: “Atãopitikara, kona nota paxitari Teoso, kãkiti pakini. Iuaritika nikamariko onirekakiti, kotxi ⁵ ãtipirika oa tikinitakoro amanaãnãtano, ininiã nika-maãkaretxitaro. Ininiã nikamariko onirekakiti, kotxi nisãpakapekaro osãkire. ãtipirika ikara atoko otxanãtapikano. !Nimĩteenekaikari,” itxa kãkiti misiritiko mereẽkari.

⁶ Ininiã Xesosi txana imoianariakori:

—Ikara kãkiti misiritiko mereẽkari kona erekari, iuaritika ikamari osãkire iaõka. ⁷ Teoso apiaerekata. Ininiã ikenakotapitikari imereẽkini sãkire pokamara, ĩkanõka. Ninoã amanaãri Teoso imoianatinina. Ininiã apiata Teoso kenakotari isãkirena. Patimari Teoso kenakotiniri imereẽkini amanaãkiti. ⁸ Nisãpiretai, patimari Teoso misiritinina ninoã misiritakani. Ia nĩpimaãi. Nota hĩtari iaxitikiri iuaĩkana nikanapiriãkasaaki, atxiĩti napokari nisãkire auĩãkani ĩkorapokoriti? —itxa Xesosi.

Pariseo, Txineiro Apotiĩtakari Pakini

⁹ Iuikakaniua !apokaerekatari apanakini. Ninoamoni, ninoanokara kamari atão. ãti õti Xesosi sãpiretari ia sãpirenatxi atão inakari oerekiko, kãkiti ikara atoko inakanimoni atão imarotinina ĩkapani:

¹⁰ —Ipi kiki sari Teoso misãkiretiko aikotimoni. ãti kiki pariseo itxaua. ãti kiki auitetxiakori txineirote apakapakari itxaua. Itene iua misiritari kãkiti, kotxi kãkitimoni imakatzakaro apikomoni txineiro. Kona atão imakatzaka. Imisiritari kãkiti. ¹¹ Iuaã pariseo tima Teoso imisãkiretini ĩkapani. Txama iuaka imisãkiretaua. Ia atoko itxa isãkire: “Teoso, nota poxokopitikano, kotxi nota apanakini atoko kona nitxa. Kĩtiriri !nitxaua. Kãkiti misiritakari kona nitxaua. Kona nota sirĩka ãti ĩtanorokata. Kona nota ia txineiro apakapakari atoko na nitxa. Konapitini. ¹² Ikini semanati, ipi õti nitakanapari ninikini pite nimisãkiretini ĩkapani. Txineiro nisikai. Tesi txineirota auiniãno, ãtoka nisikai, ininiã pipaniãtakiti iaõka nikama,” itxa iua pariseo.

¹³ —Iuaaaki txineiro apakapakari ikira atoko itima. Kona ionakaãta iaxiti. Iaritari itorota imaerekani oerekini ĩkapani, kotxi maerekati ikamapeka. Itxari Teosomoni: “Teoso, piamonĩkano. Kona erekano nota, kotxi maerekati kamakarino nota,” itxa txineiro apakapakari.

¹⁴ Ininiã Xesosi txari:

—Atãopitikara nisãkire. Ikara inakari kiki Teoso kamaerekata. Isikasaaki iua aapokomoni, erekari itxapekaua. Iua pariseopekana, Teoso ! ika-maerekatari iua.

—Iuikakarua, poiãori itxauako. Poiãoripekana, apiatakari itxauako —itxa Xesosi.

Amarini Apokini Xesosimoni
(Mateo 19.13-15; Marko 10.13-16)

¹⁵ Āti õti kãkiti minari amarini Xesosimoni erekari ninoamoni itakini ĩkapani. Txamari Xesosi moianariakori atapakasaakiri kãkiti imiakori mĩkani, isipikapana.

—Hĩkanapiripeka. Hĩsipeka —itxana.

¹⁶ Txamari Xesosi txari imoianariakori:

—Hãuiritanako amarini notamoni apokini. !Hĩsipikapapena amarini, kotxi nitiretapitikana ninoa. Nisãkire auĩãkani auikari nisãkire amarini auikini atoko. Kãkiti nisãkire amarini auikini atoko inakaninokara apoka Teoso auĩttxi ininiãtaãua. ¹⁷ Amarini auikari iri sãkire. Ininiã hĩxinikariko ia: Amarini atoko himinakanĩã, Teoso sãkire itene himauikakanĩã, ininiã Teoso auĩttxi ininiãtaãua !hĩiroã —itxa Xesosi.

Kiki Katiiri Pirena
(Mateo 19.16-30; Marko 10.17-31)

¹⁸ Xoteo auĩte pimaãri Xesosi:

—Koerekareri erekari, kiripa nikama Teosokata ãtipirika nauini ĩkapani? —itxa.

¹⁹ Xesosi txari iua:

—Kininiãpa “erekari,” pitxano? Kãkiti erekari !auari. Teosonanira erekari.

²⁰ Pite imarotapitikari Teoso paniãtakiti: “!Pisirĩkape ãti ĩtanorokata. !Poka-niuatape. !Pĩĩtiriuatape. Apanakini !pimisirienetape. Piri, pinoro pakini pipaxitako.” Ikara atoko pimarotapeka —itxa Xesosi sãkire.

²¹ Ininiã iua kiki apakapapiretari:

—Nota axapitipanika ninakasaaki, nikĩpitari ikara atoko inakari sãkiretxiti Teoso paniãtakiti —itxa.

²² Xesosi kenakotakasaakiri iua kiki sãkire, itxari:

—Auapanika ãtinoka pikamini tĩkane. Ikinika pitii pivẽtxitako, eereka oa txineiro piskanako minakatĩ mauakinimoni. Eereka pisa notakata. Ikara atoko inakari pikaminiã, Teoso tixine papokasaaki ikinipoko erekari auini-iko pite —itxa Xesosi sãkire.

²³ Iua kiki ikara ikenakotakasaaki, imatinaniuata, kotxi iua iteene katiiri itxaua. ²⁴ Xesosi atamatakasaakiri iua matinaniuatini, itxari:

—Pamimari katxineiroteri auĩtetiniri Teoso. ²⁵ Atauako kamero napatari ãkorike sonakiã? Apia mimari kãkiti katxineiroterini auĩtetiniri Teoso —itxa Xesosi.

²⁶ Ikara inakari kenakotakani txari:

—Pamimari pisãkire. Ininiã kiripa apoka Teoso auiniãtaã? —itxana.

²⁷ Ininiã Xesosi txana:

—Kãkiti maposotakiniti Teoso posota ikamini —itxa Xesosi.

²⁸ Ininiã Petro txari:

—Ate takanapapekari ikinipoko pitekata asini ĩkapani —itxa.

²⁹ Ininiã Xesosi txari:

—Atãopitikara, ininiã ia atoko nitxai hĩte. Pauini pitakanapiniã, pĩtanoro, pitariakori, piri, pinoro, pamariteakori pakini pitakanapiniã, Teoso auĩttxi

ininiãua pirenã pisãpiretini ìkapani, ³⁰ ininiã ìkorsãaki apiata erekari papakapa. Ininiã äti öti pipìkasaaki iaxiti papokasaaki, pauapininiika pitxako –itxa Xesosi.

Iuaìkana Xesosi Sãpiretari Ipinini
(*Mateo 20.17-19; Marko 10.32-34*)

³¹ Äti öti Xesosi anikari imoianariakori ikira atoko, misãkireta itxana:

–Uatxa Xerosareëmoni asa. Kitxakapirìka Teoso sãkire sãpiretakani sãpiretãpekari nota hìtari iaxitikiri pirenã. Ninoã sãkire ìkatsopatakìtina pãitiki apokapitìkako, ³² kotxi nisikaãkako Xoteo minakonimoni. Ninapetaãkako. Nimisãkirepìretaãkako. Nikiisokaãkako. ³³ Niaritaãkako. Eereka nokaãkako. Ipi, äti pakini ötisaaki iuaìkana nõkitikaua –itxa Xesosi.

³⁴ Xesosi moianariakori ìmarotari isãkire. Ikara sãkiretxi kipatakori atoko itxa. Ininiã kona ninoã imarotari isãkire.

Mõsiãreti Xesosi Makananìtini
(*Mateo 20.29-34; Marko 10.46-52*)

³⁵ Xesosi apokaãpota Xerikoo sitatxiti takote. Mõsiãreti kimapori tiniãpo iitopãkanãta. Amanaãnãtaro txineiro. ³⁶ Ikenakotari kãkiti kimaporiã napakani, ininiã:

–Kiripa ikara? –itxa.

³⁷ –Xesosi Nasaree sitatxitikiri, iuara napaãpota –itxana apanakini.

³⁸ Ininiã iua mõsiãreti akirikata:

–Xesosi, Taviini apika mekanirii, piamonìkanoko –itxa.

³⁹ Ninoã ìkiikakani txitari iua:

–!Pakiripoatape –itxana.

Txama ìteene iua akirikata iuaìkana:

–Taviini apika mekaniri, piamonìkano –itxari.

⁴⁰ Ininiã Xesosi iotoka. Amanaãna kãkiti:

–Ere kiki himina notamoni –itxa Xesosi.

⁴¹ Xesosi takote apokasaaki, Xesosi pimaãri:

–Kipa pinireka nikaminii pitemoni?

–Kõsiãrepeka ninini ninireka –itxari.

⁴² Ininiã Xesosi txari:

–Kõsiãrepekai uatxa, kotxi pauikari nisãkire –itxa.

⁴³ Iuasaakipeka iua kiki kõsiãrepeka itxa. Ininiã iua saãpota Xesosi tikini. Teoso ereka inini pirenã isãpireãpota. Ikinimane kãkiti itùkasaakiri Xesosi kamakiti iuamoni.

–Peerekari Teoso –itxana.

19

Sakeo Pirena

¹ Xesosi Xerosareëmoni isikasaaki, Xerikoo sitatxiti apanìkaki inapaãpota.

² Iuaã aua kiki, Sakeo inakori. Iua katiiri. Iua kãkiti txineirote apotiitakari auìtetxiakori ìkapani. Apanakini txineiro apotiitakani auìte itxaua. Iua misirienetari kãkiti. Imakatzakari txineiro auìtetxiakori ìkapani. Txamari apikomoni imakatzaka. Kona atão ikamakiti. !Erekari iua.

³ Xesosi apokasaaki Xerikoo, iua Sakeo nirekari Xesosi atamatini. ! Apakata atamatìniri, kotxi pãitiri iua. Itomaneri kãkiti Xesosi ìtinikata auanãta. Ininiã !apakata mõtãnoti atamatìniri iua. ⁴ Ininiã imiteka Xesosi apisa, aaminaã kanìka itxa. Xesosi iuaã napakasaaki, iposotari itikiniri.

⁵ Xesosi apoka iua aamina patapi. Ionakaãta itxa. Itxari:

—Sakeo pikatxaka, katima pitxa. Uatxa, paapokomoni nisako, nianapokotini ikapani —itxa Xesosi.

⁶ Ininiã katxaka katimapeka itxa. Ipxokoniritika iua apakapari Xesosi.

⁷ Ikinimane iuaã auakani misãkirepiretari Xesosi. Itxana:

—Xesosi sari maerekati kamakari aapokomoni. Kininiãpa iua sa iua aapokomoni? —itxana.

⁸ Ininiã iua aapoko apoãka atoko, Sakeo tima isãkirauatini ikapani. Ininiã itxari Xesosi:

—Ipixini ninakiti nisika mattiinimoni. Nĩtirĩkakiti iuaĩkana nisikanako kãkiti. Txineiro nĩtirĩkiniã, ininiã iuaĩkana ipi ipi pakinikata nisikariko nimisiritakinimoni —itxa Sakeo.

⁹ Ininiã Xesosi:

—Ia kiki Apraão apika mekaniri apaka. Uatxa imaerekani makatxakaãka, kotxi itakanapari maerekati ikamakiti. ¹⁰ Kãkiti itari iaxitikiri apoka ikorapokoriti kãkiti pĩpinanaãkani inisini, imaerekani imakatzakini ikapani —itxa Xesosi.

*Nitiritxi Erekarĩ, Nitiritxi Maerekati Pakini
(Mateo 25.14-30)*

¹¹ Eereka Xesosi sãpiretari ia sãpirenatxi atão inakari oerekiko. Oerekari ia sãpirenatxi, kotxi Xerosareẽ ninoa apokaãpota. Kãkiti uãkatari paĩtiki Teoso ikinimane auĩte ininiua. ¹² Ia atoko itxa:

—Kiki aiamatapeka õtakoxiti isini, auĩtetxi ininiua ikapani. Iua nirekari isini, ininiã eereka inirekari ikanapiriini. ¹³ Ininiã isini apisapanika akiritari tesi inĩtiriakori. Isikanapana txineiro tesi ota oro kamakoro. Åtoka isikaãpota inĩtiriakori. Itxa: “Nota åtiãtaã nauakasaaki, hiamotari tiĩtxi. Eereka pivẽtxitari apikomoni txineiro hãpakapini ikapani. Ikara atoko hĩtxako,” itxa.

¹⁴ —Isipeka atoko kãkiti iuaã auakani inirekari iua auĩtetxi ininiua, kotxi omanatarina. Ininiã ninoa iokanapireta iuamoni: “Ate inirekai pite aãũte pininiua,” itxana ninoa.

¹⁵ —Iuasaaki iua åtiãtaã auĩtetxi ipeka itxaua. Ikanapiriãkasaaki akiritana inĩtiriakori, txineiro isikanapakini. Ininiã iua txana ninoa: “Hõerekano txineiro apikomoni hãpakapakito,” itxa. ¹⁶ Åti initiri apoka iuamoni. “Nipatrãote, pite sikanapano åtoka ota. Uatxa tesipeka ota aua notamoni,” itxa.

¹⁷ —Iuasaaki auĩtetxi txari iua: “Pite kamakiti peerekari. Pite ninitiri erekari. Åtonoka ota nisikapekai, iuaritika piparĩka peerekari. Uatxa tesi pakini sitatxiti auakani auĩte pitxauako,” itxa.

¹⁸ —Åtipekana apoka auĩtetximoni: “Åti ota pisikanapano nota. Uatxa sĩkopeka ota aua notamoni,” itxa initiri.

¹⁹ —Ininiã auĩtetxi txari: “Erekapitikari. Ininiã sĩko pakini sitatxiti auakani auĩte pitxauako,” itxari.

²⁰ —Åtipekana apoka auĩtetximoni: “Oniã pinakito txineiro. Mãkatxi mataã niapirikaro, poteta nitxaro pitxineirote. ²¹ Nota pĩkai pite. Pataparaxinirei. Nimarotari pite amotari åti kamakiti. Piamotari pikiena åti kãkiti kiena,” itxa.

²² —Ininiã iua auĩtetxi apakapapiretari: “Pite ninitiri maerekati pitxaua. Pite txano nota kiki kataparaxinireri nitxaua. Pimarotari niamotiniri åti kamakiti. Pimarotari niamotiniri åti kãkiti kiena. ²³ Ikara atoko ininiã, pimanirekaniãri piparĩkauatini, kinirepa kona pisikataro nitxineirote pãkomoni? Pisikaãkamaroko, napakapamaroko apikomoni nitxineirote nikanapiriãkasaaki,” itxa auĩtetxi.

24 —Ininiã iua paniãtana iuaã auakani: “Himakatxakaroko nitxineirote iuamoni nisikakito. Hísikaro tesi ota auakitimoni,” itxa.

25 —“Auapeka tesi ota iuamoni,” itxarina.

26 —Ininiã auítetxi apakapapiretana: “Piparĩkauatiniã, ininiã pinakiti itori aua, ininiã apikomoni papakapa. Pite iarinouatiniã, ininiã ikara xika pinakito poião. Æti õti piarini xika ikara poiãori makatxakaãkako apaka.

27 Uatxa himinana notamoni nimokaiakariakori, kotxi ninoa ! inirekano nota iauítena nininiua. Hõkana ninoa nota apisatoõ,” itxa auítetxi.

Xesosi Xerosareẽ Apokaãpotini

(Mateo 21.1-11; Marko 11.1-11; Xoão 12.12-19)

28 Ikara inaãka atoko, Xesosi sari imoianariakori apisa Xerosareẽmoni. 29 Xerosareẽmoni isikasaakina, apokaãpotana Petxipaxee, Petãnia pakini aapokotxiti. Ninoa ipi aapokotxi Oriva inakori xirata takote. Iuaã auakasaaki, Xesosi iokanatana ipi imoianariakori aapokotximoni.

30 —Ikira aapokotximoni hõsa. Iuaã hãpokariko xomẽta ãkiri, iaxiriãkori. Iua xomẽta ãkiri kãkiti maitopãkakotipanika inakori. Hĩkoxiripatakariko iua. Himinari notamoni. 31 Ipitikiri akiritiniã: “Kinirepa hõte koxiripatakarini nipira?” inakasaakii, ia atoko hĩtxariko: “Apiananiri nirekari iua,” hĩtxako — itxana.

32 Iuaã apokasaakina, ikinika Xesosi sãkire iaõka auapeka. 33 Ninoa koxiri-patakasaakiri xomẽta ãkiri, ipitikiri apoka.

—Kinirepa nipira hĩkoxirika? —itxa.

34 Ininiã ninoa:

—Apiananiri nirekari iua —itxana.

35 Ininiã anikarina xomẽta ãkiri Xesosimoni. Imoianariakori takari imãkana xomẽta nopini. Imoianatarina Xesosi xomẽta nopini iitopãkini ikapani.

36 Xesosi saãpotakasaaki Xerosareẽmoni, apanakini kãkiti matameẽkari imãkana kimaporiãpo Xesosi napini ikapani. 37 Õtanoxiratarì Oriva inakori iokiriãtakasaaki, ninoa imakinika ipoxokoniritikana akiripoakatana, kotxi itikaeparina itori Teoso posotiire.

38 —Peerekari auítetxi, Apiananiri iokanatakiti kãkitimoni. Teoso takari erekari iuamoni. Ininiã Teoso !omanataikari kãkiti. Peerekari Teoso, iaxiti apiko nopinixiti auakari. Apiananiri itxaua —itxanãtana ninoa iusaaki.

39 Iuaã kãkiti itomaneri sauaki aua pariseoakori apaka. Ninoa txari Xesosi: —Koerekareri, piotokakana pimoianariakori ikara isãkirena.

40 Ininiã Xesosi:

—Atão ninoa akiritakiti. Ininiã ! nipinitana iotokakiniri. Nimauiri-takaniãna isãkirena nota Apiananiri nininiãua, ininiã Teoso txĩkitakari kai soro sãkirauatini ikara sãkire isãpiretini —itxa Xesosi.

Xesosi Txiapata Xerosareẽkini Itiretini

41 Ninoa apokaãpotakasaaki Xerosareẽ, Xesosi Xerosareẽ atamatakasaaki, iua txiapata, kotxi iuaã aua mirikiniti kãkiti isãkire mauikakani.

42 Ixinikasaakina Xerosareẽ auakani itxa:

—! Himarotari hĩkamakiti tĩkane hãuini ereka inini ikapani, neenamatzì mauakani ikapani. Ninirekari himarotiniiri, txamari uatxa ikara himarotini kipataãka himimarotakaniri ikapani. 43 Æti õti himokaiakarini ãkitai hõte. Ininiã kona kãkiti pokĩka sitatxi, kona ãroã. Iusaaki himitekini ! auari. Hãkitapeẽkaikako. 44 Himokaiakarini xipokariko ia sitatxi. Ikinimaneko okaãkako. Kai ãti kai nopini auakari !ikaikotaika. Imakinika xipope. Iua atoko inakari auako, kotxi hõte !apakapari Teoso hõtemoni apokasaaki.

*Pirãtxi Vẽtxitakani Omitikiko**(Mateo 21.12-17; Marko 11.15-19; Xoõo 2.13-22)*

⁴⁵ Xesosi apokasaaki Xerosareẽ, isari Teoso misãkiretiko aikotiã. Iuaã auari kãkiti tiitxi vẽtxitakani, ininiã Xesosi omitikana. ⁴⁶ Xesosi txana ninoa:

—Teoso sãkire iõkatsopatakori txari:

Ia naapoko, “Teoso misãkiretiko aikoti” akiritaãkako, itxa. Txamari hũte txĩkitakari ia aiko kũtiririni iomaãtiniãtaã ininiua —itxa Xesosi.

⁴⁷ Teoso misãkiretiko aikoti ãki ikiniõtika oerekaruata. Iuasaaki sasetotxi auũteakori, kaiõkatsopareriakori, kãkiti auũteakori pakini kinirão okaka txari Xesosi. ⁴⁸ Txamari itomaneri kãkiti potxitari Xesosi oerekakiti sãkiretxiti. Ininiã ninoa kaikotapika Xesosikata ikinika isãkire imarotinina ikapani. Ikara xika !iposotarina okiniri iua iuasaaki.

20*Xesosi Paniãtakari Moerekakoni**(Mateo 21.23-27; Marko 11.27-33)*

¹ Xesosi Teoso iokanapirena erekari isãpiretakasaaki Teoso misãkiretiko aikoti ãki, iuasaaki sasetotxi auũteakori, kaiõkatsopareriakori, kãkiti auũteakori pakini apoka. ² Ninoa pimaãri Xesosi:

—Pite omitikana tiitxi sikakani Teoso misãkiretiko aikotiã auakani. Kipaniãpa pikamari ikora pikamakiti? Kipa paniãtai? —itxana.

³ Ininiã Xesosi txana:

—Nota apaka pimarauatako hĩtemoni. ãtinoka nipimaãiko hũte. Ininiã hãpakapipiretano. ⁴ “Kipa paniãtari Xoõoni ipatxisarauatini? Teosokani paniãtari Xoõo? Kãkitikani paniãtari Xoõo?” —itxa Xesosi.

⁵ Eereka ninoakakarini isãkirauatana:

—Kanatokopa atxa? “Teosora,” aniniã, ininiã ipaniãtamaua eereka: “Kinirepa kona hãuikitari Xoõo sãkire?” itxamaua ate. ⁶ “Kãkitira paniãtari Xoõo,” aniniã, ininiã kãkiti kiporonakauako ate kai soroã, kotxi ninoamoni Xoõo Teoso sãkire sãpiretakari itxaua. Ininiã kanatokopa atxa? —itxakakuana.

⁷ Ininiã eereka ninoa apakapipiretari Xesosi:

—Kona ate imarotari —itxana.

⁸ Eereka Xesosi txana:

—Ininiã nota apaka kona nisãpiretai nipaniãtakiri uãka —itxa Xesosi.

*Parĩkauatakani Maerekani**(Mateo 21.33-46; Marko 12.1-12)*

⁹ Eereka Xesosi sãpiretari kãkiti ia sãpirenatxi atão inakari oerekiko. Ia atoko itxa:

—Aua kiki. Itakari amãtiiri ova inakoro. Ovanoka itaka ikikioteẽ. Eereka iĩkitxitana kãkiti itakare nĩkatakani. Eereka isari ãti tixini. Iuaã mapakanani ikaikota. ¹⁰ Oamiko manapi iokanatarini inĩtiri apakapiniri ipixini amãtiiri. Txamari amãtiiri nĩkatakani noropatari iua nitiri. Ininiã eereka iokanatarina iua. Kona axapiti amãtiiri anika ipatrãotemoni. ¹¹ Ininiã iuaĩkana ãti inĩtiri iokanata. Iuaĩkana ninoa noropatari iua inĩtiri. Imisiritarina. Eereka iokanatarini iua. Kona axapiti amãtiiri anika ipatrãotemoni. ¹² Iuaĩkana ãti inĩtiri iokanata ikikiotemoni. Iuaĩkana ikarotarina, iokanata itxarina. Kona anikari axapiti amãtiiri iuamoni. ¹³ Iua katarareri txari: “Kipa nikamaã? Ari, uatxa nĩmarotapekari. Namarite nitiretakiti niokanatako ninoamoni. Ninoa paxitapitkariko iua,” itxama.

14 —Amātiiri nīkatakani atapari amātiiri takakari ākiri apokaāpotini. Ininiā itxana: “Katakareri ākiri ina. Katakareri ipīkasaaki, iua ākiri apakapari ikinika. Ininiā maōkari iua. Ininiā ikinika itakare aua atemoni,” itxana.

15 —Ininiā ninoa kosekaītotari katakareri ākiri, mapara okaītota itxarina. Ininiā okapirina.

Ininiā Xesosi pimaāri kākiti iuaā auakani:

—Kirīpa iua katakareri kamaā? 16 Iua okanako ikinipoko ninoa. Itakare apanakinimoni sika itxako —itxa Xesosi.

Kākiti kenakotakasaakiri ikara pirena itxana:

—Ikara atoko inakari !anireka —itxana ninoa.

17 Ininiā Xesosi iteene atamatana.

—Ininiākara natokopa itxa Teoso sākire iōkatsopatakori oerekiniua?

Apokotxi kamakani kona nirekari ātika kai soro. Iua kai imanirekakiniti kai apiari itxapekaua. Apanakini kai soro maīkakari itxaua.

Itxa Teoso sākire iōkatsopatakori. 18 Kākiti mākititiniā ikora kai xika, ikarotaāka. Ikora kai irikiniā kākiti nopini, pomaīpeka itxana. Ininiā eereka aāpani itxaua —itxa Xesosi.

Homano Auīte Īkitxitiko

(Mateo 22.15-22; Marko 12.13-17)

19 Iuasaaki Xesosi sākirauatakasaaki, sasetotxi auīteakori, kaiōkatsopareriakori pakini, nirekari maīkiniri Xesosi, okinirina ikapani, kotxi ninoamoni ikara Xesosi sāpiretakiti oerekari kākiti ninoa nirekiniri okiniri Xesosi. Txamari ! imaīkarina, kotxi ipīkarina apanakini kākiti. 20 Ikinīōtika ninoa itikapikarina Xesosi sinimoni imarotinina ikapani. Ininiā ninoa iīkitxitari kamīkapirirerini Xesosi imisākiretinina ikapani. Ninoa nirekari Xesosi kerokiniri isākire. Ikerokiniāri, iposotarina anikiniri auītetxiakorimoni okinirina ikapani. 21 Ininiā ninoa kamīkapirirerini apoka Xesosimoni.

—Koerekareri, ate imarotari atāopitikara pisākire. Pite oerekari ikinipoko kākiti atāo Teoso nirekiti kamiko. Poerekakiti sākiretxiti kākiti apiarinimoni, iuatxikana poerekari kākiti poiāorini. 22 Atāokani txineiro asikini Homanoakori auītemoni, Sesa inakorimoni? Apakata amasikakaniro iuamoni? —itxana ninoa.

23 Xesosi imarotari ninoa nirekari ikerokiniri isākire, ininiā iua txana:

—Kinirepa hātamaekatatano nota? 24 Poerekano txineiro ota. Kisanōkapa ia? Kiuākapa aua uai? —itxa.

Ininiā ninoa:

—Sesa sanōka, iuāka apaka aua —itxana.

25 Ininiā Xesosi:

—Hīsikariko Sesamoni iua nakiti. Hīsikariko Teosomoni iua nakiti —itxa Xesosi.

26 Ninoa nirekari Xesosi kerokiniri isākire kākiti apisatoō, txamari ! ikerokari. Ininiā ninoa tsorikaāta Xesosi apakapapiretakiti ikenakotakasaakina. Apikomoni isākirauataikana.

Ipīkari Ōkitikiniua Mauikakoni

(Mateo 22.23-33; Marko 12.18-27)

27 Ikara inaāka atoko, apoka satoseoakori inakoni. Satoseo kona auikari ipīkari iuaīkana ōkitikiniua. Ninoa misākiretari Xesosi. 28 Itxana:

—Koerekareri, kitxakapirika Moisesini iōkatsopatari ia atoko inakari: “Kiki meenetipanika ipininiā, iua itari takaroko tikinitakoro. Iua itari keene ininiā, itakauākatari amarini iua itarini ipīpekarini uāka,” itxa Moisesini.

29 Setxi itaritxiakori aua mitxi ikorapokoriti. Apia kiomanetakari itaniriuaata. Meenetipanika ipina. 30 Itari takaro iuani tikinitakito. Iua apaka ipina

meenetiapanika. ³¹ Iuaĩkana āti itari takaro oa. Iuaĩkana ipina meenetiapanika. Iua atokotxikana itxana imakinikana itariakori. ³² Eereka oanipekana opĩpe apaka. ³³ Ipĩkani ōkitikasaakiaua, kirĩpa oĩtaniri? Kotxi ikinikana takapekaro oa –itxana.

³⁴ Ininiā Xesosi:

–Uatxa ĩkorasaaki kākiti ĩtaniriuata. ³⁵ Teoso nakitiakori iuaĩkana ōkitikasaakiaua, !ĩtaniriuataikana. ³⁶ Ninoa !ipinaika, kotxi Teoso nitiriakori iaxitikiñi atoko itxauanako. Iuasaaki Teoso anaakori atoko itxauana, kotxi Teoso ōkitikapekana ninoa. ³⁷ Hite kerokari hĩsākire. Hite sākire txari: “Ipĩkani !ōkitikaikaua.” Moisesini oerekaua ipĩkani iuaĩkana ōkitikapnikaua. Iua iōkatsopatakasaakiri aamina tirinakari pirena, isāpiretari Teoso sāpiretakiti. Ia atoko itxa Teoso iuasaaki: “Nota Apraāo Teosone, Isaki Teosone, Xakoo Teosone pakini nitxaua,” itxa Teoso. ³⁸ Ininiā ninoa Apraāo, Isaki, Xakoo auapanika, kotxi Teoso !ipĩkani Teosoneni. Auāki inakani Teosonera iua, kotxi iuamoni ikinimane auākipanika –itxa Xesosi.

³⁹ Eereka ātikaka kaiōkatsopareriakori txari:

–Koerekareri, atāopitikara pīsākire –itxana.

⁴⁰ Ikara inaāka atoko kākiti pĩkarauata apikomoni ipimarauatini.

Teoso Mereēkiti Tavii Apika Mekaniri Itxaua

(Mateo 22.41-46; Marko 12.35-37)

⁴¹ Ininiā Xesosi pimaāna:

–Kinirepa isāpiretaāka Teoso mereēkiti Taviini apika mekaniri ininiua?

⁴² Kotxi Taviini iōkatsopata Xikari aātsopateē. Itxari:

Apiananiri txari niauĩtemoni: “Nota kikomoni piitopāka.

⁴³ Piitopākiniritika nixipokariko pimokaiakariakori. Nikamariko ninoa pikiti pitakiniātaā atoko ininiua.”

Itxa Taviini xikare. ⁴⁴ Taviini akiritari Teoso Mereēkiti “Niauĩte.” Ininiākara kanatokopa iua Tavii apika mekaniri? –itxa Xesosi.

Kaiōkatsoparerini Maerekani

(Mateo 23.1-36; Marko 12.38-40)

⁴⁵ Eereka kākiti apisatoō Xesosi ōtākikana imoianariakori. ⁴⁶ Ia atoko itxa:

–Erepaniko, kaiōkatsoparerini misirienetini. Ninoa ieretakari mākatxi ĩtanori, peereri, apanakini atamatinina ĩkapani. Tiitxi amotikoātaā ninoa potxitari kākiti ninoakata sākirauatini apanakini atamatinina ĩkapani. Ninoa potxitari iitopākinina auĩtetxi topākiniātaā aiko āki Xoteo apotitiniātaāua. Kiinirisaaki ninoa nirekari apiari topākiniātaā iitopākinina.

⁴⁷ Kiki ipĩkasaaki, ninoa misiritaro tikinitakoro. Ninoa mixirikari oaāpoko, iuaritika imisākiretarina Teoso. Teoso imisākiretakasaakina, kaiāori sākiretxi isākiretana. Ininiā apanakini kenakotakasaakiri, ninoa xinikari: “Atāo iua imarotari Teosokata isākirauatini,” itxana. Txamari Teoso kamaākaretxitana, ininiā apiata imisiritaākanako.

21

Tikinitakoro Matxineiroto Sikakito

(Marko 12.41-44)

¹ Xesosi sākirauatakasaaki Teoso misākiretiko aikoti āki, itikari katiirini takiniro itxineirotena kaixa āki Teoso ĩkapani. ² Iuasaaki oāua tikinitakoro matiito. Ōtaniri !auaika. Oa sikaro ipi txineiro ota okinika oamoni auakaro.

³ Ininiā Xesosi txa:

–Atāopitikara, okira sito sikari apiata. ⁴ Kotxi apanakini sikaro itxineirotena itetakito. Okira sikari okinika onakito –itxa Xesosi.

Teoso Misäkiretiko Aikoti Irikiko
(Mateo 24.1-2; Marko 13.1-2)

⁵ Äti öti Teoso misäkiretiko aikoti äki aua Xesosi imoianariakorikata. Aiko ereri pirena isäkirenätana.

—Uai peereri. Ere kai sorokiniri paretxiä auakari pakaronepokori. Patamatari käkiti sikakiti Teosomoni —itxana.

⁶ Ininiä Xesosi txana:

—Ari atäopitikara peerekari. Txamari apokapitikako äti öti ia aiko irikiko İkapani. Iuasaaki kai äti kai nopini auakari !auaika. İkinipoko irikaäkako —itxa Xesosi.

Misirikaretxi Apokaenetini
(Mateo 24.3-14; Marko 13.3-13)

⁷ Ininiä ninoa pimaäri:

—Koerekareri, kirisaakipa ikara atoko inakari auapani? Kiätokopa itxa ia aiko Teoso misäkiretiko irikini öti manapi aimarotini İkapani —itxana.

⁸ Ininiä Xesosi apakapapiretana:

—Erepaniko, xipokatxi öti apokaäpotakasaaki, käkiti nirekari imisirienetiniü hïte. İto aäpirena auako. Kaiäopokori kiki säkire: “Teoso mereëkitikarano nota. Nota apokapeka uai,” itxamana. Paxirari ninoa säkire. !Himaäkatapena ninoa. !Himoianatapena ninoa. ⁹ Neenamatsxiene hïkenakoenetakasaaki, !hïpïkarauatape. İua atoko inakari merepanika auako. İuasaaki xipokatxi öti !apokapanika —itxa Xesosi.

¹⁰ —Äti uäka kamari neenamatsxi äti uäkakata. Äti auïtetxi sotatoneakori neenamauata äti auïtetxi sotatoneakorikata. ¹¹ İuasaaki xipokatxi öti apisa, nota apokini apisa, itixi iakeëkatakato. Natxi auako. İtori amianari auako. Apaka käkiti atamatakiti iaxiti kamapïkaretana.

¹² —İkara inakari apisa, apanakini maïkaiko hïte. Himisritaäkako. Xoteoakori anikaiko aiko Xoteo apotiitiniätaäua Xoteoakori auïte apisatoö apoïtiniina İkapani. Hïtakaäka kateïa äki. Ninoa anikaiko hïte itixi auakani auïteakorimoni hïte apoïtinina İkapani. İua atokokanerako hinaäkako nisäkire häuikini xika. ¹³ İuasaaki auïtetxiakori apisatoö häuakasaaki, hïsäpiretariko Teoso iokanapirena erekari. ¹⁴ Ninoa himisäkiretini apisa, maerekaxiniretika !hïtxape. Kona hïpïkarauatape, ¹⁵ kotxi ninoa apisatoö häuakasaaki, nota sikaimaroretai hïte, ininiä himokaiakariakori !iposotari apakapapiretiniina hïte. !Iposotarina isäpiretiniina: “Kona atäo pisäkire,” !itxana. ¹⁶ Hinoroma, hïrima, hïtariakorima, apanakini hinirimanema, haökimanerema pakini sikaiko hïte himokaiakariakorimoni. Ätikaka hïte okaäkako İuasaaki. ¹⁷ İkinimane omanataiko hïte nisäkire häuikini xika. ¹⁸ İuaritika Teoso !auiritari ätika hiäko maporokiko, kotxi Teoso iteene nïkatapitikaiko hïte. ¹⁹ Himïteenekiniäri İkinika himisiritiko, ininiä Teoso txïkitakaiko ätipirika İuakata häuapininiika hinini İkapani —itxa Xesosi.

Xerosareë Xipokiko Pirena
(Mateo 24.15-28; Marko 13.14-23)

²⁰ Apikomoni Xesosi txari:

—Hätamatakasaakiri sotatokori äkitiniri Xerosareë, İuasaaki himarotariko pakotapaniri sitatxi xipokini. ²¹ İuasaaki hïte Xotéïa tōpa auakani himitekako oxiratarimoni. Sitatxi häuiniä, ininiä himitekako. Mapara häuiniä, kona hïkanapiripe sitatximoni, ²² kotxi İuasaaki käkiti misiritiko öti apoka. Teoso säkire İökatsopatakori säpiretatekari İkara öti apokini. ²³ İuasaaki !erekapaniri sito kamixiro İkapani, kaxitakarero İkapani, kotxi omitekini !apakata. Xoteo auiniätaä auapitikako iteene imisiritikona tïkane, kotxi

iuasaaki Teoso oerekari iua omanākare Xoteoakorimoni. ²⁴ Itomaneri kākiti okaākako saasara atoko inakaroā. Apanakini anikaākako ikini uāka tixinemoni. Xoteo minakanuia xipokariko sitatxi Xerosareē. Teoso auiritana ninoa kaikotini iuaā. Eereka Teoso xipokariko ninoa tapara. Eereka !auaikana –itxa Xesosi.

Kākiti Itari Iaxitikiri Kanapiriini
(Mateo 24.29-31; Marko 13.24-27)

²⁵ Apikomoni Xesosi txari:

–Nota uai apokini apisa, atokatxi, kasiri, iōriki pakini oerekariko kākiti nota iposope uai napokini. Apaka potxoari uiniti auari tsakati mitari. Iua tsakati miramaneri iene. Ikara xika itixi auakani kamaxirexinirepeka itxanako. ²⁶ Kākiti ākipa iotokako ipīkare xika. Itixi misiritiko xika ipīkarauata, kotxi iōriki, ikinika iaxiti auakani iakeēkatoko. ²⁷ Iuasaaki nota, hītari iaxitikiri katxakaāpota katxiārikata. Iuasaaki ikinimane atapanoko nota. Iuasaaki kaposotiireno nota. Niotximerekata napoka uai. ²⁸ Ikara itixi misiritiko apokaāpotakasaaki, haiamatako. Hionakaātako, kotxi paītiki nota kanapiriā hīte napini ikapani. Iuasaaki nimakatzakai hīte ikinika maerekati auiniātaā –itxa Xesosi.

Piko Mina Pirena
(Mateo 24.32-35; Marko 13.28-31)

²⁹ Xesosi sāpiretari āti sāpirenatxi atāo inakari oerekiko. Itxari:

–Hīxinikari aamina piko inakori. Apanakini ātiāo aamina apaka hīxinika. ³⁰ Pooīoporipeka onakasaaki, otomorekasaaki, “Kamoī apokanapanoka,” hītxa. ³¹ Iua atokokana ikara misirikaretxi mixikanani nisāpiretakiti hītikasaaki, iuasaaki himarotariko paītiki Teoso ikinimane auite itxauako.

³² –Ia nisākire atāo. Itixi auakani !ixipoka ikinipoko nisāpiretakiti mapokakani apisa. ³³ Iaxiti xipokapitikako. Īkoraxiti apaka xipokapitikako. Iuaritika nota sākire !ixipoka.

Iātapakori Ōti Pirena

³⁴ –Erepaniko, maerekaxiniretika kona hīttxape. !Hīsarauatape. !Hīpoātape. Hīparīkanoka ! hīxinikapeko, kotxi hīsarauatiniā, hīpoātiniā, hīparīkanoka hīxinikiniā, ! hīxinikari nikanapiriini ōti, kotxi ĩkora ōti himimarotakani ōtisaaki, napokoko. Erepaniko, kotxi txikatoro atoko itxa napokini. Kākiti !imarotapaniri napokini ōti. ³⁵ Imakinika kākiti itixi auakani imarotariko napokini iuasaaki. ³⁶ Hiātapariko nikanapiriini. Ātipirika himisākiretariko Teoso. Hamanaāriko Teoso ikara inakari mamisiritakanii hīte. Hamanaāriko Teoso himapētauatakani ikapani hītari iaxitikiri apokasaaki iua apisatoō hītimakasaaki –itxa Xesosi.

³⁷ Īkiniōtika Xesosi sari Teoso misākiretiko aikotimoni Teoso sākire oerekini ikapani. Īkiniōtika mapiānikata Xesosi sari ōtanoxiratarimoni, Oriva inakori-moni. ³⁸ Īkanōkapanika kākiti apoka Teoso misākiretiko aikotiā Xesosi sākire ikenakotinina ikapani.

22

Satanasi Īroā Xotasi Xinireē
(Mateo 26.1-5, 14-16; Marko 14.1-2, 10-11; Xoāo 11.45-54)

¹ Kaiamapeka Pāscoa inakori kiiniriti apokini. Iua kiiniriti Xoteoakori nikari pāo matireēkati. ² Iuasaaki sasetotxi auiteakori, kaiōkatsopareriakori pakini nirekari Xesosi okinina, txamari, ninoa pīkari apanakini kākiti, kotxi ninoa apokaerekatari Xesosi.

³ Iuasaaki Satanasi ĩroaĭtotari Xotasi Isikariotxi inakori. Iua Xotasi Xesosi moianarikamara, apanakinikata. ⁴ Iuasaaki iua sari sasetotxi auĭteakorimoni, Teoso misăkiretiko aĭkoti nĭkatakani auĭteakorimoni. Iuasaaki isăkirauata ni-noakata Xesosi imĭkapiritini ĩkapani. Iuasaaki ninoa xinikaxitita:

—Kiătokopa itxatari Xesosi isikinĭ atemoni?

⁵ Sasetotxi auĭteakori enenĭka. Ninoa txari Xotasimoni:

—Pisikasaakiri Xesosi atemoni, aĭkitxitaiko pite —itxana Xotasimoni.

⁶ —Ateeneka —itxa Xotasi.

Ikara atoko inaăka atoko Xotasi iătapari isikiniri ōti manapi. Inirekari kăkiti mauakanisaaki, Xesosi imĭkapiritini.

Păskoă Kiiniriti Kamiko

(Mateo 26.17-25; Marko 14.12-21)

⁷ Iuasaaki kăkiti parĭkauata Păskoă kiiniriti ikaminina ĩkapani. Iua kiiniriti auakasaaki, itotarina păo matireăkati inikinina. Iuasaaki okarina soti auĭte ĩkiri kiinirisaaki inĭăkitina ĩkapani. ⁸ Xesosi paniătana Xoăo, Petro pakini:

—Hĭsako. Hăpotiitariko nipokori Păskoă kiiniriti ĩkapani —itxa.

⁹ Ininiă ninoa:

—Namonĭpa akamatari kiiniri? —itxana.

¹⁰ Ininiă Xesosi:

—Xerosareėmoni hĭsa. Iuaă hĭtikari kiki kaminiri sito parĭka. Iua apaănătari ĩparaă. Kopiti ikĭiă anikanăta. Iua aōkitaiko hĭte. Iuakata sa hĭtxako. Hĭĭroă aapokotxi iua ĩroiniătăă. ¹¹ Himisăkiretari kauiniri. Hĭtxariko iua: “Koerekareri nirekari imarotĭniri: ‘Namonĭpa ĩanapokotakani kaikotĭniătăă iriko? Iuaă inirekari ĩnapiĭniri Păskoă ōti imoianariakorikata,’ hĭtxariko iua.” ¹² Iuasaaki kauiniri oerekai ĩtanokiri koa mitari iuaă kiiniri ĩkapani. Imakinika tiĭtzi iposope. Iuaărako hăpotiitari imakinika Păskoă kiiniriti ĩkapani —itxa Xesosi.

¹³ Ininiă sa itxana. Apoka itxarina ĩkinika Xesosi săkire iaōka. Ininiă iuaă ninoa maiamatari kiiniri.

Xesosi ĩto, Iarėka Pakini

(Mateo 26.26-30; Marko 14.22-26; 1 Korĭto 11.23-25)

¹⁴ Ininiă Păskoă kiiniriti potarikasaaki, Xesosi imoianariakorikata topăka.

¹⁵ Ininiă Xesosi txana:

—Iteene ninirekari hĭtekata ninikiniri ia nipokori Păskoă kiiniritisaaki, natatsĭrauatiĭni apisa. ¹⁶ Ia atoko ĩnakari nipokori ĩnĭnikaikariko hĭtekata. Teoso ĩkinimane auĭte ĩnakasaakĭua, iuasaakiikarako ĩnikapitĭkariko iuaĭkana.

¹⁷ Eereka iua kosekari iătatxi koana ovaă ĩăriăti. Ininiă itxa:

—Niri, erekapitĭkari ia pisĭkakĭti —itxari Teoso.

Eereka itxana imoianariakori:

—Ia ĩăriă hăpakapako. Hĭkinika hiătariko. ¹⁸ Atăo nisăpiretai. ĩNiătaikaroko ovaă, Teoso ĩkinimane auĭte ĩminakanisaakĭua. Teoso ĩkinimane auĭte ĩnakasaakĭua, iuasaakiikarako iuaĭkana niătariko ovaă —itxa Xesosi.

¹⁹ Eereka ikosekari komiri:

—Erekapitĭkari ia komiri pisĭkakĭti atemoni —itxari Teoso.

Eereka imapixĭnikaăpotari, sĭkaăpota itxana imoianariakori:

—Ia niĭto okaăka hĭte ĩkapani. Ia komiri ĩnikasaaki, hĭxinĭkanoko nota. Hĭxinĭkari ĩpinĭni hĭte ĩkapani.

²⁰ Inĭkaăkarina atoko, ikosekaro ovaă. Isikana imoianariakori. Ininiă itxa:

—Ia ĩnarėka xĭketakari makatzakariko hĭte maerekani. Teoso săpiretapekari kăkiti ikamaenetakĭti amaneri kăkiti ĩkapani. Ia ĩnarėka oerekari kăkiti, Teoso kamapekari ikamaenetakĭti. ²¹ Iua ĩmĭkapitĭkari uatxa uai topăka

notakata. ²² Nota h̄itari iaxitikiri okaākako. Teoso s̄akire iōkatsopatakori s̄āpiretapekari n̄ipinini t̄ikane. Nota h̄itari iaxitikiri m̄ikapiritakari iteene mis̄ir-itaākako —itxa Xesosi.

²³ Xesosi moianariakori ninoakakarika is̄ākirauatana:

—Kipa sikatari Xesosi imokaiakariakorimoni? —itxanātana.

Kiripa Apiatakari?

²⁴ Ikara atoko inaāka atoko Xesosi moianariakori mis̄ākiretakakaua.

—Kiripa apiatakari txatapaniuko ate sauaki? —itxana.

²⁵ Ininiā Xesosi:

—Xoteo minakaniua aūteakori itaparas̄ākireritika ipaniātana Xoteo minakaniua iaūitena nireēkiti ikaminina ikapani, iuaritika ninoa s̄akire, “Peerekaua ate. Ate moianatari k̄ākiti,” itxana. ²⁶ H̄ite kona ninoa atoko kona h̄itxape. Atx̄iiti apiari pitxaua h̄ite sauaki, ininiā amarini atoko pitxauako. Aūitexi pininiāua, nitiritxi atoko pitxauako. ²⁷ Kiripa apiatakari txataua? Aūitexi nipokori nikakarikani, apiatakari txatauako? In̄itiri nipokori kamakarikani apiatakari txatauako? Ikinimane k̄ākiti imarotari nipokori nikakari apiatakari itxaua. Txamari nota auakasaaki k̄ākiti sauaki, nitiritxi atoko nitxaua, kotxi k̄ākiti nimoianata.

²⁸ —Xoteoakori misiritakasaakino nota, kona h̄ite takanapano. At̄āo ni-moianariakori h̄itxaua. ²⁹ Niri, aūitexi tx̄ikitakapekano nota. Ininiā iua atokokana nota tx̄ikitakai h̄ite aūitexi hininiua. ³⁰ Nota aūitexi ninakasaaki, hinipokota, hiāta h̄itxako notakata. Auako aūitexi top̄ākini h̄ite ikapani. Ininiā iusaaki h̄ipaniātana tosi nirimanetxi Isaeo auakani ikamakitina t̄ikane —itxa Xesosi.

Xesosi S̄āpiretari Petro Kipatiniri Iua

(Mateo 26.31-35; Marko 14.27-31; Xoāo 13.36-38)

³¹ Xesosi s̄ākirauata Sim̄āo Petromoni:

—Sim̄āo, Sim̄āo, Satanasi amanaāpekari Teoso pite, apanakini apaka atamaaerekatini ikapani. Ahoisi misiritiko atoko inirekari imisiritini pite. ³² Iuaritika, nota mis̄ākiretapekari Teoso isikataparatiniri pixinire Sim̄āo, nis̄akire at̄āo pauikini ikapani. Pikerokariko pikamakiti, iuaritika pikanapiriāpitika nota s̄akire iteene iuaikana pauikini ikapani. Eereka pisikataparaxiniretanako pitariakori nota s̄akire aūiākani —itxa Xesosi s̄akire.

³³ Petro txari Xesosi:

—Niaūte, nota iposope nitxa kateiamoni nisini pitekata. Pitekata iposope nitxa nipinini —itxa.

³⁴ Xesosi txari:

—At̄āo nis̄āpiretai. Ia īkanōkati patari s̄ākirauatini apisapanikako, ipi āti pakinikata, “!Nimarotari iua,” pitxanoko —itxa Xesosi.

Xesosi Ōt̄ākikana Imoianariakori

³⁵ Eereka iuaikana Xesosi s̄ākirauata imoianariakorikata:

—M̄itxi nota iokanatai k̄ākitimoni. Iusaaki kona nisikai txineiro. Kona nisikai sako mata. Kona nisikai sapato, iuaritika minakati aūinii atx̄iiti? Erekarī h̄isini ikinika hinirekakiti mauakanisaaki? —itxa Xesosi

—Minakati !auinuaa ate —itxana.

³⁶ Ininiā Xesosi txana:

—Txamari uatxa pitxineirote, sakora pakini aūiniāi, panika. Iouata mitaro mauakanisaakii, pimāka inopinikiri piv̄ētxitako iouata piamotini ikapani.

³⁷ Teoso s̄akire iōkatsopatakori kitxakapir̄ika txari:

Imaikaāka, kokaniri maikiko atoko inaākako.

Ininiã ikara nimaĩkiko apokapitikako. Ikara nota pirena kitxakapirĩka atãopitika –itxa.

³⁸ Imoianariakori txari:

–Apiananiri, patamata. Uai aua ipi iouata aneenamauatini ĩkapani.

Xesosi txari:

–!Apakata ikara atoko inakari hĩsãkire –itxa Xesosi.

Xesosi Misãkiretiniri Teoso Xetsẽmani Inakoriãtaã
(Mateo 26.36-46; Marko 14.32-42)

³⁹ Eereka ixirata auĩte Oriva inakorimoni isa, kotxi itotapekari iuaã isini. Imoianariakori sari iuakata. ⁴⁰ Iuaã apokasaakina, Xesosi txana:

–Satanasi nirekari maerekati hĩkamini. Ininiã himisãkiretariko Teoso, iua sikataparatinĩ, Satanasi nirekakiti himakamakani ĩkapani –itxa Xesosi.

⁴¹ Ininiã iuaã itakanapana imoianariakori. Apikoxãki axapiti sa itxa. Iuaã ikapotoreẽkaua, misãkireta itxari Teoso. ⁴² Itxari:

–Niri, !pauritapeno paĩtiki natatsiirauatini, iuaritika kona pikamapiri nota nirekaãkiti. Pite nirekaãkiti ninireka nikamini –itxa Xesosi.

⁴³ Iuasaaki Teoso nitiri iaxitikiri apoka iuamoni isikataparaxiniretiniri ĩkapani.

⁴⁴ Iuasaaki Xesosi xinire kamaxirepeka. ãkixinireẽ apokapeka itsii. Ininiã iteene imisãkiretari Teoso. Ininiã iinĩkakare arẽkatxikata tapika ixitimoni.

⁴⁵ Teoso imisãkiretaka atoko, õkitikaua, imoianariakorimoni isa. Iua apoka ninoamoni. Imakipoanãtana, kotxi isãpakepekana imatinaniuatinina xika.

⁴⁶ Ininiã akiritana:

–Kinirepa himakanãta? Hõkitikaua. Himisãkiretari Teoso, Satanasi nireẽkiti himakamakani tĩkane –itxa Xesosi.

Xesosi Maĩkiko Pirena
(Mateo 26.47-56; Marko 14.43-52; Xoão 18.1-11)

⁴⁷ Xesosi sãkirauatakasaaki imoianariakorikata, itomaneri kãkiti Xotasikata apoka. Xotasi mĩkiikana ninoa Xesosi oerekini ĩkapani. Iua Xotasi Xesosi moianarikamara, apanakinikata. Xotasi apokasaaki apitxokari Xesosi. ⁴⁸ Ininiã Xesosi txari iua:

–Xotasi, pimĩkapiritatari pitari iaxitikiri papitxokasaaki? –itxa Xesosi.

⁴⁹ Xesosi moianariakori imarotakasaakiri kãkiti nirekiniri Xesosi imaĩkini, itxana:

–Apiananiri, erekari atxiĩti uatxa aneenamauatini, aiouataneẽ –itxana.

⁵⁰ Ininiã ãti Xesosi moianari sauakari sasetotxi auĩte apiatakari nitiri kĩpita ikikomoni. ⁵¹ Ininiã Xesosi:

–Hiĩtoka ikara. Iaõpe.

Eereka Xesosi takapiotaua ikĩpitaã. Iuasaaki kakĩpitapeka itxa iuaĩkana.

⁵² Sasetotxi auĩteakori, kiomãtxiakori pakini ina Xesosi imaĩkinina ĩkapani. Xesosi txari ninoamoni:

–Kinirepa himinari iouata, piriri pakini himaĩkinino ĩkapani? ⁵³ Ikiniõtika hĩtekata naua aiko Teoso misãkiretikoã. Iuasaaki kona hĩte maĩkano. ĩkanõka hina, kotxi ipiaã hĩkamari maerekati –itxa Xesosi.

Petro Kipatari Xesosi Imarotini
(Mateo 26.69-75; Marko 14.54, 66-72; Xoão 18.15-18, 25-27)

⁵⁴ Ininiã ninoa maĩkari Xesosi, anika itxarina sasetotxi auĩte apiatakari aapokomoni. Iroãna aapoko ãki. Ininiã Petro sari ninoa tikini. ⁵⁵ Sasetotxi aapoko takote apoka. Iuasaaki mapara xamina pokitakori aua. Kãkiti topãkanãta xamina takote. Irokanãtana. Ininiã Petro topãka ninoa takote.

⁵⁶ Iuasaaki ātokoro atamatari iua xamina kamaraã. Ininiã itakote oāpoka. Omixinitari iua:

—Ia kiki Xesosikata auakari —otxa.

⁵⁷ Txamari Petro txari:

—Ātokoro, kona nimarotari iua —itxa.

⁵⁸ Eereka āti atamatari iua. Itxari iua:

—Pite Xesosi moianarikarai? —itxari.

Txamari Petro:

—Konapitini —itxa.

⁵⁹ Āti oara napa atoko āti txari:

—Atāopitikara, ikira kiki Xesosi moianaripitikara, kotxi Kariréiakiri itxaua iua —itxa.

⁶⁰ Petro txari:

—Kona nimarotari ikara pisāpiretakiti.

Iuasaaki, isākirauatakasaaki, patari sākirauata. ⁶¹ Iuasaaki Xesosi saporitika, atamata itxari Petro. Iuasaaki, Petro xinikari mitxi Xesosi sāpiretakiti: “Patari sākirauatini apisapanikako, ipi āti pakinikata, ‘Nimarotari iua,’ pitxanoko” ininiri iaōka aua. ⁶² Ininiã eereka Petro sipe. Iteene txiapata itxa.

Sotatoakori Napetiniri Xesosi (Mateo 26.67-68; Marko 14.65)

⁶³ Xesosi nīkatakani napetari, noropata itxarina Xesosi. ⁶⁴ Iuasaaki iaxirikaokitarina iua, ninoa imatamatakani ikapani. Iuasaaki noropata itxarina.

—Kimarorei pite. Kiripa noropatai? —itxana.

⁶⁵ Itomaneri maerekati sākiretxitiã itxitarina Xesosi. Inapetiniri !iotoka.

Xesosi Xoteo Auīteakori Apisatoō (Mateo 26.57-68; Marko 14.53-65; Xoão 18.19-24)

⁶⁶ Īkanōkapanika kiomātxiakori, sasetotxi auīteakori, kaiōkatsopareriakori pakini apotiitaua. Iuasaaki Xesosi minaāka ninoamoni.

⁶⁷ —Pisāpiretaua ate, Teoso mereēkitikai pite? —itxarina.

Ininiã Xesosi apakapapiretana:

—Nisāpiretiniã, !hāuikari nisākire. ⁶⁸ Nipimarauatiniã, hīte !apakapapiretano. Apaka !hāuiritari nisikakiko. ⁶⁹ Paītiki hītari iaxitikiri topākako Teoso kaposotiireri kikomoni —itxa Xesosi.

⁷⁰ Ininiã iuaīkana ninoa pimaāri:

—Teoso ākirikai pite? —itxarina.

Ininiã Xesosi apakapapireta:

—Atāopitikara hīsākire. Iuapitikarano nota —itxa.

⁷¹ —Iaōpekara. Akenakotapekari isākire. Ininiã apikomoni isākire kenakotakani !anirekaika, kotxi ateka kenakotapekari iua sākire maerekati —itxana.

23

Xesosi Pirato Apisatoō (Mateo 27.1-2, 11-14; Marko 15.1-5; Xoão 18.28-38)

¹ Ininiã imakinika ninoa anikari Xesosi Piratomoni. ² Ininiã iuaā ikamarina aāpirena. Apoītarina Xesosi:

—Ate kenakopiretari oerekiniri kākiti maerekati ikamini, kotxi iua otākikari kākiti, kākiti miīkitxitakaniri Sesa, Homano auīte apiari. Apaka itxa: “Teoso mereēkitino nota. Auītetxi apiatakari nitxaua,” itxa iua sākire.

Txamari na atãoni ikara atoko itxana ninoa. Ikara atoko ninoa apoĩtari Xesosi. Kona atão ninoa sãpiretakiti. ³ Ininiã Pirato pimaãri Xesosi:

—Pitekani Xoteoakori auĩte txataua? —itxari Xesosi.

—Iuapitikarano nota —itxa Xesosi.

⁴ Ininiã Pirato txana sasetotxi auĩteakori, kãkiti pakini:

—!Napokari maerekati ikamakiti —itxa.

⁵ Iuaĩkana apoĩtarina:

—Iua oerekana kãkiti maerekati ikamini auĩtetxiakorimoni. Kariréia tōpamonira ipotorika. Uatxa uaipekarari iua —itxana.

Xesosi Erotxi Apisatoõ

⁶ Pirato kenakotakasaakiri isãkirena, ipimaãna:

—Ia kiki Kariréiakirikani?

⁷ —Ari iuapitikara —itxana.

Ikara Pirato imarotakasaaki, iokanatarari Xesosi Erotximoni, kotxi Kariréia tōpa auakani auĩte itxaua Erotxi. Iuasaaki iua ianapokota Xerosareẽ. Ininiã Pirato iokanatarari Xesosi Erotximoni, kotxi Xesosi Kariréiakiri.

⁸ Erotxi kenakopiretapekari Xesosi pirena. Ininiã iua aõkitakasaakiri Xesosi, poxokope itxakata, kotxi inirekari Xesosi oerekiniri iposotiire. ⁹ Ininiã iteene ipimaãri Xesosi, ikamakiti imarotini ikapani. Txamari Xesosi !apaka-papiretari iua. ¹⁰ Iuasaaki sasetotxi auĩteakori, kaiõkatsoparerini pakini iteene apoĩtari Xesosi. Ikinika ninoa sãkire aãpirenanoka. ¹¹ Eereka Erotxi, isota-toneakori pakini napetari Xesosi. Ieretakarina auĩtetxi mãka maparakiri apiata inapetinirina ikapani.

—Hãtamatarari ere. Auĩtetxi itxaua —itxana.

Eereka iuaĩkana iokanatarina Piratomoni. ¹² Mitxi Erotxi, Piratokata omanatakakaua. Ikara õti ninoa apokaerekatakakaua.

Xesosi Okiko Nirekiko

(Mateo 27.15-26, 11-14; Marko 15.6-15; Xoõo 18.39-19.16)

¹³ Ininiã eereka Pirato apotiitari sasetotxi auĩteakori, Xoteo auĩteakori, apanakini kãkiti pakini. ¹⁴ Ininiã itxa:

—Hĩte minari ia kiki notamoni. Hĩte apoĩtari iua imisirienetiniri kãkiti. Hĩte apisatoõ nipimaãpekari ikamakiti pirena. Notamoni kona maerekati !ikama. ¹⁵ Erotxipekana !apokari maerekati ikamakiti, ininiã iokanatarari iua notamoni iuaĩkana. Inipítikara iua erekari, txamari hĩte nirekari okiko maxikatiika. ¹⁶ Ininiã nota paniãtari inoropatiko aãpitsa aamata kamakoriã. Eereka niokanatarari isini.

¹⁷ Iuasaaki Pãskoã kiiniritisaaki, auĩtetxiakori itotari isikakiniri ãtika kateia ãki auakari.

¹⁸ Ikara Pirato sãkire ikenakotakasaakina, ninoa akirikata:

—Hõkariko ere kiki. Hĩsikakariko Pahapasi —itxana.

¹⁹ Pahapasi kateia ãki aua, kotxi iua apanakinikata naiatarari auĩtetxiakori. Kokaniri apaka itxaua.

²⁰ Pirato nirekari Xesosi isikakinini, ininiã iuaĩkana isãkirauata kãkitimoni.

²¹ Txamari ninoa akiripoakata:

—Aamina ĩpiriãmitakari nopini hĩtokakitariko. Hõkariko aamina ĩpiriãmitakari nopini —itxakatana.

²² Pirato mitxi isãkirauata ipikata. Iuaĩkana isãkirauata:

—Kixikapa? Maerekati !ikama. Ixika !auari ipinini ikapani. Nipaniãtariko inoropatiko, eereka nisikakariko —itxari.

²³ Txamari iuaĩkana akiripoakatana:

—Hõkariko aamina ĩpiriãmitakari nopini.

Ninoa akiripoakatini xika Pirato kamari ninoa nirekakiti. ²⁴ Ininiã Pirato: –Xesosi ipinako hinirekakiti iaõka –itxa Pirato.

²⁵ Iuasaaki isikakari Pahapasi kateia åki auakari. Neenamtxi kamakari, kokaniri apaka itxaua Pahapasi. Eereka isikari Xesosi sotatoakorimoni aamina Ìpiriãmitakari nopini okiko Ìkapani.

Xesosi Tokakitaãka Aamina Ìpiriãmitakari Nopini

(Mateo 27.32-44, 11-14; Maro 15.21-32; Xoõo 19.17-27)

²⁶ Ininiã sotatoakori anikari Xesosi okiko Ìkapanimoni. Iuasaaki kima-poriãpo aõkitarina Simão, Sireni sitatxitikiri. Iuasaaki iua apoka sitatximoni. Sotatoakori maãkari iua. Aamina Ìpiriãmitakari itakana Simão tsotere nopini: –Panika ia aamina Ìpiriãmitakari –itxarina.

Xesosi tikini sa itxa Simão. ²⁷ Xesosi tikini isa mirikiniti kãkiti. Åtokaka sitoakoro sari apaka. Imatinaniuatana, itxiapatana, kotxi imarotarina Xesosi paãtiki ipinini. ²⁸ Xesosi kirioka ninoa sitoakoromoni. Itxana:

–Sitoãkini Xerosareẽ auakani anaakoro. Kona notani !himariaka. Hitekara himariakaua. Hamariteni Ìkapani hõtxiapata, ²⁹ kotxi åti õti apokasaaki, kãkiti sãkire: “Apiaerekata sito meeneto oniniua,” kotxi iuasaaki misirikaretxi apokasaaki, pamonõkoniri. ³⁰ Iuasaakiikarako kãkiti akiripoakatako ixirata auãtemoni: “Åte nopini pirika. Pipataua,” itxanako, kotxi iuasaaki ninoa mokaikariakori apokaãpota ninoa xipokini Ìkapani. ³¹ Nota aamina amaneri atoko nitxa. Hite aamina Ìsasaka atoko hõtxa. Nota !ikamari maerekati, iuaritika ia atoko nota ipina. Erepaniko aamina Ìsasaka atoko hõtxa, ininiã åti õtirako apiata himisiritiko –itxa Xesosi sãkire.

³² Ninoa anikari ipi maerekati kamakani Xesosikata ipininina Ìkapani.

³³ Apokasaakina “Kiiãtãtxi” inakoriãtaã, itokakitarina Xesosi aamina Ìpiriãmitakari nopini. Iua atokokanera itxana maerekati kamakani. Åti maerekati kamakari itakana Xesosi kikomoni, åti isanaremoni.

³⁴ Iuasaaki Xesosi txari:

–Niri !pimisiritapena ninoa, maerekati ikamakitina xika, kotxi !imarotarina ikamakitina –itxa Xesosi.

Iuasaaki sotatoakori kamari sarauatxi. Eereka imaktxakarina Xesosi mãka. Sarauatxi kãiatakari apakapari imãka. ³⁵ Kãkiti iuaã auakani itikari Xesosi. Sasetotxi auãteakori napetari iua. Itxana:

–Iua makatzakapekari apanakini imapinakanina Ìkapani. Teoso mereẽkiti ininiãua, kinirepa iuaka !imakatzakaua? –itxana.

³⁶ Iuasaaki sotatoakori apaka napetari iua. Katxioãri isikarina Xesosi iãtini Ìkapani, txamari liãtari. ³⁷ Itxana:

–Pite Xoteo auãte pininiãua, ininiã aamina Ìpiriãmitakariã pimakatzakaua. Piteka pimakatzakauako –itxarina.

³⁸ Iuasaaki iõkatakori takaãka ikii tanomoni:

–Xoteoakori Auãte –itxa iua iõkatakori. Homanõ sãkireẽ aua. Kreko sãkireẽ aua. Xoteo sãkireẽ pakini aua iuaã iõkatakori.

³⁹ Maerekati kamakari Xesosi takote tokakitakori akiritari iua. Itxitari. Inapetari:

–Pite Teoso mereẽkiti pininiãua, Ìteroa piposotiire? Piteka pimakatzakaua. Ate apaka pimakatzaka –itxa.

⁴⁰ Åti maerekati kamakari iuaã tokakitakori õtãkikari iua:

–Kona pite pikatari Teoso? Ate apaka apinako. ⁴¹ Atãõpitiikara ate misiritiko, kotxi maerekati akamapeka. Ere kiki !ikamari maerekati –itxa.

⁴² Eereka itxari Xesosi:

–Xesosi, auãtetxi pininiãtaãua papokasaaki, pixinikano nota, kotxi ninirekari nisini pitekata iuaxiti –itxari.

⁴³ Xesosi apakapapiretari:

—Atãopitikara nítxai, uatxa ia õti, pite sariko notakata iaxiti Erekarĩatã.

Xesosi Ipinini Pirena

(*Mateo 27.45-56; Marko 15.33-41; Xoão 19.28-30*)

⁴⁴ Ininiã apaniãxiti takote atokatxi piãkapeka. Ipi ãti pakini oara ipiãka.

⁴⁵ Atokatxi !iponikaika. Iuasaaki mãkatxi mata mitari Teoso misãkiretiko aikotiã arõkakarĩ matsorakitaãka. Ipi matapeka itxa. ⁴⁶ Iuasaaki Xesosi akirikata:

—Niri, nisikai nixinire pinĩkatini ìkapani.

Ikara atoko inaãka atoko, ipina. ⁴⁷ Sotato auĩte itikasaakiri, ikenakotakasaakiri, itxa:

—Atãopitikara ìkira kiki atão inakarĩnoka kamakari iua. Maerekati !ikama —itxa sotato auĩte.

⁴⁸ Kãkiti iuaã apotiitakaniua ikara atamatakasaakina, itorotana iaritana ipĩkarauatini xika. Ininiã isipekana. ⁴⁹ Ikinika Xesosi aõkimanere, sitoakoro Kariréiakini, iua tikini sikani pakini aua iuaã. Ìkira atoko itikanãtarina Xesosi okiko.

Xesosi Katiko Pirena

(*Mateo 27.57-61; Marko 15.42-47; Xoão 19.38-42*)

⁵⁰ Iuasaaki iuaã aua Xosee inakori. Xoteo auĩteakori õtãkikakari iua. Erekarĩ iua. Erekarĩnoka ikama. ⁵¹ Arimateia sitatxitikiri iua. Arimateia sitatxiti, Xotéia tõpa aua. Iãtapapikari Teoso ikinimane auĩte ininiua. Mitxipe apanakini Xoteo auĩteakori õtãkikakani nirekasaakiri Xesosi okinina, iuasaaki iua Xosee txari:

—Konapitini. !Apakata ikara atoko akamini —itxa.

⁵² Xesosi ipinaka atoko, Xosee sari Piratomoni. Amanaãri Xesosi ìto akauarimoni itakini ìkapani. Ininiã Pirato sikari Xesosi ìto iuamoni. ⁵³ Ininiã iua makatxakari Xesosi ìto itokakitikoãtã. Iapirikari mãkatxi mataã, kai iriko ãki taka itxari. Mitxi ipĩkari !auapanika iua iriko ãki. ⁵⁴ Ikara õti sesta veira. Ikinika sesta veira, Xoteoakori tomatini õti apisa, Xoteoakori aiamata tomatiko õti ìkapani.

⁵⁵ Sitoakoro Kariréiakini Xesosikata ìkani sari Xosee tikini kai irikomoni. Ninoa nirekari imarotiniiri Xesosi ìto takikoãtã. ⁵⁶ Eereka ninoa kanapiriã aapokomonina. Kamariãro, aãtsopa ãtião pakini apotiitana Xesosi ìtoã itakininã ìkapani. Ininiã tomatiko õti tomata itxana, kotxi Teoso paniãtakiti iaõka ikamana.

24

Xesosi Iuaikana Auãki Inini

(*Mateo 28.1-10; Marko 16.1-10; Xoão 20.1-10*)

¹ Tomĩkosaaki ìkanõkapanika, sitoakoro sari kai irikomoni, kamariãro Xesosi ìtoã itakinina ìkapani. ² Ninoa apokasaaki iuaã, atamatarina. !Katoreikari kai iriko. Kai tore mãkatxakapeõkaika. ³ Ininiã ninoa ìroã, txama kona apokarina Xesosi ìto. ⁴ Ininiã sitoakoro:

—Ìtapari Xesosi ìto? Kanatokopa itxa? —itxanãtana.

Iuasaakipeka ipi kiki tokiã. Itĩmana sitoakoro apisatoõ. Pomẽkari mãkarini ninoa. Mẽkokari iotximere atoko itxa ninoa mãka. ⁵ Sitoakoro pĩkarauata, ininiã iãkana. Ixitipeka auakiitana. Ininiã ninoa kiki txana:

—Kinirepa hinitanãtari auãki inakari ipĩkani sauaki? ⁶ !Uaiikari iua.

Õkitikapekã. Hĩxinikari isãkire Kariréia hĩtekata auakasaaki. ⁷ Ia atoko itxa isãkire: “Hĩtari iaxitikiri sikaãkako maerekanimoni. Eereka nipinako aamina

Ípiriãmitakari nopini. Eereka ipi ãti õtisaaki iuaĩkana nõkitikauako,” itxa Xesosi. Hixinikariko isãkire –itxana.

⁸ Ininiã ninoa sitoakoro:

–Ari ikara atokopitikara itxapeka isãkire –itxana.

⁹ Eereka ninoa sipeka. Õsi Xesosi moianariakorimoni isana. Apanakini kãkiti iuaã aua apaka. Iuaã ninoa sãpiretana ikinipoko itikakitina. ¹⁰ Maria Matarenama, Xoanama, Maria Txiako inoroma, apanakini pakini sãpiretari Xesosi moianariakori itikakitina. ¹¹ Txamari Xesosi moianariakori kona auikari ninoa sãkire.

–Paxirari hĩsãkire –itxana.

¹² Petronoka auikari ninoa sãkire, ininiã imiteekata kai irikomoni. Iãka, iriko ãki atamatini ĩkapani. Mãkatxi matanoka, Xesosi İtoã Xosee iapirikak-itinoka atamata. Eereka aapokomoni ikanapiriã. Isikasaaki, itsorĩkaãnãta, Atamatakiti ixinikanãta.

Emaoso Kimaporiti Sikani (Marko 16.12-13)

¹³ Ikara õti ipi Xesosi sãkire auĩãkani iãpota Emaoso inakori aapokotxitimoni. Xerosareẽ pipotorikasaaki, ipi oara napa atoko papoka Emaoso.

¹⁴ Ninoa ipi sãkirauanãta isaãpotakasaakina. Isãkiretarina, ixinikarina Xesosi ipinini pirena. ¹⁵ Isãkirauanãtakasaakina, iuasaaki Xesosi ina ninoa tikini, ininiã iua sa ninoakata. ¹⁶ Txamari ninoa kona imarotari iua Xesosi ininiua.

¹⁷ Ininiã Xesosi:

–Kipa hĩte sãkirenãta? –itxa Xesosi.

Ininiã ninoa iotoka. Iuasaaki ninoa toõ oerekari imatinaniuatina.

¹⁸ Kiropasi inakori apakapapiretari:

–İkinimane Xerosareẽ auakani imarotari Xesosi okiko pirena. Atxiĩti pite ãtiãtaã ĩkarikai? –itxari.

¹⁹ Ininiã Xesosi txari:

–Natokopa itxa iua? –itxa.

Ininiã ninoa:

–Xesosi Nasaree sitatxitikiri iua. Teoso sãkire sãpiretakari itxaua. Teoso, kãkiti apaka apokaerekatari isãkire, ikamakiti pakini, kotxi paposotiireri isãkire, ikamakiti pakini. ²⁰ Sasetotxi auĩteakori, aãũteakori apaka sikari iua okiko ĩkapani, aamina ĩpiriãmitakari nopini ipinini ĩkapani. ²¹ Ate uãkatari iua kãkiti Isaeo auakani maerekani makatxaãkari ininiua. Kita mitxi iua ipina. ²² Mixikanani sitoakoro iua sãkire auĩãkani sãkirauata atekata. Ininiã atsorĩkaãta. Isãpiretauana ĩkanõkapanika akauarimoni isinina. ²³ Txamari ninoa kona apokaikari Xesosi İto. Ninoa sãkire, aõkitana Teoso nitiriakori iaxitikini iuaã. Ninoa sãpiretana sitoakoro Xesosi iuaĩkana õkitikapekaua. ²⁴ Eereka ãtikaka imoianariakori sari iuaã atamatinirina ĩkapani. Sitoãkini sãkire atãopitikara. Txamari laõkitari Xesosi iuasaaki –itxa Kiropasi.

²⁵ Ininiã Xesosi txana ninoa:

–Mĩlkiteni hĩtxaua. !Hĩnrekari hãuikiniri Teoso sãkire sãpiretakani sãpiretakiti imakinika Teoso sãkire, ²⁶ kotxi ninoa txari: “Teoso nirekari imereẽkiti atsiirauatini, Teoso tixine ikanapiriĩni apisapanika,” itxa Teoso sãkire –itxa Xesosi.

²⁷ Iãpotakasaakina, Xesosi sãpiretana ninoa Teoso sãkire iuaka pirena. Merepanika iuaka oerekaua Moisesi iõkatsopatakitiã, eereka Teoso sãkire sãpiretakani iõkatsopatakitiã. Iuaka oerekaua imakinika Teoso sãkire iõkatsopatakoriã auakariã.

²⁸ Iuasaaki ninoa apokaãpota Emaoso takote. Ninoamoni Xesosi nirekari apikomoni isini. ²⁹ Ininiã itxana:

–Kona pisipe apikomoni. Mapiānikata, ininiā atekata pikaikota –itxarina.

Ininiā Xesosi İroā aapokotxiā ninoakata ikaikotini İkapani. ³⁰ İitopāka ninoakata inipokotini İkapani. İuasaaki Xesosi kosekari komiri.

–Teoso, erekapitikari pisikakiti atemoni –itxa.

İuasaaki imapixinikari komiri, sika itxana ninoamoni. ³¹ İuasaakipeka ninoa imarotari Xesosi ininiua. İuasaakipeka, ereēkoka itxa. ³² İniniā ninoa misākiretakakaua:

–Atāopitikara, kimaporiā isākirauaāpotakasaaki, Teoso sākire oerekarauaāpotakasaaki, axinire poxokoniuata iuasaaki –itxana.

³³ İuasaakipeka ninoa aiamata. İkanapiriāna Xerosareēmoni. İuaā apokana ōsi Xesosi moianariakori, apanakinikata. ³⁴ İsāpiretana:

–Xesosi auāki inini pirena atāopitikara. Apiananiri ōkitikapekava. Petromoni oerekapekava –itxana ninoa.

³⁵ İniniā eereka Kıropasi imoianarikata sāpiretana kimapori isinina pirena. İsāpiretana komiri Xesosi mapixinikini pirena, kotxi iuasaakiika ninoa imarotari iua Xesosi ininiua.

Xesosi Oerekava İmoianariakorimoni

(Mateo 28.6-20; Marko 16.14-18; Xoāo 20.19-23; Ātosi 1.6-8)

³⁶ İsākirauatapanikana inakasaakina, Xesosi tokiā ninoa sauaki.

–Erekaxinire hİtxako –itxa.

³⁷ İtikoākatana. İpİkarauatana. Kamiri iuākatarina.

³⁸ –Kinirepa hİtikoka? Kinirepa kamaxirepeka hİtxa İİkiteta?

³⁹ Hātamatariko niuako, nikiti pakini. İuapitikarano nota. Himaātakano. Kamiri !kaxiniri. Kamiri kona kapiri. Hātamatano. Nİİtokara. Kamiri !nitxaua –itxa Xesosi.

⁴⁰ İniniā oerekari iuako, ikiti pakini ninoamoni. ⁴¹ Ninoa iteene poxokoniuata, txamari !iteene !auikapanikarina atāo Xesosi ininiua. İniniā iuasaaki Xesosi pimaāna:

–Nipokori aua hİtemoni? –itxa.

⁴² İniniā ninoa sikari ipixini ximaki kimitakori. Mapaā apaka isikarina.

⁴³ İniniā iua nikari ninoa apisatoō. İuasaaki ninoa imarotari atāo Xesosi ininiua, kotxi kamiri !inikari nipokori. ⁴⁴ Eereka iua misākiretana ninoa:

–Mİtxi hİtekata nauakasaaki, nisāpiretai İkinipoko nota pirena Teoso sākire İōkatsopatakoriā. Noerekapekai hİte Moisesini İōkatsopatakiti, Teoso sākire sāpiretakani İōkatsopatakiti. Xikari İōkatsopatakori apaka noerekapekai. İmakinika ninoa sāpiretakiti nota pirena apokapeka.

⁴⁵ İuasaaki isikaİmaroretana ninoa Teoso sākire İōkatsopatakori imarotina İkapani, ininiā iuasaaki ninoa imarotari atāo. ⁴⁶ İtxari:

–Kİtxakapirİka İōkatsopatapeēkaika:

Teoso mereēkiti atatsiİruauatako. Okaākako. İpi āti ōİsaaki ōkitikauako.

⁴⁷ Kākiti nisākire auİākani İaripiretariko niokanapirena eerekari İkini İtix-İti. Merepanika Xerosareē auakanimoni isāpiretaākako, eereka İkini İtix-İti auakanimoni isāpiretaākako. Ninoa oerekariko kākiti takanapiniri İmaerekanina, ininiā iuasaakipeka Teoso makatzakariko maerekatİ İkamakitina. ⁴⁸ Hİkinika hİte İtikapekari nipinini. Hātamatano nota iuaİkana auāki ninini. İniniā iteene himarotari nota pirena apanakini hİsāpiretini İkapani.

⁴⁹ Nota İokanatariko niri sikaenetakiti, Eerekari Matamatakoti, hİtemoni. Uai sitatxi hİkaikotako. Hİātapariko iua apokini. İniniā hāpakapariko Teoso posotiire itano İkari –itxa Xesosi.

Xesosi Anikaāka Teoso Tixinemoni

(Marko 16.19-20; Ātosi 1.9-11)

⁵⁰ Xesosi anikari imoianariakori Petánia sitatxitimoni. Iuaã apokasaakina, Xesosi õkitikauakotaua. Itxari Teoso:

—Niri, naia pinĩkata. Pitakari erekari naimoni —itxa.

⁵¹ Isãkirauatakasaaki, anikaãka Teoso tixinemoni. ⁵² Iuasaaki ninoa:

—Peerekari Xesosi. Iuanoka Apiananiri —itxanãtana.

Eereka Xerosareẽ ikanapiriãna ipoxokoniritikana. ⁵³ Ikiniõtika isana Teoso misãkiretiko aikutimoni. Iuaã ninoa misãkiretari Teoso:

—Peerekai. Erekapitikari pikamakiti ate ikapani —itxanãtana ikiniõtika.

Ameẽ.

XOÃO

Xesosi, “Teoso Säkire” Inakori

¹ Itixi kamiko apisa iua “Teoso Säkire” inakori auapeka. Iua Teosokata aua. Iua Teoso txaua. ² Ikinipoko potorikikosaaki Teosokata auari iua “Teoso Säkire” inakori.

³ Teoso paniätari iua ikinipoko ikamini. !Auari iua makamakiniti. ⁴ Xesosi, “Teoso Säkire” inakori, kamari itanapokoka auäki inini. Iuanoka sikari ikinipoko auäki inini, kotxi iuanoka auapika. Iua tirikapi atoko itxa, kotxi iopinikari käkiti xiniremoni Teoso säkire imarotini İkapani, ätipirika auini İkapani. ⁵ Iopinikari ipiä. Ipiä kona xipokari iua tirikapi kamara.

⁶ Teoso iokanatarı isäkire säpiretakari tükane kiki Xoão inakori. Iokanatarı iua käkitemoni, käkiti xinire iopiniäkari isäpiretini İkapani. ⁷ Isäpirenauata, Teoso säkire ikinimane imarotini İkapani, auikapiretinirina İkapani. ⁸ Kona Xoãoni käkiti xinire iopiniäkari txaua. Xoão iokanataäka käkiti xinire iopiniäkari isäpiretini İkapani. ⁹ Iua atão iopinikari käkiti xinire. Apoka İkoraxiti, ikinipoko käkiti xinire iopinikini İkapani.

¹⁰ Iua “Teoso Säkire” inakori aua İkoraxiti. Iua kamari itixi, iuaritika İkoraxiti auakani kona auikapiretari iua säkire. ¹¹ Iua apoka itixi ikamakitemoni, txamari käkiti ikamakini kona nirekari iua. ¹² Iuaritika apanakini nirekari iua, ininiä auikarina isäkire. Ininiä iua sikaposotiiretana ninoa Teoso anaakori ininiuana İkapani. ¹³ Aponaniäkasaaki, Teoso anaakori !atxaua. Ateka Teoso anaakori akaminiua !aposota. Kona käkitemoni txikitakaua Teoso anaakori aniniäua. Teosora kamari iua anaakori aniniäua.

¹⁴ Käkiti itxapekaua iua “Teoso Säkire” inakori. Atekata aua. Ate itikari iua. Peerekari iua. Peerekari iposotiire. Ikinipoko erekari aua iuamoni. Isäkire atäonoka itxa. Ikara atoko itxa, kotxi iri Teoso. Teoso äkiri imatonökari itxaua Xesosi.

¹⁵ Xoão säpiretari Xesosi käkitemoni. Ia atoko isäpirenauata:

—Iua, hitemoni nisäpiretakiti: “Nota tikinimoni apokakari, apiatako iua. Nota poiäoka, kotxi nota auini apisapanika auapeka iua.”

¹⁶ Ikinipoko erekari aua iuamoni, ininiä amakinika ate apakapari ikinipoko erekari iuamonikiri. Isikaäpotari erekari atemoni. ¹⁷ Aimarotari Teoso paniätakiti säkiretxiti, kotxi Moisesini oerekepekaua. Apiaerekata Xesosi Kristo oereäkiti, kotxi iua oerekaua Teoso iteene tiretiniua. Ikinipoko erekari isika atemoni. Maerekati kamakani atxaua, iuaritika Teoso tiretaua. Oerekaua atão inakari aimarotini İkapani. ¹⁸ Teoso atamatakari !auari. Imatonökari Teoso äkiri, irikata auakari, iuara oerekaua Teoso aimarotini İkapani, kotxi Teosotxikana iua.

Xoão Kapatxisareri Säpiretakiti

(Mateo 3.1-12; Marko 1.1-8; Arókasi 3.1-18)

¹⁹ Xoteo auiteakori Xerosareë sitatxiti auakani iokanatanana käkiti Xoãomoni. Iokanatanana sasetotxiakori. Iokanatanana sasetotxiakori moianatakani apaka Xoãomoni, ipimainirina İkapani: “Kinakariparai pite?” ²⁰ Kona Xoão kipatarı isäpiretinina. Atão isäpiretana:

—Teoso mereäkiti käkiti iätapakiti, kona nitxaua nota —itxa.

²¹ Ininiä ipimaärina:

—Ikara atoko ininiä kiriparai? Eríasikani? —itxana.

—Kona iuano —itxa.

—Teoso sãkire sãpiretakari aiãtapakitikani atxiĩti? —itxana.

—Kona iuano —itxa.

²² —Ikara atoko ininiã, natokopa inakariparai pite? Ninoa ate iokanatakani nirekari imarotiniina pite. Natokopa inakaripa pite? —itxana.

²³ Ininiã Xoão:

—Teoso sãkire sãpiretakari Isaía inakori iõkatsopatakiti txari:

Auako kiki ãparaã makipakaniãtaã. Isãpirenauatoko. Itxariko: “Hõeretariko kimapori Apiananiri apokini apisapanika. Itãkaãpo erekari hĩkamako iua napini ikapani,”

itxa Isaía. Iua kiki ãparaã makipakaniãtaã kasãpirenari, iuakarano nota. Iua Isaía sãpiretakitikarano nota —itxa Xoão.

²⁴ Pariseoakorira iokanataka ninoa kiki Xoãomoni. ²⁵ Ipimaãrina Xoão:

—Iua Teoso mereẽkiti aiãtapakiti piminakanisaakiaua, Eríasi inakori piminakanisaakiaua, Teoso sãkire sãpiretakari aiãtapakiti piminakanisaakiaua, kinirepa pite patxisatari kãkiti? Kipaniãpa pite patxisarauata? —itxarina.

²⁶ —Ãparaãnanira nota patxisarauata. Hĩte sauaki aua kiki himimaro-takiniti. ²⁷ Iuara, nota tikini apokakari, apiatakari iua. Minakati nitxaua nota, ininiã kona apakata napokini iua takote. Kona apakata ikiti mata tsapitsa nikoxirikini, kotxi minakati nitxaua —itxa Xoão.

²⁸ Ikara atoko Xoão sãpiretana ninoa Xotão ipiniã Petãnia sitatxiti, ipatxisarauatiniãtaã.

Soti Auĩte ãkiri, Teoso Nakiti

²⁹ Katimatiniĩkata Xoão atapari Xesosi, iuamoni inini. Xoão sãpiretana apanakini itakote auakani:

—Hãtapari. Erenapani soti auĩte ãkiri Teoso nakiti, kotxi ikinimane maerekani makatxaãkari itxaua. ³⁰ Mitxi nisãpiretakitikara ere. “Kiki apokako nota tikini. Apiananiri iua, kotxi nota mauakanisaakipanika iua aua.”

³¹ Mitxi nota apaka kona nimarotari maerekanitxi makatxaãkari uãka. Nota patxisatari kãkiti ãparaã, kotxi iusaaki nisãpiretari iua pirena Isaeo tixini auakanimoni —Xoão txana ninoa.

³² Xoão sãpiretana apanakini itikakiti:

—Nota itikari iua Erekari Matamatakoti Teoso tixinekiri katxakini. Kamoa katxakini atoko itxa iua. Isari Xesosimoni, kaikota itxa iuakata. ³³ Ikara apisa kona nota imarotari iuãka. ãparaã nipatxisarauatini paniãtakari sãpiretano: “Pitikariko Erekari Matamatakoti katxakini. Kikimoni apokini pitikariko. Iua kiki patxisarauatini ãtião, kotxi isikari Erekari Matamatakoti patxisatakonimoni,” itxano. ³⁴ Notakara itikari ikara. Nota sãpiretari nitikakiti, ininiã nimarotapitikari ia kiki Teoso ãkiri ininiua —itxa Xoão.

Merepitipanika Xesosi Moianariakori

³⁵ Katimatiniĩkata iuaĩkana Xoão auanãta iuaã ipi imoianariakorikata.

³⁶ Iusaaki itikari Xesosi inapaãpotini, ininiã akiritari imoianariakori:

—Hãtapari. Ere kiki, soti auĩte ãkiri Teoso nakiti itxaua —itxa.

³⁷ Ikara ikenakotakana atoko ninoa ipi imoianariakori sari Xesosi tikini.

³⁸ Ininiã Xesosi sapotorika, atapana iua tikini ikani.

—Kipa hinireka atxiĩti? —itxana ninoa.

—Koerekareri, namonipa paua pite? —itxarina.

³⁹ —Masa, hãtamata —itxa.

Ininiã isana iuakata, atamata itxarina iua auiniãtaã. Iusaaki kikatapeka. Eereka ikanõkapeka ikanapiriãna.

40 Ninoa Hoão moianariakori, Xesosikata sikani, Ātree, Ātree moianari pakini. Simão Petro itari itxaua iua Ātree. 41 Eereka Ātree sari katimariã itari Simãomoni.

—Ate aõkitari Teoso mereëkiti aiãtapakiti —itxa.

42 Ininiã Ātree anikari itari Simão Xesosimoni. Xesosi atamatarari Simão.

—Pite Simão, Hoão inakori ãkiri. Uatxa pite Petro pinaãkako —itxa.

Kai sorotxikana iuãka Petro.

Piripi, Natanaeo Pakini Xesosi Akiritini

43 Katimatinĩkata Xesosi nirekari Karirẽia tõpamoni isini. Iuaã aõkitari Piripi inakori.

—Notakata masa. Nimoianari pitxapekauako —itxari.

44 Iua Piripi aapoko Petsáita sitatxiti. Iuaã apaka aua Ātree, Petro pakini aapoko. 45 Iuasaaki Piripi nitari Natanaeo inakori. Apokasaakiri isãpiretari:

—Ate aõkitari kiki. Moisesini iõkatsopatakiti sãpiretakiti iua. Teoso sãkire sãpiretakani iõkatsopatakiti sãpiretakiti aãkita. Iuakara Xesosi txaua. Nasaree sitatxitikiri iua. Xosee ãkiri iua Xesosi —itxari.

46 —Nasaree sitatxitiã !auari erekari —itxa Natanaeo.

—Auapitika. Masa, maãpiãkatari iua —itxa Piripi.

47 Xesosi atapari Natanaeo iuamoni inaãpotini.

—Ere kiki atão Xoteopitikara. Atãonoka ikama —itxa Xesosi.

48 Ininiã iuasaaki Natanaeo kenakotari Xesosi sãkire. Ipimaãri Xesosi:

—Kiãtokopa ininiãpa pimarotano nota? —itxari.

Xesosi txari iua:

—Piripi akiritiniã apisapanikara, nimarotari piko kati patapi piitopãkanãta.

49 Ininiã Natanaeo apakapapiretari:

—Koerekareri, Teoso ãkiri pitxaua pite. Kãkiti Isaeo tixini auakani auĩte pitxaua —itxari Xesosi.

50 Ininiã Xesosi:

—Pite auikari nisãkire, kotxi nimitikakinitika nimarotari piko kati patapi piitopãkanãtini. Pite imarotapanikariko apia posotiretxi. 51 Pite itikariko Teoso tixine osereëkiko. Pitikariko Teoso nitiriakori kanĩkini. Pitikariko ninoa katxakini, pitari iaxitikiri nopini apokinina. Atãopitikara ikara atoko nitxai pite —itxari Natanaeo.

2

Xesosi Inoãkari Āparaã, Iãriãpeka Itxĩkitakini

1 Ipi õti napaka atoko aua kiiniri tanirauatiko pirena kiiniriti Kanaa sitatxiti Karirẽia tõpa. Xesosi inoro aua kiiniriãtaã iuasaaki. 2 Kakiiniriteri kemaĩtxitari Xesosi, imoianariakori pakini. 3 Iãriã xipoka atoko Xesosi inoro: —!Auaika iãriã —otxari Xesosi.

4 Ininiã Xesosi:

—Kinirepa ikara atoko pitxano? Niposotiire manapi ! apokapanika — itxari inoro.

5 Ininiã Xesosi inoro txana kaapokori nitiriakori:

—Ipaniãtakiti iaõka hĩkamako —õtxa.

6 Iuaã kopiti aua, seisi pakini, mitari kopititi, kai kamakori. Naia kopiti ãki aua ãparaã Xoteoakori arokiniua ikapani. Iuaãtaã ninoa arokaua. Kiomãtxiakorini oerekinina atoko ninoa arokaua Teoso imisãkiretinina apisa, ninoa Teoso apakapini ikapani. Ātika iua kopiti maĩkari ãparaã seĩ arĩtro.

7 Xesosi paniãtana kaapokori nitiriakori:

—Hĩxãpokakari naia kopiti ãki ãparaã —itxana ninoa.

Ininiã ninoa xāpokakari kopiti āki āparaã. Isonakatapeka apoka āparaã.

8 Ininiã Xesosi:

—Hisorokaātari āparaã, sika hūtxari kakiiniriterimoni iātini ĩkapani.

Ininiã ninoa anikari āparaã kakiiniriterimoni. **9** Iua kakiiniriteri iātari. Iuasaaki iāriāpeka itxapekaua āparaã.

—Amonipa ina ia iāriã? —itxa.

!Imarotari. Ninoa nitiritxi āparaã anikakani imarotari iua iāriã. Ininiã kakiiniriteri txari itanorouatakari:

10 —Kinirepa mixikanani ia iāriã apia erekari na pisikaua? Apanakini sikari iāriã apia erekari kiiniri potorikasaaki. Kākiti kamitope inakasaakiika apanakini sikari iāriã poião erekari. Txamari uatxaika pite sikari apia erekari —itxari.

11 Iuasaaki Xesosi mipotorikari iposotiire Kanaa sitatxiti Kariréia tōpa iua auakasaaki. Iposotiire oerekari Apiananiri ininiua. Ikara atoko ininiã, Xesosi moianariakori auikari Xesosi Teoso mereēkiti kākiti iātapakiti ininiua, kotxi ninoa itikari iposotiire.

12 Ikara atoko inaãka atoko Xesosi, inoro, itariakori, imoianariakori pakini sari Kapanaoō sitatxitimoni. Iuaã ikaikotana mapaōtipeka.

Pirātxi Omitikiko Pirena

(Mateo 21.12-13; Marko 11.15-17; Arókasi 19.45-46)

13 Xoteoakori kiinirite Páskoa inakori apisapanika, Xesosi sari Xerosareēmoni. **14** Isa Teoso misākiretiko aikotimoni. Iuaã pirikeri āki itikari pirātxi vēxtitakani, kema auīte, soti auīte, kamao pakini vēxtitakani. Itikari txineirota sikakani apaka. Alesa takote ninoa topākanāta. Ivētxitarona txineirota. Apakaparona āti uāka txineirote, kotxi oa ātoião, ininiã Xoteo txineirote isikana. **15** Ininiã Xesosi kosekari aāpitsa. Īpatari. Aāpitsaā omitikenatana ninoa pirātxi vēxtitakani. Omitikenatana kema auīte, soti auīte Teoso misākiretiko aikoti takote auakani. Ikakanapiriāri amesa txineirota apakapikoāta. Txineirota xikepoakatani. **16** Ipaniātana kamao vēxtitakani:

—Himakatzakariko kamao. Hanikariko mapara. Niri aapoko āki hīvētxirauatini! Iapakata. Kona uaini pirātxi vēxtitiko —itxana ninoa.

17 Iuasaakipeka imoianariakori xinikari Teoso sākire iōkatsopatakori: Nota iteene tīretari paapoko pite misākiretiko aikoti. Iua xika nokaākako, itxa Teoso sākire iōkatsopatakori.

18 Eereka Xoteo auīteakori misākiretari Xesosi:

—Teoso paniātiniã ninoa kākiti iua misākiretiko aikotiã auakani pomitikenatini, poerekaua posotiiretxi Teoso paniātiniã aūiikini ĩkapani —itxana ninoa.

19 Xesosi apakapapiretari:

—Hīrikariko ia Teoso aapoko. Ipi āti pakini ōtisaaki iuaĩkana nōkitikariko ia Teoso aapoko —itxa Xesosi.

20 Ininiã ninoa:

—Anekani. Koarēta seisi anokanani iua aiko kamiko. Kiātokopa pitxari ipi āti pakini ōtisaaki pōkitikini iuaĩkana? Kona kiĩkitei pite pisākire ikara atoko pinini —itxarina Xesosi.

21 Txamari Xesosi sākire “Teoso aapoko” ixinikari iūto. !Ixinikari Teoso misākiretiko aikoti. **22** Xesosi ipinaãka atoko, ōkitikaākaua atoko, iuasaakipeka imoianariakori xinikari ikara Xesosi sākire. Iuasaaki ninoa auikari Xesosi sākire. Auikarina Teoso sākire iōkatsopatakori sāpiretiniri Xesosi atāo Teoso ākiri ininiua.

23 Xesosi Xerosareē auakasaaki, Páskoa kiiniriti auakasaaki, itomaneri kākiti auikari Xesosi Teoso mereēkiti ninoa iātapakiti ininiua. Ninoa itikari

posotiiiretxi ikamakiti, ininiã auikarina Xesosi sãkire. ²⁴ Txamari Xesosi !auikari kãkiti sãkire, kotxi imarotari ikinimane äkixinire sãkire. ²⁵ Kãkiti äkixinire sãkire !ipimaãri xatiki, kotxi imarotapekari kãkiti äkixinire sãkire.

3

Nikotemo Pirena

¹ Äti ikanökati Nikotemo inakori motika Xesosimoni. Iua Xoteoakori auite itxaua. Pariseo itxaua apaka. ² Iua misãkiretari Xesosi:

—Koerekareri, ate imarotari koerekareri, Teoso iokanatakiti pininiua. Teoso pitekata mauakaniã, kona piposotari posotiiiretxi pikamini, ininiã ate imarotari Teoso iokanatai pite kãkitimoni —itxa.

³ Ininiã Xesosi:

—Iuaikana iponaniãkarira sari Teoso auitexi ininiãtaãua. Iuananira sari iuaxiti. Atãopitikara ikara atoko nitxai pite —itxa.

⁴ —Kiãtokopa pitxa auapekarikai iuaikana piponaniini? Kona piposotari pinoro äko äki iuaikana piãroini. Kona piposotari iuaikana piponaniini —itxa Nikotemo.

⁵⁻⁶ Ininiã Xesosi:

—Atãopitikara ikara atoko nitxai. Piponaniãkasaaki, piri, pinorokata äkirinanira pitxaua. Iua Erekar Matamatakoti iponaniãkitakiniã, Teoso äkiri pitxaua. Kãkiti, iua Erekar Matamatakoti iuaikana iponaniãkitaãkitinanira, sari Teoso auitexi ininiãtaãua. ⁷ Koniko pitsoriãkaãtapeko. Piponaniãko ipikata. Ipikata pimiponaniãkaniã, kona pisari Teoso auitexi ininiãtaãua.

⁸ Itima xõkarauata inirekiniãtaã. Pikenakotari ixõkarauatini, iuaritika na pimarotari itima sinimoni. Na pimarotari itima ininimoni. Iua atokokana !kimarotikori Erekar Matamatakoti iuaikana iponaniãkitaãkiniri kãkiti —Xesosi txari Nikotemo.

⁹ Nikotemo apakapapiretari:

—Nota !imarotari ikara pisãkire —itxa.

¹⁰ Ininiã Xesosi:

—Koerekareri apiari pitxaua. Kãkiti Isaeo tixini auakani poereka. Txamari pite !imarotari ikara atoko nininii pite. ¹¹ Atãopitikara ikara atoko nitxanãtai pite. Ate sãpiretari aimarotakiti, aitiãkiti pakini. Txamari !hinirekari hãuikapiretiniri asãpiretakiti. ¹² Ikorapokoriti pirena nisãpiretakasaakii, !pauikari nisãkire. Atauako pauikatari nisãkire Teoso tixine pirena nisãpiretakasaakii? ¹³ Kona kãkiti sapanika Teoso tixine. Ätinoka sari iuaã, Teoso tixine poritikakarinnoka, kãkiti itari iaxitikirinoka sari iuaã.

¹⁴ —Kitxakapiriãka äparaã makipakaniãtaã Moisesini ökitikari imini metao kamakori aãke mapotökireë. Itano itakari. Kãkiti Teoso sãkire auiakani imini akatsatakini atamatari Moisesini ökitikakiti, ininiã kona ipinana. Iua atokokana kãkiti itari iaxitikiri ökitikaãkako. ¹⁵ Ininiãkara iua sãkire auiakari kona ipinaika. Auapikako.

¹⁶ —Teoso iteene tiretari ikini itixiti auakani, ininiã iokanatarari imatonökari imi kãkitimoni. Ininiã iua sãkire auiakansirako kona ipinaikako. Ätipirika auapikako. ¹⁷ Teoso iokanatar imi kãkitimoni ikini itixiti auakanimoni kona imisiritinina ikapanini. Iua iokanatar imi kãkiti maerekani imakatxakini ikapani, ninõa imapinakani ikapani.

¹⁸ —Teoso äkiri sãkire auiakari kona iokanataãka kãkiti misiritikomoni. Iua Teoso äkiri sãkire mauiakati, iuarako sako kãkiti misiritikomoni. Teoso äkiri sãkire imauiakani xikara ikara atoko inaãkanako. ¹⁹ Teoso äkiri sãkire mauiakani misiritaãkako, kotxi atão inakari oerekakari kãkiti xinire iopiniãkari apokapeka ikoraxiti. Iua oerekari atão aimarotini ikapani. Tirikapi

atoko itxa, kotxi oerekaua atão. Ninoa mauikareni kona nirekari tirikapi. Inirekarina ipiã, kotxi maerekati ikamanātana. ²⁰ Maerekati kamakari kona nirekari tirikapi. Kona tirikapi takote kona aua, kotxi ipĩkari ikamara. Ipĩkari kãkiti itikiniri maerekati ikamini. ²¹ Teoso sãkire iaõka kamakarira sari ikamaraã, kotxi ikamara oerekari apanakini iua kamakiti atão inini Teoso nireẽkiti iaõka inini –Xesosi txari Nikotemo.

Xesosi Apiari, Xoão Poiãori Inini

²² Ikara atoko inaka atoko Xesosi imoianariakorikata sari Xotéia tõpamoni. Mapaõti ikaikota imoianariakorikata iuaãtaã. Imoianariakori patxisatari kãkiti iuaã. ²³ Xoão apaka patxisatari kãkiti Enõ inakoriãtaã, Sarĩ inakoriãtaã takote. Ipatxisarauata iuaãtaã, kotxi iuaãtaã ãparaã kaiãopokori. Ikinĩõtika kãkiti sari uamoni iuaãtaã, ininiã Xoão patxisatana. ²⁴ Iuasaaki Xoão kona takaãkapanika kateia ãki.

²⁵ Iuasaaki Xoão moianariakori sãkirauata apanakinikata kãkiti arokiniaua pirena, Teoso misãkiretiko aikoti ãki iĩroinina apisa pirena. ²⁶ Apokana Xoãomoni.

–Koerekareri, Xotão ipiniã iua kiki pite patxisatakiti, atemoni pisãpiretakiti, uatxa iua patxisarauatapeka. Ikinipoko kãkiti sari uamoni. Atemoni !erekari ipatxisarauatini –itxana.

²⁷ Xoão apakapapiretana ninoa:

–Erekapitikari ipatxisarauatini, kotxi Teoso paniãtari iua. Teoso masikakaniãri posotiiretxi kãkitimoni, kona xatiki iposotari iparĩkauatini Teoso ĩkapani. ²⁸ Nota kona Teoso mereẽkitino. Kãkiti iãtapakiti kona nitxaua nota. Teoso iokanatano nota Teoso mereẽkiti apokini apisa. Ikara hĩte imarotapeka. Ikara atoko nitxapekai hĩte. Hĩsãpiretari ikara apanakinimoni.

²⁹ –Maxinikari kiki ĩtanorouatakasaaki. Sito amanaãkito iua nakiti otxaua. Imoianari topãka iua takote. Ipoxokoniuaata ĩtanorouatakari sãkire ikenakotakasaaki. Iua atokokana nota poxokoniuaata. Nota iua moianari atoko nitxaua. Xesosi iua ĩtanorouatakari atoko itxaua. Kãkiti iua nakiti itxaua.

³⁰ Xesosi apiaãpotako. Nota poiãõãpotako.

³¹ –Iaxiti ĩkari Apiananiri. Itixi auakani imarore poiãõnoka, kotxi itixinoka imarotana. Teoso tixine ĩkari Apiananiri itxaua. ³² Iua sãpiretari itiãkiti. Ikenakotakiti isãpireta. Txamari kãkiti !auikari isãpirena. ³³ Kãkiti Apiananiri sãpirena auĩãkani, imarotari Teoso sãkire atão inini, ininiã apanakini apaka imarotari Teoso sãkire atão inini. ³⁴ Iua Teoso iokanatakiti sãpiretari Teoso sãkire, kotxi Teoso sikari Erekareri Matamatakoti uamoni, ininiã ikinipoko Erekareri Matamatakoti posotiire aua iua Teoso iokanatakitimoni. ³⁵ Aĩri Teoso tiretari imi. Isikari imi ikinipoko imoiaini ĩkapani. ³⁶ Teoso ãkiri sãkire auĩãkani uaapikako Teosokata. Teoso ãkiri sãkire mauĩãkani kona auapanina Teosokata. Teoso omanatapikanako ninoa atĩpirika –itxa Xoão ninoamoni.

4

Xesosi Misãkiretaro Samariakero

¹ Kãkiti sãpiretari pariseoakori:

–Xesosi sãkire auĩãkani, iua patxisatakini, itomaneri. Xoão patxisatakini poiãoka –itxana.

² (Ari, kona Xesosini patxisarauata. Imoianariakorira patxisatari kãkiti.)

³ Xesosi imarotakasaakiri pariseoakori kenakopiretiniri iua, iuasaaki iua osipikari Xotéia tõpa. Kinirão kanapirikari Kariréia tõpamoni. ⁴ Inirekareri Samaria tõpa ĩpirixititini Kariréia tõpa apokini ĩkapani.

⁵ Samaria tōpa Īpirixititakasaaki, apoka Sikaa sitatxiti takote. Iuaã aua itixi Xoseeni nakiti, iri Xakooni sikakiti kitxakapirīka. ⁶ Iuaã aua aariko Xakooni kisakakiti āparaã apaātiko. Iuaã Xesosi apokasaaki, iotoka, kotxi isāpakapeka ōtakori Īpirixititini xika. Ininiã iitopāka aariko takote. Iuasaaki apaniãxitipeka.

⁷ Iuasaaki sito Samaria auakaro apoka iuaã, āparaã apaātakaro. Oāpokasaaki, Xesosi amanaãro āparaã:

—Āparaã pisikano —itxaro.

⁸ Oa apokini apisapanika Xesosi moianariakori sari sitatximoni nipokori iamotinina Īkapani.

⁹ Oa sito apakapapiretari:

—Xoteo pitxaua pite. Samaria auakaro nitxaua nota. Kinirepa nāparaãte pamanaãno? —otxa.

Ikara atoko otxa, kotxi Xoteoakori kona sākirauata Samaria auakanikata.

¹⁰ Ininiã Xesosi:

—Teoso sikakiti pimarotaãkamako, pitemoni āparaã amanaãkari pimarotaãkamako, notamonimarako pamanaãri āparaã, kotxi piātiniãri āparaã nota sikakiti, pauapika ātipirika —itxaro.

¹¹ —Kona katiui pite. Kiriãpa papaātari āparaã, kotxi paĩtanoirikori. Namonipa papokatari āparaã kãkiti ātipirika auini inĩkitaãkari? ¹² Kitxakapirīka aãtokirini Xakoo sikaua ate ia aariko. Iua, imiakori, ipiraakori pakini iãtari ia āparaã ia aarikoãkiri. Pite apiata atxiiti? —otxa.

¹³ Ininiã Xesosi:

—Kãkiti ia irikoãkiri āparaã iãtakari iuaĩkana iposonatapanika. ¹⁴ Kãkiti nota siãkiti āparaã iãtakari apikomoni !iposonataika. Ākixinire amomo atoko itxa āparaã nota siãkiti. Iua āparaã txikitakari iua ātipirika auini Teosokata —itxaro.

¹⁵ —Iua āparaã pisikano nimaposonatakani tĩkane, ininiã uai kona ninaika āparaã napaãtini —otxa.

¹⁶ —Pakiritari pĩtaniri. Uai piminari —itxa.

¹⁷ —Kona kĩtanirino —otxa.

—Atãopitikara, “Kona kĩtanirino,” pinini. ¹⁸ Sĩko pakinipekara pĩtaniri. Kiki uatxa pitekata auakari na atão pĩtanirini. Inipitikara pisãkire —itxaro.

¹⁹ Ininiã oa:

—Teoso sãkire sãpiretakari pitxaua pite, kotxi pimarotari ikinipoko nika-makiti. ²⁰ Kitxakapirīka ate kiomaneakorini apotiitaua Teoso imisãkiretinina Īkapani ia oxiratari nopini. Txamari hĩte Xoteoakori txari: “Xerosareẽnanira aãpotiitauako Teosokata” —otxa.

²¹ Ininiã Xesosi:

—Pauikariko nisãkire. Āti õti apokako. Iuasaaki kona uai oxiratariãni, kona Xerosareẽni kãkiti apotiitaua aĩri Teoso imisãkiretinina Īkapani. ²² Hĩte Samaria tōpa auakani apotiitaua Teoso himisãkiretini Īkapani. Txamari, kona atão himarotari iua. Ate Xoteoakori aimarotapitikari Teoso, kotxi Teoso sikakiti kãkiti maerekani makatxakakari Xoteo itxaua. ²³ Teoso keto apokapanika, ari apopeka, ininiã aĩri Teoso misãkiretakani atão inakani misãkiretari iua ākixinireẽna. Ninoã sãpiretari atão inakarínoka iuamoni. Aĩri nirekari kãkiti ikara atoko inakani misãkiretiniri iua. ²⁴ Teoso nirekari amisãkiretiniri iua aãkixinireẽ, kotxi Teoso ĩto !auari. Inirekari kãkiti sãpiretiniri atão inakarínoka iuamoni —itxa Xesosi.

²⁵ Ininiã oa:

—Nimarotapitikari iua Teoso mereẽkiti aiãtapakiti, Kristo inakori, apokapitikako ĩkorapokoriti. Iua apokasaaki ikini sereti isãpiretauako —otxari.

²⁶ —Nota pimisãkiretakiti Teoso mereẽkiti hiãtapakitikarano nota —itxaro.

Āti Takarauata, Āti Amarauata Inini Pirena

²⁷ Iuasaakipeka Xesosi moianariakori kanapiriā. Ākixinireēna ninoa tsorīkaānāta:

—Kinirepa Xesosi sākiraauata oa sitokata?

Kotxi oa Samaria auakaro. Iuaritika !ipimaārona: “Kiripa ĩkai?” kona itxarona. Kona ipimaārina Xesosi: “Kinirepa pimisākiretataro oa?” kona itxarina.

²⁸ Iuasaaki oa sito takanapari oti, sitatximoni kanapiriā otxa. Oākiritari kākiti iuaā auakani,

²⁹ —Masa. Maāpiākatari kiki ikinipoko nikamakiti imarotakari. Iua Teoso mereēkiti aiātapakiti atxiīti? —oa txana ninoa.

³⁰ Ininiā iua sitatxi auakani sari Xesosimoni. ³¹ Ninoa apokini apisapanika imoianariakori akiritari Xesosi:

—Koerekareri, pinipokota —itxarina Xesosi.

³² —Nipokori auape nota niākiti tīkane hīte mimarotakiniti —itxa Xesosi.

³³ Ininiā imoianariakori imisākiretakakana:

—Kiripa sikatari nipokori Xesosi nikakiti? —itxana.

³⁴ Ininiā Xesosi:

—Nota kamari iua niokanatakiri nirekaākiti. Ninirekari nikaminiri ikinipoko iua paniātakiti. Ia niparīka. Niparīka nikiena atoko itxa, kotxi niokanatakiri paniātakiti nikamini sikataparatanō, nipokori sikataparatinino atokotxikana. ³⁵ Kākiti txari: “Ipi ipi pakini kasiriti auapanika takari iposope inini tīkane, ininiā uatxa kona nīparīkauata.” Ia atoko kona hītxape hīsākire. Himereka. Hātamatariko takari. Nisāpiretai hīte hītakare iposope haāpoko hanikini tīkane. ³⁶ Iua atokotxikana Teoso sākire takaāka kākiti ākixinireē. Katakakereri miparīkatakari apakapari iparīka ĩki. Iua anikari kākiti Teoso aapokomoni, ātipirika Teosokata auini ĩkapani. Ininiākara katakareri, iua miparīkatakari apaka poxokoniuatoko. ³⁷ Aātokirini txari: “Āti takarauata, ātipiekana apotiitari takari.” ³⁸ Ia sākiretxiti atāo, kotxi nota paniātai hīte mitxi himaparīkauatakaniātaā hamarauatini. Apanakini parīkauatapeka iuaā. Ninoa takapekari Teoso sākire kākiti ākixinireē. Pasāpaniri ninoa parīka. Ninoa parīkauata mitxi, ininiā uatxa hīte parīka poiāo kākiti Teosomoni hanikini —itxa Xesosi.

Samaria Auakani Auikiniri Xesosi Sākire

³⁹ Kaiāopokori Samariakini iua sitatxiti auakani aukari Xesosi sākire, kotxi oa sito mitxi sāpiretana:

—Nikamakiti ikinika isāpiretano —otxana.

⁴⁰ Ininiā ninoa Samaria auakani apoka Xesosimoni.

—Atekata paua —itxarina Xesosi.

Ininiā Xesosi kaikota ipi ōti ninoakata. ⁴¹ Xesosi sākire ikenakotakasaakina, apikomoni ninoa aukapiretari.

⁴² Ninoa misākiretaro oa sito:

—Uatxa ate aukapiretari Xesosi sākire, kona pite sāpirenaānanini, ate aukapiretari. Ateka kenakotapekari iua sākire, ininiākara ate aukapiretari iua sākire. Uatxa ate imarotari atāo inini Teoso mereēkiti ininiua Xesosi. Kākiti itixi auakani maerekani makatxaākari itxaua iua —itxarona.

Auītetxi Ākiri Xesosi Makananitini

⁴³ Iuaā ipi ōti inapaka atoko Xesosi sipeka. Karirēia tōpa isa. ⁴⁴ Mitxi Xesosi sākire: “Teoso sākire sāpiretakari paxitaāka, txamari Teoso sākire sāpiretakari itixineē auakasaaki, kākiti iuaātaā kona aukari iua sākire,” itxapeka Xesosi.

⁴⁵ Iuaritika Karirēia tōpa apokasaaki, kākiti iuaā auakani ipoxokoniritika apakapari Xesosi, kotxi ninoa apaka sari iua Páskoa kiiniriti Xerosareē

sitatxitiā. Iuaātaā itikarina Xesosi posotiire. Ininiākara ipoxokoniritikana apakaparina Xesosi.

⁴⁶ Xesosi iuaākana sari Kanaa sitatxitimoni, Kariréia tōpa. Mitxi Xesosi inoākepekari āparaā iāriā ininiua iuaā. Xesosi apokasaaki Kanaa, auītexi ākiri amianata Kapanaoō sitatxitikiri. ⁴⁷ Iua auītexi kenakopiretari Xesosi Kariréia tōpa apokini, Xotéia tōpa osipikini. Inakasaaki Xesosimoni isa, aōkita itxari Xesosi. Aiatari:

—Masa Kapanaoōmoni, naapokomoni. Namarite amianata. Pimakananitari iua. Ipinanapanoka —itxari Xesosi.

⁴⁸ Ininiā Xesosi:

—Nimakamakaniāri posotiiretxi, kona hīte nirekari auikiniri nisākire. Posotiiretxi hītikasaakinani, hīte nirekari nisākire hāuikini. Teoso takaōtxikare hītikasaakinani, hinirekari nisākire hāuikini —itxa Xesosi iuamoni.

⁴⁹ —Masapoka naapoko. Pimasikanisaaki, namarite ipinapitikako —itxari.

⁵⁰ —Pisa paapokomoni. Pamarite kona ipina —Xesosi txari iua.

Iua kiki auikari Xesosi sākire, ininiā isipeka. ⁵¹ Ipxininipokoriti aōkitana initiriakori.

—Pamarite auapitikako —itxarina.

⁵² —Namonikitapa akananita? —itxana.

—Kita apaniāxiti apoomari iotoka —itxana.

⁵³ Iuasaaki iua kiki imarotari kita Xesosi sākire manapikara: “Pamarite kona ipina,” ininiri manapikara iotoka apoomari. Ikara atoko ininiā, ikinimane iua aapoko auakanī, iua pakini auikari Xesosi sākire.

⁵⁴ Ininiā ipikatapeka Xesosi kamari posotiiretxi Kariréia tōpa auakasaaki, Xotéia tōpa osipikasaaki.

5

Matīpokotakati Xesosi Erekapeka Inīkitakini

¹ Ikara atoko inaāka atoko Xesosi sari Xerosareē sitatxitimoni, kotxi Xoteo kiinirite Teoso ikapani aua iuasaaki. ² Xerosareē sitatxiti apanīkaki, soti auīte vētxitikoātaā takote aua ipoa xapitikiri. Sīko ironakiko aua iuaātaā. Xoteo sākire Epiráiko. Epiráiko sākireē iua ipoa uāka “Petésita.” ³ Ironakikoātaā amianatakanipokoni sirīkanāta. Mōsiāreni, motīkani, matīpokotakani pakini iuaā auanāta. Iātapanātarina āparaā tokīkaātini. ⁴ Teoso nitiri apokanaka iuaātaā. Iua apokasaaki itokīkaātakari āparaā. Āparaā tokīkaātakasaaki, ātika amianatakari īkiika komokaātakari erekapeka itxa. ⁵ Matīpokotakati iuaā auanātakari amiananātakari trīta oito pakini anokanani amianata. ⁶ Xesosi atamatarī iua iuaā isirīkanātini. Imarotari iua uatxakapokoni amiananāta. Ininiā Xesosi pimaāri:

—Ereka pinini pinireka? —itxari.

⁷ Amianatakari apakapapiretari:

—Ari, ninirekapitikamari, txamari kona kanikikono kāuaāriā āparaā tokīkaātakasaaki. Nīkomokaaritakasaaki, āti komokape napisapanika —itxari Xesosi.

⁸ —Pōkitikaua. Pisirimata pikoseka, sipeka pitxa —Xesosi txari.

⁹ Iuasaakipeka erekapeka itxa iua amianatakari. Isirimata ikoseka, tīpokota itxapeka. Iua ōti kākiti tomatini ōti. ¹⁰ Ininiākara Xoteo auīteakori txitari amianatakari erekapeka inakari:

—Uatxa kākiti tomatini ōtisaaki pite anikanātari pisirimata. Īkora atoko ininiā, kākiti !auritaāka —itxarina, kotxi ninoamoni iparīkauata isirimata anikasaaki.

¹¹ Ininiã iua kiki:

—Erekafe ninikitaãkirira paniãtano: “Pisirimata pikoseka, sipeka pitxa,” itxano.

¹² Ininiã ninoa:

—Kiripa kiki paniãtai pisirimata pikosekini pisini ikapani?

¹³ —!Nimarotari iuãka —itxa.

Iuaãtaã ipoa xapitikiri takote kaiãopokori kãkiti auanãta, ininiã patimari Xesosi sipeka ninoa sauaki.

¹⁴ Eereka Xesosi aõkitari iua kiki Teoso misãkiretiko aikotiã.

—Uatxa pitipokotapeka, ininiã maerekati pitakanapako. Iuaikana maerekati pikamakasaaki, atxiiti amianari apiatakari inokai —Xesosi txari iua.

¹⁵ Eereka iua kiki sari Xoteo auiteakorimoni.

—Xesosira erekapeka txikitakano nota —itxari.

Xoteo Omanatiniri Xesosi

¹⁶ Tomatiko õtisaaki Xesosi makananitari iua amianatakari. Ikara xika Xoteo auiteakori kinirão okaka txari Xesosi. ¹⁷ Xesosi imarotari Xoteo auiteakori sãkire, ininiã itxana:

—Niri Teoso kamari erekari ikiniõtika. Iua atokotxikana nota. Kona niotoka erekari nikamini tomatiko õtisaaki —itxa Xesosi.

¹⁸ Ikara Xesosi sãkire xika Xoteo auiteakori apiata omanatari Xesosi. Ninoa-moni Xesosi kamari maerekati tomatiko õtisaaki amianatakari imakananiti. Xesosi sãkire: “Niri Teoso,” inini xika, apiata omanatarina iua, kotxi iua: “Teosotxikana nota” itxanãta iua Xesosi.

Xesosi Irikata

¹⁹ Ininiãkara Xesosi misãkiretana Xoteo auiteakori:

—Atãopitikara nitxai hite. Nota Teoso ãkiri nitxaua. Notanani lkakamareno. Nitikari niri kamanãtakiti, ininiã niri kamakiti iaõka nikama. Iuanokara nikama nota. Niri kamakitiitxikana nota kama apaka. ²⁰ Niri tiretano nota, ininiã ikini sereti ikamanãtakiti oerekano. Oerekapanikariko posotiiretxi apiatapanikako nota kamini ikapani, ininiãkara hite tsorikaãtako hitikasaakiri.

²¹ Niri õkitikari ipikani, iuaikana aua inini tikane. Iua atokotxikana nota txikitakana kãkiti ninirekaãkini, iuaikana auini ikapani. ²² Teoso kona txari kãkitimoni: “Kona erekai pite, ininiã kãkiti misiritikomoni pisa,” kona itxa Teoso. Apanakinimoni kona Teoso txari: “Erekai pite, ininiã uai pina notakata pauini ikapani,” kona itxa Teoso. Notakara iua ãkirikara txari ikara atoko inakari kãkitimoni, kotxi Teoso sikaposotiiretano nota ikara atoko inakari nisãpiretini kãkitimoni. ²³ Ikara atoko ininiãkara, kãkiti paxitano nota. Niri nirekari nota paxitiko, iua paxitiko atokotxikana. Nota mapaxitakani kona paxitari niri nota iokanatakari.

²⁴ —Atãoenepitikara nitxai hite. Nisãkire kãpitakari, nota iokanatakari sãkire auiaãkari, auapika Teosokata. Kona Teoso misiritapaniriko iua. Kona ipinaika. Auapika Teosokata. ²⁵ Atãoene nitxai hite. Kãkiti xinire ipikari atoko itxa maerekati ikamakiti xika. Teoso ãkiri sãkire kãkiti kãpitini õti apokapanikako. Ari iketo apokapeka. Nota sãkire kãpitakani auapikako.

²⁶ Aãri Teosonoka posotari itxikitakiniri ikinipoko auãki inini, kotxi iuanoka auapika. Isikaposotiiretano nota apaka ikinipoko nitxikitakini auãki inini.

²⁷ —Aãri Teoso txano nota: “Kãkiti itari iaxitikiri pitxaua, ininiãkara pitxariko nisãkire mauiaãkani: ‘Kona hite kãpitari Teoso sãkire, ininiã kãkiti misiritikomoni hãsa,’ pitxako. Pitxariko nisãkire auiaãkani: ‘Hite kãpitari Teoso sãkire ininiã uai hina Teosokata hãuini ikapani.’ Ikara atoko pitxariko kãkitimoni,” Teoso txano nota.

28 —Kona hĩtsorĩkaãtapeko, ikara sãkiretxiti hĩkenakotakasaaki. Āti ōti ipĩkani, katakoni, kenakotariko Teoso ākiri akiritinina. 29 Iuasaaki ōkitikauanako. Ninoa erekari kamakani auapikako Teosokata. Ninoa maerekati kamakani misiritaãkako.

30 —Notanani kona nitxari kãkiti: “Pite sari kãkiti misiritikomoni. Pitepekana inari uai Teosokata pauini ĩkapani.” Notanani kona ikara atoko nitxari kãkiti. Teoso sãpiretakitinokara nitxa kãkitimoni, ininiãkara nisãkire kãkitimoni atãonoka, kotxi kona nota nirekaãkitini nikama. Niri nipaniãtakiri nirekaãkitinanira nikama —itxa Xesosi.

Xesosi Sãkire Atãoene Sãpiretakani

31 Apikomoni Xesosi sãpirenauata:

—Notaka sãpiretiniãua hĩtemoni, atxiĩti kona kauikikono. 32 Ātipekana nota sãpiretakari aua. Nimarotari atão inini iua sãpiretakiti. 33 Hĩte iokanatapekari himoianariakori Xoãomoni nota himarotini ĩkapani. Iua sãpiretapekana ninoa atãoene nota sãkire. 34 Kona ninitanãtari kãkiti nisãkire atão inini sãpiretakani. Nota sãpiretai hĩte Xoão sãpiretakiti sãkiretxiti, himaerekani Teoso makatxakini ĩkapani, himapinakani ĩkane.

35 —Xoão tirikapi tirinakari poniãkari atoko itxa. Tirikapi iopinikari ikinipoko, tirikapi takote auakari aãtamatiini ĩkapani. Iua atokokana Xoão oerekari kãkiti atão inakari. Mapaõtinokara hĩte poxokiniuata iua sãkire hĩkenakotakasaaki.

36 —Aua āti nota sãpiretakari. Iua Xoão poiãoka. Ātipekana apiata. Nota kamakitikara apiata. Nikamakiti sãpiretari nota sãkire atão inini. Nikamakiti, niri paniãtakiti kãkiti itikasaaki, imarotari niri uaimoni iokanatinino nota.

37 —Niri, nota iokanatakari kãkitimoni, iua apaka nota sãpiretakari. Kona hĩte kenakotari Teoso sãkirauatini. Kona hĩte atamatari itoõ. 38 Isãkire !auari hãkixinireẽ, kotxi kona hãuikari nota sãkire iua iokanatakiti sãkire.

39 —Hĩte atatsopatapikari Teoso sãkire iõkatsopatakori, hãuini ātipirika Teosokata himarotini ĩkapani. Ia Teoso sãkire iõkatsopatakori nota sãpiretakari apaka itxaua. 40 Txamari kona hinirekari nisãkire hãuikini. Kona hinirekari notamoni hinini, ātipirika Teosokata hãuini ĩkapani.

41 —!Ninitari niuikiko. 42 Iteene nimarotai hĩte. Kona xapiti hĩtoretari Teoso hãkixinireẽ. 43 Niri iokanatanano nota uaimoni. Txamari kona hĩte apakapano nota Teoso iokanatakinitino. Teoso maiokanatakinitira hĩte apakapa. 44 Hĩte potxitari āti iuikinii. Txamari kona hĩkamari erekari Teosonoka iuikinii ĩkapani, ininiã kona hãuikari iua sãkire.

45 —Kona notani sãpiretapaniri niri hĩte maerekani. Moisesira sãpiretariko himaerekani Teosomoni. Hĩte uãkataru iua sãpiretari hĩte ereka hinini, txamari iua sãpiretariko niri himaerekani. 46 Moisesini sãkire iõkatsopatakiti hãuikaãkamako, nota sãkire apaka hãuikamako, kotxi Moisesini nota sãpiretakari apaka. Iua iõkatsopatapekari nota sãkire. 47 Hĩte kona auikapiretari Moisesini iõkatsopatakiti. Isãkire iõkatsopatakiti himauikakaniã, kiãtokopa hĩtxa nota sãkire hãuikini? —itxa Xesosi.

6

Sĩko Mio Kãkiti Xesosi Sikakienatini (Mateo 14.13-21; Marko 6.30-44; Arókasi 9.10-17)

1 Eereka āti ōti Xesosi ĩpiriãtari Karirėia poa. Ia ipoa uãka apaka Txiperiatxi poa inaãka. 2 Kaiãopokori kãkiti sari iua tikini, kotxi ninoa itikapekari Xesosi

makananirauatini. ³ Xesosi kanîka mitaxiratarimoni. Iuaã iitopâka imoianariakorikata. ⁴ Xoteoakori kiinirite, Pâskoia inakori kiiniriti apisapanika Xesosi sari iuaãtaã. ⁵ Iitopâkasaaki, Xesosi atapari itomaneri kâkiti apokaãpotini iuamoni. Ininiã ipimaãri Piripi:

—Amonipa aiamotatariko komiri nakira kâkiti asikakienatini îkapani?

⁶ Xesosi ikara atoko txari Piripi, kotxi inirekari imarotini: “Atauako atxiiti Piripi auikari niposotiire?” Xesosi imarotapekari iuaka ikamakiti tîkane. ⁷ Ininiã Piripi apakapapireta:

—Txineiropokoni, tosêtosî txineiro ota, kona apakata komiri aamotini, nakira kâkiti asikakienatini îkapani. !Apakata —itxari.

⁸ Iuasaaki âti Xesosi moianari Simão Petro itari, Âtree inakori, txari Xesosi:

⁹ —Uai aua amarini. Auari ikiena. Sîko komiri sevata inakori kamakori auari iua. Ipi ximaki axapitiri apaka auari iuamoni. Txamari kâkiti itomaneri sikakienatiko !apakata. Ia nipokori poiãoka —itxari.

¹⁰ Xesosi paniâtari imoianariakori:

—Nakira hîpaniãta iitopâkinina —itxana.

Sotonaiakiperi auari iuaãtaã. Iua nopini iitopâkana. Sîko mio apikomoni kikiakori aua. ¹¹ Xesosi kosekari komiri amarini nakiti. Iuasaakipeka imisâkiretari Teoso:

—Erekapitikari ia komiri auiniua ate.

Iua sikari imoianariakori. Eereka ninoa xanakari kâkiti topâkakanimoni. Iua atokokanera itxarina ximaki. Ikinikana inirekaka iaõka auana ninoa.

¹² Ikinimane kamitopeka inakasaaki, ipaniâtari imoianariakori:

—Itetakori komiri, ximaki pakini hâpotiita. Kona hiomatapiriko —itxa.

¹³ Ininiã apotiitarina komiri itetakori. Tosi kotarina ixâpokakana komiri itetakori.

¹⁴ Xesosi posotiire ninoa kâkiti itikasaaki, ninoakakarika isâkirauatana:

—Atâopitikara Xesosi aiâtapanâkatikara, Teoso sâkire sâpiretakari inakorikara ere Xesosi —itxana.

¹⁵ Xesosi imarotapekari ninoa nirekiniri iauûtetinirina iua. Iua kona nirekari ninoa auûtetiniri iua. Ninoa mamaîkakaniri apisapanika, Xesosi sipeka iuanoka. Apikoxiti oxiratarimoni ikanîka.

Xesosi Ipoa Nopini Inaãpotini

(Mateo 14.22-23; Marko 6.45-52)

¹⁶ Kikatapeka imoianariakori iokiriãta ipoa tiniã. ¹⁷ Iereêtauana kanaua âki. Îpiriaãpotarina ipoa Kapanaoõ sitatxiti manapi. Îkanõkapeka inakasaaki kona Xesosi apokapanika ninoamoni. ¹⁸ Kataparari îtimati apoka, ininiã tsakatipokoni. ¹⁹ Iuasaaki imekoãpotana. Ipixiniãpeka apokasaakina, ataparina Xesosi ipoa nopini itîpokotini. Kanauamoni isaãpota. Ninoa pîkarauata, kotxi ninoa uâkatari kamiri.

²⁰ Xesosi akiritana:

—Notakara. Kona hîpîkarauatape —itxana.

²¹ Ininiã apakaparina Xesosi ipoxokoniritikana. Iua morõkokaua kanauaã. Iereêtakasaakiua, iuasaakipeka kanaua apoka imiriïpe Kapanaoõ manapi.

Kâkiti Nitiniri Xesosi

²² Katimatiniãkata ipiniãmoni kaikotakani nitamari Xesosi. Ninoa imarotari âtoka kanaua mitxi iuaã auini. Oa kanaua Xesosi moianariakori anikapeka. Ninoa imarotari Xesosi kona sari imoianariakorikata. Imarotarina ninoanani sini. ²³ Iuasaaki kanauaniri Txiperiatxi sitatxitikini apokita Xesosi merepani Teoso misâkiretiniãtaã takote merepani komiri nikikoãtaã.

²⁴ Iuasaaki kona ninoa apokari Xesosi, imoianariakori apaka. Ininiã ninoa

iereētāua kanāua āki. Iuaīkana ikanapiriāna. Ipoa Īpiriātana Kapanaoō sitatxitimoni, Xesosi initinina Īkapani.

Komiri Kākiti Auapininiika Inini Tīkane

²⁵ Ninoā apokari Xesosi ipoa ipiniā.

—Koerekareri, namonikitapa papoka uai? —itxarina.

²⁶ Ininiā Xesosi:

—Atāo nisāpiretai hīte. Hīte nikari komiri nisakakiti. Kamitopeka hītxa, ininiā nipokori Īkapaninokara hīnitanātano nota. Kona hāuikari Teoso posotiireē nikaminiri iua posotiiretxi.

²⁷ Xesosi pinitana:

—Nipokorinoka ! hīxinikape, kotxi nipokori okanani mauakati itxāua. Hīxinikariko ātiāo nipokori, nota hītari iaxitiki siākiti, kotxi nota sikari kākiti, kākiti auapininiika inini tīkane. Teoso sikari ikinika iposotiire notamoni ninirekaākiti nikamini Īkapani —Xesosi txana ninoā.

²⁸ —Kiātokopa atxtari Teoso nireēkiti akamini? —itxana ninoā.

²⁹ —Ianoka Teoso nirekari hīkamini. Iua nirekari hāuikiniri iua iokanatakiti sākire —Xesosi txana ninoā.

³⁰ —Iuaīkana posotiiretxi apiari pikaminiā, ininiāra aāuikari Teoso iokanatakiti pininiāua. Kinakaripa posotiiretxi pikamapanika?

³¹ Anirimaneni kitxakapirīkarini āparaā makipakaniātaā auakasaakina, inikarina komiri iaxiti katxakakari. Teoso sākire iōkatsopatakori txari:

Isikari komiri Teoso tixinekiri ninoamoni, —itxarina Xesosi.

³² Ininiā Xesosi:

—Atāo nisāpiretaiko hīte. Kona Moisesini sikari komiri Teoso tixinekiri. Nirikara sikaātari atāo komiri iua tixinekiri kākitimoni. ³³ Teoso tixine Īkari, iua ākiri, komiri atoko itxa, ikini itixiti auakani Īkapani, kotxi iua sākire auiākani auapininiika Teosokata —itxana.

³⁴ —Ikiniōtika pisikāua ia komiri —itxarina.

³⁵ —Notakara iua komiri Teoso iokanatakiti nitxāua. Notakara sikari kākiti auini Īkapani. Iua nisākire auiākari !inatxitaika. !Iposonataika.

³⁶ —Hīte aōkitapekano nota, txamari kona hīte auikapanikari nisākire. Ikara atoko nitxapekai hīte. ³⁷ Imakinika kākiti notamoni Teoso siākini inapitikako notamoni. “Hīsipeka,” kona nitxana notamoni apoākani. ³⁸ Nitakanapari Teoso tixine. Īkorapokoriti napoka, nipaniātakiri nirekaākitinoka nikamini Īkapani. Notaka nirekaākiti na nikama. ³⁹ Niri nipaniātakiri !inirekari ātika kākiti notamoni isiākini ereēkokini. Itixi xipokini ōtisaaki, inirekari nota ōkitikinina ninoā auapininiika inini tīkane. ⁴⁰ Iua nipaniātakiri nirekari nota imarotakani, nisākire auiākani, auapininiika inini. Itixi xipokini ōtisaaki nōkitikana ninoā iuaīkana auiāki inini —itxa Xesosi.

⁴¹ Ninoā Xoteoakori kona apokaerekatari Xesosi sākire, kotxi iua txari: “Nota iua komiri Teoso tixine Īkari komiriti nitxāua,” ininiā ninoā tsoata.

⁴² Ininiā ninoā:

—Iua kiki Xesosi Xosee ākiri. Aaōkitapekari iri, inoro pakini. Kinirepa “Teoso tixine Īkarirano” itxape iua? —itxana, itsoatinina.

⁴³ Ininiā Xesosi txana:

—Kona himaxirauatape. Kona hītsoatape. ⁴⁴ Niri nipaniātakiri akiritakitinanira posotari inini notamoni. Niri makiritakiniti kona posota inini notamoni. Itixi xipokini ōtisaaki nōkitikana notamoni apoākani iuaīkana auinina Īkapani. ⁴⁵ Kitxakapirīka Teoso sākire sāpiretakani iōkatsopatari ia Teoso sākire: Teosorako oerekariko ikinipoko kākiti.

Niri sākire kīpitakani, niri oereēkini, apoka notamoni. ⁴⁶ Kona aua kākiti niri atamatakari. Nota Teoso tixine ĩkari, notanokara atamatapekari niri.

⁴⁷ —Nota sākire auiākari, iuara auapininiika Teosokata. Ia nisākire atāo.

⁴⁸ Nota iua komiri nitxaua kākiti auapininiika inīkitakakarino. ⁴⁹ Hinirimane kitxakapirīkarini nikari komiri iaxiti katxaākari āparaā makipakaniātaā. Iaxiti katxaākari inikanimana, txanima ipīpena. ⁵⁰ Kākiti nikiniāri atāo komiri Teoso tixine ĩkari kona ipina. ⁵¹ Iua komiri, Teoso tixine ĩkari nitxaua nota. Kākiti auapininiika inīkitakakarino nota. Ia komiri niākari auapininiika itxako. Ia komiri nisakakiti ia niitokara. Niito nisika kākiti ikini itixiti auakani auapininiika inini tīkane —itxa Xesosi.

⁵² Ikara atoko ininiā ninoa Xoteoakori taparakienatakakaua:

—Natokopa itxa ia kiki iito isikiniua ate, anikiniri ĩkapani? —itxana.

⁵³ Ininiā Xesosi:

—Atāoenepitikara ikara atoko nitxai hīte. Hītari iaxitikiri ĩto himanikakanisaaki, iarēka himiātakanisaaki, kona hīxinire auapani ātipirika.

⁵⁴ Iua niito niākari, niarēka iātakari, auapikako Teosokata. Xipokatxi ōtisaaki nōkitikariko iua iuaīkana auini ĩkapani. ⁵⁵ Niito atāo komiri itxaua. Niarēka atāo iāriā itxaua. ⁵⁶ Niito niākari, niarēka iātakari, aua nākixinireē. Nota aua iua ākixinireē. ⁵⁷ Niri, ātipirika auapika inakari, iokanatanano nota ĩkorapokoriti. Iuara sikano nota ātipirika nauini ĩkapani. Iua atokotxikana nota sikari nota niākari ātipirika auini ĩkapani. ⁵⁸ Nota iua komiri Teoso tixine ĩkari nitxaua. Komiri hīkiomaneakorini nikakiti ātiāo. Iua komiri nikakari ipīpe. Nota siākiti komiriti niākani, nisākire auiākani auapininiika Teosokata itxanako.

⁵⁹ Ikara atoko itxa Xesosi sākire aiko āki Xoteo apotiitiniātaāua Kapanaoō sitatxiti oerekarauatakasaaki.

Apanakini Takanapiniri Xesosi

⁶⁰ Xesosikata sikani isākire potxitakani, ikara isākire ikenakotakasaakina, ipimaruatakakana:

—Pamimari ikara isākire. Kipa imarotari ikara atoko inakari sākiretixiti? —itxana.

⁶¹ Masāpiretakotika Xesosi imarotari ikara atoko itsoatinina. Ininiā iua:

—Hinirekatari hītakanapinino nota ia nisākire xika? ⁶² Kiātokopa hīxinikakiti hītikiniāno nota hītari iaxitikirino kanīkini mitxi nauiniātaā? Atxiiti iusaaki hāuikatarini nisākire? ⁶³ Iua Erekarī Matamatakotinokara sikari kākiti auini tīkane. Kākiti ĩto tapara ! auari. Ikara sākiretxi hītemoni nisāpiretakiti, iua Erekarī Matamatakoti sākiretxikana. Nisākire auikiko auākitakari kākiti, ātipirika Teosokata auini ĩkapani. ⁶⁴ Txamari auapitika hīte sauaki nisākire mauīākani —itxa Xesosi.

Merepitipanika Xesosi imarotapekari iua sākire mauīākani tīkane. Xesosi imarotari apaka inīkapiritakiri tīkane.

⁶⁵ —Niri Teoso masikaposotiiiretakinini kona iposota apokini notamoni —itxa Xesosi.

⁶⁶ Ikara isākire xika itori Xesosikata sikani takanapari iua. Kona inirekaikarina iuakata isinina. ⁶⁷ Ininiā Xesosi pimaāna imoianariakori tosi: —Hītepekana, hīte apaka nirekatari hītakanapinino? —itxa Xesosi.

⁶⁸ Ininiā Simāo Petro apakapapiretari:

—Apiananiri, kirimonipa asa atxiiti? Pitenanira sāpiretari kākiti auapininiika inini. ⁶⁹ Ate imarotari Teoso mereēkiti pininiua. Teoso ākiri, auapika inakari ākiri pitxaua pite —Petro txari Xesosi.

⁷⁰ Ininiā Xesosi:

—Nota mereēi hīte tosi kikiakori. Txamari hīte sauaki aua Satanasi nitiri —itxa Xesosi.

⁷¹ Iuasaaki Xesosi xinikari Xotasi Isikariotxi inakori, Simão inakori ãkiri. Xesosi moianarikamara iua, txamari imĩkapiritariko Xesosi.

7

Xesosi Itariakori Maukakaniri Isãkire

¹ Eereka Xesosi kaikotapanika Karirẽia tõpa. Kona Xotẽia tõpa !ikaikota iuasaaki, kotxi iuaã Xoteo auĩteakori nirekari okiniri. ² Iuasaaki Xoteo kiinirite Papiri inakori kaiama atokepekari. ³ Ininiã Xesosi itariakori misãkiretari iua:

—Posipika uai. Pisãkire auĩãkanimoni Xotẽia auakanimoni pisa. Ninoa apaka nirekari itikiniri pikamakiti. ⁴ Kãkiti nirekiniãri iteene imarotaãka, !ikipatari ikamakiti. Pite kamanãtari posotiiiretxi uai Karirẽia tõpa. Pisa Xotẽiamoni. Iuaã poerekari piposotiire ikinimane imarotiniĩ !kapani —itxana.

⁵ Ikara atoko itxarina Xesosi, kotxi itariakori apaka iuasaaki kona auikanipikari isãkire.

⁶ Ininiã Xesosi apakapapiretana:

—Iuaã nisini keto kona apokapanika. Apakata ikiniõtika Xotẽia tõpamoni hĩte sini, ⁷ kotxi kãkiti ! omanatai hĩte. Notananira omanataãka, kotxi nisãpiretari maerekati kãkiti kamakiti. ⁸ Erekarĩ hĩte sini kiinirimoni. Kona nota sapani uatxa. Nisini manapi apokasaaki nisa —itxa Xesosi.

⁹ Itariakorimoni ikara inaka atoko, ikaikotapanika Karirẽia tõpa.

Xesosi Sari Papiri Kiiniritimoni

¹⁰ Itariakori kiinirimoni !ikiikapeka. Ninoa tikinimoni isa Xesosi. Iuasaaki ! kasãpirenari kiinirimoni isini !tkane. Ininiã kãkiti mimarotakinitika isa.

¹¹ Xoteo auĩteakori nitapiimari Xesosi kiinirisaaki. Ipaããri kãkiti:

—!tpari Xesosi?

¹² Kãkiti iuaã auakani sãkirauata Xesosi pirena. Apanakini txari:

—Peerekari Xesosi.

Apanakinipekana:

—Kona erekari. Imisirienetari kãkiti —itxana.

¹³ Kona kãkiti sãkirauata Xesosi uãka Xoteo auĩteakori takote, kotxi ipĩkana.

¹⁴ Mapaõtinoka kiiniri xipokini apisapanika, Xesosi sari Xotẽia tõpamoni. Isari Teoso misãkiretiko aikotimoni. Iuaã oerekarauata. ¹⁵ Xoteoakori tsorĩkaãnãta Xesosi sãkire ikenakotakasaakina:

—Kininiãpa ere kiki paimatireri. Kona apaiaõkarauata —itxanãtana.

¹⁶ Ininiã Xesosi apakapapiretana:

—Na nota imaroreni noerekai hĩte. Iua niokanatakiri imarorera noerekai hĩte. ¹⁷ Kãkiti Teoso nirekaãkiti nirekaãkani imarotari noerekiniri Teoso imarorenoka. Ninoa imarotari nimoerekakaniri notaka nimarore.

¹⁸ Kãkiti iuaka isãkire sãpiretakari nirekari apanakini iuikiniri iua. Kãkiti Teoso sãkirenoka sãpiretakari nirekari iuikiniri Teoso ipaniãtakiri. Ikara atoko inakari kãkiti sãkire atãonoka. !Ikamari maerekati. ¹⁹ Moisesini oerekai hĩte Teoso sãkire, ipaniãtakiti iõkatsopatakori. Txamari kona hĩte kamari Teoso paniãtakiti. Kona ãtika hĩte kamari ipaniãtakiti, kotxi hinirekari hõkinino nota —itxana ninoa.

²⁰ Ininiã ninoa apakapapiretari:

—Maerekati matamatakoti auãitotai pite. Kiripa kinirão okaka txai pite? Iua maerekati matamatakoti xika ikara atoko pitxa pisãkire —itxarina.

²¹ Ininiã Xesosi:

—Nota kamari posotiiiretxi tomatikoõtxitisaaki, iua kiki matĩpokotakati ni-makananitakasaaki, ininiãkara hĩte tsorĩkaãta. Hũuãkatarĩ nĩparĩkauatini.

²² Txamari hîte apaka parĩkauata tomatiko õtisaaki, kotxi hĩkamari Teoso takaõtxikare hamarite Ìtoã tomatiko õtisaaki. Moisesini paniãtai Teoso takaõtxikare hĩkamini hamarite Ìtoã oito õti iua aukasaaki. Ari hinirirmane kitxakapirĩkarini, Moisesini apisapanika, oerekepekari ikara atoko inakari hĩkamini. ²³ Ininiã hîte kamari Moisesi paniãtakiti tomatikoõtxitisaaki. Ikara atoko ininiã, kinirepa hîte omanatano nota, iua kiki erekepeka nitxĩkitakini xika tomatikoõtxitisaaki? ²⁴ Iteene pimimarotakanisaakiri ãti kamakiti, kona pakiritapiri: “Iua kamari maerekati,” kona pitxape. !Papoĩtapiri ãti. Atão inakarínoka pinita, atão pimarotini Ìkapani –itxa Xesosi.

Xesosikani Teoso Mereẽkiti Txataua?

²⁵ Apanakini kãkiti Xerosareẽ auakani txanãtari:

–Ere kíkikani ninoa kinirão okaenetakitikani? ²⁶ Hãtamatarì. Iua sãkirauanãta kãkiti apisatoõ. Kona kapĩkareri iua. Auĩtetxiakori !kasãkirena. Atauako auũteakori auĩkatarì isãkire atxiĩti? Atxiĩti auĩkatarina Xesosi Teoso mereẽkiti aiãtapanãtakiti ininiãua? ²⁷ Atão Teoso mereẽkiti aiãtapanãtakiti apokasaaki, kona kimarotikori iua ininimoni. Ate amakinika imarotapitiki iua Xesosi ininimoni. Karirẽiakiri iua, ininiã Xesosi Teoso mereẽkiti aiãtapakiti litxaua –itxanãtana.

²⁸ Teoso misãkiretiko aikotiã Xesosi oerekaruanãtakasaaki, itaparasãkireritika ipimaãna kãkiti iuaã auakani:

–Atauako híte imarotatano nota? Atauako himarotatarì nota ininimoni? Kona notaka iokanataua kãkitimoni. Niokanataãka. Nota paniãtakari atãonoka isãkire. Kona híte imarotari iua. ²⁹ Nota imarotari iua, kotxi iua auiniãtaãkirikarano nota. Iuara iokanatano kãkitimoni –itxa Xesosi.

³⁰ Iuasaaki auĩtetxiakori nirekamari imaĩkinirina. Kona kamaĩkikori, kotxi imaĩtiko manapi kona apokapanika. ³¹ Ninoa auĩtetxiakori kona auikari Xesosi sãkire, iuaritika itomaneri kãkiti auikari Xesosi Teoso mereẽkiti kãkiti iãtapakiti ininiua.

–Iua kiki inipitikara Teoso mereẽkiti aiãtapakiti itxaua, kotxi ãti posotiretxi apiari kamakari !auari –itxanãtana.

Sotatoakori Iokanatiko Xesosimoni

³² Pariseoakori kenakotakasaakiri kãkiti sãkire ikara atoko inakari, ninoa, sasetotxi auĩteakori pakini iokanatarì sotatoakori Xesosi imaĩkinina Ìkapani.

³³ Sotatoakori apokasaaki iuamoni, Xesosi txari kãkiti iuaãtaã:

–Mapaõtinoka hítekata nauako. Eereka nisa nipaniãtakirimoni.

³⁴ Hinitapiikamano, !hãpokapanino. Nisinimoni kona híte posotari hĩsini –itxa Xesosi.

³⁵ Auĩtetxiakori ninoakakarika isãkirauatana:

–Amonipa isa atxiĩti, ate mapokakaniãri iua? Atauako õtakoxiti isatako Xoteoakori iarikanimoni, ãti uãka sauaki Xoteoakorimoni? Atauako oerekatari Xoteo minakaníua? ³⁶ Kotxi iua sãkire: “Hinitanoko. !Hãpokano nota. Kona híte posotari nota sinimoni hĩsini,” itxa sãkireta. Ate !imarotari isãkire –itxanãtakakana.

Ãparaã Kãkiti Auãkitaãkari

³⁷ Kiiniri mapotõkire õti apiapoxokonita. Iua õti Xesosi tima kãkiti sauaki. Itaparasãkireritika isãpirenauata ikinimane kenakotiniri Ìkapani:

–Piposonatakasaaki, notamoni pinako piãtini Ìkapani. ³⁸ Teoso sãkire iõkatsopatakori txari:

Nota sãkire auĩãkari ãxinireẽ aua amomo atoko inakari. Iua ãparaã txĩkitakari kãkiti auãki inini.

–itxa Xesosi.

³⁹ Iua Erekarí Matamatakoti amomo atoko itxa. Xesosi sãkire auĩãkari apakapariko iua Erekarí Matamatakoti. Iuasaaki Xesosi sãkirauatakasaaki, iua Erekarí Matamatakoti kona siãkapanika kãkitimoni, kotxi Xesosi kona kanapiriãpanika Teoso tixinemoni.

⁴⁰ Ikara Xesosi sãkire ikenakotakasaaki itori kãkiti txari:

—Atãopitikara ikira kiki Teoso sãkire sãpiretakari aiãtapakiti itxaua.

⁴¹ Apanakini txari:

—Iua Teoso mereẽkiti aiãtapakiti itxaua.

Apanakinipekana:

—Teoso mereẽkiti aiãtapakiti, Kariréiakiri ! itxaua. ⁴² Teoso sãkire iõkatsopatakori sãpiretari Teoso mereẽkiti aiãtapakiti, Taviini apika mekaniri itxaua. Iua iponaniãko Pereẽ sitatxiti Taviini auiniãtaã —itxana.

Ikara atoko itxanãtana, kotxi kona imarotarina Xesosi iponaniiniãtaã Pereẽ sitatxiti.

⁴³ Iuasaaki apanakini auikari Xesosi sãkire. Apanakinipekana ! auikari Xesosi sãkire. ⁴⁴ Apanakini nirekamari imaĩkiniri Xesosi iuasaaki, iuaritika iua maĩkakari ! auari.

Sotatoakori Kanapiriã Xoteo Auĩteakorimoni

⁴⁵ Ininiã sotatoakori kanapiriã sasetotxi auĩteakorimoni, pariseoakori pakinimoni. Ininiã ipimaãna:

—Kinirepa kona himinari Xesosi uaimoni?

⁴⁶ —Apia imatiresãkireta iua. ! Auari kãkiti iua atoko ina sãkiretakari, ininiãkara !apakata amaĩkiniri iua —itxana sotatoakori.

⁴⁷ Ininiã pariseoakori omanãkarauata.

—Atauako iua misirienetai hĩte apaka? Iua txĩkitakai hĩte isãkire hãuikini.

⁴⁸ ! Auari auĩtetxi iua sãkire auĩãkari. ! Auari pariseo iua sãkire auĩãkari.

⁴⁹ Kãkiti miĩkietinanira auikari Xesosi sãkire. Xesosi sãkire auĩãkari kona imarotari Moisesini paniãtakiti. Ininiãkara Teoso misiritanako ninoa —itxa pariseoakori sãkire.

⁵⁰ Iuasaaki Nikotemo inakori iuaãtaã aua. Pariseo itxaua. Iua õti apisapanika iuara sari Xesosimoni ikanõka imisãkiretiniri ikapani. Ninoa ikara atoko isãkirauatakasaaki, Nikotemo misãkiretana ninoa:

⁵¹ —Kãkiti kamakiti isãpiretini apisapanika, “maerekati ikamakiti,” kona hĩtxape. Ikara atoko itxa Moisesini oerekasaaikua ate —itxana.

⁵² Ininiã ninoa pariseoakori:

—Atxĩiti pite Kariréiakirikai apaka, Xesosi atoko? Iteene patatsopatariko Teoso sãkire iõkatsopatakori. Iua iteene patatsopatakasaaki, iuasaakiikarako pimarotariko ! auari Teoso sãkire sãpiretakari, Kariréia tõpakiri —itxarina iua.

⁵³ Eereka ikinimane sari aapokomonina.

8

Sito Õtaniri Minakotikatika Sirĩkakaró

¹ Iuasaaki Xesosi sari Orivanape Xiratamoni. Oriva txipokori.

² Katimatĩnikata ikanapiriã Teoso misãkiretiko aikotimoni. Iuasaaki ikinipoko kãkiti apotiitaua iuamoni. Ininiã Xesosi topãka, Teoso sãkire isãpiretini ikapani. ³ Iuasaaki kaiõkatsopareriakori, pariseoakori pakini minaro sito iuamoni. Ninoa apokaro oa sito õtaniri minakotikatika osirĩkini. Itakarona oa ikinimane apisatoõ.

⁴ —Koerekareri, aãpokaro oia sito õtaniri minakotikatika osirĩkini.

⁵ Moisesini sãkire iõkatsopatakori paniãtaua ikara atoko inakaro kai soroã oõkaãka. Pitepekana, kiãtokopa atxataro oa? —itxana Xesosimoni.

⁶ Ikara atoko ipimaãrina Xesosi, kotxi inirekarina Xesosi kerokiniri isãkire. Inirekarina Moisesini paniãtakiti iaõka imakamakaniã, ininiã maerekati ikamapeka. Txamari !kasãkireri Xesosi. Iokirita, iõkata itxari kipatxi iuakokiã. Imakenakotakiniti atoko itxa. ⁷ Ipmarauatapanikana, ininiã Xesosi õkaõkitaua.

—Maerekati makamakaturako ãkiika kiporonakiniro aroa kai soroã —itxa Xesosi.

⁸ Eereka Xesosi iuaĩkana iokirita, iõkata itxari kipatxi. ⁹ Ninoa ikaraene ikenakotakasaakina, iua apiata kiomãtxi inakariua sipeka. Eereka iua tikini auakari apaka sipeka. Ikara atoko itxaãpotana ikinikana isinina. Eereka Xesosinoka kaikota oa sitokata. ¹⁰ Xesosi õkaõkitaua, atamata itxaro oa sito. Oanoka kaikota iuaã.

—Itapari pimaerekani sãpiretakani? —itxaro.

¹¹ —Apiananiri, isipekana nimaerekani sãpiretakani —otxari.

—Nota apaka kona sãpiretari pimaerekani. Pisipeka. Maerekati kona pikamapinikako —itxaro.

Kãkiti Xinire Iopiniãkari

¹² Eereka Xesosi iuaĩkana oerekari kãkiti.

—Nota ikini itixiti auakani tirikapite atoko nitxaua, kotxi noerekari Teoso sãkire notakata sikani. Teoso mimarotakani ipiaã sikani itxauana. Notakata sikanipekana !itipokota ipiaã. Nota sikana ninoa ãtipirika auinina ikapani —itxa Xesosi.

¹³ Ininiã pariseoakori misãkiretari Xesosi:

—Kona ate auikapiretari pisãkire, kotxi pitenani sãpiretari pisãkire. Ikara atoko ininiã, kona aimarotari atãoene inini pisãkire. ãti sãpiretiniãri pite sãkire iaõka, aũuikari atxiiti —itxarina Xesosi.

¹⁴ Ininiã Xesosi:

—Nota sãkirekara ikara atoko nitxai hĩte, iuaritika atãoenekara ikara atoko nitxai hĩte, kotxi nota imarotari nininimoni, nimarotari nisinimoni. Kona hĩte imarotari nota ininimoni. Kona hĩte imarotari nota sinimoni. ¹⁵ Kãkiti hĩtxaua, ininiã hãpoĩrauata, kotxi !himarotari atão. Kona nota txari kãkitimoni: “Pite, peerekai pite. Pitepekana, !erekai pite.” !Ikara atoko !nitxari kãkiti.

¹⁶ Iuaritika nisãpiretakasaakiri kãkiti kamakiti, atãonoka nitxa nisãkire, kotxi kona notananini sãpirenauata. Niri niokanatakiri sãpiretakitixikana nisãpireta.

¹⁷ Kitxakapirĩka hĩteka kiomaneakorini sãkire iõkatsopatakori txari: Kãkiti itikakititixikana ãti itikakiti. Ninoa ipi sãkire ãtinoka auiniã, ininiã ninoa sãkire atãonoka itxa, itxa hĩkiomane sãkire. ¹⁸ Nota sãpiretari nota pirena. Niri niokanatakiri apaka sãpiretari nota pirena nisãkiretxikana, ininiã ipi auape —itxa.

¹⁹ —Naniparari piri? —itxarina.

—Kona himarotano nota. Niri apaka kona himarota. Nota himarotaãkamako, niri apaka himarotamako.

²⁰ Ikara atoko Xesosi sãkiauata. Txineiro Teoso ikapani sikikoãtaã takote Xesosi oerekarauata Teoso misãkiretiko aikotiã. Xesosi ikara atoko isãpirenauata, iuaritika kona kamaĩkikori, kotxi imaĩkiko manapi kona apokapanika.

Xesosi Sinimoni Kãkiti Masikani

²¹ Iuaĩkana Xesosi misãkiretari kãkiti:

—Nisipiriko. Eereka hinitapiimano. Nota sinimoni !hãuiritaãka hĩsini. Hĩpinakasaaki, himaerekanikatika hĩpinako —itxa Xesosi.

²² Xoteo aũteakori napetari:

—Atauako iuaka okãtauako? Kotxi iua txari: “Nota sinimoni kona hãuiritaãka hĩsini” —itxana ninoa.

²³ Iuaĩkana Xesosi sãkirauata ninoamoni:

–İkoraxitikinirai hĩte. Nota itanokiri. Hĩte İkora itixikinirai hĩte. ! İkoraxitikirino nota. ²⁴ İkara atoko ininiãkara, nota txai hĩte: “Hĩpinakasaaki himaerekanikatika hĩpinako,” nitxai. Himaũkakanisaakiri nisãkire nota pirena, hĩpinakasaaki himaerekanikatika hĩpinako. Kona Teoso makatzakinii himaerekani –Xesosi txana ninoa.

²⁵ –Kiriparai pite? –itxarina Xesosi.

–Merepitipanika nisãpiretakitikara iuakarano nota. ²⁶ Nisãpiretakiti tĩkane hĩte maerekani nisãpiretini tĩkane kaĩãopokori. Nota iokanatakari atãoenenokara isãkire. Iua sãpiretakitinokara nisãpiretari kãkiti itixi auakani –itxa Xesosi.

²⁷ Ninoa himarotari Xesosi iokanatakari aĩri Teoso. ²⁸ Ininiã Xesosi txana:

–Nota hĩtari iaxitikiri hõkasaaki, niĩto itano hõkitikasaaki, iusaakiikarako himarotano kinakaripa nota. Iusaaki himarotariko notaka sãkire ! nisãpireta. Niri oereẽkitinokara nisãpireta. ²⁹ Iua niokanatakari notakata aua. Niri !itapanano nota, kotxi inireẽkitinoka nikama –itxa Xesosi sãkire.

³⁰ Xesosi ikara atoko ina sãkiretakasaaki, itomaneri kãkiti auikari isãkire.

Õpoĩkakoni Pirena

³¹ Ininiã Xesosi sãkirauata Xoteoakorimoni iua sãkire auĩãkanimoni.

–Nisãkire iaõka hĩkamakasaaki, atão nimoianariakori hĩtxauako. ³² Atão nimoianariakori hinakasaakiaua, himarotari atãonoka inakari. Atãonoka inakari himarotakasaaki, õpoĩkakoni atoko hĩtxaua.

³³ Ninoa apakapapireta:

–Apraãoni apika mekanirireua ate, ininiã anirekinimoni asa. Nitiritxi iamotakoni !atxaua. Kinirepa õpoĩkakoni atoko pitxĩkitakaua? –itxana.

³⁴ Ininiã Xesosi:

–Atãonoka nitxai hĩte. Maerekanitxi nitiri atoko itxa kãkiti maerekati kamakari. ³⁵ Nitiritxi iamotakori atipirika !auari ipatrãote aapoko. Patrão ãkiri auapika atipirika iri aapoko. ³⁶ Nota Teoso ãkiri txĩkitakasaakiri kãkiti õpoĩkakori atoko ininiua, maerekanitxi nitiri !itxaikauako. Iusaaki iposotari erekari ikamini.

Apraãoni Apika Mekaniriakori

³⁷ –Nimarotari Apraãoni apika mekaniriakori hininiua, txamari hinirekari hõkinino. Nisãkire himaũĩkani xika hinirekari hõkinino. ³⁸ Nota sãpiretai hĩte nota iri oerekakiti. Hĩte kamari hĩte iri paniãtakiti –itxa Xesosi.

³⁹ –Apraãoni ate iri –itxana ninoa.

Ininiã Xesosi:

–Apraãoni apika mekaniriakori hininiãua, Apraãoni kamakiti atoko hĩkamamako. ⁴⁰ Atãonoka nisãpiretai hĩte. Teoso sãpiretakitinokara nisãpiretai, iuaritika hinirekari hõkinino. Apraãoni !ikamari ikara atoko inakari. ⁴¹ Hĩte kamari hĩte iri kamakiti atoko inakari –itxa Xesosi.

–Teosonanira ate iri. Ate atãopitika iua anaakori atxaua –itxana.

⁴² –Teoso atão hĩri ininiãua, nota hĩtiretamako, kotxi Teoso auiniãtaã nota ina uaimoni. Kona notaka iokanataua. Teosora iokanatano nota uaimoni.

⁴³ Kininiãpa !hĩkitetatarı ikara atoko nininii? !Himarotari nisãkire, kotxi kona xatiki hinirekari nisãkire iaõka hĩkamini. ⁴⁴ Satanasira hĩri. Hĩte nirekari maerekati, Satanası nireẽkiti iaõka hĩkamini. Kitxakapirĩka itixi kamiko atokopanika kokaniri itxaua Satanası. Iua !inirekari atãoene isãpiretini. ! İposotari atãoene isãpiretini. Aãpirenanokara iua imarota, kotxi aãpirenaãri itxaua iua. Aãpirenaãri iri itxaua iua Satanası. ⁴⁵ Nisãkire atão, ininiãkara hĩte !auikari nisãkire. ⁴⁶ Hĩte atika itikatarı maerekati nikamini? Atika !itikari

maerekati nikamini, kotxi kona maerekati kona nikama. Ininiã kinirepa kona hïte auikari nisãkire? ⁴⁷ Teoso anaakori kïpitari iua sãkire. Hïte kona kïpitari iua sãkire, kotxi iua anaakori !hïtxaua hïte —Xesosi txana ninoa.

Xesosi Apraão Apisapanika Auini

⁴⁸ Ininiã Xoteoakori txari Xesosi:

—Ate sãkire atão. Samariakiri pitxaua pite. Maerekati Matamatakoti auaitotai pite —itxana.

Ninoa akiriuaãkatarì Xesosi “Samariakiri,” kotxi Xoteoakori omanatana Samariakini. ⁴⁹ Ininiã Xesosi:

—Maerekati Matamatakoti kona auaitotano nota. Nota paxitari niri, txamari hïte kona paxitano nota. ⁵⁰ Kona notani nitari kãkiti nota iuikakani tïkane. Nirira nirekari kãkiti iuikinino nota. Nirira imarotari nisãkire atãonoka inini.

⁵¹ Nota sãkire iaõka kamakari !ipina. Ikara atãoene.

⁵² Xoteoakori apakapapiretari:

—Uatxa aimarotari maerekati matamatakoti auaitotai pite, kotxi Apraõni ipïpe. Teoso sãkire sãpiretakanini apaka ipïpe. Kinirepa pite sãkire: “Nota sãkire iaõka kamakari !ipina,” pitxa? ⁵³ Aïrini Apraõni ipïpe. Pite apiata atxïiti? Teoso sãkire sãpiretakanini apaka ipïpe. Kiriparai pite? —itxarina Xesosi.

⁵⁴ Ininiã Xesosi:

—Notaka niuikiniua !apakata. Nirira iuikano nota. Hïte sãkire: “Ateosone iua,” txamari nota irira iua. ⁵⁵ Kona himarotari Teoso. Notananira imarotari Teoso. Nota “kona Teoso nimarota,” nininiã, hïte atokokamarako nitxamako. Aãpirenaãri nitxamauako. Nota imarotapitikari iua. Nota kïpitari isãkire. ⁵⁶ Hiri Apraão poxokoniua, nota uai apokini ikenakoenetakasaaki. Iua itikari nota uai apokini, ininiã iua poxokoniua.

⁵⁷ Ininiã ninoa Xoteoakori: —Pite sïkoëta anokanani !apokapanika, iuaritika paõkitatari Apraão? Paxirari pisãkire —itxarina.

⁵⁸ —Apraão apisapanikara nota aua. Ikara atãoene nitxai hïte —itxa Xesosi.

⁵⁹ Ikara isãkire ikenakotakasaakina, ikosekarina kai soro Xesosi ikiporonakinina ïkapani, okinina ïkapani. Xesosi kipataua. Osipikari Teoso misãkiretiko aikoti. Inapaãpota ninoa sauaki.

9

Mõsiãreti Xesosi Erekepeka Inïkitakini

¹ Xesosi tïpokotakasaaki, itikari mõsiãreti. Iua ponaniãkasaaki, mõsiãreti itxapekaua. ² Xesosi moianariakori pimaãri iua:

—Koerekareri, kiripa kamari maerekati iua mõsiãreti inini? Iuakani? Irikani? Inorokani?

³ Ininiã Xesosi:

—Kona iua maerekani xikani mõsiãreti itxaua. Kona iri maerekani xikani, kona inoro maerekani xikani mõsiãreti itxaua. Kona maerekaniitxi xikani mõsiãreti itxaua. Iua mõsiãreti Teoso posotiore kãkiti imarotini ïkapanira.

⁴ Kãkiti parïkauata pokamara. Mapiãpeka inakasaaki, kona kãkiti posotaikari iparïkauatini. Iua atokokana akamarïko niokanatakiri paniãtakiti aãuapanika anakasaaki. Apinaka atoko kona akamaikari Teoso paniãtakiti ïkorapokoriti.

⁵ ïkorapokoriti nauakasaaki, niopinikana ikinimane ãkixinire Teoso imarotini ïkapani —itxa Xesosi.

⁶ Ikara inaãka atoko ienemaã ixiti oakaka Xesosi. Ikamari ãkape, minapa itxari mõsiãreti oki nopini. ⁷ Iokanatarì:

—Parokari poki Siroee poamoni —itxari mõsiãreti.

Iuaā auari ipoa xapitikiri kākiti kamakiti. Iua ipoa uāka “Siroee.” Iua uākatxikana “Iokanatakori” itxaua. Iua sari Siroeemoni. Arokatoōtau. Iuasaakipeka kōsiārepeka itxa.

⁸ Aapoko takote auakani, kākiti mitxi mōsiāreti itikakani pakini, ninoa misākiretakakaua:

—Ikira kiki mitxi iitopākanātapika inakarikani, kākiti txineirote amanaānātapika inakarikani, ikira kiki? —itxana.

⁹ Apanakini apakapipiretari:

—Ari, iuapitikara.

Apanakinipekana apakapipiretari:

—Kona. Kona iuani. Āti kiki iua mōsiāreti atoko inakarira.

Iua mitxi mōsiāreti apakapipiretari:

—Ari, iuapitikarano nota —itxa.

¹⁰ Ininiā ninoa:

—Kiātokopa pitxa uatxa kōsiārepeka pitxapeka? —itxarina.

¹¹ —Iua Xesosi inakori kamari ākape, nokiā minapa itxari. Ipaniātano: “Āparaā Siroee inakorimoni pisa. Iuaā parokatoōtau,” itxano nota. Ininiā nisa. Narokatoōtau. Iuasaakipeka nota kōsiārepekanano —itxa.

¹² —Namoniparari iua? —itxarina.

—A, meta —itxa iua mitxi mōsiāreti.

Pariseoakori Mitxi Mōsiāreti Inakarikata

¹³ Ninoa anikari iua mitxi mōsiāreti pariseoakorimoni. ¹⁴ Iua ōti Xesosi kamakasaakiri ākape mōsiāreti kōsiārepeka inīkitakini ikapani tomatiko ōtisaaki iusaaki. ¹⁵ Ninoa anikasaakiri iua mitxi mōsiāreti inakari pariseoakorimoni, pariseoakori apaka pimaāri iua:

—Kininiāpa uatxa kōsiārepeka pitxa? —itxana.

—Ākapeēra noki nopini iminapa. Eereka narokatoōtau. Uatxa kōsiārepeka nitxa —itxa.

¹⁶ Pariseoakori ātikaka txari:

—Iua kiki, ākape mōsiāreti oki nopini minapakari, kona iua kamari Teoso paniātakiti, kotxi iparīkauata tomatiko ōtisaaki. !Apakata ikamakiti.

Pariseoakori ātikakapekana sākirauata:

—Maerekati kamakari kona kamari ikara atoko inakari posotiiretxi, mōsiāreti kōsiārepeka inīkitakini.

Ininiā pariseoakori taparakienatakakaua ikara xika. ¹⁷ Iuaīkana pariseoakori misākiretari iua kiki:

—Kiātokopa inakaripa iua kiki pite makananitikari? —itxarina iua.

—Teoso sākire sāpiretakari itxaua iua.

¹⁸ Xoteo auiteakori kona auikari isākire, mitxi mōsiāreti eereka kōsiārepeka inakari sākire. Ininiā ninoa akiritari iri, inoro pakini.

¹⁹ —Hīte sākire hamarite auakasaaki mōsiāreti itxapekaua. Hamaritekani ere? Kiātokopa uatxa kōsiārepeka itxa? —itxana.

²⁰ —Ari, ate ākiripitikara. Iponaniākasaaki, mōsiāretepeka itxaua. ²¹ Kona ate imarotari kiriāpareuako uatxa kōsiārepeka itxa. Kona ate imarotari kiriuako kamari kōsiārepeka inini. Hīpimaāri iua, kotxi mitapekari iua. Iuaka apakapipiretai hīte —iri, inoro pakini txana ninoa.

²² Iri, inoro pakini ikara atoko itxana Xoteo auiteakori ipīkinina xika. Xoteo auiteakori sāpiretpekani kākiti: “Kākiti Xesosi sākire auīākani, Teoso mereēkiti ininiua auīākani, kākiti iātapakiti ininiua auīākani, kona auiri-taākaikana Iroinina aiko Xoteo apotiitiniātaūa.” ²³ Ininiā pīkaretxi xika iri, inoro pakini txari: “Hīpimaāri iua. Mitapekari iua,” itxana ninoa.

²⁴ Ininiā iuaīkana pariseoakori akiritari iua kiki mitxi mōsiāreti inakari.

—Atãonanira pisãpiretako Teoso apisatoõ. Ate imarotari maerekatnoka ikamini Xesosi, kotxi imakananirauata tomatiko õtisaaqi —itxarina.

²⁵ Ininiã iua:

—Kona nimarotari maerekati ikamini. Kona nimarotari erekari ikamini. Mitxipeka mõiãreti nitxaua. Uatxa kõsiãrepeka nitxaua. Ikaranoka nimarota —itxana ninoa.

²⁶ —Kiãtokopa itxai kõsiãrepeka inãkitakiniã?

²⁷ Iua mitxi mõiãreti inakari apakapapiretari:

—Nisãpiretapekai hõte mixikanani, txamari ! hãuikari nisãkire. Kinirepa hinirekatari iuaãkana nisãpiretini? Atauako hõte apaka nirekari iua sãkire hãuikini? —itxana.

²⁸ Ininiã itxitarina:

—Pitera auikari iua sãkire. Ate auikari Moisesini sãkire. ²⁹ Aimarotari Teoso misãkiretari Moisesini. Iua Xesosi kamari maerekati. !Aimarotari amonikiripa iua ina —itxana.

³⁰ Iua kiki apakapapiretari:

—Anekani. Kona hõte imarotari amonikiriuaoko iua ina. Iuara ka-mõiãretano nota. ³¹ Teoso kona maãkatari maerekati kamakari amanaãkiti. Teoso teosonetakani amanaãkiti imaãkatapitika. Iua nirekaãkiti kamakari amanaãkiti imaãkatapitika. ³² Mitxipeka mõiãreti kõsiãrepeka inãkitaãkari kona auari. Itixi kamikosaakipanika ! auari kõsiãrepeka inãkitaãkari. Uatx-aikara auape. ³³ Xesosi Teoso iokanatakiti iminakanimuauoko, likamamariko posotiiretxi —itxa iua.

³⁴ Ininiã pariseoakori:

—Pite maerekatipeka auakarikai. Åtipirika pite kamari maerekati. Maerekatnoka piãkiteta. Iuaritika pinirekatari ate poerekini? Konapitini. Kona ate nirekari ikara pisãkire. Pisipiniikaua. Kona uai pikanapiripinika. Ate kona nirekari pite uai kãkiti apotiãniãtaãua aikoti pinini —ninoa txari iua.

Ininiã aiko porikiti iokanatarina.

Mitxi Mõiãreti Inakari Auikiniri Xesosi Sãkire

³⁵ Xesosi kenakopiretari iporikiti iokanatiko mitxi mõiãreti inakari, ininiã Xesosi nitari iua. Apokasaakiri, itxari:

—Atauako pauikatari Teoso ãkiri sãkire? —itxari.

³⁶ —Kipa iua? Nimarotiniãri, nauikapitkariko —itxa.

³⁷ —Pite aõkitapekari Teoso ãkiri. Iuapitikara misãkirenãtai pite uatxa —itxa.

³⁸ —Apiananiri, nota auikari pite Teoso ãkiri pininiua.

Ininiã iua kapotoreãkaua Xesosi apisatoõ.

³⁹ —Ìkorapokoriti napoka Teoso sãkire auiaãkani ipinimoni nitakinina ãkapani. Isãkire mauiaãkani ipinimoni nitakinina ãkapani napoka ãkorapokoriti. Apanakini nisikaposotiãreta, Teoso sãkire auikinina ãkapani. Mitxi ninoa mõiãreti atoko itxauana, kotxi mitxi ! imarotarina Teoso. Ninoa auikapiretakasaakiri Teoso sãkire, kõsiãreri atoko itxapekauana. Apanakinipekana atão minakati isãkirena: “Nimarotapitikari Teoso.” Ninoa uãkatari kõsiãreri atoko ininiua. Txamari kona atão ninoa nirekari imarotiniri Teoso. !Nisikari posotiiretxi ninoamoni, Teoso sãkire auikinina ãkapani. Kãkiti iua atoko inakari mõiãreti atoko itxaua —itxa Xesosi.

⁴⁰ Åtikaka pariseoakori Xesosi takote auakani kenakotari.

—Atauako atekani apaka mõiãreti atoko atxaua? —itxana.

⁴¹ —“Mõiãreñi atoko atxaua,” hininiã hãsãkire, ininiã atão hãsãkire. Txamari hõte txari: “Kõsiãreua ate,” hõtxama. Iua atoko hininiã hãkamapitikari maerekati, kotxi kona hãuikari Teoso sãkire —Xesosi txana ninoa.

10

Soti Auíte Pitikiri

¹ Xesosi sākiraauatakasaaki, ia atoko itxa isāpirena:

—Atāopitikara ia atoko nitxapaniiko hūte. Soti auíte ĩroā pirikeri itoremoni. Itoremoni mūroākani kīitiriri itxauana, kotxi ātiātaā ikanīka ĩroini ĩkapani.

² Pirikeri toremoni ĩroākari soti auíte pitikiri. ³ Initiri osereēri pirikeri tore iua ĩkapani. Soti auíte kenakotari ipitikiri sākire. Ipitikiri imarotari ĩkinipoko ipiraakori uāka akiritinina ĩkapani. Iuara anikana inipokotinina ĩkapani.

⁴ Porikiti auakasaakina, iua saāpota ninoa apisa. Iua tikini isana ninoa. Ninoa imarotari iua sākire ene. ⁵ Ninoa kona sari kākiti imimarotakininitina tikini. Ipitikiri minakotika akiritakasaakina, imitekana. Kona imarotarina imapitikiritakininitina sākire.

⁶ ĩkara sāpirenatxi atāo inakari oerekiko Xesosi sāpiretari pariseoakori. Txamari ninoa kona imarotari Xesosi ikara atoko inakari isāpirena.

Xesosi Soti Auíte Pitikiri Erekarī Itxaua

⁷ Xesosi iuaīkana sākiraauata.

—Inipitikara nota pirikeri tore nitxaua, soti auíte ĩroini ĩkapani. ⁸ Nota apisa apoākani, atāo minasākiretakani kīitiririni itxauana. Soti auíte kona maākatari ninoa sākire. ⁹ Nota itore nitxaua. Kākiti ĩroiniātaā tore nitxaua. Nota makatxakari uai ĩroākari maerekani, auapininiika inini ĩkapani. ĩroā, ipokīka itxapika. Kona kapīkareri. Natxi !auari. ¹⁰ Kīitiriri apoka ĩitiriuatini ĩkapani, okaniuatini ĩkapani, imisirikarauatini ĩkapani. Notapekana apoka kākiti auapininiika inini ĩkapani, kākiti auini ereka inini ĩkapani.

¹¹ Pitikiritxi erekari nitxaua nota. Pitikiritxi erekari ipina ipiraakori mapinakani ĩkapani. ¹² Nitiritxi soti auíteakori pitikiri !itxaua. Anāpa auíte kaneenamari apokasaaki, iua miteka. Itakanapanako soti auíteakori. Ininiā anāpa maīkari soti auíte, oxikepoata itxana. ¹³ Iua nitiritxi mitekako, kotxi txineiro ĩkapaninokara iparīkauata. Kona atāo itiretari soti auíte.

¹⁴ —Soti auíte pitikiri erekari nitxaua nota. Atāo nimarotari nipiraakori. Ninoa apaka atāo imarotano nota. ¹⁵ Iua atokokana niri imarotano nota. Nota apaka imarotari niri. Nota ipinako soti auíteakori nota nakiti mapinakani ĩkapani. ¹⁶ Nota aua apanakini soti auíteakori apaka. Uatxa ia pirikeri āki !auapanīkana. Nimananako ninoa apaka ia pirikeri āki auinina ĩkapani. Ninoa auikariko nisākire. Ininiā ninoa imakinika aua ātika pirikeri āki. Ātikarako ninoa pitikiri.

¹⁷ —Niri turetano, kotxi nauiritari nipinini, iuaīkana nōkitikinua ĩkapani.

¹⁸ Kākiti !iposotari okinino nota nimanirekasaakiri nokiko. Nota sikariko nīto nokiko ĩkapani. Ninirekasaaki manapi nipina. Ninirekasaaki manapi nōkitikaua. ĩkara atoko niri paniātano nota —itxa Xesosi.

¹⁹ ĩkara Xesosi sākire Xoteoakori kenakotakasaaki, itaparakiēnatakakauana. Apanakini potxtitari Xesosi sākire. Apanakini kona potxtitari.

²⁰ Apanakini txari:

—Satanasi nitiri auaītotari iua.

Ātipekana txari:

—Imapitxirita. Kinirepa hīkenakotatari mapitxiritakari sākire? —itxana ninoa.

²¹ Apanakini txari:

—Satanasi nitiri auaītotakiti !ikara atoko itxa sākireta. Satanasi nitiri kona kōsiārepeka txīkitakari mōsiāreti —itxana.

Xoteoakori !Auikari Xesosi Sākire

²² Mitaãsaaki Xoteoakori kamari kiiniri Xerosareẽ. Iuasaaki ixinikarina Teoso misãkiretiko aikoti merepaniko kamiko. ²³ Iuasaaki Xesosi t̃pokota aiko Teoso misãkiretikoãtaã, Saromãoni inakoriãtaã. ²⁴ Iuaã Xoteoakori apotiitaua iuamoni. Iuasaaki ninoa txari iua:

—Pite Teoso mereẽkiti pininiãua, pisãpiretaua. Akokaxiti anirekari aimarotiniiri ikara —itxarina.

²⁵ Xesosi apakapapiretana:

—Nisãpiretapekai h̃ite. Kona hãuikari nota sãkire. Niposotiire nikamakiti niri uãkaã oerekapekai h̃ite. ²⁶ Nisãpiretapekai h̃ite, txamari kona hãuikari nota sãkire, kotxi nisoti auĩtene kona h̃txaua. ²⁷ Nisoti auĩtene imarotari nisãkire. Nota imarotana ninoa. Ninoa kapokitano nota. ²⁸ Nitx̃ikitakana ninoa ãtipirika auinina. Nota kamari ninoã imip̃ikanina t̃kane. Kona kamaktxakikona nota ñkatakini. ²⁹ Niri sikana ninoa notamoni. Apiatakari itxaua iua. Ininiã ãti kona posotari imaktxakinina niri ñkatakini. ³⁰ Niri, nota pakini ãtika atxaua.

³¹ Ikara atoko Xesosi inakasaaki, Xoteoakori morõkari kai soro ikiporonakinirina ikapani. ³² Xesosi sãkirauata ninoamoni:

—Kaiãopokori erekari niri nakiti noerekapekai h̃ite. Kinakarixikapa hinireka h̃ikiporonakinino nota? —itxa Xesosi.

³³ Xoteoakori apakapapireta:

—Kona akiporonakai erekari pikaminiã. Akiporonakai, “Teosorano nota” pinini xikara. Pite kiki, iuaritika “Teosorano,” pitxa. Ininiã maerekati pikamapeka Teosomonikari.

³⁴ Xesosi apakapapiretana:

—Kitxakapir̃ika Teoso sãkire iõkatsopatakori txari:

Nitxai: “Teosoakori h̃txaua h̃ite.”

³⁵ Aimarotari Teoso sãkire iõkatsopatakori ãtipirika atão inini. Teoso akiriuãkatana ninoa isãkire apakapakani “teosoakori.” ³⁶ Ininiã kinirepa h̃ite kamaãkaretxitano. Niri mereẽno nota inireẽkiti nikamini ikapani. Iokanatano ikorapokoritimoni. Ininiã kinirepa hãpoĩtano Teoso nimisãkirepiretini, “Teoso ãkirirano” ninakasaaki? ³⁷ Nimakamakaniãri niri nirekaãkiti, iuasaaki kona hãuikari nota sãkire. ³⁸ Nikaminiãri inirekaãkiti, iuaritika himauikakaniãri nisãkire, hãuikariko niposotiire. H̃itikakiti hãuika. Ininiã himarotariko, hãuikariko, niri, nota pakini ãtika aniniua —itxa Xesosi.

³⁹ Iuasaakipeka pariseoakori omanãkarauata. Iuaĩkana inirekarina imaĩkinirina Xesosi. Txamari iuasaakipe isipe.

⁴⁰ Iuaĩkana Xesosi kanapiriã Xotão ipiniãmoni. Iuaã ikaikota Xoão kapatxisarerini patxisarauatiniãtaã. ⁴¹ Itomaneri kãkiti sari iuamoni. Ininiã ninoa txa:

—Xoão kona kamari posotiiretxi, iuaritika ikinika isãpiretakiti Xesosi pirena atão inakarinnoka isãpireta.

⁴² Ininiã itori kãkiti iuaãtaã auikari Xesosi sãkire.

11

Arásaro Ipinini

¹ Kiki Arásaro inakori aua ipi itaro, Maria, Mata pakini. Ninoa aua Petãnia aapokotxiti. Iuasaaki Arásaro amianata. ² Xesosi ipinini apisa, oa Maria arokari Xesosi kiti kamariãroã, oiãkoã kaxipota otxari. Oa Maria itari Arásaro amianata. ³ Iua amianatakasaaki, Maria, Mata pakini iokanapireta Xesosimoni:

—Apiananiri, pitiretakiti amianata —otxari.

⁴ Ninoa iokanapirena ikenakotakasaaki, iua txa:

—Amianari inokari Arásaro kona ipinini Ìkapanini. Teoso posotiire oerekini Ìkapanira iua amianari inokari iua. Kãkiti: “Teoso ãkiri peerekari” iniko Ìkapanira iua amianata.

⁵ Xesosi tiretari Mata, oítaro Maria, Arásaro pakini. ⁶ Ikenakotakasaakiri Arásaro amianatini, iua napapanikari ipi òti iuaxiti. ⁷ Eereka itxana imoianariakori:

—Iuaìkana Xotéia tōpa masa.

⁸ Ininiã imoianariakori:

—Koerekareri, kitapani iuaã Xoteoakori nirekari kai soroã ikiporonakinii pite. Iuaritika pisatapanikako iuaãtaã? —itxarina.

⁹ Ininiã Xesosi:

—Pokamara tosi oara aua kãkiti parìkauatini Ìkapani. Pokamara tìpokotakari kona mãkìtita, kotxi atokatxi ipinikari ikinipoko. ¹⁰ Txamari Ìkanōka tìpokotakari mãkìtita, kotxi atokatxi kamara !auari.

¹¹ Ininiã Xesosi:

—Amoianari Arásaro imakanãta. Nota òpirìkariko iua —itxa Xesosi.

¹² Ininiã Xesosi moianariakori txa:

—Imakanãtiniã, erekaãpopekari uatxa —itxana.

¹³ Xesosi imarotari Arásaro ipinini, txamari imoianariakori uãkatari Arásaro atão imakini.

¹⁴ Ininiã Xesosi txana ninoa atão imarotinina Ìkapani:

—Arásaro ipìpe. ¹⁵ Erekapitikari iuaã nimaauakani, kotxi eereka hìte auikariko nota sãkire. Masa iuaxiti. Maòkitari iua —itxa Xesosi.

¹⁶ Tomee Txítximo inakori misãkiretana apanakini Xesosi moianariakori:

—Masa iuakata apinini tìkane.

Ikara atoko itxa isãkire, kotxi iuaxiti Xoteoakori nirekari okiniri Xesosi.

Kãkiti Auãki Inìkitaãkari

¹⁷ Xesosi apokasaaki iuaxiti ipi ipi pakini òti napapeka. Ininiã iusaaki Arásaroni katapeëkaika. ¹⁸ Petãnia Xerosareë takote. ¹⁹ Apanakini kãkiti apoka Mata, Maria pakinimoni. Ninoa moianatana, kotxi itarina !auaika.

²⁰ Mata kenakopiretari Xesosi apokaãpotini. Ininiã oa sari oaòkitiniri Ìkapani. Maria kaikota oaãpoko ãki.

²¹ Xesosimoni Mata apokasaaki, otxari iua:

—Apiananiri, pite uai auaãkamako, kona nitari ipinamako. ²² Iuaritika nimarotapitikari, pamanaãkiti Teoso sikapitikai —otxa.

²³ Ininiã Xesosi txaro:

—Pitari iuaìkana auapanikako.

²⁴ Ininiã Mata:

—Nimarotari itixi xipokini òti nitari iuaìkana auapanikako. Ipìkani òkitikiniua òti, iua òkitikaua —otxa Mata.

²⁵ Ininiã Xesosi sãkirauata:

—Nota ipìkari òkitikakarirano nota. Kãkiti auãki inìkitaãkarirano nota. Nota sãkire auãkari ipininiã, iuaritika iuaìkana auapanikako. Kona ipinaika.

²⁶ Nota sãkire auãkari auapanikako iuaìkana. !Ipinakako. Pauikatari ikara atoko ninini? —itxa Xesosi.

²⁷ Ininiã Mata:

—Apiananiri, nauikapitikari. Teoso mereëkiti pitxaua. Teoso ãkiri pitxaua. Teoso iokanatakiti itiximoni Ìkari pitxaua. Ikara nauikapitika —oa txari iua.

Xesosi Txiapatini

²⁸ Eereka Mata sari oítaromoni. Oãkiritaro oa, mapara omisãkiretini Ìkapani.

—Koerekareri apope. Iua akiritai —otxa Mata.

²⁹ Maria kenakotari ikara inakasaaki, katimariã õkitikaua, iuamoni sa otxa oa. ³⁰ Iuasaaki Xesosi !apokapanika aapokotxiãtaã. Ikaikotapanika mitxi Mata apokiniãtaã. ³¹ Maria katimaritika õkitikasaakiaua, Xesosimoni osini ïkapani, Xoteoakori, oaãpoko ãki auakani, oa mïkapiritakani, sari oa tikini. Ninoa uãkatari akauarimoni osini otxiapatini ïkapani.

³² Maria apoka Xesosimoni. Oãtamatakasaakiri iua, iua apisatoõ okapo-toreëkãua. Otxari:

—Uai pauaãkamako, kona nitari ipinamako —otxa.

³³ Xesosi atamataro otxiapatini. Xoteoakori oakata apokakani txiapata apaka, ininiã Xesosi iteene matinaniuata ãkixinireë. ³⁴ Iua pimaãna:

—Nanipa hïkatatari? —itxa.

Ininiã ninoa:

—Apiananiri, masa. Patariko iuaã —itxana.

³⁵ Iuasaaki Xesosi txiapata.

³⁶ —Hãtamatarari Xesosi. Iua turetãpitikari Arãsaroni —itxa Xoteoakori.

³⁷ ãtikaka Xoteoakori txa:

—Mõsiãreti kõsiãrepeka itxïkitakapeka. Atxiïti iua uai apokaãkamako, kona Arãsaro ipinamako —itxana.

Xesosi Õkitikiniri Arãsaroni

³⁸ Ininiã Xesosi iteene matinaniuata ãkixinireë. Iuasaaki isa akauarimoni. Ninoa takari ipïkari kai auïte ãki. Kai auïte itotaãka.

³⁹ Ininiã Xesosi txari:

—Himakatxakari akauari tore —itxa.

Mata, Arãsaroni itaro txari Xesosi:

—Apiananiri, ipaiakapeka. Ipi ipi õti pakinipeka ikatiko, ininiã pata-parasakari —otxari Xesosi.

⁴⁰ Ininiã Xesosi:

—Nota sãpiretapekai: “Nota sãkire pauikiniã, pitikariko Teoso posotiire” —itxaro.

⁴¹ Ininiã imakatxakarina kai. Iuasaakipeka Xesosi ionakaãta iaxiti.

—Niri. Erekai, kotxi pikenakotari nisãkire. ⁴² Nimarotari ãtipirika pikenakotiniri nisãkire. Ikara atoko nitxa sãkireta kãkiti uai auakani kenakotiniri ïkapani, kotxi ninirekari ninoa auikiniri pite iokanatinino nota uaimoni —itxa.

⁴³ Ikara atoko inaãka atoko akirikatari:

—Arãsaro, põkitikaua. Pipokïka.

⁴⁴ Ininiã iuasaakipeka Arãsaro pokïka. Imakinika iïto mãkatxi mataã iapirikaãka. Itoõ apaka iapirikaãka mãkatxi mataã.

Ininiã Xesosi:

—Himakatxakari iapirikiko.

Xesosi Okaenetiko Pirena

(Mateo 26.1-5; Marko 14.1-2; Arókasi 22.1-2)

⁴⁵ Xoteoakori Mariamoni ïkani itikari ikara atoko inakari, ininiã auikarina Xesosi Teoso ãkiri ininiuua. ⁴⁶ ãtikaka Xesosi kamakiti itikakani kanapiriã pariseoakorimoni. Isãpiretana Xesosi õkitikiniri Arãsaro. ⁴⁷ Ininiã pariseoakori, sasetotxi auïteakori pakini apotiitaua. Imisãkiretakakana:

—Kiripa ate kama? Ia kiki kamari itori posotiiretxi. ⁴⁸ Aãuiritiniãri iua ikara atoko ikamini, ïkinipoko kãkiti auikari iua sãkire. Ininiã iua tikini isana. Ikara atoko ininiã, Homanoakori xipokari Teoso misãkiretiko aikoti ate nakiti, ate tixine apaka —itxana.

⁴⁹ Iuasaaki Kaipasi inakori sasetotxiakori auíte apiatakari inakari iua. Itxana:

—Híte kona kimarorepanikai. ⁵⁰ Erekari áti kiki ipinini ikinimane map-inakani íkapani. Ikara atoko ininiã, kona ikinipoko anirimane ipinako —itxa Kaipasi.

⁵¹ Íkorakanani sasetotxi auíte apiatakari itxaua Kaipasi. Ia atoko itxa: “Xesosi ipinako Xoteoakori mapinakani íkapani. ⁵² Kona ninoa íkapaninani ipinako. Teoso anaakori iarikakani íkapani apaka ipinako. Ininiã iuasaakirako iua apotiitari ikinipoko ninoa. Ininiã Teoso anaakori itxauanako,” itxa Kaipasi sãkire.

⁵³ Iuasaaki eereka imapapiretarina Xesosi okinina tíkane. ⁵⁴ Ikara atoko ininiã, Xesosi kona saika Xotéia tópamoni. Isari Eparaií sitatxitimoni, áparaã makipakaniãtaã takote. Iuaã ikaikota imoianariakorikata.

⁵⁵ Iuasaaki imatokoãpotarina Páskoa kiiniriti. Iuasaaki itomaneri Xoteoakori Xerosareë tópa auakani sari Xerosareë sitatxitimoni. Iua kiiniri apisapanika, isana iuaã oerexiniretinuana íkapani. Iuasaaki amanaãrina Teoso imakatzakiniri maerekati ikamakitina. ⁵⁶ Iuaã Xoteoakori nitari Xesosi. Ninoakakarika ipimaãkakana:

—Atauako kiinirimoni inapani atxiiti?

⁵⁷ Sasetotxi auíteakori, pariseoakori pakini paniãtapekari kãkiti:

—Himarotakasaakiri Xesosi auiniãtaã, hísãpiretauako ate, ininiã amaíkariko iua.

12

Maria Takari Kamariãro Xesosi Kitiã (Mateo 26.6-13; Marko 14.3-9)

¹ Seisi ôti Páskoa kiiniriti apisa, Xesosi sari Petãnia sitatxitimoni. Iuaã aua Arásaro, Xesosi ôkitikakiti Arásaro ipíkasaaki. ² Iuaã ikamaãka nipokori Xesosi íkapani. Mata sikari nipokori kãkitimoni. Iuasaaki Arásaro apanakinikata topãka Xesosikata. ³ Iuasaaki Maria kosekaro kamariãro koana. Oia atão nato kamakoro. Ipixini kiro ominani aua. Kona koketakoroni. Natonokara. Pakaronero, iuaritika okitakaro Xesosi kitimoni. Oiãkoã okaxipokari. Iuasaaki aapokotxi ãki omarinokara itxaua.

⁴ Txamari Xotasi Isikariotxi inakori !apokaerekatari kamariãro Xesosi kitiã okitakini. Iua Xotasi Simão ãkiri. Xesosi moianari itxaua, txamari imíkapiritariko Xesosi.

⁵ Ininiã Xotasi txari:

—Kãkiti paríkauata tresëtosi pakini ôti oia atoko inakaro kamariãro iamotiko íkapani. Kinirepa kona ovétxitaãka? Kinirepa txineiro mauakininiti-moni !osika? —itxa Xotasi.

⁶ Ikara atoko itxa, kotxi kiítiriri itxaua. Iua nĩkataro ninoa txineirote. Iua itotapekari txineiro iítirĩkini. Iua !imaãkatana txineiro mauakininiti.

⁷ Xesosi apakapapiretari:

—Kona hĩtxitapero Mariapani. Onĩkataro kamariãro ia ôti notamoni otakini íkapani, kotxi oxinikari nikatiko ôti íkapani. ⁸ Minakati mauinakini auapikako hĩtekata. Txama nota !auaikako hĩtekata —itxa Xesosi.

Xoteo Auíteakori Nirekari Okiniri Arásaro

⁹ Itomaneri Xoteoakori kenakopiretakasaakiri Xesosi Petãnia sitatxitiã auini, ininiã iuaã isana Xesosi aókitinina íkapani. Kona iuananini ninoa nireka aókitinina. Arásaro Xesosi ôkitikakiti apaka ninoa nirekari atamatinina.

¹⁰ Ininiã sasetotxi auíteakori nirekari Arásaro apaka okinina, kotxi kaiãopokori

käkiti auikari Xesosi säkire Arásaro säpiretakiti ikenakotakasaakina. Itakana-parina sasetotxiakori säkire auikinina. ¹¹ Arásaro iuaikana auiniã, ininiã itomaneri Xoteoakori asikaãpotari iauitena, Xesosi säkire auikinina ikapani.

Xesosi Xerosareẽ Apokaãpotini

(*Mateo 21.1-11; Marko 11.1-11; Arókasi 19.28-40*)

¹² Katimatiniãkata, itomaneri kãkiti Páskoa kiiniritimoni sikani, kenakopiretari Xesosi apokaãpotini Xerosareẽmoni. ¹³ Ininiã Xerosareẽkini sari aõkitinirina iua. Kinari tape anikana, Xesosi apiãkatakasaakina. Akirikatana:

–Peerekari Teoso. Teoso takari erekari Isaeo auakani auitemoni, Api-ananiri uãkaã ìkarimoni –itxana.

¹⁴ Mitxipe Xesosi iokanitari imoianariakori xomẽta ãkiri initinina. Ninoã apokasaakiri, iminarina Xesosimoni. Ininiã Xesosi topãka iua nopini. Iua nopini Xesosi sari Xerosareẽmonikari. Kitxakapirĩka Teoso säkire iõkatsopatakori txari:

¹⁵ Kãkiti Xerosareẽkini kona hĩpĩkarauatape. Erepani hĩaũite. Xomẽta nopini iitopãkako, itxa Teoso säkire kitxakapirĩka. Ikara iaõka apokaþeka, kotxi Xesosi apoka xomẽta nopini.

¹⁶ Iuasaaki imoianariakori kona xinikari Teoso säpiretakiti kitxakapirĩka auakari. Xesosi ipinaka atoko, õkitikaãkãka atoko, iuasaakiika ninoã xinikari ikara Teoso säkire. Ininiã iuasaakiika imarotarina Teoso säpiretakiti.

¹⁷ Mitxi kãkiti akauari takote auakani, ninoã itikari Xesosi õkitikiniri Arásaro. Ninoã iaripiretari Xesosi kamakiti. ¹⁸ Ininiã kãkiti apiãkatari Xesosi, kotxi ninoã kenakoenetaþekari Arásaro õkitikini. ¹⁹ Ininiã pariseoakori misãkiretakãka:

–Hãtamata. Kiripa aposota akamini? Ikinimane kãkiti nirekari iua. Ininiã pariseoakori xikotari Xesosi.

Ãtikaka Krekoakori Nitari Xesosi

²⁰ Ãtikaka Krekoakori apoka Xerosareẽmoni Páskoa kiiniriti ikapani, kotxi ninoã nirekari Teoso imisãkiretinina. ²¹ Apokasaakina iuaãtaã, isana Piripimoni. Iua Petsãita aapokotxitikiri, Karirẽia tõpa auakari. Ininiã apokasaakina Piripimoni, ipimaãrina:

–Ate nirekari Xesosi aaõkitini.

²² Ininiã Piripi sari ãtreemoni, isãpiretiniri ikapani. Eereka isana Xesosimoni.

²³ Ininiã apokasaakina, Xesosi txana ninoã:

–Kaiamapekari nota hĩtari iaxitikiri sini niri tixinemoni ikinipoko erekari napakapini ikapani. ²⁴ Atão nisãpiretai. Nota kimi oki atoko. Kãkiti matakakaniãro oa, ãtika okinoka auapika. Pitakiniãro, opitxaka. Ininiã kaiãori oki aua. Ikara atoko nota. Nimapĩkaniã, ininiã notanokara auari. Nipininiã, ininiã itomaneri kãkiti sari niri tixinemoni. ²⁵ Pite ãtipirika kaminiãri piteka nireẽkitinoka, ininiã pinireẽkiti xipokapitakako pitekata. Pite nireẽkiti xipokiniã, nota säkire pauikini xika, pite auapininiika txako Teosokata. ²⁶ Kãkiti nirekiniãri iparĩkauatini nota ikapani, imoianatanoko. Iua atoko ininiã, nota auiniãtaã iua apaka auako. Kãkiti parĩkauatiniã nota ikapani, ininiã niri paxitariko iua.

Xesosi Sãpiretari Ipinini

²⁷ Xesosi misãkiretari Teoso:

–Uatxa kona erekaxinireno, ininiã kiãtokopa nitxa nisãkire pitemoni? Atxiiti nipaniãtai: “Niri, pimakatzakinanoko nimapinakani ikapani.” Ikara atoko !nipaniãtai, kotxi nipinini ikapanira napoka ìkorapokoritimoni. ²⁸ Ininiã niri, poerekari kãkiti ikinimane auite pininiãua –itxa Xesosi.

Iuasaakipeka iaxitikiri txari:

—Noerekepekari kākiti ikinimane auīte nininiāua. Eereka iuaīkana noerekapanikariko ikara —itxa Teoso.

²⁹ Kākiti iuaātaā auakani kenakotari iaxitikiri sākire. Txamari itxana:

—Ikarokirauata.

Apanakini txari:

—Teoso nitirira sākirauata iuakata —itxana.

³⁰ Xesosi txana ninoa:

—Ikara sākirauata kona nota ĩkapanini. Hĩte ĩkapanira isākirauata. ³¹ Iposope ikini itixiti auakani misiritiko imaerekanina xika. Iposope ikini itixiti auakani auīte Satanasi inakori xipokiko. ³² Nota aamina ĩpiriāmitakari nopini nōkitikikosaaiki, iuasaaki nikosekanako kākiti notamonikari.

³³ Ikara atoko itxa, kākiti imarotiniri aamina ĩpiriāmitakari nopini ipinini.

³⁴ Apanakini kākiti apakapapiretari:

—Teoso sākire kitxakapirĩka iōkatsopatakori oerekaua Teoso mereēkiti ātipirika auini. !Pina. Txamari pite sāpiretaua ipinini aamina ĩpiriāmitakari nopini? Kipa iua aĩtari iaxitikiri pisāpiretakiti? —itxana ninoa.

³⁵ Ininiā Xesosi:

—Tirikapi kamara atoko nitxa. Hĩtekata nauakasaaki, noerekai hĩte atōo inakari. Uatxa tirikapi kamara hĩtekata auapanika. Paĩtiki nota sipe. Tirikapi auakasaaki, pauapikako tirikapi kamaraā. Ininiā ipiā kona apoka hĩtemoni. Kākiti mauikakaniāri nota sākire, ĩkanōka ĩpokotakani atoko itxana. !Imarotarina isininomonina. ³⁶ Tirikapi hĩtemoni auakasaaki, hāuikariko iua sākire. Ikara atoko ininiā, “pokamarari anaakori” hĩtxaua —itxa Xesosi.

Ikara atoko inaka atoko isipeka. !Isāpiretari isininoni.

Xoteoakori Kona Auikari Xesosi Sākire

³⁷ Xoteoakori itikari ikinipoko posotiiretxi Xesosi kamakiti. Iuaritika kona ninoa auikari iua sākire. ³⁸ Ikara atoko ininiā, kitxakapirĩka Teoso sākire sāpiretakari Isaía inakori iōkatsopatakiti, iuasaaki apopeka. Isaía txari:

Apiananiri, kākiti !auikapiretari asākire ninoamoni asāpiretakiti. !Auikari piposotiire poereēkiti ninoamoni,

itxa Isaía. ³⁹ Iua atoko ininiā, Xoteoakori kona posotari auikiniri Xesosi sākire, kotxi iuaīkana Isaía txari:

⁴⁰ Teoso mōsiāretakana ninoa. Kaikokii itxĩkitakana. Itikakitina kona ĩkitetana ninoa. Ikiāna kona !imarotarina. Ininiā ninoa kona apokapaniko notamoni erekepeka ininina nitxĩkitakini ĩkapani,

itxa Teoso Isaía iōkatsopatakitiā.

⁴¹ Kitxakapirĩka Xesosi uai apokini apisa Isaía iōkatsopatari ia sākiretxiti. Iuasaaki Teoso oerekari Isaía Xesosi posotiire, apaka ikinika Xesosi kamakiti ĩkane.

⁴² Iuaritika itomaneri Xoteo auĩteakori auikari Xesosi sākire. Txamari ! isāpiretarina apanakini, kotxi ninoa pĩkari pariseoakori. Pariseoakori imarotakasaakiri Xesosi sākire auīākani ininiuana, !auritaikana ninoa ĩroini aiko Xoteoakori apotiĩniātaāua. ⁴³ Iua atoko ininiā, ninoa apia nirekari kākiti iuikinina. Poiāoka ninoa nirekari Teoso iuikinina.

Xesosi Iuaīkana Sākirauata Xoteoakorimoni

⁴⁴ Xesosi itapasākireritika txari:

—Kākiti auikiniāri nota sākire, kona nota sākirenanini ninoa auika. Niri sākire apaka auikana, kotxi iua iokanatano nota uaimoni. ⁴⁵ Natamatakiri apaka atamatari niri. ⁴⁶ Tirikapi atoko nitxa nĩkasaaki kākĩtimoni. Nota sākire auīākani kona kaikota ipiāā. ⁴⁷ Kākiti nisākire kenakotakani mauikakaniāri

nisäkire, kona nimisiritari iua imaerekani xika. Kona kãkiti nimisiritini ìkapanini nina uaimoni. Nina kãkiti maerekani nimaktxakini ìkapanira.

⁴⁸ —Nota manirekakati, nisäkire manirekakati apaka, auapeka imisiritiko mereëkari. Nisãpiretakiti, iuarako itixi xipokini õtisaaki sãpiretari imisiritiko.

⁴⁹ —Notaka sãkire !nisãpiretai. Niri sãkirena nisãpiretai. Niri iokanatano nota uaimoni. Iua paniãtakiti isãpiretakiti nisãpiretai hïte. ⁵⁰ Nimarotari kãkiti aukiniãri niri paniãtakiti auapininiika itxako. Nota sãpiretari niri sikapiretinino iaõka.

13

Xesosi Arokari Imoianariakori Kiti

¹ Pãskoã inakori kiiniriti apisapanika, Xesosi imarotari paõtiki itixi itakanapini irimoni isini ìkapani. Iua tiretapikana kãkiti iua nakiti. Ninoa itiretiniritika ipinako Xesosi.

² Xesosi imoianariakorikata inipokotini apisapanika Satanasi sikanireõtapekari Xotasi Isikariotxi Xesosi imãkapiritini ìkapani. Iua Xotasi, Simão ãkiri. Eereka inirekari isikiniri Xesosi imokaiakarimoni. ³ Xesosi imarotapekari iri sikiniri ikinipoko posotiiiretxi Xesosimoni. Imarotapekari Teosomoni ipotorikini. Imarotapekari iuamoni ikanapiriini. ⁴ Iuaritika inipokotaka atoko, õkitikaua. Imaktxakari imãka inopini auakari. Eereka ipomakitari mãkatxi mata nitiritxi parïka atoko ikamini ìkapani. ⁵ Eereka itakari ãparaã tiitxi ãki. Ininiã arokana imoianariakori kiti. Eereka mãkatxi mataã ikaxipokaãpotana.

⁶ Simão Petro takote apokasaaki, Petro txari:

—Konapitini, Apiananiri. Ninitiri !pitxaua. Ininiã kona parokapiri nikititxi.

⁷ Ininiã Xesosi:

—Uatxa kona pimarotari nikamakiti. Pimarotariko ãti õti.

⁸ —Koniko pite arokapaniri nota kiti —itxa Petro.

Ininiã Xesosi:

—Pimauiritakaniãno pikiti narokini, ininiã kona nimoianari pitxauka —itxa Xesosi.

⁹ —Ikara atoko ininiã, kona nikitinani paroka. Niuako, nikii, imakinika paroka —itxa Petro.

¹⁰ Ininiã Xesosi:

—Kãkiti kipaãtakaniua poirepe itxana. Itipokotakasaaki, iuaãkana itxiko apoka iuamoni. Iuasaaki ikitinokara arokaãka. Hïte himakinika poirepeka, kotxi nimaktxakapekari himaerekani. ãtinokara kona poireri, kotxi imaerekani auapanika.

¹¹ Xesosi imarotapekari iua mïkapiritakari, ininiã itxa: “Himakinika poirepeka. ãtinokara kona poireri,” itxana.

¹² Ninoa kiti arokaãka atoko, ieretakari imãka inopinikiri. Ikanapiriã amesamoni. Ipimaãna:

—Kinirepa narokatari hïkiti? ¹³ Hïte akiriuaãkatano nota “koerekareri.” Apaka hãkiriuaãkatano “Apiananiri.” Atãopitikara hïsãkire, kotxi ikara inakari nitxaua. ¹⁴ Hïauite, hõereëkiri nitxaua. Iuaritika narokari hïkiti. Hinitiri atoko nipariãkauata. Ininiã hãrokakititakauaua, kãkiti nitiri atoko hininiua. ¹⁵ Noerekapekai hïte erekari hïkamini. Uatxa hïkamariko nota kamakiti atokokana. ¹⁶ Atão inakari nitxai. Nitiritxi iamotakori poiãori. Iauite apiari. Apaka kãkiti iokanatakari apiata. Iokanatakiti poiãori. ¹⁷ Uatxa hïte imarotari atão inakari hïkamini. Hïkaminiãri, hïpoxokoniua.

18—Kona himakinikani ikara atoko nitxai. Nimarotari nimereēkini, txamari ia Teoso sākire iōkatsopatakori iaōka apokapitikako. Itxari:
 Notakata komiri nikakari, iuakarako kamari maerekati notamoni. 19 Uatxa iua himarotini apisapanika nisāpiretai hīte. Ininiā nisākire iaōka apokasaaki, himarotariko Teoso ākiri nininiua nota. 20 Atāo inakari nisāpiretai. Kākiti nota iokanatakiti hītemoni hāpakapiniā, nota apaka hāpakapa. Hāpakapiniāno nota, hāpakapari apaka nota iokanatakari hītemoni —itxa Xesosi.

Xotasi Mīkapiritiniri Xesosi

(Mateo 26.20-25; Marko 14.17-21; Arókasi 22.21-23)

21 Xesosi ikara isāpiretaāka atoko, ākixinireē imatinaniuata. Itxana:

—Ari, ātikara hīte sauaki mīkapiritano nota.

22 Ininiā imoianariakori atamatakakaua.

—Kiripa ikara atoko txatako? —itxana.

23 Iuasaaki Xesosi moianari itiretakiti papīkañtota iuamoni. 24 Ininiā iuasaaki Simāo Petro ieki itxa isona iuamoni. Ininiā Petro:

—Pipimaāri iua: “Īkiripa ikara atoko txatariko iua?” —itxari.

25 Ininiā Xesosi tiretakiti pimaāri Xesosi:

—Kiripa ikara atoko txatai? —itxari.

26 Ininiā Xesosi:

—Komiri niākakiti nisikakitikarako ikara atoko txanoko.

Ininiā iuasaaki iākari komiri. Eereka isikari Xotasi Isikariotximoni. Iua Xotasi Simāo ākiri. 27 Xotasi komiri inikasaaki, Satanasi ĩroā ixiniremoni. Ininiā Xesosi txari Xotasi:

—Kinirāo kamaka pinakiti pikamapoka —itxari.

28 Iuaā auakani ākixinireē:

—Kinirepa ikara atoko itxatari Xotasi?

29 Xotasi nīkataro ninoa txineirote. Ininiā ninoa ākixinireē:

—Atxiiti iokanataro iua komiri iamotini ĩkapani.

Ātipekana:

—Atxiiti iokanataro iua matiinimoni txineiro isikini ĩkapani —itxanātana ākixinireēna.

30 Komiri apakapaāka atoko, inikaāka atoko isipe Xotasi. Mapiāpe inakasaaki.

31 Xotasi sipeka inaāka atoko, Xesosi txana ninoa:

—Uatxa kākiti itikariko kākiti itari iaxitikiri posotiire. 32 Kākiti atamatariko Teoso posotiire imimoni auakari. Ininiā Teoso txari: “Erekapitikari namarite.” Iuasaaki Teoso oerekari kākiti iua apokaerekatiniri imi. Ikara atoko ininiā, oerekari imi ereka inini.

33 —Nitiretakini, pañtikinoka nauini hītekata. Eereka hinitapiimano nota, txamari nota sinimoni kona hīposotari hīsini. Ikara atoko nitxapekana Xoteoakori. Iuatxikana uatxa nisāpiretai hīte. 34 Ininiā uatxa nisāpiretaiko hīte Teoso paniātakiti amaneri: “Hītiretakakaua, nota hīte nitiretini atokokana.”

35 Ikara atoko hīkaminiā, ikinimane imarotariko nota moianariakori atāo hininiāua.

Xesosi Sāpiretari Petro Kipatiniri Iua

(Mateo 26.31-35; Marko 14.27-31; Arókasi 22.31-34)

36 Simāo Petro pimaāri:

—Koerekareri, nanipa pisatako?

Xesosi apakapapiretari:

—Nota sinimoni kona uatxa apakata hīsini. Āti ōtirako hīsa hīte.

³⁷ Iuaĩkana Petro:

—Apiananiri, kinirepa kona pitekata nisa uatxa? Nipinapitikamako pitekata —itxa Petro.

³⁸ —Atãopitikani notakata pipinini pinirekaka? —itxari.

—Atão nisãpiretai. Ia İkanõkati patari sãkirauatini apisapanikako, “!Nimaro-tari iua,” pitxanoko ipi åti pakinikata —itxa Xesosi.

14

Xesosi Pinitari Imoianariakori

¹ —Kona himatinaniuatape. Kona himaãkapeua. Hãuikariko Teoso sãkire. Apaka hãuikariko nota sãkire. ² Niri auiniãtaã aua kaiãopokori aapokotxi. İkara atoko iminakanimako, nisãpiretapiimaiko hite. Iuaã nisa hãuiniãtaã nikamini İkapani. ³ Iuaã nisa hãapoko nikamini İkapani. Eereka nikanapiriã. Nanikai hite notakata hãuini İkapani. İniniã hite apaka aua nota auiniãtaã. ⁴ Hite imarotari nota sini kimaporiti —itxa Xesosi.

Teoso Kimapore İtxaua Xesosi

⁵ —Kona aimarotari pisinimoni. Natokopa ininiãpa aimarotatari pite sini kimaporiti? —itxa Tomee.

⁶ İniniã Xesosi txari:

—Teosomoni sikari kimaporiti nitxaua. Atãonoka nisãkire. Atãonoka nika-makiti. Nitxikitakari kãkiti auapininiika inini. Notamoni apokakarinanira sari nirimoni. ⁷ Atão nota himarotiniã, ininiã himarotariko niri apaka. Uatxa himarotapekari iua. Hãtamatapekari iua —itxa Xesosi.

⁸ —Apiananiri, poerekari piri atemoni. İkaranoka anireka —itxa Piripi.

⁹ İniniã Xesosi:

—Piripi, kona mixaikani hitekata nauama nota, iuaritika kona himarota-panikano nota? Nota aõkitakari, aõkitapekari niri. Kĩnirepa, “Piri poerekaua,” pitxa? ¹⁰ Kona pite auikapanikari niri auini nota åki? Nota apaka aua niri åki.

—Hitemoni nisãpiretakiti kona nota sãkirenanini. Niri paniãtakitira. Niri nota åki auakari uara kamari İkinipoko nikamakiti. ¹¹ Hãuikariko nisãkire niri åki nauini. Niri nota åki auini apaka hãuika. Himauikakaniãri nisãkire, ininiã hãuikari nikamakiti. ¹² Atão nisãpiretai. Nota sãkire auĩãkani kamariko nota kamakiti atokokana. Apaka ninõa kamakiti apiata, kotxi nirimoni nisako. ¹³ Nota uãkaã hamanaãkiti nota sikai hite. İkara atoko ininiã, oerekaãka niri ereka ininiua. ¹⁴ İkinipoko nota uãkaã hamanaãkiti, nota sikapitikai hite. ¹⁵ Nota hĩtiretiniã, hĩkamariko nipaniãtakiti —itxa Xesosi.

Erekari Matamatakoti Apokaenetini

¹⁶ —Namanaãriko niri åti kõtãkikareri iokanatini hitemoni. Iuakara auap-ininiika txako hitekata. ¹⁷ Iua Erekari Matamatakoti atãonani ina sãkiretakari. Kãkiti Teoso sãkire mauĩãkani kona apakapari iua, kotxi kona atamatarina iua. Apaka kona imarotarina iua. Hĩtepekana imarotari iua, kotxi hitekata aua. Iua aua hite åkixinireẽ.

¹⁸ —İniniã kona nitakanapai hite. Nikanapiriãpanikako hitekata nauini İkapani. ¹⁹ Paĩtiki atoko kãkiti İkoraxiti auakani kona atamataikanoko nota. Hite atamatanoko. Hite auapanikako, kotxi nota apaka auapanikako. ²⁰ Iuaĩkana auapanika ninakasaaki, himarotariko niri åki nauini. Hite apaka auako nota åkixinireẽ. Nota aua hite åkixinireẽ apaka. Txapaniko.

21 —Iua nisãkire auiãkarira nipaniãtakiti kamakarira tiretano nota. Nota tiretakari niri tireta. Nota apaka tiretari iua nitiretakiri. Ikara atoko ininiã, noerekariko apikomoni nisãkire iuamoni.

22 Æti Xotasi, kona Xotasi Isikariotxi inakorini, txari Xesosi:

—Kinirepa atenani poerekari Teoso ãkiri pininiua? Kinirepa kona poerekari ikara apanakinimoni? —itxa.

23 Xesosi apakapapiretari:

—Kãkiti tiretiniãno, ikamari nisãkire iaõka. Niri tiretariko iua. Niri, nota pakini apokako iuamoni. Iuakata aãuako. 24 Nota matiretakani kona nãkatari nisãkire. Nisãkire hãkenakotakiti kona nota sãkireni. Niri niokanatakiri sãkirera.

25 —Hitekata nauakasaaki, ikara sãkiretxi nisãpiretai. 26 Niri iokanatariko kõtãkikareri, Erekari Matamatakoti inakori hãtemoni. Erekari Matamatakoti oerekaiko hãte ikinipoko niuãkaã. Himaxinãkaretakiti iuaãkanako iua oerekaiko. Ikinipoko nisãpiretakiti oerekaiko.

27 —Nisini apisapanika nikamaerekaxiniretai. Nota xinire ereka inini atokotxikana nikamaerekaxiniretai. Nisãkire mauãkani kona posotari kamaerekaxiniretiniri ãti nota kamaerekaxiniretini atoko. Kona hãmaãkapeua. Kona hãpikarauatape. 28 Hãte kenakotapekari nisãkire ia atoko nininiã hãte: “Nisapitikako, iuaritika nikanapiriãpanikako hãtekata nauini ãkapani.” Hãtoretiniãno, hãpoxokoniua nirimoni nisini ãkapani, kotxi poiãori nitxaua nota. Apiatakari itxaua niri. 29 Ikara nisãpiretakiti apokini apisa nisãpiretai hãte. Ikara nisãpiretakiti iaõka apokasaaki, hãte auikari nisãkire. 30 Apikomoni iteene nisãpiretinii ! apakata. Ìkorapokoriti auakani auãte Satanasi inakori paãtiki apokako notamoni, iuaritika ! iposotari itxãkitakinino ipaniãtakiti nikamini. 31 Iteene ninirekari imakinika kãkiti imarotiniri nitiretiniri niri. Apaka nikamari ikinipoko niri paniãtakiti —itxa Xesosi.

Eereka Xesosi txari:

—Maõkitikaua. Masipeka.

15

Xesosi Atão Itãkaretsa Itxaua

1 Ininiã eereka Xesosi txari:

—Atão itãkaretsa nitxaua nota. Itãkaretsa nãkatakari itxaua niri. 2 Isauakaro otsa marito, kotxi kona kariro oa. Otsa iriuatataropekana iua kisauakaro omapotõkirenoka, iteene oriuatini ãkapani. 3 Hãte poirepeka hãtxa. Nisãkirenanira oeretai hãte. 4 Okanotsa atokokana hãtxaua. Nota itãkaretsa atoko nitxaua. Ininiã hãpitxaka notamoni. Ikara atoko hininiã, hãkaikota notakata. Ininiã nota kaikotapika hãtekata. Ikara atoko hininiã, hãriuapatitika. Ikara atoko hininiã, erekarinanira hãkama. Hãriuatiniã, ininiã erekari hãkama. Notamoni himapitxakakaniã, kona hãposotari hãkaminiri erekari. Kona hãriuata, kotxi nota tapara ! apokari hãtemoni. ! Kari hãte. Okanotsanoka auiniã, kona kariro. Notakata hãuapininiika hininiã, amããiiri auapitika.

5 —Nota itãkaretsa nitxaua. Hãte nikanotsa hãtxaua. Notamoni pitakakari ãtipaniriko oripaniko. Notakata himauakaniã, kona xapitiki kona hãposota hãkamini. 6 Nota sãkire mauãkati okanotsa ipinakari atoko itxa. Txiarokakari atoko itxa. Kãkiti apotiitari okanotsa ipinakari. Eereka okari xaminaã arikini ãkapani. Iua atokokana aãri Teoso misiritari isãkire mauãkani. 7 Notamoni hãpitxakiniã, hãkenakotiniãri nipaniãtakiti, hinirekaãkiti hamanainiãno, ininiã nisãkapitãkai hãte. 8 Ito hãriuatiniã, kãkiti txariko niri: “Peerekai.” Hãte iriuatiniã, ininiã hãte atão oerekariko apanakinimoni atão nimoianariakori hininiua.

Hítiretakiniua Pirena

⁹ –Niri tiretinino atokotxikana, nitiretai híte. Kona hítakanapapiri nítiraõki. ¹⁰ Híkípitiniãri nisãkire, ininiã nítiraõki kaikotapika hítekata. Nota atokokanerako hítxako. Nota kípitari niri sãkire, ininiã niri tiraõki kaikotapika notakata.

¹¹ –Ikara atoko nitxai híte, nípoxokoni hítemoni kaikotini íkapani. Ikara atoko ininiã, poxokonitxi xãpokako híxiniremoni. ¹² Ia nípániãtakiti: “Nota tiretinii atokotxikana, hítiretakakauako.” ¹³ Pipiniã pimoianariakori mapinakani íkapani, ininiãkara iteene pitiretana ninoa. Ikara tiraõkitxi apiatakari. ¹⁴ Nípániãtakiti híkaminiã, atão nimoianariakori hítxaua. ¹⁵ Uatxa ! nixinikaikari nitiritxi hininiua, kotxi nitiritxi kona imarotari iauíte xinikakiti. Uatxa atão nimoianariakori hítxaua, kotxi íkinipoko niri oerekakiti nisãpiretapekai híte. ¹⁶ Kona híteni mereẽno nota. Notara mereẽi híte híruiatini íkapani. Nínirekari híruiatini. Nínirekari kãkiti nota sãkire híspiretakini txípokori maxípokakati atoko ininina. Ikara atoko ininiã, hamanaãriko niri hinirekakiti nota uãkaã, ininiã niri sikapitikai híte. ¹⁷ Ia nípániãtai híte hítiretakiniua.

Xesosi Moianariakori Omanatakani

¹⁸ Iuaíkana Xesosi pinitari imoianariakori:

–Apanakini omanataiko híte. Ininiã híxinikariko ia nisãkire. Merepiti-panika ninoa omanatano nota. ¹⁹ Teoso sãkire himauikakaniã, Teoso sãkire mauikakani tiretapitikai híte, kotxi ninoa atoko hítxa. Txamari ninoa nakiti ! hítxaua. Híte kona íkoraxiti auakani !hítxaikaua. Nimereẽpekai híte. Nimaktxakapekai átião paríkatxi híkamini íkapani. Iua xika Teoso sãkire mauikakani omanatai. ²⁰ Híxinikariko ia nisãpiretakiti. Nitiritxi poiãoka itxaua. Iauíte apiatakari itxaua. Kãkiti misiritiniãno nota, nota atokokanerako imisirítai híte apaka. Nisãpiretapekai híte. Nota sãkire apamoníkiniãna, ininiã híte sãkirekanera ninoa apamoníka apaka. ²¹ Imisirítaina, kotxi híte auikari nota sãkire. Himisiritaãkako, kotxi kona imarotarina niokanatakiri. ²² Nota uai mapokakaniã, nimasãkirauatakaniã, kona imarotarina maerekati ikamakiti. ²³ Nota omanatakani apaka omanatari niri. ²⁴ Nípotsiire nikamakiti apanakini kona posotari ikamini. Noerekari ninoa nípotsiire, ininiã uatxa maerekati auari ninoamoni, kotxi !auikari nota sãkire. Íkinika itikapekari posotiiretxi nikamakiti, uuaritika ninoa omanatano nota, niri apaka.

²⁵ –Uatxa apopeka Teoso sãkire iaõka. Teoso sãkire iõkatsopatakori txari: Maxikatiika ninoa omanatano.

²⁶ Kõtãkikareri kona apokapanika. Niokanatariko nirikata auakari, Erekari Matamatakoti. Iua potorika niri auiniãtaã. Atão ene sãkiretakari itxaua. Isãpiretariko nota sãpiretakiti, nikamakiti pakini. ²⁷ Ininiã híte apaka sãpiretariko nota kamakiti, nisãpiretakiti pakini apanakinimoni, kotxi merepiti-panika nipotorikasaaki híte auapika notakata. Ininiã himarotapitikano nota.

16

¹ Xesosi sãkirauatapanika:

–Ikara atoko nitxai híte atão himarotini íkapani, ininiã kona hítakanapari nisãkire. ² Áti õti Xoteo auíteakori omitikenataiko híte aiko Xoteo apotitiniãtaãua. Áti õti apokapanikako ia nisãpiretakiti. Iuasaaki ninoa xinikariko híte okiko ereka inini. Ninoamoni híte okiko Teoso paniãtakiti iaõka. Txamari kona Teoso paniãtari ikara atoko inakari. ³ Ikara atoko inakari ikamanako, kotxi kona imarotano nota, niri pakini. ⁴ Ikara atoko nitxai híte, kotxi ikara atoko inakari apokasaaki, híxinikariko nisãkire. Merepanika

nimoianatakasaakii, kona ikara atokoni !nitxai hïte, kotxi nota auapanika hïtekata –itxa Xesosi.

Erekari Matamatakoti Parïka

⁵ Xesosi sãkirauatapanika:

–Païtiki nisipekako niokanatakirimoni. Kona hïpimaãpeno: “Nanipa pisa?” Kona hïtxapeno. ⁶ Ikara atoko nisãpiretapekai, ininiã uatxa kona erekaxinirei hïte. ⁷ Iuaritika nitxai hïte atão nisãkire. Apiaerekata nota sini. Nota masikaniã, iua Kõtãkikarereri kona apoka hïtemoni. Nisiniã, niokanatariko iua hïtemoni. ⁸ Iua Kõtãkikarereri apokasaaki, oerekariko ïkorapokoriti auakani maerekani. Oerekariko Teosonoka txïkitakiniri kãkiti atão inakari ikamini. Oerekariko kãkiti misiritiko imaerekani xika. Iua Erekari Matamatakoti oerekariko ikara atoko inakari. ⁹ Iua oerekariko maerekati kãkiti kamakiti, kotxi ninoa !auikarina nisãkire. ¹⁰ Iua oerekariko Teosonoka txïkitakiniri kãkiti atão inakarinoka ikamini, kotxi nota sipekako nirimoni. Nota !auaika uai noerekarauatini ïkapani. Païtiki kona hïte atamataikanoko nota. ¹¹ Iua Erekari Matamatakoti oerekariko maerekati kamakani misiritiko, kotxi ïkorapokoriti auakani auïte Satanasi inakori misiritiko mereeëkapeka.

¹² –Auapanika apikomoni nisãpiretakiti tïkane hïtemoni. Txamari !apakata apikomoni nisãpiretinii, kotxi !himïteenekari apikomoni nisãpiretinii. ¹³ Iua Erekari Matamatakoti, atãoene sãpiretakari, iua ïkasaaki, iua oerekaiko ïkinipoko atão sãkiretxiti. Kona iua sãkireni isãpiretaiko hïte. Iaxiti auakari sãkirera, niri sãkirera, isãpiretaiko. Isãpiretaiko hïte katana Teoso kamakiti tïkane apaka. ¹⁴ Erekari Matamatakoti oerekaiko ereka ninini, kotxi iua apakapariko nisãkire, eereka isãpiretaiko hïtemoni. ¹⁵ Ikini sereti niri nakiti nota nakiti apaka. Ininiã nota txai hïte, “Erekari Matamatakoti apakapariko nota nakiti. Ininiã eereka isikai hïtemoni himarotini ïkapani.”

Matinanitxi, Eereka Poxokonitxi Apoka Inini

¹⁶ –Païtiki kona hãtamataikanoko nota. Eereka iuaïkana hãtamatanoko, kotxi nirimoni nisako –itxa Xesosi.

¹⁷ Imoianariakori txanãta:

–Kiripa itxanãta Xesosi? “Païtiki kona hãtamatanoko. Eereka iuaïkana hãtamatanoko nota, kotxi nirimoni nisako.” Kiripitipa itxanãta Xesosi? –itxana imoianariakori.

¹⁸ –Kirisaakipa apokatako ikara inaãtakiti? Kiripa ikara isãkire: “Païtiki,” Xesosi sãkire atemoni? Ikara isãkire kona ate imarotari xatiki –itxanãtana.

¹⁹ Xesosi imarotari ninoa nirekari ipimainiri iua. Ininiã Xesosi txana:

–Hïte nirekari hïpimainino nota, kotxi nisãpiretai païtiki kona hãtamatinino, eereka iuaïkana hãtamatanoko. ²⁰ Atãopitikara ia atoko nitxai hïte. Hïtxiapatako. Himatinaniuatako. Iuusaaki apanakini kãkiti ïkorapokoriti auakani poxokoni uatako. Himatinaniuatako, eereka hïpoxokoni apokapitikako.

²¹ –Hïte sito atoko hïtxauako. Sito oãuaenetanapanoka onakasaaki, oa omaãkapekaua. Imi auaka atoko, kona oxinikaikari otsii. Poxokope otxa, kotxi auapeka amarini. ²² Ikara atoko itxako hïtemoni apaka. Uatxa kona erekaxinirei hïte. Iuaïkana naõkitapanikaiko hïte. Iuusaakirako hïpoxokoni uatako. Iuusaaki kãkiti kona posotari ixipokiniri hïpoxokoni.

²³ ïkora õti apokasaaki, kona hïpimaãikano nota. Iuusaaki hamanaãri niri hinirekakiti nota uãkaã, ininiã iua sikai hamanaãkiti. ²⁴ Uatxapiima kona hamanaãpanikari hinirekakiti nota uãkaã. Hamanaïniãri, hãpakapapitikariko. Ininiã hïpoxokoni apokapitikako hïtemoni.

Imoianariakori Auikari Xesosi Sãkire

²⁵ —Mítxi niomaãtari ipixini nisãkire, kãkiti mimarotakaniri ìkapani. Ìti òti kona niomaãtaikari atão. Nisãpiretaiko niri iteene himarotini ìkapani. ²⁶ Iuasaaki hinirekakiti hamanaãno nota uãkaã. Kona nota amanaãri niri hinirekakiti isikinii. Híte amananiãri, isikapitikai. ²⁷ Niri tiretai híte, kotxi híte tiretano nota. Híte auikari iua iokanatinino nota uaimoni. Ininiã iua tiretapitikai híte. ²⁸ Niri iokanatanano ìkorapokoriti. Paĩtiki nitakanapari ìkorapokoriti nirimoni nisini ìkapani —itxa Xesosi.

²⁹ Imoianariakori txari:

—Uatxa pisãkire atãoenepitika. Sãkiretxi piomaãtakiti kona auaika, kotxi uatxa aimarotari pisãkire. ³⁰ Uatxa aimarotari pite imarotini imakinika. Kona apakata apikomoni apimarauatini, kotxi uatxa aũuikari Teoso auinimoni ìkari pininiua pite —itxarina Xesosi.

³¹ Xesosi apakapapiretana:

—Uatxa hãuikari nisãkire —itxa Xesosi.

³² —Uatxa Teoso ketotini manapi apope hãarikini ìkapani. Imakinika híte takanapanoko. Notanani kaikòta. Iuaritika kona notananini kaikota, kotxi niri aua notakata. ³³ Ikara atoko nisãpiretai, kotxi ninirekari erekaxinirepeka hinini. Ìkorapokoriti hãuakasaaki, kãkiti misiritapitikai híte. Iuaritika hũpoxokoniuatoko, kòtxi nota tapara apiata. Maerekanitxi tapara poiãoka —itxa Xesosi.

17

Xesosi Misãkiretari Teoso Iuaka Ìkapani

¹ Xesosi ionakaãta iaxiti. Iuasaaki isãpiretari ia isãkire Teosomoni:

—Niri, piketotini manapi apopeka. Pisikariko piotximere iuaĩkana nota pamaritemoni, ininiãkara nota oerekari kãkiti pite iotximere, ² kotxi pite sikano nota piposotiire ikinimane auite nininiua ìkapani. Ininiã nika-mari ikinimane kãkiti pite sikakini auapininiika ininina ìkapani. ³ Kãkiti imarotiniã pite, imarotiniãno nota Xesosi Kristo piokanatakiti, ninoa auapininiika, kotxi pite atão Teoso pitxaua. Pitenanira atão Teoso pitxaua. ⁴ Noerekari ìkorapokoriti auakani pite Apiananiri pininiua, kotxi nikamapekari parĩkatxi pipaniãtakiti. ⁵ Ininiã niri, uatxa piotximere pisikano, pitemoni napokasaaki. Itixi kamiko apisapanika pitekata nauakasaaki, niotximere aua. Iua niotximeretxikana pisikano iuaĩkana —itxa Xesosi.

Xesosi Misãkiretari Teoso Imoianariakori Ìkapani

⁶ Xesosi sãkirauatapanika irimoni:

—Nota sãpiretari piuãka kãkitimoni, ninoa itixi auakani notamoni pisikakini. Mítxi pite nakitiakori itxauana. Pite sikana ninoa notamoni, ininiã ninoa kamari pisãkire iaõka. ⁷ Uatxa imarotarina ikinika napakapakiti pite sakinino. ⁸ Nisãpiretapekana ninoa pisãkire, ininiã auikarina pisãkire. Imarotapitikarina pitemoni nipotorikini. Ininiã auikarina pite iokanatinino nota kãkitimoni.

⁹ —Nimisãkiretai pite ninoa ìkapani. Kona nimisãkiretai nota sãkire mauĩkani ìkapani. Nimisãkiretai ninoa notamoni pisikakini ìkapaninoka, kotxi pite nakitiakori itxauana. ¹⁰ Ikinika nota nakiti pite nakiti itxaua apaka. Ikinika pite nakiti nota nakiti itxaua. Ninoa pisikakini oerekari apanakini Apiananiri nininiua. Ininiã iuasaaki apanakini txari: “Peerekari Xesosi.” ¹¹ Uatxa ! nikaikotaikako ìkorapokoriti. Txamari ninoa kaikotapanika uai. Nota sipekako pitemoni, ininiãkara pinĩkatana ninoa notamoni pisikakini, kotxi pite niri pitxaua, erekarinoka kamakarii pite, kaposotiirei pite. Pite sikaposotiiretano nota. Ninirekari ninoa ãtika atoko

ininiuana, nota pitekata ātika atoko aniniuā atokokana. ¹² Itixi ninoakata nauakasaaki, ninīkatana ninoā pite uākaā, piposotiireē. Ninoā notamoni pisikakini ninīkatapitika. Kona ātika nomaīāta. Xotasinoka pīpinanaka, kotxi pīpinanakakani ākiri itxaua iua. Ipīpinanaka, kotxi kitxakapirīka Teoso sākire iōkatsopatakori sāpiretapekari ikara apokini apisapanika.

¹³ —Uatxa nota sipeka pitemoni. Ikara atoko itxa nisākire kākitikata nauapanika ninakasaaki, nota poxokoni ninoā ākixinire auini īkapani. ¹⁴ Nisikapekari pisākire ninoamoni, ininiākara nisākire mauīākani omanatana ninoā, kotxi nisākire auīākani īkorapokoriti auakani !itxaikauana ninoā. Iua atokotxikana kona īkorapokoriti auakarino nota. ¹⁵ Nimsākiretai pinīkatatinina ninoā, Satanasi mamaīkakanina īkapani. Kona ninirekari mauikareni sauaki auakasaakina pimakatxakinina. ¹⁶ Īkorapokoriti auakani !itxauana. Nota iua atokotxikana. ¹⁷ Pimakatxakana ninoā pite nakitiakori īkapani. Pisākireē pimakatxakana, kotxi pisākire atāo. ¹⁸ Nota pisākire mauīakanimoni piokanātini atokokana, niokanātana ninoā pisākire mauīakanimoni. ¹⁹ Ninoā īkapani notaka nisikaua pitemoni pinirekakiti nikamini īkapani. Ininiākara ninoāka apaka sikaua pitemoni pinirekakiti ikaminina īkapani.

Xesosi Misākiretari Teoso Isākire Auiākani Īkapani.

²⁰ —Kona nimoianariakorinani īkapanini nimsākiretai pite. Apaka nimsākiretai imakinika nisākire auīākani īkapani, katana nimoianariakori sākire auīākani īkapani apaka. ²¹ Nota amanaāi ninoā xinire ātika atoko ininina īkapani. Nota aua pite ākixinireē. Pitepekana aua nota ākixinireē. Iua atokotxikana ate aua ninoā ākixinireē. Ikara atoko ininiā, nota sākire mauīākani īkorapokoriti auikapanikariko pite iokanatinino nota. ²² Ininiā erekari notamoni pisikakiti, piotximere, nisikapekana ninoā. Ininiā ninoā xinire ātika atoko itxauana, ate ātika aniniuā atokokana itxana ninoā. ²³ Nota aua ninoā ākixinireē. Pite aua nota ākixinireē. Ikara atoko ininiā peerekari, kotxi ātika itxaua ixinirena. Ikara atoko ininiā nisākire mauīākani imarotariko pite iokanatinino nota. Apaka ninoā imarotari nota pitiretini atokotxikana, pitiretinina ninoā apaka.

²⁴ —Niri, ninirekari ninoā notamoni pisikakini notakata auini īkapani. Ninirekari ninoā atamatiniiri ikinipoko erekari notamoni pisikakiti, niotximere pisikakiti, kotxi pite turetano nota itixi kamiko apisa. ²⁵ Niri, atāo inakarinoaka kamakarii pite. Kākiti īkorapokoriti auakani kona imarotai pite. Iuaritika nota imarotai pite. Ninoā imarotari pite iokanatinino nota kākitimoni. ²⁶ Nisāpiretapekai pite kākitimoni. Apikomoni nisāpiretapanikariko pisākire. Ininiā pitiraōki notamoni auakari ninoamoni auako. Ininiākara nota aua ninoā ākixinireē.

18

Xesosi Maīkiko Pirena

(Mateo 26.47-56; Marko 14.43-50; Arókasi 22.47-53)

¹ Teoso imisākiretaka atoko, Xesosi ipiriātari sōtoāri Setorō inakori. Iuaā aua amātiirinape. Ininiā Xesosi sari iuaā imoianariakorikata. ² Xotasi, Xesosi mīkapiritakari, imarotari Xesosi imoianariakorikata itotiniri iuaātaā isinina. ³ Ininiā Xotasi sari amātiirinapemoni ātikaka sotatoakorikata, Teoso misākiretiko aikoti nīkatakanikata. Sasetotxi auīteakori, pariseoakorikata sari iuaātaā apaka. Ikeekotxi, tirikapi pakini anikana. ⁴ Xesosi imarotari ikinika iuamoni ikamakitina tīkane. Imarotapekari ninoā nirekakari okinirina iua. Iuaritika isari ninoamoni. Ipimaāna:

–Kiripa hinitanãta?

⁵ Ininiã ninoa:

–Xesosi Nasareekirira anita –itxana.

Ininiã Xesosi:

–Iuakarano nota.

Iuasaaki Xotasi, Xesosi mĩkapiritakari, aua ninoakata. ⁶ Xesosi “iuakarano nota” inakasaaki, osipikana, ixitipe irika itxana.

⁷ Iuaĩkana Xesosi pimaãna:

–Kipa hinitanãta?

–Xesosi Nasareekirira –itxana.

⁸ –Nitxapekai, iuakarano nota. Nota hinitiniã, hãuiritana nimoianariakori sini –itxa Xesosi.

⁹ Ikara atoko itxa, mitxi isãkire apokini ĩkapani. Mitxi itxari Teosomoni: “Kona nomaiãtana nimoianariakori notamoni pisikakini. Kona ãtika ! nomaiãta.”

¹⁰ Eereka Simão Petro inakori kosekari iouata auĩte. Isauakari Maoko inakori ikikomoni ikĩpita. Iua sasetotxi auĩte apiatakari nitiri.

¹¹ Xesosi txari Petro:

–Pitakaro iouata auĩte omata ãki. Apakatapitika nota kaminiri niri paniãtakiti. Niri nirekapitikari natatsiitini nipinini kãkiti ĩkapani –itxa Xesosi.

Xesosi Anasi Apisatoõ

¹² Eereka sotatoakori, apaka sotatoakori auĩte, Teoso aikote nĩkatakani pakini maĩkari Xesosi. Iaxirika itxarina. ¹³ Merepanika anikarina Xesosi Anasi inakorimoni. Iua Anasi Kaipasi imatikiri. Iuasaaki iua Kaipasi sasetotxi auĩte apiatakari itxaua. ¹⁴ Iua Kaipasi õtãkikapekana Xoteo auĩteakori. Ia atoko itxa isãkire: “Apiaerekata ãti kiki ipinini ikinimane mapikani ĩkapani,” itxa Kaipasi õtãkikare.

Petro Kipatari Xesosi Imarotini

(Mateo 26.69-75; Marko 14.54, 66-72; Arõkasi 22.54-62)

¹⁵ Simão Petro, ãti Xesosi moianari pakini asikatikinitari Xesosi Anasi aapokomoni anikikosaaki. Mitxipeka sasetotxiakori auĩte apiatakari aõkitapekari iua ãti Xesosi moianari. Ininiã iua ĩroã sasetotxiakori auĩte apiatakari aapoko Xesosikata. ¹⁶ Petro kaikota iporikiti itore takote. Eereka ĩmoianari sari iporikiti. Imisãkiretaro ĩronakikoãtaã tore nĩkataro. Ininiã oãuiritari Petro ĩroini.

¹⁷ Oa txari Petro:

–Pite ikira Xesosi moianarikai? –otxari.

–Kona –itxaro.

¹⁸ Iuasaaki katxĩkareri aua, ininiã nitiritxiakori, Teoso misãkiretiko aikoti nĩkatakani pakini kamari xamina. Xamina ĩtinipoki irokanãtauana. Petro ninoakata aua iuasaaki.

Xesosi Sasetotxiakori Auĩte Apisatoõ

(Mateo 26.57-68; Marko 14.53-65; Arõkasi 22.54, 66-71)

¹⁹ Iroko ãki Xesosi sasetotxi auĩteakorikata aua. Ininiã sasetotxiakori auĩte apiatakari misãkiretari Xesosi:

–Pisãpiretano pimoianariakori, pisãkire poerekakiti pakini –itxari.

²⁰ Xesosi apakapapiretari:

–Ãtipirika nisãpiretapikai hĩte. Nitotari noerekaruatini aiko Xoteo apotitiniãtaãua, Teoso misãkiretiko aikotiã apaka. Kona nikipatari nisãkire.

Ikinipoko kenakotari noereëkiti. ²¹ Ininiã kinirepa hĩpimaãno? Hĩpimaãna nisãkire kenakotakani. Ninoara imarotari noereëkiti –itxa Xesosi.

²² Xesosi ikara atoko isãkirauatakasaaki, Teoso misãkiretiko aikoti nĩkatakari aritoõtari Xesosi.

–Atokope. Kona ikara atoko pitxape sasetotxi auĩte apiatakarimoni –itxari.

²³ Ininiã Xesosi:

–Nikerokiniãri nisãkire, pisãpiretano nikerokakiti, txamari kona nikerokari. Atão nisãkire, ininiã kinirepa piaritano? –itxa Xesosi.

²⁴ Eereka Anasi iokanatarari Xesosi iaxirikiko. Eereka anikarina sasetotxi auĩte apiatakarimoni, Kaipasi inakorimoni.

Iuaĩkana Petro Kipatarari Xesosi Imarotini

(Mateo 26.71-75; Marko 14.69-72; Arókasi 22.58-62)

²⁵ Petro iporikiti aua iuasaaki. Ininiã apanakini pimaãri:

–Ikira kiki moianarikai pite? –itxarina.

Ininiã iua:

–Kona –itxa.

²⁶ Āti sasetotxi auĩte apiatakarari nitiri, Petro kisauakakĩpitakiti nirimane iua. Iua pimaãri Petro:

–Pitekani amãtiirinapeãtaã nitika iuakata? –itxari.

Iuaĩkana Petro txari:

–Kona notani.

²⁷ Iuasaakipeka patari sãkirauata. Iuasaakipeka mitxi Xesosi sãpiretakiti iaõka auape.

Xesosi Pirato Apisatoõ

(Mateo 27.1-2; Marko 15.1-5; Arókasi 23.1-5)

²⁸ Īkanõkapanika ninoa takanapari Kaipasi aapoko, Anikarina Xesosi Homano auĩte auinimoni, kãkiti misiritiko imarotiko pakitamoni. Xoteo auĩteakori kona nirekari aiko ãki ĩroinina. Kona inirekarina ãti uãka takote iitopãkinina. Āti uãka takote iitopãkiniãna, kona apakata nipokori inikinina Pãskoa kiiniritiã. ²⁹ Ininiã Pirato pokĩka porikiti Xoteo imisãkiretini ĩkapani. Ininiã Pirato txana ninoa:

–Kixikapa himinatari ikira kiki notamoni? –itxana.

³⁰ Ininiã ninoa txari:

–Maerekati imakamaniã, kona ate minari iua pitemoni.

³¹ Ininiã Pirato:

–Hĩteka xinikari maerekati ikamakiti, ininiã ixika auiniã hĩteka misiritari iua. Hĩkiomaneakorini sãkire iaõka himisiritari iua –itxa Pirato.

Xoteoakori apakapapiretari:

–Kona apakata aõkiniri iua, kotxi hĩte Homanoakori ! auiritaua aõkiniri kãkiti. Pitenokara apakata okiniri iua –itxana.

³² Ikara atoko inaãka, mitxi Xesosi sãkire iaõka apokini ĩkapani, kotxi mitxi isãpiretapekari aamina ĩpiriãmitakari nopini ipinini.

³³ Pirato ĩroã kãkiti misiritiko imarotiko pakita ãki iuaĩkana. Ipĩkapiretari Xesosi. Ipimaãri:

–Pitekani Xoteoakori auĩte txataua? –itxari.

³⁴ Ininiã Xesosi txari: –Piteka sãkirekani ikara? Atxiĩti apanakini sãkire atokotxikana pipimaãno atxiĩti? –itxa Xesosi.

³⁵ Pirato apakapapiretari:

–Xoteokani nitxataua? Konapitini. Piteka nirimane, pinirimane auĩteakori pakini sikai pite notamoni pimisiritiko tĩkane. Kixikapa? Kipa maerekati pikamakiti? –itxa Pirato.

³⁶ Ininiã Xesosi:

—Auñtetxi nininiãtaãua kona ìkorapokoritini. Nitixine ìkorapokoriti inaãkamako, niniritiakori neenamauatamako, ininiã Xoteoakori kona maĩkamanoko. Auñtetxi nininiãtaãua ãtiãtaãra —itxa Xesosi.

³⁷ Pirato txari Xesosi:

—Ininiã auñtetxikani pitxataua?

Ininiã Xesosi: —Atãopitikara pisãkire auñtetxi nininiua. Niponaniã ìkorapokoriti auñtetxi nininiua ìkapani. Itixi napoka atãoene nisãpiretini ìkapani. Atãoene nirekakani auikari nisãkire —itxa Xesosi.

³⁸ Ininiã Pirato:

—Kiripa atãoene txaua?

Xesosi Okiko Nirekiko

(Mateo 27.15-31; Marko 15.6-20; Arókasi 23.13-25)

Eereka Pirato iuaĩkana mapara isa Xoteoakori imisãkiretini ìkapani. Itxari:

—Kona nota apokari maerekati ikamakiti. ³⁹ Hite itotari maerekati kamakari kateia ãki auakari nisikakini Pãskoã kiiniritisaaki. Hite nirekatari nisikakiniri ikira Xoteoakori auñte? —itxa Pirato.

⁴⁰ Ikinimanekana akiripoakatana:

—Kona iuani. Pahapasira anireka.

Txamari iua Pahapasi kokaniri. Iua naiatapekari Homanoakori.

19

¹ Ininiã Pirato paniãtari sotatoakori noropatiniri Xesosi. ² Ininiã sota-toakori kamari saporieãa atoko inakari, kotipiaro kamakori. Ieretakari Xesosi kiiã. Auñtetxi mãka poporeri itakana Xesosi nopini. Ikara atoko ininiã, inapetarina Xesosi. ³ Ikara atoko itxana inapetinirina:

—Aãuñte —itxarina Xesosi inapetinina.

—Xoteo auñtekai pite —itxarina.

Ininiã iusaaki ìaritarina itoõ.

⁴ Iuaĩkana Pirato sari mapara iuaĩkana Xoteoakori imisãkiretini ìkapani.

—Hõtakaõtxikari. Hitemoni nimirari iua, kotxi ninirekari himarotininiri, ! napokari maerekati ikamakiti. ⁵ Ininiã Xesosi apoka mapara. Saporieãa kotipiaro kamakori ikiiã, auñtetxi mãka pakini auã iuamoni. Ininiã Pirato txari:

—Hãtamatarari iua.

⁶ Sasetotxi auñteakori, Teoso misãkiretiko aikoti nĩkatakani pakini atamatakasaakiri, ninoã akiripoakata:

—Hõkariko iua. Hõkariko iua. Aamina ìpiriãmitakari nopini hĩtokakitariko — itxana.

Ininiã Pirato:

—Hiteka anikari. Hiteka okari iua aamina ìpiriãmitakari nopini, kotxi kona napokari maerekati ikamakiti.

⁷ Ininiã Xoteoakori:

—Akiomane sãkire paniãtari kãkiti iua atoko inakari okiko, kotxi iua sãkire: “Teoso ãkirirano nota,” itxa —itxana Xoteoakori Piratomoni.

⁸ Xoteoakori sãkire ikenakotakasaaki, apia pikareta Pirato. ⁹ Ininiã iuaĩkana ìroã kãkiti misiritiko imarotiko pakita ãki. Ipimaãri Xesosi:

—Nanipa pina?

Txamari !kasãkireri Xesosi.

¹⁰ Ininiã Pirato:

—Kona pinirekatari pimisãkiretinino? Pixinikariko ia nisãkire. Nota posotari nisikakinii. Apaka nota posotari nokinii aamina ìpiriãmitakari nopini — itxa Pirato sãkire.

¹¹ Xesosi apakapapiretari:

–Kona pite auari posotiiretxi pokinino ĩkapani. Ikara inakari piposotiire auiniā, Teosonanira sikai ikara posotiiretxi. Nota sikanapakani pitemoni kamari apiata maerekati.

¹² Pirato ikara atoko inakari ene ikenakotakasaaki, iua ākixinireē ixinikari:

–Kiatokopa atxiiti nisikakari Xesosi?

Inirekari Xesosi isikakini. Txamari Xoteoakori akiripoakata:

–Pisikakiniāri ikira kiki, kona Sesa moianari !pitxaikauako. Iua sākire: “Auĩtetxi apiananiri nitxaua.” Sesanoka auĩtetxi apiananiri –itxana Xoteoakori.

¹³ Pirato ikara atoko inakariene ikenakotakasaaki, iminari Xesosi iporikitimoni. Ininiā Pirato topāka. Iuaā kākiti misiritiko isāpiretiniātaā. Kākiti takauākatari iuaā “Kimapori kai kamakori” inaāka. Xoteo sākireē “Kapataa.” Iuaā auĩtetxi iokanitari maerekati kamakari imisiritikomoni. ¹⁴ Iuasaaki apaniāxiti takote. Iua ōti Páskoā kiiniriti potorikini ōti apisa. Iuasaaki Pirato txari Xoteoakorimoni:

–Hātamata, hāuĩte.

¹⁵ Ininiā iuaĩkana ninoā akiripoakata:

–Piokanatariko ere. Piokanatariko ere. Hōkariko aamina ĩpiriāmitakari nopini –itxana sasetotxi auĩteakori.

Ininiā Pirato:

–Hinirekatari nokiniri hāuĩte aamina ĩpiriāmitakari nopini?

Ininiā ninoā:

–Ātikara ate auĩte. Sesanokara ate auĩte –itxana ninoā.

¹⁶ Ininiā Pirato sikari Xesosi sotatoakorimoni aamina ĩpiriāmitakari nopini okiko tĩkane.

Xesosi Tokakitaāka Aamina ĩpiriāmitakari Nopini

(Mateo 27.32-44; Marko 15.21-32; Arókasi 23.26-43)

Ininiā anikarina Xesosi. ¹⁷ Xesosi anikari aamina ĩpiriāmitakari iuaka okiko ĩkapani. Isana ixirata “Kiitātatxi” inakorimoni. Xoteo sākireē, “Kóokota,” inakori.

¹⁸ Iuaā aamina ĩpiriāmitakari nopini itokakitaāka Xesosi. Apaka ipi kiki tokakitaāka iua takote. Āti Xesosi kikomoni. Āti isanaremoni. ¹⁹ Pirato paniātari iōkatsopari aamina ĩpiriāmitakari nopini tokakitiko. Ia atoko itxa iōkatakiti: “Xesosi Nasareekiri, Xoteoakori Auĩte.” ²⁰ Itomaneri Xoteoakori atatsopari iua, kotxi Xesosi okikoātaā sitatxi takote. Sitatxi sikani na-paāpotakasaaki, atamatarina iua iōkatsopari. Ia iōkataāka Xoteo sākireē, Kreko sākireē, Homano sākireē pakini ikinimane imarotiniri ĩkapani. ²¹ Ininiā sasetotxi auĩteakori txari Pirato:

–Kona piōkatsopatapiri, “Xoteoakori auĩte.” Piōkatsopatariko iuanoka uākatari Xoteoakori auĩte ininiua –itxana.

²² Ininiā Pirato:

–Auape niōkatsopatakiti. Kona iuaĩkana niōkatsopari –itxa Pirato.

²³ Xesosi itokakitakana atoko, sotatoakori kosekari Xesosi māka. Imatsorakitarina. Imāka mata imatsorakitana ninoā ipi ipi pakini apakapini ĩkapani. Āti sotato apakapari ipixini, āti sotato apakapari ipixini, itxaāpota. Xesosi māka, āti imāka patapi auakari, !imatsorakitana, kotxi iotsare !auari. Peerekari. ²⁴ Sotatoakori itxakakana:

–Kona amatsorakitari ia. Sarauatxi atoko makama, imāka anikakari aimarotini ĩkapani.

Ininiā iuasaaki Teoso sākire iōkatsopatakori kitxakapirĩka iaōka apoka. Iua txari:

Ninoā xanakari nimāka. Isarauatana nimāka anikakari imarotinina ĩkapani.

Teoso sãkire iaõka sotatoakori kama.

²⁵ Iuasaaki aamina ipiriãmitakari takote oãua Maria, Xesosi inoro oitarokata. Iuaã apaka oãua Maria Matarena inakoro. Iuaã apaka oãua ãto Maria, Krópsi inakori itanoro. ²⁶ Xesosi amatakasaakiro inoro iua takote, amatakasaakiri imoianari itiretakiti apaka, itxaro inoro:

—Nitiretakito, ere Xoão, pamarite itxaua.

²⁷ Imoianaripekana itxa:

—Aroa pinoro otxaua.

Ininiã eereka iua anikaro oa apokomoni iuakata oãuini tũkane.

Xesosi Ipinini Pirena

(Mateo 27.45-56; Marko 15.33-41; Arókasi 23.44-49)

²⁸ Eereka Xesosi imarotari iparĩka xipope. Ikinika Teoso sãkire iõkatsopatakori iaõka apokini ikapani, itxari:

—Niposonata.

²⁹ Iuaãtaã aua tiitxi. Iua tiitxi ãki aua iãriã katxioãri. Ininiã iuasaaki iokomokarina mapoa atoko inakari iãriãmoni. Aãkeẽ itakarina, Xesosi namaã taka itxarina. Iua aãke isopo inakorike. ³⁰ Iãtaka atoko itxari:

—Ikinika nĩparĩka uatxapeka ixipopeka.

Inaãka atoko iokirikiita, iokanata itxari ixinire irimoni. Iuasaakipeka ipina itxa.

Sotato Iorotari Xesosi Iomĩtiã

³¹ Iua õti sesta veira, kãkiti tomatiko õti apisa. Xoteo auĩteakori paniãtari Pirato aamina ipiriãmitakariã auakani tapike kapatakiko, katima ipĩka ininina ikapani, iĩtona makatxakiko ikapani apaka. Tomatiko õtisaaki kona ninoa nirekari ipĩkari ito kaikotini iuaã. ³² Ininiã sotatoakori sari iuaã. Ikapatarina Xesosi takote auakani tapike. ³³ Txamari sotato amatakasaakiri Xesosi, !auaika. Ipĩpeka. Ininiãkara kona ikapatakari itapike. ³⁴ Sotato iorotari Xesosi itanapitaã iomĩtiã. Iuasaaki iarẽka, ãparaã pakini xiketa.

³⁵ Notara itikari Xesosi ipinini, ininiã atãopitikara nisãpiretakiti. Nisãpiretari ikinika nitikakiti. Nimarõtari nisãkire atão inini, ininiã nisãpiretai ia atatsopatanani, hĩte apaka auikiniri ikapani. ³⁶ Teoso sãkire iõkatsopatakori kitxakapirĩka txari:

Kona ãtika iua api !kapatakaãka.

Ininiãkara kona Xesosi api kapatakaãka, Teoso sãkire iõkatsopatakori iaõka apokini ikapani. ³⁷ ãti Teoso sãkire iõkatsopatakori txari:

Ninoa amatariko iorotakitina.

Xesosi Katiko Pirena

(Mateo 27.57-61; Marko 15.42-47; Arókasi 23.50-56)

³⁸ Eereka Xosee, Arimateia sitatxitikiri, amanaãri Xesosi ito Piratomoni. Iua Xosee auikari Xesosi sãkire, txamari ikipatari Xesosi sãkire auikini, kotxi ipĩkari Xoteo auĩteakori. Amanaãkasaakiri Xesosi ito, Pirato txari:

—Ari, panikari iua.

Ininiã Xosee anikari Xesosi ito. ³⁹ Iuasaaki imoianari Nikotemo inakori. Iua Nikotemo mitxipeka sari Xesosimoni ikanõka imisãkiretiniri ikapani. Iua moianatari Xosee, Xesosi ito apakapakasaaki. Nikotemo anikari aãtsopa aroesi inakori, miha inakori pakini ikoke Xesosi itoã taãkori tũkane. Trĩta siko kiro pakini iua ikoke anika. ⁴⁰ Ninoa ipi iapirikari Xesosi ito mãkatxi mataã ikokekata. Ikara atoko Xoteo kamari ipĩkari itoã ikatiko apisa.

⁴¹ Xesosi aamina ipiriãmitakari nopini takikoãtaã, iuaã takote aua amãtiirinape. Amãtiirinapeãtaã aua akauari amanepanika inakori. Kona

ipĩkari ĩto takaãkapanika iuaã. ⁴² Iua akauari kona õtakori, ininiã itakarina Xesosi ĩto iuaã, kotxi Xoteo tomatini õti apokanapanoka.

20

Akauariã Xesosi ĩto Mauakani

(Mateo 28.1-8; Marko 16.1-8; Arõkasi 24.1-12)

¹ Tomĩko ĩkanõkapanika, Maria Matarena sari akauarimoni. Oãpokasaaki, oãtamatari akauari tore kai auĩte kamakori makatxakapeẽkaika. ² Ininiã omiteka Simão Petromoni. Xesosi moianari itiretakĩtĩmoni apaka osa. Oãkiritana:

—Apiananiri ĩto makatxakaãka akauariã. Kona aimarotari namonireuako itakapirina —otxana.

³ Ininiã Petro, ãti Xesosi moianarikata sari akauarimoni. ⁴ Imitekana. Iua ãti Xesosi moianari miteka katimaritika, ininiã inapari Petro. Ininiã iua apoka Petro apisa. ⁵ Iãka aariko ãki atamatini ĩkapani. Atamatari mãkatxi mata, ipĩkari iapirikiko. Kona ĩroã. ⁶ Iuasaaki Petro apoka iua tikini. ĩroã aariko ãki. Atamatari mãkatxi mata. ⁷ Atamatari mãkatxi mata, mitxi Xesosi kiiã iapirikiko. Iporiĩmatataãka. Ikikomoni aua ãti mãkatxi mata. Isanaremoni aua ãti mata. ⁸ Ininiã iua mitxi apoãkari ĩroã, atamata itxari. Ininiã auikari Maria sãkire. Iuasaakiãka auikari Xesosi õkitikiniua. ⁹ Iuasaaki ni-noa kona iteene imarotapanikari Teoso sãkire iõkatsopatakori kitxakapirĩkari, kotxi Teoso sãkire sãpiretapekari Xesosi ipinini, eereka õkitikiniua. ¹⁰ Eereka Petro ãti Xesosi moianarikata kanapiriã aapokomonina.

Xesosi Oerekaua Maria Matarenamoni

(Mateo 28.9-10; Marko 16.9-11)

¹¹ Maria Matarena kaikota aariko iriko takote. Otxiapanãtakasaaki, amaãtiki opapĩkakiita oiãkakiita aariko iriko ãki oãtamadini ĩkapani. ¹² Oãtamataana ipi Teoso nitiriakori iaxitikini. Imãkana kasarori. Iitopãkana mitxi Xesosi ĩto auiniãtaã. ãti mitxi Xesosi kii auiniãtaã, ãti mitxi ikiti auiniãtaã. ¹³ Itxarona:

—Kinirepa pitxiapanãta? —itxana.

Ininiã oa:

—Imakatxakaãka niauĩte ĩto. Kona nimarotari ĩto takikoãtaã —otxana.

¹⁴ Iuasaaki oporikimoni osapotorika. Oãtamatari Xesosi, txamari !oimaro-tari.

¹⁵ Ininiã Xesosi:

—Kinirepa pitxiapanãta? Kiripa pinita? —itxaro.

Ouãkatari Xesosi amãtiirinape nĩkatakari ininiua. Ininiã otxari:

—Pite makatxakiniãri iua ĩto, ininiã pisãpiretano ĩto pitakiniãtaã. Ininiã nanikariko ãtiãtaã —otxari.

¹⁶ Ininiã Xesosi txaro:

—Maria.

Ininiã okirioka iuamoni. Otxari osãkireẽ:

—Haponii.

Popĩkari sãkireẽ, “Noereẽkiri,” otxa.

¹⁷ Ininiã Xesosi txaro:

—Kona pimaãtakapeno, kotxi nirimoni kona nisapanika. Pisa nitariakorimoni. Pitxanako: “Nota sariko nirimoni, hĩte iritxikana apaka. Nisariko niTeosonemoni, hĩTeosonetxikana apaka,” itxa.

¹⁸ Ininiã Maria Matarena sari Xesosi moianariakorimoni:

—Natamatapekari aãuĩte —otxana.

Ininiã osãpiretana ikinika Xesosi sãkire.

*Xesosi Oerekaua Imoianariakorimoni**(Mateo 28.16-20; Marko 16.14-18; Arókasi 24.36-49)*

¹⁹ Iua Tomiño İkanõkati Xesosi moianariakori apotiitaua. Iuasaaki itotarina ikinika aapokotxi tore, kotxi ipikana Xoteo auiteakori. Iuasaaki Xesosi tokiã aapokotxi ãki ninoa sauaki.

–Erekaxinire hıtxako –ıtxana ninoa.

²⁰ İkara inaka atoko oerekari iuako karo. Oerekari itanapita karo. İniniã Xesosi atamatakasaakina, imoianariakori iteene poxokoniıuata. ²¹ İuaıřkana Xesosi txana:

–Erekaxinire hıtxako. Niri iokanatinino atokotxikana, niokanatai hıte niri nireẽkiti hıkamini İkapani.

²² İuasaaki ixõkana. İtxana:

–Hãpakapariko Erekarı Matamatakoti. ²³ Apakata pisãpiretiniri nota sãkire auıãkari, imaerekani maktxakaãkapeka. Apakata pisãpiretiniri nota sãkire mauıãkani, imaerekani İmakatxakaãka –ıtxa Xesosi.

Xesosi Oerekaua Tomeemoni

²⁴ Xesosi imoianariakorimoni oerekasaakıua, Tomee Txıtximo inakori kona aua ninoakata. ²⁵ İniniã apanakini sãpiretari Tomee:

–Ate aõkitari Xesosi –ıtxana.

İniniã iua:

–İuako karo nimatamatakaniã, iuako karo nimakaaıakakaniã niuakokiã, kona nauikari hıte sãkire. İtanapita karo nimakaaıakakaniã, kona nauikari hısãkire –ıtxa Tomee.

²⁶ Aıti semanati napaka atoko, Xesosi moianariakori apotiitaua iuaıřkana aapokotxi ãki. İuasaakiıka Tomee aua ninoakata. Aapokotxi tore itotaãka, İuarıtıka Xesosi tokiã ninoamoni:

–Erekaxinire hıtxako –ıtxana ninoa.

²⁷ İuasaaki itxari Tomee:

–Patamata niuako. Pıkaaıakariko piuakokiã nitokakitiko karoã. Ni-tanapita iorotikomoni pitakari piuakoki. Kona mauıkaretıka ! pitxape. Pauıkariko nisãkire –ıtxari.

²⁸ İniniã:

–Nıauıte, niTeosone –ıtxa Tomee.

²⁹ İniniã Xesosi:

–Uatxa pıte auıkarı auãki ninini, kotxi patamatano. Kãkiti nota maõkitakani auıkiniãri nisãkire, apakapariko apiata erekari Teoso sikakiti –ıtxa Xesosi.

³⁰ Xesosi kamari apikomoni iposotiire imoianariakori sauaki. İposotiire ikamakiti imakinika kona iõkatsopataãka ia iõkatsopariã. ³¹ İa niõkatsopata Xesosi Teoso mereẽkiti, Teoso ãkiri inıniua hãuıkini İkapani. İkara atoko hãuıkiniã, hãuapıniniıka hıtxako Xesosi posotiireẽ.

21*Xesosi Oerekaua Setxi Imoianariakorimoni*

¹ Aıti õti Xesosi oerekaua iuaıřkana imoianariakorimoni ipoa Txıperıatxi inakori tınıã. İa atoko iua oerekaua:

² İuaã aua Simão Petro. İuakata aua Tomee Txıtximo inakori. Natanaeo, Kanaa aapokotxitikiri, Karirıeıa tõpa auakarı apaka aua iuakata. Sepeteo anaakori apaka aua iuakata. Apikomoni ipi Xesosi moianariakori apaka aua iuaã. ³ Simão Petro txana:

–Nota okatsaãtako –ıtxa.

İniniã apanakini:

—Ari, ate apaka okatsaãtako pitekata —itxana. Ininiã isana. Kanauaã iereëtauana. Ìkanõka okatsaãtana, txamari !imaïkarina ximaki. ⁴ Ìkanõkapanika Xesosi ikipatxitemoni tïpokonãta, txamari !imarotarina Xesosi iuaã auini.

⁵ Xesosi akiritana:

—Namariteakori, kaiomaãi ereë? —itxana.

—Kona kaiomaãua —itxarina.

⁶ Ininiã Xesosi paniãtana:

—Hítakariko hetxi hïkikomoni. Ereë hãpokariko ximaki —itxa Xesosi.

Ininiã ninoa okari hetxi ikikomonina. Eereka kona iposotaikarina ikosekinirina hetxi kanaua ãki, ximaki itori imaïkinina xika. ⁷ Xesosi moianari itiretakiti txari Petromoni:

—Aãuïtekara.

Ikara inakari sãkiretxiti ikenakotakasaaki, Petro ieretakari imãka, mitxi imakatzakakiti, oka itxaua ipoamoni Xesosimoni isini ìkapani. ⁸ Apanakini kanauaã ina. Ikosekaãpotarina hetxi. Iuasaaki ximaki xãpoka hetxiã. Itakoã !ítakori, atxiïti seï metronoka. ⁹ Ikanïkiïtakasaakina, atamatarina xamina. Ximaki iropike nopini auape. Apaka auari komiri.

¹⁰ Xesosi txana:

—Himinari ximaki himaïkakiti mapake.

¹¹ Ininiã Petro kosekari hetxi imiriï. Xãpoãkata ximaki. Sëtosïkoëta tres ximaki mitapoakari aua. Kaiãopokori ximaki, iuaritika hetxi kona tsorakita.

¹² Xesosi akiritana:

—Uai hina. Manipokota.

Kona ãtika imoianari kona kataparaxinire ipimainiri iua: “Kiriparai” ininiri iua, kotxi ninoa imarotari iua Apiananiri ininiua. ¹³ Ininiã Xesosi apoka ninoamoni. Ixanakari komiri, ximaki pakini, sika itxana ninoamoni.

¹⁴ Ikara õti apisapanika, Xesosi ipinaka atoko, õkitikaua atoko, oerekapekaua ipikata imoianariakorimoni.

Xesosi Misãkiretari Petro

¹⁵ Inipokotaka atoko Xesosi pimaãri Simão Petro:

—Simão, Xonasi ãkiri, kipa apiata tiretano nota, pitekani, nakirakani? —itxa Xesosi.

Ininiã Petro txari:

—Ari, Apiananiri, pimarotari nota apokaerekatini —itxa Petro.

Ininiã Xesosi:

—Poerekari nisãkire soti auïte anaakorimoni, ninakitiakorimoni.

¹⁶ Iuaïkana ipimaãri:

—Simão, Xonasi ãkiri, atão pitiretatano nota? —itxa Xesosi.

—Ari, Apiananiri, pimarotari napokaerekatini —itxa Petro.

Ininiã Xesosi:

—Pinïkatana soti auïte, ninakitiakori —itxa Xesosi.

¹⁷ Iuaïkana ipimaãri:

—Simão, Xonasi ãkiri, pitiretatano nota?

Ininiã Petro matinaniuata ixinireë, kotxi Xesosi pimaãri ipi ãti pakinikata “Pitiretatano nota.”

Ininiã Petro:

—Apiananiri, pite imarotari ikinipoko. Pimarotapitikari nitiretinii pite.

Ininiã Xesosi:

—Poerekari nisãkire soti auïte ninakitiakorimoni. ¹⁸ Atão nitxai.

Åtokoripanika pinakasaaki, piteka pieremãkataua. Pisari pinirekinimoni. Kiomãtxi pinakasaaki, pitamëkakanoketauako, ininiã ãti ieremãkatai. Eereka anikai pimanirekakanimoni —itxa Xesosi.

¹⁹ Ikara atoko Xesosi sãkire, kotxi ikara atoko itxako Petro ipinini. Petro ipinini iteene paxitariko Teoso, ininiã kãkiti txariko: “Peerekari Teoso.” Ininiã Xesosi:

—Pikapokitano nota. Ninireëkiti pikamako —itxa Xesosi Petromoni.

Xesosi Iteene Tiretakiti

²⁰ Petro kirioka. Atapari Xesosi moianari, itiretakiti ninoa tikini inini. Iuakara mitxi Xesosikata iitopãka Pãskoa kiiniritisaaki. Iuasaaki ipimaãri Xesosi: “Niauïte, kiripa mĩkapiritai?” ²¹ Petro atapakasaakiri Xesosi tiretakiti ninoa tikini inini, ipimaãri Xesosi:

—Natokopa itxatako ere ipinini?

²² Ininiã Xesosi:

—Nota nirekiniãri iua auapanika inini nikanapiriãkasaaki, kona nisãpiretai pite. Kona pixinikapiri iua. Pixinikari piteka kaminiri nota nireëkiti —itxa Xesosi.

²³ Ininiã iaripireta Xesosi sãkire auiãkanimoni, iua imoianari itiretakiti imapinakani Xesosi kanapiriini apisa. Txamari Xesosi !isãpiretari imapinakani. Iua txari: “Nota nirekiniãri iua auapanika inini nikanapiriãkasaaki, kona nisãpiretai,” itxa Xesosi.

²⁴ Nota ikara Xesosi moianari itiretakiti nitxaua. Nota itikari imakinika Xesosi kamakiti. Ininiã nota iõkatsopatari ikamakiti, isãkire pakini. Ininiã aimarotari atão nisãpiretakiti.

²⁵ Auapanika itori Xesosi kamakiti. Ikinika ikamakiti !kaiõkatikopankari. Ikinika niõkatsopatiniã, !apakata, kotxi itixi kona apakata kaiãopokori aãtsoa auini.

ÁTOSI Xesosi Iokanatakini Kamakiti Pirena

Xesosi Kanapiriini Iaxiti

¹ Ereēkai Teópiro, Teoso tiretakari. Merepitipanika niōkatsopatakiti aātsopaā txari ikinipoko Xesosi kamakiti, isāpiretakiti pakini. ² Niōkatsopatakiti mapotōkire auari Xesosi iaxiti sini pirena. Isini apisa isāpiretana iokanatakini Erekeri Matamatakoti paniātakiti.

³ Ipinaāka atoko iuaīkana iuaka oerekaua ninoamoni, ininiā imarotarina atāopitika iua ōkitikapekaua. Koarēta pakini ōti iua auanāta ninoakata. Iuasaaki isāpiretana Teoso auītetxi ininiāua pirena. ⁴ Imakinika apotitakasaakiua itxana ninoa:

—Kona hītakanapapiri Xerosareē sitatxiti. Aīri iaxitikiri iokanaenetakiti hiātapako. Iua mītxi hītemoni nisāpiretakiti. ⁵ Atāopitikara Xoōoni patxisatai hīte āparaā. Mapaōti napaka atoko, Erekeri Matamatakoti apokako hītemoni. Iuasaaki hīpatxisataākako Erekeri Matamatakotiā —itxa Xesosi sākire.

⁶ Ininiā imoianariakori apotiitakasaakiua Xesosikata, ipimaārina iua:
—Aāuīte, uatxa iuaīkana pīsikatarī atixine atemoni, Isaēo apika mekaniri-akorimoni? —itxarina.

⁷ Ininiā Xesosi txana ninoa:
—Kona hīte imarotiniiri īkapani. Aīrinanira imarotapaniri hīte tixine hītemoni isikini ōti. ⁸ Erekeri Matamatakoti apokasaakirako hītemoni, hāpakapariko posotitiretxi. Ininiā hīte nota kamakiti atamatakani hītxauako. Hīsāpiretariko hītiākiti, himarotakiti pakini Xerosareē sitatxiti auakanimoni, imakinika Xotēia tōpa auakanimoni, Samaria tōpa auakanimoni, ikini itixiti auakanimoni pakini hīsāpireāpotariko —itxa Xesosi ninoamoni.

⁹ Ikara atoko inaāka atoko, ninoa okiā atamatari iua anikiko iaxiti. Katxiārī āki isa, ininiā kona ninoa itikaikari. ¹⁰ Iaxiti ionakaātakasaakina, apoka ipi kiki katsopiri mākatakani ninoa takote. ¹¹ Ninoa txana:

—Kiki Karirēiakini, kinirepa hionakanāta iaxiti? Īkora Xesosi iaxiti sikari, isini atokotxikana ikanapiriini —itxana ninoa.

Itanokiri Koaā Apotiitakaniua

¹² Ininiā Oriva xirataātaā ipotorikana. Ikanapiriāna. Xerosareēmoni isana. Oriva kona ōtakori. Kākiti Oriva xirata potorikakani sini Xerosareēmoni tako atokokanera Xoteo kiomaneakorini auiritari kākiti sini tomatiko ōtisaaki.

¹³ Xerosareē sitatxiti apokasaakina, iīroāna aapokotxi āki. Ininiā isana itanokiri koaā. Petroma, Xoōoma, Txiakoma, Ātreema, Piripima, Tomeema, Patoromeoma, Mateoma, Txiakoma (Aoepo ākiri), Simāoma (Homano omanatakari), Xotasima (āti Txiako itari) pakini aua iuaātaā. ¹⁴ Ātipirika ninoa apotiitaua Teoso imisākiretinina īkapani. Apaka sitoakoro Xesosi sākire auiākani, Maria Xesosi inoro, Xesosi itariakori pakini apotiitaua ninoakata. Ninoa misākiretakasaakiri Teoso, ātika kākiti xinirenoka atoko itxana. Ininiā erekarinoka auana ninoamoni. Kona omanatakauana.

Matxia Mereīko Pirena

¹⁵ Iuasaaki sētovītxi pakini Xesosi sākire auiākani aua. Petro ōkitikaua ninoa sauaki. ¹⁶ Ininiā itxa:

—Nitariakori, hītakaōtxikari Teoso sākire kitxakapirīka Taviimoni isāpiretakiti. Tavii iōkatsopatarī Xotasini pirena, Xesosi māīkakani oerekakari

pirena, kotxi Erekar Matamatakoti kamaimaroretari iua Tavii. Atão ikara Teoso sãkire kitxakapirĩkari apokapeka uatxa. ¹⁷Iua Xotasini atekata auakari iua. Ate parĩka atoko ikama.

¹⁸—Uaritika isikari Xesosi imokaiakariakorimoni. Txineiro apakapakitoã iamotaãka itixi. Iuaã ipipe. Itano okaua. Ixiti apokasaaki, iokirikũita. Íxoreka itikako. Iuasaaki itikapitsa poãpekatani. ¹⁹Imakinika Xerosareẽ auakani kenakopiretari Xotasini ipinini. Ininiã ninoa akiritari iuaãtaã itixi uãka “Aseotama.” Popĩkari akiritari “Arẽkatxi Tixini.”

²⁰—Xikari iõkatsopatakorĩã iõkatsopatapeẽkaika ia Xotasi pirena:

Iua aapoko takanapaãkako. Kona auiritaãka kãkiti auini iuaãtaã. Iparĩka sikaãkako ãtimoni, itxa Teoso sãkire.

²¹—Ininiã amereẽriko ãti kiki atekata sikari tĩkane. Amereẽriko kiki mitxi Xesosikata sikari, mitxi amoianari ikiniõtika Xesosikata aãuakasaaki. ²²Amereẽriko kiki Xoãoni patxisarauatini itiãkari, imakinika Xesosi kamakiti itiãkari, iaxiti isini itiãkari, kotxi anirekari iua amereẽkiti Xesosi õkitikinua imarotakari ate atoko inakari —itxa Petro.

²³Ininiã imereẽrina ipi kiki, Xosee Pasapasi inakori. Apanakini akiritari iua Xõsito. ãti kiki uãka Matxia inakori. ²⁴Iposo atoko imisãkiretarina Teoso: —Pite imarotari ikinimane kãkiti ãkixinire. Poerekaua ãkiripa naia kiki pimereẽkiti ²⁵atekata parĩkauatakari tĩkane, Xesosi iokanatakiti tĩkane, kotxi Xotasini takanapari ikara parĩkatxi imaerekanĩ xika, maerekanĩ misiritikoãtaã isini ãkapani —itxana Teosomoni.

²⁶Iposo atoko ikamarina sarauatxi atoko inakari imoianarina imarotinina ãkapani. Ikara atoko ininiã, imereẽrina Matxia. Ininiã Xesosi iokanatakiti itxaua. Ikara õti atoko, iua moianatari apanakini õsi Xesosi iokanatakini.

2

Pẽtekõsitxi Kiiniriti Õti

¹ Pẽtekõsitxi kiiniriti õti (takari merepitipanika nikiko õti) apokasaaki, Xesosi sãkire auĩãkani ãtika kãkiti xinire atoko itxauana. Imakinika apotiitauana. ²Katimaritika iaxiti ãkari kataparari ãtimati atoko inakari xãpoka aapokotxi ãki Xesosi moianariakori topãkiniãtaã. ³Ininiã iuasaaki xamina tirika atoko inakari tokiã. Imakinikana ikiiãna apoka. ⁴Erekari Matamatakoti ãroã ikinika ãkixinireẽ. Iuasaakipeka ninoa sãkirauata ãti uãka sãkireẽ, kotxi Erekar Matamatakoti kamaimaroretana.

⁵Iuasaaki Xerosareẽ sitatxitiã auanãta ikini uãkati kãkiti Xoteoakori. Ninoa Teoso sãkire kĩpitakani. ⁶Ikenakotakasaakirina iaxiti ãkari ãtima atoko inakari, apotiitauana mirikinĩti kãkiti. Ininiã itikokitatana, kotxi ikenakotarina apanakini sãkirauatini isãkireẽna. ⁷Itsorĩkaãtana:

—Kiãtokopa ininiãpa imarotatarina ate sãkire. Hãtamatana, Karirẽiakinikara sãkirauanãta ateka sãkireẽ. ⁸Kiãtokopa itxa akenakotiniri ateka sãkire? —itxana ninoa.

⁹Iuaãtaã auari kaiãopokori kãkiti ãti uãka. Auari Patxiakinima, Mẽtxiakinima, Erãokinima, Mesopotãmiakinima, Xotẽiakinima, Kapatõsiakinima, Põtokinima, Ásiakinima, ¹⁰Pirĩxiakinima, Pãpiriakinima, Exitokinima, Arĩpiakinima, Sireni takotekinima, Homakinima pakini aua. Apanakini Homakinini atão Xoteoakori. Apanakini mamakaua, ininiã Xoteo itxapekauana. ¹¹Kretakinima, Arãpiakinima pakini aua iuaã.

Ininiã ninoa txa:

—Ate kenakotari Karirẽiakini sãkirauatini ateka sãkireẽ. Isãpiretarina ikinipoko erekari Teoso Apiananiri kamakiti —itxana.

12 Ininiã ninoa tsorĩkaãta. !Imarotarina.

—Natokopa itxana imarotininirina ate sãkire? —itxana.

13 Apanakini kãkiti napetana:

—Poãtakanira ninoa —itxana.

Petro Apakapapiretakiti Kãkitimoni

14 Iuasaaki Petro, õsi Xesosi iokanatakinikata misãkiretana iuaã apotiitakaniua. Itxari:

—Xotéia auakanii, ikinika Xerosareë sitatxiti auakanii, hĩtakaõtxikariko nisãkire himarotini ĩkapani. ¹⁵ Hiuãkatana naia kikiakori poãtini. Kona ipoãtana, kotxi atokatxi inaãpotapanika. ¹⁶ Ia uatxa hãtamatakiti kitxakapirĩka Teoso sãpiretapekari Xoeomoni. Iua Xoeo Teoso sãkire sãpiretakari sãpiretapekaua. Iua txari:

17 Teoso txari: “Xipokatxi õti iatokopeka inakasaaki, niokanataro Erekaro Matamatakoti ikini kãkitimoni. Pamariteakori sãpiretariko nisãkire apanakinimoni. Ātokoriakori atamatariko itapone atoko inakari Teoso sãkakititi pokamarasaaki. Iuasaaki nisãkire nisãpiretana. Kiomãtxiakori taponetariko nota oerekakiti. Iuasaaki nisãpiretariko nisãkire ninoamoni.

18 Īkora õtisaaki ninitiriakori, niniteroakoro pakinimoni niokanataro Erekaro Matamatakoti. Ninoa sãpiretariko nisãkire.

19 Iaxiti noerekariko niposotiire kãkiti mimarotakiniti. Īkorapokoriti apaka noerekariko niposotiire Apiananiri nininiuua imarotininina ĩkapani. Arẽkatxi, xamina, katxiãri pakini apokako.

20 Atokatxi piãkako. Kasiri arẽkatxi atoko itxako. Apiananiri apokini apisanikarako auako ikara atoko inakari. Peerekapaniri Apiananiri apokini õti. Īkora õti apiatakari, kotxi iuasaaki Apiananiri oerekauako kãkitimoni.

21 Ininiã Apiananiri akiritakani makatxakaãkako imapinakani ĩkapani,” itxa Apiananiri Xoeomoni.

22 Petro sãkirauatapanika:

—Kãkiti, Isaeokini, hĩkenakotariko nisãkire. Hĩte apisatoõ Teoso oerekepekari Xesosi, Nasaree sitatxitikiri. Teoso mereẽkiti itxaua, kotxi ikamaro Teoso posotiire kãkiti mimarotakiniti Teoso himarotini ĩkapani. Himarotapekari ikara. ²³ Xesosi sikaãka imokaiakariakorimoni, kotxi Teoso nirekari ikara atoko iniko. Teoso imarotapekari ikara atoko inakari apokini õti. Hĩtekara, apanakini maerekati kamakanikata maĩkari Xesosi. Aamina ĩpiriãmitakari nopini hĩtokakitari, oka hĩtxapiri iuani. ²⁴ Iuaritika ipinaka atoko, iuaĩkana Teoso õkitikari iua. Teoso sikakari iua ipĩkitxi mamisiritakaniri ĩkapani. Ipĩkitxi liposotari ixipokiniri iua, kotxi Apiananiri itxaua.

25 —Kitxakapirĩka Tavii sãpiretari Xesosi pirena. Itxari:

Nota itikapikari Apiananiri nota apisatoõ. Iua aua nikkomoni. Ininiã !nimakatxakaãka.

26 Ininiã nixinire poxokoniuatapeka itxa. Nisãkire poxokoni apaka aua. Niĩto auãki inakasaaki, iãtapari Teoso sikaenetakiti.

27 Apiananiri kona takanapano nota ipĩkani auiniãtaã. Apiananiri !auritano Erekaro Kamakari paikini.

28 Apiananiri oerekepekano mapĩkani kimaporite. Iua notakata aua, ininiã nipoxokoniuata, itxa Xesosi Taviiomoni kitxakapirĩka.

29 Ininiã Petro sãkirauatapanika:

—Kikiakori, hãuiritano nisãpiretiniri Tavii pirena. Tavii anirimane kitxakapirĩka auakari. Iuani ipĩpe, ikatapeẽka. Uatxa atemoni auapanika iua

akauare. ³⁰ Iua Teoso sãkire sãpiretakari. Atão iua imarotari Teoso sãkire. Teoso sãpiretakekari iua apika mekani Teoso mereẽkiti itxauako. Tavii imarotari Teoso mereẽkiti õkitikaãkapanikako auõttxi ininiua tĩkane. Teoso sãpiretari imereẽkiti topãka auõttxi itopanere nopini. Ininiã atão auõttxi itxaua.

³¹ –Tavii imarotari ikara atoko inakari Xesosi apokini apisapanika, kotxi iõkatsopatari Xesosi ipinini pirenã, iuaĩkana õkitikiniua pirenã apaka. Iua txari: Ipĩkani auiniãtaã !ikaikota. Ito !ipaiaka, itxa Tavii kitxakapirĩka.

³² –Iua Xesosi ipinaka atoko, Teoso õkitikari iua. Ate amakinika Xesosi õkitikiniua itikakani atxaua. ³³ Ininiã uatxaika Xesosi topãka Teoso kikomoni. Ikara atoko Xesosi Apiananiri itxaua. Apakapari Erekarĩ Matamatakoti, Teoso sikaenetakiti. Iposo atoko, iokanatarĩ Erekarĩ Matamatakoti atemoni. Iuakara uatxa hãtamata ikamakiti. Hĩkenakotari iua sãkire uatxa.

³⁴ –Tavii !isari iaxiti auõttxi ininiua ĩkapani, iuaritika iõkatsopatari: Apiananiri misãkiretari niauĩte: “Nota kikomoni piĩtopãkinititika

³⁵ nixipokariko pimokaiakariakori. Nikamariko ninoã pikiti pitakiniãtaã atoko ininiua,” Apiananiri txari niauĩte.

³⁶ –Ininiã Isaeo auakanii, himarotariko ia. Hĩte okari Xesosi, iuaritika Teoso kamari iua auõttxi ininiua. Teoso mereẽkiti itxaua –itxa Petro.

³⁷ Iuasaaki Petro sãkire ikenakotakasaakina, ãkixinireẽna tsĩĩtxi apoka iouata iorotiniri tsii atoko itxa. Maerekaxiniretinoka itxana. Eereka itxana ninoã:

–Kiripa akama? –itxana.

³⁸ Petro apakapapiretana:

–Himaerekani hĩtakanapa. Hĩte imakinika hĩpatxisataãkako Xesosi Kristo uãkaã, ininiã Teoso makatxakari himaerekani. Iuasaakiko hãpakapari Erekarĩ Matamatakoti Teoso sikakiti. ³⁹ Kotxi ikara Teoso sikaenetakiti hĩte ĩkapani, hamarite ĩkapani, apanakini õtako auakani apaka ĩkapani. Ikara Teoso sikaenetakiti ikinimane kãkiti Teoso akiritakini ĩkapani –itxa Petro.

⁴⁰ Petro iteene õtãkikana ninoã, kotxi inirekarĩ atão ikaminina, ininiã itokata õtãkikana ia atoko:

–Īrapokoriti auakani maerekati kamakani itxauana. Himaktxakaua. Hĩtakanapariko himaerekani. Hãuikariko Xesosi sãkire –Petro txana ninoã.

⁴¹ Īkora õti, tres mio kãkiti ipoxokoniritikana auikari Petro sãpiretakiti. Iuasaaki ipatxisataãkana.

Xesosi Sãkire Auiãkani Moianatakiniua

⁴² Eereka ikiniõtika apaiaõkarina Xesosi iokanatakini oerekakiti. Ātipirika itiretakauana. Ātipirika ikamarina kiiniri komiri imapixinikinina Xesosi ipinini ixinikinina ĩkapani. Ātipirika imisãkiretarina Teoso. ⁴³ Ikinimane tsorĩkaãnãta, kotxi Xesosi iokanatakini kamari ito posotiiretxi kãkiti mimarotakinini, apanakini Teoso imarotini ĩkapani.

⁴⁴ Teoso sãkire auiãkani apotiĩtapikaua. Ninoã xanakari ikinika inakitina. ⁴⁵ Ivẽtxitarina itiina, ininiã tũĩtxi ĩki isikana matxineirotenimoni. ⁴⁶ Ikiniõtika aiko ãki Teoso misãkiretikoãtaã apotiĩtapikauana. Ninoã aapoko ãki ikamarina komiri mapixinikiko kiiniriti. Ātipirika ninoã apotiĩtaua ipoxokoniritikana nipokori inikinina ĩkapani. Ākixinirena erekapitikari. ⁴⁷ Ixikarauatana Teoso ĩkapani. Imakinika kãkiti apokaerekatana ninoã. Ininiã ikiniõtika Teoso makatxakari kãkiti maerekani. Ininiã Teoso sãkire auiãkani apiaãpota.

1 Áti òti mapiátiki Petro, Xoão pakini sari Teoso misákiretiko aikotimoni Teoso imisákiretinina Íkapani. 2 Iuasaaki ikiniótika kákiti anikari matípokotakati Teoso misákiretiko aikoti toremoni. Itore uáka “Peereri.” Iuaá matípokotakati amanaári txineiro iuaá napakanimoni. Iponaniákasaaki matípokotakati itx-
 aua iua. 3 Ininiá Petro, Xoão pakini Íroákasaaki, iua amanaári txineiro:

—Txineiro hísikano —itxa.

4 Ininiá Petro, Xoão apaka atamatari iua. Ininiá Petro txari:

—Patamataua.

5 Ininiá iua matíkati atamatana ninoa. Iuákatari txineiro isikinina iuamoni.

6 Ininiá Petro:

—Kona auari txineiro atemoni. Kona pirata aua atemoni. Oro apaka ! auari. Iuaritika nota auakiti nisikapítikai. Xesosi, Teoso mereékiti, Nasa-rekiri, iua uákaá pókítikauako. Pitípokotako —Petro txari iuamoni.

7 Ininiá Petro maíkari iuako ikikomonikiri ókitikiniua Íkapani. Iuasaakipeka ikiti, ikitinota pakini kataparapeka itxa. 8 Ininiá okakataua, típokota itxa. Íroá Petro, Xoão pakinikata Teoso misákiretiko aikoti áki. Íroákasaaki, okaápokataua. Itípokoápokata.

—Ari, peerekari Teoso —itxanáta.

9 Ikinimane itikari iua típokotini. Ikenakotari ixikarauatini Teosomoni.

10 Ikinimane imarotari iua kiki aiko Íronakikóatáa “Peereri” inakoriáatáa topákanátakari, txineiro amanaánátakari iua. Ininiá ninoa:

—Anekani. Kiripa atxiiti? Mitxi matípokotakati. Uatxa itípokotape. Kana-tokopa itxa? —itxana.

Petro Sápíretakiti Kákitimoni

11 Apanakini kenakopíretana ninoa, ininiá imitekana ninoamoni matípokotakati pírena imarotinina Íkapani. Iuasaaki ninoa auiniáatáa akiritaáka “Saromão pakita.” Iuaá Petro, Xoão pakini aua mitxi matípokotakatikata. Iua maíkakanokeápotana Petro, Xoão pakini. 12 Iua Petro atapana kákiti ninoamoni Íkani. Itxana:

—Isaéo auakanii, kinirepa híte tikoka ere kiki típokotini hátamatakasaaki? Kinirepa híte itikaua ate? Na ate posotíreèni kamarí iua típokotini. Ate ereka anini kona kamarí iua típokotini. 13 Apraóni, Isakini, Xakooni pakini Teosone, aÍriakorini kitxakapíríkarini Teosone, iuara oerekepekaua imi Xesosi ereka inini. Teoso ákiripítikara itxaua. Iua posotíre auapítika. Iuakara hísika okiko Íkapani. Eereka Pirato inakori nirekasaakiri isikakiniri. Híte ! inirekari iua sikakiniri Xesosi. 14 Iuasaaki híte kona nirekari erekarinoka kamakari. !Hinarekari iua atáo inakarinoka kamakari. Híte amanaári Pirato isikakiniri kokaniri hítemoni. 15 Ininiákara híte okapiri kákiti auáki inini kamakari. Iuaritika ipíkani sauakí Teoso ókitikari iua. Ate itikari atáopítikara iua ókitikiniri.

16 —Ia kiki hítikakiti himarotakiti kataparapeka itxa, kotxi iua auikari Xesosi posotíre. Iua auikari Xesosi sákire erekepeka inini Íkapani. Hátamatari híte apísatoó iua ereka inini.

17 —Ininiá uatxa nitariakori, nimarotari híte, híte auíteakori pakini okapiri Xesosi atáo himimarotakani xika. 18 Kitxakapíríka Teoso sákire sápiretakani oerekepekaua Kristo misiritiko. Ikara imisiritiko auapeka. 19 Ikara atoko ininiá, hítakanapariko himaerekani. Erekarí kimaporiti hínitako, ininiá Teoso makatxakari himaerekani. 20 Iuasaaki Apiananiri kamapoxokonitai. Isikataparatai. Iuasaaki iua iokanitari Xesosi imereékiti hítemoni. 21 Merepanika iua Xesosi kaikota iaxiti. Teoso kamariko imakinika amaneri. Iuasaaki Xesosi apoka iuaíkana. Iua atokokana itxana Teoso sákire sápiretakani kitxakapíríka. 22 Kitxakapíríka Moisesi txari:

Apiananiri hīTeosone iokanatariko isākire sāpiretakari hītemoni nota iokanatinini atokokana. Hinirimane itxaua iua. Hīkenakotariko ikinika isāpiretakiti hītemoni.

²³ Ikinimane iua sākire makenakotakati xipokaākako.

²⁴ —Teoso sākire sāpiretakari Samoero inakori, eereka ikinikana Teoso sākire sāpiretakani pakini sāpiretapekari Teoso iokanatiniri imereēkiti kākitemoni ikorasaaiki. ²⁵ Teoso sākire sāpiretakani anaakorirai hīte, ininiākara isākire ninoamoni, uatxikana isākire hītemoni uatxa. Itxari Apraōni:

Āti pimekaniri sikariko erekari ikini itixiti auakanimoni, itxa Teoso. Ininiā ikara Teoso sikaenetakiti hīkiomaneakorinimoni, hītemoni apaka isikaeneta. ²⁶ Ininiā Teoso iokanatarai iua ākiri Xesosi hītemoni merepitipanika. Iokanatarai iua hītemoni erekari hītemoni isikini ikapani, himaerekani hītakanapini ikapani —itxa Petro.

4

Petro, Xoāo Pakini Xoteo Auñteakori Apisatoō

¹ Petro, Xoāo pakini sākirauatapanika kākitemoni inakasaaki, sasetotxiakori, Teoso misākiretiko aikoti nīkatakari, satoseoakori pakini apoka ninoamoni.

² Ininiā ninoa naiataua, kotxi Petro, Xoāo pakini sāpiretari kākiti ipikani ōkitikiniua pirena, kotxi ninoa txari:

—Xesosi ipinaka atoko, iuaikana iua ōkitikaua, ininiā ipikani ōkitikauako.

³ Ininiākara ninoa maikana Xoāo, Petro pakini. Iuasaaki mapiānikata, ininiā itakana kateia āki ikanōka iuaā inapinina ikapani. ⁴ Iuaritika itomaneri Petro sākire kenakotakani auikapiretari iua sākire. Sīko mio kikiakori auikari Teoso sākire Petro sāpiretakiti.

⁵ Katimatinīkata Xoteo auñteakori, kiomātxiakori, kaiōkatsopareriakori pakini apotiimanetaua Xerosareē. ⁶ Sasetotxiakori auñte apiatakari Anasi inakori iuaā aua. Inirimane Kaipasi inakori, Xoāo inakori, Arexātri inakori pakini aua iuaā apanakini sasetotxiakori auñte nirimanekata. ⁷ Xoāo, Petro pakini mināka ninoa apisatoō. Ipimaārina:

—Kiposotiireēpa hōkitikari matīpokotakati? —itxana.

⁸ Erekari Matamatakoti moianatarai Petro. Ininiā iua txana ninoa:

—Añuñteakori, akiomaneakori, ⁹ hinirekari asāpiretinii uatxa erekari akamakiti matīkatimoni. Hinirekari himarotiniiri erekapeka inini. ¹⁰ Ininiā ikinika hīte, ikinika Isaeo tixini auakani apaka, himarotariko ia. Xesosi Nasareekiri posotiireēra ia kiki hīte apisatoō timakari makananitaāka. Iuara hīte oka aamina ipiriāmitakari nopini. Iuara Teoso ōkitika iuaikana ipikani sauaki. ¹¹ Kitxakapirīka Teoso sākire iōkatsopatakori sāpiretari Xesosi hīte manirekakani, kotxi itxari:

Kai aapokotxi kamakanii, !hinirekari āti kai soro. Iua kai himanirekakiniti apiari itxapekaua. Apanakini kai soro maīkakari itxaua.

¹² —Xesosinokara makatzakari kākiti maerekani. Kona āti maerekan-itxi makatzakakari !auari ikini itixiti. Teoso sikari iuanokara kākitemoni maerekani imakatzakini ikapani —itxa Petro.

¹³ Ninoa tsorīkānātana Petro sākire ikenakotakasaakina, kotxi Petro, Xoāo pakini sākirauata itaparaxinireritika. Mitxi kona ninoa apaiaōkarauata, iuaritika ninoa imarotari atāo isākirauatini. Ninoa xinikari:

—Ixi. Ninoa minakani. Iuaritika kiikitena, kotxi Xesosi moianariakori itxauana —itxana.

¹⁴ Ininiā !kasākirena, kotxi matīkati tīpokotapeka ninoa apisatoō. ¹⁵ Ininiā ipaniātana Petro, Xoāo pakini mapara isinina, ninoa auñtetxiakori ininimoni-uana isākirauatini ikapani. ¹⁶ Ininiā auñtetxiakori txari:

—Kanatokopa atxatana ninoa? Kotxi ikinimane Xerosareë auakani imarotari itxikitakinirina matíkati erekape inini. Atãopitikara ninoa kamari posotiiretxi. !Aposotari akipatiniri ia sãkiretxiti, kotxi ikinipoko imarotapekari matíkati tïpokotini. ¹⁷ Kona anirekari ikara pirena apikomoni iaripiretini kãkiti sauaki. Ininiã atxanako ninoa: “Na apikomoni Xesosi pirena hïsãpiretapinikariko.”

¹⁸ Ininiã uaiãkana akiritana. Eereka itxana:

—Kona hïsãpiretapinikariko apikomoni Xesosi pirena. Kona hõerekapiriko uaiãkana Xesosi pirena —itxana.

¹⁹ Ininiã Petro, Xoão pakini apakapapiretana:

—Kiripa atão akïpitini? Hïtekani? Teosokani? Kipa erekari? Hïte mereëri.

²⁰ Kona aposotari atakanapiniri asãpiretiniri aïtikakiti, akenakotakiti pakini —itxana.

²¹ Ininiã uaiãkana auïtetxiakori txitana. Iposo atoko auiritana isinina, kotxi maerekati !ikamana. !Imisiritana, kotxi ipïkarina kãkiti. Ikinimane kãkiti txari:

—Peerekari Teoso kamakiti matíkati ïkapani —itxana.

²² ïkora kiki makananitakori koarëta anope iuusaaki.

Xesosi Sãkire Auiãkani Misãkiretiniri Teoso

²³ Xoão, Petro pakini sikakikosaaki, ninoa kanapiriã imoianariakorimoni. Ikinika sasetotxi auïteakori sãkire, kiomãtxiakori sãkire pakini ikinika isãpiretana. ²⁴ Ikara ikenakotakasaakina, ikinikana misãkiretari Teoso. Ininiã itxana:

—Apiananiri, ikinika posotiiretxi auari pitemoni. Pitenanira Teoso pitxaua. Pite kamari iaxiti, itixi, potxoari uinitï pakini. Imakinika iaxiti auakani, itixi auakani, potxoari uinitï auakani pakini pikama. ²⁵ Kitxakapiriã Erekari Matamatakoti kamaimaroretari pinitiri aãtokiri Tavii. Ininiã itxari: Kinirepa kãkiti Teoso manirekaãkani omanãkarauata? Kinirepa kãkiti maxikatïika xinikari maerekati ikamini ãtïmonï?

²⁶ Auïtetxiakori apotiitaua neenamatzï ikaminina ïkapani. Ninoa apotiitaua Apiananiri inaiatinina ïkapani, imereëkiti apaka inaiatinina ïkapani, itxa Tavii.

²⁷ —Atãopitikara Erotxi, Põsio Pirato pakini apotiitaua Xoteo minakonikata, Xoteoakori pakinikata. Ninoa apotiitaua uai ia sitatxtiã. Isãkirauatana pamarite Xesosi okinina ïkapani. Txamari pite mereëri iua erekarinoka kamakari. ²⁸ Mitxi pite imarotari imakinika ninoa kamakiti tïkane. Kãkiti kamari pinirekakiti, kotxi kaposotiirei. ²⁹ Ininiã auïte, pixinikariko ikara maerekapirenatï. Pisikataparaxiniretaua ate pinitiriakoriua pisãkire asãpiretini ïkapani. ³⁰ Pamarite erekari kamakari Xesosi posotiireë pimakananitanako amianatakani. Kãkiti maposotakiniti pikamako. Posotiiretxi pikamako pisãkire aõerekini ïkapani. Ikara pikamako pamarite Xesosi posotiireë —itxana ninoa Teosomoni.

³¹ Teoso imisãkiretaãkana atoko, ninoa apotiitiniãtaãua iakeka. Erekari Matamatakoti apoka ikinimanemoni. Ininiã itaparaxinireritikana isãpiretarina Teoso sãkire kãkitimoni.

Teoso Sãkire Auiãkani Moianatari Itariakori

³² Ikinika Teoso sãkire auiãkani ãtika kãkiti xinire atoko itxauana. Kona itxana: “Nota nakitira ia,” kona itxana. Kapotxinaniri !auari. Ninoa xanakari ikinika itiina. ³³ Xesosi iokanatakini itaparaxinireritikana txari ikinimanemoni:

—Xesosi Apiananiri uaiãkana õkitikaua ipinaka atoko. Ate imarotari, kotxi ate aõkitari iua ipinaka atoko —itxana kãkitimoni.

Ininiākara Teoso sikari ikinika erekari ninoamoni. ³⁴ Ninoa sauaki tiitxi amonitakari !auari. Kikio ipi auiniāri, kakikioteri vētxitari ātika. Apokotxi ipi auiniāri, kaapokori vētxitari ātika. Oa txineiro ninoa sika ³⁵ Xesosi iokanatakinimoni. Eereka ninoa xanakoro oa txineiro matiitinimoni.

³⁶ Iuasaaki aua Xosee. Sasetotxi, Arevii apika mekaniri itxaua. Xipri inakori pokomiriūtiki iua. Xesosi iokanatakini takauākatari iua Panapee inaāka. Popikari sākireē iuāka: “Kasikapoxokoniri,” kotxi ātipirika isikapoxokonitari kākiti. ³⁷ Iua vētxitari ātika ikikiote. Iua kikio īki isika Xesosi iokanatakinimoni.

5

Ananíasi, Sapira Pakini

¹ Iuasaaki auari Ananíasi inakori, ĩtanoro Sapira inakoro pakini. Iua vētxitari kikio. ² Ikaikotakoro ipixini kikio īki. Ipixininoka isika Xesosi iokanatakinimoni. Sapira imarotari ōtaniri kamakiti. Txamari iua sikasaakiro oa txineiro Xesosi iokanatakinimoni, itxari:

—Ikinika kikio īki asika Teosomoni —itxa.

³ Iuasaaki Petro txari:

—Ananíasi, kinirepa pauiritari Satanasi misirienetini maerekati pikamini ĩkapani? Erekari Matamatakotira pimisirieneta, kotxi ipixini kikio īki kaikota pitekata. Kinirepa pisāpiretari ikinika txineiro pisikini Teosomoni? ⁴ Kikio pivētxitini apisapanika, ĩkora kikio pite nakiti. Eereka pivētxitakasaakiri, ōkora txineiro pite nakito. Ininiā kinirepa pitxari: “Ikinika nisika Teosomoni?” Kona kākiti pimisirieneta. Teosora pimisirieneta —Petro txari.

⁵ Iuasaakipeka Ananíasi iripe. Ipīpe. Ininiā ikara kenakotakani pīkarauakata. ⁶ Iuasaaki ātokoriakori iapirikari Ananíasini ĩto mākaxi mataā ikatinirina ĩkapani. Eereka anikarina, kata itxarina iuani.

⁷ Ipi oara, āti oara pakini napaka atoko iua ĩtanoro apoka. Kona oimarotapanikari oĩtanirini ipinini. ⁸ Ininiā Petro txaro:

—Pisāpiretano. Ōia txineironokani ĩkikiote īki ĩhāpakapakito aua? Atāo pisāpiretano? —itxaro.

Ininiā oa:

—Ari aroanokara ate apakapakito aua —otxari.

⁹ Ininiā Petro:

—ĩĥite uākatatari Erekari Matamatakoti auiritai himisirienetini iua? Uatxaika ĩronakikoātaā pĩtanirini katakani apokaŕepeka. Ininiā ninoa anikapitakai pite apaka —itxaro.

¹⁰ Iuasaakipeka oĩripe, pīpe otxa. Iuaĩkana ninoa ātokoriakori ĩroā. Apokarona oani, ininiā anikarona. Ikatarona ōtanirini takote. ¹¹ Ininiā ĩkinipoko Xesosi sākire auiākani, apanakini ikara kenakoenetakani pakini pīkarauata.

Amianatakani Makananitiko

¹² Iuasaaki Xesosi iokanatakini kamanātari posotiiretxi, kākiti mimarotakiniti pakini kākiti sauaki. Ikinioĥtika Xesosi sākire auiākani apotiitaua Teoso misākiretikoātaā, “Saromāo pakita” akiritakori. ¹³ Xesosi sākire mauĩkani apokaerekatana ninoa, txamari ipīkarena xika ĩnirekarina imoianatinina. ¹⁴ Iuaritika apikomoni kākiti apotiĩāpotaua ninoakata, kotxi kikiakori, sitoakoro pakini auikari Apiananiri sākire. ¹⁵ Iuasaaki Xesosi iokanatakini makananitana amianatakani, ininiākara kākiti anikana amianatakani kimaporimoni. Sirimatatxi nopini itakana ninoa kima-poriātaā. Ininiā kākiti xinikari: “Petro napakasaaki, isanōka amianatakani imoni apokiniā, imakananitaākana.” ¹⁶ Ininiā kaiāopokori kākiti Xerosareē

takotekini apoka. Ninoa minana amianatakani, apaka kãkiti maerekani matamatakoni misiritakini pakini. Ininiã Xesosi iokanatakini makananitanan imakinikana.

Xesosi Iokanatakini Misiritiko

¹⁷ Iuasaaki sasetotxi auïte apiatakari, imoianariakorikata, satoseoakorikata xikotana Xesosi iokanatakini. ¹⁸ Ininiã ninoa maïkana. Eereka kateia ãki taka itxapena ninoa. ¹⁹ Iua ïkanõkati Teoso nitiri iaxitikiri matakakari kateia tore. Eereka anika itxana iporikiti. Itxana:

²⁰ —Hisa Teoso misãkiretiko aikotimoni. Iuaã hïsapiretariko Teoso sãkire kãkitimoni kãkiti auini amaneri inini ïkapani —itxa Teoso nitiri.

²¹ Ininiã ïkanõkapanika ninoa sari Teoso misãkiretiko aikotimoni. Teoso nitiri sãkire iaõka ikamana. Iuaã isãpiretarina Teoso sãkire kãkitimoni.

Iuasaaki sasetotxi auïte apiatakari, imoianariakorikata pïkapiretana Xoteoakori kõtãkikarerini, Xoteo kiomaneakori pakini, ininiã imakinika ninoa apakïtakana Xesosi iokanatakini. ²² Ininiã apanakini sari kateiamoni apinina ïkapani. Txamari apokasaakina iuaã, !auaïkana Xesosi iokanatakini. Ininiã ïkanapiriãna auïtetxiakorimoni isãpiretinina ïkapani. ²³ Ininiã itxana:

—Ate apokasaaki kateia tore, itotaãkapanika. Kateia nïkatakani auanãta itore takote. Txamari itore amatakakasaaki, kãkiti !auaïka iriko ãki —itxana.

²⁴ Ininiã sasetotxi auïte apiatakari, Teoso aikote nïkatakani auïte, sasetotxiakori pakini kenakoentakasaakiri ïkara sãkiretxiti:

—Anekani? Nãpa ninoa atxïiti? Kiripa apikomoni auatako? —itxana.

²⁵ Iuasaakipeka kiki apoka. Isãpiretana:

—Hïkenakotariko nisãkire. Ninoa kikiakori kateia ãki hïtakakini Teoso misãkiretiko aikoti ãki aua. Oerekanãtarina Teoso sãkire kãkitimoni —itxana.

²⁶ Ininiã Teoso misãkiretiko aikoti nïkatakani auïte, initiriakorikata sari iuaã. Ninoa minana Xesosi iokanatakini iuaïkana auïtetxiakorimoni. Imaïkasaakina, kona iariatana, kotxi ipïkarina kãkiti kai soroã kiporonakinina. ²⁷ Ninoa apokasaaki, ipaniãtana Xesosi iokanatakini Xoteoakori kõtãkikarerini apisatoõ itiminina. Sasetotxi auïte apiatakari txana:

²⁸ —Mitxi ate paniãtai Xesosi sãkire himasãpiretakani kãkitimoni. Txamari hõerekapanikari iua sãkire ikinimane Xerosareë auakanimoni. Ate xika Xesosi ipina, hïtxanãta ikinimanemoni —itxa sasetotxi auïte.

²⁹ Ininiã Petro, apanakini Xesosi iokanatakiniakata apakapapiretari:

—Ate kïpitari Teoso paniãtakiti. Kona kãkiti paniãtakitini akïpita. ³⁰ Teoso, akiomaneakorini Teosone, õkitikari Xesosi iuaïkana auini ïkapani. Hïtera okari iua Xesosi aamina ïpiriãmitakari nopini. ³¹ Iuaritika Teoso takari Xesosi ikikomoni. Itxïkitakari iua auïtetxi ininiua. Kãkiti maerekani makatxaãkari itxaua. Ininiã Isaeo auakani takanapiniãri imaerekani, Xesosi makatxakari ninoa maerekani. ³² ïkara ate imarota. Apaka Erekar Matamatakoti imarotari ïkara. Teoso sikari iua Erekar Matamatakoti isãkire Kïpitakanimoni —itxa Petro ninoamoni.

³³ ïkara ikenakotakasaakina, iteene omanãkarauatana. Ininiã ninoa:

—Mãokana —itxana.

³⁴ Iuasaakio Kamarieo inakori õkitikaua kõtãkikarerini sauaki. Pariseo itxaua. Teoso paniãtakiti oerekakari itxaua. Ikinimane paxitari iua. Ininiã iua txari:

—Hanikana naia mapara atenoka asãkirauatini ïkapani —itxa.

³⁵ Ininiã eereka itxana:

—Isaeo tixini auakanii, hïkïketariko hïkamakiti ninoa Xesosi moianariakorimoni. ³⁶ Akokaxiti auari Teota inakori. Iua txari: “Auïtetxi apiatakari nitxaua nota,” itxa. Iuasaaki koatrosëtosï kikiakori moianatari iua. Auïkarina

ia sãkire. Txamari okapeêka iuani. Eereka iuakata sikani iarikape. Iua auñtetxi ininiua xipope. Isãkire !auikaãkaika.

³⁷ —Teotani ipinaka atoko Xotasi Kariréiakiri apoka. Iuusaaki auñtetxiakori iaõtari ikinimane kãkiti. Kaiãopokori kãkiti auikari iua Xotasi sãkire, ininiã ninoa moianatari iua. Iua Xotasi imoianariakorikata nirekari ixipokinina auñtetxiakori. Txamari iua apaka okapeêka, ininiã imoianariakori iarikape.

³⁸ —Ininiã uatxaikara nõtãkikai hñte: “Hñtakanapanako ninoa Xesosi iokanatakini. Hñsakanako ninoa, kotxi atxiñti ninoa ! ikamari Teoso paniãtakiti, ininiã pañtiki ninoa sãkire apaka ! auaika. ³⁹ Txamari, ninoa kaminiãri Teoso paniãtakiti, erepaniko, kotxi atxiñti hinaiatari Teoso” —itxa Kamarieo.

Iuusaaki ninoa Xoteo õtãkikakani kñpitari Kamarieo sãkire. ⁴⁰ Akiritana Xesosi iokanatakini iuañkana ñiroinina. Ipaniãtari ninoa xirokitatiko. Ininiã ninoa:

—Xesosi sãkire kona hñsãpiretapinikako —itxana.

Eereka sikaka itxana isinina ñkapani. ⁴¹ Isikasaakina, ipoxokoniuatana.

—Teoso apokaerekataua ate, kotxi auiritari amisiritiko Xesosi sãkire aãuikini xika —itxana.

⁴² Ininiã ikiniõtika oerekaruatana Teoso misãkiretiko aikoti ãki, kãkiti aapoko ãki apaka. Isãpiretarina erekari pirena Xesosi Teoso mereêkiti ininiua pirena.

6

Setxi Kikiakori Mereïko

¹ Xesosi sãkire auñãkani apiañpota. Iuusaaki Xoteoakori Kreko sãkire imarotakani taparakienatana apanakini Xoteoakori. Itxana:

—Atekata auakani sitoakoro tikinitakoni kona apakapari nipokori ikiniõtika apanakini tikinitakoni apakapiniri atoko —itxana ninoa.

² Ininiã Xesosi iokanatakini tosi pakini pñkapiretana ikinimane Xesosi sãkire auñãkani. Itxana:

—Kona erekari ate takanapiniri Teoso sãkire aõerekini asikakienarauatini ñkapani. ³ Ininiã setxi kikiakori himereêko, ikara parñkatxi ikaminina ñkapani. Himereêna Erekarí Matamatakoti paniãtakitinoka kamakani. Himereêna kimarorerini. Ininiã asikana ia parñkatxi ikaminina, sitoakoro tikinitakoni isikakienatinina ñkapani. ⁴ Ininiã atepékana, Teoso amisãkireta. Isãkire aõereka. Ikaranoka akamako ikiniõtika —itxana.

⁵ Ikinimane Xesosi sãkire auñãkani apokaerekatari Xesosi iokanatakini sãkire, ininiã ninoa mereëri Estevão. Iua iteene auikari Teoso sãkire. Erekarí Matamatakoti paniãtakitinokara ikama. Apaka imereêna Piripima, Porókoroma, Nikanooma, Tximoma, Pamenama, Nikoraoma pakini. Iua Nikoraõ Átxiokiakiri itxaua. Mitxi Xoteo minakatiua iua, eereka imamakaua. Xoteopeka itxapekaua. ⁶ Xesosi sãkire auñãkani minana ninoa Xesosi iokanatakini. Ininiã Xesosi iokanatakini misãkiretari Teoso. Iuakona itakana ninoa nopini, ikara Teoso parñka ikaminina ñkane.

⁷ Ikara atoko ininiã, Teoso sãkire iaripireta apikoxiti. Ininiã mokatanitika kaiãori Xerosareë auakani auikari Xesosi sãkire. Ito sasetotxiakori apaka kñpitari Xesosi sãkire.

Estevão Mañiko

⁸ Estevão itene auikari Xesosi sãkire. Teoso posotiire aua iuamoni. Kaposotireri iua, ininiã ikamari kãkiti mimarotakiniti. Ikamari posotiiretxi, Teoso posotiire oerekini ñkapani. ⁹ Txamari ãtikaka kikiakori !inirekari iua. Ninoa ãti Xoteo apotiitiniãtaãua aikoti sikani. Ninoa “Ninoaka nireêkiti

kamakani” akiritaākana. Ninoa Sireni sitatxitikini, Arexātria sitatxitikini, Sirísia tixinikini, Ásia tixinikini pakini. Ninoa iteene misākiretakakaua Estevãokata, kotxi !auikarina iua sākire. ¹⁰ Txamari Estevão sākirauataka atoko, !kasākirekana, kotxi Erekarí Matamatakoti sikaimaroretari iua Estevão. ¹¹ Ininiã ninoa sikari txineiro apanakini kikiakorimoni Estevão apoítinina íkapani. Ininiã ninoa txineiro apakapakani txari:

–Ate kenakotari iua, Moisesini imisākirepiretini, Teoso apaka imisākirepiretini –itxana.

Txamari na atāoni isākirena. ¹² Ikara isākirena xika, kiomātxiakori, kaiōkatsopareriakori, apanakini kākiti pakini naiataua, ininiākara imaikarina Estevão, kōtākikarerinimoni anika itxarina iua.

¹³ Eereka iminana apanakini, Estevão imisākirepiretinina íkapani. Ninoa txari:

–Ia kiki misākirepiretapikari Teoso misākiretiko aikoti. Apaka kona inirekari Moisesi paniātakiti. ¹⁴ Ate kenakotari iua sākire: “Xesosi Nasareekiri xipokariko Teoso misākiretiko aikoti. Ixipokariko akiomaneakorini sākire Moisesini paniātakiti.”

Ikara atoko aāpirena ikamana ninoa. ¹⁵ Ikinimane ninoa kākiti ōtākikakani atamatari Estevão toō. Teoso nitiri iaxitiki toō atokokana itxa Estevão toō.

7

Estevão Sākirauata Kōtākikarerimoni

¹ Ininiã sasetotxiakori auíte apiatakari txari Estevão:

–Atāokani ninoa sākire?

² Estevão txari:

–Nikiomaneakori, nitariakori pakini, hīkenakotanoko. Teoso iaxitiki oerekaua aātokirini Apraōnimoni. Mesopotámia tixini auakasaaki, Araā tixini auini apisapanika, Teoso motika iuamoni. ³ Iuasaaki Teoso txari iua: “Pitakanapariko pitixine, pinirimane pakini. Āti tixinimoni pisako. Noerekinimoni pisako,” itxa Teoso. ⁴ Ininiã sipe itxa Apraō. Itakanapari Kaotéia inakori tixini. Araā tixinimoni iua sipe. Araā auakasaaki irini ipipe. Irini ipinaka atoko, Teoso mīpiri iua uaimoni uatxa aāuiniātaā. ⁵ Apraō auakasaaki, Teoso !isikari uai tōpa iuamoni iua nakiti inini íkapani. Kona ipixini metro isika iuamoni inakiti inini íkapani. Isikaenetari uai tōpa iua, imekaniriakori pakinimoni. Txamari !keeneri iua iuasaaki. ⁶ Teoso txari Apraōmomi: “Pamariteni, pimekaniriakori, papika mekaniriakori auako āti kākiti tixine. Iuaārao imisiritapeēkanako koatrosētosí anokanani. Iparíkauatana apanakini íkapani maxikatíika. Ininiã iteene imisiritiko aua.”

⁷ –“Ininiākara nimisiritariko ninoa misiritakani. Eereka Apraō apika mekaniriakori takanapariko iuaā, uaimoni kanapiriā itxanako. Ininiã íkorapokoriti ninoa paríkauatoko nota íkapani,” itxa Teoso. ⁸ Ininiã Teoso txari: “Híte kitsotakariko ikini hamariteni tsiki mata. Ikara nitakaōtxikare hātamatakasaaki, hīxinikariko nisikaenetakiti,” itxa Teoso. Eereka Apraō ākiri aua, Isaki inakori. Oito ōtipeka auini ōti inakasaaki, Apraō kitsotakarí itsiki mata. Isaki aneēkasaaki, imi Xakoo inakori aua. Eereka Xakoo anaakori auapeka tosi pakini. Ikara tosi imiakori aātokiriakorini iriakori itxauana.

Xosee Pirena

⁹ –Xakoo anaakori xikotari itarina Xosee inakori. Ininiã itariakori vētxitari iua Exito sikanimoni. Iuaritika Teoso auapika iuakata. ¹⁰ Imisiritiko auakasaaki, Teoso moianatari iua imapinakani íkapani. Iuasaaki Exito auakani auíte Paraoo inakori. Teoso sikaimaroretari Xosee, ininiã Paraoo

potxitari iua, ininiã Paraoo txari iua: “Exito auakani auíte pitxauako. Naapoko auakani piníkata apaka,” itxa Paraoo Xoseemoni.

11 –Eereka makienanitxi aua Exito tixiniã, Kanaaã tixiniã apaka, ininiã ikinimane natxita. Aãtokiriakorini apaka !auari nipokori. !Apokari nipokori.

12 Ininiã Xakoo kenakoenetari triko auini Exito tixini. Ininiã ipaniãtana tesi imiakori Exito tixinimoni isinina. Mitxi lisana Exitomoni.

13 –Ininiã iuaĩkana ãti õti isana Exitomoni, kienatxi iamotinina ĩkapani. Iuasaaki Xosee oerekaua ninoamoni. Iuasaaki Paraoo imarotari Xosee nirimane. 14 Ininiã Xosee pĩkapiretari iri Xakoo, itariakorikata, inirimanekata. Setẽta sĩko pakini kãkiti sari Exito tixinimoni, kotxi aua ĩkinipoko nipokori iuaã.

15 –Ininiã Xakoo apanakinikata sari Exitomoni. Iuaã mapakanani atoko Xakooni ipĩpe. Eereka aãtokiriakorini ipina iuaãtaã apaka. 16 Ninoa ipĩkasaakina, iĩtona anikapeẽka Sikeẽ tixinimoni. Iuaãkiri akauaritiã ikata inapeẽkana. Apraãoni auapanika inakasaaki, iamotari iua akauari Emoo ãkiriakorimoni.

Moisesi Pirena

17 –Itixi Teoso sikaenetakiti Apraãomoni kaiamapeka Xoteoakorimoni inakasaaki, kãkiti Isaeokini kaiãopokoikana Exito tixiniã. 18 Itokanani napaka atoko, ãti Exito auakani auíte Xoseeni mimarotakati aua. 19 Iua auĩtetxi misiritari anirimanekorini. Ininiã sotatoakori mixirika itxapena amarini xapitiri. Eereka oka itxapena.

20 –Iuasaakikara Moisesi iponaniã. Moisesi amarinipanika inakasaakiaua peerepatikiri. Ipi, ãti pakini kasiriti iri, inoro pakini nĩkatari iua ninoa aapoko. 21 Eereka ninoa takanapari iua Paraoo ãkero kipaãtiniãtaãua takote. Ininiã oa apokari iua amarini. Oanikari oaãpokomoni. 22 Exito auakani imarore ĩkinipoko oerekaãka iuamoni. Kasãkiri iua. Kakamareri iua.

23 –Koarẽta anokanani inakasaaki, inirekari inirimane Isaeokini aõkitini. 24 Inirimanemoni isikasaaki, itikari Exito auakari xirokitatiniri kiki Isaeokiri, ininiã ixikatxitari. Iua aritapiri Exito auakari, oka itxapiri iuani. 25 Iuasaaki Moisesi uãkatari inirimane Isaeokini imarotiniri Teoso nirekari Moisesi makatxakinina ninoa, Exito auakani mamisiritakanina ĩkapani. Txamari ninoa !imarotari ikara. 26 Apikomoni ãti õti, iua sari inirimanemoni. Iuaã iua apokana ninoa neenamuanãtini, inaiapoatakakauana. Ininiã Moisesi õtãkikana ninoa. Itxana: “Kikiakori hĩtaritakakaua. Kĩnirepa himisiritakakaua?”

27 –Inirimane misiritakari katika txari Moisesi: “Kipa txai pite ate auíte pininiua? Kipa txai pite ate õtãkikakari pininiua?” 28 Kita Exitokirini pokini atokokana pokatanoko nota?” itxa. 29 Ikara sãkiretxiti ikenakotakasaaki, Moisesi takanapari Exito tixini. Mitxiaã tixinimoni isa. Iuaã ĩtanorouata. Ipi imiakori aua iuamoni.

30 –Koarẽta anokanani ãparaã makipakaniãtaã iua aua iuasaaki. Teoso nitiri iaxitikiri motika Moisesimoni ixirata Sinai inakoriãtaã. Iuasaaki iua amatari aanaia tirinini, txama !arika. !Ixipoka. 31 Ikara itikasaaki, Moisesi tsorĩkaãta, ininiã aanaia takote isa iteene atamatini ĩkapani. Iuasaakipeka ikenakotari Apiananiri sãkirauatini: 32 “Pikiomaneakori Teosonekarano nota. Apraão, Isaki, Xakoo pakini Teosonekarano nota,” itxa Teoso. Iuasaaki Moisesi kikananaka ipĩkare xika. Ipĩkari Teoso sãkirauatini manapi atamatini.

33 –Ininiã Apiananiri txari iua: “Pikitimata pimakatxaka, kotxi uai piti-miniãtaã nota auanãta. 34 Nitikana ninakitiakori Exito tixiniã. Exito auakani misiritapena ninoani. Nikenakotari oõkinina. Nota inari nisikakinina

Īkapani. Ininiãkarako Exito tixinimoni niokanatai pite,” Apiananiri txari Moisesi.

³⁵—Iua Moisesi Isaeokini manirekakiniti, kotxi ninoa txari: “Kipa txai pite ate auĭte pininiua? Kipa txai pite ate otãkikakari pininiua?” itxarina. Iuakara Teoso iokanatakiti ninoamoni ninoa auĭte ininiua Īkapani, ninoa imakataxakini Īkapani, kotxi Teoso nitiri aanaiaã tirinakariã auakari iokanatai iua ninoamoni.

³⁶—Ereka iua makatxakana ninoa Exito tixini. Oerekari Teoso posotiire kãkiti maposotakiniti Exito tixiniã. Oerekari Teoso posotiire potxoari uiniti, Põkamarari inakoriã. Āparaã makipakaniãtaã apaka oerekari Teoso posotiire koarẽta anokanani iuaãtaã.

³⁷—Ia Moisesikara sãpiretana Isaeokini: “Teoso iokanatariko isãkire sãpiretakari hĭtemoni nota iokanatini atokokana. Hĭte nirimanekara iua. Hĭkenakotariko iua sãkire,” itxa Moisesi. ³⁸ Moisesi aua Teoso nakitiakorikata āparaã makipakaniãtaã. Aãtokiriakorini aua iuakata. Apaka Teoso nitiri iaxitikiri aua iuakata. Iua Teoso nitiri misãkiretari Moisesi ixirata Sinai inakoriãtaã auakasaaki. Iua apakapari Teoso sãkire, atemoni isikini Īkapani. Iua Teoso sãkire txĭkitakari iua sãkire auĩãkani ātipirika auni Teosokata.

³⁹—Aãtokiriakorini kona nirekari inĩkaenetinirina Moisesi sãkire. !Nirekarina iua. Inirekarina Exitomoni ikanapiriinina. ⁴⁰ Iuasaaki ninoa paniãtari Arão: “Teosoakori kamakoni pikaminaua, ate mĩkiikakani tĩkane. Īkora Moisesi Exito tixini amakataxakakiri, ĩtapari iua? !Aimarotari iua auiniãtaã,” itxarina Arãomoni. ⁴¹ Ininiã ninoa kamari kema auĭte ãkiri atoko inakari oro kamakori iteasonetinina Īkapani. Ereka okarina soti auĭte teoso ikamakitina isikinina Īkapani. Kiiniri ikamana. Ipoxokoniuatana, kotxi ninoaka kamari iteasonena. ⁴² Txamari Teoso atão inakari takanapana ninoa. Ininiã iteasonetarina iaxiti auakani iõriki, kasiri, atokatxi pakini. Teoso sãkire sãpiretakari kitxakapiriãka iõkatsopatarini ia sãkiretxiti:

Hĭte Isaeokini, koarẽta anokanani āparaã makipakaniãtaã hãuakasaaki, ! hõkari pirãtxi nota Īkapani.

⁴³ Iuasaaki hĭte anikari papiri aamata kamakori hĭteosone Moroki inakori Īkapani. Apaka iõriki atoko inakari hĭteosone Hẽpaã inakori hĩkamakiti hanika hĭtekata iuasaaki. Hĭte kamari Moroki, Hẽpaã pakini hĭteosonetini Īkapani. Ikara xika nota iokanataiko hĭte āti kãkiti tixinemoni. Papirõnia sitatxiti apikoxiti niokanatai hĭte.

Teoso Papire Pirena

⁴⁴—Aãtokiriakorini auari papiri aamata kamakori Teoso misãkiretiko papire āparaã makipakaniãtaã auakasaakina. Moisesi kamari iua papiri Teoso paniãtakiti iaõka, kotxi Teoso oerekari Moisesi iua papiri kamiko. ⁴⁵ Moisesi ĩpinaka atoko apanakini aãtokiriakorini apakapari iua papiri irina sikakĩi. Ininiã iuasaaki ninoa anikari iua papiri, Xosoeekata isikasaakina, āti uãka tixine imixirikasaakina, kotxi Teoso omitikana ninoa āti uãka, aãtokiriakorini apokasaaki iuaã. Iua papiri kaikota iuaã. Auapanika iuaã Tavii aãtokiriakorini auĭte inakasaakia. ⁴⁶ Teoso apokaerekatarini Tavii, ininiã Tavii nirekari Xakoo Teosone misãkiretiko aikoti ikamini. ⁴⁷ Txama Teoso ! auiritari Tavii kaminiri. Ininiã Saromão, iua ãkiri kamari Teoso misãkiretiko aikoti.

⁴⁸—Teoso Apiananiri kona aua aapokotxi kãkiti kamakiti ãki, kotxi Teoso sãkire sãpiretakari kitxakapiriãka txari:

⁴⁹ Apiananiri txari: “Niitopãkiniãtaã iaxiti itxa. Itixi nikiti nitakiniãtaã. Ininiã kanatokopa itxa aapokotxi hĩkamini nota Īkapani? Namonipa nauiniãtaã?

⁵⁰ Kotxi notakara kamari ikinipoko,” itxa.

Erekari Matamatakoti Manirekakani

⁵¹ Estevão sákirauatapanika:

—Híte kona kinirão kenakotaka txari Teoso sãkire. Hítsiki mata kisauakaãkapitika, txamari kona hikenakotari Teoso sãkire hãkixinireë. Átipirika kona hinirekari Erekari Matamatakoti paniãtakiti hãkamini. Hãtokiriakorini kitxakapirika atoktxikana híte. ⁵² Hãtokiriakorini misiritana ikinimane Teoso sãkire sãpiretakani. Ninoa okana iua sãkire sãpiretakani, Erekarinoka Kamakari sãpiretakani. Ninoa Teoso sãkire sãpiretakani sãpiretari Erekarinoka Kamakari äti öti uai apokini. İkorasaaki hıtera mıkapiritari iua. Hıtera okari iua Erekarinoka Kamakari. ⁵³ Hıtekara apakapapekari Teoso sãkire Teoso nitiriakori mıkiti. Iuaritika !hıkamari ipaniãtakiti —itxa Estevão.

Estevão Kiporonakiko

⁵⁴ Xoteoakori kenakotakasaakiri Estevão sãkire, omanãkarauatana. Akatsakatsiriãtuana omanãkarena xika. ⁵⁵ Iuaritika Erekari Matamatakoti iteene sikataparaxiniretari Estevão. Iuasaaki iua ionakaãta iaxiti. Atamatari Teoso iotximere. Atamatari Xesosi timini Teoso kikomoni. ⁵⁶ Ininiã itxa:

—Hãtamata. Natamatari iaxiti xorekini. Aıtari iaxitikiri tima Teoso kikomoni —itxa Estevão.

⁵⁷ Iuasaaki Xoteoakori totari ikenakokina iuakoãna. Iteene ninoa akiripoakata. Eereka ninoa ikinika miteka iuamoni. ⁵⁸ Imaıkarina. İkosekaãpotarina sitatxi mapotökire. Iuaãtaã ipotorikana ikiporonakinirina iua kai soroã. Iuasaaki itikarauatakani takari imãkana Saoro inakori kiti takete inıkatini ikapani. ⁵⁹ İkiporonakasaakirina, Estevão akiritari Teoso. İtxari:

—Apiananiri Xesosi, papakapariko nixinire.

⁶⁰ Iuasaaki ikapotoreëkaua. İt aparasãkireritika akiritari Teoso:

—Apiananiri, pimaxinıkaretariko ia maerekati ninoa kamakiti —itxa. Iuasaakipeka ipıpe.

8

Xesosi Sãkire Auiãkani Misiritiko

¹ Estevão ipıksaaki Saoro aua iuaã.

—Ari erekapitkari ipinini —itxa Saoro.

Estevãoni ipinini ötısaakipeka ipotorika Xesosi sãkire auiãkani misiritiko Xerosareë. Ninoa iteene misiritaãka, ininiã ikinimane Xesosi sãkire auiãkani Xerosareë auakani iarika itxapena. Xotéia töpamoni, Samaria töpamoni pakini iarikana. Xesosi iokanatakininoka kaikota Xerosareë. ² Estevão ipinaka atoko kikiakori Teoso sãkire auiãkani katari iuani. Iteene itxiapatana. ³ Iuasaaki Saoro potorika ixipokinina Xesosi sãkire auiãkani. Ninoa aapokomoni isaãpota. Kikiãkini, sitoakoro apaka ikosekaıtota, taka itxana kateia äki.

Piripi Samariamoni Sini

⁴ Teoso sãkire auiãkani iarikasaaki, isãpiretarina Teoso sãkire ikini aapokotxiã. ⁵ Piripi sari Samaria sitatxitimoni. Iuaã iua sãpiretari kãkiti Xesosi Teoso mereëkiti ininiua. ⁶ Isãkire ikenakotakasaakina, posotiretxi ikamakiti itikasaakina, iteene ikenakotarina isãkire. İmixinıkarina isãpiretakiti. ⁷ Maerekani matamatakoni kãkiti auafıtotakini takanapari kãkiti. Akiripoakatana ipokıksaakina. Kaiãopokori matıpokotakani apaka makananiãta. ⁸ Ininiã Samaria auakani iteene poxokoniuata.

Miiti Simão Inakori

⁹ Iuasaaki Samaria sitatxitiã aua kiki Simão inakori. Miiti itxaua iua. Imisirienetana kãkiti Samaria auakani. Ininiã ikinimane tsorikaãta, ikamakiti atamatakasaaki. Iua iuikaua.

—Kimaroreno nota —itxa.

¹⁰ Ininiã ikinimane kïpitari iua sãkire. Auïtetxiakori, poiãorini pakini kïpitari isãkire. Ininiã itxana:

—Iua Simão auari Teoso posotiire. Kaposotiireri iua —itxana.

¹¹ Ininiã ikïpitarina isãkire, kotxi itokatapeka itikarina ikamakiti kãkiti mimarotakiniti. ¹² Ninoa auikasaakiri Piripi sãpiretakiti erekari pirenã, Teoso auïtetxi ininiãua pirenã, Xesosi Kristo posotiire pirenã pakini, kikiakori, sitoakoro apaka patxisataãka. ¹³ Iuasaaki Simão apaka auikari. Ipatxisataãka. Ininiã isari Piripi sinimoni, kotxi itsorikaãta, posotiiretxi kãkiti mimarotakiniti itikasaaki.

¹⁴ Xesosi iokanatakini Xerosareë auakani kenakopiretari Samaria auakani auikiniri Teoso sãkire. Ininiã ninoa iokanatarì Petro, Xoão pakini Samariamoni. ¹⁵ Iuaã apokasaakina, imisãkiretarina Teoso, Erekari Matamatakoti isãkire auiaãkani apakapini Ìkapani. ¹⁶ Erekari Matamatakoti kona apokapanika ninoamoni iuasaaki. Apiananiri Xesosi uãkaãnanira ipatxisataãkana. ¹⁷ Ininiã Petro, Xoão pakini takari iuakona ninoa nopini. Iuasaakipeka apakaparina Erekari Matamatakoti.

¹⁸ Simão itikasaakiri Erekari Matamatakoti apokini kãkitimoni, kinirão sikaka itxaro txineiro Petro, Xoão pakinimoni. ¹⁹ Ininiã itxa:

—Ìkora hïposotiire hïsikano, niuako kãkiti nopini nitakasaaki, Erekari Matamatakoti ninoamoni apokini Ìkapani —itxa.

²⁰ Txamari Petro txari:

—Pite, pitxineirotekata samakauako, kotxi pite uãkatari pitxineirote iamotiniri Teoso posotiire. ²¹ Kona xapiti pitemoni auapani ia parìkatxi, kotxi pãkixinire na atão Teoso apisatoõ. ²² Ininiã pitakanapariko ikara pimaerekani. Pamanaãri Apiananiri pimaerekani imaktxãkini Ìkapani. Atxiiti iua maxinikaretari pixinikakiti pãkixinireë. ²³ Nota imarotai pite. Pãkixinireë xãpoãkata maerekatinoka. Pimaerekani maïkai. !Auiritai pisini pinirekinimoni —itxa Petro.

²⁴ Ininiã Simão apakapapiretari:

—Pimisãkiretariko Teoso nota Ìkapani. Ikara atoko pisãpiretakiti na ninireka —itxa Simão.

²⁵ Petro, Xoão pakini sãpiretari Xesosi kamakiti ninoa Ìkapani. Isãpiretarina Apiananiri sãkire. Eereka ikanapiriãna Xerosareëmoni. Ikanapiriãpotakasaakina, isãpiretarina Teoso iokanapirena erekari kaiãopokori aapokotxi auakanimoni Samaria tãpa.

Piripi Etxiõpiakirikata

²⁶ Eereka Apiananiri nitiri iaxitikiri misãkiretari Piripi:

—Piamatako. Atokatxi pokikinimoni pikikomoni pisako. Pisa kimaporimoni, ãparaã makipakaniãtaã. Iua kimapori Xerosareë Kasa tixinimoni sikari.

²⁷ Ininiã aiamata, sipe itxari. Ipixinipokoriti aõkitari Etxiõpia tixinikiri. Etxiõpia auakani auïte õtãkikakari itxaua. Paimatireri iua. Ikinimane kamari iua paniãtakiti. Etxiõpia auakani auïte sito Kãtasi inakoro. Kaiãopokoro otxineirote, otiï pakini. Iua kiki parika ikinipoko oa nakiti inikata oa Ìkapani. Mïtxi iua sari Xerosareëmoni Teoso imisãkiretini Ìkapani. ²⁸ Ikanapiriãkasaaki,

mitekaĩ áki iitopākasaaki, atatsopatari Isaía iōkatsopatakiti. Isaía Teoso sākire sãpiretakari kitxakapirĩka. ²⁹ Iuasaaki Erekarĩ Matamatakoti txari Piripi:

—Pisa okira mitekaĩmoni. Pikaikota oa takote.

³⁰ Ininiã Piripi miteka iuamoni. Ikenakotakasaakiri Isaía iōkatsopatakiti atatsopatinĩ, Piripi pimaãri:

—Pimarotatari ere patatsopatakiti? —itxari.

³¹ Ininiã iua:

—Natokopa ininiãpa nimarotari? Kipa oerekano? —itxari.

Ininiã aiatari Piripi mitekaĩ áki iuakata iitopākini ĩkapani. ³² Iua iōkatsopatari ia Teoso sākire:

Soti auĩte okikomoni anikiko atoko itxa iua. Soti auĩte ákiri piti kisauakikosaaki, !kasãkireri iua. Iua soti auĩte ákiri atoko itxa iua, kotxi iua apaka !kasãkireri.

³³ Inapetaãka iua. !Atãoni kãkiti kama iuamoni. Okaãkape. !Auari iua ákiri.

Ikara atoko itxa Teoso sākire, Isaía iōkatsopatakiti.

³⁴ Ininiã iua Etxiõpiakiri pimaãri Piripi:

—Pisãpiretano, natokopa itxa Teoso sākire sãpiretakari sākire? Kipa soti auĩte atoko inakari? Kipa okaãka? Iuakani? Átikani?

³⁵ Ininiã Piripi oerekari ikara Teoso sākire iōkatsopatakori.

—Xesosira ikara atoko inaãka —itxa.

Ininiã apikomoni isãpiretari Teoso iokanapirena erekari, Xesosi pirena.

³⁶ Isaãpotakasaakina, apokana ãparaã auiniãtaã. Ininiã iua kiki txari:

—Uai aua ãparaã. Apakata nipatxisatiko?

³⁷ Ininiã Piripi txari iua:

—Apakatapifika pipatxisatiko iteene pauikiniãri Xesosi sākire pãkixinireẽ.

Ininiã iua apakapipireta:

—Nota auikapitĩkari Xesosi Teoso mereẽkiti, Teoso ákiri ininiãua.

³⁸ Ininiã iua Etxiõpiakiri paniãtari mitekaĩ anikakari iotokini. Iuasaaki Piripi, iua Etxiõpiakiri apaka katxaka, imaãta itxana. Ininiã Piripi patxisatari iua kiki.

³⁹ Ikanĩkiĩtakasaakina, Erekarĩ Matamatakoti anikari Piripi. Ininiã iua kiki kona atamataikari Piripi. Ininiã iãpotapitipo. Ipoxononoka itxa. ⁴⁰ Iuasaaki Asoto sitatxitipeka itokiã Piripi. Isaãpotakasaaki, ikinika aapokotxitĩã isãpiretari Teoso sākire. Teoso sākire isãpiretiniritika Sesaréia sitatxitimoni apokako.

9

Saoro Auikiniri Xesosi Sākire

(*Átosi 22.6-16; 26.12-18*)

¹ Iuasaaki Saoro okaenatapikana Apiananiri sākire auiãkani. Ininiã iua sari sasetotxi auĩte apiatakaroni. ² Amanaãri aãtsopa Saoro parĩka sãpiretiko aãtsopati. Iua nĩrekari sasetotxi auĩte iōkatsopatiniri ikara, Saoro anikini ĩkapani. Inirekari isikiniri iua aãtsopa ikinika aiko Xoteo apotiĩtiniãtaãua nĩkatakanimoni Tamásiko sitatxititi, kotxi Saoro nĩrekari imaĩkinina Xesosi sākire auiãkani, kikiakori, sitoakoro pakini, Tamásiko sitatxitĩã apokakini. Inirekari anikinina Xerosareẽmoni.

³ Iua apokaãpotakasaaki Tamásiko sitatxitimoni, katimaritika iotximeretxi iaxitikiri ákitari. ⁴ Irika xitipe. Ininiã ikenakotari sãkiretxi:

—Saoro, Saoro, kinirepa pimisiritano? —itxa ikenakotakiti.

⁵ Ininiã iua:

—Kiriparai Apiananiri?

Ininiã:

–Xesosira nota. Pimisiritakitikarano –itxa Xesosi.

⁶ Ikikinanaka, iteene ipīkarauatiniā.

–Apiananiri, kipa pinireka nikaminii? –itxa.

Ininiā Apiananiri:

–Pōkitikaua, sitatxi pisa. Iuaā āti sāpiretai pikamakiti tīkane –itxa Xesosi.

⁷ Imoianariakori iotoka. Ipīkarauatana. Masākireninoka itxana. Ninoa kenakotari iaxitikiri sākire, txamari !atamatarina.

⁸ Eereka Saoro ōkitikaua, xorekaāta itxa, txamari imosiāretapeka iua. Ininiā imoianariakori anikari iua. Ikanōpiāpotarina Tamásikomoni. ⁹ Ipi, āti pakini ōti mōsiāretika itxa. Iuasaaki !inipokota. !Iāta.

Ananíasi Makananitiniri Saoro

¹⁰ Tamásiko sitatxiti aua kiki Xesosi sākire auīākari, Ananíasi inakori. Iuasaaki Teoso sākirauata Ananíasikata itaponemoni. Itaponeē Apiananiri akiritari iua:

–Ereēkai Ananíasi –itxa.

Ininiā:

–Uaikarano nota, Apiananiri –itxari Teoso.

¹¹ Apiananiri txari:

–Paīamatako. Kimapori Eretīka āpori kimaporitimoni pisako. Xotasi aapokomoni pisa. Iuaā pinitari Taaso sitatxitikiri Saoro inakori. Uatxiikara isākirauanāta notakata. ¹² Saoro taponetai pite. Iua atamatai pite apokini iuamoni, piuako inopini pitakini ikapani iuaīkana kōsiārepeka inini ikapani –itxa Teoso.

¹³ Ininiā Ananíasi:

–Apiananiri, kākitipokoni sāpiretano ikara kiki pirena. Pamonōkoniri iua. Imisiritapekana pite nakitiakori Xerosareē sitatxiti auakani.

¹⁴ Sasetotxiakori auīte paniātari iua imaīkinina piuāka akiritakani uai Tamásiko sitatxiti auakani –itxa Ananíasi.

¹⁵ Ininiā Apiananiri txari:

–Pisako iuamoni. Nota mereēpekari iua kiki, nota parīka ikamini ikapani. Iua sāpiretariko nota sākire Xoteo minakonimoni, auītetxiakorimoni, Isaeo tixini auakanimoni pakini. ¹⁶ Noerekariko Saoro iteene atatsiirauatini nota sākire auikini xika –itxa Teoso.

¹⁷ Ininiā Ananíasi sari Xotasi aapokomoni. Iīroā. Eereka iuako itaka Saoro nopini.

–Nitari Saoro, Apiananiri Xesosi, paōkitakitira kimaporiā, iuara iokanatanota pitemoni kōsiārepeka iuaīkana pinini ikapani. Iokanatanota pitemoni Erekarī Matamatakoti papakapini ikapani –itxa.

¹⁸ Iuasaakipeka oki nopini auakari katxaka. Ximaki tāta atoko itxa. Kōsiārepeka itxa. Eereka ōkitikaua. Iuasaaki ipatxisataāka. ¹⁹ Inipokotaka atoko, itapara auapeka.

Saoro Tamásiko Sitatxiti Auakasaaki

Saoro kaikota Tamásiko mapaōti Xesosi sākire auīākanikata. ²⁰ Iua sari aiko Xoteo apotiitiniātaūa. Iuaā oerekarauata. Oerekarī Xesosi Teoso ākiri ininiāua. ²¹ Isākire kenakotakani tsorīkaāta.

–Iua Saoro okana Xesosi uāka akiritakani Xerosareē auakani. Iua ina uaimoni Xesosi uāka akiritakani imaīkini ikapani, sasetotxi auīteakorimoni anikinina ikapani –itxana.

²² Saoro oerekarauatakasaaki, imaroāpotari Teoso imarore. Teoso sika-posottiireāpotari iua. Ininiā iteene imarotari Teoso sākire, apanakini oerekini ikapani. Iua atoko ininiā, itaparaxinireritika oerekarī Xoteoakori Tamásiko

sitatxiti auakani Xesosi Teoso Mereëkiti ininiãua. Ininiã ninoa !imarotari apakapapiretinirina iua.

²³ Mapaõti atoko Xoteoakori sãkirauatakaka Saoro okinina Ikapani. ²⁴ Saoro sãpiretaãka Xoteo aiamatapeka okinirina iua. Ninoa iãtapapikari sitatxi Ìronakikoãtaã okinirina tũkane. Ìkanõka, pokamara iãtaparina iua.

²⁵ Tuasaaki Ìkanõka Xesosi sãkire auiaãkani anikari iua sitatxi pirikeremoni. Iuaã Saoro ieretakaua kotari åki. Pirikeri sonaã iokatzakarina Saoro kotari åki sitatxi mapara. Iposo atoko imiteka Xerosareõmoni.

Saoro Xerosareë Apokini

²⁶ Saoro apokasaaki Xerosareë, inirekari Xesosi moianariakori imoianatini. Txama Ìkinikana pĩkari iua. Kona !auiritarina iua moianatinina ninoa, kotxi !auikarina iua atão auikiniri Xesosi sãkire. ²⁷ Iuaritika Panapee anikari iua Xesosi iokanatakimoni. Isãpiretana ninoa:

—Kimaporiã isikasaaki, Saoro aõkitari Apiananiri. Apiananiri misãkiretari iua. Tamásiko sitatxiti auakasaaki, itaparaxinireritika isãpiretari Xesosi sãkire kãkitimoni —itxa Panapee.

²⁸ Panapee sãkire ikenakotakasaakina, auikarina Saoro sãpiretakiti. Ininiã Saoro kaikota Xerosareë Xesosi sãkire auiaãkanikata. Inirekinimoni isa Xerosareë. Isinimoni itaparaxinireritika isãpiretari Apiananiri Xesosi sãkire.

²⁹ Isãkirauata Xoteoakorikata, Kreko sãkire imarotakanikata. Inirekarina ninoa imarotiniiri Xesosi sãkire. Txamari inirekarina okinirina iua. ³⁰ Tuasaaki Xesosi sãkire auiaãkani imaropiretari ninoa okaenetiniri Saoro, ininiã anikarina sitatxi Sesaréia inakorimoni. Eereka iokanatarina iua Taaso inakori sitatxitimoni.

³¹ Tuasaaki Xesosi sãkire auiaãkani !imisiritaãkaika. Xotéia tõpa, Kariréia tõpa, Samaria tõpa pakini !auaika Xesosi sãkire auiaãkani misiritiko iuasaaki. Erekar Matamatakoti sikataparaxiniretana ninoa. Kãkiti itoãpotari auikiniri Xesosi sãkire. !Ikamarina maerekati, kotxi iteene ipĩkarina Apiananiri.

Enéias, Tókasi Pakini

³² Petro ìanaxititakasaaki, iua sari Teoso sãkire auiaãkanimoni Arita sitatxiti auakanimoni. ³³ Iuaã aõkitari kiki Enéias inakori. Iua matĩpokotakati itxaua. Oito anokananipeka !õkitikaua. ³⁴ Petro txari iua:

—Enéias, Xesosi Kristo makananitai. Põkitikaua. Piapirikari pisirimata —itxari matĩpokotakati.

Iuasaakipeka õkitikaua. ³⁵ Ìkinipoko Arita sitatxiti auakani, Sarõ sitatxiti auakani pakini atamatari iua Enéias, ininiã itakanaparina imaerekanina. Inĩkapiretarina Apiananiri sãkire.

³⁶ Åti sitatxiti Xopi inakoriã oãua sito Teoso sãkire auiaãkaro, Tapita inakoro. Kreko sãkireë ouãka Tókasi otxaua. Oa kamapikari erekari. Omoianatana matxineiroteni.

³⁷ Arita auakani auikasaakiri Apiananiri sãkire, oa Tókasi amianata. Eereka oani opĩpe. Opĩpeka atoko, arokaĩtotarona, taka itxarina oĩto ìtanokiri kooã. ³⁸ Xopi sitatxiti Arita sitatxiti takote, ininiã Xesosi sãkire auiaãkani Xopi sitatxiti auakani kenakoenetari Petro Arita sitatxiti auiniã, iokanatana ipi kiki Petromoni, apinirina ikapani. Iokanapiretana:

—Pinapokako uai. Katima pitxako —itxana.

³⁹ Ininiã Petro aiamata. Ninoakata isa. Iua apokasaaki, anikarina ìtanokiri kooã. Ìkinipoko tikinitakoni txiapanãta Petro takote. Ninoa oerekari Petro mãkatxi Tókasinĩ kamakiti ninoa ikapani oãuakasaaki. ⁴⁰ Ininiã Petro iokanatana ninoa mapara. Eereka ikapotoreëkãua. Isãkirauata Teosokata. Eereka oamoni ikirioka. Itxaro:

—Tapita pōkitikaua.

Iuasaakipeka xorekaāta otxa. Oātamatakasaakiri Petro, oitopāka. ⁴¹ Ininiā imaikaro ouako oōkitikinua ikapani. Eereka iua akiritana Xesosi sākire auāikani, tikinitakoni pakini, oa auāki onini oerekini ikapani.

⁴² Ikini Xopi auakani imaropiretari Tókasi iuaikana auāki onini, ininiāra itomaneri kākiti auikari Apiananiri sākire. ⁴³ Petro kaikota iuaā Xopi sitatxiti mapaōti. Iua kaikota Simão inakorikata. Iua Simão aamata kamakari.

10

Konério Tapone Pirena

¹ Iuasaaki Sesaréia sitatxiti aua kiki Konério inakori. Āti uāka iua. Homano itxaua. Seī pakini sotato auite iua. Kākiti akiritana ninoa sotatoakori Itáriakini. ² Iua Konério kamari Teoso sākire iaōka. Iua, ikinipoko aapoko auakanikata paxitari Teoso. Imisākiretapikari Teoso. Isikana matiitimoni inirekakitina. ³ Āti ōti kikatapeka inakasaaki itaponeuata. Itaponeē itikari Teoso nitiri apokini iuamoni. Itxari:

—Konério —itxa.

⁴ Teoso nitiri atamatakasaaki, ipīkarauata.

—Apiananiri, kipa pinireka? —itxa Konério.

Ininiā Teoso nitiri txari:

—Teoso kenakatapekari pisākire iuamoni. Itikapekari pisikarauatini matiinimoni. Teoso xinikapitikai. ⁵ Ininiākara ātikaka kikiakori piokanata Xopimoni Simão Petro uaimoni imininina ikapani. ⁶ Iua kaikota āti Simōokata, aamata kamakarikata. Iua aapoko potxoari uiniti takote aua. Iua Simão Petro sāpiretaiko pikamakiti tīkane —itxa Teoso nitiri.

⁷ Eereka iua Teoso nitiri sipe. Iposo atoko Konério akiritana ipi initiriakori, ātika isotatone pakini. Iua sotato kamari Teoso sākire iaōka. Iua auapika Konériokata, inireēkiti ikamini tīkane. ⁸ Ininiā Konério sāpiretana ninoa ikinipoko Teoso nitiri sāpiretakiti. Iposo atoko iokanatanana Xopimoni.

Petro Tapone Pirena

⁹ Katimatīnikata Konério iokanatakini potorika. Apaniāxiti inakasaaki ninoa apokaāpota sitatxi Petro auiniātaā. Iuasaaki Petro kanikauata aapokotxi nopini Teoso imisākiretini ikapani.

¹⁰ Iuasaaki Petro natxita. Inirekari inipokotini. Nipokori kamikosaaki, itaponeuata. ¹¹ Itaponeē atamatari iaxiti xorekini. Aamata mitamatari katxakaāpota iuamoni. Imapotomatare ipi ipi pakini iaxirikaāka. Iua aamata katxaka xitimoni. ¹² Iua aamata āki aua ikini sereti kaxipirini. Aua pirātxi. Aua itopa auakani. Aua imini. Aua araākani. ¹³ Ininiā Petro kenakotari itanokiri sākirauatini:

—Petro, pōkitikaua. Pokari ia, pinikini ikapani —itxari Petro.

¹⁴ Petro Xoteo itxaua, ininiā kona ikinika linika. Ininiā Petro txari:

—Konapitini Apiananiri. Kona ninikari ikinipoko naia kaxipirini. Manaiatini. Pamininiri —itxa.

¹⁵ Iuaikana itanokiri sākirauata:

—Nota oeretakiti kona kamininiri kona pitxape —itxa.

¹⁶ Ipi, āti pakinikata iua aamata katxaka ikara atoko. Iposo atoko ikanīkaxitita Teoso tixinemoni.

¹⁷ Ininiā Petro ākixinireē ixinikaxitita:

—Kanatokopa itxa ikara nitapone?

Iuasaakipeka Konério iokanatakini apokapekari Simão aapoko. Apokana Simão aapoko toremoni. ¹⁸ Akiritana:

—Ereëkai. Simão Petro uai aua atxĩiti? —itxana.

¹⁹ Iuasaaki Petro xinikapanikari itapone. Erekarari Matamatakoti txari:

—Ikiraākara ipi, āti pakini kākiti nitanātai. ²⁰ Pōkitikaua. Pikatxaka xitimoni. Pisa ninoakata, kotxi niokanatanana ninoa uaimoni —itxa Erekarari Matamatakoti.

²¹ Ininiā Petro sari Konério iokanatakinimoni:

—Notakara hĩte nitanāta. Kipa ikai hĩte?

²² Ninoa apakapapiretari iua:

—Konério, aāũite iokanataua ate. Erekarari iua. Ikamari Teoso sākire iaōka. Ikinipoko Xoteo apokaerekatarari iua. Teoso nitiri iaxitikiiri paniātari iua pite akiritini, pisākire ikenakotini ikapani —itxana.

²³ Ininiā Petro:

—Hiĩroā. Uai himaka —itxa.

Konério Aapoko Auakasaakina

Katimatiniĩkata Petro sari ninoakata. Apanakini Xesosi sākire auĩākani Xopikini sari apaka. ²⁴ Katimatiniĩkata apokana Sesaréia sitatxiti, Konério auĩniātaā. Iua Konério apotiitapekana inirimane, aōkimanere pakini Petro iātapinina ikapani. ²⁵ Petro iroākasaaki Konério aapoko, iua aōkitari Konério. Iuasaaki Konério kapotoreēkaua Petro apisatoō. ²⁶ Txamari Petro txari iua:

—Pōkitikaua. Kiki pite atoko inakarikarano nota.

²⁷ Isākirauatakasaakina, Petro iroā. Aōkitari ito kākiti apotiitakaniua. ²⁸ Ininiā itxana:

—Hĩte imarotari ate kiomaneakorini !auiritari Xoteo moianatiniri āti uāka. !Auiritaāka ate iroini hĩte atoko inakari aapoko. Iuaritika Teoso txano nota: “Na pakiritapiri āti uāka kanaiari,” itxano. ²⁹ Ininiā hĩte pīkapiretakasaakino nota, nimarotari atāo nisini hĩtemoni. Ininiā, kinirepa hĩte apakītakano nota? —Petro txari Konériomoni.

³⁰ Konério apakapapiretari:

—Ipi, ipi pakini ōti apisapanika nauanāta naapoko. Iuasaaki kona nīnikari nipokori, Teoso nīmīsākiretini ikapani. Kīkatapeka inakasaaki, nīmīsākiretakasaakiri Teoso, katimaritika kiki tokiā nota apisatoō. Pomēkoriri imāka. ³¹ Itxano: “Konério, Teoso kenakotapekari pamanaākiti. Ixinikari pisikarauatini matiinimoni. ³² Ātikaka kiki piokanata Xopi sitatxitimoni Simão Petro inakori uaimoni imininina ikapani. Iua aua āti Simãoakata, aamata kamakarikata. Simão aapoko potxoari uiniti takote.” ³³ Iuasaaki nota apakītakai pite. Peerekari papokini atemoni. Uatxa ate uai aua Teoso apisatoō Teoso paniātakiti pitemonikiri akenakotini ikapani. Ininiā pišāpiretauako —itxa Petromoni.

³⁴ Ininiā Petro txari:

—Uatxa nimarotari atāo inakari. Teoso sikari erekarari ikininapemoni. Inirekarari ikini uāka apokini iuamoni, inakitiakori ininiuana ikapani. ³⁵ Teoso apakapari ikini itixiti auakani, iua paxitakani, atāo inakari kamakani. Apakapari Xoteoakori. Apakapari Xoteo minakanuua apaka. ³⁶ Himarotari Teoso iokanapirena Isaeo auakanimoni. Ikara erekarari pirena sāpiretaua Xesosi Kristo xipokari Teoso omanatiniri kākiti imaerekani xika, kākiti erekaxinire inini ikapani. Ikinimane auĩte itxaua Xesosi. ³⁷ Ikara Teoso iokanapirena himarota, kotxi iaripireta ikini Xotéia tōpa. Merepitapanika iaripireta Kariréia tōpa, Xoāo patxisarauataka atoko. ³⁸ Himarotari Xesosi

Nasareekiri pirena. Himarotari Teoso sikari Erekaru Matamatakoti iua-
moni. Iteene isikaposotiiretari iua. Ikini tōpati isa erekaru ikamini ikapani.
Imakananitana Satanasi misiritakini, kotxi Teoso aua iuakata. ³⁹ Ateka
itikari ikinipoko ikamakiti Xoteoakori tixine iua auakasaaki, Xerosareē
sitatxiti auakasaaki apaka. Eereka aamina ipiriāmitakari nopini ninoa okari
iuani.

⁴⁰ –Iuaritika ipi āti pakini ōtisaaki Teoso ōkitikari iua. Iuaka oereka
kākitimoni ipīpekariika iuaikana aua inini. ⁴¹ Kona ikinipokoni atamataru
iua. Teoso mereēkininira atamataru iua. Iuaritika kaiāori iua atamatakani.
Ininiā ate atamataru iua. Iua ōkitikaua atoko ate nipokota, iāriā aāta iuakata.
⁴² Iokanataua ate Teoso sākire asāpiretini ikini kākitimoni. Teoso mereēri iua,
kākiti misiritiko mereēkaru ininiua ikapani. Auākipanika inakani, ipīkani pakini
misiritiko mereēkaru itxaua. ⁴³ Ikinipoko Teoso sākire sāpiretakani sāpiretari
iua pirena. Ninoa txari: “Iua sākire auiākani maerekani makatxakaāka” –
itxa Petro.

Xoteo Minakanuia Patxisatiko

⁴⁴ Petro sākirauatapanika inakasaaki, Erekaru Matamatakoti apoka ikinika
Petro sākire kenakotakanimoni. ⁴⁵ Ininiā Petro moianariakori Xesosi
sākire auiākani kisauakatsikimatatakoni tsorikaāta, kotxi Teoso sikari Erekaru
Matamatakoti Xoteo minakonimoni apaka. Ninoa tsiki mata !ikisauakaāka,
iuaritika Erekaru Matamatakoti apoka ninoamoni. ⁴⁶ Ikenakotarina Xoteo
minakanuia sākiraauāta āti uāka sākireē.

–Peerekari Teoso. Apiananiri itxaua –itxanātana Xoteo minakanuia.

⁴⁷ Ininiā Petro txari:

–Ninoa Xoteo minakanuia apakapapekaru Erekaru Matamatakoti ate
apakapiniri atokokana. Ininiā apakatapitika ninoa patxisatiko āparaā.
Kona kākitini iotokakana ipatxisatikona.

⁴⁸ Ininiā iua paniātana ninoa patxisatiko Xesosi Kristo uākaā. Iuasaaki
ninoa aiataru Petro:

–Atekata mapaōti pikaikota –itxarina.

Ininiā Petro kaikota ninoakata.

11

Petro Sāpiretakiti

¹ Xesosi iokanatakini, Teoso sākire auiākani Xotēia tōpa auakani apaka
kenakotari Xoteo minakanuia auikinirina Teoso sākire. ² Ininiā Petro
kanapiriāksaaki Xerosareēmōni, kisauakatsikimatatakoni apoītari iua.

³ –Pite imaka itsiki mata makisauakakoni aapoko āki. Ninoakata
pinipokota pitxa. !Apakata pikamakiti –itxarina.

⁴ Ininiā Petro sāpiretari ikinipoko itiākiti, ikenakotakiti pakini.

⁵ –Xopi sitatxiti nauakasaaki, Teoso nimisākiretakasaaki, nitaponemoni
natapari mākatxi mata atoko inakari iaxiti katxakaāpotini. Ipi, ipi pakini
imapotomatare iaxirikaāka. Iua apoka nota takote. ⁶ Iteene nimixinitari
mākatxi mata āki auakani. Natamataru ikini sereti kaxipirini. Aua pirātxi.
Aua itopa auakani. Aua imini, araākani pakini. ⁷ Iuasaaki nikenakotari
sākiretxi iaxitikiri: “Pōkitikaua. Oka, nika pitxako,” itxa. ⁸ Txamari nitxari iua:
“Apiananiri, konapitini. !Ninikari nipokori mauiritakoti ia atoko inakari,
kotxi pamininiri,” nitxari.

⁹ –Iuaikana iaxitikiri sākiraaua: “Teoso oeretakiti kona kamininiri kona
pitxape.” ¹⁰ Ipi āti pakinikata iua aamata katxaka ikara atoko. Eereka ikinika
kosekaāka iaxiti.

11 —Iuasaakipeka ipi, áti pakini kikiakori Sesaréiakini apoka aapokotxi nikaikotiniátaã. Iokanataãkana notamoni. 12 Ininiã Erekarí Matamatakoti paniãtano: “Pisa ninoakata. Kona pipikarauatape,” itxa. Naia seisi aitariakori Xopikini moianatano nota iuasaaki. Ininiã ate Íroã Konério aapoko. 13 Ininiã iua sãpiretaua ate, Teoso nitiri iaxitikiri apoka iuamoni aapoko áki. Iua Teoso nitiri txari iua: “Piokanatarí kikiakori Xopimoni Simão Petro inakori apinina íkapani. 14 Iua sãpiretaiko pite maerekani makatxakiko, paapoko auakani maerekani makatxakiko apaka.”

15 —Nipotorikasaaki nisãkirauatini, Erekarí Matamatakoti apoka ninoamoni merepanika atemoni apokini atokotxikana. 16 Iuasaaki nixinikari Apiananiri sãkire. Iua txari: “Xoã patxisarauata áparaãã. Hite patxisa-taãkako Erekarí Matamatakotiã.” 17 Ininiã Teoso sikari Erekarí Matamatakoti ninoamoni, atemoni isikini atokotxikana Xesosi Kristo Apiananiri sãkire aãuikasaaiki. Ikara atoko ininiã, !apakata Teoso ninaiatini —itxa Petro.

18 Petro sãkire ikenakotakana atoko, !itsoataikana.

—Peerekari Teoso —itxana.

—Ininiã Teoso auiritari Xoteo minakaníua apaka imaerekanina itakanap-inina, Teosokata átipirika auinina íkapani —itxana.

Teoso Auiãkani Átxiokia Sitatxiti Auakani

19 Estevão ipinaãka atoko, Xesosi sãkire auiãkani misiritaãka, ininiã ninoa iarika. Iariãkani sari maioakari. Penísia tixinima, Xipri pokomiríitima, Átxiokia sitatxitima pakinimoni isana. Ninoa oerekari Teoso sãkire Xoteomoniani. 20 Ninoa átikaka Xiprikini, Sirenikini pakini sari Átxiokia sitatxitimoni. Iuaã isãpiretarina Teoso iokanapirena erekari, Xesosi Apiananiri pirena, Xoteo minakonimoni ninoa apaka imarotini íkapani. 21 Apiananiri sikaposotiiretana ninoa. Ininiãkara ítomaneri kãkiti auikari Apiananiri sãkire. Maerekati itakanapana. Ikamarina Apiananiri nireëkiti.

22 Ikara apopireta Xesosi sãkire auiãkanimoni Xerosareë sitatxitiã. Ininiã ninoa iokanatarí Panapee Átxiokia sitatxitimoni. 23 Iuaã iua apokasaaki, imarotakasaakiri ninoa apakapiniri erekari Teoso sikakíti, ipoxokoniua. Isikataparaxiniretana. Ótãkikana Apiananiri paniãtakitinoka ikaminina ikini itaparaxinireritikana. 24 Erekarí Panapee. Ikinika Erekarí Matamatakoti paniãtakiti ikama. Auikari Xesosi sãkire ikini ixinireritika. Ikara atoko ininiã, ítomaneri kãkiti auikari Apiananiri sãkire.

25 Eereka Panapee sari Taaso sitatxitimoni, Saoro initini íkapani.

26 Itaõkitakasaakiri, iminari iua Átxiokia sitatxitimoni. Áti anokanani ikaiotana iuaã Xesosi sãkire auiãkanikata. Oerekarina Teoso sãkire ítomaneri kãkitimoni. Xesosi sãkire auiãkani Átxiokia sitatxiti auakani merepitipanika takauãkataãka, “Kristopiki.”

27 Iuasaaki átikaka Teoso sãkire sãpiretakani Xerosareëkini sari Átxiokia sitatxitimoni. 28 Ninoa átika Ákapo inakori ókitikaua. Erekarí Matamatakoti sãkire isãpireta:

—Natxinoka auako ikini itixiti —itxa.

Ikara isãkire apokaepa Kráotxio Homano auíte inakasaaki.

29 Ininiã íkinika Xesosi sãkire auiãkani nirekari txineiro iokanatiní itari-akorimoni Xotéia tãpa auakanimoni. Ito auinina, íto iokanatana. Poiãonoka auinina, poiãonoka iokanatana. 30 Panapee, Saoro pakini anikari isikakitina. Isikaro oa txineiro Xotéia tãpa auakani ótãkikakanimoni.

12

Xesosi Säkire Auiäkani Misiritiko Iuaïkana Apokini

¹ Iuasaaki auítetxi, Erotxi inakori, misiritana Xesosi säkire auiäkani. Átikaka itaka kateia äki. ² Iua okapiri Txiako iouata mitaroã. Iua Txiako Xoão itari. ³ Erotxi imarotakasaakiri Xoteoakori apokaerekatiniri Txiakoni okiko, ipaniätari Petro mäikiko. Imaïkari Petro Xoteoakori kiiniritesaaki, päo miätiaäkati kiiniritisaaki. ⁴ Petro imaïka atoko itakari iua kateia äki. Ipaniätari tesiseisi sotatoakori nïkatiniri iua. Kiiniri xipoka atoko Erotxi nirekari imereiniri imisiritiko ikinimane apisatoõ. ⁵ Ininiã Petro kateia äki kaikota. Iuasaaki Xesosi säkire auiäkani ätipirika misäkiretari Teoso Petro ïkapani.

Petro Sikakaäka

⁶ ïkanõka, imisiritiko imarotini õti apisapanika, kateia äki Petro imakanãta ipi sotato apanïkaki. Iaxirikiko tsapi metao kamakori ipi. Aua apaka apikomoni sotatoakori kateia toreãtaã, Petro mamitekakani ïkapani. ⁷ Patimari Teoso nitiri tokiini. Tirikapi ponika kateia äki. Iuasaakipeka Teoso nitiri õpirïkari Petro.

—Põkitikaua. Katima pitxako —itxari.

Iuasaakipeka itsapi iaxirikiko iuakoäkiri katxaka. ⁸ Teoso nitiri paniätari: —Pimãka pieretaka. Pikiti mata pitaka, ininiã Petro takari. Pimãka pinopinikiri apaka pitaka, eereka pisa notakata —itxa.

⁹ Ininiã Petro sari iua tikini. Kateia ipokïkana. Iuasaaki Petro uãkatari itaponeuatini. Imarotari atão Teoso nitiri mipokïkiniri iua. ¹⁰ Eereka inapari ipi sotatoakori auiniãtaã, apoka itxana itore maparakiri metao kamakori. Iuaãtaã napakari sari sitatximoni. Ikara itore iuaka matakakaua. Ininiã ninoa pokïka. Iua ahoa mapotõkire apokasaakina, katimaritika Teoso nitiri takanapari iua. ¹¹ Iuasaaki Petro imarotapekari:

—Na nitaponeni itxa. Atãopitikara Apiananiri iokanatarini nitiri itixinekiri nota imakataxakini ïkapani. Pataparari Erotxi, iuaritika Apiananiri makatxakano. Xoteoakori nirekari okinino, iuaritika Apiananiri makatxakano —itxa.

¹² Ikara ixinika atoko, isari Maria aapokomoni. Xoão Marko inakori inoro oa Maria. Iuaã itomaneri kãkiti apotiitapekaua, Teoso imisäkiretinina ïkapani. ¹³ Maria aapoko apokasaaki, akirita. Átokoro Hotxi inakoro sari itoremoni. Okenakotari Petro säkire. ¹⁴ Oimarotakasaakiri Petro mapara apokini, omiteka iriko äki aapokotxi äki auakanimoni. Opoxokoniouata, txamari omaxinïkaretari itore omatakakini Petro ïkapani. Ininiã otxari apanakinimoni:

—Aapokotxi toreãtaãpekari Petro —otxa.

¹⁵ Ininiã ninoa:

—Pimapitxirita.

—Atãopitikara nisäkire —otxa oa.

Ininiã ninoa:

—Petro kamiritekara.

¹⁶ Ninoa ikara atoko inaätakasaaki, Petro mapara akirinãtapanikana ninoa. Eereka ninoa matakakari itore, atamata itxarina.

—Kanatokopa pitakanapari kateia? —itxarina.

¹⁷ Ininiã iuakoã ipinitana:

—Hïkenakotari nisäkire —itxana.

Eereka isãpiretana:

—Apiananiri makatxakano nota kateia äki. Ikinika ikara hïsãpiretariko Txiako, apanakini aïtariakori pakini —itxa.

Iuasaaki isipe. Átiãtaã isa.

¹⁸ Katimatinīkata sotatoakori kateia nīkatakani tsorīkaãta:

– İteri iua Petro? Kanatokopa itxa Petro pokikīni? –itxana.

Initapiimarina Petro. ¹⁹ Ininiã Erotxi paniãtana initiko, txamari !apokarina. Erotxi pimaãna sotatoakori Petro nīkatakani, Petro sinimoni imarotinina ikapani, txamari ninoã imarotari Petro sinimoni. Ininiã eereka ipaniãtari ninoã sotatoakori okiko Petro mitekini xika.

Ikara atoko inaãka atoko Erotxi sipeka. Xotẽia tõpa ipotorika. Sesarẽia sitatxitimoni isa.

Erotxi İpinini Pirena

²⁰ Erotxi omanatana Txiro sitatxiti auakani, Sitoõ sitatxiti auakani pakini. Ninoã nirekari iua omanatinina xipokini, kotxi ninoã apakapari nīpokori Erotxi tixinekiri. Ininiã ninoã säkirauata Parãsito inakorikata. Iua Parãsito nīkatarı Erotxi aapoko, itii pakini. Paimatireri iua. Ninoã säkirauatakaãki iuakata, iua auikari ninoã säkire. Eereka Erotximoni isana neenamatzı xipokini ikapani. ²¹ Erotxi ketotari ikinimane kãkiti imisãkiretini ikapani. İketo õti apokasaaki ieretakari imãka ereri inakari, auĩttxi mãka. Eereka iitopãka auĩttxi itopanere nopini. Iuaã iua misãkiretana kãkiti. ²² Ininiã kãkiti txari:

–Teosora säkirauanãta. Na kãkitini –itxana.

²³ Iuasaakipeka Teoso nitiri iaxitikīri okari Erotxi, kotxi iua auiritari kãkiti iteasonetiniri iua. Ininiã tsmi sotakiperi nika txari iito. Ikara atoko inikoã ipĩpe.

²⁴ Iuasaaki Teoso säkire iaripireta. Ininiã itomaneri kãkiti auikari Teoso säkire.

²⁵ Panapee, Paoro pakini parĩka Xerosareẽ sitatxitiã xipokaãka atoko, Ætxiokia sitatxitimoni kanapiriã itxana. Anikarina Xoão Marko ninoakata.

13

Panapee, Saoro Pakini Mereĩko

¹ Xesosi säkire auĩãkani sauaki Ætxiokia sitatxitiã aua Teoso säkire säpiretakani, Teoso säkire oerekakani pakini. Aua Panapee. Aua Simão “Pomamari.” Aua Arõsio Sirenikīri. Aua Manaeẽ. Auĩttxi Erotxi inakori xapitipanika inakasaaki, iua Manaeẽ xapitipanika inakasaaki, imakananitaãka Erotxikata. Apaka Saoro aua Ætxiokia sitatxitiã. ² Æti õti Xesosi säkire auĩãkani iuaãtaã takanapari inipokotinina Apiananiri imisãkiretinina ikapani. Iuasaaki Erekarı Matamatakoti txana ninoã:

–İmakatzakana Panapee, Saoro pakini parĩkatxi ikaminina nota ikapani –itxa Erekarı Matamatakoti.

³ Ininiã ninoã takanapari inikini Teoso imisãkiretini ikapani. İposo atoko itakarına iuakona Panapee, Saoro pakini nopini. İokanatana ninoã Erekarı Matamatakoti paniãtakiti ikaminina ikapani.

Xipri Pokomiriĩti Pirena

⁴ Erekarı Matamatakoti iokanatana Panapee, Saoro pakini, ininiã ninoã sari Sereõsia sitatxitimoni. Iuaã ninoã iereẽtaua maporo ãki. Isana Xipri pokomiriĩtimoni. ⁵ Saramina sitatxitiã apokasaakina, isãpiretarına Teoso säkire aiko ãki Xoteo apotiĩniãtaãua. Xoão Marko inakori moianatana ninoã iuasaaki.

⁶ Xipri pokomiriĩti İpirixititana. Paposi sitatxitimoni isana. Iuaã itaõkitarina kiki Xoteo. Miĩti itxaua. Iuãka Paxesosi. Æti iuãka Erimasi.

–Teoso säkire säpiretakarıkaranõ nota –itxa iua.

Txamari na atão isãkire. ⁷ Iua moianatari Xipri auakani auĩte Sẽxio Paoro inakori. Paimatireri iua Sẽxio Paoro. Iua akiritana Panapee, Saoro pakini

iuamoni Teoso sãkire ikenakotini ìkapani. ⁸ Txamari Erimasi ! inirekana ninoa. !Nirekari Séxio Paoro auikiniri atão Teoso sãkire.

⁹ Iuasaaki Erekarì Matamatakoti iteene sikaimaroretari Saoro (ãti iuãka Paoro,) ininiã iteene atamatarì iua miiti. ¹⁰ Itxari iua:

—Pite Satanasi ãkiri pitxaua. Pite atão kamakari mokaiakari pitxaua. Pite kamari ikini sereti maerekati. Ikara atoko ininiã, pimisirienetari kãkiti. Atão inakari Apiananiri sãkire pite nirekari pimamakini. ¹¹ Ikara pimaerekani xika Teoso misiritaiko pite uatxa. Mõsiãreti pitxauako. Kona patamatapaniri atokatxi mapaõti.

Iuasaakipeka katxiãri atoko inakari, ipiã apaka apoka Erimasimoni. Ininiã iua nitari ãti anikakiri ìkapani. ¹² Séxio Paoro atamatakasaakiri Erimasi misiritiko, iua auikari Teoso sãkire. Itsoriããta:

—Peerekari Paoro oerekakiti sãkiretxiti Apiananiri pirenã isãpiretakiti — itxa.

Ãtxiokia Sitatxiti Pisítxia Tixini

¹³ Iposo atoko Paoro imoianariakorikata iereẽtaua maporo ãki. Paoposi itakanapana. Pexi sitatxitimoni, Pãpíria tixini isana. Pexi sitatxiti auakasaakina, Xoão Marko takanapana ninoa, Xerosareẽmoni ikanapiriini ìkapani. ¹⁴ Eereka iuaãkana maporo ãki iereẽtauana. Isana Ãtxiokia sitatxitimoni, Pisítxia tixinimoni. Ãtxiokia sitatxiti auakasaakina tomatiko õtisaaki ìroãna aiko Xoteo apotiitiiniãtaãua. Iuaã iitopãkana. ¹⁵ Teoso paniãtakiti aãtsopateẽ, Teoso sãkire sãpiretakani iõkatsopatakiti aãtsopateẽ pakini atatsopataãka atoko auãtetxiakori iuaãtaã auakani txana ninoa:

—Aãtariakori, ate nirekari hãsãkirauatini, hãsãkire auiniã, naia kãkiti hãsikataraxiniretini ìkapani —itxana.

¹⁶ Ininiã Paoro õkitikaua. Õkatari iuako ninoa sãkirauatini iotokakinina ìkapani. Ininiã itxa:

—Nitariakori Isaeo auakanii, apaka hãte Xoteo minakanuia Teoso paniãtakiti kamakanii, hãkenakotariko nisãkire. ¹⁷ Isaeo auakani Teosone mereẽna aãtokiriakorini Exito tixini auakasaakina, ãti uãkakata auakasaakina. Itxãkitakana ninoa itomane ininina. Iuasaaki Exito auakani misiritana. Ininiã eereka Teoso makatzakana iposotiireẽ, ininiã itakanaparina Exito tixini.

¹⁸ —Eereka, koarẽta ano Teoso mĩteenekana ninoa ãparaã makipakaniãtaã, kotxi ikamapikarina maerekati iuaã. ¹⁹ Eereka ixipokana setxi pakini ãti uãka Kanaã tixini auakani. Eereka isikari iua itixi ninoamoni ãtipirika iuaã auinina ìkapani. ²⁰ Eereka Teoso sikana kõtãkikarerini Isaeo auakani auãteakori tãkane. ãti kõtãkikarerì aua. Eereka iua ipina. Eereka ãtipekana kõtãkikarerì aua. Eereka iua ipina. Itxaãpotana koatrosẽtosi sãkoẽta anokanani. Imapotõkire, Samoero inakori Teoso sãkire sãpiretakari ninoa õtãkikakari itxaua.

²¹ —Eereka ninoa nirekari auãtetxi apiatakari ninoa auãte ininiua ìkapani. Ininiã Teoso sikana ninoa Saoo inakori, Xixi ãkiri. Iua atokiri kitxakapirika Pẽxamiã inakori. Iua Saoo ninoa auãte apiatakari koarẽta anokanani.

²² Eereka Teoso makatzakari Saoo. Itxãkitakari Tavii ninoa auãte apiatakari ininiua. Teoso sãpiretari Tavii pirenã: “Kãkiti Tavii Xeseo ãkiri atoko inakari ninireka, kotxi iua kamari ikinika ninireẽkiti,” itxa Teoso.

²³ —Teoso sikaenetari ãti, Tavii apika mekani Isaeo auakanimoni. Isaeo auakani maerekani makatxaãkari itxauako. Iua Xesosikara. Iua kãkiti maerekani makatxaãkari txaua. ²⁴ Xesosì parãka ipotarikani apisapanika, Xoão sãpiretari ikinimane Isaeokini imaerenkana itakanapinina, eereka ipatxisataãkana. ²⁵ Xoão parãka ixipokasaaki, ipimaãna ninoa: “Kipa hũuãkatatano nota? Nota kona iua hiãtapakitini. Iuaritika iua ina nota tikini.

Nota poiãori, ininiã !apakata iua takote napokini ikiti mata nimaktxakini ìkapani, kotxi iua Apiananiri," itxa Xoão.

²⁶ Paoro sãkirauatapanika:

—Nitariakori, Apraão apika mekaniriakorii, apaka hïte Xoteo minakanua Teoso paniãtakiti kamakanii, hïkenakota. Hïtemonikari Teoso iokanataru iokanapirena kãkiti maerekani makatxakiko pirena. ²⁷ Xerosareẽ auakani, ninoa auïteakori pakini kona imarotari Xesosi Teoso ãkiri ininiua. Ninoa atatsopataru Teoso sãkire sãpiretakani sãkire ikini tomatiko õti, iuaritika ! imarotarina ninoa sãkire. ²⁸ Ninoa kona apokari ixika Xesosi okiko ìkapani, iuaritika ipaniãtari Pirato okiniri. ²⁹ Ninoa kamari Xesosimoni ikinipoko mitxi Teoso sãkire iõkatsopatakori iaõka. Iposo atoko imaktxakarina iua aamina ìpiriãmitakariã. Ikata itxarina kai iriko ãki. ³⁰ Iuaritika Teoso õkitikari iua ipìkitximonepeka auakaripeka. ³¹ Õkitikaãka atoko, ito õti kãkiti atamatari iua. Kariréiakini, iuakata Xerosareẽmoni sikani aõkitari iua. Ininiã Xesosi iuaïkana auini pirena sãpiretakani itxauana ninoa Xesosi aõkitakani. Isãpiretarina apanakini Isaeo auakani.

³² —Ininiã uatxa ate sãpiretari Teoso iokanapirena erekari hïtemoni. Ikara sãkiretxiti Teoso kamaenetakiti aãtokiriakorinimoni kitxakapirïka. ³³ Ìkoraasaaki Teoso kamapekari ikara ikamaenetakiti ate ìkapani, ninoani apika mekaniriakori ìkapani, kotxi iua õkitikari Xesosi ipikasaaki, iuaïkana auãki inini ìkapani. Kitxakapirïka Teoso sãkire iõkatsopatakori Xikari ipiãtaã sãpiretari Xesosi õkitikinua õti, kotxi itxari: Pite namarite. Ia õti noerekari kãkiti pite iri nininiua nota.

³⁴ —Kitxakapirïka Teoso sãpiretapekari iua õkitikiniri Xesosi ipikasaaki, iuaïkana imapinakani tïkane, kotxi isãkire iõkatsopatakori txari: Nikamaenetakiti Taviimoni pitemonikara nikama. Ikara erekari nikamapitkako pitemoni.

³⁵ Teoso sãkire iõkatsopatakori Xikari tesiseisiãtaã txari: Teoso kona auiritari Erekari Kamakari ìto paiakini.

³⁶ —Kitxakapirïka Tavii auakasaaki, ikamari Teoso nireẽkiti, kotxi iniri mane auïte itxaua. Eereka ipïpe. Ikatapeẽka. Inirimane kata ikatapeẽka, ininiã ìto paiaka. ³⁷ Xesosipekana, Teoso õkitikari iua. Iua ìto kona paiaka. ³⁸ Ininiãkara nitariakori himarotariko ia. ³⁹ Xesosi sãkire auïãkani maerekani makatxakaãka. Erekarini ninoa. Moisesi paniãtakiti kamiko kona makatxakari kãkiti maerekani. ⁴⁰ Erepaniko. Kitxakapirïka Teoso sãkire sãpiretakani sãkire iaõka atxiiti apoka hïtemoni, kotxi ⁴¹ ia atoko itxana: Hïkenakota, hïte Teoso sãkire napetakanii. Hãtamariko niposotiire, iuaritika hïpinako, kotxi !hãuikari niparïka hïte sauaki. Æti sãpiretiniãri niparïka, iuaritika !hãuikari.

Ikara atoko itxa Paoro sãkire ninoamoni.

⁴² Xoteoakori pokikasaaki Xoteo apotiitiniua aapokotxiti, iusaaki Xoteo minakanua aiatana Paoro, Panapee pakini iuaïkana tomatiko õti ìkari Teoso sãkire isãpiretinina ìkapani. ⁴³ Kãkiti apotiitakanua potorika atoko, itomaneri Xoteo, Xoteo minakanua Teoso sãkire auïãkani pakini sari Paoro, Panapee pakinikata. Paoro, Panapee pakini misãkiretana ninoa. Õtãkikana ninoa, ikiniõtika atão ikaminina, kotxi Teoso iteene turetana ninoa.

⁴⁴ Ininiã ãti tomatiko õtisaaki ikinimane iua sitatxiti auakani apoka Apiananiri sãkire ikenakotinina ìkapani. ⁴⁵ Xoteoakori atapari itomaneri kãkiti apokaãpotini Paoro, Panapee pakini sãpiretakiti ikenakotinina ìkapani. Ininiãkara ninoa xikotana Paoro, Panapee pakini. Imisãkirepiretana ninoa:

—Na atão Paoro sãkire. !Apakata isãkire —itxanãtana.

⁴⁶ Iuasaaki Paoro, Panapee pakini itaparaxinireritikana isákirauatana.

—Ate sápiretari Teoso sákiŕe híte Xoteoakorimoni merepitipanika. Ikara atáŕo. Txamari híte !inirekari. Híte atxiít! inirekari átipirika auáki hinini? Ikara atoko ininiá, ate sariko Xoteo minakonimoni, ⁴⁷ kotxi Apiananiri paniátaua ate ia atoko:

Tirikapi atoko inakari hítxauako Xoteo minakanuia íkapani nisákiŕe atáŕo ninoa imarotini íkapani, ninoa maerekani nimakatzakini íkapani, ikini itixiti auakani ikara imarotini íkapani,

—itxa Paoro.

⁴⁸ Xoteo minakanuia kenakotakasaakiri ikara Paoro sákiŕe, ipoxokoniuatana. Ininiá ninoa:

—Peerekari Apiananiri sákiŕe —itxanátana.

Teoso mereéri kákiti átipirika iuakata auini íkapani, ininiá iuasaaki kákiti kenakotakasaakiri Paoro sákiŕe, ninoa Teoso mereékini auikari iua sákiŕe.

⁴⁹ Iuasaaki Teoso sákiŕe iaripireta ikinipoko iua tixini. ⁵⁰ Txamari Xoteoakori !apokaerekatari Xoteo minakanuia auikiniri Xesosi sákiŕe. Ininiá isápiretarina aápirena sitoakoro apiatakani Teoso paxitakanimoni, sitaxi auakani auíteakorimoni pakini. Ininiá ikara xika ninoa omanatana Paoro, Panapee pakini. Ininiá iokanatana átiátaá isinina. ⁵¹ Ininiá Paoro, Panapee pakini takanapari iuaá. Itakanaparina kipatxi ikiti mataá auakari apáka, kotxi kona ninoa nirekaikari Teoso sákiŕe. Ininiá isana Ikónio sitatxitimoni. ⁵² Átxiokia sitatxiti auakani Xesosi sákiŕe auíakani poxokoniuaata. Iteene ikamarina Erekarí Matamatakoti nireékiti.

14

Ikónio Pirena

¹ Paoro, Panapee pakini auakasaaki Ikónio sitatxitiá, isana aiko Xoteo apotiitiniátaáua. Isápiretarina Teoso sákiŕe kákitimoni, ininiá kaiáŕopokori Xoteoakori, Xoteo minakanuia pakini auikapiretari Teoso sákiŕe. ² Txamari apanakini Xoteoakori Teoso sákiŕe mauíákani kamaomanáketana Xoteo minakanuia. Ininiá ninoa omanatana Teoso sákiŕe auíákani. ³ Xesosi iokanatakini Paoro, Panapee pakini okanani auana Ikónio sitatxiti. Ninoa sápiretari Apiananiri pirena itaparaxinireritikana. Isápiretarina Apiananiri sikiniri ikinipoko erekari maerekanimoni. Apiananiri oerekari isákiŕena atáŕo inini, kotxi isikaposotiŕetana ninoa, posotiŕetxi, kákiti mimarotakinini pakini ikaminina. ⁴ Kákiti sitaxi auakani omanatakakana. Apanakini auikari Xoteoakori sákiŕe. Apanakini auikari Xesosi iokanatakini sákiŕe.

⁵ Ininiá Xoteo minakanuia, Xoteoakori pakini, ninoa auíteakorikata imisákiŕetakakaua Xesosi iokanatakini imisiritinina íkapani, kai soroá ikiporonakinina íkapani. ⁶ Paoro, Panapee pakini kenakotakasaakiri ikiporonakikona pirena, imitekana. Arisítara sitatxitimoni, Tepi sitatxitimoni, Arikaónia tixini isana. ⁷ Iuaá isápiretarina Teoso iokanapirena erekari kákitimoni.

Arisítara Pirena

⁸ Arisítara sitatxiti aua kiki petokakititakari iuasaaki. Matípokotakati. Iponaniákasaaki, ipetokakititapeka. ⁹ Ikenakotakasaakiri Paoro sákiŕe, Paoro atamatari iua. Iuasaaki Paoro imarotari iua kiki auikapiretiniri Xesosi sákiŕe erekape inini íkapani. Ininiá iteene atamatari iua. ¹⁰ Itapasákiŕeritika Paoro txari iua:

—Pókitikaua. Pitima —itxari.

Ininiá iuasaakipeka ókitikaua, típokota itxa. ¹¹ Iuasaaki kákiti itikari Paoro kamakiti. Ininiá ninoa akirikata isákiŕeéna, Arikaónia tixini auakani sákiŕeé:

—Teosoakori apoka atemoni. Kikiakori atoko itxana ninoa.

¹² Ninoa takauākatarī Panapee, Xópīte ininiua. Itakauākatarī Paoro Mekório ininiua, kotxi apiata isákirauata. Panapee poiãoka isákirauata. Xópīte, Mekório pakini teosoakori kamakoni uãka. ¹³ Sitatxi Ìronakikoãtaã takote aua Xópīte misákiretiko aikoti. Xópīte misákiretakani auíte iusaaki minari kema auíteakori, aãui kaiãori pakini sitatxi Ìronakikoãtaãmoni. Iuaã iua apanakini kãkitikata nirekari kema auíte okinina Paoro, Panapee pakini Ìkapani, iteosone Ìkapani okinirina atokotxikana. ¹⁴ Panapee, Paoro pakini imarotakasaakiri ikamakitinã tãkane, imatsorakitarina ninoaka mãka, kotxi Teoso litxauana.

Ninoa kãkiti itomanerimoni imitekana. Itapasãkīreritikana itxana:

¹⁵ —Kãkiti, kinirepa Ìkora atoko hĩtxa? Hĩte kikiãkini atokokanera atxa ate. Ate uai apoka teoso kãkiti kamakiti hĩtakanapini Ìkapani, atão Teoso himarotini Ìkapani, kotxi atão Teoso auapininiika inakari itxaua. Iua kamari iaxiti, iaxiti auakani, itixi, itixi auakani, potxoari uiniti, potxoari uiniti ãki auakani pakini. ¹⁶ Kitxakapirĩka Teoso auiritana ikinipoko kãkiti inirekaãkitina Ìkaminina. ¹⁷ Iua Teoso ininiua sãpiretakari kaiãopokori auapika, kotxi erekari Teoso sikakiti kãkitimoni oerekari iua Teoso ininiua. Teoso sikari ãparaã iaxitiki kãkitimoni. Iua ãparaã oerekari iua Teoso ininiua. Takari kikiõ auakari iua sikakiti erekari apaka oerekari kãkiti iua Teoso ininiua. Teoso sikari nipokori ikini sereti kãkitimoni. Ikara oerekari iua Teoso ininiua. Iua sikapoxokonitari aãkixinire. Ikara apaka oerekari iua Teoso ininiua.

¹⁸ Ikara atoko itxana Paoro, Panapee pakini, iuaritika kãkiti nirekapanikari okiniri kema auíte Paoro, Panapee pakini Ìkapani. Itapararitika Paoro, Panapee pinitana ninoa, ininiã ! ikamarina. ¹⁹ Eereka Xoteoakori Átxiokia sitatxitikini, Ikónio sitatxitikini pakini apoka Arisitarã sitatxitimoni. Ninoa kãkiti misákiretana Arisitarã auakani. Imisákirepiretana Paoro, Panapee pakini, ininiã Arisitarã auakani auikari ninoa sãkire. Ininiã ikiporonakarina Paoro kai soroã. Eereka ikosekãitotarina iua sitatxi mapotókire. Ninoa uãkatarī iua ipĩpe. ²⁰ Iuaritika Xesosi sãkire auĩãkani apotiitakasaakīua iuakata, Paoro õkitikaua. Sitatximoni kanapiriã itxa. Kamatinĩkata Paoro, Panapeekata sari Tepi sitatxitimoni.

Ikanapiriãna Átxiokiamoni, Stria Tixiniã

²¹ Paoro, Panapee pakini sãpiretari Teoso iokanapirena erekari Tepi sitatxiti auakanimoni. Ninoa oerekari kaiãopokori kãkiti. Eereka Arisitarã, Ikónio, Átxiokia pakini sitatxitimoni ikanapiriãna. ²² Iuaã oerekana kãkiti Teoso sãkire iteene imarotinina Ìkapani. Õtãkikana ninoa Teoso sãkire iaõka ãtipirika ikaminina. Ia atoko Paoro, Panapee pakini oerekana ninoa: “Teoso aãũtetakasaaki, amisiritiko kaiãopokori amĩteenekako.”

²³ Ikinipoko Xesosi sãkire auĩãkani apotiitiniãtaãua Paoro, Panapee pakini mereẽna ninoa õtãkikakani. Ninoa kõtãkikarerini iteene auikari Apiananiri sãkire. Paoro, Panapee pakini misákiretari Teoso ninoa Ìkapani. Nipokori itakanapa Teosokata isákirauatini Ìkapani iusaaki.

²⁴ Eereka isipekana. Ipĩrixititarina Pisĩtxia tixini. Eereka Pãpĩria tixinimoni isana. ²⁵ Isãpiretarina Teoso iokanapirena erekari Pexi sitatxiti auakanimoni. Eereka isana Atãria tixinimoni. ²⁶ Iuaã iereẽtaua maporo ãki Átxiokia sitatxitimoni isinina Ìkapani. Iuaã Átxiokia sitatxitiã mitxipeka ninoa iokanataãka Teoso parĩka ikaminina Ìkapani. Iuaãtaã Xesosi sãkire auĩãkani misákiretari Teoso ninoa Ìkapani, Teoso iteene nĩkatinina Ìkapani. Ikara parĩkatxi iposope ninoa kamini.

²⁷ Átxiokia sitatxiti apokasaakina, Xesosi sákire auiákani imakinika apoti-
itaua ninoakata. Ininiã Paoro, Panapee pakini sãpiretari ikinika Teoso
kamakiti. Isãpiretarina Teoso auiritinina Xoteo minakanuia apaka auikiniri
Xesosi sákire. ²⁸ Paoro, Panapee pakini auapokota iuaã Átxiokia sitatxitiã
Xesosi sákire auiákanikata.

15

Teoso Takaõtxikare Pirena

¹ Átikaka kikiakori Xotéia tõpakini apoka Átxiokia sitatxitimoni. Ninoa
oerekana Xesosi sákire auiákani:

—Moisesini paniãtaua Teoso takaõtxikare aitoã atakini. Txamari hite !
hõtakari, ininiã Teoso limaktxakari himaerekani —itxana ninoa.

² Paoro, Panapee pakini txana ninoa:

—Na atão hite sákire. Teoso takaõtxikare ninoa ãtoã !auari, iuaritika Teoso
maktxakapekari ninoa maerekani —itxana.

Ininiã itaparakienatakakauana ikara sákiretxiti xika, ininiã ninoa mereëna
Paoro, Panapee, átikaka Xesosi sákire auiákani Átxiokia auakani apaka Xe-
rosareëmoni isinina ikapani.

—Iuaã hīsãpiretariko ikara sákiretxiti Xesosi iokanatakinimoni,
kiomãtxiakori pakinimoni. Ninoa sãpiretaua atão —itxana.

³ Iusaaki Xesosi sákire auiákani takapiretanapana ninoa, ininiã Paoro,
Panapee, apanakini pakini potorika. Ninoa ipirixititakasaakiri Penísia tixini,
Samaria tõpa pakini, Paoro sãpiretana ikinimanemoni:

—Xoteo minakanuia takanapapekari imaerekani. Inirekarina Teoso
paniãtakitinoka ikaminina.

Ininiã Xesosi sákire auiákani poxokoniuata ikara pirena ikenakotakasaak-
ina.

⁴ Eereka Paoro apanakinikata apoka Xerosareëmoni. Xesosi iokanatakini,
kiomãtxiakori, apanakini Xesosi sákire auiákani pakini apakapana ninoa.
Paoro, Panapee pakini sãpiretari Teoso kamakiti Xoteo minakonimoni.

⁵ Iusaakipeka átikaka pariseoakori, Xesosi sákire auiákani, apakapapiretana:
—Ninoa Xoteo minakanuia apakapapitkariko Teoso takaõtxikare. Ninoa
kamapitkariko Moisesini paniãtakiti. Hīsãpiretanako —itxana.

Xesosi Iokanatakini Kiomãtxiakorikata

⁶ Ininiã ninoa Xesosi iokanatakini, kiomãtxiakorikata apotiitaua, Xoteo
minakanuia ãtoã Teoso takaõtxikare takiko pirena isãkiretinina ikapani. ⁷ Ninoa
iteene sãkirauataka atoko, iua Petro õkitikaua, misãkireta itxana ninoa:

—Nitariakori hite imarotari Teoso mereëno nota. Hite sauaki uatx-
akapokoikani iua mereëno nota, iua iokanapirena erekari nisãpiretini ikapani

Xoteo minakonimoni, ikenakotinina ikapani, auikinirina ikapani. ⁸ Teoso
imarotari kãkiti ákixinire sákire. Iua sikari Erekar Matamatakoti Xo-
teo minakonimoni. Ininiãkara aimarotari Teoso apakapari Xoteo mi-
nakanuia, kotxi isikari Erekar Matamatakoti ninoamoni, atemoni isikini
atokotxikana. ⁹ Amaerekani ate ákixinireë Teoso maktxakini atokokanera,
Teoso maktxakari imaerekanina ákixinireëna, kotxi ninoa auikari Xesosi
sákire. ¹⁰ Hite txikitakari Teoso omanãkarauatini. !Erekari hĩkamakiti. Hite
nirekari Xesosi sákire auiákani kaminiri ikinika Moisesi paniãtakiti, txamari
akiomaneakorini kitxakapirĩka !iposotari ikaminirina Moisesi paniãtakiti.
Ate apaka !aposotari. ¹¹ Moisesini paniãtakiti kamiko !imaktxakari kãkiti
maerekani. Amaerekani maktxakaãka, kotxi Xesosi Apiananiri iteene
tirtaua ate, ininiã aũikari isãkire. Ikara atokokana Xoteo minakanuia
maerekani maktxakaãka apaka —itxa Petro.

¹² Panapee, Paoro pakini sãpiretana ninoa Teoso kamakiti Xoteo minakonikata auakasaakina, Teoso kamakiti kãkiti maposotakinini, postoti-iretxi. Ikara isãpiretakasaakina, ikinimane iuaã apotiitakaniua tsorikaãnãta. Masãkireninoka itxana. ¹³ Panapee, Paoro pakini sãkirauatata atoko, Txiako txari:

–Nitariakori hãkenakotari nota sãkire. ¹⁴ Simão Petro uatxananira isãpiretaua Teoso tiretinina Xoteo minakaniua, kotxi ninoa sauaki imereẽna kãkiti inakitiakori ãkapani. ¹⁵ Teoso sãkire sãpiretakani kitxakapirãkarini iõkatsopatapekari ikara atoko inakari sãkiretxiti. Ninoa iõkatsopatapekari:

¹⁶ Apiananiri txari: “Eereka nikanapiriã. Noerekai nisãpirena amaneri, notamoni hãpokini ãkapani. Hãauãte Taviini auakasaaki, pamimari hãpokini notamoni. Ikara atoko inakari uatxa xipope, apokotxi irikakari xipokakari atoko itxa. Apokotxi amaneri atoko nikamako, ininiã apakatapitika kãkiti apokini notamoni.

¹⁷ Ininiã ikini uãkati nitanoko nota. Xoteo minakaniua nota akiritakini ninakitiakori nitanoko nota.”

¹⁸ Ikara atoko itxa Apiananiri kitxakapirãka kãkiti imarotini ãkapani, itxa Teoso sãkire iõkatsopatakori.

¹⁹ –Ininiã notamoni, ãrekari apaniãtinina ninoa Xoteo minakaniua, Teoso sãkire auãkani, ate kiomaneakorini paniãtakiti ikaminina. Ikara atoko inakari pamimari. ²⁰ Maõãkikana ninoa. Maiõkatsopata ninoamoni: “! Hinikapiri nipokori teoso kamakorimoni siãkori. Hãtanoro minakotokatika ! hãsirikape. Hãtaniri minakotikatika hãsirikape. ! Hinikapiri nipokori manotsaãtakori xini. Arẽkatxi ! hãtape, ! hinikape.” Ikaranokara maiõkatsopata ninoamoni. ²¹ Ikaranoka aiõkatsopata, kotxi apikomoni Moisesini paniãtakiti atatsopataãka aiko ãki Xoteoakori apotiitiniãtaãua ikini õti tomatiko õtisaaki. Moisesini sãkire sãpiretaãka ãtipirika ikininape sitatxiti, ninoa iteene imarotini ãkapani –itxa Txiako ninoamoni.

Iokantsopatakitina Xoteo Minakonimoni

²² Ninoa Xesosi iokanatakini, kiomãtxiakori apaka, ikinimane Xesosi sãkire auãkani apaka, ninoa apokaerekatari ãtikaka kiki imereinina Ætxiokia sitatxitiimoni Paoro, Panapee pakinikata isinina ãkapani. Ninoa mereẽri Xotasi inakori, Sírasi inakori pakini. Iua Xotasi uãka Pasapasi inaãka. Xesosi sãkire auãkani iteene paxitana ninoa ipi. ²³ Xesosi iokanatakini, apanakini pakini iokanatari aãtsopa iõkatsopatakitina Xotasi, Sírasi pakini anikiniri. Ia atoko itxa iua iõkatsopari:

Ate hãtariakori, Xesosi iokanatakini, kiomãtxiakori apaka, aiokanatsopata hãte aãtariakorimoni Xoteo minakonimoni, Ætxiokia sitatxiti auakanimoni, Sírasi tixini auakanimoni, Sírasi tixini auakanimoni pakiniimoni aiokanatsopata. Ereẽkai hãte.

²⁴ Ate kenakoentari Xesosi sãkire auãkani uai auakani sari hãtemoni. Ninoa txai hãte: “Hãtakariko Teoso takaõtxikare hãitoã. Hãkamariko Moisesini paniãtakiti. Ikara himakamakanisaaki, Teoso ! imaktaxakapaniri himaerekani.” Ikara atokora itxaina hãte. Ininiã hãte kamaxirexinirenoka hãtxa. Uatxa kona hãte imarotari atão hãkamini. Kona ateni paniãtana ninoa ikara atoko inakari isãpiretiniina hãte. ²⁵ Ininiãkara ate apotiitaua. Akinika ate apokaerekatari kikiakori amereẽkini hãtemoni aiokanatinini Panapee, Paoro pakinikata. Panapee, Paoro pakini ate tiretakini. ²⁶ Ninoa kikiakori amereẽkini sipeka monõkoriaãtaã Apiananiri Xesosi Kristo paniãtakiti ikaminina ãkapani.

²⁷ Ate iokanatari Xotasi, Sírasi pakini ninoakata hãtemoni. Hãpisatoõ ninoa sãpiretaiko ate iokanatsopatakititxikana. ²⁸ Erekar Matamatakoti

apokaerekatakiti sākiretxiti, ate apokaerekatakiti sākiretxiti apaka asāpiretai hīte uatxa. Paniātakori apia mimari !apaniātai hīte. Ianokara apaniātakiti sākiretxiti hīkamako: ²⁹ “! Hinikapiri nipokori teoso kamakorimoni sikakori. Arēkatxi !hiātape, !hinikape. !Hinikapiri nipokori manotsaātakori xini. ! Hīsirkape sitokata pītanoro minakotokatika. ! Hīsirkape kikikata pītaniri minakotikatika.” Iuanokara himakamakaniā, peerekari. Ereēpiko, itxa ninoa iōkatsopatakiti.

³⁰ Paoroma, Panapeema, Xotasima, Sírasi pakini iokanataāka Ātxiokia sitatxitimoni. Ninoa iuaā apokana. Apotiitana ikinimane Xesosi sākire auīākani, ninoamoni sika itxarina iua iōkatsopari. ³¹ Atatsopatakana atoko ipoxokoniuatana, kotxi erekapirenari ninoa iokanapirena. ³² Xotasi, Sírasi pakini Teoso sākire sāpiretakani itxauana. Ninoa iteene sākirauata ninoa Xoteo minakanuia isikataparaxiniretinina ikapani. Ininiā ninoa Xoteo minakanuia apikomoni aukarina Xesosi sākire. ³³ Xotasi, Sírasi pakini kaikota iuaātaā mapaōti. Eereka Xesosi sākire auīākani takanapapiretana, Xesosi iokanatakinimoni ikanapiriinina ikapani.

—Hīsipiniikaua erekaxinire hinini —itxana.

³⁴ Iuaritika Sírasi apokaerekatari iuaā ikaikotini. ³⁵ Paoro, Panapee pakini kaikotapanika Ātxiokia sitatxiti. Ninoa apanakinikata oerekari Apiananiri sākire iua sākire auīākanimoni. Isāpiretarina iua sākire isākire mimarotakanimoni apaka.

Paoro, Panapee Pakini Iarikini

³⁶ Eereka mapaōtipeka inapaka atoko, Paoro misākiretari Panapee:

—Makanapiriā ikininape aapokotxitimoni mitxi Apiananiri sākire asāpiretinimoni. Mamotikaētana aītariakori atauako erekana atxiiti —itxari Panapee.

³⁷ Panapee nirekari Xoão Marko inakori anikini ninoakata. ³⁸ Txamari Paoro !nirekari anikiniri iua.

—Pāpíría tixini aāuakasaaki, iua Xoão Marko asikaua. !Inirekaikari atekata iparīkauatini —itxa.

³⁹ Ikara xika itaparakienatakauana. Eereka iarikana. Panapee anikari Xoão Marko. Maporo āki iereētauana Xipri inakori pokomiriitimoni isinina ikapani. ⁴⁰ Paoro mereēri Sírasi, iuakata isini ikapani. Iuaātaā Xesosi sākire auīākani misākiretari Teoso, Paoro, Sírasi pakini ikapani, Teoso inīkatinina ikapani. Eereka Paoro potorika Sírasiakata. ⁴¹ Īpirixitarina Síría tixini, Sírísía tixini pakini. Aapokotxi apokasaakina, isāpiretari Xesosi sākire iuaātaā auakanimoni. Isikataparaxiniretana Xesosi sākire auīākani. Ininiā ninoa apia aukari Xesosi sākire.

16

Tximótxio Moianatana Paoro, Sírasi Pakini

¹ Paoro sari Tepi sitatxiti. Eereka Arisitara sitatxiti isa. Iuaā aua kiki, Xesosi sākire auīākari, Tximótxio inakori. Inoro Xoteo otxaua. Oa apaka aukari Xesosi sākire. Iri kona Xoteoni. Āti uāka Kreko itxaua. ² Xesosi sākire auīākani, Arisitara auakani, Ikónio auakani apaka sākire: “Peerekari Tximótxio.” ³ Paoro nirekari anikiniri Tximótxio iuakata imoianari ikapani. Ininiā iua takari Teoso takaōtxikare Tximótxio itōā, kotxi Xoteoakori iuaātaā auakani imarotari Tximótxio iri Kreko ininua. ⁴ Paoro imoianariakorikata saāpota ikininape sitatxitimoni. Kākiti aapoko apokaāpotakasaakina, isāpiretarina ninoa Xesosi iokanatakinini sākire, kiomātxiakori sākire pakini.

Isäpiretarina ikinimane kákitimoni. Ninoa sáikire aátsopaã iókatsopatakori sáikiretxiti isäpiretana ninoa. Paoro imoianariakorikata ôtáikikana ninoa ikara isáikirena auikinina íkapani. ⁵ Ininiã ikiniótika kákiti apiaápotape auikiniri Xesosi sáikire. Itomanepeka auikari Xesosi sáikire.

Paoro Taponetari Masetónia Auakari

⁶ Paoro imoianariakorikata Ípirixitiápotari Piríxia tixini, Karásia tixini pakini. Iuasaaki Erekarí Matamatakoti ! auiritana ninoa Xesosi sáikire isäpiretinina Ásia tixiniã. ⁷ Ninoa apokasaaki Mísia tixini takote, inirekamarina Pitxínia tixini isinina. Erekarí Matamatakoti ! auiritana isinina Pitxínia tixinimoni. ⁸ Ininiã ninoa Ípirixititari Mísia tixini. Apokana Tóatxi sitatxiti.

⁹ Iua íkanókatí Paoro taponeuata. Itaponetari kiki Masetónia tixini auakari. Itimanáta. Amanaánatari:

—Uaimoni pina Masetónia tixini. Pimoianataua ate —itxari.

¹⁰ Ininiã Paoro taponeuataka atoko, ate xinikari:

—Masapoka Masetónia tixinimoni, kotxi atáoka Apiananiri akiritaua ate Teoso iokanapirena erekarí kákiti ikiraákinimoni asäpiretini íkapani.

Ininiã aiamata Masetóniamoni asini íkapani.

Arítzia Auikari Xesosi Sáikire

¹¹ Tóatxi ioporokote ate iereétaua maporo áki. Asapitipo Samotirásia ipokomiriíti. Pokatimari óti ate sari Niápori sitatxiti. ¹² Iuaã apotorika. Asari Piríposi sitatxitimoni, Masetónia tixiniã. Masetónia tixiniã iua sitatxi mitari. Piríposi atoko inakari ! auari. Iuaã auana kaiópokori kákiti Homa sitatxitikini. Ate napari mapaóti iuaã.

¹³ Tomatiko ótsaaki sitatxi ítinikata ate sari uini ítinikata. Ate uákatari uini ítinikata Xoteoakori apotiitiniãua Teoso imisákiretinina íkapani. Ininiã ate apoka iuaã. Atáopitika ate uákatakiti. Aápokaro Xoteoakoro. Iuaã apotiitauana Teoso imisákiretinina íkapani, ininiã aítópáka, ninoakata asákirauatini íkapani.

¹⁴ Sito Arítzia inakoro auana ninoa sitokata. Oa txíta poporeri vétxitakaro otxaua oa. Txiatxira sitatxitikero oa. Teoso misákiretakoro oa. Iuasaakipekara okenakotari asáikire. Iuasaaki Apiananiri iteene kamaimaroretaro oa Paoro sápiretakiti, ininiã oa auikari isäpiretakiti. ¹⁵ Ininiãkara oa, oaápoکو auakani apaka, patxisataáka. Eereka oa aiataua oaápoکو áki akaikotini:

—Masa naapoko, híkaikotini íkapani. Hitemoni atáo nauikiniári Apiananiri sáikire, ininiã notakata híkaikota —otxa.

Ikara atoko oa aiataua oakata akaikotini, ininiãkara akaikota oaápoکو.

Paoro, Sírsi Pakini Kateia Áki Auini

¹⁶ Áti óti Teoso misákiretiko aikotimoni asikasaaki, ataókitaro átokoro iamotakoro. Maerekati matamatakoti auáítotaro oa. Iua maerekati matamatakoti imarotari kákiti kamakiti apisapanika. Oa amotakani apakaparo ito txineiro oimarore íki. ¹⁷ Oa átokoro osapika Paoro tikini, ate tikini apaka. Oákirítapika: —Naia kikiakori Teoso nitíriakori. Apiananiri nitíriakori itxauana naia. Oerekauana amaerekani makatxakiko, Teosomoni asini íkapani —otxaápokata.

¹⁸ Itanaótika ikara atoko oákirináta. Ininiã Paoro maerekaxiniretinoka itxa oákirítakiti xika. Áti óti isapotorika, paniáta itxari maerekati matamatakoti:

—Xesosi Kristo uákaã nota paniátai, pitakanapiniro aroa átokoro —itxa.

Iuasaakipeka maekati matamatakoti takanaparo. ¹⁹ Oa amotakani ikara imarotakasaaki, otsopa ímapakapapekanika oimarore íki, ininiã imaíkarina Paoro, Sírsi pakini. Ikosekaítotana, anikana sitatxi apaníkaki auítetxiakorimoni. ²⁰ Iuaã apokana. Isäpiretarina Homanoakori:

—Naia kikiakori Xoteo itxauana. !Erekari ninoa oerekapiretakiti, ininiã sitatxi auakani omanãkarauata ninoa sãpiretakiti xika. ²¹ Ate amakinika Homano atxaua. Aimarotapekari aãuiãkiti aãuïte paniãtakiti. Txamari naia oerekaua ipinimonipo inakari akamini ïkapani. Naia oerekaua äti uãka auïãkiti sãkiretxiti. !Auiritaãka aãuikiniãri naia oerekapiretakiti. !Auiritaãka akaminiri —itxana.

²² Iuasaaki kãkitipokoni iuaã apotiitakaniua nirekari Paoro, Sírsasi pakini iãsokinina. Ninoa auïtetxiakori matsorakitari Paoro mãka, Sírsasi mãka apaka, imaktxakinina ïkapani. Ipaniãtarina apanakini aãpitsaã ixirokitatiko. ²³ Ixirokitatapeëkana atoko, kateia äki okaãkana Paoroni, Sírsasini pakini. Auïtetxiakori paniãtari iua kateia nïkatakari, inapokopiretiniri imasikakakoni tïkane. ²⁴ Ininiãkara kateia nïkatakari okaraïtotana Paoro, Sírsasi pakini kateia irikoãkixiti. Ieretakari ninoa kiti isïkatatxi taopata kamapakotatakori äki, imaktxakakanina ïkapani.

²⁵ ïkanõka Paoro, Sírsasi pakini misãkirenãtari Teoso. Ixikarauanãtana Teoso ïkapani. Apanakini kateia äki auakani kenakonãtari. ²⁶ Iuasaaki katimaritika itixi iakeëkata iteene. Kateia patapi apaka iakeëkata. Iuasaakipeka kateia tore takaka. Iïtxikikona metao kamakori, pirikeri äki auakani itxikikona, karakitakata, katxaka itxa metao. ²⁷ Iuasaaki kateia nïkatakari meraka. Iua atamatarì kateia tore takakapeka, ininiã iuãkatarì ïkinimane kãkiti inïkatakini mitekapeka. Ninoa mitekaãkamako, iua auïte okamariko iua, iparïka imakamakani xika. Ininiã ikosekaro iouata mitaro iuaka iorotiniua ïkapani. ²⁸ Okaaritakasaakiua, Paoro akirikata:

—Kona pokapeua. Uaikareua ate amakinika —itxa.

²⁹ Iua kateia nïkatakari amanaãri tirikapi. Katimaritika ïroã. Ipamaka Paoro, Sírsasi pakini apisatoõ. Ikininanaãkata. ³⁰ Eereka imipokïkana ninoa. Iua:

—Kiatokopa nikama, nimaerekani Teoso makatxakini ïkapani? —itxana ninoa.

³¹ Ninoa:

—Pauïkariko Apiananiri Xesosi sãkire, ininiãkara Teoso makatxakari pi-maerekani, paapoko auakani maerekani apaka —itxari.

³² Eereka Paoro, Sírsasi pakini sãpiretari Apiananiri sãkire iuamoni, iua aapoko äki auakanimoni apaka. ³³ Iuasaaki imaropirïkata kateia nïkatakari arokari ninoa karo. Eereka iua imiakorikata, ïtanorokata patxisataãka. ³⁴ Eereka anikana Paoro, Sírsasi pakini aapoko äki. Isikakienatana. Iua imiakorikata, ïtanorokata poxokoniua, kotxi iuasaaki ninoa auikari Teoso sãkire.

³⁵ Katimatiniãkata auïtetxiakori iokanatanana initiriakori kateiamoni, Paoro, Sírsasi pakini isikakini ïkapani. Ninoa apokasaaki, itxana kateia nïkatakaroni:

—Pauiritana Paoro, Sírsasi pakini isinina.

³⁶ Ininiã iua kateia nïkatakari sãpiretari Paoro:

—Niauíteakori iokanapireta notamoni hïte nisikakini ïkapani. Ininiãkara hïsipiniikaua erekaxinirepeka hinini —itxana.

³⁷ Txamari Paoro txari auïtetxiakori nitiriakaroni:

—Ari, Homanoakorikareua ate, iuaritika auïtetxiakori Homanoakori iari-tataua ate ïkinimane apisatoõ. Maxikatïlka ninoa iaritataua ate. !Akamari maerekati. Eereka kateia äki ninoa okaua ateni. Uatxa ninoa nirekari iokanatinua ate ïkinimane mimarotakinitipanika. Konapitini. Ninoapitakaroko inari uai. Ninoa makatxakaua ate uai —itxa Paoro ninoamoni.

³⁸ Ninoa kikiakori kanapiriã iauïteakorimoni. Isãpiretarina Paoro iokanapirena. Ninoa auïteakori imaropiretakasaakiri Paoro, Sírsasi pakini

Homano ininiuana, ninoa pīkarauata, kotxi ninoa maxikatiika misiritana Paoro, Sírası pakini. ³⁹ Ininiākara ninoa sari Paoromoni, Sírası pakinimoni. Ninoa:

—Ate !imarotari hīte Homano hininiua. Aimarotaākamariko !amisirita-maiko —itxana.

Eereka ninoa auītetxiakori mipokīkana Paoro, Sírası pakini.

—Sitatxi hītakanapako —itxana.

⁴⁰ Ininiā Paoro, Sírası pakini takanapari kateia. Arítxia inakoro aapokomoni isana. Iuaā aōkitana kākiti Xesosi sākire auīākani. Paoro, Sírası pakini sikataparaxiniretana ninoa. Eereka isipekana, iua sitatxiti itakanapinina.

17

Tesarónika Sitatxiti Pirena

¹ Paoro, Sírası pakini napari Āpípori sitatxiti. Apikomoni inaparina Aporónia sitatxiti. Eereka apokana Tesarónika sitatxiti. Iuaā aua aiko Xoteo apotiitiniātaāua. ² Paoro itotapekari Xoteo apotiitiniātaāua aikotimoni isini. Ininiākara iua sari iuaā. Ipi āti pakini ōti tomatiko ōti, isari iuamoni. Iuasaaki Teoso sākire iōkatsopatakori isāpireta kākitemoni iuaātaā auakanimoni. Ninoa pimarauata, ininiā iua sāpirenauata. ³ Ininiā Paoro txari:

—Teoso sākire iōkatsopatakori oerekaua ate: Teoso mereēkiti misiritāākapitikako, okaākapitikako. Eereka ōkitikapitikauako, iuaīkana auāki inini īkapani. Ia Xesosi hītemoni uatxa nisāpirenātakiti Teoso mereēkitipitikara iua —Paoro txana ninoa.

⁴ Ātikaka Xoteoakori auikari Paoro sākire, ininiā Paoro, Sírası pakini moianariakori itxapekauana. Kaiāopokori Akaia tixini auakani Teoso sākire auīākani, auikari Paoro sākire apaka. Kaiāopokoro sitoakoro, auītetxiakori itanoroakoro, auikari Paoro sākire apaka.

⁵ Xoteoakori, Paoro sākire mauīākani, xikotari Paoro. Ininiā ninoa apotiitana kākiti kaneenamarini, maparīkauatakani ahoaātaā auakani. Apotiitana kākitemoni. Ininiā ninoa akiripoakata, imiteēkatana. Ikinimane sitatxi auakani kenakotari. Neenamati atoko itxakatana. Imitekana Xasão inakori aapokomoni. Īroākatana itapararitikana, Paoro, Sírası pakini initina. Inīrekarina imipokīkinirina ninoa kākiti apotiitakanimoni apisatoō.

⁶ Txamari Paoro, Sírası pakini !auari iuaā. Ininiā ikosekaītotarina Xasão. Apanakini Xesosi sākire auīākani apaka ikosekaītotana. Iauīteakorimoni anikana. Isāpiretarina iauīteakorimoni:

—Paoro, Sírası pakini kamari maerekati. Ikini itixiti ikamarina maerekati. Ininiā ninoa uai ate sitatxineēpekarana uatxa. ⁷ Ia Xasão apakapana ninoa. Iua aapoko ikaikotana ninoa. !Ikamarina aauīte Sesa inakori paniātakiti, kotxi ninoa oerekari kākiti āti auītetxi ininiāua, Xesosi inakori —itxana iauīteakorimoni.

⁸ Ikara sākiretxiti ikenakotakasaakina, kākiti apotiitakanua akiripoakata. Auītetxiakori !imarotari ikamakitina tīkane. ⁹ Eereka auītetxiakori misākiretana Xasão, apanakīnikata:

—Hīkitxitana hīsakikiko īkapani. Eereka auiritaina hīsini.

Ininiā eereka auiritana isinina.

Peréia Sitatxiti Pirena

¹⁰ Kikatapeka inakasaaki, Xesosi sākire auīākani iokanatana Paoro, Sírası pakini Peréia sitatxitemoni. Iuaā Peréia sitatxiti ninoa apoka atoko, Īroāna aikoā Xoteo apotiitiniātaāua. ¹¹ Kākiti iuaā auakani iteene nirekari Paoro sāpirena ikenakotinina. Tesarónika auakani !atokoni itxana ninoa. Ikiniōtika

ninoa atatsopatarí Teoso sáikire iókatsopatakori, kotxi inirekarina imarotini-rina:

—Paoro sáikire atão atxiíti? —itxana.

12 Ininiã kaiãopokori Xoteoakori auikari Xesosi sáikire. Kaiãopokoro sitoakoro Akaia tixini auakani apaka auikari Xesosi sáikire. Naia sitoakoro auítetxiakori Ítanoroakorokara. Kaiãopokori kikiakori Akaia tixini auakani apaka auikari Xesosi sáikire. ¹³ Eereka Xoteoakori Tesarónika sitatxiti auakani kenakopiretari Paoro sápiretiniri Xesosi sáikire Peréia sitatxitiã. Ininiã ninoa sari Peréia sitatxitimoni. Apokaákana atoko, itxíkitakarina kákiti ahoaãtaã apotiitakaniua Paoro omanatinina Íkapani. ¹⁴ Ikara atoko ininiã, Xesosi sáikire auíákani iokanatarí Paoro potxoari uinitimoni. Síراس, Tximótxio pakini kaikotapanika Peréia sitatxiti. ¹⁵ Paoro moianatakani anikari iua Atena sitatxitimoni. Eereka ninoa kanapiriã Peréia sitatxitimoni. Paoro iokanapireta Síراس, Tximótxio pakinimoni:

—Katúmariã hinako —itxa.

Atena Sitatxiti Pirena

¹⁶ Ininiã Atena sitatxitiã Paoro iãtapari Síراس, Tximótxio pakini apokini. Iuaaaki Paoro itikari kaiãopokori teoso kákiti kamakiti. Sitatxi xápoka kákiti teosonenoka. Ia xika Paoro matinaniuata. ¹⁷ Ininiãkara Paoro oerekari Teoso sáikire Xoteoakorimoni aiko áki Xoteo apotiitiniãtaãua. Xoteo minakaníua, Teoso sáikire auíákani apaka, Paoro oerekari Teoso sáikire iuaãtaã. Ninoa pimarauata, ininiã imisákiretakakana Teoso sáikire ixinikinina Íkapani. Ikiniótika Paoro oerekari Teoso sáikire kákitimoni, nipokori iamotikoãtaã sikanimoni. ¹⁸ Kákiti kaxinikaxitirerini, Epikoreo inakoni, Esitóiko inakoni apaka sákirauata Paorokata. Paoro sápiretana ninoa Xesosi pirena. Isápiretana Xesosi ipinini, eereka ókitikiniua, iuaákana auáki inini pirena. Ininiã átikaka:

—Natókopa itxa ikara inakari sáikiretxiti? Uauato sáikire atoko itxa. !Kíikiteri iua —itxana.

Apanakinipekana txari:

—Isápiretari áti itixiti auakani teosone pirena.

Paoro Sápirenauata Ariópako Inakoriãtaã

¹⁹ Eereka ninoa kaxinikaxitirerini anikari Paoro aiko kákiti apotiitiniãtaãua, imirií nopini Ariópako inakoriãtaã. Iuaã ninoa txari:

—Ate nirekari aimarotiniiri poerekakiti sáikiretxiti. Mitxi kona ate kenakotari ikara atoko inakari sáikiretxiti. ²⁰ Ipixini poerekakiti sáikiretxiti !aimarotapanika. Ipinimonipo itxa poerekakiti. Ininiã pisápiretaua. Poerekaua, aimarotini Íkapani —itxarina Paoro.

²¹ Ikara atoko itxana, kotxi ikiniótika Atena sitatxiti auakani, apaka áti itixiti ikani Atena kaikotakani nirekari átiãtaákiri sápiretakiti imarotiniina Íkapani, ininiã ikiniótika amaneri sáikiretxiti ikenakonãtana.

²² Paoro ikinimane apisatoó itima, imirií Ariópako inakoriãtaã. Iua txana ninoa:

—Kikiakori, Atena sitatxiti auakanii, nitikapekari híteosone kaiãopokori, ininiã nimarotari iteene hípaxitiniiri híteosone. ²³ Ahoaãtaã ninapaãpotakasaaki, natamatari kaiãopokori híteosone misákiretikoãtaã. Iuaaaki natamatari áti híteosonemoni sikakori takikoãtaã. Iuaã natatsopatarí iókatakori: “Uai Teoso mimarotakoti misákiretikoãtaã.” Iua híteosonetakiti, himimarotakiniti, iuapitikara uatxa nota sápiretai híte.

²⁴ —Iua Teoso kamarí itixi. Ikinipoko itixi nopini auakari apaka ikama. Iua Apiananiri. Iua itixi auakani auíte itxaua iua. Iaxiti auakani auíte apaka itxaua iua. !Ikaikota kákiti kamakiti aikotiã. ²⁵ Ikinipokokara

auapeka Teosomoni, ininiã ! inirekari kãkiti kamakiti iua auini ìkapani. Teosopitikara txìkitakari kãkiti auãki inini. Iuakara sikaxiniretari kãkiti. Teosokara sikari ikinipoko kãkiti auakiti. ²⁶ Merepitipanika kãkiti ! auari, eereka Teoso kamari kiki Atão inakori. Ikini uãkati kãkiti atokiri itxaua iua Atão. Teoso iokanatana ninoa ikini itixitiã auinina. Kãkiti mauakani apisapanikara, imereëri kãkiti iponaniini òti tũkane. Iaõtari kãkiti auiniãtaã tũkane. ²⁷ Ikara atokora itxa Teoso kamakiti. Teoso txìkitakari kãkiti nitiniri Teoso. Initaãpotakasaakirina, atxiiti ninoa apokari Teoso, kotxi kona õtakoni aua Teoso. ²⁸ Áti txapekari: “Teoso txìkitakaua auãki anini, atĩpokotini ìkapani. Iua matxìkitakakaniãua auãki anini, !aãuari.” Kaxikarerini hĩte sauaki auakani txapekari: “Teoso anaakori ate apaka txaua.” ²⁹ Teoso anaakori aniniãua, ininiãkara aimarotari kona kãkiti kamakiti atoko inakarini !itxaua Teoso. Kona oro kamakorini !itxaua. Kona pirata kamakorini !itxaua. Kona kai kamakorini !itxaua Teoso. Konapitini. ³⁰ Mitxipe kãkiti !imarotari atão inakari. Iuasaaki Teoso !imisiritana kãkiti imimarotakanisaakina. Txamari uatxaika ipaniãtari ikininape kãkiti ikini itixiti auakani imaerekanina itakanapinina ìkapani. ³¹ Ikara atoko Teoso txari ikinimane kãkiti, kotxi iua ketotapekari áti òti kãkiti misiritiko òti. Xesosi Teoso mereëkiti iuakarako sãpiretariko kãkiti misiritiko ikara òti apokasaaki, kotxi iua imarotari atão inakari. Aimarotari Xesosi Teoso mereëkiti ininiãua, kotxi Teoso õkitikari iua, iuaikana auãki inini ìkapani —Paoro txana ninoa.

³² Xesosi iuaikana auãki inini pirena ikenakotakasaakina, ãtikaka napetari Paoro. Apanakini:

—Ate nirekari pisãpirena iuaikana akenakotini —itxarina Paoro.

³³ Ininiã Paoro sipe. ³⁴ Apanakinipekana auikapitikari Paoro sãkire. Txionisio inakori, Atena sitatxiti auakani auĩte, auikari isãkire. Apaka sito Tamari inakoro auikari isãkire.

18

Korĩto Sitatxiti Pirena

¹ Eereka Paoro takanapari Atena sitatxiti. Korĩto sitatxitimoni isa. Iuamoni apoka. ² Iuaã aõkitari kiki Ákira inakori. Iua Xoteo. Põto inakoriãtaã iua iponaniã. Itãria tixini ìkari. ! Okanani apoka Korĩto sitatxiti. Apoka ìtanorokata, Pirisira inakorokata. Ninoa takanapari Itãria tixini, kotxi Itãria auakani auĩte Krãotxio inakori paniãtana ikinimane Xoteoakori, Homa sitatxiti itakanapinina. Paoro ianapokota Ákira, Pirisira pakinimoni. ³ Eereka ikaikota ninoakata, kotxi ninoa parĩka iua Paoro parĩkatxikana. Papiri aamata kamakori kamakani ninoa. Ininiã Paoro kaikota Ákirakata, iuakata iparĩkauatini ìkapani. ⁴ Ikiniõtika tomatiko òti, Paoro sari aiko Xoteo apotiiniãtaãua. Iuaã Xoteoakori, Krekoakori pakini apotiitaua. Paoro oerepiretana ninoa Xesosi sãkire, isãkire auikinina ìkapani.

⁵ Sírasi, Tximótxio pakini takanapari Masetónia tixini. Korĩto sitatxiti apoãkana atoko, Paoro takanapari iparĩka papiri aamata kamakori ikamini, Teoso sãkire kãkitimoni ikiniõtika isãpiretini ìkapani. Iua oerekana Xoteoakori Teoso mereëkitipitikara iua Xesosi. ⁶ Txamari ninoa Xoteoakori omanotari Paoro. Ninoa misãkirepiretari Xesosi, ininiã Paoro kamaãkaretxitana ninoa Xesosi imisãkirepiretinina xika. Iõkokari imãka ninoa apisatoõ aãpani katxakini ìkapani, omanãkare oerekini ìkapani. Ininiã Paoro txana:

—Teoso lapakapai hĩte Xesosi sãkire himauikakani xika. Kona nota xikani, kotxi nisãpiretakai hĩte. Ininiã uatxaika nisãpiretariko Xesosi sãkire Xoteo minakonimoni. Xoteoakorimoni !nisãpiretaikariko —itxa Paoro.

7 Ininiãkara Paoro takanapana ninoa. Isari Txísio Xósito inakorimoni iua aapoko ikaiкотini ikapani. Xoteo minakatiua iua. Teoso misãkiretakari iua. Iua aapoko aiko Xoteo apotiitiniãtaãua takote aua. ⁸ Aiko Xoteo apotiitiniãtaãua sikani auíte Krispo inakori auikari Apiananiri Xesosi sãkire. Ítanoro, imiakori apaka, auikari Xesosi sãkire. Kaiãopokori kãkiti Koríto auakani kenakotari Paoro sãpirena, ininiã eereka ninoa auikapiretari. Ipatxisataãkana.

⁹ Áti Íkanõkati Teoso txíkitakari Paoro itaponeuatini. Itaponemoni Api-ananiri misãkiretari iua:

—!Pipíkarauatape. Nisãkire pisãpiretapitipo kãkitimoni. !Piotokape. ¹⁰ Kotxi nota auapika pítekata. Pikarotakiri !auari, kotxi kaiãopokori kãkiti nota nakitiakori Íkorapokoriti auari —itxa Paoromoni.

¹¹ Ininiã Paoro kaikota iuaã áti ano, ipixini ano pakinikanani Teoso sãkire oerekini Íkapani.

Xoteoakori Anikari Paoro Káriomoni

¹² Eereka iuaã Akaia tixini auakani auíte áti Íroã, Káριο inakori. Iua Homano itxaua. Homanoakori auítetari iua. Iuasaaki Xoteoakori apotiitaua. Ninoa maíkari Paoro. Anikarina aiko kãkiti misiritiko sãpiretikoãtaã. ¹³ Iuaã ninoa txari Káriomoni:

—Ia kiki na atão oerekari kãkiti Teoso paniãtakiti kamiko. Ipinimonipo itxa iua oerekakiti. Na aãtokiriakorini oerekakiti atokoni itxa. !Auiritaãka Paoro oerekapiretakiti —itxana.

¹⁴ Paoro sãkirauatini apisapanika, Káριο txana Xoteoakori:

—Nisãpiretai híte Xoteoakori. Paoro kamaãkamariko maerekati, nota kenakotamariko apikomoni hískiremak. ¹⁵ Txamari !ikamari maerekati. Híte taparakienatakakaua hãuikapiretakiti xika, hãtokiriakorini oerekapiretakiti xika. Híte Xoteoakori. Nota áti uãka nitxaua, ininiã hítekara xiníkari atão inakari. Kona notani sãpiretai híte auiaíkiti —itxa Káριο.

¹⁶ Ininiã omitikana ninoa, aiko kãkiti misiritiko sãpiretikoãtaã õpõkikinina Íkapani. ¹⁷ Iuasaaki Krekoakori maíkari Sóseni inakori. Iuani Xoteoakori apotiitiniãtaãua sikani auíte. Krekoakori xirokititari aãkeẽ aiko kãkiti misiritiko sãpiretikoãtaã apisatoõ. Txamari Káριο !imaãkatari.

Paoro Kanapiriã Átxiokia Sitatxitimoni

¹⁸ Eereka Paoro kaikotapanika mapaõti iuaã Koríto sitatxiti Xesosi sãkire auiañanikata. Eereka iua takapiretanapana ninoa. Isipe Pisisira, Ákira pakinikata. Iereẽtauana maporo áki, Síría tixinimoni isinina Íkapani. Sẽkireia sitatxiti apokana. Iuaã Paoro sãpiretari Teoso ikamaenetakiti Teoso Íkapani. Eereka ikixatari ikii ikamaenetakiti ixinikini Íkapani. ¹⁹ Ninoa apoka Épeso sitatxiti. Iuaã Paoro takanapana Pisisira, Ákira pakini. Paoro Íroã aiko áki Xoteo apotiitiniãtaãua. Iuaã apakapapiretakakaua Xoteoakorikata Teoso sãkire isãpiretinina. ²⁰ Ninoa misãkiretari Paoro ninoakata apikomoni ikaiкотini Íkapani. Txamari Paoro !inirekari ikaiкотini.

²¹ —Nisariko kiiniri Teoso misãkiretiko aikotiã Xerosareẽ. Eereka Teoso nirekiniãri, uai nikanapiriã hítemoni —itxa Paoro.

Eereka isipe. Iereẽtaua maporo áki. Épeso sitatxiti itakanapa. ²² Sesaréia sitatxiti apoka Paoro. Eereka isa Xerosareẽmoni. Iuaã apokasaaki, ianapokota Xesosi sãkire auiañanimoni. Eereka isa Átxiokia sitatxitimoni. ²³ Iuaã ikaiкота mapaõti. Eereka isipe. Karásia tixini, Píríxia tixini apaka Ípirixitiãpota. Aapokotxi apokaãpotakasaaki, isikapoxokonitana ikinimane Xesosi sãkire auiañani.

Aporo Pirena

²⁴ Iuasaaki Xoteo Aporo inakori sari Épeso sitatxitimoni. Iua iponaniã Arexãtria sitatxitiã. Paimatireri iua. Imarotari Teoso sãkire iõkatsopatakori imakinika. ²⁵ Iua oerekapeẽkaika Xesosi sãkire, ininiã atão Xesosi sãkire isãpireta kãkitimoni. Ipoxxokoniritika isãpirenauata. Txamari kãkiti patxisatiko pirena ! iteene imarotapanika. Xoão kapatxisareri oerekapiretakitinanira imarota. ²⁶ Iua Aporo sãpirenauata itaparaxinireritika aiko ãki Xoteo apotiitiniãtaãua. Iuasaaki Pirisira, Ákira pakini kenakotari isãkire. Eereka anikarina aapokomonina. Oerekarina apikomoni Teoso sãkire imarotini ikapani.

²⁷ Eereka Aporo:

–Ninirekari Akaia tixinimoni nisini –itxa.

Ininiã Xesosi sãkire auiaãkani:

–Ari, erekapitikari pisini.

Ininiã Xesosi sãkire auiaãkani, Épeso auakani, iokanatsopatari itariakorimoni Akaia tixini auakanimoni. Itxana iõkatsopariã: “Hãpakapariko aĩtari Aporo inakori.” Aporo apokasaaki Akaia tixini, iteene imoianatana Xesosi sãkire auiaãkani. Ninoa aukari Xesosi sãkire, kotxi Teoso iteene tiretana ninoa. ²⁸ Ikinimane apisatoõ Aporo oerekana Xoteoakori, Xesosi sãkire mauiaãkani, Xesosi atãopitika Teoso mereẽkiti ininiua. Teoso sãkire iõkatsopatakoriã iua oerekana Xesosi Teoso mereẽkiti ininiãua. Ininiã Xoteoakori !kasãkirena.

19

Paoro Épeso Sitatxiti Auakasaaki

¹ Aporo Korĩto sitatxiti auakasaaki, Paoro ĩpirixititari Épeso tõpa Épeso sitatxiti apokini ĩkapani. Iuaã aõkitana kãkiti Xesosi sãkire auiaãkani. ² Paoro pimaãna ninoa:

–Xesosi sãkire hãuikasaaki, hãpakapatari Erekar Matamatakoti? –Paoro txana ninoa.

Ininiã ninoa:

–Kiritipita iua Erekar Matamatakoti? !Aimarotari –itxana.

³ Ininiã Paoro:

–Kanatokopa inakariãpa hĩte patxisataãka, Erekar Matamatakoti himimarotakani?

Ininiã ninoa:

–Ari, Xoão patxisarauatini atoko inakarikanera ate patxisataãka – ĩtxarina Paoro.

⁴ Ininiã Paoro:

–Xoão patxisatana kãkiti maerekati takanapakani. Itxana ninoa: “Hĩteko iteene aukapiretariko nitikini apokakari, Kristo Xesosi inakori,” Xoão txari kãkiti –itxa Paoro.

⁵ Ikara ikenakotaãkana atoko, ninoa patxisataãka Xesosi Apiananiri uãkaã.

⁶ Iuasaaki Paoro takari imakinika iuako ninoa nopini. Iuasaakipeka ninoa apakapari Erekar Matamatakoti. Iuasaaki ninoa sãkirauata kãkiti ãti uãka sãkireẽ. Isãpiretarina Teoso sãkire kãkitimoni. ⁷ Ninoa kikiakori atxiĩti tosi pakini.

⁸ Ipi ãti pakini kasiriti ikiniõtika aiko Xoteo apotiitiniãtaãua Paoro sãpirenauata itaparaxinireritika. Apanakinikata imisãkirenãtakakauana. Paoro nirekana ninoa auikinirina Teoso sãkire, Teoso auĩtetxi ininiãua pirena. ⁹ Txamari ãtikaka ninoa ! ĩnrekar aukapiretinirina, kotxi ! ĩnrekarina ikara atoko inakari sãkiretxiti. Ninoa misãkireporetari Xesosi sãkire ĩkinimane kãkiti apisatoõ. Ininiãkara Paoro takanapana ninoa. Anikana Xesosi sãkire auiaãkani iuakata. Ikiniõtika Txirano inakori oerekarauatiniãtaã

Paoro oerekari Teoso sãkire kãkitimoni. Ninoa pimaaãpotakakaua Teoso sãkire imarotiniina Ìkapani. Apakapapireãpotakakauana. ¹⁰ Iuaã Paoro oerekarauata ipikanani, ininiã ikinimane kãkiti Ásia tixini auakani kenakotari Xesosi Apiananiri sãkire. Xoteoakori, Krekoakori pakini kenakotari.

Sepa Anaakori Pirena

¹¹ Teoso sikaposotiiretari Paoro posotiiretxi ipinimonipo inakari ikamini. ¹² Ikara atoko ininiã ikii mata, imãka iparìkauatini Ìkapani apaka anikaãka amianatakanimoni, ininiã Teoso txìkitakana amianatakanì erekape ininina. Maerekani matamatakoni auaãtotiniãri kãkiti, Paoro mãka ninoa kãkiti apakapakasaaki, maerekani matamatakoni sipe.

¹³ Iuasaaki apanakini Xoteoakori, miitiakori, maerekani matamatakoni omiitiãkani, sarì kãkitimoni maerekani matamatakoni omitikinina Ìkapani. Xesosi pirena ikenakotana. Ininiã eereka ninoa txari maerekani mata-matonimoni:

—Apaniãtai hìsipiniikaua Xesosi uãkaã, Paoro sãpiretakiti Xesosi uãkaã — itxana ninoa.

¹⁴ Iuasaaki aua kiki Xoteo, Sepa inakori. Sasetotxiakori auite itxaua. Iua anaakori kiki setxi pakini. Sepa anaakori paniãtana maerekani matamatakoni sini Xesosi uãkaã. ¹⁵ Txamari ãti òti maerekati matamatakoti apakapapiretana ninoa:

—Nota imarotari Xesosi. Nimarotari Paoro. Hìte !nimarota. Kiniparai hìte? —itxa maerekati matamatakoti.

¹⁶ Iuasaakipeka kiki maerekati auaãtotakiti okakataua ninoa nopini. Api-ataparata iua maerekati. Iuasaaki iua ãsokitakatapena ninoani. Ininiã ninoa miteekata, kasarapekana, kakaropekana itxapena.

¹⁷ Ikinimane kãkiti Épeso sitatxiti auakani kenakopiretari ikara ene. Xoteoakori, Krekoakori apaka kenakopiretari ikara ene, ininiãkara ipìkarauatana. Ikara atoko ininiãkara Xesosi uãka apiata ipaxitaãka.

¹⁸ Kaiãopokori Xesosi sãkire auãkani apotiitaua. Ikinimane apisatoõ isãpiretarina maerekati mitxi ikamakitina. ¹⁹ Apanakini kasikapõererini apaka apoka iuaã. Iminarina sikapõeretxi apaiaõkiko tsopa. Ikinimane apisatoõ iotikarina. !Inirekaikarina maerekati ikaminina. Iaõtarina ikara aãtsopa Ìki. Ìiki sikoõta mio txineiro ota pirata kamakoro. Kaiãopokoro txineiro. ²⁰ Ikara atoko ininiãpanirako Apiananiri sãkire iaripiretako ikini itixiti. Kaiãopokori kãkiti apiata auikaãpotari Apiananiri sãkire.

²¹ Eereka Paoro ãkixinire txari:

—Nìpirixititariko Masetónia tixini, Akaia tixini pakini. Iposo atoko Xeosareõmoni nisako. Iposo atoko Homa sitatxitimoni nisako —itxa ãkixinireẽ.

²² Iokanatana imoianariakori, Tximótxio, Erásito inakori pakini Masetónia tixinimoni. Paoro kaikotapanika Ásia tixiniã.

Neenamatxi Épeso Sitatxiti Auini

²³ Iuasaaki Paoro Épeso sitatxiti auakasaaki, kãkiti Xesosi oerekapiretakiti manirekakani misãkirepireãpotari Paoro, kotxi !inirekarina Xesosi oerekapiretakiti. ²⁴ Iuasaaki kiki Temétxio inakori aua iuaã. Ikamari aiko axapitipikiri inakori. Krekoakori teosone Txiana inakoro misãkiretiko aikoti atoko inakori ikama. Kaiãopokori ikama pirata kamakori ivéxititini Ìkapani. Iua, initiriakori apaka apakaparo txineiropokoni iparìkana Ìki. ²⁵ Iua Temétxio pìkapiretana ikinimane initiriakori, ninoa kamakitikana kamakani apaka. Temétxio txana:

—Kikiakori, hīte imarotari kaiāopokori txineiro aāpakapa aparīka īki. ²⁶ Hīte kenakotapekari Paoro sāpirenātakiti. Paoro txanāta: “Kākiti kamakiti kona teoso litxaua.” Kona ia tōpananini, kona Épesonanini, ikara atoko itxa. Ikini itixiti Ásia tixini auakanimoni ikara atoko itxa. Kaiāopokori kākiti Paoro sākire auīākani auapeka. Kaiāopokori kākiti !inirekaikari teoso ate kamakiti. ²⁷ Atxiīti kākiti misākirepiretari ate kamakiti. Atxiīti !inirekaikari aparīka. !Ikarananini. Atxiīti kākiti !ipaxitaikari ateosone Txiana misākiretiko aikoti. Ininiā atxiīti kākiti misākirepiretaro oa Txiana. Ikinimane Ásia tixini auakani teosonetaro oa. Ikini itixiti auakani teosonetaro oa —itxa Temétxio ninoamoni.

²⁸ Ninoa kenakotakasaakiri ikara sākiretxiti, omanākarauatana. Ninoa akirikata:

—Txiana, Épeso auakani teosone. Apiananiro oa —itxanātana ninoa.

²⁹ Ikinimane kākiti sitatxi auakani miteēkata, akiriāpokatana. Imaīkarina Paoro moianariakori, Kaio inakori, Arisitako inakori pakini. Ninoa Masetónia tixinikini. Ikosekaītokatana. Imimiteēkatana. Kākiti apotitiniātaūa aikotimoni anikaākana, miūroā itxana. ³⁰ Ikara Paoro imarotakasaaki, inirekari İroini kākitikata isākirauatini İkapani, txamari Xesosi sākire auīākani !auiritari iua İroini. ³¹ Ātikaka Ásia tixini auakani auīteakori, Paoro tirketani, iokanapireta Paoromoni:

—Kona piūroāpeko kākiti apotiitiniātaūa aikoti āki —itxarina iokanapirena.

³² Aiko āki ikinimane akiripoananikata. Apanakini akirikatakiti ipinimonipo. Apanakinipekana akirikatakiti ipinimonipo itxanātana, kotxi kaiāopokori kākiti txari:

—Kixikapa aāpotiitaua?

!Imarotarina ixika. ³³ Xoteoakori iuaā apotiitakaniua katikari Arexātri inakori ikinimane apisatoō, isākirauatini İkapani. Iuasaaki ōkitikari iuako kākiti iotokini İkapani, isākire ikenakotinina İkapani. ³⁴ Txamari ninoa imarotakasaakiri Arexātri Xoteo ininiāua, akiripoakatana ipi oara:

—Txiana, Épeso auakani teosone, Apiananiro —itxanātapikana.

³⁵ Eereka auītexi inakariau apoka ninoa apisatoō. Iua posotari ninoa iotokakini. Itxarina:

—Ikini itixiti auakani imarotari atenokara Épeso auakaninokara nīkatiniri ateosone Txiana misākiretiko aikoti. Apiananiro oa. Ninoa imarotari atenokara nīkatiniri kai oa İto atoko inakari iaxiti katxakakaro. ³⁶ Ikinimane imarotapekari ikara inakari, ininiākara hīotokako. Iteene hīxinikariko hīkamakiti tīkane. Maxikatīka !hākirinātape. ³⁷ Kotxi hīte minana naia kikiakori uaimoni, txamari !iītirīkarina tiitxi ateosone misākiretiko aikoti āki auakari. !Imisākirepiretarona ateosone. ³⁸ Temétxio, iuakata parīkauatakani pakini, nirekiniāri naia kateiamoni isinina, auapitika aiko kākiti misiritiko sāpiretikoātaā. Auapitika aauīteakori. Iuaā erekari isāpiretinirina maerekati naia kamakiti. ³⁹ Iuaīkana hītsoatiniā, sitatxi auakani auīteakori apotitakasaakia, hīsāpiretana ninoa himapokaerekatakiniti ninoa ōtākinini İkapani. ⁴⁰ !Apakata mixikanani himitekini, hākiripoakatini atoko hīkamini. Maxikatīka hākiripoanāta. Ixika !auari. Atxiīti Homanokari auīte txitaua maerekati akamakiti xika —itxana ninoamoni.

⁴¹ Eereka ipaniātana ninoa sini.

¹ Ninoa kākiti apotiitakaniua aapokomonina ikanapiriāka atoko, Paoro pīkapioretana Xesosi sākire auiākani. Imisākiretana. Ikamapoxokonitana. Iposo atoko itakanapapiretana. Isipe Masetónia tixinimoni. ² Īpirixititari Masetónia tixini. Aapokotxi apokaāpotakasaaki, isāpireāpotari Xesosi sākire kākitimoni. Isikataparaxiniretana. Eereka Akaiā tixinimoni apoka. ³ Iuaā ikaikota ipi āti pakini kasiriti. Eereka Paoro kaiamapeka maporo āki iereētiniua Síria tixinimoni isini ĩkapani. Iuasaaki, ikenakopiretari Xoteoakori okaenetiniri iua. Ininiākara Paoro:

—Masetónia tixinimonikanerako nikanapiriāko —itxa Paoro.

⁴ Sópato inakori Peréia sitatxitikiri sari iuakata. Piho inakori ākiri itxaua. Arisitako inakori, Sekōto inakori, Tesarónika sitatxitikini, ninoa apaka sari Paorokata. Kaio inakori Tepi sitatxitikiri apaka sari Paorokata. Txíkiko inakori, Tópimo inakori Ásia tixinikini, Tximótxio inakori pakini moianatari Paoro.

⁵ Iuasaaki nota Arókasi inakori iuakata naua. Paoro imoianariakorikata ĩkiika isinina. Nota, nimoianariakorikata sari Paoro tikini. Tóatxi sitatxiti Paoro ĩatapaua ate. ⁶ Pāo miātiākati níkiko ōti napaka atoko, Piriṗosi sitatxiti aiereētaua maporo āki Tóatxi sitatxiti asini ĩkapani. Síko pakini ōti napaka atoko Tóatxi aāpoka. Iuaā aaōkitana Paoro imoianariakorikata. Iuaā anapari āti semanati.

Paoro Txíkikitari Ipīkari Iuaīkana Auāki Inini

⁷ Tomatiko ōtisaaki Xesosi sākire auiākani apotiitaua komiri ixanakinina ĩkapani, Xesosi ipinini ixinikinina ĩkapani. Iuasaaki Paoro oerekanāteri Teoso sākire. Apaīkanōkapeka isāpirenauatapanika, kotxi katimatínikata isipe. ⁸ Ate apotiitiniātaāua aiko inopinita auakari iriko āki. Iuaā auari kaiāopokori tirikapi poniākari, ininiākara papatakari. ⁹ Iuasaaki ātokori Etxiko inakori topākanāta inopinita auakari sonaā. Paoro sāpirenauanātapika, ininiākara itapo inokaāpotari iua Etxiko. Eereka imaka. Iuasaaki ixipotatika. Xitipeka apoākata. Ninoa miteēkata iuamoni isinina, txamari !auaika. ¹⁰ Ininiā Paoro katxaka, sa itxa iuamoni. Isirīka iua ipīkari nopini, imaarata itxari.

—!Hīpīkarauatape. Auākipanikari —itxana ninoa.

Ininiā iuaīkana iua ātokori auākipeka itxa. ¹¹ Iposo atoko Paoro kanīka iuaīkana inopinita irikomoni. Komiri inika. Iposo atoko iuaīkana ni-noakata isākirauanātiniritika katimata itxa. Ikatimataāka atoko isipe Paoro. ¹² Eereka anikarina iua ātokori aapokomoni. Ninoa iteene poxokoniua iua auākipanika inini.

Miretomoni Sikiko Pirena

¹³ Iuasaaki Paoro paniātaua ate:

—Hite sari maporoā Asosi sitatxitimoni. Imiriūrako nota sari. Iuaā nota iereētaua hitekata —itxaua ate.

Ininiā ate sari iua apisa. ¹⁴ Asosi sitatxiti Paoro aōkitaua ate. Iereētaua maporo āki. Iposo atoko asa Mitxireni sitatxitimoni. ¹⁵ Iuaātaā aāpokasaaki, iuaīkana apotorika. Āti ōti napaka atoko, anapari Kio inakori takote pokomiriī. Āti ōti napaka atoko, Samosi inakori pokomiriī aāpoka. Iuaīkana āti ōti napaka atoko, aāpoka Mireto sitatxiti. ¹⁶ Iuasaaki Paoro !inirekari Épeso ioporokoti apokitini, kotxi !inirekari auapokotini Ásia tixiniā. Ikati-maritaua, kotxi iposotiniāri, inirekari Xerosareē apokini. Pētekósitxi kiiniriti apisapanika apokini inireka.

Xesosi Sākire Auiākani Auīteakori Ōtākikiko

¹⁷ Ininiã Paoro Mireto sitatxiti auakasaaki, iokanapireta Épeso sitatxiti-moni. Ipïkapiretana Xesosi sãkire auïãkani auïteakori. ¹⁸ Ninoa apokasaaki, Paoro misãkiretana ninoa:

—Himarotari merepitipanika Ásia tixini napokasaaki, eereka hïtekata nauakasaaki, himarotari ikiniõtika nauini hïtekata. ¹⁹ Iuasaaki nïparïkauata Apiananiri nirekakiti nikamini. Na niuikaua. Iteene nitxiapata. Xoteoakori nirekari okinino, ininiã nimaxirexinire auapitika iuasaaki, iuaritika nikamari Apiananiri paniãtakiti. ²⁰ Himarotari na nikipatarï ipixini Teoso sãkire. Nisãpiretapekai hïte imakinika Teoso sãkire hïte ereka hinini ïkapani. Kãkiti apotiitiniãtaãua noerekai Teoso sãkire. Apaka nisari ãti haãpokomoni, eereka ãti haãpokomoni, eereka ãti haãpokomoni, nitxaãpota Teoso sãkire noerekinii. ²¹ Xoteoakori, Xoteo minakanuia apaka nisãpiretari nimarotakiti Teoso oerekakiti maerekanitxi itakanapinina ïkapani, Teoso paniãtakiti ikaminina ïkapani. Nisãpiretari nimarotakiti Teoso oerekakiti, Xesosi Apiananiri sãkire auïkinina ïkapani.

²² —Ininiã nota sariko Xerosareë, kotxi Erekarï Matamatakoti paniãtano nota iuaã nisini. !Nimarotari kiatokouako ninaãkapaniko iuaã. ²³ Ikini sitatxiti nauakasaaki, Erekarï Matamatakoti pinitano: “Piteniko takapeëkako kateia ãki iuaã. Iuaã pimisiritiko auapitukako,” itxano. Iuananira nimarota Xerosareë napokasaaki. ²⁴ Ikara nimisiritiko sãkiretxiti kona mamakari nixinikakiti, kotxi kona nitiretari nauini ïkorapokoriti. Xesosi Apiananiri paniãtakiti parïkatxiti ninireka nikamini. Nipoxokoniritika nauini mapotõkirepe nitxako. Xesosi paniãtano Teoso iokanapirena erekarï Teoso tiraõki nisãpiretini kãkiti.

²⁵ —Nisãpiretapekari Teoso auïtetxi ininiãua pirena hïte sauaki nauakasaaki. Uatxa nimarotari hïte hïkinika kona hãtamataikanoko nota. ²⁶ Ininiã hïxinikapikariko nisãkire iaõka uatxa nisãpiretakiti. Kãkiti hïte sauaki auakari pïpanakiniã, Teoso kimapore imimarotakaniã, kona nota xikani. ²⁷ Kotxi nisãpiretapekai hïtemoni imakinika Teoso iokanapirena. ²⁸ Erepaniko, katokinani hïtxako maerekati apokini hïtemoni. Erekarï Matamatakoti sikapekarï kãkiti hïtemoni Xesosi sãkire hõerekini ïkapani, ininiãkara hinïkatana ninoa. Soti auïte nïkatakani atokokana hïtxauako. Ninoa hïpiraakori atoko. Ininiã hïtiretanako ninoa kãkiti, kotxi Teoso nakitiakori itxauana. Teoso ãkiri ipina ninoa ïkapani, iua nakitiakori ininiuana ïkapani. ²⁹ Nimarotari kãkiti apokapitakako hïtemoni nota sini tikini. Ninoa nirekarï ixipokinirina hïparïka Teoso ïkapani. Xapakori patari imaïkini monõkoni atoko itxako ninoa hïte sauaki imonõkoni apokini. Ininiã erepaniko. Katokinani hïtxako. ³⁰ ãti õti kãkiti hïte oereëkini sãpiretakiti na atãoni. Koketakori sãkiretxiti isãpiretana apanakini Xesosi sãkire auïãkani. Ikara xika apanakini auikari ninoa sãkire, ininiãkara isanako ninoakata. !Auikaikarina hïte sãkire. ³¹ Ininiãkara erepaniko. Hïxinikariko ipi anokanani ãti anokanani pakini nota õtãkikanãtai hïte. Noerekanãtai hïte Teoso sãkire ïkanõka, pokamara pakini. Ikiniõtika noerekai hïte. Nitxiapata nõtãkikasaakii, kotxi nitiretai.

³² —Uatxa nisikai hïte Teosomoni, iua nïkatinii ïkapani. Nitakanapari Teoso sãpirena hïtekata, kotxi iua sãpiretari isikini ïkinipoko erekarï. Iuara sika-posotiiretai hïte. Iuara sikai hïte erekarï inïkatakiti, inakitiakorimoni isikini ïkapani. ³³ !Nixikotari apanakini. !Nimaãkatari itxineirote, imãkana pakini.

³⁴ Hïte imarotapitikari notaka parïkauata imakinika ninireëkiti, nimoianariakori nireëkiti apaka niamotini ïkapani. ³⁵ Ikara atoko aparïkauatinã, atiretana kãkiti maposotakanuia. Nota parïka oerekepekai hïte ikara atoko hïkamini. Maxinikari Xesosi Apiananiri sãkire. Iua txari: “Teoso takari erekarï kãkitimoni iua amonitakiti apakapakasaaki. Teoso takari

apia erekari sikarauatakarimoni,” –Paoro txana ninoa Épesokinimoni, Teoso sãkire auiãkani auñteakorimoni.

³⁶ Iuasaaki Paoro kapotoreëkaua ninoakata. Imisãkiretarina Teoso. ³⁷ Ninoa ikinimane txiapakata. Imaarãkarina Paoro, apitxoka itxarina. Itakapiretanaparina. ³⁸ Apiata imatinanina, kotxi Paoro sãpiretana ninoa, ! aõkitaikarina iua. Isana iuakata maporomoni.

21

Paoro Sari Xerosareëmoni

¹ Maporo aãpokasaaki, ate takapiretanapana ninoa Épesokini. Eereka asipeka. Kosi pokomiriütimoni asakatapitipo. Iuaã aãpoka. Katimatinĩkata asa Hotxi ioporokotemoni. Eereka Pátara sitatxitimoni asa. ² Iuaã aãpokaro ãto maporo Penísia tixinimoni sikaro, ininiã aiereëtaua atoko ate potorika asini. ³ Apaniãxiti apokasaaki, aãtamatarı Xipri pokomiriüti. Anapari Xipri pokomiriüti asanaremoni. Asari Síria tixinimoni. Aãpokita Txiro sitatxiti, kotxi iuaã tiitxi maporo ãki auakari kaikota. ⁴ Iuaã ate aõkitari kãkiti Xesosi sãkire auiãkani, ininiã akaikota ninoakata ãti semanati. Ninoa txari Paoro:

–Xerosareëmoni ! pisipe, kotxi Erekari Matamatakoti sãpiretapekaua ate pimisiritiko tũkane aua iuaãtaã –itxarina.

⁵ Apotorikini õti apokasaaki, ate sipe iuaĩkana maporomoni. Ninoa ikinika, İtanoroakorokata, imiakorikata, isana atekata sitatxi İtiniã ioporokomoni. Akinika akapotoreëkaua ikipatxiteë, misãkireta atxari Teoso. ⁶ Atakapiretanapana iposo atoko, ate iereëtaua maporo ãki. Ninoa kanapiriã aapokomonina.

⁷ Ininiã Txiro sitatxiti atakanapa. Iuaĩkana apotorika. Eereka aãpoka Pitoremaita sitatxiti. Iuaã ate misãkiretana kãkiti Xesosi sãkire auiãkani. Akaikota ãti õti ninoakata. ⁸ Katimatinĩkata iuaĩkana apotorika asini. Eereka aãpoka Sesaréia sitatxiti. Iuaã Piripi inakori aapokomoni asa. Teoso sãkire sãpiretakari itxaua Piripi. Xesosi moianariakori Xerosareë auakasaakina, ninoa mereëri iua Piripi, apikomoni kikiakori seisi pakini, ninoa imoianatinina İkapani. Ate kaikota Piripi aapoko. ⁹ Piripi auari ipi ipi pakini imiakoro ãtokoropanika. Ninoa apaka sãpiretari Teoso iokanapirena kãkitimoni. ¹⁰ Ate auanapa iuaã mapaõti. Iuasaaki Teoso sãkire sãpiretakari Ákapo inakori Xotéia tõpa potorikakari apoka Piripi aapoko. ¹¹ Ikosekari Paoro makiomatare. İtxikari iuako ikitikata. Itxari:

–Erekari Matamatakoti txari: “Xoteoakori Xerosareë auakani iaxirikapiriko ia makiomataretxi nakititakari ia atokokanerako iaxirikiko. Eereka isikarina Xoteo minakonimoni” –Ákapo txaua ate.

¹² Ikara akenakotakasaaki, ate apanakini iuaã auakanikata txari Paoro:

–Paoro koniko !pisipe Xerosareëmoni –atxari.

¹³ Txamari Paoro:

–Kinirepa hĩtxiapanãta? Hĩte kamamatinanitano nota. !Nimaãkatari ni-axirikiko Xerosareë. !Nimaãkatari nokiko apaka Apiananiri Xesosi nauikini xika –itxaua ate.

¹⁴ !Ikãpitari asãkire. Ininiã ate:

–Jaõpe. Ikara atoko ininiã, ate nirekari Teoso nireëkiti kamiko –atxa.

¹⁵ Mapaõti inapaka atoko, aãiamata Xerosareëmoni asini İkapani. Eereka apotorika asini. ¹⁶ Apanakini Xesosi sãkire auiãkani Sesaréiakini sari atekata apaka. Menasõ inakori aapoko ninoa anikaua ate, kotxi iuaã anirekari akaikotini. Menasõ Xipri pokomiriütikiri. Okananipeka iua auikari Xesosi sãkire.

Paoro Apoka Xerosareë

¹⁷ Xerosareë aãpokasaaki, Xesosi sãkire auiaãkani apakapaua ate ipoxokonir-itikana. ¹⁸ Katimatinĩkata Paoro sari atekata Txiakomoni aianapokotini ikapani. Ikinimane Xesosi sãkire auiaãkani auĩteakori aua iuaãtaã. ¹⁹ Paoro misãkiretana. Isãpiretana imakinika Teoso kamakiti Paoro parĩkaã Xoteo minakaniua sauaki iparĩkauatakasaaki. ²⁰ Ikara ikenakotakana atoko, ninoa txari:

–Peerekari Apiananiri –itxana.

Eereka itxarina Paoro:

–Aĩtari, pimarotari kaiãopokori Xoteoakori auikiniri Xesosi sãkire. Ninoa auikari Moisesini oerekakiti sãkiretxiti apaka. ²¹ Apanakini sãpiretapekana ninoa: “Paoro oerekanãtana Xoteoakori, Xoteo minakaniua sauaki auakani, Moisesini oerekakiti itakanapinina ikapani. Oerekanãtana ninoa Teoso takaõtxikare imiakori itoã imatakakani ikapani. Oerekanãtana ninoa aãtokiriakorini oerekakiti itakanapinina ikapani.” Ikara atoko itxanãtana ninoa. ²² Ninoa !imarotapanikari pite uai apokini, ininiãkara natokopa atxatari akaminiri, kotxi anirekari ninoa imarotiniri apanakini sãpiretakiti poxiene inini. Anirekari ninoa imarotiniri pite auikapitikari Moisesini oerekakiti. ²³ Ininiãkara ia pikama. Naia ipi ipi pakini kikiakori misãkiretari Teoso. Isãpiretarina Teosomonikari ikamaenetakitina tĩkane. ²⁴ Ininiã pisa naiakata Moisesini oerekakiti iaõka hĩkamini ikapani, ininiãkara hĩkapaãtaua Teoso ikapani. Pite iĩkitxitari naia kii kixatikoko ikapani. Ikara atoko ininiã, ikinimane imarotariko poxienetapa apanakini sãpiretakiti. Ninoa imarotariko Moisesini paniãtakiti pikamini. ²⁵ Ninoapekana, Xoteo minakaniua Xesosi sãkire auiaãkanipekana, ate iokanatsopapeka ninoamoni. Asãpiretana ate xinikakiti: –!Hinikapiriko nipokori teoso kãkiti kamakitimoni sikakori. !Hinikapiri arẽkatxi. Manotsãatakori xini !hinikape. !Hĩsirĩkape pĩtanoro minakotokatika. !Hĩsirĩkape pĩtaniri minakotikatika. Ikara atoko atxa ate ninoamoni aiokanatsopatinĩ –itxarina Paoro.

²⁶ Ininiã Paoro anikana ninoa kikiakori. Katimatinĩkata ninoa kipaãtaua Teoso ikapani Moisesini oerekakiti iaõka ikaminina ikapani. Eereka Paoro iroã Teoso misãkiretiko aikotiã. Isãpiretari sasetotxi ninoa keto iĩtona arokiko xipokini õti, kotxi iuasaakiko sasetotxi apakapari ninoa sikakiti Teosomoni.

Paoro Maĩkiko

²⁷ Iua semanati kaiaapeka ixipokini inakasaaki, ãtikaka Xoteoakori Ásia tixinikini atamatari Paoro Teoso misãkiretiko aikoti ãki. Ninoa misãkirepiretari Paoro ikinimane kãkiti iuaã apotiitakanimoni, ininiã ninoa sãkire xika ikinimane omanatari Paoro. Eereka imaĩkarina Paoroni. ²⁸ Ásia tixinikini akiripoata:

–Hĩte Xoteoakori himoianataua ate. Ia kikirã oerekari ikini itixitikini omanatinina Xoteoakori. Iara oerekari kãkiti Moisesi paniãtakiti imakamãkani. Oerekari kãkiti mapaxitakarini ia Teoso misãkiretiko aikoti. Īkoraasaaki !ipaxitari ia aiko, kotxi imĩroãna Xoteo minakaniua aiko ãki, ininiãkara itxikotari ia aiko Teoso nakiti –itxanãtana ninoa.

²⁹ Ikara itxana, kotxi mitxi itikarina kiki Xoteo minakatiua Tõpimo inakori Épeso sitatxitikiri Paorokata tĩpokotini sitatxi apanĩkaki. Txamari Paoro !anikari iua aiko ãki. Ininiã iuaãkatarina Paoro anikapekari iua aiko ãki. ³⁰ Ininiã iua Paoro maĩkiko pirena iaripireta. Ikininape sitatxi auakani kenakoenetakasaakiri ikara, imitekana aikomoni. Imaĩkarina Paoro. Ikosekaĩtotarina. Teoso misãkiretiko aikotiã impipokiãkatarina Paoro. Iuasaakipeka aiko tore totaãkapeka. ³¹ Kãkiti iuaã apotiitakaniua nirekari

okiniri Paoro. Sotatoakori Homano inakaniua ninoa auíte kenakoenetari ikinimane Xerosareë auakani neenamauatini. ³² Iuasaakipeka sotatoakori auíte anikana sotatoakori. Imitekana Paoromoni. Käkiti atapakasaakina sotatoakori auíte sotatoakorikata, iuasaakiua iotoka Paoro iarítatinina.

³³ Ininiã sotatoakori auíte maikari Paoro. Ipaniãtana sotatoakori Paoro iaxirikini ipi kohëtxiã. Iposo atoko ipimaãna kãkiti itakote auakani:

—Kiripa ia kiki? Kixikapa ia atoko inaãka? —itxana ninoa.

³⁴ Ininiã ätikaka iuaã auakani, ia xikara. Apanakinipekana äti xikara, itxaãponãtana isãkirena. Sãkiretxi kaiãopokori ininiã, iua !imarotari atão ixika. Ikara atoko ininiã, sotatoakori auíte paniãtana sotatoakori, ninoa aapokomoni anikinirina Paoro. ³⁵ Sotato aapokokiri kanikoatxiã apokasaakina, sotatoakori õtanõkari Paoro ïto, kãkiti mamaikakaniri ïkapani.

³⁶ Kotxi kaiãopokori kãkiti itikini ïkani akiripoakata:

—Hõkariko. Hõkariko —itxanãtana.

³⁷ Paoro sotatoakori aapoko äki ïroãnapanoka inakasaaki, Paoro txari sotatoakori auíte:

—Apakata pite nimisãkiretini?

Ininiã sotato auíte tikoka.

—Pite imarotari Krekoakori sãkire —itxari Paoro.

³⁸ —Kona piteni Exito tixinikiri pitxataua? Kona piteni kitatiki kamanãtari neenamãtxi auítetxiakori põmanatini? Kona piteni anikatana ipi ipi pakini mio kokanirini ixaminakitekãtana äparaã makipakaniãtaã? —ipimaãri Paoro.

³⁹ Ininiã Paoro:

—Kona notani. Xoteo nitxaua. Nota Taaso sitatxitikirirano nota. Taaso sitatxiti, sitatxi apiari inakari, Sirísia tixinikiri. Pauritano nakira kãkiti nimisãkiretini —itxari iua.

⁴⁰ Ininiã sotatoakori auíte:

—Ari, pimisãkiretana.

Inakasaakiri Paoro tima kanikoatxiã. Iuasaaki õkitikari iuako kãkiti akiritini iotokini ïkapani, isãkire ikenakotinina ïkapani. Ikinipoko iotokasaaki, iua sãkiranuata ninoakata Xoteo sãkireë, Epiráiko sãkireë.

22

Paoro Misãkiretari Xerosareë Auakani

¹ Ininiã Paoro:

—Nitariakori, niriakori, hikenakotariko nisãkire. Na maerekati na nikama. Erekarinokara nikama —itxa.

² Ninoa kenakotakasaakiri ninoaka sãkireë, Epiráiko sãkireë isãkiranuati, !akiritãikana. Itsoriããtana.

³ Ininiã Paoro:

—Xoteopitikanano nota. Niponaniã Taaso sitatxiti, Sirísia tixiniã. Eereka uai Xerosareë sitatxiti napoka. Uaikara naneë. Iuasaaki koerekareri kimatireri Kamarieo inakori oerekano imakinika. Iua oerekano aksiomaneakorini kitxakapirãkarini paniãtakiti imakinika. Nota parãkauata Teoso ïkapaninokara, hïte parãkauatini atokotxikana. ⁴ Mitxipeka nota kapokotana kãkiti Xesosi sãkire auiaãkani, Xesosi kimaporeë sikani. Nimaikana, kateia äki oka nitxana. Kiki, sito pakini nimaika. Nota xika ninoani ipïpe. ⁵ Sasetotxiakori auíte apiatakari, Xoteo auíteakori pakini imarotari atãopitika nisãkire. Ninoakara sikano aãtsopa iõkatsopakitina auítetxiakorimoni Tamásiko sitatxiti auakanimoni nanikini ïkapani. Iua aãtsopa auiritano Xesosi sãkire auiaãkani nimaikini. Ininiã nota sari iuaã

Xesosi sākire auiākani nimaīkini ĭkapani, Xerosareēmoni nimikanapiriinina ĭkapani imisiritikona tĭkane.

⁶ –Apaniāxiti Tamásiko sitatxiti takote napokaāpotakasaaki, patimari iotximere iaxitikiri apoka notamoni. ⁷ Xiti nirika. Nikenakotari nakiriuaakatiko: “Saoro, Saoro, kinirepa pite misiritano nota?” itxano.

⁸ –Ininiā nota: “Apiananiri, kiriparai pite?” nitxari.

–Ininiā iua: “Nota Xesosi Nasaree sitatxitikirikarano nota. Pimisiritakitarano nota,” itxano.

⁹ –Nimoianariakori atamatari iua iotximere, ininiā ipĭkarauatana. Na ikenakotarina nota misākiretakari. ¹⁰ Ininiā nota: “Apiananiri, kipa pinireka pitemoni nikamini?” nitxari.

–Ininiā Apiananiri: “Ereē pitima. Tamásikomoni pisa. Iuaātaā pisāpiretaākako imakinika Teoso nireēkiti pikamini ĭkapani,” itxa Apiananiri notamoni.

¹¹ –Iua iotximere xika mōsiāreti nitxaua. Ininiā nimoianariakori kanōpiāpotano. Anikanona Tamásikomoni. ¹² Iuaātaā aua kiki Ananiasi inakori. Iua kamapikari akiomaneakorini kitxakapirĭkarini paniātakiti. Ikinimane Xoteoakori Tamásiko auakani iteene paxitari iua. ¹³ Iua ina notamoni. Nota takote apoka itxa. Itxano: “Nitari Saoro, kōsiāre pitxako,” itxano nota.

–Iusaakipeka nota kōsiārepeka nitxa. Natamatari iua. ¹⁴ Iua: “Akiomaneakorini Teosone mereēi pite inirekakiti pimarotini ĭkapani. Teoso mereēi pite Erekarinoka Kamakari patamatini ĭkapani. Teoso mereēi pite Erekarinoka Kamakari sākire pikenakotini ĭkapani. ¹⁵ Pitekarako sāpiretariko itanapoko kākitimoni atāo Xesosi pirena, patamatakiti, pikenakotakiti pakini. ¹⁶ Ininiā kona okanani pitxape. Pōkitikaua. Pipatxisataākako. Pakiritariko Apiananiri uāka, ininiā iua makatzakari pimaerekani,” Ananiasi txano nota.

¹⁷ Eereka nikanapiriā Xerosareēmoni. Teoso misākiretiko aikotimoni nisa. Iuaā Teoso nimisākirenātakasaaki, nitaponetari Apiananiri. ¹⁸ Natamatari iua. Itxano nota: “Katima pitxako. Xerosareē posipika uatxapeka. Uai auakani laulikapaniri nota pirena pisāpiretakiti,” itxa.

¹⁹ Ininiā nota: “Apiananiri, nota nitapekana kākiti pisākire auiākani ikini aikoti Xoteo apotiitiniātaāua. Niāsokapekana. Kateia āki nitakapekana. Ninoa imarotapitikari ikara nikamakiti. ²⁰ Pite sākire sāpiretakari Estevāo inakori okikosaaki, nota aua iuaā. Iusaaki ninĭkatari kokanirini māka inopinikiri. Nota apokaerekatari okinirina iuani.”

²¹ –Ininiā Apiananiri: “Pisipeka. Ōtakoxiti niokanatai Xoteo minakoni,” itxano –itxa Paoro kākitimoni.

Paoro Homano Itxaua

²² Iusaakipeka Xoteo minakonimoni isini xika, kākiti iuaā apotiitakaniua !nirekaikarina Paoro sākire ikenakotinina. Omanākarauata. Akiripoakatana:

–Hōkariko. !Erekari auapanika inini –itxana.

²³ Akiripoakatana. Iōkokarina imākana inopinikiri. Kipatxi okarapekatana apaka, kotxi omanākarauata. ²⁴ Ininiā sotatoakori auĭte paniātana sota-toakori anikiniri Paoro aiko kaikori āki, sotatoakori aapoko āki. Ipaniātana Paoro ixirokitatiko tĭkane, kotxi inirekari imarotiniri Paoro omanatiko xika. ²⁵ Paoroni ĭtxikasaakina ixirokitatiko ĭkapani, Paoro pimaāri sotato itakote timakari:

–Erekari atxĭti hĭte xirokitatiniri kiki Homano inakori maxikatĭka? Homano nitxaua. Kixikapa hĭte nirekari hĭxirokitatinino? –Paoro txari iua.

²⁶ Ininiākara sotato sarĭ iauĭtemoni.

—Iua kiki amaĩkakiti Homano itxaua iua, ininiäkara erepaniko iuamoni pikamakiti tĩkane —itxari.

²⁷ Ininiã sotatoakori auĩte sari Paoromoni.

—Pisãpiretano. Homanokani pitxataua? —itxari Paoro.

Ininiã Paoro:

—Iuapitkarano nota.

²⁸ Sotatoakori auĩte txari:

—Nota Homano nitxaua, kotxi nĩkitxitari aãtsopa ĩki Homano nininiua ĩkapani. Pakaroneri.

Ininiã Paoro:

—Niponaniãkasaaki Homano nitxapekua —itxa.

²⁹ Iuasaaki Paoro xirokaaritakani patimari isinina. Sotatoakori auĩte pĩkarauata, Paoro Homano ininiua imarotakasaaki, kotxi iua paniãtana sotaotxari iĩtxikiniri Paoro.

Paoro Xoteo Auĩteakori Apisatoõ

³⁰ Katimatinĩkata sotatoakori auĩte koxirikari Paoro. Inirekari imarotiniri Xoteo apoĩtiniri, ininiã ipĩkapiretana sasetotxi auĩteakori, Xoteo auĩteakorikata. Ipaniãtari Paoro itimini ninoa apisatoõ.

23

¹ Ininiã Paoro iteene mixinitoõtana Xoteo auĩteakori.

—Nitariakori, erekari nikaminiritika, uatxa uai naua. Teoso nireẽkitinoka ninireka nikamini. Teoso imarotari ikara, kotxi imarotari nixinikakiti nãkixinireẽ —itxa.

² Sasetotxiakori auĩte apiatakari Ananiãsi inakori lipotxitari Paoro sãkire, ininiã ipaniãtari Paoro takote auakani aritiniri Paoro sona. ³ Ininiã Paoro:

—Teosokarako aritaiko pite. Aapokotxi tare txĩtatakori atoko pitxa pite, kotxi mapara peerekai, txamari pãkixinireẽ maerekatinoka. Pite topãkanãta ereẽ nota pikenakotini ĩkapani aksiomaneakorini paniãtakiti iaõka pikamini ĩkapani, txamari pipaniãtari niaritiko. Aksiomaneakorini na paniãtari ikara atoko inakari. Pite kona kamari ninoa paniãtakiti —Paoro txari iua auĩtetxi.

⁴ Paoro takote auakani txitari Paoro:

—! Erekari pimisãkirepiretiniri sasetotxi auĩte apiatakari Teoso nakiti —itxana.

⁵ Ininiã Paoro:

—Nitariakori, !nimarotari iua sasetotxi auĩte apiatakari ininiua, kotxi Teoso sãkire iõkatsopatakori txari: “Kona pimisãkirepiretapiri hãauĩte.”

⁶ Paoro atamatana kãkiti iuaã apotiitakanua. Apanakini satoseoakori itxauana. Apanakini pariseoakori itxauana. Ininiã itapararitika isãpiretana: —Nitariakori, pariseokarano nota. Pariseo akirikarano nota. Uai nota minaãka hĩte apisatoõ, kotxi nota auikari ipĩkanipeka õkitikiniua, iuaĩkana auãki ininina ĩkapani —itxana ninoa.

⁷ Iuasaakipeka pariseoakori, satoseoakori pakini taparakienatakakaua, kotxi pariseoakori auikari Paoro sãkire. Satoseakori !auikari Paoro sãkire.

⁸ Kotxi satoseoakori !auikari ipĩkari õkitikiniua, iuaĩkana auãki inini ĩkapani. Kona auikarina Teoso nitiriakori iaxitikini auini. Kona auikarina matamatakoni auini. Pariseoakori auikari ipĩkari õkitikiniua, iuaĩkana auãki inini ĩkapani. Auikarina Teoso nitiriakori auini. Auikarina matamatakoni auini apaka. ⁹ Iuasaaki ikinimane apia akiripoakata. Itaparakienatakakauana. Pariseoakori, kaiõkatsoparerini inakoni, õkitikaua. Itapararitika itxana:

—Atemoni ia kiki !ikamari maerekati. Atxiĩti matamatakoti, atxiĩti Teoso nitiri iaxitikiri sãkirauata iuakata. Ininiãkara !apakata aniatiniri Teoso —itxana.

¹⁰ Ninoa iteene taparakienatakakauana, ininiã ineenamauaaritana. Sotoakori auíte píkari ninoa okiniri Paoro, ininiã ipaniãtana sotatoakori:

—Hísako kãkiti sauaki apaníkaki. Iuaã himakatzakariko Paoro. Hanikariko sotatoakori aapokomoni —itxana.

Ininiã anikarina iuaã.

¹¹ Áti Íkanõkati Apiananiri apoka Paoromoni. Paoro takote itima. Itxari:

—Kataparaxinire pitxako. Pisãpiretapekari nota pirena uai Xerosareë. Apaka pisãpiretariko nota pirena Homa sitatxiti —itxari.

Xoteoakori Nirekari Okinirina Paoro

¹² Katimatiníkata apanakini Xoteoakori apotiitaua. Ixinikarina Paoro okini Íkapani. Ninoa txari:

—!Anipokotapani, !aãtapani, Paoro aõkini apisa —itxana.

¹³ Ninoa Xoteoakori koarëta apikomoni. ¹⁴ Eereka ninoa sari sasetotxi auíteakorimoni, kiomãtxiakori pakinimoni. Ninoa txana:

—Ate okaenetari Paoro. !Anipokotapani iua aõkini apisa. ¹⁵ Ininiã híte aãuíteakori amanaãriko sotatoakori auíte, imininiri Paoro uai. Hísãpiretariko sotato auíte, hinirekari apikomoni hípimainiri Paoro. Iuusaaki ate iãtapariko kimaporíã aõkiniri Íkapani —itxana ninoa.

¹⁶ Paoro itaro ákiri kenakoenetari Paoro okaenetiko, ininiãkara Íroã sotatoakori aapoko, sãpireta itxari iritanirimoni. ¹⁷ Ininiã Paoro misãkiretari sotato auíte poiãori.

—Panikari ia átokori hãuítimoni. Iminapiretakiti inireka isãpiretiniri iua —itxa.

¹⁸ Ininiã sotato auíte poiãori anikari iua auítimoni.

—Ate maĩkakiti Paoro misãkiretano nota, ia átokori pitemoni niminini, kotxi inirekari isãkirauatini pitekata —itxari.

¹⁹ Ininiã apiari anikari iuakoã ninoanani auiniãtaã. Ininiã iua:

—Kipa pinireka pisãpiretinino? —itxari.

²⁰ Ininiã iua átokori apakapiretari:

—Xoteo auíteakori nirekari amanainii katana pokamara Paoro panikini ninoamoni. Isãpiretainako pite, inirekapanikarina apikomoni Paoro sãkire íkenakotinina. Txamari paxirari ninoa sãkire. ²¹ !Pauikapena, kotxi koarëta apikomoni kikiakori kipatauako kimaporíã Paoro iãtapinina, okinirina Íkapani. Ninoa kikiakori txapeka !inipokotaikana, !iãtaikana, Paoro imokakinina apisa. Ninoa iposopeka kimaporíã iãtapinirina Paoro. Ninoa iãtapari ninoa nirekakiti pikamini —itxari sotato auíte.

²² Ininiã sotato auíte:

—!Pisãpiretapiri notamoni pisãpiretakiti apanakinimoni.

Ininiã lokanatarari átokori ikanapiriini aapokomoni.

Paoro Iokanataãka Périsi Inakorimoni

²³ Iposo atoko sotato auíte píkapioretana ipi sotatoakori auítetxi poiãoni inakaníua. Imisãkiretana:

—Hãpotiitana tosëtosí sotatoakori ikitiã sikani, setëta sotatoakori kavaro nopini sikani, tosëtosí sotatoakori meretaua anikakani pakini. Iposope hĩtxako ia Íkanõkati novi oara hĩpotorikini Sesaréia sitatxitimoni hĩsini Íkapani.

²⁴ Kavaroakoro hĩsikari Paoro, oa nopini isini Íkapani. !Hãuiritapiri Paoro okiko. Hanikari Paoro Homanoakori auítimoni Périsi inakorimoni —itxana ninoa.

²⁵ Iposo atoko sotato auíte iõkatsopata:

²⁶ Nota Krãotxio Arísia inakorino iõkatsopata apiarimoni, pite Périsi aãuítimoni. Ereëkai. ²⁷ Ia kiki Paoro inakori Xoteoakori maĩkakiti. Ninoa nirekari okiniri. Nota, nisotatoneakorikata makatzakari iua,

kotxi Homano itxaua. ²⁸ Ninirekari nimarotiniri kixikapa ninoa nirekari okiniri Paoro, ininiäkara nanikari iua Xoteoakori auñteakori apotiitiniätaäua. ²⁹ Iuañ nimarotari ixika ! auari kateia äki ikaikotini ïkapani. Ixika ! auari ipinini ïkapani. Ninoa apoñtari iua ninoa atokiriakorini paniñtakiti imakamakani xika. ³⁰ Nikenakopiretari Xoteoakori okaenetiniri Paoro, ininiä niokanatarari iua pitemoni. Nipaniätana Paoro apoñtakani isäpiretiniina Paoro kamakiti. Iananirako niökatsopata. Ereëpiko, itxa sotato auñte säkire Périsimoni.

³¹ Sotatoakori auñte paniätiniri atokokana sotatoakori anikari Paoro. ïkanöka anikarina Ätxipatiritxi sitatxitimoni. ³² Katimatinïkata sotatoakori ikitiña sikaninanira kanapiriñ sotato aapokomoni. Kavaro nopini sikani anikari Paoro apikomoni. ³³ Anikarina Sesaréia sitatxitimoni. Isikarina Paoro iökatsoparikata auñtetximoni, Périsi inakorimoni. ³⁴ Ininiä iua atat-sopatarari iua iökatsopari. Iposo atoko ipimañri Paoro:

—Kitixinepa paua? —itxari iua.

Ininiä Paoro:

—Sirísia tixinikirirano —itxa.

³⁵ Ininiä Périsi txari:

—Pikamapiretakini apokasaaki, nikemarike pisäkire —itxa.

Ininiä ipaniätana sotatoakori:

—Erotxini kamakiti aikoti äki hinïkatariko Paoro.

24

Paoro Apoñtiko Pirena

¹ Sïko öti auakasaaki, sasotetxiakori auñte apiatakari Ananiási inakori sari Sesaréia sitatxitimoni. Apoka iuañ kiomätxiakorikata, kiki Tétoro inakorikata apaka. Iua Tétoro käkiti ïkapani kasäkireri käkiti misiritiko mereëkari apisatoö. Ninoa apoka Périsi apisatoö Paoro apoñtinina ïkapani. ² Ninoa apokasaaki, sotato minari Paoro Périsi apisatoö. Iposo atoko Tétoro akiritaäka isäkirauatini ïkapani. Ininiä Tétoro apoñtari Paoro:

—Périsi, apiari pitxaua. Auñteti kimatireri pitxaua, kotxi mapakanani atixine neenamtxi ! auari. Mitxi kaiñopokori maerekati kamakori. Uatxa maerekati poiñoöpota, kotxi pite kamari erekari käkiti ïkapani. ³ Erekapitikari pikamakiti ate ïkapani. Ate apokaerekatarari. ⁴ Kona ninirekari niomakotetinini pite, ininiäkara nisäkire poiñooka apikomoni nisäpiretai, ininiä pikenakotari nisäkire.

⁵ —Ia kiki ! erekari. Pamonoñkoniri. Itxïkitakari Xoteoakori neenamauatini ikini itixiti. Kiki Nasaree sitatxitikiri säkire auñäkani auñte itxaua iua Paoro. ⁶ Teoso misäkiretiko aikoti imapaxitakanisaaki, ate maïkari iua. Akiomaneakorini oerekini atoko atxamariko Paoro. ⁷ Txamari iusaakipeka sotatoakori auñte Arísia inakori apoka iuañ. Imakatzakari Paoro itaparar-itika ate sauaki. ⁸ Eereka Arísia paniätana pitemoni ainini. Pite pimañriko Paoro, ininiä pimarotari asäpiretakiti inipitika inini —Tétoro txari Périsi.

⁹ Iusaaki Xoteoakori iuañ auakani:

—Ari, inipitikara isäkire —itxarina Périsi.

Paoro Säkire Périsi Apisatoö

¹⁰ Iposo atoko Périsi paniätari Paoro isäpirenauatini. Ininiä Paoro: —Nimarotapitikari kona uatxakani ate tixine auakani misiritiko mereëkari pitxaua. Ininiäkara nota apokaerekatarari pitemoni nisäpiretiniri nikamakiti.

¹¹ Tosi öti pakini napakari nisa Xerosareëmoni Teoso nimisäkiretini ïkapani. Pipimañri apanakini atäokani nisäkire. ¹² Nanera ïkenakotari nota txitiniri

áti Teoso misáki-retiko aikoti áki. Ikininape Xoteo apotiitiniátaãua aikoti áki !atamatarina neenamatzixi nikamákitakini. Átiátaã apaka !atamatarina nitxíkitakiniri kákiti neenamatzixi ikaminina. ¹³Nanera maxikatíika kamapiretano nota. !Itikanona nota maerekati nikamini. ¹⁴Nota auikari Xesosi sáki-re. Ia atão. Naneramoni Xesosi sáki-re na atão. Nota paríkauata ate atokiriakorini Teosone íkapani Xesosi sáki-re níkipítakasaaki. Moisesini paniátakiti apaka nauika. Teoso sáki-re sápiretakanini íõkatsopatakiti apaka nauika. ¹⁵Nanera auikari Teoso ókitikinina ikininape kákiti ípíkani. Erekarini, maerekani apaka ókitikauako iuaíkana auáki ininina íkapani. Nota apaka auikari íkara. ¹⁶Íkiniótika ninirekari atãonoka nikamini Teoso íkapani, kákiti íkapani apaka.

¹⁷—Ninapapekari mapakanani átiátaã, eereka nikanapiriã Xerosareëmoni. Iuaã nisa txineiro ninirimanemoni matxineirotenimoni nanikini íkapani. Apaka iuaã ninirekari nisikaenetakiti Teosomoni nisikini. ¹⁸Nisikaenetakiti Teosomoni nisikasaaki Teoso misáki-retiko aikoti áki, níkipaãtaua Moisesini oerekakiti iaõka. Iuasaaki Xoteoakori Ásia tixinikini itikano nota. Kákiti apotiitakaniua !auari notakata iuasaaki. Neenamatzixi !auari iuasaaki. ¹⁹Ninoa itikano. Maerekati nikamaákkamako, kinirepa kona ninoa apoka uai uatxa pite isápiretinina íkapani? ²⁰Ninoa uai mapokakanisaaki, pipimaãna nanera íkenakotakitina, itikakitina nota Xoteo auíteakori apisatoõ nauakasaaki. Kipa atxiíti nimaerekani iuasaaki? Iuasaaki kona níkamari maerekati. ²¹Atxiíti iuasaaki nanera !apokaerekatari nisáki-re, kotxi nitxana: “Nota auikari ípíkani ókitikinina, iuaíkana auáki inini íkapani. Íkara nauikakiti sáki-retixi xika híte maíkano nota.” Atxiíti nanera !apokaerekatari íkara nisáki-re —itxa Paoro sáki-re Périsimoni.

²²Périsi iteene imarotapekari Xesosi oerekakiti sáki-retixiti. Iua misáki-retana ninoa:

—Sotatoakori auíte Arisia inakori apokapanikako uai. Iuasaakiko nisápiretari kiátokopa nitxatari Paoro. Uatxa xipope asáki-re —itxa Périsi.

²³Ipaniátari sotato auíte poiãori inakari Paoro níkatakari tíkane:

—Píníkatariko Paoro. Pauiritariko inirekiniátaã isini. Pauiritariko iniri mane apokini iuamoni. Pauiritariko inirekakiti isikinirina —itxa Périsi.

Paoro Sákirauata Périsi, Tosira Pakinikata

²⁴Mapaóti napa atoko Périsi ítanorokata Tosira inakorokata apoka Paoro auiniátaã. Xoteo oa. Périsi píkapiretari Paoro. Iua apokasaaki, Paoro sápiretana ninoa Kristo Xesosi sáki-re auikiko, ininiã ninoa kenakotari. ²⁵Paoro sápiretari Teoso sáki-re atão inakari kamiko pirena. Isápiretari Teoso sáki-re ítotxi níreëkiti amakamakani. Isápiretari kákiti misiritiko itixi xipokini óti apokasaaki. Ininiãkara Périsi píkarauata.

—Iaõpe. Pisipe. Áti óti níparíka mauakanisaaki, iuaíkana nípíkapiretai —itxari.

²⁶Périsi nírekari Paoro sikiniri txineiro iuamoni, isikakiniri íkapani. Ininiãkara itokata ípíkapiretari Paoro iuakata isákirauatini.

²⁷Ípikanani napa atoko Pósió Pésito inakori auítetxi txapekaua, ininiã Périsi sipe. Périsi nírekari Xoteoakori apokaerekatiniri iua, ininiã isini apisa ! isikapiretari Paoro, ininiã Paoro kaikotapanika kateia áki.

¹ Pésito aua Sesaréia sitatxiti ipi áti pakini óti, eereka isari Xerosareëmoni.
² Iuaã sasetotxi auñteakori, Xoteo auñteakori pakini kamapiretari Paoro Pésitomoni. ³ Ninoa iteene amanaári Pésito:

—Pikamariko ate nireëkiti. Piminariko Paoro uai Xerosareëmoni —itxana.

Ikara ninoa nireka, kotxi okaenatarina Paoro ipixinipokoriti. ⁴ Txamari Pésito apakapapiretana:

—Kona, Sesaréia sitatxitikarako aua Paoro. Mapaóti napa atoko nota kanapiriã iuamoni. ⁵ Hinirekiniári, átikaka hñte sari iuamoni notakata. Iuaã hñãñpiretari Paoro kamakiti maerekati —Pésito txana ninoa.

⁶ Pésito napari ipi semanati Xerosareë. Eereka ikanapiriã Sesaréiamoni. Katimatiniãkata Iroã aiko kãkiti misiritiko sãpiretikoãtaã. Iuaã ipikapiretari Paoro. ⁷ Paoro apokasaaki, Xoteo Xerosareëkini ákitari iua. Apoñtarina iua maerekati kaiãopokori ikamakiti, txamari imaerekani itikakari !auari, kotxi !ikamani maerekati. ⁸ Eereka Paoro:

—Maerekati na nikama. Xoteoakori aãtokiriakorini paniãtakiti nikamapitika. Teoso misãkiretiko aikoti nipaxitapitika. Homano auñte paniãtakiti, Sesa inakori paniãtakiti nikamapitika —itxa.

⁹ Pésito nirekari Xoteoakori apokaerekatiniri iuaka, ininiã ipimaári Paoro:

—Pinirekatari Xerosareë pisini? Iuaãrako nota kenakotariko nanera sãkire, pite sãkire apaka —itxa.

¹⁰ Txamari Paoro:

—Konapitini. Homano nitxaua. !Apakata Xerosareë Xoteoakori apisatoõ nisãkire kenakotiko. Uaikara Homanoakori auñte Sesa nirekari Homano sãkirauatini kãkiti misiritiko sãpiretakani apisatoõ. Erekarari uai pikenakotiniri nisãkire. Pite iteene imarotari kona xatiki maerekati nikama Xoteoakorimoni. ¹¹ Ixika auiniã nipinini ikapani, maerekati nikaminiã, ininiã apakata nipinini. Txamari nanera na atão apoñtano nota, ininiã naneramoni nisikanapakiri !auari. Ninirekari Sesamoni nisini —itxa Paoro sãkire.

¹² Ininiã Pésito sãkirauata iua ótãkikakanikata Paoro Sesamoni isini ikapani. Eereka apakapapiretari Paoro:

—Pite nirekari Sesamoni pisini, ininiãrako iuamonirako pisa —itxari Paoro.

Pésito Sãkirauata Akiripakata

¹³ Mapaóti napa atoko auñtetxi Akiripa inakori apoka Sesaréia itaro Perenisi inakorokata. Ninoa ianapokota Pésitomoni. ¹⁴ Mapaóti napa atoko Pésito sãpiretari Paoro Akiripamoni:

—Uai aua kiki kateia áki Périsi takakiti Paoro inakori. ¹⁵ Xerosareë napokasaaki, sasetotxi auñteakori, Xoteo auñteakori apaka apoñtari iua. Inirekarina nota paniãtiniri iua okiko. ¹⁶ Txamari nisãpiretana: “Homanoakori kona okari kãkiti áti apoñtakiti, iua apoñtakiti sãkire imakenakotakani apisa. Merepanika erekari iua apokini iua apoñtakanikata kãkiti misiritiko mereëkari apisatoõ, ninoa sãkire kãkiti misiritiko mereëkari kenakotini ikapani,” nitxana.

¹⁷ —Paoro omanatakani uai apokasaaki, katimatiniãkata niñroã kãkiti misiritiko sãpiretikoãtaã. Iuaã nipikapiretari Paoro, ininiã iua apoka iua omanatakani apisatoõ. ¹⁸ Ninoa sãkirauata. Apoñtarina Paoro. Niuãkatari ninoa sãpiretiniri maerekati Paoro kamakiti. ¹⁹ Txamari ninoa auñãkiti sãkiretixiti xika ninoa omanatari Paoro. Kiki ipikari Xesosi inakori xikara apoñtarina. Paoro auikari Xesosi iuañkana auñki inini. Ninoa !auikari Xesosi ókitikiniua.

²⁰ —Iuasaaki na nimarotari nikamakiti tġkane. Ininiā nipimaāri Paoro: “Na pinirekatari Xerosareē pisini? Iuaā pite apoġtakani, pite pakini kenakotaākako,” nitxari Paoro. ²¹ Txamari iua apakapapiretano: “Kona. Sesamonira ninireka nisini,” itxano nota. Ininiā notara paniātari iua kateia āki ikaiko-tiniritika niokanatariko Sesamoni —itxa Pésito.

²² Ininiā Akiripa:

—Nota nirekari nikenakotiniri iua kiki sākire —itxa.

Ininiā Pésito:

—Katanarako pikenakotari iua sākire —itxa.

Akiripa, Perenisi Pakini Apoka Pésitonomi

²³ Katimatiniġkata Akiripa, Perenisi pakini apoka, itomaneri iniritiako-rikata. Peeremākapokona. Iroāna kākiti apotiituniātaāua. Sotato auġteakori, sitatxi auakani auġteakori pakini iroā. Eereka Pésito pġkapiretari Paoro, ininiā Paoro minaāka. ²⁴ Ininiā Pésito:

—Pite, Akiripa, hġte atekata apotiitakaniua apaka, hġtamataria ia kiki. Ikinimane Xoteoakori uai auakani, Xerosareē auakani apaka !apokaerekataria ia. Isāpiretanona ia maerekati ininua. Ninoa amanaāno ia okiko. ²⁵ Notamoni maerekati ! ikama ia. Notamoni ixika ! auari ipinini ġkapani. Eereka ia amanaāno apiari Sesamoni isini, ininiā nota auiritari isini. ²⁶ Txamari ! nimarotari ixika niōkatsopatini Sesamoni. Ininiākara nimirari Paoro hġte apisatoō isākire hġkenakotini ġkapani. Akiripa, apiari pitxaua pite, ininiā ninirekari pite sāpiretinino nota niōkatsopatakiti tġkane. Ia hġkenakotaka atoko hġsāpiretano Sesamoni niōkatsopatini ġkapani. ²⁷ !Apakata kateia ākikiri Sesamoni niokanatinini ixika nimasāpiretaniā, kotxi Sesa nirekari imarotiniri ikamakiti xika.

26

Paoro Sākirauatini Akiripa Apisatoō

¹ Eereka Akiripa paniātari Paoro:

—Nauritai pisāpiretiniaua pimaġkiko xika.

Ininiā Paoro ōkatari iuako isākire isāpiretini ġkapani. Iposo atoko Paoro sākirauata, maerekati imakamakani ninoa imarotini ġkapani.

² —Aāuġte Akiripa, notamoni erekari pite apisatoō nisāpiretiniri Xoteoakori apoġtinino. ³ Kotxi pite iteene imarotari ate atokiriakorini oereēkiti, Xoteoakori paniātakiti. Ininiā namanaāi pikenakotiniri nisākire imakinika.

⁴ —Xoteoakori imarotano nota ātokoripaniġa ninakasaakiaua, nitixine nauakasaaki. Eereka Xerosareē nauakasaaki ninoa imarotano. Imarotarina ikiniōtika nauini. ⁵ Mixakapokoni ninoa imarotano nota. Imarotarina pariseo nininiāua. Ikara isāpiretaina, inirekiniāna. Kākiti pariseo inakari iteene aukari ate atokiriakorini oereēkiti sākiretxiti.

⁶ —Xoteoakori uatxa omanatano nota, kotxi nauġkari Teoso sikaenetakiti ate atokiriakorimoni apokapeka uatxa. ⁷ Ate nirimane, tosi pakini niri-manetxi, iġtapari ikara Teoso sikaenetakiti apokini ōti. Ninoa parġkauata Teoso ġkapani ġkanōka, pokamara pakini. Niauġte Akiripa, ikara Teoso sikaenetakiti xika Xoteoakori maġkano nota. ⁸ Kinirepa hġte !aukari Teoso posotiniri ipġkari ōkitikini, iuaġkana auāki inini ġkapani?

⁹ —Mitsipeka nota omanataria Xesosi Nasareekiri, hġte omanatiniri atokokana, ininiā nikapokotari isākire auġākani. ¹⁰ Xerosareē nauakasaaki, nikapokotari isākire auġākani. Sasetotxi auġteakori auiritano kākiti Teoso nakitiakori kateia āki nitakini. Kaiāopokori nitaka kateia āki. Xoteo auġteakori nirekasaakiri okinina, nota apaka nirekari. ¹¹ Nisari Xoteo apotiitiniua aikotimoni ikininape Xesosi sākire auġākani nimiritini ġkapani. Ninirekari

Xesosi sākire auikiko xipokini. Iteene nomanatana, ininiākara nisari apanakini sitatxitimoni ninoa nikapokotini ĩkapani.

¹²—Īkara xika nisari Tamásiko sitatxitimoni. Sasetotxi auĩteakori auiritano nisini. Ipaniātana Xesosi sākire auĩākani nimaĩkini. ¹³ Ipixinipokoriti, apaniāxiti iotximere iaxitiki apoka notamoni. Atokatxi iotximere poiāoka. Īkara iotximere apiata. Iua iotximere āki nota nimoianariakorikata aua.

¹⁴ Ate iriākata xitipe. Iuasaakipeka nikenakotari nakiritiko: “Saoro, Saoro,” itxano Epiráiko inakori sākirexitia. “Kixikapa pimisiritano nota? Piteka pimisiritaua, nota pimisiritakasaaki. Atxiiti kema auĩteka karotaua ipitikiri aāketē. Iua kema auĩte atoko pitxa,” itxano.

¹⁵—Ininiā nota: “Apiananiri, kiriparai pite?” nitxari.

—Ininiā iua: “Xesosira nota, pimisiritakitikarano nota. ¹⁶ Pitima. Nota oerekaua pitemoni, pite nimerēini ĩkapani, ninitiri pininiua ĩkapani. Uatxa pitikakiti pisāpiretako apanakinimoni. Pisāpiretapanikariko ikinimane kākiti apikomoni noerekakiti tĩkane. ¹⁷ Ninĩkataiko pite Xoteo sauaki pauakasaaki, Xoteo minakanuia sauaki pauakasaaki apaka. Xoteo minakonimoni niokanatai pisini. ¹⁸ Kākiti ipiaā sikani atoko itxana, kotxi !imarotarina Teoso sākire. Mōsiāreni atoko ninoa, kotxi !atamatarina Teoso kimapore. Ininiākara pitekaru oerekanao Teoso sākire ikimapore imarotinina ĩkapani, ipiā itakanapinina, ikamaramoni isinina ĩkapani. Ininiākara !ikamaikari Satanasi paniātakiti. Teoso paniātakitinoka ikamana eereka. Ininiā ninoa auikariko nisākire, ininiākara nota makatxakariko ninoa maerekani. Ininiā Teoso nakitiakori ninoa apaka txauana,” Xesosi txano nota.

¹⁹—Niauĩte Akiripa, ĩkara atoko ininiāra, nikamapekari imakinika Xesosi paniātakiti, iaxiti iotximere apokasaaki nikenakotakiti. ²⁰ Nisāpiretari Xesosi sākire merepitipanika kākiti Tamásiko sitatxiti auakanimoni, eereka nisāpiretari Xerosareē auakanimoni. Eereka nisāpiretari ikinimane Xotēia tōpa auakanimoni. Eereka nisāpiretari kākiti Xoteo minakonimoni. Nisinimoni nisāpireāpotana ninoa: “Himaerekani hĩtakanapako. Hāuikariko Teoso sākire. Erekarinoka hĩkamako, ininiākara aimarotapitikari maerekati hĩtakanapini,” nitxana. ²¹ Īkara atoko nitxana ikinimane nisāpiretini. Īkara nisākire xika Xoteoakori maĩkano nota Teoso misākiretiko aikoti āki nauakasaaki. Kinirāo okaka itxanona. ²² Uatxa nauapanika, kotxi Teoso nĩkatano nota. Ininiā ia ōti Xesosi sākire nisāpireta hĩte apiarinimoni, hĩte poiāorinimoni apaka. Moisesini sāpiretakiti iaōka nisāpireta. Teoso sākire sāpiretakani sāpiretakiti iaōka nisāpireta. Ninoa sāpiretari Teoso mereēkiti apokini. ²³ Ninoa txari: “Teoso Mereēkiti apokako. Iua misiritaākkako. Iuakarako ōkitikaua ipinaka atoko. Iuaĩkana auāki itxako. Mitxi ipinakari ! ōkitikaua. Merepanikā iua ōkitikaua. Iuara sāpiretariko Xoteoakori maerekani makatxakiko, Xoteo minakanuia maerekani makatxakiko apaka,” itxana Teoso sākire sāpiretakani. Ninoa sāpiretakiti iaōka nota sāpiretai apaka —itxa Paoro.

²⁴ Paoro ĩkara atoko inakasaaki, Pésito akiritari:

—Paoro, lkiĩketei. Pimapitxiriāpota iteene papaiaōkaruatini xika —itxa.

²⁵ Ininiā Paoro:

—Niauĩte Pésito, kona nimapitxirita nota. Atāopitikara nisākire nikama. Erekaris nisākire. ²⁶ Niauĩte Akiripa, pimarotapekari nota sāpiretakiti, ininiā kataparaxinireno nimisākiretinii. Pimarotari Xesosi pirena, kotxi Xesosi ipikasaaki, kona kipatakoriātāni ipina. ²⁷ Niauĩte Akiripa, pite auikatari Teoso sākire sāpiretakani sākire? Nota imarotari pite auikiniri.

²⁸ Ininiā Akiripa:

—Pite sākire txĩkitakaaritano nota Xesosi sākire nauikini —itxari.

²⁹ Ininiã Paoro:

—Teoso imarotari. Ninirekari pite, hïte hïkinika uatxa nisãkire kenakotakani pakini iteene hãuikiniri Xesosi sãkire nota auikiniri atokotxikana. Txamari kona nota nirekai hïte kateia ãki hãuini nota atoko —itxa Paoro sãkire.

³⁰ Paoro sãkirauataka atoko auïtetxi Akiripa, itaro Perenisi, Pésito, ikinimane ninoakata ïkani pakini, itimana. ³¹ Iporikiti ipokïkasaakina, imisãkiretakana:

—!Auari ikira kiki okiko xika. !Auari kateia ãki itakiko xika.

³² Ininiã Akiripa txari Pésito:

—Ikira kiki mamanaãkaniãri Sesamoni isini, isikakaãkapiimako.

27

Paoro Potorika Homamoni Isini

¹ Eereka Pésito sãpiretaua ate iketo apope Itária tixinimoni aïpiriãtini. Paoro apanakini maïkakoni apaka sikaãka Xório inakorimoni. Iua Xório seï pakini sotato auïte itxaua. Sesa sotatone itxaua. ² Ate iereëtaua maporo ãki, Ataramítxio sitatxitikero ãki. Ásia tixinimoni sikaro oa maporo. Kiki, Arisitako inakori sari atekata. Iua Tesarónika sitatxitikiri, Masetónia tixinikiri iua Arisitako. Ininiã ate sipe. ³ Katimatiníkata ate apoka Sitoõ ioporokoti. Xório tìretari Paoro, ininiã auiritari iua aõkimaneremoni isini iuaã, inirekakiti apakapini ïkapani. ⁴ Eereka ate potorika iuaã. Iuasaaki ïtima inataparata aãpisamoni, ininiã maporo iopiriãri Xipri pokomiriïti ïtima manapakaniãtaã. ⁵ Ate ïpiriãtari potxoari uiniti. Sirisia tixini takote anapa. Pãpória tixini takote anapa. Ate apoka Miha sitatxiti, Arisia tixiniã. ⁶ Iuaã sotato auïte apokaro maporo Arexãtria sitatxitikero, Itária tixinimoni sikaro. Iua iereëtakaua ate oa maporo ãki.

⁷ Iuaïkana apotorika. Iuasaaki ïtima inataparata aãpisatoõ, ininiã inanaritika asaãpota mapaõtipeka, ininiã eereka aãpoka Sinito sitatxiti apisatoõ. ïtima tapara xika !aposotaika apikomoni asini anirekinimoni, ininiã aiopiriãri Kreta pokomiriïti ïtima manapakaniãtaã. Iuaã anapari Saomona pokomiriïti. ⁸ Inanaritika asaãpota imiriï takote. Aãpoka ioporoko “Ioporoko Erekari” akiritikoãtaã, Araséa sitatxiti takote.

⁹ Iuaã aãuapokota. Pamonõkoniri apikomoni asini. Kiiniri Teoso ïkapani kãkiti manipokotakani inapapeka, ininiã imarotaãka ïtima kataparari kaïamapeka apokini. Ininiã Paoro õtãkikana ninoa:

¹⁰ —Apikomoni asiniã, pamonõkoniri. ïtima kataparari kasaikamaro maporo atïkata. Kãkiti ipinako —itxa Paoro.

¹¹ Txamari sotatoakori auïte !auikari Paoro sãkire. Iua auikapiretari kamaporoteri sãkire, maporo nïkatakari pakini sãkire. ¹² Kaiãopokori maporo ãki parïkauatakani txari:

—Ia ioporoko kona erekari mitaã anapini. Masa apikomoni. Atxiïti aposota Penisi sitatxitimoni aãpokini. Iuaã manapakakari mitaã —itxana.

Penisi sitatxiti Kreta inakori pokomiriïti ioporokoti. Atokatxi ereëkokini manapi aua Penisi sitatxiti.

ïtima Kataparari Pirena

¹³ Iuasaaki ïtima poiãoka apokaãpota ate tikinimoni, ininiã ninoã uãkatari:

—Uatxaïka erekapekari Penisi sitatxitimoni asini —itxana.

Ininiã õtanõkarina kai, maporo maïkiko, ininiã potorika atxa. Kreta miriïti takote anapaãpota. !Anirekari potxoari uiniti apanïkakiã asini, kotxi pamonõkoniri iuaã. ¹⁴ Txamari patimari ïtima iteene inataparata Kreta

pokomiriĩtikiri. Ītima uāka “Atokatxi Pokĩkinimonikiri.”¹⁵ Ininiā Ītima apoka maporomoni. Pataparari. !Aposotari Ītima ininimoni asini, ininiākara aāuiritari Ītima anikiniro maporo Ītima sinimoni.¹⁶ Aiopiriāri Kaota inakori pokomiriĩti. Iua pokomiriĩ xapitiri. Iua pokomiriĩti Ītima kimaporeē aua, ininiā iusaaki pokomiriĩ anapakasaaki Ītima poiāo taparata, ininiākara aōtanōkaro kanaua maporo kapokiāmonikiri.¹⁷ Akosekaāpotari kanaua maporo āki aeretakini ĩkapani. Ininiā ninoa iapiripoataro maporo aāpitsaā Ītima katakakitapetiniri monōkoni. Ninoa pĩkari Ītima anikiniro maporo ĩkapatxite apanĩkakiākirimoni. Iua ĩkapatxite Arĩpia tixini takote. Ininiā ikaxitikarina mākaxi mata maporo aniākari. Mākaxi mata kaikotiniā maporo nopini, patimaua Ītima anikiniua. Ikara atoko ininiā, auiritarina Ītima anikiniua.¹⁸ Ītima inataparatanika, ininiā katimatinĩkata ninoa okaāpotari tiitxi maporo āki auakari potxoari uunitimoni maporo sakikini monōkoni.¹⁹ Katimatinĩkata okarina maporo tii potxoari uunitimoni.

²⁰ Mapaōti !aātamataikari atokatxi. !Aātamataikari iōriki. Ītima inataparatanika, ininiā auākatari apinini.

²¹ Mapaōtipeka maporo āki parĩkauatakani kona inikaikana. Ininiā Paoro misākiretana:

—Kinirepa hĩte kona kĩpitari nisākire? Kinirepa hĩte takanapari Kreta pokomiriĩti? Hĩkĩpitaākarariko nōtākikinini, tiitxi kona hōkamako.²² Iuaritika kataparaxinire hĩtxako. Nisāpiretai, kona kākiti !ipina. Maporonanira sakika.²³ Nota Teoso nakiti nitxaua. Iua ĩkapani niparĩkauata. Minipani iua nitiri iaxitiki oerekaua notamoni.²⁴ Teoso nitiri akiritano: “Paoro, !pipĩkaruatape. Pite apokapitikako Sesa apisatoō. Peerekari Teoso. Itiretai pite, ininiākara ninoa pitekata sikani !ipinapani,” itxano.²⁵ Ininiā kataparaxinire hĩtxako, kotxi nota auikari Teoso sākire. Ikamapitikariko nisāpiretinii iaōka.²⁶ Ītima okaroko maporo ipokomiriĩ —itxa Paoro sākire ninoamoni.

²⁷ Ipi semanati Ītima inataparata. Anikaro maporo potxoari uuniti Metxiteháneo inakori ĩpiriātini. Eereka apanĩkanōka maporo āki parĩkauatakani uākatari imiriĩ takotepeka aāpokini.²⁸ Ininiā ninoa okari kai iokaritsaā ĩpanaā imarotinina ĩkapani. Trĩta seisi metro ĩpanaā. Eereka apikomoni iaōtarina ĩpanaā, vĩtxi setxi metronoka.²⁹ Ininiā ipĩkaruatana maporo kai mitarimoni oāpokini monōkoni. Ininiā maporo kapokiāmoni ikaxitikarina ipi ipi pakini kai iokaritsaā maporo maĩkiko. Eereka imisākiretarina Teoso paĩtiki ikatimatini ĩkapani.³⁰ Maporo āki parĩkauatakani nirekari maporo itakanapinina. Iokatxakarina kanaua potxoari uunitimoni. Ninoa txaua:

—Iuaĩkana kai aiokatxaka uai maporo ĩkiinaā.

Txamari na atāo isākirena. Inirekarina maporo itakanapinina kanaua āki.

³¹ Iusaaki Paoro txana sotato auĩte, sotatoakori pakini:

—Nakira kikiakori maporo āki makaikotakaniā, hĩte ipinako —itxa.

³² Ininiā sotatoakori tsotakari aāpitsa kanaua maĩkakarini, ininiā Ītima anikari iua kanaua.

³³ Iusaaki imaropirĩkata. Paoro oťākikana ikinimane inipokotini ĩkapani:

—Ipi semanati hiātapanātari Ītima napini. Ipi semanati hĩteni kona xatiki hinipokota.³⁴ Ininiā hinipokotako uatxa, hĩtapara apokini ĩkapani himapinakanani ĩkapani. Hĩkarotiko !auapani. Hiāko ātika kona katxakapani —itxa.

³⁵ Eereka Paoro kosekari komiri. Ikinimane apisatoō isākirauata Teosokata. Iposo atoko imapixinikari komiri porii, nika itxari.³⁶ Ininiā ikinimane kataparaxinirepe itxana, ininiā inipokotana.³⁷ Tosētosu setēta seisi pakini kākiti maporo āki auakani iusaaki.³⁸ Iteene inipokotakana atoko, okarina triko pōtxoari uunitimoni maporo poana onini ĩkapani.

Maporo Sakikini Pirena

³⁹ Katimatinīkata maporo áki parĩkauatakani atamatari imiriĩ, txamari ! imarotarina itixi uáka. Atamatarina ikipatxite, ininiã ninoa:

—Iuaã kipatxi nopini maanikaro maporo, aposotiniã —itxana.

⁴⁰ Ininiã itsotakarina aãpitsa maporo tsapi. Kai kaikota ipatapiã. Ikoxirikarona aãpitsa mekotxi maĩkiko, maporo oerekaãtiko. Iposo atoko òkitikarina mākaxi mata maporo ĩkiiãtinimoni auakari, ikipatxitemoni maporo ĩtima anikini ĩkapani. Ininiã ikipatxitemoni asaãpota. ⁴¹ Txamari ipix-inipokoriti maporo atxapaã ikipatxite nopini. Maporo ĩkiiãtinimoni atxapaã. !Osaika. Tsakati kataparari xika maporo kapokiãtinimoni txirakiãpota.

⁴² Sotatoakori kinirão okaka txana ikinimane maĩkakoni. ! Inirekarina ninoa mitekini imiriĩmoni anokinina. ⁴³ Sotatoakori auĩte !inirekari Paoro okiko, ininiã !auritana. Ipaniãtana ikinimane:

—Himarotiniãri hanokini, ininiã hĩte merepanika hĩkomokako. Hanoka ikipatxitemoni. ⁴⁴ Eereka, hĩte mimataanoreni hĩkomokako. Himaĩkariko maporo txirata, ininiã hanoka ikipatxitemoni —itxana.

Ikara atoko aniniã, amakinika aãpoka ikipatxitemoni.

28

Máota Pokomiriĩti Pirena

¹ Imiriĩpekaua amakinika, eereka aimarotari Máota inakori pokomiriĩti aãpokini. ² Iuaã auakani apakapaua ipoxokoniritikana. Iuasaaki ãparaã potorika ikipini. ãparaã kipini xika patxĩkareri, ininiã iuaã auakani kamari xamina, ate irokini ĩkapani. ³ Iuasaaki Paoro apaka apotiãxi xamina. Xamina pokiã itakasaakiri, xamina pataka õpòkikari imini xamina iriko áki auakari. Akatsatari Paoro uako. ⁴ Ninoa ipokomiriĩ auakani atamatari imini Paoro uakoã iaròkini. Ininiã imisãkiretakakana:

—Ikira kiki kokaniri atxiĩti. !Ipin potxoari uiniti, iuaritika inapakakiniri !auri. Uatxaika ipinapitakako —itxakakana.

⁵ Paoro ĩkokari imini xamina pokimoni arikini ĩkapani. !Katsiiri iuamoni.

⁶ Ninoa iãtapanãtari iuako ananapoatini. Iãtaparina iua mokatanitika ipinini. Mapa oara napa atoko !ipina, ininiã ninoa:

—Kona kokaniri ikira. Teoso itxaua —itxanãtana.

⁷ Iuaãtaã takote aua kikio Pópirio inakori nakiti. Máota pokomiriĩti auakani auĩte itxaua. Iua apakapaua ate ipoxokoniritika. Akaĩkota iua aapoko ipi ãti pakini õti. ⁸ Iuasaaki iri sirĩkanãta. Apoomata. Itikanãta. Ininiã Paoro sari iuamoni. Akiritari Teoso iua ereka inini ĩkapani. Itakari iuako inopini. Iuasaakipeka erekapeka itxa iua. ⁹ Eereka amianatakani iua pokomiriĩti auakani sari Paoromoni, ininiã iua makananitana ninoa. ¹⁰ Ninoa sikaua tiitxipokoni. Apotorikasaaki ãto maporo áki, isikauana imakinika anireẽkiti.

Paoro Homa Sitatxiti Isini

¹¹ Ate napari ipi ãti pakini kasiriti iuaã. Eereka aiereẽtaua maporo áki, Arexãtria sitatxitikero áki. "Itarixti Ipi" akiritãka maporo uáka. Mitaãsaaki oa maporo kaikota Máota pokomiriĩti. ¹² Apotorika iuaã. Eereka aãpoka Sirakosa inakori sitatxiti. Iuaã akaikota ipi ãti pakini õti.

¹³ Eereka iuaĩkana maporo potorika. Aãpoka Héxio sitatxiti. Katimatinīkata ĩtima atikinimonikari ina, ininiã patimari asini. Katimatinīkata aãpoka Posoori sitatxiti. ¹⁴ Iuaã aõkitana kãkiti, Xesosĩ sãkire auiãkani. Ninoa amanaãua ãti semanati anapini ninoakata. Eereka iuaĩkana aiereẽtaua maporo áki. Iuaĩkana apotorika. Homa sitatxiti aãpoka.

¹⁵ Xesosi sákire auiäkani, Homa auakani, kenakoenetari aäpokaenetini, ininiã inana ate aokitinina İkapani. Apanakini aokitaua ate kienatxi amotikoãtaã takote, Ápio inakoriãtaã takote. Apanakini aokitaua ate kãkiti imakiniãtaã, “İpi Áti Aapokotxiti” inakoriãtaã. Paoro aokitakasaakina ninoa, ipoxokoniuaata.

—Peerekari Teoso, kotxi naia inari notamoni —itxa Paoro.

Homa Sitatxiti Paoro Apokini

¹⁶ Homa sitatxiti aäpoka atoko, Paoro auiritaãka inirekiniãtaã auini. Átika sotato kaikotapika iuakata isinimoni imarotini İkapani.

¹⁷ İpi äti pakini öti napaka atoko, Paoro pİkapiretana Xoteoakori auİteakori. Ninoa apotiitakasaakia, Paoro misäkiretana ninoa.

—Nitariakori, ! nikamari maerekati Xoteoakorimoni. Nauikapitikari akiomaneakorini oerekakiti sãkiretxiti. Iuaritika nimaİkaãka Xerosareë. Nisikanapaãka Homanoakorimoni. ¹⁸ Homanoakori pimaãno nimaİkiko xika. Eereka inirekarina isikakinino, kotxi ninoa imarotari ixika ! auari nipinini İkapani. ¹⁹ Txamari Xoteoakori ! inirekari Homano sikakinino, ininiãkara nakiritari Sesa nisäkire ikenakotini İkapani. ! Ninirekari nimisãkireporetiniri ninirimane Xoteoakori. ²⁰ İkara atoko ininiã, nipİkapiretai hİte nimisãkiretini İkapani. Teoso mereëkiti sãkire, Xoteoakori İatapakiti sãkire nauikini xika, nota maİkaãka.

²¹ Ininiã ninoa:

—Ate ! apakapari iökatsopari Xotëia tōpakiri pite maerekani pirena. Aİtariakori iuaã İkani ! iminapiretari maerekati pikamakiti pirena. ²² Ate nirekari akenakotiniri pite auiäkiti sãkiretxiti, kotxi akenakoenetapekari apanakini sãkire: “Xesosi sãkire na atão” —itxana ninoa.

²³ Ininiã ninoa ketotari äti öti Paorokata aokitakakinuana. İketotiniri manapi itomaneri kãkiti sari Paoro auinimoni. Paoro İkanökapanika sãkirauatapitipo. İkanökapeka auakapanika isãpirenauatini. Isãpiretana Teoso auİtxeni ininiãua.

—Atão Teoso äkiripitikara Xesosi —itxa Paoro sãkire.

Isãpiretana ninoa Moisesi iökatsopatakiti, Teoso sãkire sãpiretakani iökatsopatakiti apaka, atão Teoso äkiripitikara Xesosi ininiua ninoa imarotini İkapani. ²⁴ Apanakini auikari Paoro sãkire. Apanakini !inirekari auikinarina Paoro sãkire. ²⁵ Ininiã ninoa taparakienatakakaua Xesosi sãkire auikakani mauikarenikata. İpotorikinina apisa, iuaİkana Paoro misäkiretana ninoa:

—Erekari Matamatakoti sãkirauata atão hinirimanekata kitxakapirİka. İpaniãtari Teoso sãkire sãpiretakari Isaİa inakori isãpiretiniri Teoso sãkire hinirimanemoni. ²⁶ İtxari:

Hİsa kãkitimoni. Hİsãpiretanako ninoa: “Hİkenakotari nisäkire ätipirika, txamari !hinirekari himarotiniri nisäkire. Ätipirika hİtikari nikamakiti, txamari !hinirekari häuikini nota kaminiri ia atoko inakari.”

²⁷ Kotxi kãkiti äkixinireë ! inirekarina imarotinirina nisäkire. ! Inirekarina ikenakotinirina nisäkire. ! Inirekarina itikinirina nikamakiti. Inirekiniãrina, itikapitikarina nota kamakiti. Inirekiniãrina, atão ikenakotarina nisäkire. Äkixinireëna imarotaãkamariko nota sãkire, inimanako notamoni, ininiã nota txİkitakamanako ninoa ereka ininina,

itxa Teoso sãkire.

²⁸ Paoro sãkirauata iuaİkana ninoakata:

—Ninirekari himarotiniri Teoso iokanapirena erekari kãkiti maerekani makatxakiko pirena iokanapiretaãkapeka Xoteo minakonimoni. Ninoakara auikapitikariko Teoso sãkire.

²⁹ Ikara Paoro sãpiretaãka atoko, ninoa Xoteoakori sipeka. Isikasaakina, iteene itaparakienatakakauana Paoro sãkire ikenakotinina xika.

³⁰ Paoro kaikota iuaã ipi anokanani. Iikixitari kaapokori iua aapoko Paoronoka auini ikapani. Paoro ipoxokoniritika apakapana ikinimané iua-
moni sikani. ³¹ Isãpiretana ninoa Teoso auĩtetxi ininiãua. Oerekana ninoa Xesosi, Teoso mereẽkiti ininiãua, Apiananiri ininiãua. Isãkirauata itaparax-
inireritika kãkitimoni. Auiritaãka ikĩnipoko imarotakiti isãpiretini.

HOMANO

Paoro Iokanatsopatakiti Homa Auakanimoni

¹ Nota Paoro iokanatsopata hitemoni. Xesosi Kristo nitirikarano nota. Teoso mereëno nota iua iokanatakiti kăkitimoni nininiua ikapani. Iua akiritano nota, Teoso iokanapirena erekari kăkitimoni nisăpiretini ikapani. Ikara parikatxinoka inireka nikamini. ² Kitxakapirika Teoso săkire săpiretakani săpiretaua Teoso sikaenetakiti, iua iokanapirena erekari. Teoso săkire iokatsopatakoriă ikara atatsopataăka.

³ Ia Teoso iokanapirena erekari săpiretaua aăuïte Xesosi Kristo Teoso âkiri ininiua. Kăkiti itxapekaua. Iuasaaki Tavii apika mekaniri itxaua. ⁴ Iuaritika Teoso âkiri itxaua. Erekarî Matamatakoti oerekari kăkiti Teoso âkiri ininiua Xesosi, kotxi ôkitikari Xesosi ipikaripeka. Iuaïkana aua itxa. Ikara posotiiretxi apiari oerekari kăkiti Xesosi Teoso âkiri ininiua. ⁵ Xesosi Kristo sikaua ikinipoko erekari. Ininiă iokanataua ikini itixitimoni, kăkiti isăkire asăpiretini ikapani, isăkire auikinina ikapani, isăkire iaôka ikaminina ikapani. Ikara atoko aparikauata Kristo ikapani.

⁶ Hïtepekana, Teoso akiritai hïte apaka Xesosi Kristo nakitiakori hininiua ikapani. ⁷ Ininiă nota iokanatsopata hitemoni Teoso tirketakinimoni, Homa sitatxiti auakanimoni. Teoso akiritai hïte iua nakitiakori hininiua ikapani. Aïri Teoso, Apiananiri Xesosi Kristo apaka sikari ikinipoko erekari hitemoni. Ikamaerekaxiniretai hïte.

Paoro Nirekari Isini Homa Auakanimoni

⁸ Merepanika nitxari niTeosone: “Erekapitikai, kotxi Homa auakani iteene aukari pisăkire. Ikinî tōpati auakani kenakopiretari ninoa auikiniri pisăkire,” nitxari Teoso Xesosi Kristo uăkaă. ⁹ Nisăkirauatakasaaki Teosokata, nimisăkiretari Teoso hïte ikapani. Âtipirika nimisăkiretari Teoso hïte ikapani. Teoso imarotari ikara nisăkire atăo inini. Nota parikauata Teoso ikapani. Iuanoka ninireka nikamini. Nisăpiretari iua iokanapirena erekari imi pirena kăkitimoni. ¹⁰ Nimisăkiretakasaakiri Teoso, nitxari: “Pauritiniăno, ninirekari païtiki Homa auakanimoni nisini. Mitxi ! apakata ninoamoni nisini. Pinirekiniări iuaă nisini, pimoianatano ninoamoni napokini ikapani,” nitxari. ¹¹ Iteene ninirekari naôkitinii hïte, kotxi ninirekari Teoso kamata- aparatiniri hăkixinire nisăkireë. ¹² Ininiă nota kamataparaxiniretaiko hïte, kotxi himarotari nota iteene auikiniri Xesosi săkire. Apaka hïte kamata- paraxiniretano nota, kotxi hïte apaka iteene aukari Xesosi săkire.

¹³ Nitariakori, ninirekari himarotiniri itokatapiima naiamatama hitemoni nisini ikapani, txamari iuasaaki ! apakata nisini. Itomaneri kăkiti Xoteo minakanïua âtiătaă auakani aukari Xesosi săkire. Ininiă iua atoktxikana ninirekari kaiăopokori kăkiti hïte sauaki auakani apaka auikiniri Xesosi săkire. ¹⁴ Nisăpiretari Teoso săkire ikininapemoni. Nisăpiretari sitatxi auakanimoni. Nisăpiretari îtopa auakanimoni apaka. Nisăpiretari iokatsopari imarotakanimoni. Nisăpiretari iokatsopari mimarotakanimoni apaka. Ikara nîparika. ¹⁵ Ininiă iposotere nitxa nisăpiretiniri Teoso iokanapirena erekari hïte Homa sitatxiti auakanimoni apaka. Ikinika nitaparaă nisăpiretai.

¹⁶ Na nipetauata Kristo iokanapirena erekari nisăpiretinii, kotxi iua iokanapirena oerekaua Teoso posotiire iua săkire auïăkani maerekani imaktxakini ikapani. Kaposotiireri iua, ininiă imaktxakari ikinimane maerekani, iua săkire auïăkani maerekani. Ikara ikaminana Xoteoakori merepanika. Eereka ikaminana Xoteo minakanïua apaka. ¹⁷ Teoso

iokanapirena erekari sãpiretaua Teoso txĩkitakiniri kãkiti atão inakarinoka ikamini. Teoso sãkire auikikoãnokara, kãkiti txĩkitakaãka atão inakarinoka ikamini. Teoso sãkire iõkatsopatakori txari:

Kãkiti atão inakarinoka kamakani auini erekari, kotxi ninoa auikari Teoso sãkire.

Kãkiti Kamakiti Maerekati

¹⁸ Teoso iaxiti auakari oerekaua iua omanãkarauatini kãkiti maerekani xika, ininiãkara iua misiritariko kãkiti, kotxi kãkiti linirekari Teoso paniãtakiti ikamini. Ikamarina maerekatinoka. Maerekati ikamakasaakina, ikipatarina atão inakari. ¹⁹ Kãkiti ikara atoko inakani Teoso misiritanako ninoa, kotxi apakata ninoa atamatiniri iua kamakiti. Teosora oerekapekari ikamakiti kãkitimoni iua imarotinina ikapani. ²⁰ Teoso kamari itixi, ininiã kãkiti atamatakasaakiri Teoso kamakiti, imarotari kiãtokopa itxa Teoso. Matamatakoti itxaua Teoso, iuaritika kãkiti atamatakasaakiri ikamakiti, imarotari iua posotiire auapika inini. Imarotari iua Teoso ininiua. Kãkiti imarotari ikara atoko inakari itxaua Teoso, iua kamakiti atamatakasaakina. Ininiãkara kãkiti imarotapitikari Teoso auini. Ininiãkara na atão kãkiti sãkire: “Na nimarotari Teoso auini inini.”

²¹ Kãkiti imarotari Teoso auini, iuaritika !isãpiretarina Teoso: “Atão Teoso pitxaua,” ! itxarina. ! Isãpiretarina Teoso: “Erekapitikari pikamakiti ate ikapani,” ! itxarina. !Kiĩkitena. !Imarotaikarina atão inakari, kotxi ãkixinireëna maerekatinoka aua. ²² Ninoa sãkire: “Kimaroreua ate,” txamari !kiĩkitena. ²³ Teoso mapinakatimoni ! itxana: “Pitenokara Teoso txaua,” ! itxarina. Kãkiti ipinapitika, iuaritika kamakori kãkiti atoko inakari imisãkiretana: “Pite ateosone,” itxana. Kamakori kotipiriki atoko inakari, kamakori pirãtxi atoko inakari, kamakori imini atoko inakari pakini ninoa misãkireta: “Hĩte ateosone,” itxana.

²⁴ Ininiãkara Teoso takanapana ninoa. Auiritana maerekati ikaminina ãkixinirena nirekaãkiti. Itxiko atoko itxa imaerekanina iĩtona nireëkiti. Ninoaka na paxitauana iĩtona, kotxi ãti sirĩka ãtikata. ²⁵ !Inirekarina auikinirina atão inakari Teoso sãkire. Inirekarina auikinirina atão minakati. Teoso kamakitimoni itxana: “Pite ateosone. Aparĩkauata pite ikapani,” itxana. Ikinipoko kamakarimoni litxana: “Pite aTeosone. Aparĩkauata pite ikapani,” ! itxana. Atão inakari kamakani ãtipirika txari ikinipoko kamakari: “Peerekai pite.” Ameë.

²⁶ Ikara kãkiti maerekani xika, Teoso takanapana ninoa. Auiritana maerekati kãkiti kapëta txĩkitaãkari, iĩtona nireëkiti ikaminina. Ininiã sito na nirekaikari kikikata osirĩkini. Sito nirekari ãto sitokata osirĩkini. ! Apakata. Ikara maerekati itxaua. ²⁷ Iua atokokana kiki linirekaikari sitokata isirĩkini. Kiki nirekari ãti kikikata isirĩkini. !Apakata. Ikara maerekati itxaua. Ininiãkara iĩtona misiritaãkako imaerekanina xika.

²⁸ Ninoa imaroreë ! inirekarina imarotinirina Teoso, ininiã Teoso takanapana. Auiritana ixinikinirina atão minakati. Maerekatinoka ixinikakitina, ininiã ikamarina atão minakati. ²⁹ ãkixinireëna aua ikini sereti maerekati. Iĩtona nireëkitinoka ikamana. ãtipirika ikamapikarina maerekati. Apanakini nakiti tiitxi atamatakasaakina, inirekarina. Ikamarina maerekati apanakinimoni. ãkixinireëna ixikotarina ãti. Kokaniri itxauana. Ineenamauatapikana. Apanakini imisirienetana. Ixinikarina apanakini kamakiti maerekatinoka. Aãpirena ikamana. ³⁰ Imisãkirepiretarina ãti. Omanatarina Teoso. !paxitarina apanakini imisãkiretakasaakina. Iuikauana. ãtipirika: “Paimatireua ate,” itxanãtana. Ixinikapikarina: “Natokopa itxa apikomoni maerekati akamini.” !Ikĩpitarina iri paniãtakiti, inoro paniãtakiti

pakini. ³¹ !Kiikitenana. !Ikamarina ikamaenetakitina. !Itiretarina inirimane. !Inirekarina neenamtxi ixipokinina. !Iamonĩkana apanakini. ³² Teoso sãkire txari: “Kãkiti ikara atoko inakani ipinapitĩkako. Ninoa ipinini atão.” Ikara Teoso sãkire imarotapiikamana, iuaritika ikamapanikarina ikara maerekati. Apaka apokaerekatarina apanakini, maerekati ikamakasaaki.

2

Teoso Misiritari Maerekati Kamakani

¹ Atxiĩti hĩte txari: “!Erekana ninoa, kotxi ninoa kamari maerekati,” hĩtxa. !Apakata ikara atoko hinini, kotxi hĩte apaka kamari maerekati ninoa kamakiti atokotxikana. Ininiã !apakata kãkiti akiritiniri ãti kãkiti maerekati kamakari ininiua. ² Apakatapitika Teoso akiritiniri kãkiti maerekati kamakari ininiua, kotxi iua imarotari atão. Ininiã maerekati kamakari apakapari atão imisiritiko imaerekani iaõka. ³ “Ninoa maerekati kamakani misiritãakako,” hinakasaaki, hĩxinikari hĩte apaka kamari maerekati ninoa kamakiti atokotxikana. Ininiã hĩte apaka !hinapakapaniri Teoso misiritinii hĩte. ⁴ Atxiĩti na hĩte maãkatari Teoso, kotxi hĩte txari: “Teoso katiraõkiri itxaua,” hĩtxa. Atxiĩti na himaãkatari Teoso, kotxi iuasaaki !imisiritapanikai hĩte. Atxiĩti na himaãkatari Teoso, kotxi Teoso ãtipirika mĩteenekai hĩte. Teoso nirekari hĩtakanapiniri maerekati hĩkamakiti, erekarinoka hĩkamini ikapani. Ininiã iua tiretai hĩte. Ikara hĩte imarotamako.

⁵ Txamari hĩte paikoxinirei. Na hinirekari himaerekani hĩtakanapini. Ininiã himisiritiko apiaãpotako. Kãkiti misiritiko õti apokasaaki, Teoso misiritapitikaiko hĩte. Iuasaaki kãkiti imarotariko Teoso omanãkare imaerekani xika, kotxi Teoso atão imarotari kãkiti kamakiti. ⁶ Ikamakiti erekari ininiãua, Teoso sikari erekari iuamoni. Txamari ikamakiti maerekati ininiãua, Teoso misiritariko iua. ⁷ Aua kãkiti ãtipirika erekari kamakani. !Isãpaka erekari ikamini. Inirekarina Teoso: “Erekapitikai,” ininina. Inirekarina Teoso paxitinina. Inirekarina auinina ãtipirika. Kãkiti ikara atoko inakani Teoso txĩkitakana ãtipirika auinina ikapani. ⁸ Apanakinipekana kamari inireẽkitinoka. !Inirekarina atão imarotinina. Maerekatinoka inirekana ikaminina. Teoso omanatana kãkiti ikara atoko inakani. Teoso misiritanako ninoa. ⁹ Ikinipoko kãkiti maerekati kamakani maxikaãkako. Atatsiirauatako. Merepanika Xoteo misiritaãkako, eereka Xoteo minakanuia apaka misiritaãkako. ¹⁰ Teoso txanako kãkiti erekari kamakani: “Erekapitikai hĩte.” Ikara atoko itxanako merepanika Xoteoakori, eereka Xoteo minakanuia apaka. Teoso paxitanako ninoa. Ikamaerekaxiniretanako. ¹¹ Teoso misiritana ikini kãkiti maerekati kamakani. !Auiritari apanakini maerekati kamakani napakakiniri imisiritikona. Apanakini maerekati kamakani imisiritini atokokana, imisiritari ikinipoko maerekati kamakani.

¹² Xoteo minakanuia !auari Moisesi sãkire Teoso paniãtakiti iõkatsopatakori. Ninoa kamari maerekati, ininiã Teoso paniãtakiti imimarotakanisaaki ipinana. Xoteoakori aua Teoso paniãtakiti iõkatsopatakori. Ninoa apaka kamari maerekati. Ininiã Teoso misiritana ninoa, isãkire iõkatsopatakori iaõka imakamakani xika. ¹³ Teoso kamaerekatari isãkire iaõka kamakani. Pike-nakotakasaakiri Teoso sãkire, txamari !pikamari isãkire iaõka, iuasaaki Teoso likamaerekatai pite. ¹⁴ Xoteo minakanuia !auari Teoso sãkire iõkatsopatakori. Iuaritika atxiĩti ikamarina Teoso paniãtakiti iõkatsopatakori iaõka, kotxi ikamarina ãkixinirena sãkire iaõka. !Auari Teoso sãkire iõkatsopatakori ninoamoni, iuaritika Teoso paniãtakiti auape ãkixinireña. ¹⁵ Teoso paniãtakiti iaõka ikamakasaakina, oerekarina imarotinirina atão inakari ãkixinireña. Ækixinirena sãkire sãpiretana atão. Ætikata itxana: “Pite kamari maerekati. !

Apakata.” Ātikata erekari ikamakasaakina, “Pite kamari erekari. Erekapi-tikari.” Itxa ākixinirena sākire. ¹⁶ Kākiti kamakiti imarotiko ōti apokako. Iuasaaki Teoso paniātariko Xesosi Kristo sāpiretiniri kākiti kamakiti. Kākiti kamakiti apanakini mimarotakiniti apaka isāpireta. Iuasaaki isāpiretari kākiti misiritiko imaerekani xika. Teoso iokanapirena erekari nisāpiretakiti oerekapekari ikara atoko inakari.

Xoteoakori Auari Teoso Paniātakiti Iōkatsopatakori

¹⁷ Hītepekana, hīte txari: “Ate Xoteo atxaua. Teoso apakapapitikaua ate, kotxi isikari ipaniātakiti iōkatsopatakori atemoni. Atenoka Teoso anaakori atxaua,” hītxa. Ininiā hīteka iuikaua. ¹⁸ Hīte imarotari Teoso nireēkiti hīkamini. Himarotari Teoso paniātakiti iōkatsopatakori, ininiā himarotari erekari apiari hīkamini. ¹⁹ Hītxari: “Atera oerekari Teoso kimapore, ikimapore mimarotakanimoni. Mōsiāreni atoko itxana ninoa,” hītxa. “Ate imarotari Teoso sākire, ininiā ate imarotari apanakini aōerekini. Ininiā ate tirikapi atoko atxaua. Apanakini ipiā sikani atoko itxana ninoa.” Ikara atoko hītxa hīte. ²⁰ Hītxari: “Koerekarerini atxaua. Kākiti mūkiteni oereēkani atxaua. Ate oerekari kākiti poiō imarotakani. Ate imarotari ikinipoko. Aimarotari atāo, kotxi Teoso sākire iōkatsopatakori aua atemoni.” Ikara atoko hītxa hīte. ²¹ Hīte Xoteo inakanuia oerekari apanakini. Kinirepa kona hīteka oerekaua apaka? Hīte ōtākikari apanakini: “!Piitiriuatape”. Kinirepa hīte na takanapari hītiriuatini? ²² Hīte ōtākikari apanakini: “!Pisirīkape pītanoro minakotokatika.” Kinirepa hīte apaka sirīka hītanoro minakotokatika? Hīte omanatari teoso kamakōri, ininiā kinirepa hītirīkari ninoa teosone aikoti tii? ²³ Hīte iuikaua, kotxi Teoso sākire iōkatsopatakori aua hītemoni, txamari apanakini na paxitari Teoso hīte xika, kotxi kona hīte kamari Teoso sākire iaōka. ²⁴ Teoso sākire iōkatsopatakori txari: Hīte Xoteo xika, Xoteo minakanuia misākirepiretari Teoso, itxa Teoso sākire iōkatsopatakori.

²⁵ Teoso takaōtxikare aua hītoā. Teoso paniātakiti hīkaminiā, erekapitikari Teoso takaōtxikare hītoā auini. Teoso paniātakiti iōkatsopatakori hīmaka-makaniā, Teoso takaōtxikare mauakiniti atoko hītxaua. ²⁶ Xoteo minakatua, Teoso takaōtxikare iītoā mauakini, Teoso sākire iaōka ikaminiā, Teoso txariko: “Iua Xoteo atokotxikana itxa. Nītakaōtxikare iītoā auakiti atokotxikana itxaua.” ²⁷ Hīte Xoteoakorimoni aua Teoso paniātakiti iōkatsopatakori, iuaritika !hīkīpitari Teoso sākire. Teoso takaōtxikare auapitikama hītoā, iuaritika !hīkīpitari Teoso sākire. Xoteo minakanuia !auari Teoso takaōtxikare iītoāna, iuaritika ninoa kamari Teoso paniātakiti iōkatsopatakori. Ikara atoko ininiā, ninoa oerekaī himaerekani.

²⁸ Kiripa atāo Xoteo? Kiripa Teoso nakiti txataua? Kirimonipa aua Teoso takaōtxikare atāo inakari? Teoso takaōtxikare iītoā auakini, na ikinikani atāo Xoteo itxauana. ²⁹ Teoso paniātakiti iōkatsopatakori !oerekaua Teoso nakiti aniniua. Xoteo atāo inakanuia, Teoso nakiti itxaua ākixinireē. Teoso takaōtxikare aua iua ākixinireē. Erekari Matamatakoti takari Teoso takaōtxikare iua ākixinireē. !Inirekari kākiti iuikiniri. Inirekari Teoso iuikiniri.

3

Teoso Kamari Ikamaenetakiti

¹ Atxiiti hīte txano nota: “Teoso apakapari Xoteo. Teoso apakapari Xoteo minakanuia apaka, ininiā !apiaerekata Xoteo aniniua. !Apiaerekata Teoso takaōtxikare aiōā auini.” Atxiiti ikara atoko hītxa. Txamari na atāo. ² Apiaerekatapitika Xoteo aniniua, kotxi Teoso merepitipanika sāpiretari

iuaka sākire Xoteomoni, ninoa iōkatsopatiniri ĩkapani, inĩkatinirina ĩkapani.
³ Iuaritika apanakini Xoteo !auikari Teoso sākire. Ikara xika atxiĭti Teoso !
 ikamari ikamaenetakiti? ⁴ Ikamapitikari. Atxiĭti paxirari ikinimane sākire.
 Iuaritika Teoso sākire atāonoka. Teoso sākire iōkatsopatakori txari:

Teoso sākirauatakasaaki, ikinimane imarotari isākire atāo ininiua.
 Isāpiretakasaakiri kākiti imisiriritiko imaerekani xika, iuasaaki
 imarotaākako Teoso kamakiti atāo inini.

⁵ Atxiĭti kākiti txano nota: “Atāo minakati akamakasaaki, apanakini apia
 imarotari Teosonoka kaminiri atāo inakari. Ininiā erekari akaminiri atāo
 minakati apanakini imarotiniiri Teosonoka kaminiri atāo inakari. Ininiā !
 apakata Teoso misiritiniua ate, maerekati akamini xika.” Atxiĭti aua kākiti
 ikara atoko ina sākiretakani. ⁶ Apakatapitika Teoso misiritiniri maerekati
 kamakari. Iua kamari atāonoka, ininiā apakatapitika imisiritiniri ikinimane
 maerekati kamakani.

⁷ Atxiĭti kākiti txaua: “Atāo minakati asāpiretakasaaki, apanakini imaro-
 tari Teoso sākirenoka atāo ininiua. Atāo aminasākiretakaniā, apanakini
 kākiti txari: ‘Teosonoka ereka,’ itxana. Ininiā !apakata Teoso misiritiniua
 amaerekani xika.” Atxiĭti aua kākiti ikara atoko ina sākiretakani. ⁸ Ikara atāo
 ininiā, maerekati makama erekari apokini ikapani. Txamari ikara sākiretxiti
 na atāo. Iuaritika apanakini apoĭtapekaua ate ikara atoko asāpiretini. Ininiā
 atāopitika ninoa misiritiko, isākirena xika.

!Auari Kākiti Erekari

⁹ Ĥixinikariko ikinika ikara nisāpiretakiti. Atauako Xoteo apiaerekata?
 Atauako Xoteo minakanuia poiāo ereka? Kona ikara atokoni itxa. No-
 erekapekai ĥite, Xoteo minakanuia atokokana itxa Xoteo, kotxi ikinimane
 kamari maerekati. Akinika !aposotari atakanapiniri maerekati akamini.

¹⁰ Teoso sākire iōkatsopatakori txari:

!Auari atāo inakari kamakari. Ātika !auari.

¹¹ Teoso nireĕkiti imarotakari !auari. Teoso nirekakari !auari.

¹² Ikinimane kaporiĕkari Teoso. Ikinimane kerokari ikamakiti. Erekari
 kamakari !auari. Ātika !auari.

¹³ Kākiti sākire maerekati, ĭtotxi arakakari saka atoko itxa. Itotarina
 imisirienetinirina apanakini. Kākiti sākire imini tsiĭā atoko itxa.

¹⁴ Ātipirika imisākirepiretarina āti, kotxi inĩkatarina omanākaretxi ākixinireĕna.

¹⁵ Maxikatĭka inirekarina okinirina āti.

¹⁶ Isinimonina imaxikana apanakini. Maerekaxinireninoka itxĭkitakana
 apanakini.

¹⁷ !Imarotarina neenamatzxi itakanapinina.

¹⁸ !Ipaxitarina Teoso. !Ipĭkarina iua.

Itxa Teoso sākire iōkatsopatakori.

¹⁹ Aimarotari Teoso sikari ikinika ipaniĕtakiti iōkatsopatakori atemoni Xo-
 teoakarimoni, inireĕkiti aimarotini ĩkapani. Ininiā !apakata ate, Xoteo
 minakanuia pakini: “!Nimarotari Teoso nireĕkiti,” anini, kotxi isāpiretipekari
 inireĕkiti akamini tĭkane. Ininiā atāopitikara Teoso misiritinina ikinimane
 maerekati kamakani. ²⁰ Ikinika Teoso paniĕtakiti iōkatsopatakori !aposota
 akamini, ininiā Teoso kona kamaerekataua. Teoso paniĕtakiti iōkatsopatakori
 oerekaua maerekati kamakani aniniua.

Natokopa Itxa Teoso Kamaerekatiniri Kākiti?

²¹ Uatxa Teoso oerekapekaua itxĭkitakiniri kākiti atāo inakari kamakani
 ininiua. Teoso paniĕtakiti ikinika ! ikama kākiti, iuaritika itxĭkitakaākana
 atāo inakari kamakani ininiuana. Kitxakapirĭka Moisesi, Teoso sākire

sāpiretakani apaka sāpiretari ikara. ²² Teoso txīkitakari kākiti atāo inakari kamakani ininiuana, Xesosi Kristo sākire auikasaakina. Itxīkitakari Xoteo, Xoteo minakanuia pakini atāo inakari kamakani ininiuana, Xesosi sākire auikasaakina. Xoteo minakatiua Teosomoni, Xoteotxikana itxaua. ²³ Kotxi ikinimane kamari maerekati, ininiā !aposota aāpokini Teoso iotximere-moni. ²⁴ Maerekati kamakanuia ate, iuaritika Teoso sikari ikinipoko erekari maxikatiūka atemoni, ininiā Teoso kamaerekataua ate, kotxi Kristo Xesosi ikitxirauata ate ikapani ipīkasaaki. Ininiā Teoso !imisiritaikaua amaerekani xika. ²⁵ Teoso sikari Xesosi ipinini kākiti ikapani. Xesosi ipīkasaaki, Teoso makatxakari maerekati akamakiti. !Imisiritaikaua ate, kotxi aūikari Xesosi ipinini ikitxitari Teoso, maerekati akamakiti. Teoso sikari Xesosi ipinini ate ikapani. Ikara oerekaua atāo inakarinoa ikamini. Mitxipitipanika Teoso !imisiritana kākiti imaerekanina xika. Iātapani iketo manapi apokini, kotxi iamoni kākiti. ²⁶ Teoso sikari Xesosi, ininiā ipipe kākiti ikapani, ininiā uatxa Teoso misiritari kākiti maerekati ikamini xika, ininiā aimarotari Teoso atāo inakarinoa kamakari itxaua iua, kotxi !auritari maerekati kamakari inapakakini. Erekari Teoso, ininiā iua posotari ikamaerekatiniri kākiti Xesosi sākire auiākani.

²⁷ Ininiā !apakata aūuikiniua, kotxi !auari aparīka akamaerekatakiri, ininiā !apakata aūuikiniua Teoso paniātakiti iōkatsopatakori akamakasaaki. Teosora kamaerekataua, Xesosi sākire aūuikasaaki. ²⁸ Teoso paniātakiti iōkatsopatakori kamakari atxiīti !ikamaerekataāka, kotxi !auikari Xesosi sākire. Xesosi sākire auikakarinoa ikamaerekataāka. ²⁹ Atauako Teoso Xoteo Teosonenanini itxataua? Konapitini. Xoteo minakanuia Teosonekanera apaka itxaua Teoso. ³⁰ Teoso ātinoka aua. Iua kamaerekatana Xoteo, Xesosi sākire auiākani. Iua kamaerekatana Xoteo minakanuia apaka, Xesosi sākire auikasaakina. ³¹ Ikara atoko ininiā, atxiīti kākiti txari: “Teoso kamaerekataua ate, kotxi aūuikari Xesosi sākire, ininiā Teoso paniātakiti iōkatsopatakori !itxaika. Ininiā !akamaikari,” itxa kākiti sākire atxiīti. Konapitini. Xesosi sākire aūuikasaaki, anirekari iteene akaminiri Teoso sākire paniātakiti iōkatsopatakori.

4

Atāo Inakari Kamakari Apraāo

¹ Maxinikari Apraāo aīri kitxakapirīkari. Natokopa itxa iua imarotakiti, Teoso kamaerekatiniri kākiti? ² Apraāo kamakiti erekari kamaerekataākamari iua, ininiā iua iuikamauako. Txamari iua iuikiniua !auari Teoso apisatoō. ³ Teoso sākire iōkatsopatakori txari:

Apraāo auikari Teoso sākire, ininiākara Teoso txīkitakari iua atāo inakari kamakari ininiuana.

⁴ Parīkauatakari ipatrāote sikari iparīka iki iuamoni. Maxikatiūka !iikitxitari iua. Isikari, kotxi iparīkauata. ⁵ Kākiti auikiniāri Teoso kamaerekatiniri maerekati kamakari, iua kākiti !iukari iuaka parīka. Imarotari iparīka !ikamaerekatari iua. Teoso txīkitakari ikara atoko inakari kākiti atāo inakari kamakari ininiuana, kotxi iua auikari Teoso sākire. ⁶ Kitxakapirīka Tavii txari ikara atoko. Iua sāpiretari kākiti Teoso sukakiti erekari apakapakani. Teoso txīkitakari iua atāo inakari kamakari ininiuana. Na iparīkani txīkitakari iua atāo inakari kamakari ininiuana. ⁷ Tavii txari:

Teoso makatxakasaakiri kākiti maerekani, !atamataikari maerekati ikamakiti. Teoso takari ikinipoko erekari kākiti ikara atoko inakarimoni.

⁸ Teoso !iaōtari iua kamakiti maerekati. Teoso takari ikinipoko erekari iuamoni.

Itxa Tavii kitxakapirīka.

⁹ Atxiiti pite txari: “Atauako ia erekari Teoso sikakiti, Tavii sãpiretakiti, kãkiti Teoso takaõtxikare auaitotakiti ikapaninanini?” Konapitini. Ia erekari Teoso sikakiti Teoso takaõtxikare mauaitotakini ikapani apaka. Nisãpiretapekai ia Teoso sãkire iõkatsopatakori:

Apraõ auikari Teoso sãkire, ininiãkara Teoso txikitakari iua atõ inakari kamakari ininiua,

itxa Teoso sãkire iõkatsopatakori. ¹⁰ Kirisaakipa Teoso txikitakari Apraõ atõ inakari kamakari ininiua? Atauako Teoso takaõtxikare Apraõ itõã auakasaakiikani? Konapitini. Takaõtxikari Apraõ itõã takiko apis-

apanikara, itxikitakari Apraõ atõ inakari kamakari ininiua. ¹¹ Merepanika Teoso txikitakari Apraõ atõ inakari kamakari ininiua, eerekaikara itakari itakaõtxikare itõã. Ikara Teoso takaõtxikare oerekari, mitxipeka Teoso txikitakari Apraõ atõ inakari kamakari ininiua, kotxi iua auikari Teoso sãkire. Apraõ auikari Teoso sãkire, Teoso takaõtxikare itõã auini apis-

apanika. Ininiã Apraõ ikini Teoso sãkire auiakani iri atoko itxaua. Atxiiti Teoso takaõtxikare itõãna !auari. Iuaritika ninoa iri atoko itxaua Apraõ. Teoso txikitakari ikinimane iua sãkire auiakani atõ inakari kamakani ininiuana. ¹² Apraõ Teoso takaõtxikare auaitotakini iri atoko itxaua, ninoa auikiniãri Apraõ sãkire Apraõ auikiniri atokotxikana, kotxi Teoso auikari Teoso sãkire Teoso takaõtxikare itõã auini apisapanika.

¹³ Teoso sikaenetari itixi Apraõomoni, imekaniriakori pakinimoni. Ikara atoko Teoso sãkire, kotxi Apraõ auikari Teoso sãkire. Iua auikari Teoso sãkire, ininiã Teoso txikitakari iua atõ inakari kamakari ininiua. Apraõ kamakiti erekari litxikitakari Teoso sikaenetiniri itixi Apraõomoni. ¹⁴ Kãkiti erekari kamakari Teoso sãkire mauiakati !apakapari Teoso sikaenetakiti, kotxi !auikari Teoso sãkire. Teoso sikari isikaenetakiti iua sãkire auiakanimoninani. ¹⁵ Teoso paniãtakiti iõkatsopatakori makamakati misiritaãkako. Teoso paniãtakiti iõkatsopatakori mauakaniã, maerekati !auari. Txamari auapitika Teoso paniãtakiti iõkatsopatakori.

¹⁶ Ininiã kãkiti auikasaakiri Xesosi sãkire, apakapari Teoso sikaenetakiti. Maerekati kamakani kãkiti, iuaritika apakaparina Teoso sikaenetakiti, kotxi Teoso nirekari ikinipoko erekari isikini kãkitimoni. Ininiã ikinimane Apraõ apika mekaniriakori apakapapitikari Teoso sikaenetakiti. Xoteoakori Teoso paniãtakiti iõkatsopatakori auakini apakapari. Xoteo minakanuia Teoso sãkire Apraõ auikini atoko inakani apaka apakapari. Ate amakinika iri atoko itxaua Apraõ. ¹⁷ Teoso sãkire iõkatsopatakori txari:

Teoso txari Apraõ: “Nota txikitakaiko pite itori ãti uãka iri pininiua.”

Ininiã Teosomoni iua aãri atoko itxaua, kotxi Apraõ auikari Teoso sãkire. Teoso txikitakana ipikani iuaikana auãki inini. Iua kamari mitxi mauakati auini.

¹⁸ Apraõ kiomãtxipeka inakasaaki, kona keeneri. Iuaritika auikari Teoso sãkire. Iãtapari Teoso sikaenetakiti apokini. Ininiã apanakini ãti uãka iri atoko itxapekua Teoso sãkire iaõka. Teoso sãkire iõkatsopatakori txari:

Papika mekaniriakori kaiãopokopaniriko.

¹⁹ Apraõ seã anokanani inakasaaki, imarotari itõ ipinanapanoka inini. Imarotari Sara !oposotaikari keene onini. Iuaritika iteene auikari Teoso sãkire. ²⁰ !Iotoka auikiniri Teoso sikiniri isikaenetakiti iuamoni. Iua auikari Teoso sãkire itaparaxiniriritika. “Teoso posotari ikinipoko ikamini,” itxa.

²¹ Iua iteene imarotari Teoso posotiniri isikiniri isikaenetakiti. ²² Apraõ auikari Teoso sãkire, ininiãkara Teoso txikitakari iua atõ inakari kamakari ininiua. ²³ Na Apraõonani Teoso txikitakari atõ inakari kamakari ininiua.

²⁴ Iua txikitakaua ate apaka atõ inakari kamakani aniniua, aãuikiniãri Teoso sãkire. Aãuite Xesosi ipikasaaki, Teoso õkitikari iua iuaikana auini ikapani.

²⁵ Teoso sikari Xesosi kăkitimoni ipinini ĩkapani maerekati akamakiti xika. Teoso ōkitikari iua iuaĩkana auăki inini ĩkapani, ate ikamaerekatini ĩkapani.

5

Teoso !Omanataikaua Ate

¹ Ininiă Teoso kamaerekataua, kotxi aăuikari isăkire, ininiăkara aăuĩte Xesosi Kristo iotokakari Teoso omanatiniua ate. Teoso ! omanataikaua ate. Uatxa apakapaua ate. ² Aăuikasaakiri Xesosi săkire, iusaaki aimarotari ikinipoko erekari Teoso sikakiti atemoni ikiniōtika. Iteene apoxokoniuaata, kotxi aiătapari Teoso aaōkitini, iua iotximere aătamatini ĩkapani. ³ Apanakini misiritakasaakiaua, apoxokoniuaata apaka, kotxi Teoso oerekaua amĩteenekiniri amisiritiko. ⁴ Amisiritiko amĩteenekiniă, aimarore apiaăpota. Aimarore apiaăpotakasaaki, aiătapariko erekari apokini atemoni. ⁵ Erekari apokini aiătapiniă, aăpakapapitikariko erekari, kotxi aăkixinireĕ aimarotari Teoso iteene tiretiniua. Erekari Matamatakoti Teoso sikakiti atemoni, oerekaua Teoso tiraōki aăkixinireĕ.

⁶ Erekari akamini amaposotakanisaaki, Teoso amanirekakanisaaki, Kristo ipina ate ĩkapani. Iua ipina iketo ōti manapi. ⁷ Atxiĩti kăkiti ipina atăo inakari kamakari ĩkapani iua mapinakani ĩkapani? Atxiĩti !ipina iua ĩkapani. Atxiĩti kăkiti ipina âti erekari kămakari ĩkapani, iua mapinakani ĩkapani? Atxiĩti ipina iua ĩkapani. ⁸ Teoso oerekaua ate, iua iteene tiretiniua ate, kotxi Kristo ipina ate ĩkapani maerekati akamapanika anakasaaki.

⁹ Kristo ipinini kamaerekataua ate, ininiă uatxa Teoso apakapaua ate. Apikomoni Kristo kaminaua, kotxi Teoso ! omanataikaua. !Imisiritaikaua. ¹⁰ Ate Teoso omanatakani anakasaakiaua, Teoso âkiri ipina ate ĩkapani. Ininiă Teoso mokaiahari !atxaikaua. Iua apakapaua. Iua apakapaua, ininiă amaerekani imakatzaka, ininiă aăuapininiika, kotxi iua ōkitikaua auapininiika anini ĩkapani Teosokata, kotxi Kristo auini auapika. ¹¹ Teoso kamari ikara ate ĩkapani. Apikomoni iua kaminapanikauako ate, kotxi iua kamapoxokoni-taua, kotxi aăuĩte Xesosi Kristo mikanapiriăua ate Teosomoni.

Adăo, Kristo Pakini

¹² Maerekantixi apoka itixi kiki âtika xika, Adăo inakori xika. Maerekati ikamakiti xika ipină. Ininiă ikinimane kăkiti ipina, kotxi ikinimane kăkiti kamari maerekati. ¹³ Teoso paniătakiti iōkatsopatakori apokini apisapanika, kăkiti kamari maerekati, iuaritika Teoso ! imisiritana ninoa maerekati ikamakitina xika, kotxi iusaaki ! isăpiretapanikari ipaniătakiti. ¹⁴ Adăo auakasaaki atoko, Moisesi auakasaaki manapi, iusaaki Teoso paniătakiti iōkatsopatakori !apokapanika, iuaritika ikinimane ipina. Atxiĩti kăkiti !ika-mari maerekati Adăo maerekani atoko, kotxi iua !ikamari Teoso paniătakiti, iuaritika ikinimane ipina. Kiki Adăo inakori axinikasaaki, aimarotari iua Xesosi atoko ininiua.

¹⁵ Txamari aimarotari iua na Xesosi ! atokoni itxaua, kotxi âtika kiki maerekani xika, itori kăkiti ipina. Iua sikari ipĩkitxi kăkitimoni. Kiki âtipekana, Xesosi Kristopekana, iua sikari erekari Teoso siăkiti itori kăkitimoni imap-inakanina ĩkapani. Teoso siăkiti ĩki !auari. !Erekari Adăo sikakiti. Peerekari Xesosi Kristo siăkiti. ¹⁶ Kiki âtika Adăo inakori kamari maerekati. Ătinoka maerekati ikama, ininiă eereka Teoso săpiretari imaerekani. Eereka Teoso misiritari iua. Teoso siăkiti ! ikara atokoni itxa. Kăkiti maerekati itori ikamakasaaki, kiki âtipekana Xesosi sikari Teoso siăkiti kăkitimoni, ininiă ikamaerekatana kăkiti. Iusaaki imakatzakari ninoa maerekani. ¹⁷ Kiki âtika, Adăo inakori maerekani xika, Teoso txĩkitakari ikinimane ipinini. ! Erekari iua kiki kamakiti. Ăti kiki, Xesosi Kristo inakori kamakiti peerekari.

Iua txīkitakari kākiti ākixinire katapara inini maerekati imakamakani īkapani. Kākiti ikara atoko inakari Teoso sikari ikinipoko erekari. Itori isika. Itxīkitakari iua atāo inakari kamakari ininiua. Ia iparīka īki !uuari.

¹⁸ Adāo kamari ātinoka maerekati, iuaritika iua maerekati txīkitakari Teoso misiritinina ikinika kākiti. Iua atokokana Xesosi kamakiti ātika txīkitakari Teoso kamaerekatina kākiti ninoa ātipirika auini īkapani. Iuasaaki atāonoka ikamakiti. ¹⁹ Kiki ātika Adāo inakori na kamari Teoso sākire iaōka, ininiā itxīkitakari kākiti itomaneri maerekati ikaminina. Kiki ātipekana Xesosi inakori kamari Teoso sākire iaōka, ininiā itxīkitakari kākiti itomaneri atāo inakari kamakani ininiuana.

²⁰ Teoso sikari ipaniātakiti iōkatsopatakori Moisesimoni. Iuasaaki kākiti imarotari maerekati itori ikamakitina, ininiā maerekanitxi apiaāpota, kotxi Teoso paniātakiti iōkatsopatakori auape. Maerekanitxi apiaāpota, iuaritika erekari Teoso sikakiti kākitemoni apiata. ²¹ Maerekanitxi txīkitakari kākiti ipinini. Erekarī Teoso sikakiti kākitemoni txīkitakari kākiti auini ātipirika imaxipokakani tīkane, kotxi aāuīte Xesosi Kristo txīkitakari kākiti atāo inakari kamakari ininiua. Ininiākara kākiti auapininiika, kotxi Xesosi Kristo ka-maerekatana.

6

!Anirekaikari Maerekati Akamini

¹ Ininiā erekari atxiīti apikomoni maerekati akamini, ikinipoko erekari Teoso sikakiti apiata auini īkapani? ² Konapitini. Teoso makatzakapekari amaerekani, kotxi iuasaaki !anirekaikari apikomoni maerekati akamini. Anireēkiti maerekati akamini xipope, kākiti ipinini atoko itxa ixipokini. Ininiā !apakata apikomoni maerekati akamini. ³ Apatxisatiko oerekari Kristo Xesosi nakitiakori aniniua. Iuakata apinini atoko itxa apatxisatiko. Himarotapekari ikara. ⁴ Apatxisatiko oerekari Kristokata ikatakoni atoko aniniua, ininiā !anirekari apikomoni maerekati akamini. Kristo iri Teoso posotiire ōkitikari imi, iuaīkana auāki inini īkapani. Peerekari iposotiire. Ininiā apatxisatiko oerekari Xesosi ōkitikiko atokokana Teoso ōkitikaua ate aāuini amaneri inini īkapani.

⁵ Aāuapika Kristokata, ininiā ātika atoko atxaua iuakata aāuini, ininiā Kristo ipinini atokokana mitxi aāuini xipope. Kristo iuaīkana auini atokokana, aāuini amaneri. Peerekari, kotxi aāuapika Kristokata, ātika atoko aniniua iuakata. ⁶ Mitxi anireēkiti xipope, kotxi Kristo makatzakari amaerekani aamina Ipiriāmitakari nopini ipīkasaaki ate īkapani. Ininiā mitxi anireēkiti posotiire !auaika. Ixipokaākapeka, kotxi mitxi anireēkiti maerekatina. Ininiā maerekanitxi nitiriakori atoko ! atxaikaua. Aimarotari ikara. ⁷ Maerekanitxi na paniātaikari kākiti ipīkari.

⁸ Kristokata ipīkani atoko aniniā, aimarotari iuakata aāuini apaka. ⁹ Ipīkasaaki ōkitikaāka, ininiā !ipinaika. Aimarotari ikara. Ipīkitxi na kaposotiirekari iuaikana Kristo ipinini īkapani. ¹⁰ Iua ipina maerekanitxi posotiire ixipokini īkapani. Iuasaakipeka maerekanitxi posotiire xipoka. Uatxa Kristo auapininiika Teosokata, iri nireēkitinoka ikamini īkapani. ¹¹ Iua atokotxikana anireēkiti maerekati xipope. Uatxa !anirekaikari maerekati akamini. Uatxa aāuapininiika Teosokata, iua nireēkitinoka akamini īkapani, kotxi Kristo Xesosikata aāuapika.

¹² Ininiā na hāuiritapiri hīto paniātini maerekati hīkamini. Na hīkamapiri maerekati hīto nireēkiti. ¹³ Na hāuiritapiri hīto kaminiri maerekati. Na hāuiritapiri hōki kaminiri maerekati. Na hāuiritapiri hinama kaminiri maerekati. Na hāuiritapiri hīuako kaminiri maerekati. Na hīkamapiri

maerekati hiito nireekiti. Hiteka h̄sikauako Teosomoni, kotxi mitxi ip̄ikani atoko h̄txaua, eereka Teoso tx̄ikitakai auāki iuaikana hinini, ininiā h̄sikari hiito ikinika Teosomoni. Atāo inakarinoa h̄ikamako h̄okiā, hinamaā, h̄uakoā, imakinika h̄iitō. ¹⁴ Uatxa maerekanitxi apatrāote atoko ! itxaikauako. Uatxa amisiritiko ! auaika, Teoso paniātakiti iōkatsopatakori amakamakaniā, kotxi ikinipoko erekari Teoso sikakiti aāpakapakasaaki, iusaaki imakatzakari amisiritiko.

Atāo Inakari Nitiriakori

¹⁵ Ininiā atxiiti h̄txano nota: “Maerekati makama, kotxi amisiritiko ! auaika Teoso paniātakiti iōkatsopatakori amakamakaniā, kotxi ikinipoko erekari Teoso sikakiti aāpakapakasaaki, imakatzakari amisiritiko. Ininiā makamari maerekati,” atxa atxiiti. Konapitini. ¹⁶ Himarotari, h̄uiritiniāri kākiti paniātini iua nireekiti h̄ikamini, ininiā iua h̄ipatrāote atoko itxaua. Iua nitiriakori atoko h̄txaua, kotxi h̄ikamari iua paniātakiti. Maerekanitxi h̄ipatrāote ininiāua, h̄ikamari maerekati, ininiā h̄ipina. Ininiā kona h̄ua Teosokata ātipirika. Teoso h̄ipatrāote ininiāua, iua paniātakiti h̄ikama, ininiā atāo inakarinoa h̄ikama. ¹⁷ Nitxari Teoso: “Erekapitikari atemoni pikamakiti.” Ikara atoko nitxari Teoso, kotxi mitxi maerekanitxi nitiriakori atoko h̄txaua. Uatxa maerekanitxi nitiriakori ! h̄txaikaua, kotxi iteene h̄ikpitari h̄ōerekiko. ¹⁸ Teoso makatzakapekai h̄ite, ininiā uatxa maerekanitxi nitiriakori ! h̄txaikaua. Uatxa Teoso nitiriakori h̄txaua, ininiā atāo inakarinoa h̄ikama. ¹⁹ Ikara atoko nitxa s̄akireta h̄itemoni, kotxi himarotari nitiritxi, patrāo pakini pirena. Himarotakiti poiāoka. Mitxi h̄uiritari hiito kaminiri maerekati inireekiti. H̄uiritari hiito apikomoni maerekati ikamaāpotini. Apiaāpota maerekati h̄ikamakiti. Iusaaki hiito maerekanitxi nitiri atoko itxaua. Uatxa h̄sikari hiito Teosomoni atāo inakari nitiri ininiua ikapani, ininiā h̄ikamariko atāo inakarinoa. Ininiā Teoso nakitiakorinoa h̄txaua.

²⁰ Maerekanitxi nitiriakori hinakasaakua, atāo inakari nitiriakori na h̄txaua, ininiā atāo inakari na paniātai h̄ite atāo inakarinoa h̄ikamini. ²¹ Īkiripa erekari h̄apakapa, maerekati mitxi h̄ikamakasaaki? Kona kapakaparei. Uatxa h̄ipētauata maerekati mitxi h̄ikamakiti xika. Maerekati kamiko xika kākiti ipina, ininiā kona aua Teosokata ātipirika. ²² Uatxa maerekanitxi na paniātaikai h̄ite. Uatxa Teoso nitiriakori h̄txapekua, ininiā h̄ikamari ikinipoko Teoso ikapani. Ininiā h̄uapininiika h̄txako Teosokata ātipirika. ²³ Maerekanitxi kākiti patrāote atoko itxa. Īkitxitari kākiti par̄ikatxi ĩki, txamari ip̄ikitxi itxaua par̄ikatxi ĩki. Teoso sikakiti atemoni ātiāo. !Apar̄ikauata Teoso sikakiti aāpakapini ikapani, iuaritika isikaua aūini ātipirika inini ikapani, kotxi aūite Xesosi Kristo ipina ate ikapani.

7

Tanirauatakarō Atoko Atxa

¹ Nitiriakori, h̄ite h̄ikinika imarotari paniātakori iōkatsopatakori, ininiā himarotari nis̄akire. Kākiti auapanika inakasaaki, ik̄ipitariko paniātakori iōkatsopatakori. ² Noerekaiko h̄ite. Paniātakori iōkatsopatakori paniātaro sito okaikotini oitanirikata iua auapanika inakasaaki. Iua ipininiā, iua paniātakori na paniātaikaro oa. ³ Ōtaniri auapanika inakasaaki, ātikata oāuiniā, kanokarero otxaua. Ōtaniri ipininiā, paniātakori iōkatsopatakori na paniātaikaro oa, ininiā apakata ātikata oitaniriuatini. Ikara atoko oniniā, kanokarero !otxaua.

⁴ Nitiriakori, oa sito atokotxikana ate amakinika. Kristo ipina ate ikapani, ininiā Moisesi paniātakiti iōkatsopatakori kona paniātaikaua, kotxi uatxa Kristo nakitiakori atxaua. Uatxa Teoso ōkitikakiti Kristo nakitiakori atxaua. Iua

nakitiakori atxaua, ininiã erekari akama Teoso ikapani. ⁵ Mitxi anireëkiti maerekati paniãtaua maerekati akamini. Aïto nirekari maerekatinoa ikamini, kotxi paniãtakori iõkatsopatakori txari: “Kona hïkamapiri maerekati.” Ininiã iusaaki apiata anirekari maerekati akamini, kotxi maerekatinoka kamakani atxaua. Ininiã apina, ininiã kona aãuapika Teosokata. ⁶ Mitxi paniãtakori iõkatsopatakori nirekari ipaniãtiniua. Uatxa paniãtakori iõkatsopatakori na paniãtaikaua. Ikara kitzakari. Uatxa amaneri, kotxi uatxa aparïkauata Teoso ikapani. Erekari Matamatakoti oerekaua aparïkauatini Teoso ikapani.

Teoso Paniãtakiti Iõkatsopatakori

⁷ Ininiã natokopa itxa uatxa axinikakiti? Teoso paniãtakiti iõkatsopatakori maerekati itxaua atxiïti? Konapitini. Maerekati !itxaua. Teoso paniãtakiti iõkatsopatakori mauakanimako, nota !imarotamariko maerekati nikamini. Teoso paniãtakiti iõkatsopatakori txari:

Kona pinirekapiri äti nakiti,

ininiã äti nakiti ninirekiniã, nimarotari nikaminiri maerekati. ⁸ Maerekati xika na nota nirekari ikara Teoso paniãtakiti nikamini. Ininiã iteene ninirekari apanakini nakiti. Ninirekari apanakini nakiti, kotxi Teoso paniãtakiti iõkatsopatakori txari:

Kona pinirekapiri äti nakiti.

Teoso paniãtakiti iõkatsopatakori mauakaniã, iusaaki maerekati !auari.

⁹ Teoso paniãtakiti iõkatsopatakori nimimarotakanisaaki, na nimarotari maerekati nikamini. Niuãkatori nãkixinire auãki inini. Teoso paniãtakiti iõkatsopatakori nimarotakasaaki, nimarotari maerekati nikamini. Iusaaki nimarotari nipinini nimaerekani xika. ¹⁰ Iusaakipeka nimarotari nãkixinire ipïkari atoko inini. Teoso paniãtakiti iõkatsopatakori oerekari kãkiti erekari ikamini, iua auini ikapani. Txamari Teoso paniãtakiti iõkatsopatakori oerekano nota nipinini nimaerekani xika. ¹¹ Maerekati ninireëkiti misirienetano. Imisirienetano, ininiã na nikamari Teoso paniãtakiti iõkatsopatakori iaõka. Ininiã nikamari maerekati. Ininiã maerekati xika nipina.

¹² Teoso paniãtakiti iõkatsopatakori !auari maerekati, kotxi Teoso kamari. Atãonoka itxa Teoso paniãtakiti. Erekari. ¹³ Atxiïti erekari txïkitakano nipinini? Konapitini. Maerekanitxi txïkitakano nipinini. Maerekanitxi txïkitakano Teoso paniãtakiti iõkatsopatakori erekari nimakamakani, ininiã nikamari maerekati, ininiã iua maerekanitxi txïkitakano nipinini. Ininiã aimarotari maerekanitxi kona xatiki apakata. Maerekatinoa, kotxi maerekanitxi txïkitakano nipinini. Teoso paniãtakiti iõkatsopatakori oerekaua ikara atoko inakari.

¹⁴ Aimarotari Teoso paniãtakiti iõkatsopatakori iaxiti ikari ininiua. Txamari nota uaikirino. Maerekanitximoni vëtxitakori atoko nitxaua, maerekanitxi nitiri atoko nininiua ikapani. ¹⁵ Na nimarotari nikamakiti, kotxi na nikamari notaka nireëkiti. Nikamari nimanirekakiniti, nomanatakiti. ¹⁶ Ininiã maerekati nimanirekakiniti nikamakasaaki, iusaaki nimarotari Teoso paniãtakiti iõkatsopatakori ereka inini. ¹⁷ Ininiã na notani kamari maerekati. Maerekati nãkixinireë auakarira txïkitakari nikaminiri iua maerekati. ¹⁸ Nimarotari erekari !auari nãkixinireë. Maerekatinoa aua nãkixinireë, kotxi ninirekari erekari nikamini, txamari !niposotari. ¹⁹ Na nikamari erekari ninireëkiti. Nikamapïkari maerekati nimanirekakiniti. ²⁰ Ininiã nimanirekakiniti nikaminiã, kona notani kamari. Maerekati nãkixinireë auakarira txïkitakano iua maerekati nikamini.

²¹ Ininiã ia sãkiretxiti atão: Ninirekasaakiri erekari nikamini, maerekatinoka niposota nikamini. ²² Nãkixinireë iteene ninirekari Teoso paniãtakiti

iōkatsopatakori iaōka nikamini. ²³ Txamari aua āti ninireēkiti niūto āki. Iua niūto nireēkiti nirekari ixipokiniri nākixinire nireēkiti. Iua niūto nireēkiti xika nikamari maerekati nireēkitinoka. !Niposotari erekari nikamini. Kateia āki iaxirikakoni atoko nitxa. ²⁴ !Erekano nota. Maerekati kamakarino nota. Kipa makatxakano, maerekati niūto nireēkiti nimakamakani ikapani? Niūto txīkitakano nipinini. Kipa moianatano? ²⁵ Aūūite Xesosi Kristokara moianatano. Iuara makatxakano nimapinakani ikapani. Peerekari Teoso, kotxi iua kamari ikara atoko nota ikapani.

Ininiā uatxa ia atoko inakari nisāpiretai. Nākixinireē ninirekari Teoso paniātakiti iōkatsopatakori nikamini. Txamari niūtoā maerekanitxi nireēkitinoka niposota nikamini.

8

Erekari Matamatakoti Txīkitakari Aākixinire Auāki Inini

¹ Ininiā uatxa Teoso !itxaikaua ate: “Maerekati hīkamakiti xika nimisiri-taiko hūte,” !itxaikaua ate, kotxi Kristo Xesosi nakitiakori atxapekaua. !Aka-maikari aīto nireēkiti. Erekari Matamatakoti sikaposotiiretaua iua nireēkiti akamini. ² Erekari Matamatakoti nireēkiti akama, ininiā iua txīkitakari aākixinire auāki inini, kotxi Xesosi Kristo nakitiakori atxaua. Erekari Matamatakoti makatxakano maerekanitxi nireēkiti nikamini, ininiā na nipina.

³ Aīto maerekani xika Teoso paniātakiti iōkatsopatakori !iposotari imaktx-akiniri amaerekani, kotxi !aposotari akaminiri iua paniātakiti. Iuaritika Teoso makatxakari amaerekani, kotxi iua iokanatarimi atemoni. Imi īto ate īto atoko, maerekati kamakari īto atoko itxa. Teoso iokanatarimi atemoni ipinini ikapani, amaerekani imaktxakiniri ikapani. Ininiā ixipokari maerekati posotiiretau aītoā auakari. ⁴ Teoso kamari ikara, ininiā Xesosi kamari ikinika Teoso paniātakiti iōkatsopatakori iaōka ate ikapani, kotxi ipaniātakiti atāo in-akaranoka. Ininiā !akamaikari maerekati aīto nireēkiti. Akamari Erekari Matamatakoti nireēkiti.

⁵ Itotxi nireēkiti kamakani xinikapikari iūtona nireēkitinoka. Erekari Matamatakoti nireēkiti kamakani xinikapikari Erekari Matamatakoti nireēkitinoka. ⁶ Kākiti xinikiniāri iūto nireēkitinoka, ixinikakiti txīkitakari iua ipinini, ininiākara kona auapika Teosokata. Kākiti auiritiniāri Erekari Matamatakoti txīkitakiniri ixinikiniri Erekari Matamatakoti nireēkitinoka, iua auapininiika Teosokata. Erekaxinireri iua. ⁷ Kākiti xinikiniāri iūto nireēkitinoka, Teoso mokaiaikariakori itxauana, kotxi !inirekarina Teoso paniātakiti iaōka ikaminina. !Iposotarina Teoso paniātakiti iaōka ikaminina.

⁸ Itotxi nireēkitinoka kamakani !iposotari ikamapoxokonitininirina Teoso.

⁹ Hītepekana, Erekari Matamatakoti hākixinire auiniā, hīkamari iua paniātakiti. !Hīkamari maerekati hīto paniātakiti. Erekari Matamatakoti kākiti ākixinireē mauakanisaaki, na Kristo nakitiakori !itxauana, kotxi Erekari Matamatakoti Kristo nakiti itxaua. ¹⁰ Hīto ipinapitīkako maerekati xika, iuaritika hīxinire auākiri itxaua Kristo hākixinireē auiniā. Hīxinire auākiri itxaua, kotxi Kristo kamari atāo inakaranoka ate ikapani. ¹¹ Teoso ōkitikari Xesosi, iua ipīkasaaki. Erekari Matamatakoti Teoso nakiti hākixinireē auiniā, Teoso Kristo ōkitikakari, txīkitakariko hīto ipinakari iuaīkana auāki inini, kotxi Erekari Matamatakoti Teoso nakiti aua hākixinireē.

¹² Ininiā nitariakori, auapitika akamakiti tīkane Teoso ikapani. !Auari akamakiti tīkane aīto nireēkiti akamini ikapani. ¹³ Hīto nireēkiti hīkamaniā, hīxinire ipīkari atoko itxa, ininiā ātipirika kona hāua Teosokata. Hamanainiāri Erekari Matamatakoti maerekati hīto kamakiti ixipokini, iuasaaki hāuapika ātipirika Teosokata.

14 Erekarí Matamatakoti nireēkiti kamakani, Teoso anaakori itxauana, kotxi Erekarí Matamatakoti Teoso nakiti. 15 Iua Erekarí Matamatakoti Teoso sikakiti hitemoni. !Itxikitakai nitiritxi kapikareri hininiua. Itxikitakai Teoso anaakori hininiua. Erekarí Matamatakoti posotireē aākiritari ari Teoso: “Papai, niri,” atxari. 16 Erekarí Matamatakoti sāpiretaua aāxinireē Teoso anaakori aniniua. 17 Teoso anaakori aniniūa, aāpakapariko erekarí Teoso nīkatakiti ate ikapani. Kristo apakapari erekarí Teoso nīkatakiti iua ikapani, ininiā ate apakapari iuakata. Kristo misiritaākapeka. Ate misiritiko apaka auniā Kristo sākire aūikini xika, Kristo ikinimane auite inakasaakiua, ate apaka aua iuakata iusaaki. Aātamatarí iua iotximere. Peerekarí iusaaki iuakata aūini.

Aāpakapariko Ikinipoko Erekarí

18 Uai itixi aūakasaaki, aātatsirauata. Eereka ! axinikaikari mitxi aātatsirauatini, kotxi Teoso oerekauako ikinipoko erekarí. Iusaaki peerekarí. 19 Ikinipoko Teoso kamakiti iātapari ipoxokoniritika Teoso keto ōti. Iusaaki aimarotari Teoso anaakori. 20 Kotxi ikinipoko Teoso kamakiti misiritaākapeka, ixipokaāpotini tūkane. Ikinipoko Teoso kamakiti ixinireka ! ixipokaāpota. Teoso txikitakari ikinipoko xipokaāpotini. Iuaritika aimarotari, ipikixi xipokini ōti apokapitikako. 21 Ikinika Teoso kamakiti iātapari iua ōti. Iusaakiko itixi amaneri itxauako. !Ixipokaika. Iusaaki ikinika amaneri. !Ixipokaika. Teoso anaakori misiritiko !auaika. Peerekarí iusaakiko.

22 Aimarotari uatxapiikama ikinika Teoso kamakiti atatsirauata, amarini tsii sito atatsiitini atokokana. 23 Na itixi Teoso kamakitanani atatsirauata. Aāxinire apaka akiripireta, kotxi anirekarí Teoso keto apokini. Iusaaki iua apakapaua ate iua anaakori. Iusaakiko aīto amaneri isikaua. Iusaakiko aīto !kaxiporeikari. Merepanika Teoso sikakiti auapeka atemoni, kotxi iua sikapekarí Erekarí Matamatakoti atemoni. 24 Teoso makatxakapekarí amaerekani, aūikasaakiri isākire. Ininiā aiātapari apikomoni isikaenetakiti atemoni. ! Aātamapanikari isikaenetakiti, ininiā aiātapapanikari. Aūikapitakari isikaenetakiti isikiniua, ininiā atāo aūiukiniri. 25 Aiātapari aāpakapakiti tūkane. ! Aāpakapanikari, iuaritika aiātapari apoxokoniritika, kotxi aimarotapitikari ikara apokini.

26 Erekarí Matamatakoti moianataua, kotxi na kataparaxinireua. ! Aimarotari aamanaākiti tūkane, Teoso amisākiretakasaaki. Iuaritika, Erekarí Matamatakoti misākiretari Teoso ate ikapani. Asākireē !aposotari asāpiretiniri Teoso ikinika anireēkiti, ininiā Erekarí Matamatakoti misākiretari Teoso ate ikapani. Ipinimoni itxa isāpiretiniri Teoso. Kākiti sākireē !isākirauata Teosokata. 27 Teoso imarotari kākiti ākixinire, ininiā iua imarotari Erekarí Matamatakoti xinikakiti, kotxi Erekarí Matamatakoti misākiretari Teoso, Teoso nakitiakori ikapani. Erekarí Matamatakoti amanaāri Teoso, Teoso nireēkiti ikaminana inakitiakori.

Teoso Iteene Tiretiniua

28 Aimarotari ikiniōtika erekarí ikaminua ate, kotxi iua tiretakani, iua mereēkini atxaua ate. Iuaritika aātatsirauatini auapitika. Iuaritika iusaaki apaka erekarí ikaminua. Iua mereēua, kotxi inirekarí imereiniua. 29 Itixi kamiko apisapanika Teoso imarotapekaua ate. Iua mereēpekaua ate, iua anaakori kaiāopokori aniniua ikapani. Imereēpekaua, imi Xesosi atoko aniniua ikapani. Ininiā Xesosi aītari apiari. 30 Teoso akiritana imereēkini. Apaka ikamaerekatana iua mereēkini. Apaka itanapoko erekarí isika ninoā ikamaerekatakinimoni.

31 Teoso kamari ikinipoko ikara erekarí ate ikapani, ininiā natokopa itxa axinikakiti? Teoso kataparari moianatapitikaua, ininiā ate omanatakani

tapara poiãoka. ³² Teoso sikari ikinipoko atemoni. Imi apaka isika atemoni, kotxi ipina ate akinika ikapani. Isikari imi atemoni, ininiã aua atxiiti iua masakakiniti atemoni? !Auari. Ikinipoko erekari isikapitikaua atemoni. Ikarone !auari. ³³ Aua atxiiti Teoso mereëkini maerekani sãpiretakari? !Auari. Teosora sãpiretari ninoã maerekani mauakani, kotxi iua kamaerekat-apekana ninoã. ³⁴ Aua atxiiti Teoso mereëkini misiritiko sãpiretakari? !Auari. Kotxi Kristora misãkiretari Teoso ate ikapani, kotxi Teoso ikikomoni auakari itxaua. Iua ipina ate ikapani, ininiã eereka Teoso õkitikari iua, auapika inini ikapani. Iuara misãkiretari Teoso ate ikapani. ³⁵ Ininiã kipa atxiiti iotokakataro Kristo tiretiniua? !Auari, kotxi amaxikikosaaki, Kristo tiretapanikaua. Amauarenisaaki, Kristo tiretapanikaua. Amisiritikosaaki, Kristo tiretapanikaua. Natxi auakasaaki, Kristo tiretapanikaua. Amamãkanisaaki, Kristo tiretapanikaua. Monõkoro auakasaaki, Kristo tiretapanikaua. Neenamatzu auakasaaki, Kristo tiretapanikaua. ³⁶ Teoso sãkire iõkatsopatakori txari: Pisãkire aãuikini xika, pamonõkoniri ikiniõtika. Aõkiko monõkoni auapika. Soti auite apanakini okini atoko, apanakini nirekari okiniua ate, itxa Teoso sãkire iõkatsopatakori. ³⁷ Maerekati ikara atoko aua, iuaritika iteene akãiata, kotxi atiretakiri sikataparataua. ³⁸ Ia nimarota. Kristo tiretiniua iotokakakari !auari. Apikasaaki, itiretapanikaua. Aãuapanika inakasaaki, itiretapanikaua. Teoso nitiriakori iaxitikiñi !iotokakari itiretiniua. Sãtanasi nitiriakori !iotokakari itiretiniua. Ìkoraasaaki auakani, katana auakani apaka !iotokakari Kristo tiretiniua. !Auari posotiiretxi, Kristo tiretiniua iotokakakari. ³⁹ Iaxiti apiko nopinixiti auakani, iaxiti patapi auakani apaka, !iotokakari Kristo tiretiniua. Hinitiniãri Teoso tiretiniua iotokakakari, !hãpokari. Hinitiniãri ikinika Teoso kamakiti auniãtaã, iuaritika kona hãpokari Teoso tiretiniua iotokakakari. !Auari. Aãuite Kristo Xesosi oerekaua Teoso iteene tiretiniua.

9

Teoso Mereña Xoteoakori Inakitiakori Ìkapani

¹ Atão nisãkire. Kristo nakiti nitxaua, ininiã na nisãpiretari misirieneretxi. Nãkixinireë nimarotari nisãkire atão inini, kotxi Erekari Matamatakoti oerekari nisãkire atão inini. ² Ia nisãkire atão. Iteene nimatinaniuat-apika. Nãkixinireë maerekaxiniretinoka nitxa, ninirimane Kristo sãkire mauikakani xika. ³ Ninirekamari Teoso misiritinino nota, ninoã nitiriakori imamisiritakani ikapani. Ninirekamari Kristo manirekakanino nota, ninirimane Kristo nakitiakori ininiua ikapani. Niposotiniãri ikara atoko nikamini, nikamari ninirimane ikapani. Txamari !niposotari. ⁴ Ninirimane Isaeo apika mekaniriakori itxauana. Teoso nirekana ninoã iua anaakori ininiuana. Teoso oerekari iposotiire ninoãmoni. Isãpiretana ninoã ikamaenetakiti ninoã ikapani. Isikari ipaniãtakiti iõkatsopatakori ninoãmoni. Oerekana ninoã kiiniri atão ikaminina, iuakata isãkirauatakasaakina. Teoso sãpiretana ninoã ikamakiti tãkane ikininane kãkiti ikapani. ⁵ Ninirimane apika atokiriakorini Apraãoma, Isakima, Isaeoma pakini. Kristo uaimoni iponaniãkasaaki, ninoã apiko mekaniri itxaua, iuaritika Teoso itxaua. Ikinimane auite itxaua. "Peerekai," matxari iua ãtipirika. Ameë.

⁶ Atxiiti Teoso kona kamari ikamaenetakiti Isaeo apika mekaniriakori ikapani? Ikamapitkariko. Txamari kona ikinikani Isaeo apika mekaniriakori Teoso nakiti !itxauana. ⁷ Kona ikinikani Apraão apika mekaniriakori atão Teoso anaakori !itxauana, kotxi Teoso txari Apraão: Papika mekaniriakori atão inakani Isaki mekaniriakori itxauana.

⁸ Teoso sãpiretari Isaki auini, iua auini apisapanika. !Isãpiretari ãti Apraão ãkiri Isimaëo inakori auini, iua auini apisapanika. Isimaëo iponaniã, kotxi Apraão sirïka Isimaëo inorokata. Ininiã kãkiti Isimaëo atoko, Teoso anaakori litxauana. Teoso sãpiretari Apraão iua keene inini, ininiã isikaenetakininoka atão Apraão apika mekaniriakori itxauana. ⁹ Teoso sikaenetari Apraão keene inini. Itxari:

Niketo manapi nikanapiriãko. Iuasaaki Sara keeneroko. Kiki oenetako.

¹⁰ Apikomoni nisãpiretai. Hepeka anaakori iri ãtika. Aãpika atokirini itxaua Isaki inakori. ¹¹⁻¹² Oa anaakori iponaniã ipipe. Iponaniinina apisapanika, maerekati ikaminina apisapanika, erekari ikaminina apisapanika, Teoso sãpiretaro oa:

Merepanika iponaniãkari eereka iponaniãkari nitiri itxauako.

Ininiã Teoso mereëri iua eereka iponaniãkari Xakoo inakori apiari inini ïkapani, iua auini apisapanika. Ininiã na Xakoo kamakitini txïkitakari Teoso mereiniri iua. Teoso mereëri iua, kotxi inirekari ikara atoko inini. ¹³ Teoso sãkire iõkatsopatakori txari:

Xakoo nitireta. Isaoo nomanata.

¹⁴ Ikara atoko ininiã, kanatokopa itxa axinikakiti? Atauako Teoso na kamari erekari? Ikamapitikari erekari. ãtipirika Teoso kamari erekari.

¹⁵ Teoso txari Moisesi:

Ninirekiniãri ãti niamonïkini, niamonïkari. Ninirekiniãri ãti nimoianatini, nimoianatari.

¹⁶ Ikara atoko ininiã, anireëkiti !itxïkitakari Teoso mereinua. Akamakiti !itxïkitakari Teoso mereinua. Imereëua, kotxi iamoniãkaua. ¹⁷ Teoso txari Paraoo isãkire iõkatsopatakoriã:

Nota txïkitakai auïtetxi pininiua, niposotiire noerekini ïkapani, niuãka ikini itixiti auakani imarotini ïkapani,

itxa Teoso sãkire iõkatsopatakori. ¹⁸ Ininiã Teoso nirekiniãri iamoniãkiniri ãti, iua amoniãkari iua. Apaka inirekiniãri, itxïkitakari ãti ãkixinire kaikoxinire inini, Teoso nireëkiti imanirekakani tïkane.

Teoso Omanãkare, Iamonïkare Pakini

¹⁹ Atxiïti hïte txano nota: “Teoso ikara atoko ininiã, na ate xikani kaikoxinireua ate. !Aposotari akaminiri Teoso manirekakiniti,” atxiïti hïtxano.

²⁰ Txamari !apakata ia atoko hinini. Kiriparai hïte ikara atoko ina sãkiretakani Teosomoni? Kãkiti hïtxaua. Teoso kamakiti pitxaua. Atauako kamakori posotatari ikamakirimoni: “Kinirepa pikamano nota ia atoko ninini?” ! Apakata ikara atoko hinini hïkamakirimoni. ²¹ Hïxinikari kiki tiïtxi kamakari. Ikamari inireëkiti. Atxiïti ãti poriï katsariã, ikamari ipi kopiti. Atxiïti ianaka ikamari ãti kopiti, peereri inini, kiiniri ïkapani. Atxiïti ãtipekana ikama patimari poião ereri, ikiniõtika iãriã iãtiko ïkapani.

²² Ikara atoko itxa Teoso kaminiri kãkiti. Teoso kamari apanakini kãkiti Teoso omanãkare imarotinina ïkapani imaerekanina xika. Iuasaaki oerekana iposotiire imarotininina ïkapani. Teoso omanatana ninoa, iuaritika imïteenekana. Kona uatxa ixipokana ninoa. Txamari iketo manapi ixipokanako ninoa. Uatxa imïteenekapanikari ninoa maerekani. ²³ Apaka ïkapari apanakini iua amoniãkakini. Uatxa imïteenekari iua omanatakini maerekani, kotxi inirekari iua amoniãkakini imarotininiri iua ereka inini, kotxi peerekari iua. Iteene itiretari iamoniãkakini. Ikamana ninoa erekari isikakiti apakapinina ïkapani. ²⁴ Hïte, ate pakini, iua amoniãkakini atxaua. Iua akiritakini atxaua. Na Xoteonanini akirita. Akiritana Xoteo minakaniua apaka. ²⁵ Teoso sãkire iõkatsopatakori, Oséia iõkatsopatakitiã, Teoso sãpiretari ikara. Itxari:

Käkiti mitxi nota nakitiakori minakonimoni nitzako: “Uatxa nota naki-
tiakori hïtxapekauako.” Ninoa mitxi nimatiretakinimoni nitzako:
“Uatxa nota tiretakini hïtxapekauako,” nitzako.

²⁶ Mitxi Teoso txana ninoa: “Na nota nakitiakorini !hïtxaua.” Ikara Teoso
säkiretiniätaä, iuaätaätxikana: “Teoso ätipirika auäki inakari anaakori
hïtxaua,” inaäka ninoamoni,

itxa Teoso säkire iökatsopatakori.

²⁷ Apaka Teoso säkire iökatsopatakoriä, Isaia txari:

Isaio apika mekaniriakori kaiäopokori, potxoari uiniti kipatxite atoko itx-
ana, txamari poiäonoka makatzakaäka imapinakani ikapani.

²⁸ Patimari Teoso xipokiniri iparïka imisiritiniri käkiti imaerekani xika,

itxa Isaia. ²⁹ Mitxipeka Isaia txari:

Apiananiri kaposotiireri nïkatari apanakini aäpika mekaniriakori imap-
inakani ikapani. Ininiä atenape aupanika. Teoso manïkatakanimauako,
axipokapiimako käkiti Sotoma sitatxiti auakani xipokini atoko, käkiti
Komoha sitatxiti auakani xipokini atoko atxapiimako,

itxa Isaia säkire.

Xoteo Mauïkananiri Teoso Säkire

³⁰ Ininiäkara aimarotari ia: Xoteo minakanuia manitakanisaakiri Teoso
txïkitakinina atäo inakari kamakani ininiuana, iuaaaki Teoso txïkitakana
atäo inakari kamakani ininiuana, kotxi auikarina Teoso säkire. ³¹ Txamari
Xoteoakori nitaäpotari paniätakori ninoa atäo inakari kamakani txïkitakari,
txamari !apokarina. ³² Kinirepa !apokarina ikara? Kinirepa Teoso na
txïkitakana ninoa atäo inakari kamakani ininiuana? Kotxi !auikarina
isäkire. Inirekarina iparïkana txïkitakinina atäo inakari kamakani ininiuana. !
Inirekarina auikinirina Xesosi säkire. Ninoamoni Xesosi kai kimapori nopini
auakari atoko itxa, kotxi kai xika käkiti mäkitita. ³³ Teoso säkire iökatsopatakori
kitxakapirïkari säpiretari ia kai pirena. Itxari:

Pikenakotariko ia: Nota iokanatakiti käkitimoni kai atoko itxa. Nitakari iua
kai Siäo sitatxitiä Xoteoakori kimaporeë. Iua kai xika käkiti mäkitita.
Iua kai xika käkiti irika. Iuaritika iua säkire auïäkani !ipëtauata nota
apisatoö.

10

¹ Nitariakori, näkixinireë iteene ninirekari Teoso makatzakiniri niniri-
mane maerekani, Isaio apika mekaniriakori maerekani. Nimisäkiretari
Teoso ninoa maerekani makatzakiko ikapani. ² Nimarotari ninirimane
iteene nirekiniri iparïkauatini Teoso ikapani. Txamari ninoa kerokari, kotxi !
imarotarina atäo iparïkauatini Teoso ikapani. ³ !Imarotarina Teoso txïkitakiniri
käkiti atäo inakari ikamini. Ninoaka nirekamari atäo inakari ikaminina,
Teoso apakapininina ikapani. Ininiä !auiritarina Teoso txïkitakinina ninoa atäo
inakari ikaminina. ⁴ Kristo kamari ikinipoko Teoso paniätakiti iökatsopatakori
iaöka, ininiä iuanoka txïkitakari ikinimane käkiti iua säkire auïäkani atäo
inakari ikaminina.

Apiananiri Akiritakani

⁵ Kitxakapirïka Moisesi säpiretari atäo inakari ikamini Teoso paniätakiti.
Iuaaaki itxari:

Ikinika Teoso paniätakiti iökatsopatakori ikiniötika pikaminiä, pauapininiiika
pïtxako,

itxa Moisesi säkire. ⁶ Txamari !aposotari ikara atoko akamini. Aäuikasaakiri
Xesosi säkire, iua txïkitakaua atäo inakari akamini. Ininiäkara !apakata
päkixinireë pixinikiniri: “Kipa atxïiti posotari iaxiti apiko nopinixitimoni

isini, Kristo notamoni iminini İkapani?" ⁷ !Apakata pākixinireē pixinikiniri: "Kipa atxiİti posotari ipİkani auiniātaā isini, Kristo notamoni iminini İkapani?"

⁸ Xesosi sākire auape hİtemoni. Na hİsa ātiātaā iua sākire himarotini İkapani. Hinamaāpekari. Hākixinireēpekari. Xesosi sākire auikiko asāpiretapikari kākiti. Ia atoko asāpiretari kākiti: ⁹ Pinamaā, "Xesosi niauİte" pininiā, pākixinireē pauikiniāri Xesosi ipinini Teoso ōkitikiniri iua, iuasaaki pimaerekani makatx-akaākako. ¹⁰ Kotxi aākixinireē Xesosi sākire aāuikiniā, ikamaerekataua. Ana-amaā "Maerekati kamakarino nota," aniniā, iua makatxakari amaerekani.

¹¹ Teoso sākire iōkatsopatakori txari:

Iua sākire auİākari pĕtauatini !auari.

¹² Iua Kristo sākire auİākari atxiİti Xoteo itxaua. Atxiİti Xoteo minakatuiua itxaua. Xoteo auİte itxaua Kristo. Xoteo minakanuiua auİte apaka itxaua. İkinimane auİte itxaua Kristo Apiananiri. İsikari itanapoko erekari ikini-mane iua akiritakanimoni. ¹³ Teoso sākire iōkatsopatakori txari:

İkinimane akiritiniāri Apiananiri uāka imaerekanina makatxakini İkapani, iuasaaki imakatxakaākako imaerekanina.

¹⁴ Kiātokopa itxa ninoa akiritiniri iua, isākire imauikakanisaaki? Kiātokopa itxa ninoa auikiniri isākire, imakenakotakanisaakirina? Kiātokopa itxa ninoa kenakotiniri isākire, imasāpiretakonisaakina? ¹⁵ Kiātokopa itxa Teoso iokanapirena sāpiretiko, ate maiokanatakaniāri iua sākire sāpiretakani kākitimoni? Teoso sākire iōkatsopatakori txari:

Erekapitikari Teoso iokanapirena erekari sāpiretakani apokini kākitimoni, kotxi isāpiretarina Teoso kamaerekaxiniretiniri kākiti. Isāpiretarina erekari Teoso sikakiti kākitimoni. İkara iminapiretakitina kamapox-okonitari kākiti.

¹⁶ Txamari na İkinimane kākiti auikari Teoso iokanapirena erekari. Kotxi kixakapirİka İsaİa txari:

Apiananiri, asāpiretamari piokanapirena kākitimoni, txamari !auikarina, itxa İsaİa. ¹⁷ Kākiti kenakotakasaakiri Teoso iokanapirena, Teoso txİkitakari kākiti auikiniri isākire. Kristo sākire akenakotakasaaki, akenakotari Teoso iokanapirena.

¹⁸ Txamari nota pimaāi: "Atauako Xoteo kona kenakotari Teoso iokanapirena?" İkenakotapitikarina, kotxi Teoso sākire iōkatsopatakori txari:

Iaxiti apiko nopinixiti auakari oerekari Teoso ikini itixiti auakani. Teoso sākire atoko itxa iaxiti apiko nopinixiti auakari oerekakiti.

¹⁹ Iuaİkana nipimaāi: "Atauako Xoteo !imarotari Teoso iokanapirena?" İmarotapitikarina. Moisesi sāpiretapekari Teoso sākire. Itxari:

Nimakatxakari Xoteo minakanuiua maerekani, ininiā nitxİkitakaiko hİte hİxikotinina ninoa mitxi nota nakitiakori minakanuiua. Nitxİkitakai hİte homanākarauatini, ninoa mitxi mimaroreni xika.

²⁰ İsaİapekana sāpiretari Xoteo minakanuiua pirena. Isāpiretari Teoso sākire itaparaxinireritika:

Teoso txari: "Ninoa nota manitakani aōkitano nota. Nimotika nota makiritakanimoni."

²¹ Apikomoni isāpiretari Teoso sākire Xoteo kamakiti:

Teoso txari: "İkiniōtika namanaāri ninoa kanapiriini notamoni, txamari ! ikİpitarina nisākire. !İkamarina nisākire iaōka. İnireēkitinoka ikamana."

11

Xoteo, Teoso Sākire Auiākani

¹ Ininiā nipimaāi: "Atauako Teoso !inirekaikari Xoteoakori?" İnirekapi-tikana. Nota apaka Xoteo nitxaua. Apraāo apika mekaniri nitxaua. Pĕxamiİ

apika mekaniri nitxaua. ² Teoso !itakanapari Xoteoakori. Iua mereëna ninoa itixi kamiko apisapanika. Himarotari Teoso säkire iökatsopatakori, Eríasi tsoatakasaaki Teosomoni Xoteo maerekani isäpiretakasaaki. ³ Iuaaaki Eríasi txari:

Apiananiri, ninoa okapekari käkiti pisäkire säpiretakani. Ikapirinikarina amesa pinakiti pitemoni sikakori takikoötaa. Notanoka pisäkire säpiretakarino auapanika. Ninoa asikatikinitano nota okinino ikapani,

itxa Eríasi. ⁴ Kanatokopa Teoso apakapapiretari Eríasi? Teoso txari:

Kona pitenanini auikari nisäkire. Nota nïkatari setxi mio kikiakori nota nakitiakori. Ninoa kona teosonetari käkiti kamakiti Pao inakori. Kona ikapotoreëkauana iua apisatoö,

Teoso txari Eríasi. ⁵ Ikara atokotxikana uatxa. Aua apanakini käkiti Teoso mereëkini. Imereëna ninoa, kotxi iua nirekari ikinipoko erekari ikaminina

ninoa. ⁶ Maerekati kamakani käkiti, iuaritika Teoso mereëua ate. Isikari ikinipoko erekari ate ikapani maxikatïka. Aparïka !itxïkitakari iua sikiniri ikinipoko erekari atemoni. Aparïka txïkitakiniãri ikinipoko erekari isikiniua, ininiã kona maxikatïka isikarauata atemoni.

⁷ Ininiã kanatokopa atxa asäkire apikomoni? Xoteoakori kona apakapari inireëkitina. Inirekarina Teoso apakapinina ninoa erekarini ininiuana. Teoso mereëkininoka apakapari ikara inakari. Apanakinipekana Teoso !aurita atão imarotinina. Mõsiãreni atoko itxana. ⁸ Teoso säkire iökatsopatakori txari:

Teoso txïkitakari ninoa ãkixinire imakakari atoko inini, iua säkire imimaro-takanina ikapani. Kokipitikamana, iuaritika latamatarina Teoso kima-pore. Kakenakokipitikamana, iuaritika !inirekarina Teoso säkire ikïpitinina. Uatxapiima ikara atoko itxapanika,

itxa Teoso säkire iökatsopatakori. ⁹ Kitxakapiriãka Tavii txari Teosomoni:

Ninoa kiena kaiãopokori. Inipokotakasaakina, iuãkarina pite apokaereka-tinina ninoa, kotxi kaiãopokori ikenana. Ikenana takapiri atoko itxa imaïkinina ninoa. Itxïkitakana ikerokinina. Ikara xika ninirekari pimisiritinina.

¹⁰ Ninirekari ninoa mõsiãreni atoko ininiuana, ininiã na atão atamatarina pikimapore. Käkiti tiitxi minari porikitakani atoko pitxïkitakanako ninoa ätipirika, itxa Tavii säkire.

Xoteo Minakanuia Maerekani Makatxakiko

¹¹ Iuaïkana nipimarauata: “Atauako Xoteoakori maerekani xika Teoso xipokana ninoa?” Konapitini. Xoteoakori kamari maerekati, ininiãkara Teoso säpiretari Xoteo minakanuia imaerekanina imakatxakini, Xoteo xiko-tinina ikapani, iuaïkana Teosomoni ikanapiriinina ikapani. ¹² Xoteoakori kamari maerekati, ininiãkara Teoso sikari erekari kïkiri apanakini itixi auakanimoni. Xoteo mapakapakiniti Xoteo minakanuia apakapa erekari kïkiri. Ininiã Xoteo kanapiriãkasaaki Teosomoni, iuaaaki apiaerekata Teoso sikakiti kãkitimoni.

¹³ Uatxa nota misäkiretai hïte Xoteo minakanuia, kotxi Teoso iokanatano nota hïtemoni isäkire nisäpiretini ikapani. Niuikari hïtemoni niokanatiko.

¹⁴ Ikara atoko ininiã, atxïiti ninirimane Xoteo xikotai hïte, ininiã atxïiti apanakini ninoa kanapiriã Teosomoni, imaerekanina Teoso makatxakini ikapani. ¹⁵ Teoso takanapakasaakiri Xoteo, iua apakapari Xoteo minakanuia,

ininiã ninoa Xoteo minakanuia kanapiriã Teosomoni. Teoso iuaïkana apaka-pakasaakiri Xoteoakori, iuaaakiko peerekari. Ipïkani iuaïkana auãki inini atoko itxako.

16 Komiri akamakasaaki, ipixini Teosomoni asikasaaki, aimarotari ikinipoko iua komiri iua nakiti ininiua. Aamina kotsa Teoso nakiti ininiã, imina pori apaka iua nakiti. 17 Xoteoakori oriva mina takakori atoko itxa, takakori Teoso nakiti. Ātikaka ipori kapatakaãka. Oriva itopakiri pori apaãka. Iapitaka inaãka ikapatakikoãtaã. Aneẽ takari katiã. Takari sikakienatari itopakiri pori. Hite Xoteo minakanuia iua oriva itopakiri pori atoko hitxaua. Hãpakapari Teoso sikakiti, kotxi hite apotiitaua Xoteoakorikata, Teoso nakitiakorikata. 18 Hite Xoteo minakanuia, kona hũuikapeua Teoso apakapini hite. “Iua aãpori kapatakiko atoko, Teoso takanapana Xoteoakori, ate apakapini ikapani,” kona hitxape, kotxi aãpori atoko hitxaua. Na aãpori sikataparatarari aãkotsa. Aãkotsa sikataparatarari aãpori. Ininiã hite apakapari Teoso sikakiti, kotxi hãpotiitaua Xoteokata.

19 Atxiiti hite Xoteo minakanuia txano nota: “Iua aãpori kapatakaãkori atoko Teoso takanapari Xoteoakori. Āti aãpori iapitakiko atoko, Teoso apakapaua ate,” hitxano atxiiti. 20 Atãopitikara. Teoso takanapari Xoteoakori, kotxi ninoa ! auikari isãkire. Iua apakapai hite, kotxi hite auikari iua sãkire. Iuaritika ! hũuikapeua ikara atoko hinakasaaki. Erepaniko. 21 Teoso takanapari Xoteoakori, takari pori sauakakori atoko. Ininiã erepaniko, kotxi itopakiri aãpori atoko hitxaua. Atxiiti āti õti okanapai hite apaka.

22 Aimarotari katiraõkiri ininiua Teoso. Aimarotari apaka kataparaxinireri ininiua. Kataparaxinireri iua, kãkiti kamakasaakiri maerekati. Katiraõkiri iua, itiraõki hinirekasaaki. Itiraõki himanirekakaniã, hite apaka mapara hõkaãka, iua aãpori sauakakori atokokana. 23 Xoteo takanapiniãri imauikakaniri Xesosi sãkire, auikiniãri iuaikana isãkire, Teoso iuaikana mikanapiriãna, kotxi Teoso kapositiireri ikara atoko ikamini. 24 Hite itopakiri pori sauakakori takarimoni iapitaãkori atoko hitxaua. Kona ixinireka aua ikara atoko. Pamimari ikara atoko. Xoteo atão oriva takakori atoko itxauana. Ininiã na kamimari mitxi auiniãtaã iuaikana Teoso takinina ninoa, iuaikana imikanapiriinina ninoa iuamoni.

Xoteo Maerekani Makatxakaãkapanikako

25 Nitariakori ninirekari himarotiniri apanakini mimarotakiniti, ininiã na hũuikaua. Xoteo ! inirekari auikiniri Teoso sãkire uatxa, iuaritika na ikara atoko ! itxapani ātipirika. Ikini itixiti auakani Teoso nireẽkini Xoteo minakanuia kanapiriãkasaaki Teosomoni, iusaakiko Xoteo kanapiriãko Teosomoni.

26 Ininiã iusaaki ikinimane Xoteo kanapiriãko Teosomoni. Iusaaki Teoso makatxakari ninoa maerekani. Teoso sãkire iõkatsopatakori kitxakapiriãka auakari ikara atoko itxa. Itxari:

Xoteo itxauako maerekanitxi makatxakakari. Imakatxakariko ikinika maerekati Xoteoakori kamakiti, Teoso manirekakiniti. Iusaaki Teoso nireẽkitinoka inirekanako.

27 Nimakatxakariko maerekati ninoa kamakiti, kotxi kitxakapiriãka nika-maenetari ikara atoko inakari,

itxa Teoso sãkire iõkatsopatakori.

28 Xoteoakori ! inirekari Teoso iokanapirena erekari, ininiã Teoso takanapana ninoa. Ininiã Teoso iokanapirena erekari sãpiretaãka hite Xoteo minakonimoni. Uatxa Teoso mokaiakariakori atoko itxauana Xoteoakori, iuaritika Teoso mereẽna ninoa. Aprão, Isaki, Xakoo pakini apika mekaniriakori itxauana, ininiãkara Teoso tirtapanikana ninoa. 29 Teoso kona mamakari isãkire. Kãkiti iua mereẽkini ātipirika iua mereẽkini itxauana. Isiãkiti erekari kãkitimoni ! imakatxaka iuaikana. 30 Hite Xoteo minakanuia kitxakapiriãka ! hikipitari Teoso sãkire, iuaritika uatxa Teoso amonikai hite, kotxi Xoteo kona kipitari Teoso sãkire uatxa. 31 Uatxa Xoteoakori kona kipitari Teoso

sākire. Teoso amonīkapekai hīte Xoteo minakaniua, ininiā Teoso iuaīkana amonīkanako Xoteoakori apaka. ³² Ikinimane kākiti na kīpitari Teoso sākire. Kona aposotari akīpitiniri Teoso sākire. Teoso txīkitakaua ikara atoko anini, kotxi inirekari aimarotiniri maerekati kamakani aniniua, iuaritika !imisiritaua. Iamonīkaura.

Peerekari Teoso

³³ Peerekari Teoso. Atāonoka ikama. Paimatireri iua. Kākiti !imarotari ikamakiti tīkane. Kākiti !imarotari inireēkiti tīkane. ³⁴ !Kimarotikori Teoso xinikakiti. !Kōtākikikori Teoso. ³⁵ Teosomoni ikinipoko aua, ininiā kipa asika atxiīti uamoni? Asikiniri !auari. Ininiā !auari ate nakiti, iuaīkana Teoso sikiniua īkapani. ³⁶ Kotxi Teosokara kamari ikinipoko. Ikinipoko aua Teoso posotiireē. Ikamari ikinipoko iua īkapani. Ātipirika matxariko Teoso: "Peerekai pite." Ameē.

12

Teosomoni Sikakori Auākiri

¹ Ininiā nitariakori Teoso amonīkapitikaua. Ininiā nota iteene ōtākikai hīte. Hīteka hīsikaua Teosomoni. Teosomoni sikakori auākiri atoko hīttxauako. Ininiā iua nakitinoka hīttxaua. Ikara atoko hīkaminiā, Teoso apokaerekatari. Ikara atoko inakari akaminari Teoso, ikara atāo. ² !Hīkamapinikariko Teoso sākire mauīkāni kamakiti atoko. Hāuiritariko Teoso txīkitakiniri hīxiniākiti ereka inini, ininiākara ipinipo hīttxako. Iuasaakiko himarotari Teoso nireēkiti. Himarotari Teoso nireēkiti ereka inini. Himarotari hīkamakiti tīkane iua apokaerekatini. Himarotari atāo hīkamini.

³ Teoso sikari ikinipoko erekari notamoni, ininiā nisāpiretari iua sākire hītemoni. Ininiā notā ōtākikai hīte hīkinika. Na hūikapeua. Hīteka atāo himarotauako. Hīteka hātamakauako. Teoso txīkitakai hāuikiniri isākire. Itene hāuikiniāri iua sākire, itene hīteka himarotaua. ⁴ Kākiti Ito ātika, iuaritika itotxiā auakari kaiāopokori. Aua ikanoke, itapike, oki, ikenakoki txaāpota. Ikinika iparīka aua. Ikanoke parīka ātiāo. Oki parīka ātiāo. Itxaāpota. ⁵ Iua atokokana atxa. Itotxi ātika atoko atxa, iuaritika itoua ate. Kanoketxi, tapiketxi, okītxi, kenakokitxi, itotxiā auakari atoko ate. Kristokata aāpotiitaua. Anakititakaua. ⁶ Nota parīka Teoso īkapani ātiāo. Āti parīka Teoso īkapani ātiāo. Āti parīka Teoso īkapani ātiāo, itxaāpota. Teoso sikari erekari ikini-napemoni, ikara iparīka ikamini īkapani. Atxiīti Teoso sikaimaroretai iua sākire apanakinimoni pisāpiretini īkapani, ininiākara Teoso sākire pauikini iaōka pisāpiretari Teoso sākire kākitimoni. ⁷ Teoso sikaimaroretiniāi apanakini pimiparīkatini, ininiā pimiparīkatariko apanakini. Teoso sikaimaroretiniāi isākire poerekini, ininiā poerekarauatako. ⁸ Teoso sikaimaroretiniāi āti pisikataparaxiniretini, ininiā pisikataparaxiniretariko āti. Teoso nirekiniāri pisikiniri apanakini amonitakiti ninoamoni, ininiā ito pisikako pipoxokoniritika. Teoso sikaimaroretiniāi auītetxi pininiua, ininiā auītetxi erekari pitxauako. Teoso nirekiniāi apanakini piamonīkini, ininiā pipoxokoniritika piamonīkanako.

Tiraōkitxi

⁹ Atāo pitiretariko apanakini pākixinireē. Pomanatariko maerekantixi. Na pitokakapiri erekari pikamini. ¹⁰ Itene hītiretakakauako, kotxi Kristo txīkitakapekaura altaritakininiua. Piteka pipaxitiniua atokokana, apiata pipaxitariko āti. ¹¹ Pitaparaxiniretita piparīkauatako. Na piarinouatape. Piparīkauatako Teoso īkapani pipoxokoniritika pākixinireē. ¹² Pipoxokoniuatako,

kotxi pimarotari Teoso kaminiri ikamaenetakiti. Pimĩteenekariko pimisiritiko. Ātipirika pimisākiretariko Teoso. ¹³ Nipokori kaamatiniā pitariakorimoni, tiitxi kaamatiniā pitariakorimoni, auiniā pitemoni, pisikanako. Papakapanako pipoxokoniritika ikinimane Xesosi sākire auĩākani paapoko apoākani, ātiātaā ĩkani.

¹⁴ Pamanaāri Teoso erekari ikaminina pite misiritakani. Ari, pamanaāri Teoso erekari ikaminina ninoa. Na pamanaāpiri Teoso maerekati isikinina ninoa. ¹⁵ Pipoxokoniuatoko poxokorinikata. Pitxiapata kamatinaniririkata. ¹⁶ Āti pitiretini atoktxikana, ikinimane pitiretako. Na piukapeua. Pisākirauatoko kākiti matxineirotenikata, katxineiroteni pimisākiretini atoktxikana. “Kimaroreno nota,” na pitxape.

¹⁷ Kākiti kaminiāri maerekati pitemoni, na pikamapiri maerekati iuamoni. Atāonoka pikama ikinimane ĩkapani. ¹⁸ Pinirekariko pauini kākiti sauaki eraka inini, ininiā maxikatĩka kona pitxitapiri āti. ¹⁹ Nitiretakini, na hĩxikatxitapiri āti. Teosora xikatxitariko, kotxi Teoso sākire iōkatsopatakori txari:

Nota parĩka āti nixikatxitini. Notara misiritari maerekati kamakari, itxa Apiananiri sākire. ²⁰ Ari, kona pixikatxitapiri āti. Pikamariko ātimoni ia Teoso sākire iōkatsopatakori iaōka:

Pomanatakiri natxitiniā, pisikakienatari iua. Iposonatinia, pisikari iātini.

Īkara atoko pikaminiā, ipētauata maerekati pitemoni ikamini, itxa Teoso sākire iōkatsopatakori. ²¹ Na pauiritapiri maerekati piauĩte atoko ininiua. Erekari pikamakasaaki, maerekati iokanatapeēkaika.

13

Aāũteakori Nirekakiti Akĩpitini

¹ Akĩpitariko aāũteakori nirekakiti, kotxi Teosora auiritana ninoa auĩtetxiakori ininiuana. Teosora takari ninoa auĩtetxiakori aāũteakori ininiuana ĩkapani. ² Aāũteakori nirekakiti amakamaniā, Teoso nirekakiti apaka !akama, kotxi Teoso txĩkitakana ninoa aāũteakori ininiuana. Ninoa paniātakiti amakamaniā, amisiritaākako. ³ Erekari kamakani ! ipĩkari iauĩtena. Maerekati kamakaninani pĩkana ninoa. Pinirekatari pimapĩkakaniri piauĩte? Ininiā erekari pikamako, ininiā iua txaike: “Erekai pite.” ⁴ Teoso nitiri itxaua piauĩte, erekari pitemoni ikamini ĩkapani. Txamari maerekati pikaminiā, erepaniko. Pipĩkariko iua, kotxi iposotari imisiritinii. Iua Teoso nitiri itxaua kākiti maerekati kamakani imisiritini ĩkapani. ⁵ Ininiākara pikamariko piauĩteakori nirekakiti, kotxi pimakamakanisaakiri, pimisiritiko auapitika. Apaka pikamariko ninoa nirekakiti, kotxi pimarotari pākixinireē ĩkara atoko atāo pikamini.

⁶ Piauĩteakori Teoso nitiriakori itxauana, ininiā erekari apaka pisikiniri txineiro ninoamoni iparĩkana ikaminina ĩkapani. ⁷ Ininiākara piĩkitxitana ninoa amanaākiti, sitatxi pauini ĩkapani, pitii papakapini ĩkapani. Pipaxitanako ninoa. Pikamariko ninoa nirekakiti.

Hĩtiretakiniua Īkapani

⁸ Piĩkitxitariko ikinika piamotakiti. !Erekari pimaĩkitxitakaniri āti. Ātinoka tēpito erekari. Ia tēpito na txineironi. Ia tēpito atiraōki. Ia atoko inakari tēpito xipokini kona erekari. Ātipirika hĩtiretakauako. !Erekari pixipokiniri pitiretiniri āti. Āti tiretakari kĩpitapekari Teoso paniātakiti iōkatsopatakori. ⁹ Teoso paniātakiti iōkatsopatakori txari: “!Pisiriĩkape pĩtanoro minakotokatika. Na pokaniuatape. Na piĩtiriuatape. Na pinirekapiri apanakini tii.” Akĩpitari

ikara Teoso paniätakiti iökatsopatakori, apanakini ipaniätakiti apaka, ia Teoso paniätakiti ätika akïpitiniä. Ia Teoso paniätakiti paniätaua: “Piteka pitiretiniua atoktxikana, pitiretariko äti.” ¹⁰ Pitiretiniäri äti, maerekati !pikaminiri iua. Ininiä äti pitiretiniä, pikamari Teoso paniätakiti iökatsopatakori ikinika.

¹¹ Matiretari äti, kotxi aimarotari kaiaamakite Kristo kanapiriini. Ininiä pimerekako. Kona pimakapeko. Piparïkauatako Teoso ïkapani, kotxi itix-ine Xesosi anikiniua öti apokaäpotanapanoka. Akokaxiti aäuihari Xesosi säkire. Uatxa päitiki ikanapiriä. ¹² ïkanökari xipokaäpotanapanoka. Pokamara apokaäpotanapanoka Kristo kanapiriäkasaaki. Maerekati ipiäkasaaki kamakori atoko itxa, ininiä maiotokakari ikara akamini. Matakanapari maerekati. Makamari erekari, kotxi erekari akamakiti kapakaua, ininiä maerekati ! imaïkaua. Pokamarari atoko itxa erekari akamakiti. ¹³ Pokamara käkiti kamari atäo inakarïnoka apanakini apisatoö. Makamari ikara atoko inakari ätipirika. !Erekari kiiniri maerekati akamini. !Erekari apoätini. !Erekari asirïkini sito äitanoro minokokatika. !Erekari akaminiri maerekati äito nireëkiti. !Erekari aneenamauatini. !Erekari axikotiniri äti. ¹⁴ Ikara atoko inakari akamini !erekari. Makamari ia atoko inakari: Maamanaäri Apiananiri Xesosi Kristo kapakiniua, sotato mäka paikori sotato ïto kapakini atoko. !Hixinikapiri: “Kanatokopa nitxa nikaminiri niito nireëkiti?” Kotxi maerekatïnoka äito nireëkiti.

14

Kona Hïtaparakienatakapeua

¹ Häuiritariko Xesosi säkire poiäonoka auiäkari hïtekata apotiitiniua. Na hïtxitapiri iua, ixinikakiti na hïte xinikakiti atoko iminakanisaaki. ² Käkiti iteene auikiniäri Xesosi säkire, atxiïti inikari itanapoko nipokori. Äti käkiti poiäonoka auikiniäri Xesosi säkire, atxiïti inikari takarinoka. ³ !Erekari ikinipoko niäkari säpiretiniri takarinoka niäkarïmoni: “Pikerokari” ininiri. Apaka !erekari takarinoka niäkari säpiretiniri ikinipoko niäkarïmoni: “Pikerokari” ininiri, kotxi Teoso apakapapekari iua. ⁴ Kinakariparai pite äti nitiri pinitakari: “Pikerokari” ätimoni inakari. Ikerokiniäri, iua patröte pinitamariko. Maerekati !ikama, kotxi Apiananiri moianatari iua.

⁵ Atxiïti äti säkire: “Ia öti erekari iteene axinikiniri Teoso.” Atxiïti ätipekana: “Ikiniötika erekari iteene axinikiniri Teoso.” Häkixinireë hïxinikariko: “Natokopa itxa atäo nikamini?” ininiä eereka atäo hïkamini hïkane himarotape.

⁶ Hïte: “Ia öti apiaerekata iteene axinikiniri Teoso,” hininiä, ininiä ikara atoko hïxinika Teoso hïpaxitini ïkapani, ininiä erekapitïkari. Ikinipoko niäkari nikari ikinipoko, Teoso ipaxitini ïkapani, kotxi apisapanika itxari Teoso: “Erekapitïkai ia nipokori pisikinino niniäkiti ïkapani,” itxari. Ikinipoko maniäkati apaka aukari Teoso nirekiniri iua nikiniri takarinoka. Iua apaka txari Teoso inipokotini apisapanika: “Erekapitïkai ia kienatxi pisikinino niniäkiti ïkapani,” itxari. Ininiä iua apaka paxitari Apiananiri. ⁷ Kona ateka auïtetaua. Kona aäua ateka ïkapaninanini. Kona apina ateka ïkapaninanini. ⁸ Auapanika anakasaaki, aparïkauata Apiananiri ïkapani. Apïkasaaki, apina Apiananiri ïkapani. Ininiä auapanika anakasaaki, apïkasaaki apaka, Apiananiri nakiti atxaua. ⁹ Kristo ipina, eereka ökitikaua iuaïkana, auapanika inakani auïte ininiua ïkapani, ipïkani auïte apaka ininiua ïkapani. ¹⁰ Ininiä ! apakata pitxitiniri pitari. “!Kiïkitei,” kona pitxapiri, kotxi akinika aäpokako Teoso apisatoö. Iuasaaki iua säpiretariko akamakiti, erekari inini atxiïti, maerekati inini atxiïti. ¹¹ Teoso säkire iökatsopatakori txari: Nota Apiananiri, ätipirika auakari nitxaua. Ikinimane käkiti kapotoreëkauako nota apisatoö. Ikinimane txanoko nota Teoso nininiua.

¹² Ininiã iuasaakiikarako akinika asãpiretari Teoso ikinika akamakiti Ìkorapokoriti aãuakasaaki.

Masikataparaxiniretakakaua

¹³ Ininiã hìtokakariko hìtapparakienatakakiniua. Hãkixinireë hìtxako: “! Nitxìkitakapaniri nitari kerokiniri ikamakiti. ! Nitxìkitakapaniriko nitari kaminiri maerekati,” hìtxako. ¹⁴ Xesosi Apiananiri nakiti nitxaua, ininiãkara nimarotari, apakatapitika Teoso sãkire auiaãkari ninikiri ikinipoko nipokori, kotxi nipokori maerekati ! auari. Iuaritika kãkiti auikiniãri iua nipokori maerekati inini, !apakata inikiniri. ¹⁵ Hinikiniãri ikinipoko nipokori, atxiiti hìtari ãkixinire maxirauata, ininiã na atão hìtaretari iua. Kristo ipina iua hìtari Ìkapani, ininiã hìtakanapariko iua nipokori hinikini, kotxi atxiiti iua ! auikaikari Xesosi sãkire, iua nipokori hinikini xika. ¹⁶ Erekaru auakasaaki, ! hãuiritapiri ãti sãpiretinii ikara erekari maerekati inini. ¹⁷ Teoso aãuete ininiãua, kona nipokorinanini, kona iãtakorinanini, axinika. Teoso aãuete ininiãua, axinikari Erekaru Matamatakoti sikakiti atemoni. Iua txìkitakaua atãonoka akamini. Ikamaerekaxiniretaua. Isikapoxokonitaua. Teoso aãuete ininiãua, ikara atoko itxa aãuini. ¹⁸ Ikara atoko aparìkauatinii Kristo Ìkapani, Teoso apokaerekatua. Kãkiti apaka apokaerekatua.

¹⁹ Ininiãkara manirekaru kãkiti auini ereka inini, neenamtxi mauakani Ìkapani. Masikataparaxiniretakakaua. ²⁰ Na himisiritapiri Teoso parìka nipokori xika. Ikinipoko nipokori erekari hinikini, txamari hìte nikakiti txìkitakiniãri ãti takanapiniri Kristo, hìkerokari. ²¹ Hìtari kerokiniãri ikamakiti hìte niãkiti xika, apiaerekata himanikakaniri iua nipokori. Hìtari kerokiniãri ikamakiti hìte iãtakiti xika, apiaerekata iua iãriã himiãtakani. Na xatiki hìtxìkitakapiri hìtari kaminiri maerekati. ²² Hìtemoni ikinipoko nipokori nikiko erekari, txamari na hìsãpiretapiri apanakini. Erekaru Teosonoka imarotiniri. Hìxinikasaakiri hìkamakiti atão inini, hãkixinireë himarotakasaakiri hìkamakiti atão inini, iuasaaki hìpoxokoniuata. Ininiã kona hìteka apoitaua. ²³ Hinikasaakiri nipokori, hãkixinireë: “Erekaru atxiiti ia nipokori ninikini?” hinakasaaki, iuasaaki Teoso txai: “Maerekati pikama,” kotxi kona pauikari pikaminiri erekari. Himaukakaniãri hìkamakiti ereka inini, ininiã maerekati itxaua hìkamakiti.

15

ãti Nireëkiti Kamiko Pirena

¹ Atxiiti ikinipoko Teoso sãkire aãuika, ininiã amoiatariko Teoso sãkire poiãonoka auiaãkari, imaposotakiniti ikamini Ìkapani. ! Erekaru ateka nireëkitinoka akamini. ² Erekaru akaminiri aitari nireëkiti, iua amoiatini Ìkapani, Teoso sãkire iteene auikini Ìkapani. ³ Kristo apaka ! ikamari iuaka nireëkiti. Iua kamari Teoso nireëkiti, kotxi Teoso sãkire iõkatsopatakoriã Kristo txari iri:

Kãkiti misãkirepiretakasaakii pite, notara ninoã misãkirepireta.

⁴ Ikinika Teoso sãkire iõkatsopatakori iõkatsopataãka ate oerekiko Ìkapani. Teoso sãkire iõkatsopatakori aãuakasaaki, aiãtapari apoxokoritika erekari apokini. Aimarotari erekari apokapitikako. Teoso sãkire iõkatsopatakori sikataparaxiniretaua.

⁵ Teoso sikataparataua, ininiã apoxokoritika aiãtapari erekari apokini. Isikataparaxiniretaua. Ninirekaru Teoso txìkitakiniri hìte nireëkiti ãtinoka inini, Kristo Xesosi nireëkiti iaõka hìkamini. ⁶ Erekaru hinireëkiti hãkixinireë ãtinoka inini. Erekaru hìsãkire ãtinoka inini. Ikara atoko hininiã, hìkinika txari Teoso: “Peerekai pite,” kotxi iua aãuete Xesosi Kristo iri itxaua.

Xoteo Minakanuia Poxokoniuatini

⁷ Hāpakapariko āti, Kristo apakapini atokokana, ininiā kākiti txari Teoso: “Peerekai pite,” txariko. ⁸ Nisāpiretai. Kristo Xoteoakori nitiri atoko itxapekaua. Ikara oerekari Teoso sikiniri isikaenetakiti. Teoso sikaenetakiti Apraāomoni, Isakimoni, Xakoo pakinimoni, isikaenetakiti apokapeka Xesosi ĩkorapokoriti apokasaaki. ⁹ Kristo Xoteoakori nitiri atoko itxapekaua, ininiā Xoteo minakanuia txari: “Kaamonĭkareri Teoso. Peerekari iua,” itxana. Teoso sākire iōkatsopatakori txari:

Xoteo minakanuia auiniātaā nitxariko Teoso: “Peerekai pite.” Nixikarauata pite ĩkapani, kotxi peerekai pite.

¹⁰ Iuaĭkana Teoso sākire iōkatsopatakori txari:

Hĭte Xoteo minakanuia hĭpoxokoniuatoko Xoteoakorikata, Teoso nakitiakorikata.

¹¹ Iuaĭkana Teoso sākire iōkatsopatakori txari:

Hĭte hĭkinika Xoteo minakanuia, “Peerekari Apiananiri” hĭtxako. Hĭkinika itixi auakanĭ hĭxikarauatako Teoso ĩkapani.

¹² Iuaĭkana Teoso sākire iōkatsopatakoriā Isaiā txari:

Auako Xesee apika mekaniri. Xoteo minakanuia auĭte itxauako. Ninoa imarotariko isākire iaōka ikamini, itxa Teoso sākire iōkatsopatakori.

¹³ Teosora txĭkitakai himarotiniiri isākire iaōka ikamini. Ninirekari iua iteene kamapoxokonitini hĭte. Ninirekari ikamaerekaxiniretini hĭte, kotxi hāuikari iua sākire. Ininiā himarotari hāpakapapitikariko Teoso sākire iaōka. Erekari Matamatakoti posotiireē himarotari ikara.

Paoro Teoso Iokanapirena Erekari Sāpiretakari Xoteo Minakonimoni

¹⁴ Nitariakori, nota imarotari ereka hinini. Nimarotari hĭte iteene kimarore hinini hōerekakakiniua ĩkapani. ¹⁵ Iuaritika ia niōkatsopatakitiā nōtākikapekai hĭte nitaparaxinireritika. Himarotakiti, iuaĭkana nisāpiretai, iuaĭkana hĭxinikiniri ĩkapani. Teoso sikari erekari notamoni, ininiā ikara atoko niōkatsopata hĭtemoni. ¹⁶ Teoso sikari erekari notamoni, kotxi itxĭkitakano Xesosi Kristo nitiri nininiua. Ipaniātano nĭparĭkauatini Xoteo minakanuia ĩkapani. Sasetotxi apakapari kākiti mĭkiti, ininiā sika itxari Teosomoni. Ikara atoko itxa sasetotxi parĭka. Nota sasetotxi atoko nitxaua. Nisāpiretari Teoso iokanapirena erekari Xoteo minakonimoni, ininiā ninoaka sikaua Teosomoni inireēkiti ikaminina ĩkapani. Teoso apakapari ikara atoko inakari ninoaka iuamoni sĭkakanuia. Erekari Matamatakoti kamaerekatarĭ kākiti Teoso apakapiniua ĩkapani.

¹⁷ Ininiā Teoso ĩkapani nĭparĭkauatakasaaki, niuikari Xesosi Kristo. ¹⁸ Nota kona iuikaua, kotxi Kristo posotiireē Xoteo minakanuia kamari Teoso nireēkiti. Kristo panĭātano nota iua sākire nisāpiretinina Xoteo minakanuia. Ipaniātano inireēkiti nikamini Xoteo minakonikata nauakasaaki, ininiākara ninoa auikari nisākire. Ininiā ikamarina Teoso nireēkiti. ¹⁹ Erekari Matamatakoti posotiireē noerekari Teoso takaōtxĭkare ninoamoni. Noerekari posotiiretxi kākiti maposotakinini ninoamoni. Ininiākara ninoa kamari Teoso sākire iaōka. Kristo iokanapirena erekari ĩkinika nisāpiretapekari kākiti Xerosareē sitatxiti auakani. Eereka kākiti apikoxiti auakani nisāpireta. Eereka kākiti apikoxiti auakani nisāpireta. Nitxaāpota kākiti nisāpiretini. Imapotōkire Irĭria tixinipeka napoka, Kristo iokanapirena erekari nisāpiretini ĩkapani.

²⁰ Ātipirika ninirekari nisāpiretiniri Kristo iokanapirena erekari Kristo mĭmarotakoniātaā. Ininiā kona nĭparĭkauata Teoso ĩkapani āti parĭkauatiniātaā, kotxi āti sāpiretapekari Kristo iokanapirena kākiti iuaātaā. ²¹ Kotxi Teoso sākire iōkatsopatakori txari:

Mitxi iua masãpiretakoni imarotariko iua sãkire. Mitxi iua sãkire makenakotakani imarotariko iua sãkire, itxa Teoso sãkire iõkatsopatakori.

²² Kaiãokataikani ninirekamari nisini hĩtemoni, txamari kona apakata, kotxi iuaasaaki nisãpiretari Kristo sãkire Kristo sãkire mimarotakanimoni.

Paoro Seenetini Homamoni

²³ Itokanani ninirekamari naõkitinii hĩte. Uatxaika apakata nisini hĩtemoni, kotxi nixipokapekari nipařika ĩkorapokoriti. ²⁴ Nirekari Espãnia tixinimoni nisini. Iuaã nisikasaaki, ninirekari naõkitinii hĩte. Ninirekari mapaõti nikaikotini hĩtekata, kotxi nipotxitari hĩtekata nauini. Ninirekari hĩte moianatinino Espãniamoni nisini ĩkapani, ininiã eereka Espãnia tixinimoni nisa.

²⁵ Uatxa hĩtemoni nisini apisapanika, nisa Xerosareẽmoni, kotxi ninirekari nanikiniro txineiro kãkiti Teoso nakitiakori iuaã auakani nisikini ĩkapani.

²⁶ Kristo sãkire auĩãkani, Xoteo minakanuia Masetõnia tixini auakani, Akaia tixini auakani pakini sikaro oa txineiro. Inirekarina nisikiniro Teoso nakitiakorimoni, matxineirotenimoni, Xerosareẽ sitatxitiã. ²⁷ Ninoa poxokoniuata oa txineiro isikinina Xerosareẽ auakanimoni. Erekarini oa txineiro isikinina, kotxi Xoteoakori Kristo sãkire auĩãkani sikari Teoso sikakiti Teoso iokanapirena erekari Xoteo minakonimoni. Ininiã erekari Xoteo minakanuia sikiniri ipixini itxineirotena Teoso sikakito, Xoteoakorimoni.

²⁸ Ininiã oa txineiro nanika Xerosareẽ auakanimoni. Ninoamoni txineiro nisika atoko, ininiã eereka nipotorika Espãniamoni nisini. Espãnia napokini apisapanika nisako hĩtemoni. ²⁹ Ereẽ napokasaaki, nisãpiretai ikini sereti erekari Kristo sikakiti hĩtemoni.

³⁰ Nitariakori nota amanaã hĩte, himisãkiretiniri Teoso nota ĩkapani. Hĩkenakotatari namanaãkiti? Himisãkiretariko Teoso nota ĩkapani. Xesosi Kristo aãũte itxaua, ininiã namanaã himisãkiretiniri Teoso nota ĩkapani. Erekarini Matamatakoti txĩkitakaua atiraõkiuatini, ininiã himisãkiretari Teoso nota ĩkapani. Ikara atoko hĩkaminiã, Teoso sikataparatanoni nimisiritiko auakasaaki.

³¹ Kristo sãkire mauĩãkani Xotẽia tõpa auakani nirekari imisiritinino nota. Himisãkiretari Teoso ninoa mamisiritakanino ĩkapani. Himisãkiretari Teoso, Teoso nakitiakori Xerosareẽ auakani apokaerekatiniro txineiro Xoteo minakanuia iokanatakito. ³² Ininiã Teoso nirekiniãri, napoka hĩtemoni nipoxokoniritika. Ininiã asikapoxokonitakakaua. ³³ Teoso akamaerekaxiniretakiri aua hĩtekata. Ameẽ.

16

Paoro Akiriuãkaãpotana Ixinikakini

¹ Niokanataro aĩtaro Pepi inakoro hĩtemoni. Peerekaro oa. Omoianatana Xesosi sãkire auĩãkani Sẽkireia sitatxiti auakani. ² Apiananiri nakito otxaua, ininiã hãpakaparoko hĩpoxokoniritika, kotxi iua nakitiakori apaka hĩtxaua. Onirekiniãri himoianatiniro, himoianataroko, kotxi imoianatapekana itomaneri kãkiti. Omoianatapekano nota apaka.

³ Hĩsãpiretanako Pirisira, oĩtaniri Ākira pakini nixinikamanapitinina ninoa. Ninoa parĩkauatapeka Kristo Xesosi ĩkapani notakata. ⁴ Okaãkanapanokana nota imoianatinina xika. Peerekana, kotxi erekari ikaminanona. Xoteo minakanuia, ikini Teoso misãkiretikoãtaã apotiitakanuia apaka imarotari erekari Pirisira, Ākira pakini kamakiti nota ĩkapani. ⁵ Xesosi sãkire auĩãkani apotiitaua ninoa aapoko Teoso imisãkiretinina ĩkapani, ininiã hĩsãpiretanako nixinikamanapitinina ninoa.

Hīsāpiretariko nitiretakiti Epeneto inakori nixinikamanapitiniri iua. Ásia tixiniã iua merepitipanika auikari Kristo sākire. ⁶ Hīsāpiretaroko Maria nixinikamanapitiniro oa. Oa iteene parīkauata ate ĩkapani. ⁷ Hīsāpiretanako ninirimane Ātoróniko, Xónia pakini nixinikamanapitinina ninoa. Mitxipe nino aua notakata kateia āki. Teoso kākitemoni iokanatakini iteene imarótana Ātoróniko, Xónia pakini. Ninoa ipi auikari Kristo sākire, iua sākire nauikini apisapanika.

⁸ Hīsāpiretariko Āpirato nixinikamanapitiniri iua. Nitiretari iua. Nitari itxaua, kotxi Apiananiri anaakori atxaua. ⁹ Hīsāpiretariko Opano nixinikamanapitiniri iua. Iua parīkauata Kristo ĩkapani atekata. Hīsāpiretariko nitiretakiti Esitaki nixinikamanapitiniri iua. ¹⁰ Hīsāpiretariko Aperi nixinikamanapitiniri iua. Imisiritiko sauaki iua ! ikipatari Kristo sākire auikini. Hīsāpiretanako Arisitóporo aapoko auakani nixinikamanapitinina ninoa. ¹¹ Hīsāpiretariko ninirimane Erotxião nixinikamanapitiniri iua. Hīsāpiretanako Apiananiri nakitiakori Nasiso aapoko auakani nixinikamanapitinina ninoa.

¹² Hīsāpiretanako sitoakoro Tipena, Tiposa pakini nixinikamanapitinina ninoa. Ninoa parīkauatapitipo Apiananiri ĩkapani. Hīsāpiretaroko nitiretakito Pesitxi nixinikamanapitiniro oa. Oa apaka parīkauatapitipo Apiananiri ĩkapani. ¹³ Hīsāpiretanako Hopo, inoro pakini nixinikamanapitinina ninoa. Apiananiri mereēri iua. Iua inoro tiritano nota, ninoro tiritanino atokotxikana. ¹⁴ Hīsāpiretanako Asīkirito, Pirekōtxi, Ēmisi, Pataropa, Ēmasi, ikinika aĩtariakori ninoakata apotiitakanua pakini nixinikamanapitinina ninoa. ¹⁵ Hīsāpiretanako Piróroko, Xória, Nereo, Nereo itaro, Orīpa, ikinika Teoso nakitiakori ninoakata apotiitakanua pakini nixinikamanapitinina ninoa.

¹⁶ Himaaratakauako, kotxi aĩtaritakakaua. Kristo nakitiakori ikini Teoso misākiretikoãtaã apotiitakanua xinikamanapitai hĩte.

Paoro Ōtākikare Mapotōkire

¹⁷ Nitariakori iteene nōtākikai hĩte. Erepaniko kākiti neenamtxi nireēkani. Ninoa nirekari Kristo sākire auĩākani omanatinina apanakini Kristo sākire auĩākani. Na atão ninoa oerekakiti sākiretxiti, ininiã atxiiti kākiti takanapari Kristo sākire auikini ninoa oerekakiti xika. Kristo sākire nota oerekakiti hĩtemoni atão. Ninoa oerekakiti koketakori sākiretxiti. Ninoa moianariakori kona hĩtxapeua. ¹⁸ Kākiti ikara atoko inakani kona parīkauata aãũte Kristo ĩkapani. Ninoa parīkauata ĩtona nireēkiti ĩkapani. Imisirienetarina kākiti sākire auĩākani. Imisirienetarina kākiti ikara atoko inakani, kotxi kākiti potxitari isākirena. Kākitemoni peerekari ninoa sākire. ¹⁹ Ikinika kākiti imarotari hĩte kaminiri Kristo sākire iaōka, ininiã nota iteene poxokoniua hĩte ikara atoko hininiã. Ninirekari kiĩkite hinini erekari hĩkamini ĩkapani. Ninirekari himimarotakaniri maerekati hĩkamini. ²⁰ Teoso akamaerekaxiniretakiri, paĩtiki xipokariko Satanasi posotiire, ininiã hĩposotari hĩokanatiniri Satanasi isini.

Aãũte Xesosi Kristo ātipirika sikari ikinipoko erekari hĩtemoni.

²¹ Tximótxio, notakata parīkauatakari, xinikamanapitai hĩte. Ninirimane Arósio, Xasão, Sosipato pakini xinikamanapitai hĩte apaka.

²² Nota Tésio inakori iōkatsopatari ia iōkatsopari Paoro ĩkapani. Nota apaka xinikamanapitai hĩte, kotxi Apiananiri nakiti nĩtxaua.

²³ Nota Paoro aua Kaio aapoko. Kristo sākire auĩākani apotiitaua iua aapoko Teosokata isākirauatinina ĩkapani. Iua nirekari himarotiniri iua xinikamanapitini hĩte. Erásito inakori apaka xinikamanapitai. Txineiro

nīkatakari iua. Sitatxi auakani sikakito inīkata iua. Aītari Koato inakori xinikamanapitai hīte apaka.

²⁴ Aāuīte Xesosi Kristo ātipirika sikari ikinipoko erekari hītemoni. Ameē.

²⁵ “Peerekari Teoso,” matxako. Iua posotari ikamataparaxiniretinii hīte, ininiā kona hīotokakari hāuikiniri Kristo sākire. Teoso iokanapirena erekari nota sāpiretakiti, Xesosi Kristo sākire pakini sāpiretari ikara atoko inakari. Ikara Teoso sākire kitxakapirīka !kimarotikori. Uatxa imarotapeēkaika. ²⁶ Īkorsaaki asāpiretapekari ikara Teoso sākire, Teoso sākire sāpiretakani iōkatsopatakiti kitxakapirīka. Uatxa aimarotari ninoā sāpiretakiti. Teoso auapika inakari paniātari isākire sāpiretiko ikini itixiti auakanimoni. Ininiā apakata ikinimane auikiniri isākire. Apakata ikinimane kaminiri inireēkiti iaōka.

²⁷ Iuanani Teoso txaua. Iuanokara imarotari atāo ikinipoko. Ātipirika matxariko iua: “Peerekai pite, kotxi peerekari Xesosi Kristo.” Ameē.

1 KORĪTO

Merepanika Paoro Iokanatsopatakiti Korīto Auakanimoni

¹ Nota Paoro, Xesosi Kristo iokanatakītino. Teoso akiritano iua iokanatakīti nininiua īkapani, kotxi inirekari iokanatinino kākitimoni isākire nisāpiretini īkapani. Aītari Sōseni inakori aua notakata uai. ² Niokanatsopata hītemoni, kākīti Xesosi sākire auīākani Korīto sitatxiti auakanimoni. Kristo Xesosi makatxakakini hītḡaua Teoso īkapani. Teoso akiritai hīte iua nakītiakori hininiua īkapani. Apaka niokanatsopata ikini tōpati auakanimoni, aāuīte Xesosi Kristo uāka akiritakanimoni. Ate auīte Xesosi, ninoa auīte apaka itḡaua. ³ Aīri Teoso, Apiananiri Xesosi Kristo pakini sikari ikinipoko erekari hītemoni. Ninoa kamaerekaxiniretai hīte.

Paoro Misākiretari Teoso Korīto Auakani Īkapani

⁴ Ātipirika nimisākiretari Teoso ia atoko: “Peerekai pite, kotxi Xesosi Kristo sikari ikinipoko erekari Korīto auakanimoni. Ikara erekari pite sikakīti.

⁵ Peerekai pite, kotxi pite kamaerekatari ninoa auini. Pite oerekana ninoa sākire atāo inini īkapani. Pite kamaimaroretana. Ininiā ninoa sākire apiarekata. Ninoa imarore apiaāpota.” Ia atoko nimisākiretari Teoso.

⁶ Hītemoni asāpiretakiti Kristo pīrena auapeka hākixinireē. Ininiā iteene hāuikari Kristo sākire. ⁷ Ininiā hiātapakasaakiri aāuīte Xesosi Kristo kanapiriini, ikini sereti erekari Teoso sikakīti aua hītemoni iua parīka hīkamini īkapani.

⁸ Hīte isikataparaxiniretiniritika ikanapiriini ōti apokako. Ininiā maerekati hītemoni !auari aāuīte Xesosi Kristo apokasaaki. ⁹ Teoso kamariko ikara hītemoni, kotxi ikinika isākire iaōka ikamako. Tuakara akiritai hīte, himoianatiniri imi aāuīte Xesosi Kristo.

!Homanatakakapeua

¹⁰ Nitariakori, aāuīte Xesosi Kristo posotiireē nōtākikai. Hīsākire ātinoka hītḡako. !Ninirekari homanatakakiniua. Ninirekari ātika hīxinikakiti auini. Ninirekari ātika hinirekakiti auini. ¹¹ Nitariakori, Kroee aapoko auakani sāpiretano hītekakarika hinaiatakakiniua. ¹² Kotxi apanakini hīte txari: “Paoro sākirera nota kīpita.” Ātipekana: “Aporo sākirera nota kīpita.” Ātipekana: “Petro sākirera nota kīpita.” Ātipekana: “Kristo sākirera nota kīpita.” ¹³ !Apakata ikara atoko hīkamini. Kristo !ikaiarikaāka. Kona Paoro ipina aamina ipiriāmitakari nopini hīte īkapani. Kona Paoro uākaā hīpatxisataāka.

¹⁴ Nisāpiretari Teoso ereka inini, kotxi kona notani patxisatai hīte. Krispo, Kaio pakīninanira nipatxisata. Apikomoni !nipatxisatari kākīti. ¹⁵ Ininiā kona kākīti sāpiretari nipatxisatiniri kākīti nota uākaā. ¹⁶ Ii. Nimaxinīkaretari. Nipatxisatari Esitēpana, iua aapoko auakani pakini. Apikomoni nipatxisatakini !nixinikaika. ¹⁷ Kristo kona iokanatano nipatxisarauatini īkapani. Iokanatano Teoso iokanapirena erekari nisāpiretini īkapani. !Ninirekari kākīti sākireē, kākīti imaroreē nisāpirenauatini, kotxi kākīti imarore !isāpiretari Kristo ipinini aamina ipiriāmitakari nopini amaerekani imakatxakini īkapani.

Teoso Imarore

¹⁸ Teoso sākire mauīākani uākatari !kīlkiteri kākīti Kristo ipinini aamina ipiriāmitakari nopini sāpiretakani. Atepekana, Kristo ipinini sāpiretiko oerekari Teoso posotiire, kotxi Kristo ipinini makatxakari amaerekani. ¹⁹ Teoso sākire iōkatsopatakori kītḡakapirīka txari:

Nixipokariko ĩkorapokoriti kimarorerini imarore. Nixipokariko kiĩkiterini ĩĩkite.

Itxa Teoso kitxakapirĩka. ²⁰ Ĩtapari kimaroreri? Ĩtapari apaiãkarauatakarĩ? Naniparari kaxinikareri ĩkorapokoritikiri? Teoso oerekapekari ĩkorapokoritikiri imarore miĩkiteti imarore atoktxikana inini. ²¹ Paimatireri Teoso, kotxi ! auiritari ĩkorapokoriti auakani imarotiniri iua ninoaka imaroreẽ. Apanakin-imonĩ Kristo sãkire sãpiretiko ! kiĩkiteri, iuaritika Teoso apokaerekatari imaktxakiniri kãkiti maerekani, Kristo sãkire sãpiretiko auikasaakina.

²² Xoteoakori nirekari atamatiniri Teoso takaõtxikare, isãkire auikinina ĩkapani. Krekoakorĩpekana nirekari imaroretxi apiari imarotini. ²³ Iuaritika ate sãpiretari Kristo ipinini ĩpiriãmitakari nopini amaerekani imaktxakini ĩkapani. Xoteoakori !inirekari ikara asãkire auikinina. Krekoakorĩpekana uãkatari ikara asãkire miĩkiteti sãkire inini. ²⁴ Iuaritika Teoso akiritakini aua Xoteoakori, Krekoakori pakini. Ninoamoni Kristo parĩka oerekari Teoso posotiire. Iua parĩka oerekari Teoso imarore. ²⁵ Kãkiti uãkatari Teoso imarore !kiĩkiteri, iuaritika axapitiki Teoso imarore apiata. Ikinipoko kãkiti imarore poiãoka. Axapitiki Teoso tapara apiata. Ikinipoko kãkiti tapara poiãoka.

²⁶ Nitariakori, Teoso akiritakasaakii, hĩxinikari kãkiti xinikakiti atokokana. Natokopa itxa hĩte iusaaki? Iusaaki !kimaroreĩ. !Kaposotiire iusaaki. Auĩttxi !hĩtxaua iusaaki. Itori hĩte ikara atoko inakani iusaaki. ²⁷ Teoso mereẽri kãkiti. ĩkorapokoriti auakani uãkatari ninoa kãkiti Teoso mereẽkini miĩkiteni ininiua. Imereẽna ninoa, kimaroreni ĩkorapokoriti auakani pẽtauatini ĩkapani. ĩkorapokoriti auakani uãkatari ninoa kãkiti Teoso mereẽkini iõkapetakani ininiua. Imereẽna ninoa, katapararinĩ ĩkorapokoriti auakani pẽtauatini ĩkapani. ²⁸ Iua mereẽri kãkiti. ĩkorapokoriti auakani uãkatana ninoa Teoso mereẽkini minakani ininiuana. Imereẽri apanakini manirekakini. Imereẽri kãkiti omanatakoni. Kinirepa Teoso mereẽri kãkiti ikara atoko inakani? Teoso oerekari kãkiti, kãkiti uãkatakiti apiari inini na atão. ²⁹ Ikara atoko ininiã, kãkiti !iposotari iuikiniua Teoso apisatoõ. ³⁰ Teosora txĩkitakaua Xesosi Kristo nakitiakori aniniua. Kristo nakiti aniniãua, aimarotari imaroretxi atão inakari. Kristo txĩkitakaua atão inakari akamini Teoso apakapiniua ĩkapani. Iua txĩkitakaua Teoso nakitiakori aniniua ĩkapani. ĩkitxirauata ate ĩkapani ipĩkasaaki.

³¹ Teoso sãkire iõkatsopatakori txari:

!Apakata piuikiniua. Apakatapitika piuikiniri Apiananiri.

2

Xesosi Ipinini ĩpiriãmitakari Nopini

¹ Nitariakori, napokasaaki hĩtemoni, nisãpiretai Teoso sãpiretakiti. Kona nisãpiretai notaka sãkire nimatire. Iusaaki kona noerekai notaka imarore. Teoso sãkirenoka nisãpiretai hĩte. ² Hĩtekata nauakasaaki, na ninirekari ãti imaroretxi nimarotini. Ninirekari Xesosi Kristonoka nisãpiretinii. Apiata ninirekari nisãpiretinii iua ipinini kãkiti ĩkapani ĩpiriãmitakari nopini. ³ Hĩtekata nauakasaaki kona kataparaxinireno. Nikikinana nipiĩkaruatini xika. ⁴ Iusaaki kona kãkiti imaroreẽni nisãkirauata. Kona kãkiti imaroreẽni ninirekari hãuikiniri Teoso iokanapirena nisãpiretakiti iusaaki. Teoso iokanapirena nisãpiretakasaaki, kãkiti imarotari Erekarĩ Matamatakoti posotiireẽ nisãkirauata. ⁵ Ininiã kona kãkiti imaroreẽni hãuikari Teoso iokanapirena. Hãuikari Teoso iokanapirena Teoso posotiireẽ.

Erekari Matamatakoti Imarore

⁶ Teoso sākire auīākani iteene ākixinireē aneēkani imarotari Teoso iokanapirena asāpiretakiti kimatireri inini. Ikara imaroretxi kona īkorapokoriti auakani imaroreni. Kona auītetxiakori imaroreni ikara imaroretxi. Kotxi ninoa imarore paītiki !auaika. ⁷ Asāpiretari Teoso imarore mitxi kākiti mimarotakiniti, kotxi Teoso kipatari. Itixi kamiko apisa Teoso nirekaua asāpiretiniri ikara imarore kākitemoni ate iotximere aāpakapini īkapani. ⁸ Auītetxiakori īkorapokoriti auakani !imarotari ikara Teoso imarore. Ninoa imarotaākamariko, ininiā ! okamarinako Apiananiri kaiotximereri aamina ĩpiriāmitakari nopini. ⁹ Kitxakapirīka Teoso sākire iōkatsopatakori txari:

Kākiti oki ! atamatapanikari Teoso kamakiti tīkane iua tiretakani īkapani. Kākiti kenakoki ! ikenakotapanikari Teoso kamakiti tīkane iua tiretakani īkapani. Kākiti ! ixinikapanikari Teoso kamakiti tīkane iua tiretakani īkapani.

¹⁰ Iuaritika Teoso oerekapekaua Erekarī Matamatakotiā. Ikinipoko imarotari itxaua Erekarī Matamatakoti. Ikinipoko kipatakori Teoso imarore imarota. ¹¹ Kākiti ākixinirenoka imarotari iuaka ixiniākiti. Āti ! imarotari iua xiniākiti. Iua atokokanera Erekarī Matamatakotinoka imarotari Teoso xiniākiti, kotxi Teoso itxaua iua. ¹² Kona ate apakapari ātiāo matamatakoti īkorapokoritikiri. Ate apakapari Erekarī Matamatakoti, Teoso iokanatakiti atemoni, ininiākara aposotari aimarotini Teoso sikakiti atemoni. Itori isikakiti.

¹³ Atemoni isikakiti asāpireta. Kona kākiti imaroreēni asāpiretari kākiti. Erekarī Matamatakoti oerekaua asāpirenauatini. Ate atamatari Teoso oerekakiti isākire iōkatsopatakoriā, eereka ātiātaā isākire iōkatsopatakoriā aātamari iua oerekakiti, ininiā iuasaaki aimarotari atāo. Ikara atoko aōerekai hīte. ¹⁴ Erekarī Matamatakoti mauakinīti ! apakapari Erekarī Matamatakoti oerekakiti, kotxi iuamoni ikara sākiretxi mīkpiteti sākire. !Iposotari imarotini Erekarī Matamatakoti sāpiretakiti, kotxi Erekarī Matamatakoti ! auari iuamoni. ¹⁵ Erekarī Matamatakoti auakasakiri kākiti, iuasaaki iposotari ataerekatiniri imakinika, ininiā kākiti Erekarī Matamatakoti mauakinīti ! iposotari apoītiniri iua.

¹⁶ Teoso sākire iōkatsopatakori txari:

Kiripa imarotari Apiananiri xiniākiti iua oerekini īkapani?
Iuaritika Kristo oerekaua iuaka xiniākiti.

3

Teoso Nitiriakori Atxaua

¹ Nitiriakori, hīte ! ikamari ikinipoko Erekarī Matamatakoti nireēkiti. Hīkamari hīteka nireēkiti īkorapokoriti auakani kamini atokokana. Ininiākara nisākirauata hītekata amarinikata nisākirauatini atoko, kotxi poiāonoka hāuikari Kristo sākire. ² Tinitxiā atoko inakari nisākire nisikai. Xinitxi atoko inakari nisākire kona nisikai, kotxi ! himīteenekari nisākire kamimari. Uatxapiima hīte ! iposopanika noerekakiti kamimari himarotini. ³ Īkorapokoriti auakani xinikini atoko hīxinikapanika. Ikara xika hīxikotakakaua. Hinaiatakakaua. Homanatakakaua. Hīteka nireēkiti hīkama, īkorapokoriti auakani kamini atokokana. ⁴ Kotxi ātikaka hīte txari: “Paoro sākire nikīpita.” Apanakini txari: “Aporo sākire nikīpita.” Ikara atoko hininiā, kākiti īkorapokoritikini sākire atoko hīsākirauata. !Kiīkitepanikai.

⁵ Kiripa Paoro? Kiripa Aporo? Kristo nitiriakorinoka atxaua. Iua sākire sāpiretakaninoka atxaua. Hīte auikapekari Kristo sākire asāpiretakasaakii. Apiananiri sikari parīkatxi ikininapemoni akamini īkapani. ⁶ Ia atoko itxa

parīkatxi Teoso sikakiti: Merepanika nota sãpiretari Teoso sãkire kãkitimoni, takariki nitakini atokokana. Eereka Aporo oerekari ninoa kãkiti apikomoni Teoso sãkire. Āparaã takari nireẽkiti atoko itxa apikomoni Teoso sãkire isãpiretakiti. Nota, Aporo pakini parīkauata ikara atoko, iuaritika Teosonoka aneẽkakarī takari. Iuanokara txīkitakari kãkiti auikiniri isãkire. ⁷ Takariki taãkari, āparaã siãkari pakini minakati ninoa, kotxi Teosonoka aneẽkakarī takari. ⁸ Teoso sãkire merepanika sãpiretakari nirekari iparīkauatini Teoso ikapani. Teoso sãkire apikomoni sãpiretakari apaka nirekari iparīkauatini Teoso ikapani. Ininiã Teoso sikariko ninoa parīka ĩki ninoamoni iparīkana iaõka. ⁹ Teosokata parīkauatakani atxaua. Teoso kikiote atoko hĩtxaua. Apaka Teoso aapoko atoko hĩtxaua.

¹⁰ Teoso sikapekano ikinipoko erekari niparīka iua ikapani nikamini. Aapokotxi kamiko apisa aapokotxi kamakari kimaroreri takari kaikori, inopini aapokotxi ikamini ikapani. Iua aapokotxi kamakari kimaroreri atoko nitxaua. Merepanika nota parīkauata Kristo sãkire nisãpiretini. Kaikori aapokotxi kamakari takakiti atoko itxa ikara iua sãkire. Eereka apanakini oerekarauata apikomoni. Ninoa parīka aapokotxi kamiko kaikori nopini atokokana itxa. Erepaniko akamakasaakiri ikara parīkatxi. ¹¹ Kaikori, aapokotxi kamakari takakiti atoko itxa Xesosi Kristo sãkire. Āti kaikori kãkiti sãkire !auari. Auape kaikori Xesosi Kristo sãkire, kotxi kataparari. ¹² Xesosi Kristo sãkire aãuikasaaki, kaikori aãuini ikapani iposope. Aapokotxi iua kaikori nopini atoko itxa aparīka. Aparīka atxiĩti oro atoko itxa. Atxiĩti pirata atoko itxa. Atxiĩti kai erekari atoko itxa. Atxiĩti aamina atoko itxa. Atxiĩti aãtsopa atoko itxa. Atxiĩti katsotati atoko itxa aparīka.

¹³ Itixi xipokini õti kãkiti imarotariko natokopa itxa iparīka, kotxi iusaakiko arikatxi ataerekatari iparīka. ¹⁴ Iparīka marikakanĩã, apakapari iparīka ĩki. ¹⁵ Iparīka arikiniã, lapakapari iparīka ĩki. Iuaritika Teoso auiritari iua auini ātipirika Teosokata, txamari iua xipokaarita.

¹⁶ Kona hĩte imarotapanikari Teoso misãkiretiko aikoti hininiua? Kona hĩte imarotapanikari Erekarī Matamatakoti auini hĩto āki? ¹⁷ Kãkiti xipokiniãri Teoso misãkiretiko aikoti, Teoso xipokariko iua. Teoso misãkiretiko aikoti iua nakiti. Hĩtera Teoso misãkiretiko aikoti hĩtxaua.

¹⁸ Kona hĩteka misirienetapeuako. Atxiĩti ātikaka kãkiti hĩte sauaki uãkatari kimaroreni ininiua, kotxi imarotarina ĩkorapokoriti auakani imarore. ĩkorapokoriti auakani uãkatari Kristo sãkire auĩãkari miĩkiteti ininiua. Ininiã erekape kãkiti ĩkorapokoriti auakani akiritiniĩ miĩkiteti hininiua, kotxi iusaaki kimaroreri atão inakari hĩtxaua. ¹⁹ Teosomoni !kiĩkiteri ĩkorapokoriti auakani imarore. Teoso sãkire iõkatsopatakori txari: Teoso maĩkari kimarorerini ĩkorapokoriti auakani ninoaka imaroreẽ.

²⁰ Apaka Teoso sãkire iõkatsopatakori txari:

Apiananiri imarotari ĩkorapokoriti kimarorerini imarore litxapõ.

²¹ Ininiã ! apakata kãkiti iuikiniua imarore xika. Ikinika iua hĩtemoni.

²² Paoro aua hĩtemoni. Aporo aua hĩtemoni. Petro aua hĩtemoni. Itixi aua hĩtemoni. Hãuini, hĩpinini apaka aua hĩtemoni. Uatxa auakari, katana auakari apaka aua hĩtemoni. Ikinipoko aua hĩtemoni. ²³ Kotxi hĩte Kristo nakiti hĩtxaua. Kristo, Teoso nakiti itxaua.

4

Kristo Iokanatakini Kãkitimoni

¹ Erekarī kãkiti imarotiniri auĩtetxiakori aminakanuia. Kristo nitiriakori atxaua. Teoso iokanapirena nĩkatakani atxaua. Iua sikari iokanapirena

atemoni apanakini asâpiretini Îkapani. Iua Teoso iokanapirena ! imarotaâka mitxi. ² Nitiritxi atâo inakari âtipirika kamari iauîte paniâtakiti. ³ ! Nimaâkatari hîte ataerekatinino nota. ! Nimaâkatari apanakini ataerekatinino apaka. Kona notaka ataerekataua apaka. ⁴ Nâkixinireê maerekati ! auari, iuaritika nikamapekari maerekati. Apiananirinokara ataerekatano. ⁵ Ininiâ ! hîsâpiretapiri: “Kona erekari iua parîka. Peerekari ikara parîka,” kona hîtxape Apiananiri apokini apisa. Apiananiri apokini hiâtapako. Iua oerekariko ipiâmoni iomaâtakori. Oerekariko kâkiti nirekakiti âkixinireêna iparîkauatakasaakina. Iuasaaki Teoso txariko kâkiti: “Erekapitikari pikamakiti,” itxa.

⁶ Nitariakori, ikara nota pirena, Aporo pirena pakini nisâpiretai atâo inakari himarotini Îkapani, âti apiata himiuiakani Îkapani. Ininiâ hîkamariko Teoso sâkire iôkatsopatakori iaôka, kotxi ! apakata kâkiti iteene iuikiniri âti, âtipekana imanirekakani inini. ⁷ Pite apiananitakari ! auari. Himapakapakiniti ! auari. Kapakapare hininiâ, kinirepa mapakapareni sâkirauatini atoko hîtxa? ⁸ Ikinipoko hinireêkiti auapeka hîtemoni atxiîti? Katiipekai hîte. Ate ereê mauakanisaaki, atxiîti hîteka kamari auîtetxi hininiua. Ninirekari auîtetxi atâo hininiua, ininiâ ate auîtetxi atxaua hîtekata. ⁹ Îkoraasaaki neenamati xipoka atoko, auîtetxi kâiatakari kanapiriâ isotatonekata. Nino mapotôkire kâkiti auîtetxi maîkakini minaâka apanakini atamatinina Îkapani, inapetinina Îkapani. Eereka okaâkana ninoa kâkiti. Nota xinikari Teoso nirekari ate iua iokanatakini ikara kâkiti maîkakani atoko aniniua. Ikinimane atamataua. Kâkiti, Teoso nitiriakori iaxitikini apaka atamataua apininimoni asini. ¹⁰ Hîtemoni, miîkiteni ate txaua, Kristo Îkapani aparîkauatakasaaki. Hîtemoni, kimarorei hîte, Kristo Îkapani hîparîkauatakasaaki. Hîtemoni, ! kaposotiireua ate. Hîtemoni kaposotiirei hîte. Hîte paxitaâka, txamari ate omanataâka. ¹¹ Uatxapiima Kristo sâkire ate auikini xika anatxita. Aposonata. ! Kamâkaua. Amisiritaâka. ! Kaapokoua. ¹² Iteene aparîkauata anireêkiti aamotini Îkapani. Kâkiti takasaakiri maerekati atemoni, ate amanaâri Teoso erekari ninoamoni itakini Îkapani. Amisiritikosaaki, iuasaaki amîteenekari. ¹³ Apanakini misâkirepiretakasaakiaua, erekari ate apakapapiretana ninoa. Uatxapiima apanakinimoni îkorapokoriti txiko atoko atxaua. Kasakari atoko atxaua ninoamoni.

¹⁴ Kona niôkatsopata ikara hîpêtauatini Îkapani. Niôkatsopata ikara nipinitini Îkapani monôkori apokini apisa, kotxi namariteni nota tirketakini atoko hîtxaua. ¹⁵ Hîtemoni tesi mio Teoso sâkire oereêkani auaâkamako, iuaritika poiâo hîri atoko inakari aua. Notara hîri atoko nitxapekousa, kotxi hâukari Teoso iokanapirena erekari noerekasaakii Kristo Xesososi potsiireê. ¹⁶ Ininiâ nôtâkikai: Nota kamakiti atoktxikana hîkamako. ¹⁷ Ikara Îkapani niokanatarî Tximôtixio hîtemoni. Iua namarite nitiretakiti atoko. Iua kamari Apiananiri paniâtakiti iaôka. Iua txikitakai hîxinikiniri nikamakiti ikiniôtika Kristo posotiireê. Ikini tôpati Kristo sâkire auîâkani apotiitiniâtaâua, noerekari kâkiti erekari ikamini ikiniôtika, erekari nota kamini atokotxikana.

¹⁸ Âtikaka hîte iuikaua, kotxi hîuâkatari nota mapokakani hîtemoni. ¹⁹ Txamari Teoso auiritiniâno, paîtiki napokako hîtemoni. Iuasaakiko ! ninirekari nimarotiniri ninoa iuikaniua sâkire. Napokasaaki ereê, ninirekari nimarotiniri Teoso posotiire. ²⁰ Teoso auîtetxi ininiâtaâua kona sâkiretxinani aua. Iposotiire apaka aua. ²¹ Kiripa hîte nireka? Hinirekatari ninoropatini âikeê, ereê napokasaaki? Hinirekatari nitiretinii, nimatxitakanii, ereê napokasaaki?

Maerekati Xesosi Sākire Auiākani Sauaki

¹ Isāpiretaāka kākiti ereē kaminiri maerekati itotxi nireēkiti āti kākitikata. Iua kākiti maerekani apiari, kotxi iua sirīka iri itanorokata. Teoso sākire mauīākani kamari maerekati, iuaritika ninoa !ikamari ikara atoko inakari maerekati, kiki hīte sauaki auakari kamakiti atoko. Ninoa !inirekari isākiretinirina ikara atoko inakari maerekati. ² Iuaritika hīte iuikaua. ! Himatinaniuata himaerekani xika. Apiaerekata ikora iri itanorokata sirīkakari hōkanatini itakanapinii. ³ Nīto kona ereē aua, iuaritika nixinikakiti auapitika ereē hītekata, ininiā nota ereē hītekata nauini atokokana, nimereēpekari iua maerekati kamakari misiritiko. ⁴ Aāuīte Xesosi Kristo uākaā hāpotiitakasaakia, nota aua hītekata nixinikakitiā. Iuasaaki himarotakasaakiri Xesosi Kristo posotiire, ⁵ hīsikariko iua Satanasimoni iua ito ipinini ikapani, ixinire ereka inini Xesosi kanapiriākasaaki.

⁶ ! Apakata hūiukinia. Himarotari axapiti pāo tireēkari tirekakari itori pāo. Iua atokokana ātika maerekati kamakari txīkitakari kaiāopokori kākiti kaminiri maerekati. ⁷ Ininiā hōkanapariko maerekati mitxi hīkamakiti, amameri hinini ikapani. Ininiā pāo miātiākati atoko hītxaua, kotxi ikoke !auari. Kītxakapirīka kākiti okari ipira soti auīte, ininiā Teoso nitiri napaāpotakasaaki ninoa nōpini, kona okana ninoa. Kristo, apira soti auīte atoko itxa. Iua ipina ate mapinakani ikapani. ⁸ Pāscoa kiiniritisaaki, Teoso !auiritari pāo ātikakari nikiko, kotxi maerekati pāo tirekakari atoko itxa. Ininiā maōkanapari maerekati mitxi akamakiti. Pāo miātiākati atoko matxaua, ininiā makamari erekari. Masākiretari atōo inakarinoka. ⁹ Niokanatsopatpeka hītemoni himapotiitakanua maerekati kamakanikata, itotxi nireēkiti kamakanikata. ¹⁰ Na nixinikari ikorapokoriti maerekati kamakani. Maerekati itotxi nireēkiti kamakani, kamanarerini, kamisirienenerini, kamakori teosonetakani pakini ikorapokoriti auakani na nixinikanāta. ! Hīposota hītakanapinina ninoa, kotxi auapikana. Hīpikasaakinokara, hītakanapana ninoa. ¹¹ Uatxa niokanatsopata hītemoni, himapotiitakanua maerekati kamakanikata, “Xesosi sākire auiākarirano” inakanikata. Itanoro minakotokatika sirīkakani, kamanarerini, kamakori teosonetakani, āti misākirepiretakani, ipoātakani, kamisirieneneri pakini hītakanapako. Kona hinipokotape ikara atoko inakanikata.

¹² Kona nota parīkani Xesosi sākire mauīākani misiritiko nisāpiretini. Hīte parīkakara Xesosi sākire auiākani misiritiko hīsāpiretini. ¹³ Teosokara sāpiretariko Xesosi sākire mauīākani misiritiko. Hīte iokanatariko maerekati kamakari hīte sauaki auakari isini.

6

Āti Naiatakasaakiri Āti

¹ Xesosi sākire auiākari naiatiniāri āti Xesosi sākire auiākari, ! apakata Xesosi sākire mauīākani apisatoō anikiko. Hanikana ninoa Xesosi sākire auiākanimoni maerekati kamakari misiritiko himarotini ikapani. ² Kona himarotapanikari Xesosi sākire auiākani mereēriko Xesosi sākire mauīākani misiritiko āti ōti? Hīkamariko ikara atoko inakari xipokatxi ōtisaaki, ininiā hīposotapitikari uatxa himereiniri kākiti misiritiko, āti naiatakasaakiri āti. ³ Atxiīti hīte kona imarotapanikari himereiniri Satanasini nitiriakori misiritiko āti ōti? Ininiā hīposotapitikari himereiniri kākiti misiritiko ikorapokoriti uatxa. ⁴ Txamari neenamatzhi hīte sauaki auiniā, hanikatari kākiti Teoso sākire auiākani mapaxitanimoni? ! Apakata, kotxi ninoa ! imarotari Teoso paniātakiti. ⁵ Ikara atoko nitxai nikamapētatinii ikapani. Atxiīti kona hīposotatari hāpokiniri kimaroreri hīte sauaki neenamatzhi xipokini ikapani?

Atxiiti kona âtika aua? ⁶ Txamari âti Xesosi sâkire auiâkari anikari âti Xesosi sâkire auiâkari Xesosi sâkire mauiaâkani apisatoõ maerekati kamakari misiritiko himarotini îkapani. Ikara atoko !apakata.

⁷ Ininiâ iteene hîkerokari, cotxi hanikari hîtari kâkiti misiritiko mereêkarimoni. Erekepe hâuiritiniri hîtari kaminiri maerekati hîtemoni. Erekepe hâuiritiniri hîtari îtirîkiniri hîtii. ⁸ Txamari hiîtiriuaata. Hîkamari maerekati. Hîtariakorimonira hîkamari îkara. ! Apakata. ⁹ Kona himarotapanikari atâo minakati kamakani !isari Teoso auîtetxi ininiâtaâua? Kona hîteka himisirienetapeua. Ia atoko inakari kâkiti !isari Teoso auîtetxi ininiâtaâua: maerekati îtotxi nireêkiti kamakani, kamakori teosonetakani, îtanoro minakotokatika sirîkakari, kiki sito ininiua nirekakari, kiki âti kîkikata sirîkakari. Ninoa !isari Teoso auîtetxi ininiâtaâua. ¹⁰ Kîitiririni, kamanarerini, poâtakani, âti misâkîrepiretakani, kamisirienenerini pakini ! isari Teoso auîtetxi ininiâtaâua. ¹¹ Ikara atoko mitxi hîtxaua hîte apanakini. Iuaritika himaerekani makatxakaâkapeka. Teoso kamai hîte inakitiakori hinini. Apiananiri Xesosi kamaerekatai. Erekeri Matamatakoti, aTeosone nakiti, iua apaka txîkitakai hîte atâo inakari kamakani hininiua.

Maerekati Îtotxi Nireêkiti

¹² Nota posotari ikinipoko nikamini, txamari kona erekeri ikinipoko nikamini. Nota posotari ikinipoko nikamini, txamari kona ninirekari nîkamakiti niauite ininiua. ¹³ Nîpokori kamaâka tikakotxi îkapani. Tikakotxi nirekari nîpokori. Txamari Teoso xîpokariko nîpokori, tikakotxi pakini. Teoso !inirekari akaminiri maerekati aîto nireêkiti âti kâkiti îtokata. Apiananiri kamari aîto iua nireêkiti akamini îkapani. Aîto Apiananiri nakiti.

¹⁴ Teoso ôkitikari Apiananiri ipîkani sauaki. Iua atokokana iua ôkitikaua ate iposotiiere.

¹⁵ Ininiâ !apakata Kristo îto hîsikini sito kanokareromoni. !Apakata. ¹⁶ Kiki sirîkasaaki kanokarerokata, iuasaaki âtinoka îtotxi atoko itxauana ninoa. Teoso sâkire îokatsopatakori sâpiretaua:

Kiki sirîkini sitokata, âtika îtotxi atoko itxauana.

¹⁷ Kâkiti moianatakasaakiri Apiananiri, âtika xiniretxi atoko itxauana ninoa xinire.

¹⁸ Âtokata hîsirîkini hinirekasaaki, himitekako. Kona hîkaikotape iuaâ. Apanakini maerekati kâkiti kamakiti !imisiritari hiîto. Imisiritari hâkixinire. Hîkamakasaakiri maerekati hiîto nireêkiti sitokata, himisiritari hiîto, hâkixinire pakini. ¹⁹ Kona himarotapanikari hiîto Erekeri Matamatakoti misâkîretiko aikoti atoko ininiua? Hîte îtoâkarari iua. Teoso sikari iua hîtemoni, ininiâ hiîto kona hîte nakiti. ²⁰ Teoso iamotapekai hîte Xesosi ipîkasaaki, ininiâ hiîto îki auapitika. Ininiâ uatxa iua nakiti hîtxaua. Ininiâ uatxa hiîtoâ hîpaxitariko Teoso.

7

Îtanorouatiko Sâkîretxiti

¹ Uatxa napakapîretariko mitxi hiôkatsopatakiti notamoni. !Erekeri kiki kaxirotinro sito. ² Txamari inirekasaakiri sitokata isirîkini, erekeri kiki auini uaka îtanorokata. Erekeri sito auini oaka ôtanirikata. ³ Ininiâ erekeri kiki sikiniri îto îtanoromoni. Erekeri sito sikiniri oîto oîtanirimoni. ⁴ Îtanorotxi îto kona oa nakitinanini. Ôtaniri nakiti apaka oîto. Apaka tanirixi îto kona iua nakitinanini. Îtanoro nakiti apaka îto. ⁵ Kona hîtxape: "Kona ninirekari nisirîkini pitekata," kona hîtxape. Hinirekasaakiri nîpokori himanîkakani Teoso himisâkîretini îkapani, atxiiti iuasaaki !hinirekari hîsirîkini hîtanorokata. Hîtanoro apaka kona nirekari osirîkini hîtekata iuasaaki, Teosonoka hîxinikini

īkapani. Ininiā ikara atoko hīkaminiā erekari, txamari paītiki eereka iuaīkana hīsīrkako hītanorokata. Ininiā ikara atoko Satanasi kona sikanireōtai maerekati hīto nireēkiti hīkamini āto sitokata hīsīrkini. ⁶ Ikara nota ōtākikai hīte. Kona nipaniātai iara hīkamini. ⁷ Notamoni erekari nota atoko hinini. Iuaritika ikinimane aua Teoso siākiti iparīka kamini īkapani. Teoso sikari āti isikakiti ātimoni. Ātiāo isikakiti isika ātimoni.

⁸ Uatxa nimisākiretanako mītanirini, mītanoroni, tikinitakoni pakini. Erekari himītaniriuatakani, himītanorouatakani nota atoko hinini. ⁹ Txamari himapopotakaniāri hītakanapiniri hīto nireēkiti, erekari hītanorouatini, erekari hītaniriuatini, kotxi kapatakari atoko itxa hīto nireēkiti.

Hīkamari Atāo Hītaniriuatakasaaki

¹⁰ Ia nipaniātana kākiti ītaniriuatakani: !Apakata sito takanapiniri oītaniri. Kona notani paniātai. Apiananirira paniātai. ¹¹ Otakanapiniāri oītaniri, !apakata iuaīkana oītaniriuatini. Erekari oītanirimoni iuaīkana okanapirini. Iua atokotxikana !apakata kiki takanapiniro ītanoro. ¹² Nōtākikari apanakini. Apiananiri paniātakiti apanakini īkapani !auari, ininiā nota ōtākikana ninoā ia atoko: Xesosi sākire auīākari auiniā ītanoro Xesosi sākire mauīākato, oa nirekiniāri okaikotini iuakata, !apakata iua iokanatinoro oa otakanapiniri iua. ¹³ Iua atokotxikana, Xesosi sākire auīākaro auiniā oītaniri Xesosi sākire mauīākati, iua nirekiniāri ikaikotini oakata, !apakata otakanapiniri iua. ¹⁴ Iuasaaki ītaniritxi Xesosi sākire mauīākati apakapari Teoso sākire ītanoro kamakiti ereka atamatakasaaki. Iua atokotxikana, ītanorotxi Xesosi sākire mauīākato apakapari Teoso sākire ōtaniri kamakiti ereka oātamatakasaaki. Imakamakaniārina ikara atoko, !erekana imiakori. Irītxi, inorotxi pakini kaminiāri nōtākikakiti iaōka, erekana imiakori. ¹⁵ Xesosi sākire mauīākati nirekiniāri itakanapiniri ītanoro, oa auiritariko isini. Xesosi sākire mauīākato nirekiniāri otakanapiniri oītaniri, iua auiritaroko osini. Ikara atoko ininiā, ninoā sikakapeēkaika. Ikara atoko ininiā erekari, kotxi Teoso !inirekari anenamauatini ikara xika. ¹⁶ Pite ītanorotxi, pimarotatari? Atxīiti pītaniri auikari Xesosi sākire imaerekani makatxakiko īkapani, Xesosi sākire pisāpiretakasaakiri iua. Pite ītaniritxi, pimarotatari? Atxīiti pītanoro auikari Xesosi sākire omaerekani makatxakiko, Xesosi sākire pisāpiretakasaakiro oa.

Teoso Akiritakasaakiri Kākiti

¹⁷ Ininiā ikininape kamariko iparīka Teoso sikakiti iuamoni, kotxi Apiananiri akiritaua ikara parīkatxi akamini. Ikara nipaniātari ikinimane Teoso mereēkini apotiitiniātaāua. ¹⁸ Teoso akiritakasaakiri kiki, Teoso takaōtxikare iītoā auiniā, !apakata Teoso takaōtxikare makatxakiko. Teoso akiritakasaakiri kiki, Teoso takaōtxikare iītoā mauakaniā, !apakata Teoso takaōtxikare iītoā takiko. ¹⁹ Teoso takaōtxikare hītoā auiniā, ikara kona txīkitakai Teoso anaakori hininiua. Teoso takaōtxikare hītoā mauakaniā, ikara apaka kona txīkitakai Teoso anaakori hininiua. Teoso nireēkiti iaōka kamiko txīkitakai Teoso anaakori hininiua. ²⁰ Teoso akiritakasaakii, iuasaaki mitxi hīparīka hīkamapanikako. ²¹ Teoso akiritakasaakii, nitiritxi amotakori hininiāua, ininiā kona maerekaxinireti hītxapeua nitiritxi hininiua xika. Iuaritika hīauite sikakiniāi, ininiā hīsako. ²² Apiananiri akiritiniāri nitiritxi amotakori, Apiananiri sikakakiti itxaua iua. Apiananiri akiritiniāri nitiritxi minakatiua, Apiananiri nitiri iamotakiti itxaua iua. ²³ Xesosi amotakini hītxaua, ininiā iuaīkana kākiti nitiri iamotakoni !hītxapeuko. ²⁴ Nitariakori, Teoso akiritakasaakii, iuasaaki mitxi hīparīka hīkamapanikako.

Mitxitakani, Tikinitakoni Pakini

²⁵ Uatxa nõtākikai hīte mitxitakani. Apiananiri kona sãpiretano ipaniãtakiti hīte ìkapani, iuaritika nisãpiretai nixinikakiti, kotxi Apiananiri amonìkapekano, ininiã kãkiti posota auikiniri nisãkire. ²⁶ Ìkoraasaaki pamonõkoniri Xesosi sãkire auããkanimoni, ininiã notamoni apiaerekata kãkiti mītanorouatakani. ²⁷ Hītanorouatapeka hininiã, kona hītakanapapero hītanoro. Mītanorouatakatiapanika hininiã, kona hinitapero hītanoro. ²⁸ Iuaritika hītanorouatiniã, maerekati !hīkama. Kãkiti ìtanorouatiniã, apokapitikako ninoa maxikiko. Kona ninirekari ikara atoko hīte ìkapani.

²⁹ Nitariakori, poião õtinoka aua aparìkauatini Apiananiri ìkapani. Ininiã hīte kītanororini parìkauatako Teoso ìkapani mītanoroni parìkauatini atokotzikana. ³⁰ Txiapatakari parìkauatako Teoso ìkapani, kãkiti matxiapatakati parìkauatini atokokana. Poxokori parìkauatako mapoxokoniti parìkauatini atokokana. Tiitxi amotakari parìkauatako Teoso ìkapani, tiitxi mauakiniti parìkauatini atokokana. ³¹ Ìkorapokoriti tiitxi auakini !ixinikapiriko itiina, kotxi ìkorapokoriti kãkiti potxitakiti xipokaãpota.

³² Ninirekari erekaxinire hinini. Kiki mītanoroti posotari ixinikiniri kanatokopa iparìkauatini Apiananiri ikamapoxokonitini ìkapani. ³³ Txamari kiki kītanorori xinikari parìkatxi ìkorapokoritikiri, kotxi inirekari ikamapoxokonitiro ìtanoro. ³⁴ Mītanirito, mitxitakaro pakini nirekari oparìkauatini Apiananiri ìkapani, kotxi onirekari oĩto, oxinire pakini osikini iuamoni. Txamari sito kītaniriro xinikari parìkatxi ìkorapokoriti auakari, kotxi onirekari õtaniri okamapoxokonitini. ³⁵ Ikara atoko nisãpiretai hīte, hīte ereka hinini ìkapani. Kona ninirekari nimauiritakani erekari hãpakapini. Ninirekari atãonoka hīkamini. Ninirekari hiparìkauatini Apiananirinoka ìkapani.

³⁶ Ætokoro iri atxiiti !auiritapanikaro oa ìtaniriuatini, txamari oaneẽpeka. Ætokori nirekiniãri itakinoro oa, erekari iua auiritiniri iua. !Ikamari maerekati. Erekari iua auiritinina ninoa ìtaniriuatini. ³⁷ Atxiiti ãtokoro iri ãkixinireẽ !inirekaro oa ìtaniriuatini. Atxiiti !isikaenetaro oa ãtimoni. Iua xinikakiti omītaniriuatakani ìkapani pataparari ininiã, ãkixinireẽ imarotiniãri inireẽkiti oa mītaniriuatakani, ininiã iua kiki kamari erekari. ³⁸ Oa sikakari oĩtaniriuatini ìkapani kamari erekari. Iuaritika oa masikakati oĩtaniriuatini ìkapani kamari apiaerekata.

³⁹ Teoso paniãtakiti iõkatsopatakori paniãtaro sito kaikotini oĩtanirikata iua auapanika inakasaaki. Iua ipininiã, apakata oĩtaniriuatini onirekakitikata. Txamari Apiananiri sãkire auããkarikatanoka apakata oĩtaniriuatini.

⁴⁰ Notamoni oa apia poxokoniuata omītaniriuatakaniã iuaĩkana. Ikara atoko inakari nõtãkikaro sito, kotxi nimarotari Erekari Matamatakoti Teoso nakiti aua notamoni.

8

Nipokori Teoso Kamakori Sikiko

¹ Uatxa nisãpiretai nipokori sikiko teoso kãkiti kamakitimoni. Amakinika aimarotari ikara. Ikara inakari aimarotapeka ate. Kãkiti imaroretxi auniã iuikaua. Apiaerekata kãkiti auni tiraõkitxi, kotxi isikataparatarari kãkiti xinire. ² “Kimaroreno nota” inakari !auari imaroretxi. Kaiãopokori imaroretxi imimarotakiniti aua. ³ Iuaritika kãkiti turetiniãri Teoso, Teoso imarotari iua.

⁴ Maxinikari nipokori teoso kamakorimoni sikakori. Aimarotari teoso kãkiti kamakiti !kakamareri. Aimarotari ãtika Teoso atão inakari aua. ⁵ Aua kãkiti kamakiti. Kãkiti takauãkatari “teoso” itxaua. Kãkiti takauãkatari teoso iaxiti auakani, ìkorapokoriti auakani apaka. Kaiãopokori ikara atoko inakari

teosoakori aua. Kaiãopokori ikara atoko inakari auītetxiakori aua. ⁶ Atemoni ātika Teoso aua. Iua ari iaxitikiri. Iua kamari ikinipoko. Aparīkauata iuanoka ĩkapani. Ātika aãuīte aua, Xesosi Kristo. ĩkini sereti kamakari iua. Iua posotiireē aãuini aua.

⁷ Apanakini !imarotapanikari kãkiti kamakiti teoso minakanuia, kotxi mitxi iteene itotarina teoso kãkiti kamakiti. ĩniniã inikasaakirina nipokori teoso kamakorimoni siãkori, iuãkatarina ikara nipokori teoso atão inakarimoni siãkori. Iuasaaki ninoã uãkatar maerekati ikaminina, kotxi ãkixinireēna liteene imarotarina atão inakari. ⁸ Txamari nipokori !itxikitakaua Teosomoni asini. ĩkara nipokori anikini !imisiritaua. Apaka !ikamari ereka anini.

⁹ Iuaritika erepaniko. ĩnirikiniãri ikara nipokori ĩnikini, ĩxinikariko apanakini Teoso sãkire poiãonoka auĩãkani. Ninoã imarotiniãri ĩte nikiniri ikara nipokori, ĩniniã ninoã apaka nikari, txamari iuasaaki ninoã kamari ãkixinirena manirekakiniti. ¹⁰ Teoso sãkire poiãonoka auĩãkari atamatiniãri Teoso sãkire iteene imarotakari nikiniri nipokori teoso kamakori misãkiretiko aikotiã, isikataparaxiniretari iua apaka nikiniri nipokori teoso kamakorimoni siãkori. ¹¹ ĩniniã pimarore xika, atxiiti pitari Teoso sãkire poiãonoka auĩãkari sari imisiritikomoni. Kristo ipina iua ĩkapani apaka. ¹² ĩkara maerekati ĩtarimoni ĩkamininiã, ĩkarotari ãkixinire. ĩtari ãkixinire ĩkarotakasaaki, ĩkamari maerekati Kristomoni. ¹³ ĩniniã nipokori ĩnikini txikitakiniãri nitari kaminiri maerekati, itixi auapanika inakasaaki kona ĩnikaikari iua nipokori, kotxi kona ĩnirekari nitari kaminiri maerekati.

9

Teoso Iokanatakini Kãkitimoni

¹ Teoso iokanatakiti nitxaua. ĩnireẽkiti niposota nikamini. Naõkitapekari Xesosi Kristo aãuīte. Iparīka nikamakasaaki, ĩte auikari Apiananiri sãkire.

² Atxiiti apanakini !auikari Teoso iokanatakiti ĩniniua. ĩtera auikari Teoso iokanatakiti ĩniniua. ĩtera oerekari Apiananiri iokanatakiti ĩniniua, kotxi ĩte auikari Apiananiri sãkire, nota sãpiretakasaakii ĩte.

³ Kãkiti mauikakaniãri Teoso iokanatakiti ĩniniua, napakapapiretana ninoã ia atoko: ⁴ Apakata atxiiti aãpakapiniri nipokori, iãriã pakini aparīkauatini ĩkapani? ⁵ Apakata atxiiti ate anikiniro ātanoro Teoso sãkire auĩãkaro atekata, apanakini Teoso iokanatakini, Apiananiri itariakori, Petro pakini anikinina ninoã ĩtanoro atokotxikana? ⁶ Atxiiti apakata Panapee, nota pakininoka parīkauatini anikakiti aãpakapini ĩkapani?

⁷ Sotato sikasaaki inenamauatini ĩkapani, iuaka !iamotari anikakitina. Aua atxiiti ova takakari. Ova itakakiti matximakati aua? !Auari. Kona auari kema auīte piratakari ipira tiniã miãtakati.

⁸ ĩkara nisãkire kona kãkiti sãkirenanini. Iua atokotxikana Teoso sãkire. ⁹ Moisesi iõkatsopatapekari Teoso paniãtakiti. Ia atoko itxa:

Kona ĩitxikari kema auīte nama trikopani ikamakasaaki. Hãuiritariko ĩnikini. Teoso turetari kema auīte? Itiretapitikari. ¹⁰ Apiata isãpiretari ikara kãkiti parīkauatakani ĩkapani. ĩniniã takarauatakari takarauata, kotxi ĩnerekari ikiena ĩnikini. ĩenatxi apakari apari ikiena, kotxi ĩnerekari ikiena ĩnikini.

¹¹ Katakakeri takarauatini atokokana, ate takari Teoso sãkire ĩkixinireē. Katakakeri nikari ikiena itakakiti, ĩniniã atxiiti apakata ate apakapiniri ĩenatxi ĩte sikakiti? Kotxi ate parīkauata ĩte ĩkapani. ¹² Apakatininiã apanakini apakapiniri iparīkana ĩki ĩte sikakiti, ĩniniã apiata apakata ate apakapiniri ate parīka ĩki, iuaritika kona aamanaãri ĩsikiniãua ate parīka ĩki. Amĩteenekari ikinipoko, kotxi !anirekari aiotokakiniri Kristo iokanapirena erekari ĩkenakotini. ¹³ ĩmarotari Teoso misãkiretiko aikoti ãki parīkauatakani

iuātaā apakapari ikiena. Teosomoni sikakori takikoōtaā parīkauatakani apaka apakapari ipixini iuaātaā siākori inikinina ikapani. ¹⁴ Iua atokotxikana Apiananiri paniātari iua iokanapirena erekari sâpiretakani apaka apakap-
iniri iparīkana iki.

¹⁵ Ikara atâopitikara, iuaritika kona nipaniātai ikara atoko hīkamini. Kona niōkatsopatari ikara, niparīka iki notamoni hīsikini ikapani. Niparīka iki namanainii apisa erekape nipinini. Niuikari niparīkauatini hīte ikapani hītxineirote nimapakapakanisaaki. ¹⁶ Teoso iokanapirena erekari noereka, iuaritika ! apakata niuikiniua, kotxi Teoso sikari ia parīkatxi notamoni. Nimisiritiko auapitika, Teoso iokanapirena erekari nimasâpiretakaniā. ¹⁷ Teoso iokanapirena erekari nisâpiretiniāri kākiti, nākixinireē iteene ninirekiniāri ikara nikamini, ininiā napakapapitikariko niparīka iki. Nimanirekakaniāri ikara nikamini, iuaritika nikamari, kotxi Teoso sikari ikara parīkatxi notamoni nikamini ikapani. ¹⁸ Ia atoko niīkitxitiko: Teoso iokanapirena erekari nisâpiretakasaaki, kona minakati napakapa. Ikara atoko kamapoxokonitari nākixinire, kotxi maīkitika nisâpiretai Teoso sākire. Teoso iokanapirena erekari sâpiretakari nitxaua, ininiā niposotiire auapitika hīīkitxitinino nota nipaniātiniāi hīte, iuaritika ! ninirekari ikara atoko nikamini nota nireēkiti napakapini ikapani.

Parīkatxi Ikinimane Īkapani

¹⁹ Ninireēkiti nikama. Kākiti nitiri iamotakori !nitxaua. Iuaritika notaka nitxīkitakaua ikinimane nitiri nininiua, Teoso sākire apikomoni kākiti auikini ikapani. ²⁰ Xoteoakori sauaki niparīkauatakasaaki, Xoteo auini atoko nitxa nota auini. Ikara atoko ininiā, Xoteoakori auikari Xesosi sākire. Moisesi paniātakiti iaōka kamakani sauaki nauakasaaki, nino auini atokokana nitxa nota auini, kotxi ninirekari Moisesi sākire auīākani auikiniri Xesosi sākire. ²¹ Xoteo minakanua !imarotari Moisesi paniātakiti. Ininiā ninoakata nauakasaaki, kona nipaniātari Moisesi paniātakiti ikaminina, Xesosi sākire auikini ikapani. Iuaritika nikamari Teoso paniātakiti, kotxi iuatxikana Kristo paniātakiti nikamini. ²² Kākiti mataparaxinirenikata nauakasaaki, nota apaka kona kataparaxinireno, Xesosi sākire auikinina ikapani. Ikinī kākiti sauaki nauakasaaki, nikamari kākiti auini atoko nitxa nota auini, ininiā ikinipoko niposotakiti nikama apanakini maerekani makatxakiko ikapani. ²³ Ikara atoko nikama Teoso iokanapirena erekari nisâpiretini ikapani. Nikamari ikinipoko, Teoso iokanapirena erekari nisâpiretini ikapani. Ikara atoko ininiā, nota apaka apakapari Teoso iokanapirena erekari hītekata.

Saporiēta Apakapari

²⁴ Himarotari mitekaxi. Kākiti miteēkani miteka, iuaritika ātinoka apakapari imitekini iki. Merepitiapanika mitekaxi mapotōkire apokakarino-
noka apakapari imitekini iki. Ininiā miteēkari atoko hītxako. Hīsapitipo. Teoso parīka hīkamapitipo hīparīka iki hāpakapini ikapani. ²⁵ Ikinī miteēkari parīkauatapitipo iīto tapara iteene auini ikapani. ! Auiritari iīto misiritakari. Ikara atoko ikama, saporīēta imitekini iki apakapini ikapani. Ikara saporīēta kona okanani aua. Oxipokapitikako. Ate parīkauatapitipo ātiāo aāpakapakiti aāpakapini ikapani. Ikara aāpakapakiti !ixipoka. ²⁶ Miteēkari isinimoni mimarotakati atoko !nitxaua. Nimarotari nisinimoni. Nisapitipo mitekaxi mapotōkiremoni. Maxikatīka !nineeamauata. Na neena-
mauata nisanōkakata. ²⁷ Nitxīkitakari niīto nitiri ininiua, nota nireēkiti ikamini ikapani, kotxi nisâpiretapakari ikara apanakinimoni, ininiākara kona ninirekari nimapakapaniri notaka parīka iki.

10

Kākiti Isaeokini Aōerekini Pirena

¹ Nota nirekari hīxinikiniri kitxakapirīka, aātokiriakorini takanapakasaakiri Exitō tixini, ikinika ninoa aua katxiāri patapi. Iua katxiāri oerekana isinimonina. Apaka ikinika ninoa napani potxoari uiniti āki. ² Ninoa sari Moisesikata, ininiā katxiāri patapi auakasaakina, potxoari uiniti patapi auakasaakina, iusaaki ninoa patxisatiko atoko aua iusaaki. ³ Ninoa ikinikana nikari xinitxi Teoso iokanatakiti. ⁴ Ninoa ikinikana iātari āparaā Teoso sikakiti. Ninoa iātari āparaā kai auŕteākiriā. Kristo iua kai auŕte āparaā potorikiniātaā atokokana. Iua sari ninoakata. ⁵ Txamari Teoso !apokaerekatari kaiāopokori ninoa, ininiā ipinana. Iitona iarika āparaā makipakaniātaā.

⁶ Uatxa axinikana ninoa, ininiā aimarotari amanirekakaniri maerekati ninoa nirekiniri atoko. ⁷ !Hīteosonetapiri kākiti kamakiti, ninoa apanakini teosonetiniri atokokana, kotxi Teoso sākire iōkatsopatakori txari: Ninoa topāka inipokotinina ikapani, iātinina ikapani, eereka ōkitikauana isarauatīnina ikapani teoso ikamakitinā apisatoō.

⁸ !Apakata aanokarauatini ninoa apanakini anokarauatini atoko, kotxi āti ōtinokara vītxi tres mio ninoa okaāka ikora maerekati xika. ⁹ !Apakata aātamaekerekatiniri Kristo ninoa apanakini kitxakapirīka atamakaekerekatiniri atoko, kotxi iua xika imini okana ninoa. ¹⁰ !Hītsoatape, ninoa apanakini kitxakapirīka tsoatini atokokana, kotxi eereka Teoso nitiri xipokana ninoa.

¹¹ Ikara imisiritikona apoka ninoamoni apanakini pinitiko ikapani. Ikara imisiritikona iōkatsopataāka ate pinitiko ikapani, kotxi itixi mapotōkire ōti apokaāpota. ¹² Hītemoni ereka hinini, ininiā erepaniko, kotxi atxiiti paītiki hīkamari maerekati. ¹³ Hīte atamakaekerekataāka ikinimane atamakaekerekataāka atokotxikana. Iuaritika Teoso !itakanapai hīte. Kona iua auiritari hātamaekerekatiko himamīteenekakiniti. Iusaaki oereka hīmitekini, ininiā hīposotari hīmīteenekiniri.

Teoso Kākiti Kamakiti

¹⁴ Ininiā nitariakori nota tīretakini, hīmitēka teoso kākiti kamakiti hītakanapini. ¹⁵ Hīte kākiti kimarorerini, ininiā iteene himixinikariko nisākire. ¹⁶ Iāriā aātakasaaki, akinika aāpotiitakasaakiua, axinikari Xesosi ipinini. Iusaaki atxari Teoso: “Erekapitukai, kotxi Xesosi arēka xiketa ate ikapani.” Amaxiōpekitakasaakiri komiri, anikasaakiri, āpitiitakasaakiua, axinikari Kristo ito noropatiko ate ikapani. ¹⁷ Iusaaki itomaneua ate, iuaritika ātika komiri atokokana atxaua. Ātika itotxi atokokana atxaua, kotxi amakinika anikari ātika komiri. Ikara komiri Kristo ito atokokana itxaua.

¹⁸ Hīxinikanako kākiti Isaeokini ikorapokoritikini. Ninoa sikari Teoso xinitxi. Eereka ninoa nikari ikara xinitxi. Inikasaakirina ikara xinitxi, iusaaki ninoa oerekari iTeosonetinirina iua. ¹⁹ Kiripa ninireka nisāpiretinii? Nisāpiretari teoso kākiti kamakiti kona kakamareri. Iua teoso siākori kona itxa. ²⁰ Iuaritika erepaniko. Ikara atāo maerekati. Xoteo minakaniua sikakiti teoso kākiti kamakitimoni ninoa sika Satanasi nitirikorimoni. Kona Teoso atāo inakari isikana isiākitina. Ininiā na ninirekari hīte moianatiniri Satanasi nitiriakori. ²¹ Kona hīposotari Apiananiri iākoanaā hiātini, apaka Satanasi nitirini iākoanaā hiātini. Kona hīposotari Apiananiri kiena hinikini, apaka Satanasi nitirini kiena hinikini. ²² Atauako anirekatari akaminiri Teoso naiatinua? Ate tapara apiata atxiiti?

Xesosi Auiākani Kamakiti

²³ Nota posotari ikinipoko ninireēkiti nikamini, txamari kona ikinika erekari nikamini. Ikinipoko ninireēkiti niposotapitika nikamini, txamari kona ikinipoko kamari nākixinire aneini. ²⁴ !Hinitapiriko hiteka nireēkiti hāpakapini. Himoianatariko āti iua nireēkiti apakapini.

²⁵ Hīposotari hinikiniri nipokori amotakoriātaā auakari. Iuasaaki kona hīpimaāpiri: “Ia nipokori sikaākepeka teoso kākiti kamakitimoni?” !hītxapeko. Kōtxi himarotakasaakiri hinikiniri nipokori teoso kākiti kamakitimoni sikiko, hākixinire karotaāka atxiiti. ²⁶ Teoso sākire sāpiretaua:

Itixi Apiananiri nakiti itxaua, ikinika itixi auakani pakini.

²⁷ Xesosi mauākani aiatakasaakii hīte hinipokotini ninoakata, hinirekiniāri hīsa. Hinikariko isikakitina. Kona hīpimaāpiri: “Ia nipokori teoso kākiti kamakiti sikaākepeka?” kona hītxape, hākixinire himakarotakaniri ikapani.

²⁸ Txamari apanakini kākiti iuaā sāpiretakasaakii: “Ia nipokori sikaākepeka teoso kākiti kamakitimoni,” itxa. Iuasaaki kona hinikapiri, kotxi atxiiti hīkaroxiniretari ikara kākiti mataparaxinireti, kotxi:

Itixi Apiananiri nakiti itxaua, ikinika itixi auakani pakini.

²⁹ Na nitxai: “Kona hinikapiri ikara, hiteka ākixinire himakarotakani ikapani,” ! nitxai. Nitxai: “! Hinikapiri ikara, āti kākiti ākixinire himakarotakani ikapani.” Nota ākixinireē nota nireēkiti nikamini ikapani erekari. Āti kākiti ākixinireē nota nirekakiti nikamini ikapani !erekari, ininiā iuamoni ikara nikamakasaaki, nikamari maerekati. Kinirepa !apakata nikaminiri nota ākixinire auiritakiti? ³⁰ Napakapakasaakiri nipokori, ininiā iuasaaki nimisākiretari Teoso erekari isikakiti. Ininiā kinirepa nimisākirepiretaāka?

³¹ Nisāpiretai hīte. Hinikasaaki, hiatakasaaki, ikinipoko hīkamakasaaki, hīkamariko ikinika Teoso ereka inini imarotiko ikapani. ³² Kona hītxikitakapiri, Xoteoakori, Xoteo minakanuia, kākiti Xesosi sākire auīakani pakini kaminiri maerekati. ³³ Ninirekari ikinimane kākiti nireēkiti nikamini, ikinika nikamakasaaki. !Ninirekari erekari notanani ikapani. Ninirekari erekari ito-maneri ikapani, imaerekanina Xesosi makatxakini ikapani.

11

Sitoākini Xesosi Sākire Auīakani

¹ Hīkamariko nota kamakiti atoko inakari. Kristo kamakiti atoko nota kamini atokotxikana hīkamako. ² Nitariakori, peerekai hīte, kotxi iteene hīxinikano nota. Peerekai hīte, kotxi hīkamapanikari noereēkiti nisāpiretakiti iaōka.

³ Ninirekari himarotiniri ia: Kiki auīte Kristo itxaua. Sito auīte kiki itxaua. Kristo auīte Teoso itxaua. ⁴ Ininiā kiki ikii māka imamakatzakakaniā Teoso imisākiretakasaaki, apaka Teoso sākire oerekasaaki, kona ipaxitari iauīte Kristo.

⁵ Sito okii māka mauakaniā Teoso omisākiretakasaaki, apaka Teoso sākire oerekasaaki, kona opaxitari oāuīte oītaniri. Okii māka omatakakaniā, oa kii kixākakori atoko itxa. ⁶ Okii māka omanirekakaniā, ininiā okisauakiiākotaākakako. Opētauiniā, okii kixākiko xika, oiāko kisauakiko xika, ininiā iuasaaki okii māka otaka. ⁷ Kiki misākiretakasaakiri Teoso, kona erekari itakiniri ikii māka, kotxi Teoso atoko itxa iua. Ikamaāka Teoso ereka oerekini ikapani. Sito kamaāka oītaniri ereka oerekini ikapani. ⁸ Merepitanika Teoso kona kamari kiki sito itōā. Teoso kamaro sito kiki itōā. ⁹ Kiki kona kamaāka sito ikapani. Sito kamaāka kiki ikapani. ¹⁰ Ininiā oa takari okii māka. Ikara atoko ininiā, oerekari oauītetiniri oītaniri. Iuasaaki Teoso nitriakori iaxitiki apaka imarotari oauītetiniri oītaniri.

¹¹ Kiki, sito pakini Apiananiri sâkire auikasaaki, sito nirekari kiki. Kiki nirekaro sito. !Apakata sitonoka auiniã. !Apakata kikinoka auiniã. ¹² Kotxi sito ina kiki îtoã. Eereka ikinipoko kiki îponaniã sito îtoã. Ikara atoko itxapitikama, Teoso kamari ikinipoko. ¹³ Hîteka hîxinikapiretari ia: Sito kii mâka mauakaniã, iuasaaki atâokani Teoso omisâkiretini? ¹⁴ Kâkiti itotakiti oerekaua kiki îtanoiãkori pêtatiko. ¹⁵ Sito auiniã oiãko pañtanori, oõuikari oiãko, kotxi oiãko sikaãka okii ipatakari îkapani. ¹⁶ Kâkiti nirekiniãri ineenamauatini iãkotxi pirenã xika, ininiã kona ate, ikinika Teoso sâkire auiãkani pakini !auari ikara. Ininiã !apaniãtai ikara atoko inakari hîkamini.

Xesosi Ipinini Xinikiko Kiiniriti

¹⁷ Uatxa niõkatsopatakitiã kona niuikai, kotxi hãpotiitakasaakia, apia erekari kona hîkama. Apiata maerekati hîkama. ¹⁸ Merepanika nikenakopiretari hãpotiitakasaakia Teoso misâkiretiko aikotiã hitaparakienatakakiniua. Nixinikari ipixini ikara nikenakopiretakiti atão inini. ¹⁹ Apanakini oerekakiti atão minakiti auapitika hîte sauaki. Akenakotakasaakiri ninoã oerekakiti, aimarotari Teoso !apokaerekatana ninoã. Iua apokaerekatana iua sâkire atão inakari oerekakani. ²⁰ Hãpotiitakasaakia, kona atão hîkamari kiiniri, Apiananiri ipinini xinikiko kiiniriti. ²¹ Kotxi hinikasaaki, himixirikari hîkiena apanakini nikiniri apisapanika. Ininiã apanakini natxita, apanakini poãta iuasaaki. ²² Auapitika haãpoko hinikini îkapani, hiãtini îkapani. Hãpotiitakasaakia, homanatarari apanakini Xesosi sâkire auiãkani. Hîkamapêtatarari aitariakori matiini. Kiripa nitxai hîte? Atxiiti hinirekari niuikini? Kona xatiki niuikai hîte.

²³ Apiananiri sãpiretakiti notamoni, iua atoktxikana nisãpiretapekai hîte. Ia nisãpiretai: Îkanõka Apiananiri Xesosi mîkapiritiko õtisaaki, iua kosekari komiri. ²⁴ Iuasaaki imisâkiretari Teoso: “Erekapitikari ia komiri psikakiti atemoni,” itxa. Iposo atoko imaxiõpekarari iua komiri, sika itxari imoianari-akorimoni. Itxana: “Apakapa, nika hîtxako. Ia niõto okaãka hîte îkapani. Ia komiri hinikasaaki, hîxinikanoko nota. Hîxinikari nipinini hîte îkapani,” itxa. ²⁵ Ninoã nipokotaka atoko, mitxi komiri ikosekini atokokana, ikosekari iãkoanatxi. Iuasaaki itxana: “Ia iãkoanatxi oerekari Teoso kamapekarari ikamaenetakiti amaneri, kotxi niarêka xiketa hîte îkapani. Ia iãriã hiãtakasaaki, hîxinikanoko nota. Hîxinikariko nipinini hîte îkapani,” itxa Xesosi.

²⁶ Ia komiri hinikasaaki, ia iãkoanatxiãkiri hiãtakasaaki, hõerekari Apiananiri ipinini kãkiti îkapani. Ikara hõerekiniiritika iua îkorapokoriti kanapiriãko.

²⁷ Maxikatîlka kãkiti nikiniãri ia komiri, maxikatîlka iãtiniãri Apiananiri iãkoanaãkiri, ikamari maerekati, kotxi ! ipaxitari Apiananiri îto, iarêka pakini. ²⁸ Ia komiri hinikini apisapanika, ia iãkoanatxiãkiri hiãtini apisapanika, erekari hîxinikiniri hãkixiniãreã auakari. Maerekati auakasaaki, hamanaãri Teoso imakatzakiniri îkapani. Eereka ia komiri hinika, ia iãriã hiãta. ²⁹ Maxikatîlka hinikiniãri, hiãtiniãri, ininiã hîteka akiritari himisiritiko apokini, kotxi kona hîpaxitari Apiananiri îto. ³⁰ Ikara xika itomaneri hîte sauaki iõkapeta. Ikara xika apanakini amianata. Ikara xika apanakini ipipeka.

³¹ Amaerekani anitiniã, aamananiãri Teoso makatzakiniri amaerekani, ininiã amisiritiko kona apoka. ³² Txamari Apiananiri apokiniãri amaerekani, imisiritaua ate uatxa, amaerekani atakanapini îkapani, ininiã eereka !imisiritauakaua iua sâkire mauiãkanikata.

³³ Ininiã nitariakori, hãpotiitakasaakia Xesosi ipinini xinikiko kiiniriti îkapani, hiãtapana apanakini. ³⁴ Hinatxitiniã, hinipokotako hãpoko. Ininiã

hãpotiitakasaakiaua !hĩkamari maerekati, ininiã Teoso !imisiritai. Apikomoni nõtãkikai ereẽ napokasaaki.

12

Erekari Matamatakoti Sikakiti Kãkitimoni

¹ Nitariakori, ninirekari himarotiniiri Erekari Matamatakoti sikakiti. ! Apakata himimarotakaniri. ² Mitxi Xesosi sãkire mauuiãkani hinakasaakiaua, himisirienetaãka, ininiã hãuikari teoso kamakori masãkireti teoso atão inakari ininiua. Ikara himarotape. ³ Kãkiti sãpiretiniã hĩte: “Maerekati kamakari itxaua Xesosi,” ininiã iusaaki himarotari Erekari Matamatakoti ! auari iuamoni. Kãkiti sãpiretiniã hĩte: “Apiananiri itxaua Xesosi,” ininiã iusaaki himarotari Erekari Matamatakoti auapitika iuamoni, kotxi ikara iua oerekakiti.

⁴ Erekari Matamatakoti siãkiti ikini sereti aua, iuaritika Erekari Matamatakoti ãtinoka aua. ⁵ Ikini sereti parĩkatxi Teoso ikapani aua, iuaritika Apiananiri ãtinoka aua. ⁶ Ikini sereti Teoso kamakiti aua kãkiti ikapani, iuaritika Teoso ãtinoka aua.

⁷ Erekari Matamatakoti iuaka oerekaua kãkitimoni, ikinimane ereka inini ikapani. ⁸ Iua Erekari Matamatakoti sikari apanakinimoni isãkire kiĩkiterini ininiuana ikapani. Iua Erekari Matamatakoti sikari apanakinimoni isãkire kimarorerini ininiuana ikapani. ⁹ Iua sikari apanakinimoni Teoso sãkire iteene auikinina ikapani. Isikari apanakinimoni amianatakani imakaninitinina ikapani. Erekari Matamatakoti ãtinoka aua, iuaritika ikini sereti isika kãkitimoni. ¹⁰ Apanakini isikaposotiireta posotiretxi ikaminina ikapani. Apanakini isikaimaroreta Teoso sãkire isãpiretinina ikapani. Apanakini isikaimaroreta Erekari Matamatakoti sãkirauatakasaaki imarotininina ikapani, maerekati matamatakoti sãkirauatakasaaki imarotininina ikapani apaka. Apanakini isikaimaroreta ikini sereti kãkiti sãkire isãkiretinina. Apanakini isikaimaroreta ikara sãkiretxi mimarotakoti ikenakotakasaakina, isãpiretinirina iua kenakotakani ninoa sãkireẽ ninoa apaka imarotiniiri ikapani. ¹¹ ãtinoka Erekari Matamatakoti aua. Iuanokara parĩkauata ikara atoko. Isikari ikara isikakiti kãkitimoni inireẽkiti iaõka.

Kristo Ìto Pirena

¹² Kãkiti Ìto ãtinoka aua, iuaritika aua ikii, ikanoke, iuako, itapike, ikiti, txaãpota. Itori ikara atoko inakari aua Ìtotxiã, iuaritika ãtinoka Ìtotxi aua. Iua atokokana itxa Kristo Ìto. Xesosi sãkire auĩãkani Kristo Ìto atoko itxauana. ¹³ Atxiĩti Xoteoakori atxaua. Atxiĩti Xoteo minakanuia atxaua. Atxiĩti nitiritxi amotakoni atxaua. Atxiĩti nitiritxi minakatiua atxaua. Iuaritika ãtika Ìtotxi atoko atxaua, kotxi Erekari Matamatakoti ãtinoka inakari apoka atemoni. Iua apotiitaua ãtika Ìtotxi atoko anini ikapani. Iua aua aãkixinireẽ.

¹⁴ Kãkiti Ìto ãtinoka aua, iuaritika aua ikii, ikanoke, iuako, itapike, ikiti, txaãpota. Ìtotxiã kaiãopokori aua. ¹⁵ Ininiã !apakata kitĩtxi sãpiretiniã: “Uakõtxi !nitxaua, ininiã Ìtotxiã auakari !nitxaua.” Ikara atoko isãpiretiniã, iuaritika Ìtotxiã auakaripitikara kitĩtxi. ¹⁶ Kenakokitxi sãpiretiniãri: “Okĩtxi !nitxaua, ininiã Ìtotxiã auakari !nitxaua.” Ikara atoko isãpiretiniã, iuaritika Ìtotxiã auakaripitikara kenakokitxi. ¹⁷ Ìtotxi okĩtxinoka auiniã, kanatokopa itxa kãkiti kenakorauatini? Ìtotxi kenakokitxinoka auiniã, kanatokopa itxa kãkiti imixikarauatini? ¹⁸ Teoso kamari ikinika Ìtotxiã auakari. Iua inireẽkiti iaõka ikaminana ninoa. ¹⁹ ãtinoka Ìtotxi auakiti auiniã, Ìtotxi ! auari. ²⁰ Ìtotxiã auakani itori aua, iuaritika Ìtotxi ãtinoka aua.

²¹ Okĩtxi kona posotari isãpiretiniiri uakõtxi: “Kona nota nirekai pite.” Apaka kiĩtxi kona posotari isãpiretiniiri kitĩtxi: “Kona nota nirekai pite.” ²² Kona

ikara atoko itxa. Atxiīti auākatarī āti aīto auakari !itxa, kotxi !kataparari, iuaritika ikara mauakaniā, aīto !iparīkauata atāo. ²³ Kākiti tīretari iītoā auakari poiāori kākiti atamatakiti. Ipatari apanakini iītoā auakari kākiti matamatakani īkapani. ²⁴ Aītoā auakari apiata apotxitakiti aua apaka. Kona apatarī ikara. Apanakini aītoā auakari Teoso takari aītoā iteene apaxitini īkapani. ²⁵ Ininiā Teoso kamarī ītotxi ātinoka inini. Ikamarī ītotxiā auakani itīretakiniuana īkapani. Apanakini ītotxiā auakari naiatiniāri apanakini iītoā auakari, !apakata. ²⁶ Āti ītotxiā auakari tsiīka. Iuasaaki ikinika kākiti īto atatsiirauata. Āti ītotxiā auakari iuikaāka, ininiā ikinika ītotxi auakini poxokoniuaata.

²⁷ Kristo īto atoko hītxaua hīte. Ītotxiā auakani atoko hītxaua Kristo iītoā. ²⁸ Teoso sākire auīākani ītotxiā auakani atoko itxauana. Ikinī sereti parīkatxi aua ītotxi īkapani akamini īkapani. Merepanika Teoso mereēri iua iokanatakini. Eereka imereēri kākiti Teoso sākire sāpiretakani. Eereka imereēri kākiti Teoso sākire oereēkani. Eereka imereēri kākiti Teoso posotiire oereēkani, amianatakani makananitakani, kākiti moianatakani, auītetxiakori, kākiti sākire apanakini mīmarotakinīti sākiretakani pakini. Teoso takari ikara atoko inakani parīkauatakani iua sākire auīākani imoianatinina īkapani. ²⁹ Kona ikinimaneni Teoso iokanatakini txaua. Kona ikinimaneni Teoso sākire sāpiretakani txaua. Kona ikinimaneni Teoso posotiire oereēkani txaua. ³⁰ Kona ikinimaneni amianatakani makananitakani txaua. Kona ikinimaneni imarotari isākiretiniri kākiti sākire apanakini mīmarotakinīti. Ikinimane liposotari isāpiretiniri ikara sākiretxi iua kenakotakanimoni ninoā sākireē ninoā apaka imarotini īkapani. ³¹ Auapitika ikara Erekarī Matamatakoti sikakiti aparīkauatini īkapani. Iuaritika hinirekariko isikakiti apiaerekatakari. Uatxa noerekaiko isikakiti apiaerekatakari.

13

Tiraōkitxi Pirena

¹ Atxiīti nīmarotarī ikinī uāka sākire nisākiretini. Atxiīti nīmarotarī Teoso nītiriakori iaxitiki sākire nisākiretini, txamari iuasaaki nītiraōkiuatini ! auari, ininiā ! apakata nīmarore. Metao āsokiko ene atoko nītxa. Ipi panera tore āsokiko ene atoko nītxa. ² Atxiīti nīmarotarī Teoso sākire nisāpiretini. Atxiīti nīmarotarī ikinīpoko apanakini mīmarotakinīti. Atxiīti ikinīpoko imaroretxi aua notamoni. Atxiīti iteene nauikari Teoso posotiire, ininiā nīposotarī ōtanoxiratarī nīpaniātini ātiātaā isini. Txamari iuasaaki nītiraōkiuatini ! auari, ininiā minakati nītxaua. ³ Atxiīti nisikari ikinīpoko nīti, nītxineirote pakini matxineirotenimoni. Atxiīti nauiritari nīto arikiko. Txamari iuasaaki nītiraōkiuatini ! auari, ininiā !apakata.

⁴ Pītiraōkiuatakasaaki, pīposotarī piātapiniri pīnīrekakiti apokini. Pītiraōkiuatakasaaki, pīkamari erekari ātimoni. Pītiraōkiuatakasaaki, kona pīxikotarī āti. Pītiraōkiuatakasaaki, kona pīsāpiretarī apanakini pīuīkiniri pīkamakiti. Pītiraōkiuatakasaaki, !pīuīkaua. ⁵ Pītiraōkiuatakasaaki, kona pītxīkitakarī āti pētauatini. Pītiraōkiuatakasaaki, kona pīnīrekari pīteka nīreēkitinani. Pītiraōkiuatakasaaki, !katimari pomanākarauatini. Pītiraōkiuatakasaaki, !pīxinīkapinikari maerekati apanakini kamakiti pītemoni. ⁶ Pītiraōkiuatakasaaki, kona pīpoxokoniuaata āti kamakasaakiri maerekati. Pītiraōkiuatakasaaki, pīpoxokoniuaata atāo inakari pīkenakotakasaaki. ⁷ Pītiraōkiuatakasaaki, pīmīteenekari ikinīpoko. Pītiraōkiuatakasaaki, pauikari kākiti sākire. Pītiraōkiuatakasaaki, !katimari pītakanapiniri pīparīka pīkamini. ⁸ Tiraōkitxi !ixipoka. Txamari kākiti sāpiretakiti xīpokapitīkako. Kākiti sākiretiniri āti uāka sākire

xipokapitikako. Kākiti imarore ereēkokapitikako. ⁹ Kotxi poiāonoka aimarore. Poiāonoka Teoso sākire aimarota asāpiretini. ¹⁰ Āti ōti aimarotari ikinipoko atāo inakari. Iuasaaki atāo minakati !auaika. ¹¹ Amarini ninakasaakiaua, nisākirauata amarini sākirauatini atokokana. Iuasaaki nimarotakiti amarini imarotakiti atoko itxa. Nixinakakiti amarini xinikakiti atoko itxa iuasaaki. Txamari kikipie ninakasaakiaua, !niniakakari amarini atokokana nininiua. ¹² Uatxa aātamatakiti Teoso oerekakiti !aposota iteene aātamatini. Ātakaāri katxikoroā atamatakori atoko itxa aātamatakiti, Teoso oerekakiti. Āti ōti Teoso apisatoō aāpoka. Uatxa poiāonoka nimarota. Āti ōti Teoso apisatoō aāpokasaaki, nimarotari ikinipoko, Teoso imarotinino atokokana.

¹³ Ininiā aua ipi āti pakini erekari aākixinireē auakari. Aua Teoso sākire auikiko. Aua Teoso kamaenetakiti ikamini auikiko. Aua tiraōkitxi. Ikara tiraōkitxi apiaerekatakari.

14

Erekari Matamatakoti Siākiti

¹ Ininiā ikiniōtika hītiraōkiuatako. Hinirekariko Erekari Matamatakoti siākiti. Apiata hinirekariko iua sikini Teoso iokanapirena hīsāpiretini.

² Kākiti sākire mimarotakoti sākiretakari misākiretari Teoso. !Imisākiretari kākiti, kotxi kākiti !imarotari isākire. Erekari Matamatakoti posotiireē isāpiretari atāo inakari Teoso oerekakiti. ³ Teoso sākire sāpiretakaripekana misākiretari kākiti. Iua txīkitakari kākiti apiata auikiniri Teoso sākire. Isikat- aparaxiniretana ninoa. Imīkapiritari ninoa ākixinire. ⁴ Kākiti sākire mimarotakoti sākiretakari, iuaka txīkitakaua apiata auikiniri Teoso sākire. Teoso sākire sāpiretakaripekana, txīkitakari ikinika Xesosi sākire auīākani apiata auikinirina Teoso sākire. ⁵ Erekari hīte hīkinika sākiretiniri kākiti sākire mimarotakoti. Iuaritika apiaerekata hīsāpiretiniri Teoso sākire, kotxi Teoso sākire sāpiretakari apiari itxaua. Kākiti sākire mimarotakoti sākiretakari poiāori itxaua. Iua sāpiretiniāri isākire kenakotakani ninoa sākireē ninoa apaka imarotiniri ikapani, iuasaaki erekari, kotxi iuasaaki itxīkitakari Xesosi sākire auīākani apiata auikiniri Teoso sākire. ⁶ Hītemoni napokasaaki, nisākiretiniāri kākiti sākire mimarotakoti, nixīkitakatai hīte apiata hāuikiniri Teoso sākire? Konapitini. Ininiā kona itxa. Noerekiniāi Teoso oereēkiti notamoni, nisāpiretiniāi Teoso imarore, nisāpiretiniāi Teoso sākire, noerekiniāi Teoso sākire atāo hāuikini ikapani, iuasaaki nixīkitakatai hīte apiata hāuikiniri Teoso sākire. ⁷ Maxinikari xikari moanatakari atxīti viorāo, atxīti xōkakori pakini. Kākiti mimaritireni kaminiāri ikara, iuasaaki xikari atāo inakari !imarotaāka. Ienenoka aua.

⁸ Ātipekana noerekai. Trōpetā ene atāo ininiā, sotatoakori kenakotakasaakiri, aiamatana inenamauatini ikapani. Trōpetā ene na atāo ininiā, sotatoakori !imarotari neenamati manapīpe inini.

⁹ Iua atokokana kākiti sākire imarotakiti himasākiretakaniā, kiriāpa ninoa imarotari hīsāpiretakiti? Ikara atoko hīsākiraatiniā, maxikatīka hīsākirauata.

¹⁰ Itori uākati sākire aua ikini itixiti. Apakata ikinika imarotiko. ¹¹ Kākiti sākire nimimarotakaniā, ininiā notamoni iua āti tixinikiri atoko itxa. Apaka iuamoni nota āti tixinikiri atoko itxa. ¹² Hīte iteene nirekari Erekari Matamatakoti siākiti hāpakapini, ininiā apiata hinirekariko isikini isikakiti Teoso sākire auīākani iua sākire iteene auikinina ikapani.

¹³ Ikara atoko ininiā, erekari kākiti sākire mimarotakoti sākiretakari amanainiri Teoso isikaimaroretiniri iua sāpiretiniri isākire kenakotakani ninoa sākireē ninoa apaka imarotiniri ikapani. ¹⁴ Teoso nimisākiretiniā kākiti

sākire mimarotakotiā, nixinire misākiretari Teoso, txamari !nimarotari no-taka sākire. ¹⁵ Ininiā kipa atāo nikamini? Ia atāo: Nimisākiretari Teoso nixinireē. Apaka nimisākiretari Teoso niikiteē. Nixikarauata nixinireē. Apaka nixikarauata niikiteē. ¹⁶ Kākiti sākire mimarotakotiā hīsāpiretiniāri Teoso ereka inini, kākiti ereē pisākire mimarotakani sauaki, ! iposotari “atāopitikara” inini, kotxi !imarotari pisāpiretakiti. ¹⁷ Atxiiti atāo hīsāpiretiniri Teoso ereka inini, txamari iuasaaki kona pitxikitakari iua kākiti apiata aukiniri Teoso sākire.

¹⁸ Peerekari Teoso, kotxi apiata isikaimaroretano nota nimisākiretiniri iua kākiti sākire mimarotakotiā. Poiāonoka hīte imarotari kākiti sākire mimarotakotiā himisākiretiniri iua. ¹⁹ Iuaritika, Xesosi sākire auīākanikata nauakasaaki, apiarekata nisāpiretinina sikonoka sākiretxi ninoaka sākireē, kotxi apakata ninoa imarotini nisākire. Niposotiniāri siko mio sākiretxi kākiti sākire mimarotakotiā nisāpiretiniri kākiti, itori nisākire, iuaritika maxikatīka nisākirauata, kotxi kākiti !imarotari.

²⁰ Nitariakori, !apakata himarore amarini xapitikiri imarore atokokana inini. Iuaritika amarini xapitikiri makamakaniri maerekati ātimoni, iua atokotxikana amarini xapitikiri atoko ! hīkamapiri maerekati ātimoni. Aneēkari imarore atoko itxako hīte imarore. ²¹ Teoso sākire iōkatsopatakori txari:

Niokanatarī āti uāka hītemoni, hīte nimisākiretini ikapani. Āti tixinikini sākireē nimisākiretai hīte. Iuaritika kona hīkīpitari nisākire, itxa Apiananiri.

²² Ininiā Teoso sākire auīākari sākiretiniāri Teoso sākire mauīākani sākire, iua mimarotakiniti, Teoso sākire mauīākani iuasaaki imarotari Teoso posotiire. Teoso sākire auīākari sāpiretiniāri Teoso sākire apanakini Teoso sākire auīākanimoni, ninoa iuasaaki imarotari Teoso posotiire. ²³ Teoso sākire auīākani apotiitiniāua, ikinimane sākiretiniāri kākiti sākire mimarotakotinani, iuasaaki kākiti Teoso sākire poiāopanika imarotakari ĩroiniā, Teoso sākire mauīākati atxiiti ĩroiniā, ininiā iua uākatai hīte mapitxiritakani hininiua.

²⁴ Txamari ikinimane sāpiretiniāri Teoso sākire iuasaaki, Teoso sākire mauīākati ĩroiniā, kākiti Teoso sākire poiāopanika imarotakari ĩroiniā, ininiā iua imarotari maerekati kamakari ininiua. Iuasaaki imarotari imisiritiko auapitika āti ōti. ²⁵ Iuasaaki ikinimane imarotari iua xinikakiti ākixinireē. Ininiā iuasaaki ikapotoreēkaua Teoso apisatoō. Itxari: “Atāopitikara Teoso aua hīte sauaki,” itxa.

Kākiti Apotiitakasaakia Teoso Apisatoō

²⁶ Nitariakori, kanatokopa itxa Teoso sākire auīākani apotiitakasaakia? Aāpotiitakasaakia, akinika aminari xikari Teoso ikapani. Akinika iposope Teoso sākire aōerekini atāo aimarotini ikapani. Akinika iposope Teoso oerekakiti asāpiretini. Akinika iposope kākiti sākire mimarotakoti asākiretini. Akinika iposope iua sāpiretakiti asāpiretini ikinimane imarotini ikapani. Ikara atoko itxa aāpotiitakasaakia Teoso apisatoō. Iuasaaki makamari ikinika, Teoso sākire Teoso nakitiakori apiata aukini ikapani. ²⁷ Iuasaaki kākiti sākiretiniāri kākiti sākire mimarotakoti, ipinoka kākiti kamari ikara atoko inakari, atxiiti ipi āti pakini kamari ikara atoko inakari. !Apakata apikomoni kākiti sākiretiniri kākiti sākire mimarotakoti iuasaaki. Āti sākirauatakasaaki, apanakini kenakotari. Ātinoka sākirauata iuasaaki. Isākirauataka atoko, āti sāpiretari isāpiretakiti isākire mimarotakani sākireē, isāpiretakiti imarotinina ikapani. ²⁸ Iuasaaki isākire sāpiretakari mauakanā, ! apakata kākiti sākire mimarotakoti sākiretakari sākirauatini. Erekarī ākixinireē isākirauatini Teosokata.

²⁹ Kâkiti apotiitakasaakiua Teoso apisatoõ, iuasaaki ipi, atxiiti ipi âti pakini Teoso sâkire sâpiretakani sâpiretariko Teoso sâkire. Iuasaaki apanakini xinikariko iua sâpiretakiti, atão inini imarotini ïkapani. ³⁰ Topâkakari xinikasaakiri apikomoni Teoso oerekakiti, ininiã iuasaaki sâkirauatakari iotoka, Teoso oerekakiti topâkakari sâpiretini ïkapani. ³¹ Ikara atoko ininiã ikinimane posotari Teoso sâkire isâpiretinina. Teoso sâkire sâpiretakani âti sâkirauata, eereka âti sâkirauata. Ikara atoko itxaãpotana. Ininiã ikinimane oerekaãkako. Ikinimane sikataparaxiniretaãkako. ³² Teoso sâkire sâpiretakani posotari iãtapiniri Teoso oerekakiti isâpiretini ïkapani. ³³ Kotxi Teoso kona potxtitari ienenoka auini. !Apakata kaiãopokori sâkirauatini, kotxi apanakini !imarotari ninoa sâpiretakiti. Neenamatzî atoko itxa. Teoso nirekari inakitiakori kamakiti atão inini apotiitakasaakiuana iua apisatoõ.

³⁴ ! Apakata sito sâkirauatini hãpotiitakasaakiua Teoso apisatoõ. ! Auiritaãka osâkirauatini iuasaaki, kotxi Teoso sâkire iõkatsopatakori paniãtaro sito kaminiri kiki paniãtakiti. ³⁵ Ninoa nirekiniãri ipimarauatinina imimarotakinini imarotinina ïkapani, ininiã ninoa pimaãna ïtanirina aapokona apokasaakina. Sito sâkirauatiniã kâkiti apotiitakasaakiua Teoso apisatoõ, kâkiti pëtauata oa sâkirauatini xika.

³⁶ Hite kona apokaerekatari nisâpiretakiti? Atxiiti hite kamari Teoso sâkire? Konapitini. Atxiiti Teoso sâkire iõkanataãka hitenanimoni? Konapitini.

³⁷ Teoso sâkire sâpiretakani hininiãua, Erekari Matamatakoti siãkiti auiniãi, ininiã iuasaaki himarotari ikara nisâkire niõkatsopatakiti Apiananiri paniãtakiti inini. Hîsâpiretariko hãuikiniri ikara. ³⁸ Himamaãkatakaniãri ikara nisâkire, apanakini !imaãkatari hite sâkire.

³⁹ Ininiã nitariakori, iteene hinirekariko Teoso sâkire hîsâpiretini. Apaka hãuiritariko kâkiti sâkire mimarotakoti sâkiretiko. ⁴⁰ Ininiã hîkamariko ikinika atão hãpotiitakasaakiua Teoso apisatoõ, Teoso sâkire ikinimane kenakotini ïkapani.

15

Xesosi Ôkitikiniua Pirena

¹ Nitariakori, uatxa iuaikana ninirekari hite xinikiniri Teoso iokanapirena erekari hitemoni nisâpiretakiti. Hite apakapapekari ikara nisâpiretakiti. Hite iteene auikari ikara. ² Ikara Teoso iokanapirena erekari oerekai himaerekani makatzakiko. Ininiã atão hîxinikariko ikara nisâpiretakiti. Iteene hãuikiniãri Teoso iokanapirena erekari, himaerekani makatzakaãka. Atão minakati hãuikiniã, ininiã maxikatîika hãuikari.

³ Nisâpiretipekai mitxi nota apakapakiti, kotxi ia himimarotakaniã ! apakata. Ia napakapakiti: Kristo ipina amaerekani imakatzakini ïkapani. Teoso sâkire iõkatsopatakori sâpiretaua ikara. ⁴ Eereka ikataãka. Ipi ôti, âti ôtisaaki iuaikana ôkitikaua. Teoso sâkire iõkatsopatakori sâpiretaua ikara. ⁵ Eereka Petro atamatari iua. Eereka ikinika Kristo moianariakori atamatari iua. ⁶ Eereka kiëtosi aitariakori atamatari iua âti ôti apotiitakasaakiuana. Kaiãopanikani ninoa auapanika. Âtikaka ipîpe. ⁷ Eereka Txiako atamatari iua. Eereka ikinika Xesosi iokanatakini atamatari iua. ⁸ Imapotõkire nota apaka atamatari iua. !Natamatari Xesosi ïkorapokoriti ïtipokotakasaaki. Eereka iua apoka notamoni.

⁹ Xesosi iokanatakiti poiãori nitxaua. Apanakini iua iokanatakini apiata. Mitxi !erekari nikamakiti, kotxi nimisiritana Xesosi sâkire auiaãkani Teoso nakitiakori, iuaritika Xesosi akiritano iua iokanatakiti nininiua. ¹⁰ Teoso sikari ikinipoko erekari notamoni, ininiãkara iua iokanatakiti kâkitimoni nitxaua. Kona maxikatîikani isikari ikinipoko erekari notamoni, kotxi

iteene nīparīkauata Teoso īkapani. Apanakini Xesosi iokanatakini iteene parīkauata, iuaritika nota parīkauata apiata. Kona nota posotiireēni nīparīkauata. Ikinipoko erekari Teoso sikakiti notamoni sikaposotiiretano nota nīparīkauatini īkapani. ¹¹ Atxiīti nota sāpiretai ikara Kristo sāpiretakiti. Atxiīti apanakini iua iokanatakini sāpiretai. Ikara Kristo sāpiretakiti ate sāpiretai. Ikara Kristo sāpiretakiti hīte auika.

Ipīkani Ōkitikiko Pirena

¹² Ate sāpiretai Kristo iuaīkana ōkitikiniua. Ininiā kinirepa ātikaka hīte txari ia? “! Auari ipīkani iuaīkana ōkitikiniua,” hītxa. ¹³ Ipīkani iuaīkana ōkitikiniua mauakaniā, ininiā Kristo apaka kona ōkitikaua. ¹⁴ Kristo mōkitikakaniāua, ininiā maxikatīka asāpiretai iua sākire. Kristo mōkitikakaniāua, maxikatīka hāuikari iua sākire. ¹⁵ Kristo mōkitikakaniāua, na atāo asāpiretai Teoso kamakiti, kotxi ate sāpiretapekai iua ōkitikiniri Kristo. Ipīkani iuaīkana ōkitikiko mauakaniā, Teoso kona ōkitikari Kristo. ¹⁶ Kotxi ipīkani iuaīkana mōkitikakaniāua, Kristo apaka kona ōkitikaua. ¹⁷ Kristo iuaīkana mōkitikakaniāua, maxikatīka hāuikari iua sākire, kotxi limakatxakari himaerekani. ¹⁸ Kristo iuaīkana mōkitikakaniāua, ipīkani iua sākire auiaākani pīpinanaka. ¹⁹ Xesosi mōkitikakaniāua, iuaritika ikiniōtika ate auikari iua sākire īkorapokoriti aāuakasaaki, ininiā mūkiteni apiarini atxaua ate.

²⁰ Ikara na atāo. Uatxa maxinikari atāo inakari. Kristo ipīkaripeka ōkitikapeēkaika. Iua amātiri merepitipanika auakari atoko itxa. Iua merepanika ōkitikaua, ininiākara aimarotari apīkasaaki ate apaka ōkitikaua. ²¹ Āti kiki kamakitiā ipīkitxi apoka ikinimanemoni. Iua atokokana āti kiki kamakitiā, ipīkani ōkitikiko apoka. ²² Adāo kamakitiā ikinimane ipina. Kristo kamakitiā iua sākire auiaākani auapininiika ātipirika. ²³ Kākiti ōkitikaāka ia atoko. Kristo mitxi ōkitikaua. Iua merepanika ōkitikakariua. Ikanapiriākasaaki iua nakitiakori ōkitikauako apaka. ²⁴ Eereka itixi xipokaāka. Iuasaaki ikinika auītetxi maerekati, ikinika kaposotiireri maerekati pakini ixipokako. Eereka ikinika iua nakitiakori isika iri Teosomoni. ²⁵ Kristo ikinimane auite itxauako. Iuasaaki ixipokari ikinika imokaiakari posotiire, kotxi ikiti patapi itakana ninoa. ²⁶ Imokaiakari atoko itxa ipīkitxi. Imokaiakariakori ixipokasaaki, imapotōkire ixipokari ipīkitxi. ²⁷ Teoso sākire iōkatsopatakori txari:

Teoso takapekari ikinika iua kiti patapi.

Ikara Teoso sākireē “ikinika” aua, iuaritika aimarotari iuaka itakaua Xesosi kiti patapi, kotxi Teosora txīkitakari Xesosi ikinimane auite ininiua. ²⁸ Kristo ikinimane auite inakasaakiua, iua Teoso ākiri auītetariko Teoso, kotxi mitxi Teoso txīkitakari iua ikinimane auite ininiua. Iuasaaki Teosonoka ikinimane auite itxaua.

²⁹ Ipīkani mōkitikakaniāua, kinirepa apanakini patxisataāka ipīkani ōkitikiniua īkapani? ³⁰ Atepekana, ipīkani mōkitikakaniāua, kinirepa ikiniōtika amūteenekari monōkori? ³¹ Nitariakori, nīmarotari ipīkitxi monōkori ikiniōtika. Ikara nisāpiretai, kotxi niuikai hīte. Niuikari aāuini aāuīte Kristo Xesosikata. ³² Uai Épeso sitatxitiā kākiti ākiti kaneenamari atoko inakani nirekari imaikinino nota. Ipīkani mōkitikakaniāua, kinirepa nimūteenekari ikara atoko inakari? Ipīkani mōkitikakaniāua, ininiā atxari: Manipokota, maiāta, kotxi katana apinako.

³³ Kona hāuiritapiri āti misirienetini. Kākiti erekari moianatiniāri maerekati kamakani, ninoa txīkitakari iua maerekati kamakari ininiua. ³⁴ Himerekako. Himarotariko atāo inakari hīkamini īkapani. Maerekati! hīkamapinikako. Hīpētatauko, kotxi apanakini hīte limarotari Teoso.

Kâkiti Îto Ôkitikasaakia

³⁵ Atxiîti âti txari: “Kanatokopa itxa kâkiti ôkitikiko? Iuasaaki kanatokopa inakaripa iïto?” itxa. ³⁶ !Kîikiteri kâkiti pimarauatini ikara atoko. Takariki, pimatakaniâri kipatxi âki ! ipitxaka. ³⁷ Pitakarauatakasaaki, pitakari okinoka, atxiîti triko, atxiîti kimi. Takari aneêkari kona pitaka. Kona takariki atokoni itxa takari ipitxakasaaki. Ipitxere ipinimoni. ³⁸ Teoso kamari takari pitxere inireêkiti iaôka. Ikini takariki Teoso sikari ipitxere. ³⁹ Âti xinitxi kona âti xinitxi atokoni. Aua kâkiti xini. Kaxipirini xini ipinimoni itxa. Kotipiriki xini ipinimoni itxa. Ximaki xini ipinimoni itxa.

⁴⁰ Aua iaxiti apiko nopinixiti auakani, aua itixi takote auakani apaka. Peereri ikinipoko, iuaritika iaxiti apiko nopinixiti auakani ipinimoni, itixi takote auakani ipinimoni. ⁴¹ Peereri atokatxi. Peereri kasiri apaka, txamari kasiri âtiâo. Peereri iôriki apaka, txamari iôriki âtiâo. Apaka âti iôriki âti iôriki atokotxikana !auiari.

⁴² Iua atokokana itxa ipîkani iuaîkana ôkitikikosaaki. Îtotxi ixiti taâkori ! auaika. Iua ôkitikakori kona ipinaika. ⁴³ Îtotxi katikosaaki, ! erekari. Îtotxi iuaîkana ôkitikikosaaki, peerekari. Îtotxi katikosaaki ! kataparari. Iuaîkana ôkitikikosaaki, kataparari. ⁴⁴ Aïto katikosaaki, aïto itixi auakani îto atokotxikana. Aïto iuaîkana ôkitikikosaaki âtiâo aïto. Îtotxi îkorapokoriti aâuini îkapani aua. Apaka aua îtotxi ipinimoni, Teoso sikakiti apîkasaaki. Ikara îtotxi !ipina. ⁴⁵ Teoso sâkire iôkatsopatakori txari:

Teoso txîkitakari kiki merepitipanika auakari Adâo inakori auâki inini. Adâo imatonôkari auakari, Kristo inakori, txîkitakari kâkiti auâki inini, apaka imapanakani îkapani.

⁴⁶ Teoso nireêkiti axinikini kona apoka merepanika. Merepanika axinikari ateka nireêkiti, eereka axinikari Teoso nireêkiti. ⁴⁷ Kiki merepitipanika auakari kipatxi kamakori itxaua. Âti kiki Apiananiri, Teoso tixinekiri iua. ⁴⁸ Ikinimane kâkiti itixi auakani, iua Adâo kipatxi kamakori atokokana. Ikinimane kâkiti Teoso tixine sikani, Kristo Teoso tixinekiri atokokana. ⁴⁹ Aponaniâkasaaki, kipatxi kamakori aïto, Adâo îto atokokana itxa aïto. Iua atokokana Teoso tixinekiri îto, Kristo îto atokokana itxako aïto.

⁵⁰ Nitariakori, nisâpiretai hîte, !apakata kâkiti îto, iarêka pakini sini Teoso auîtetxi ininiâtaâua. Ipinakari kona auapininiika ! itxa. ⁵¹ Hîkenakotariko nisâkire. Nisâpiretaiko kâkiti mimarotakinîti mitxi. Kona ikinimaneni ipina. Iuaritika amakinika txîkitakaâka ipinipo aniniua. ⁵² Iuasaaki imapotôkire trôpetakero xôkaâka. Iuasaaki mêkokari katimari atoko itxa. Poki katimari matâkaâtinîni atoko itxa. Amakinika katimaritika txîkitakaâka ipinipo aniniua. Iua trôpeta xôkikosaaki, iuasaaki ipîkani ôkitikaâka. Kona ipinaikanako. Iuasaaki atxîkitakaâka ipinipo aniniua. ⁵³ Kotxi arakakani txîkitakaâkako miarakakani ininiua. Ipîkani txîkitakaâkako mipîkani ininiua. ⁵⁴ Arakakani txîkitakikosaaki miarakakani ininiua, apaka ipîkani txîkitakikosaaki mipîkani ininiua, iuasaaki Teoso sâkire iôkatsopatakori apopeka. Ia atoko itxa Teoso sâkire kitxakapirîka:

Ipîkitxi xipokaâkako. Auape kâiatakari, ipîkitxi xipokakari.

⁵⁵ Ipîkitxi tsiî !auaika. Maerekani misiritikoâtaâ anikakari kona kâiata.

⁵⁶ Ipîkitxi tsiî mitxi aua amaerekani xika. Teoso paniâtakiti iôkatsopatakori oerekaua amaerekani. Teoso paniâtakiti iôkatsopatakori mauakani, !auiari kâkiti misiritiko. Txamari maerekantxi tapara aua, kotxi Teoso paniâtakiti iôkatsopatakori auapitika. ⁵⁷ Erekapitikari Teoso, kotxi aâuîte Xesosi Kristo txîkitakaua akâiatini.

⁵⁸ Ikara atoko ininiā, nitariakori nota tiretakini, kataparaxinire hītxako. Kona hāuiritapiri apanakini txīkitakinii maerekati hīkamini. Hīparīkauatoko ikiniōtika Apiananiri īkapani, kotxi himarotari maxikatīika !hīparīkauata iua īkapani. Hīparīka īki hāpakapapitikako.

16

Txineiro Sikiko Xesosī Sākire Auiākani Īkapani

¹ Uatxa nisāpiretai txineiro himaktxakini Teoso nakitiakori īkapani. Hīkamariko Karāsia tixini auakani nipaniātini atokotxikana. Nipaniātana ninoa Teoso misākiretikoātaā apotiitakaniua ia atoko: ² Ikini Tomīko hīkinika hīte nīkataro txineiro ninoa īkapani. Txineiro Teoso siākiti iaōka, hinīkataro ipixini ninoa īkapani. Ininiā ereē napokasaaki apikomoni txineiro kona apotiitaāka. ³ Napokasaaki ereē, niokanataro kākiti, txineiro hīsikakito anakani Xerosareēmōni. Hīsāpiretano hīokanatsopatakitiā himereēkini hītxineirote anakani īkapani. ⁴ Atxiīti erekari nota sinī apaka, ininiā ninoa moianatano nota.

Paoro Paniātakiti Pirena

⁵ Masetōnia tixinimoni nisako, eereka napoka hītemoni, kotxi nisapitikako Masetōniamoni. ⁶ Iuasaaki atxiīti nikaikota hītekata. Atxiīti nikaikota mitaāsaaki hītekata. Ininiā eereka hīte posotari himoianatinino nota naia-matakasaaki apikoxiti nisini īkapani. ⁷ Kona ninirekari mapāōtinoka nikaikotini hītekata uatxa. Apiananiri auiritiniāno, ninirekari apikomoni nikaikotini hītekata. ⁸ Txamari nikaikota uai Épeso sitatxiti Pētekósitxi kiiniriti manapi ōti. ⁹ Kotxi uatxa kaiāopokori kākiti īkorapokoriti auakani nirekari nisāpiretiniri Teoso iokanapirena erekari ninoamoni. Txamari kaiāopokori kākiti !nirekano.

¹⁰ Atxiīti Tximōtxio sari hītemoni, ininiā hāpakapariko iua, imapīkarauatakani īkapani hīte sauaki, kotxi iua parīkauata Apiananiri īkapani nota parīkauatini atokokana. ¹¹ Ininiā kona apakata kākiti mamaākatakaniri iua. Ikanapiriākasaaki notamoni, iuasaaki hīokanataro iua erekaxinire inini. Niātapari iua aītariakorikata.

¹² Iteene ninirekari aītari Aporo apokini hītemoni aītariakorikata. Txamari uatxa !nirekari isini hītemoni, iuaritika iposotakasaaki isapitikako hītemoni.

¹³ Araōkire hītxako. Iteene hāuikariko Teoso sākire. Hītaparaxinireritika hāuako. Hītapararitika hāuako Teoso īkapani. ¹⁴ Xesosī tiraōkiā ikinipoko hīkamako.

¹⁵ Hīte imarotari Esitēpana, inirimane pakini. Ninoa Akaia tixini auakani. Iuaātaā ninoa merepitipanika auikari Xesosī sākire. Ninoa iteene parīkauata Teoso nakitiakori īkapani. Nitariakori, iteene nipaniātai hīte. ¹⁶ Hīkamariko kākiti ikara atoko inakani paniātakiti. Hīkamariko ikinimane amoianari paniātakiti, atekata parīkauatakani paniātakiti. ¹⁷ Esitēpana, Potonato, Akaiko pakini apokasaaki uai, nīpoxokoniua, kotxi iminarina notamoni mauakati hīte masikakiniti. ¹⁸ Ninoa sikapoxokonitari nākixinire, hīte ākixinire apaka. Erekari ate iuikiniri kākiti ikara atoko inakani.

¹⁹ Teoso misākiretikoātaā apotiitakaniua Ásia tixini auakani xinikamanapitai hīte. Ákira inakori, Pirisira inakoro pakini iteene xinikamanapitai hīte, kotxi Apiananiri nakiti hītxaua. Apaka Xesosī sākire auiākani ninoa aapoko apotiitakaniua xinikamanapitai hīte. ²⁰ Ikinimane aītariakori uai auakani xinikamanapitai hīte. Haōkitakakasaakia, himaratakakauako, kotxi Teoso nakitiakori hītxaua.

²¹ Nota Paoro iōkatsopatari ia nitakapiretanapini niuakoã. ²² Kãkiti matiretakaniãri Apiananiri Xesosi Kristo, maerekati takaãka iua nopini.

“Apiananiri, uai pina atemoni,” atxari Xesosi.

²³ Apiananiri Xesosi Kristo sikari ikinipoko erekari hītemoni. ²⁴ Nitiretai hīte hīkinika, kotxi Kristo Xesosi nakitiakori atxaua. Ameẽ.

2 KORĪTO

Paoro Iokanatsopatakiti Iuaīkana Korīto Auakanimoni

¹ Nota Paoro, Xesosi Kristo iokanatakimoto. Teoso nirekari iokanatinino kākitemoni isākire nisāpiretini ĩkapani. Ia aātsopa niōkatsopata. Aītari Tximótxio aua notakata. Ia iōkatsopari niokanata kākiti Teoso mereēkinimoni, Korīto sitatxiti auakanimoni. Apaka ia iōkatsopari niokanata kākiti Teoso nakiti-akorimoni, Akai tixini auakanimoni. ² Aīri Teoso, Xesosi Kristo Apiananiri pakini sikari ĩkinipoko erekari hītemoni. Ikamaerekaxiniretai hīte.

Teoso Mīkapiritiniua Pirena

³ Peerekari Teoso. Aāuīte Xesosi Kristo iri itxaua. Kaamonīkareri iua. Āti kākiti amonīkari iua atoko inakari ! auari. Amaerekaxinirensaaki, iua atekata aua. Amaerekaxinireni imaktxakinaua. Iusaaki imīkapiritaua. ⁴ Imīkapiritaua amaerekaxinirensaaki, ininiā apanakini maerekaxinirensaaki, iua atokotxikana ate mīkapiritana ninoa apaka, kotxi aimarotari Teoso mīkapiritiniua ate. ⁵ Kristo iteene misiritaāka, ininiā ate misiritaāka apaka. Iua atokokana Teoso moianatari Kristo, ininiā iua moianataua ate apaka. ⁶ Apanakini misiritaaua, kotxi anirekari Teoso mīkapiritini hīte. Anirekari Teoso makatxakiniri hīmaerekani. Teoso mīkapiritaua ate, ininiā hīte apaka imīkapirita. Teoso mīkapiritakasaakii hīte, isikataparatai himisiritiko hīpoxokoniritika himīteenekini ĩkapani. Hīte misiritiko ate misiritiko atokokana. ⁷ Aimarotapitikari erekari Teoso sikinii hīte, kotxi himisiritaāka ate misiritiko atokokana, ininiā Teoso mīkapiritai hīte, ate imīkapiritini atokokana.

⁸ Aītariakori, anirekari hīxinikiniri ate misiritiko Āsia tixini aūakasaaki. Iusaaki iteene amaxikaāka. Kona amīteenekari. Auākatari aōkiko. ⁹ Iusaaki aākixinireē atxa: “Apinapitikako,” atxa. Ikara atoko ininiā, aimarotari kona ate posotiire ! auari. Aimarotari Teosonoka sikataparataua, kotxi iua posotari ōkitikiniri ipīkari. ¹⁰ Pamonōkoniri iusaaki, iuaritika Teoso makatxakaua amapinakani ĩkapani. Iua makatxakapanikaua amapinakani ĩkapani. Ate auikari iua sākire, iuaīkana imaktxakinia tīkane. ¹¹ Hīte moianataua ate, kotxi himisākiretari Teoso ate ĩkapani. Ininiā Teoso kamari hamanaākiti iaōka, kotxi Teoso kamari erekari atemoni. Eereka kaiāopokori kākiti sāpiretari Teoso iua ereka inini, kotxi ikamari ninoa amanaākiti iaōka ate ĩkapani.

Paoro Masikani Korītomoni

¹² Ate poxokoniua, kotxi ate kamari erekarinoka Teoso oerekakitinoka, kākitemoni, hītemoni apaka. Atāonoka anireka akamini kākitemoni. Aimarotari ikara aākixinireē, ininiā apoxokoniua. Ikara atoko aūini, kotxi ĩkinipoko erekari Teoso sikakiti sikataparataua. Kākiti imaroreē ! iposotari ikaminiri iua auini ereka inini, kotxi ! kiūkiteri kākiti. ¹³ Hātatsopatakasaakiri aiōkatsopatakiti hītemoni, himarotari axinikakiti aākixinireē. Axinikakiti, asākire pakini ātinoka itxaua. ¹⁴ Hīte na iteene imarotapanikaua ate, iuaritika ninirekari hīuikinia ate, Apiananiri Xesosi uai ikanapiriini ōtisaaki, ate iuikinii atokotxikana.

¹⁵ Ikara nimarota, ininiā ninirekamari hītemoni nisini, ipikata hīpoxokoniuatini ĩkapani. ¹⁶ Masetōnia tixinimoni nisini apisapanika, ninirekamari hītemoni nisini. Eereka nikanapiriākasaaki uaimoni, ninirekamari hītemoni iuaīkana nisini, ininiā iusaaki ninirekamari hīte

iokanatinino nota Xotéia tōpamoni. Txamari na nisa. ¹⁷ Atxiiti hîte txano nota: “Pixinikasaakiri uai papokini, na iteene pinirekari uai papokini,” hîtxano. Txamari ninirekapitükari napokini hîtemoni. Na nota xinikari Teoso säkire mauïäkani xinikakiti atoko, kotxi ninoa säkire: “Ari, nisapitika,” txamari äkixinireë itxana: “Na nisapani,” itxana. ¹⁸ Nota säkire hîtemoni ninamaã: “Ari nisapitika,” ninakasaaki, näkixinireë apaka txari: “Ari, nisapitika,” nitxa. Teoso atãonoka säkirauatakari imarotari ikara nisäkire atãoini. ¹⁹ Síراسi inakori, Tximótxio inakori, nota pakini säpiretapekai hîte Teoso äkiri, Xesosi Kristo säkire. Xesosi säkire inamaã auakari, isäkire äkixinireë auakaritxikana isäkireta. “Nikamapitikariko,” inakasaaki, äkixinireë inirekapitükari ikaminiri. Ikamari isäkire iaõka. ²⁰ Teoso sikaenetakiti kãkitimoni kaïãopokori aua. Iua Kristo sikaua ikinipoko Teoso sikaenetakiti, ininiãkara atxari: “Ameë.” Peerekari Teoso, kotxi Kristo sikapitükaua Teoso sikaenetakiti. ²¹ Teosokara sikataparaxiniretai hîte, ate apaka, Xesosi Kristo amatakanapakani ikapani. Teosokara mereëua iua nakitiakori aniniua ikapani. ²² Apaka Teosokara sikaua Erekarî Matamatakoti, Teoso nakiti aniniua aimarotini ikapani. Iua Erekarî Matamatakoti aua aãkixinireë. Teoso takaõtxikare itxaua iua. Iua Erekarî Matamatakoti merepitipanika Teoso sikakiti atemoni, ininiã aimarotari apikomoni isikapapanikaua itanapoko inikatakiti ate ikapani.

²³ Kona nisari hîte Korîto sitatxiti auakanimoni, kotxi kona ninirekari hîte matinaniuatini hîte maerekani nisãpiretini xika. Teoso imarotari ikara atãoini. ²⁴ Hïauite kona ate txaua. Kona apaniãtai: “Ia atoko inakari häuika. Kona ikara atoko inakari kona häuikape.” Kona ikara atoko !atxai hîte, kotxi hîte auikapitükari Teoso säkire atãoinakari. Aparïkauata hîtekata hîpoxokoniuatini ikapani.

2

¹ Näkixinireë nitxari: “Na nisa iuaïkana ninoamoni nikamamatinanitinina ikapani.” ² Nota xika maerekaxinireninoka hininiã, kiripa kamapoxokinitano nota? Hîtenoka aua nota kamapoxokonitakani. Ininiã kona nota nirekari maerekaxinireni hinini nota xika. ³ Kona ninirekari hîtemoni napokini, maerekaxiniretikano ninini, hîte maerekani xika, ininiãkara nota iokanatsopatari ikora mitxi niõkatsopatakiti hîtemoni ereë napokini apisapanika. Kotxi nikamapoxokonitakini hîtxaua hîte. Nimarotari ia. Nota niënenïkasaaki, hîte himakinika enenïka apaka. ⁴ Niokanatsopatari ikora niõkatsopatakiti hîtemoni, kotxi himaerekani xika maerekaxiniretinoka nitxa. Nitxiapata. Niokanatsopatari ikora niõkatsopatakiti hîtemoni, iteene nitiretinii himarotini ikapani. Na ninirekari nikamamatinanitinii.

Maerekanitxi Maxinïkaretiko

⁵ Iua kiki maerekati kamakari maerekaxinireti txïkitakano. Iua apia maerekaxinireti txïkitakai hîte, maerekati ikamini xika. Na iteene ninirekari nitxitiniri iua. ⁶ Uatxa atokopeka homanatiniri. Iua txitaãkapeka imaerekani xika. ⁷ Uatxa himaxinïkaretariko maerekati ikamakiti, ininiã häpakapariko iua. Himisäkiretariko iua. Hïkamapoxokonitari iua. Ikara atoko himinakanïari, iua kona erekaxinireri. Ikara atoko himinakanïari, atxiiti itakanapari Teoso kimapore. ⁸ Ininiãkara nota õtäkikai hîte nitapararitika. “Atiretapitikai,” hîtxariko iua, hîtiretiniri imarotini ikapani. ⁹ Ininiã mitxi niokanatsopata hîtemoni, kotxi iuaasaaki nataerekatai hîte. Ninirekari nimarotinari, hïkipititari nõtäkikinii atxiiti? ¹⁰ Himaxinïkaretakasaakiri maerekati äti kamakiti, nota apaka maxinïkaretari. Maerekati äti ereë kamakiti auiniã, nimaxinïkaretari, kotxi nitiretai hîte. Kristo nirekari nimaxinïkaretiniri maerekati

ikamakiti. ¹¹ Axinikasaakiri maerekati āti kamakiti, akamari Satanasi nireēkiti. Ininiākara !akamari Satanasi nireēkiti. Paimatireri iua. Inirekari akerokiniri. Aimarotari iua nireēkiti, ininiā apia imatirerini matxaua.

Txito Paoro Nitini

¹² Tóatxi sitatxiti napokasaaki Kristo iokanapirena erekari nisāpiretini tīkane, kākiti iuaā auakani nirekari nisākire imarotini, kotxi Apiananiri sikanireōtana nisākire imarotini ikapani. ¹³ Iuaritika !erekaxinireno, kotxi ninitapiimari aītari Txito inakori. Kona napokari. Ininiā nitakapiretana-pana kākiti iuaā auakani: “Ereēpiko. Masetónia tixinimoni nisako,” nitxana.

Kamariāro Atoko Atxa

¹⁴ Peerekari Teoso kamakiti ate ikapani. Kristo nakiti aniniāua, Teoso txīkitakaua ātipirika akāiatini, ikinimane imarotini ikapani. Teosokata akāiata. Teoso paniātaua Kristo pirena imarotiko ikini tōpati iaripiretini, kamariāro iarikatxiātini atokokana Kristo pirena iaripiretini ikapani. ¹⁵ Kristo sikaua Teosomoni, ininiā Teoso apokaerekataua, kotxi kamariāro arikiko Teoso ikapani atokokana atxa. Kamariāro arikasaaki omari samariāpota ikini tōpati. Iua atokokana asaāpota kākitemoni, kākiti apokakonimoni, kākiti pīpinanaākanimoni apaka. ¹⁶ Kākiti pīpinanaākanimoni kanaiatxiāri atoko atxa, kotxi asāpiretana Kristo sākire imauikakaniāna, ipinana. Kākiti Teoso apokakinimoni kamariāro eretxiāro atoko atxa, kotxi asāpiretana Kristo sākire auikiniāna, auapininiika itxanako Teosokata. Kiripa posotari ikara atoko inakari parīkatxi ikamini Teoso ikapani? ¹⁷ Ate posotari Teoso ikapani aparīkauatini, kotxi kona apanakini atokoni !atxa ate. Kaiāopokori kākiti sāpiretari Teoso sākire txineiro apakapini ikapani. Ninoamoni Teoso sākire tiitxi vēxititiko atoko itxa. Kona ikara atokoni !akama, kotxi Teoso iokanataua ate kākitemoni. Teoso atamataua, ininiā atāonoka asākiraauata, kotxi Kristo nitiriakori atxaua.

3

Iōkatsopari Atoko Hītxa

¹ Atxiīti iuaīkana ate sāpiretari erekari akamakiti asākire hāuikini ikapani? Atxiīti hinirekatari apanakini iōkatsopatiniri erekari ate kamakiti ate sākire hāuikini ikapani? Atxiīti ate nirekatari apanakini iōkatsopatiniri erekari hīte kamakiti hīte sākire ate auikini ikapani? Apanakini kamari ikara atoko. Ate kona kamari ikara atoko. ² Kona ninirekari iōkatsopari ikara atoko inakari, kotxi iua iōkatsopari atoko hītxa hīte. Ate ākixinireē iōkatsopari atoko hītxa. Ikinimane atatsopatari ikara iōkatsopari, ininiā imarotarina erekari hīte kamakiti. ³ Iōkatsopari Kristo iōkatsopatakiti ate mīkiti atoko hītxa. Kona txītaā iōkatsopataāka. Erekarī Matamatakoti Teoso Mapinakati iōkatsopatari. Kona aātsopāā iōkatsopataāka. Kākiti ākixinireē iōkatsopataāka.

⁴ Ikara atoko atxai hīte, kotxi itene aimarotari Teoso, Kristo nakitiakori aniniua. ⁵ !Kimaroreua ate. Ateka !aposotari aparīkauatini Teoso ikapani. Teosora sikaposotiiretaua. Isikari imarore atemoni. ⁶ Isikaposotiiretaua Teoso ikapani aparīkauatini ikapani, isākire amaneri kākiti asāpiretini ikapani. Ikara isākire amaneri oerekaua Erekarī Matamatakoti aākixinireē auini. Isākire amaneri !oerekaua ipaniātakiti iōkatsopatakori Moisesimoni isikakiti. Ipaniātakiti iōkatsopatakori Moisesimoni isikakiti paniātari kākiti ipinini imaerekani xika. Erekarī Matamatakoti aākixinireē auiniā, itxīkitakaua aāuapininiika anini.

Teoso Parīka Amaneri

⁷ Teoso paniätakiti tesi pakini iökataäka kai nopini. Teoso sikasaakiri ikara Moisesimoni, Teoso iotximere iteene aua. Moisesi toõ iuasaaki apakapari Teoso iotximere. Iteene iotximere aua Moisesi toõ, ininiä käkiti Isaeo auakani kona posotari atamatiniri. Iotximere poiäöpotakasaaki, !iposotapanikarina itoõ atamatinina. Ininiä Teoso iotximere auakasaaki, isäkire iökatakori apoka itiximoni käkiti ipinini ikapani. ⁸ Uatxa iua Erekar Mata-matakoti txikitakari käkiti ätipirika auini ikapani, ininiä uatxa Teoso parika apiata. Peerekari ikara iparika. ⁹ Peerekari Teoso parika ipaniätakiti iökatakori käkitimoni isikasaaki, txamari iuasaaki oerekari käkiti misiritiko imaerekani xika. Uatxa Teoso parika apiaerekata, kotxi Kristo kamaerekatari käkiti. ¹⁰ Uatxa Teoso parika apiata. Peerekari. Iotximere apiari atoko itxa, ininiä iua parika kitxakapirika iotximere napakari atoko itxa. ¹¹ Kitxakapirika Teoso parika ipaniätakiti iökatakori isikasaaki peerekari, txamari ikara Teoso parika xipope. !korasaaki iparika käkiti ikamaerekatini !ixipoka, ininiä apierekata.

¹² Ia Teoso parika ! ixipoka, ininiä ataparaxinireritika asäkirauata. ¹³ Moisesi atoko !atxaua, kotxi iua ipatoõtaua mäkatxi mataä, itoõ iotximere Isaeo auakani matamatakani ikapani. Itoõ iotximere poiäöta, iuaritika ! iposotarina atamatinirina. ¹⁴ Moisesi ipatoõtiniua atokokana ninoa Isaeo auakani oki ipataäka, kotxi !imarotarina atõ Teoso nireëkiti. Uatxapiima okina ipataäkapanika atatsopatakasaakirina Teoso säkire iökatsopatakori, Xesosi apokini apisapanika auakari säkiretxiti. ! Imarotarina Teoso nireëkiti. Kristo säkire auikikosaaki, iua ipatoõtiko makatxakaäka, ininiä iuasaaki käkiti imarotari Teoso nireëkiti. ¹⁵ !korasaaki apaka Moisesi iökatsopare atatsopatakasaakina, ! imarotarina. Okina ipataäkapanika. ¹⁶ Käkiti akiritakasaakiri Apiananiri, ipatoõtiko makatxakaäka. ¹⁷ Erekar Matamatakoti itxaua Apiananiri. Erekar Matamatakoti auiniä aäkixinireë, !aparikauataika amaerekani makatxakiko ikapani, kotxi Xesosi makatxakapekari amaerekani. ¹⁸ Xesosi säkire auiakani atxaua, ininiä atõ kona ipataäka. Ätakaäri atoko atxaua. Käkiti atamatakasaakiu ate, atamatar Apiananiri iotximere. Apiananiri Erekar Matamatakoti aäkixinireë txikitakaäpotaua ikara atoko aniniua, ininiä apiaäpota aiotximere.

4

Teoso Iokanapirena Erekar Pokamara Atoko Itxa

¹ Teoso amonikaua ate, ininiä iua paniätaua ia parikatxi akamini, iokanapirena erekari apanakinimoni asäpiretini. Ikara atoko ininiä, isikataparaxiniretaua, ininiä ! anirekar atakanapiniri ikara parikatxi. ² Käkiti kipatari ikamakiti, maerekati ikamakasaaki, kotxi ipëtauata. Ikara atoko inakari maerekati !akamaika. Atakanapapekari. !Amisirienetari käkiti. Kona akoketari ate säkire Teoso säkirekata. Teoso kenakotari asäkire, ininiä atäonoka asäkire, ininiä käkiti äkixinireë imarotari akamakiti atäo inini. ³ Käkiti mimarotakanisaakiri Teoso iokanapirena erekari asäpiretakiti, käkiti pïpinanaäkari atoko itxa. ⁴ Käkiti pïpinanaäkari !imarotari Teoso iokanapirena, kotxi käkiti teosone, Satanasi inakori, ipatari ninoa oki, ininiä !atamatarina pokamara ninoa iopiniäkari. Teoso iokanapirena erekari pokamara atoko itxa. Peerekari ikara Teoso iokanapirena. Iua erekari pirenä säpiretari Kristo Apiananiri ininiua, kotxi Teoso itxaua. ⁵ Ate kona säpiretari käkiti ateka pirenä. Ate säpiretari Xesosi Kristo Apiananiri ininiua. Ate hïte nitiriakori atxaua, kotxi Xesosi nirekari hinitiriakori aniniua. ⁶ Kitxakapirika ipiänoka auakasaaki, Teoso txari: "Piopinikaxitita." Iuasaakipeka iopinikaxitita. Iua Teosotxikana iopinikari aäkixinire. Ikara iopinikare kamaimarorettaua

Teoso Apiananiri kaiotximereri ininiua. Kristo aātamatakasaaki, aātamatarī Teoso iotximere.

Xesosi Sākire Auiākani Misiritiko

⁷ Kopiti maikoti atoko atxaua, kotxi atapara !auari. Iuaritika atemoni auari Teoso iokanapirena erekari katireri. Ininiā aimarotari Teosonoka kaposotiireri, kataparari ininiua. Atepekana !aposotari. Atapara !auari. ⁸ Asinimoni amaxikakini aua, iuaritika !okaua ate. Atxiīti !aimarotari akamakiti tīkane, iuaritika kona aiotokakari Kristo sākire aāuikini. ⁹ Amisiritiko aua, iuaritika Teoso kona takanapaua ate. Atxiīti akarotaāka, iuaritika kona aōkaāka. ¹⁰ Ikiniōtika aīto okiko monōkoni aua Xesosi sākire aāuikini xika. Xesosi atatsiirauata. Ipina. Iua atokotxikana ate atatsiirauata. Atxiīti aīto ipina iua sākire aāuikini xika. Xesosi auapika, kotxi ipīpe, eereka ōkitikaua, ininiā iua atokokana aīto auapika. ¹¹ Auapanika anakasaaki, aōkiko monōkoni aua Xesosi sākire aāuikini xika. Aīto ipinapitikako, iuaritika aāuapanika, kotxi Xesosi auapanika. ¹² Xesosi iokanapirena asāpiretini xika, apanakini nirekari okiniua ate. Xesosi iokanapirena asāpiretakasaakii, hīte auikari, ininiā hīte auapika himaxipokakani.

¹³ Teoso sākire iōkatsopatakori txari:

Nota auikari Teoso sākire, ininiā nisāpiretari kākiti.

Iua atokotxikana ate auikari Teoso sākire, ininiā ate sāpiretari kākiti. ¹⁴ Teoso ōkitikari Apiananiri Xesosi, iuaīkana auini īkapani, ininiā aimarotari Teoso ōkitikiniua ate apaka, iuaīkana aāuini īkapani. Eereka Teoso anikauako ate hītekata Xesosi aāōkitini Teoso apisatoō. ¹⁵ Amīteenekari ikinipoko amisiritiko Xesosi sākire hītemoni asāpiretini īkapani. Kākiti apikomoni, apikomoni, apikomoni, txaāpota apakapari ikinipoko erekari Teoso sikakiti, ininiā ninoa kākiti kaiāopokori txari Teoso: “Erekapitikari pisikakiti notamoni.” Ikara atoko ininiā, kākitipokoni txari: “Peerekari Teoso,” itxako.

Maerekaxinireni !Atxaua

¹⁶ Ininiākara maerekaxinireni ! atxaua. Aīto xipokaāpota, iuaritika aākixinire ikiniōtika apiataparaāpota. ¹⁷ Īkoraasaaki amaxikiko auapitika Xesosi sākire aāuikini xika. Kona okanani aua amaxikiko. Eereka Teosokata ātipirika aāuapika, kotxi aāuikari isākire. Peerekari iuaasaakiko. !Axinikaikari mitxi amaxikiko, kotxi iuaasaakiko peerekari. ¹⁸ Kona amaākatari aātamatakiti. Amamatakiniti axinika. Amatakori xipokako. Matamatakoti kona xipoka.

5

Aāuapoko Teoso Tixineē

¹ Īkarapokoriti aāuakasaaki, aīto aāuapoko itxaua aākixinire īkapani. Āti ōti aīto xipoka. Ixipokasaaki, Teoso sikari ātiāo aāuapoko. Iua aīto isikaua, itixine aāpokasaaki. Iua aīto kona xipokaika. Iua aāuapoko kona uakōtxiā kamakorini. ² Īkoraasaaki aātatsiirauatakasaaki, atxari: “Ninirekari ātiāo niīto, niīto Teoso sikakiti itixine napokasaaki.” ³ Anirekari ātiāo aīto, ininiā maītotika ! atxaua. ⁴ Īkoraasaaki ia aīto auapanika inakasaaki, aātatsiitari katsiiri. Kona kataparari ia aīto. Anirekapitikamari aīto. Anirekari ātiāo aīto, ininiā aīto maxipoākati makatxakari aīto xipoākari. ⁵ Teoso kamari aīto maxipoākani īkapani. Isikapanikauako aīto ikara atoko inakari. Aimarotari ikara atāo inini, kotxi isikapekari Erekarī Matamatakoti atemoni. Ipixini Teoso sikaenetakiti isikapekaua, ininiā apikomoni sikaenetakiti isikapitikaauo.

⁶ Ininiā kataparaxinirepitikaua ate. Aimarotari aāuapoko ia aīto ininiāua, kona aāpokapanika Apiananiri tixinemoni. ⁷ Xesosi sākire auikiko oerekaua atāo aāuini tīkane. Aōkinoka kona oerekaua atāo aāuini tīkane.

⁸ Kataparaxinirepitikaua ate. Kona ate pīkari apinini. Apiaerekata apinini, kotxi iuasaakiko Apiananirikata aāua. ⁹ Anirekari amiinitiniri Apiananiri, ia aīto āki aāuakasaaki, ia aīto xipokasaaki apaka. ¹⁰ Āti ōti ate amakinika sariko Kristomoni. Iuasaaki Kristo sāpiretaua aparīka īki. Iua imarotari ikinipoko amakakiti ia aīto āki aāuakasaaki. Atxiīti akamari erekari. Atxiīti akamari maerekati. Akamakiti iaōka isikaua aparīka īki.

Kākiti Mikanapiriūko Teosomoni

¹¹ Aimarotari Apiananiri katapara inini, kotxi imisiritari kākiti imaerekani xika. Ininiā asāpiretari kākiti auikiniri iua sākire. Aparīkauata, iua sākire kākiti auikini īkapani. Teoso iteene imarotaua. Imarotari axinikakiti aākixinireē. Ninirekari hīte apaka iteene imarotiniua ate hākixinireē. ¹² Kona ate nirekari iuaīkana asāpiretinii hīte ereka anini. Anirekari asāpiretinii, apakatapitika hīuikiniua ate, kotxi atāonoka akama. Ikara atoko inakari himarotiniā, himarotari kākiti hāpakapapiretini, ninoa misākirepiretakasaakiaua ate. Ninoa kākiti ate misākirepiretakani iūkari atamatakorinoka. Kona imaākatari kākiti ākixinire ereka inini. ¹³ Atxiīti kākitimoni kona kiūkiteua ate. Ikara atoko atxa Teoso īkapani. Atxiīti paūkiteua ate. Ikara atoko atxa hīte īkapani. ¹⁴ Kristo iteene tiretaua, ininiākara anirekari iua nireēkiti akamini, kotxi aimarotari iua ipina ikinimane īkapani, kotxi ikinimane ipīkani atoko itxauana. ¹⁵ Kristo ipina ikinimane kākiti īkapani, kākiti mapinakani īkapani, kākiti ātipirika auini īkapani. Ininiā iua kākiti kona kamaikariko iuaka nireēkiti īkiniōtika. Ikamariko Kristo nireēkitinoka, kotxi Kristo ipina iua īkapani. Iuaīkana ōkitikapekaua.

¹⁶ Ininiā uatxa ! axinikaikari kākiti īkorapokoriti auakani xinikakiti atokokana. Mitxi axinikari Kristo ninoa xinikiniri atoko. Uatxa ! axinikaikari Kristo ninoa xinikiniri atoko. ¹⁷ Kristo sākire auīkari ākixinire amaneri itxaua. Mitxi maerekati ikamakiti kona kamaika. Amanerinoka ikama. ¹⁸ Ikara atoko inakari Teosora kaminaua. Mitxi amokaiakari atoko itxa Teoso, iuaritika imikanapiriāua ate iuamoni, kotxi Kristo ipina ate īkapani. Ipaniātaua ate asāpiretiniri ikinimane kākiti, Teoso nirekari imikanapiriinina ninoa iuamoni. ¹⁹ Teoso mikanapiriāri kākiti ikini itixiti auakani iuamoni, kotxi Kristo ipina kākiti īkapani. Teoso mikanapiriākasaakiri kākiti iuamoni, kona iaōtari maerekati ikamakitina. Kona ixinikaikari imaerekanina, ininiā kona imisiritana imaerekani xika. Ia pirena, kākiti imikanapiriini pirena, ipaniātaua asāpiretiniri ikinimane kākiti.

²⁰ Asāpiretari Kristo sākire kākitimoni. Asākirauata iua īkapani, ininiā Teoso iteene ōtākikai hīte ate sākireē. Kristo nireēkiti iaōka ate ōtākikai hīte. Hikanapiriāko Teosomoni. ²¹ Kristo kona kamari maerekati, iuaritika Teoso misiritari iua maerekati kamakari imisiritini atokokana. Ininiā Xesosi sākire aāuikiniā, Teoso apakapaua ate, maerekati makamakani apakapini atoko, kotxi iua kamaerekataua ate.

6

¹ Ate parīkauata Teosokata, ininiā ate iteene ōtākikai hīte. Teoso sikari ikinipoko erekari hītemoni, ininiā !apakata mamaākatakinitika hininiri Teoso.

² Kotxi Teoso sākire iōkatsopatakori txari:

Erekari kākitimoni nisika. Niketo apokasaaki, iuasaaki nikenakotari hākiritinino nota. Kākiti maerekani nimakatzakini ōtisaaki, ni-moianatai hīte.

Nisāpiretai. Uatxa apokapeka Teoso keto erekari kākitimoni isikini. Uatxa Teoso makatzakari kākiti maerekani.

Teoso Nitiriakori Atāo Inakani

³ Kona xatiki akerokari akamakiti kākitimoni, ininiā kākiti kona txari: "Ninoa kerokari ikamakitina, atāo minakati isāpiretiniua," !itxana. ⁴ Teoso nitiriakori atāo atxaua. Aāuini ikiniōtika oerekari kākiti Teoso nitiriakori atāo inakani aniniua, kotxi amīteenekari amaxikiko. Amīteenekari amisiritiko. Amīteenekari katsiiri. ⁵ Teoso nitiriakori atāo atxaua, kotxi Teoso parīka akamini xika anoropataākapeka. Kateia āki atakaākapeka. Ahoātaā kākiti apotiitakaniua naiatapekaua. Teoso parīka akamini, pasāpaniri aparīka. Itokata !aimaka. Itokata anatxita. ⁶ Kākiti imarotari ate Teoso nitiriakori aniniua, kotxi kona akamari maerekati. Aimarotari Teoso sākire. Kona katimari aomanākarauatini. Amoianatari kākiti. Erekari Matamatakoti oerekaua atāo akamini. Atāo atiretari kākiti. Ikara atoko aniniā, kākiti imarotari Teoso nitiriakori aniniua. ⁷ Ate Teoso nitiriakori atāo atxaua, kotxi atāo inakarinoka asāpireta. Teosora sikaposotiiretaua. Erekari akamakiti aīkeeko akikomoni, asanaremoni pakini atoko itxa, kotxi erekari akamakasaaki, maerekati iokanataāka. ⁸ Teoso nitiriakori atxaua, ininiā apanakini kākiti paxitaua. Txamari apanakini kākiti kona paxitaua. Apanakini sākire: "Peerekana ninoa." Txamari apanakini sākire: "!Erekana ninoa." Apanakini sākire: "Kamisirienererini ninoa," iuaritika atāo inakarinoka asākire. ⁹ Minakaniua ate, iuaritika ikinimane imarotaua. Kaiāokatani apinaarita, iuaritika aāuapanika. Amisiritāka, iuaritika kākiti kona okapanikaua. ¹⁰ Amatinianuatakasaaki, Apiananiri kamapoxokonitaua ate. Kona katxineiroteua ate, iuaritika atxīkitakari kaiāopokori kākiti ikini sereti erekari Teoso sikakiti apakapinina. Minakani atxaua, iuaritika ikinipoko erekari Apiananiri sikakiti aua atemoni.

¹¹ Hīte Korīto sitatxiti auakani asāpiretai ikinipoko axinikakiti. Nikipatakiti !aui. Itene atiretai hīte. ¹² Ate nirekari atiretiniū hīte, txamari kona hīte nirekari hīretiniua ate. ¹³ Uatxa nimisākiretai hīte namariteakori nimisākiretini atokotxikana. Hītiretauako ate, ate turetiniū atokotxikana. Hōerekaua hītiretiniua ate.

Xesosi Sākire Mauiākani Moianariakori !Hītxapeua

¹⁴ Xesosi sākire mauiākani moianariakori !hītxapeua, kotxi !apakata erekari kaikotini maerekatikata. !Apakata pokamara !kanōkarikata auini. ¹⁵ Kona Kristo moianatari Satanasi. Xesosi sākire auīākari nireēkiti āti. Xesosi sākire mauiākati nireēkiti ātiāo. Ininiā !apakata Xesosi sākire auīākari auini Xesosi sākire mauiākatikata. ¹⁶ Teoso misākiretiko aikoti āki !aui kākiti kamakiti teoso. Aīto Teoso misākiretiko aikoti atoko itxa. Teoso ātipirika auakari itxaua. Iua txari:

Nota auako ninakitiakorikata. Nitīpokota ninoa sauaki. Ninoa Teosone nitxauako. Nota nakitiakori itxauanako ninoa.

¹⁷ Ininiākara hītakanapanako nisākire mauiākani. Kona ninoakata !hāuape. ! Hīkaikotape maerekati takote, ininiā napakapai hīte.

¹⁸ Ininiā hīri nitxauako. Namariteakori, namariteakoro hītxauako hīte, itxa Apiananiri, Kaposotiireri sākire.

7

¹ Nitiretakini ikara atoko itxa Teoso kamaenetakiti ate !kapani. Ininiā matakapanari ikinipoko maerekati aīto txikotakari, aākixinire txikotakari pakini. Teoso nakitiakorinoka matxaua. Erekarinoka makama Teoso apaxitini.

Paoro Poxokoni

² Hītiretauako ate. Kona amisiritari kākiti. Kona aōerekari kākiti maerekati ikamini. Kona amisirienetari kākiti. ³ Kona ikara atokoni nitxa hīte nitxitini

īkapani. Kona nitxitai, kotxi nisāpiretapekai iteene atiretinii hīte. Ininiā ipīkitxi kona oiarikaua. Auakari kona oiarikaua. Ate oiarikakari !uari. ⁴Nimarotari hīte kamirinī nota ōtākikakiti iaōka. Nota iuikai hīte. Hīte kamatapaxiniretano nota. Amaxikaākapika, iuaritika iteene nipoxokoniua.

⁵Masetōnia tixini ate apokasaaki, kona aiotoka. Kona atomata, kotxi asinimoni aua kākiti ate misiritakani. Kākiti naiataua. Aākixinireē apīkarauata.

⁶Teoso, mīkapiritari kākiti matinaniuatakani, ininiā imīkapiritaua ate Txito apokasaaki. ⁷Iua apokini kamapoxokonitaua. Apaka isākire kamapoxokonitaua, kotxi isāpiretaua hīte kamapoxokonitiniri iua. Isāpiretaua ate hīte kinirāo aōkitaka ininino nota. Isāpiretaua, hīte maerekaxinireni, kotxi hītākitakano maerekaxinire ninini. Isāpiretaua hīte ātipirika sāpiretiniri apanakini nota kamakiti ereka inini. Txito sāpirena nikenakotakasaaki, apia nipoxokoniua.

⁸Mitxi niokanatsopatakiti hītemoni maerekaxinireti txīkitakai hīte, iuaritika erekari niokanatiniri iua niōkatsopatakiti hītemoni. Merepanika nota matinaniuata, kotxi nimarotari niokanatsopatakiti hātatsopatinī xika hīte matinaniuata. Mapaōtinoka maerekaxinireni hītāua. ⁹Uatxa poxokopekano nota. Na nipoxokoniua hīte maerekaxinireni nitākitakini īkapani. Nipoxokoniua, kotxi maerekaxinireni hinini xika, hītakanapari maerekati hīkamakiti. Iuasaaki hīkanapiriā Teosomoni. Teoso apokaerekatari ikara atoko inakari himaerekaxinireni, ininiā kona ate misiritai. ¹⁰Erekari Teoso txīkitakiniri kākiti matinaniuatini, kotxi iuasaaki kākiti takanapari maerekati ikamakiti. Ikanapiriā Teosomoni, ininiā Teoso makatxakari iua maerekani. Ikara atoko inakari matinanitxi erekari. Txamari kākiti Teoso manirekakani matinani ātiāo, ininiā ninoā ipinapikako. ¹¹Hīte matinaniuata himaerekani xika, ininiā Teoso kamaerekatai. Ininiākara uatxa erekari-noka hinireka hīkamini. Uatxa iteene hinirekari hīkaminiri Teoso nireēkiti. Hinirekari ikinimane imarotiniri hīkamakiti ereka inini. Uatxa homanatarī maerekati mitxi hīkamakiti. Maerekaxinireti hītāua himaerekani xika. Uatxa iteene hītiraōki aua. Hinirekari himarotiniri nota pirena, nota ereka ninini himarotini īkapani. Uatxa hinirekari maerekati kamakari misiritiko. Ininiākara kona hīkerokari, iua kiki maerekati ikamakasaaki.

¹²Iua iōkatsopari mitxi niokanatakiti hītemoni, niōkatsopata hīte īkapanikara. Kona iua maerekati kamakari īkapanini niokanatsopata. Kona iua maerekati kamakari misiritakiti īkapanini niokanatsopata. Niokanatarī iua iōkatsopari hītemoni atiraōki himarotini īkapani. Teoso imarotari atiretinii.

¹³Ininiā ate kamatapaxiniretaāka, kotxi hīte kamatapaxiniretaāka apaka. Apaka apoxokoniua, kotxi Txito poxokoniua. Iua poxokoniua, kotxi hīte himakinika kamapoxokonitari iua. ¹⁴Txito hītemoni isini apisapanika, nota sāpiretari iua niuikinii hīte, kotxi peerekai hīte. Atāo nisākire, kotxi kona nipētauata hīkamakiti xika, kotxi hīkamakiti atāo. Atāonoka asākire hītemoni. Atāonoka asākire Txitomoni apaka ate iuikinii hīte. ¹⁵Apiaāpota Txito tiretinii, kotxi hīkamari iua sākire iaōka. Imarotari hāpakapiniri iua hīpaxitiniritika. ¹⁶Nipoxokoniua, kotxi nimarotapitikari hīkaminiri nōtākikinii iaōka.

8

Txineiro Apanakini Sikakito

¹Nitariakori, anirekari asāpiretinii Teoso misākiretikoātaā apotiitakanīua Masetōnia tixini auakani. Peerekari Teoso kamakiti ninoā īkapani, kotxi

ikinipoko erekari isika ninoamoni. ² Ninoa liteene kauarena. Pasāpaniri nino misiritiko, iuaritika ienenīkana ninoa. Na katxineiroteni, iuaritika ipotxtarinarina itina isikinina kākiti kaamonirinimoni. ³ Nota imarotari ninoa minakati auiniāna, isikarauatana apanakinimoni. Itene isikarauatana, iniñā kaiāokātani inatxitana. ⁴ Nota kona amanaāri ninoa txineirote kākiti Teoso nakitiakori Xerosareē sitatxiti auakani īkapani, iuaritika ninoaka txano: “Ate nirekari txineiro asikini ninoamoni. Pauiritaua asikiniro ninoamoni. Asikiniāro apoxokoniuaata, kotxi ikara atoko akamini amoiatari kākiti Teoso nakitiakori,” itxana. ⁵ Kona ikarananini ninoa nireka. Itene ninoa kamapoxokonitaua ate, kotxi mitxipe ninoa txaua: “Ate nirekari Apiananiri nireēkiti akamini,” itxana. “Iua oerekiniāri inireēkiti hītemoni, ate nirekari hīte paniātakiti apaka akamini,” itxana Masetónia tixini auakani. ⁶ Txito amanaāpeka hīte txineiro hīsikini Xerosareē sitatxiti auakani īkapani, iniñā apaniātari iua sini hītemoni hīsikakiti apakapini īkapani, hītirāōki ninoa Teoso nakitiakori hōerekini īkapani. ⁷ Hīte itene auikari Xesosi sākire. Apanakini poiāoka. Hīte imarotari Xesosi sākire hīsāpiretini kākitimoni. Apanakini na itene imarotari. Hīte itene imarotari Xesosi sākire. Apanakini poiāonoka nirekari. Hīte itene nirekari Teoso parīka hīkamini. Apanakini poiāonoka nirekari. Hīte itene tiretaua ate. Apanakini poiāoka tiretaua. Hīte api-aerekata, iniñākara ninirekari hīsikakiti apaka apiari inini, kotxi ikara atoko hīkaminiā, hōerekari Xerosareē sitatxiti auakani hītiretinina.

⁸ Kona nipaniātai nitapararitika hīsikiniro hītxineirote ninoamoni. Nataerekatari hītirāōki. Atāo atxiīti hītiretari apanakini? Masetónia tixini auakani atāo tiretari apanakini. Hīte tiraōki ninoa tiraōki atoko atxiīti? ⁹ Himarotari Apiananiri Xesosi Kristo sikari ikinipoko erekari hītemoni. Itanapoko auiniri Xesosi Teoso tixine auakasaaki. Iuaritika itakanapari ikinipoko. Minakati mauakininitinoka itxapeka hīte īkapani. Ininiākara ikinipoko itakanapini xika, ikinipoko aua hītemoni.

¹⁰ Uatxa nota ōtākikai hīte, erekari hīkaminiri hīsākire iaōka, kotxi kita anokanani hīte merepanika xinikari: “Natokopa itxa akaminiri Xerosareē sitatxiti auakani īkapani?” hītxa. Hīte merepanika nirekari txineiro hīsikinina ninoa. ¹¹ Ininiā nōtākikai uatxa. Hīkamariko mitxi hīsākire iaōka. Hīpoxokoniritika hinirekariko hīokanatiniro txineiro ninoamoni, iniñā erekari hīpoxokoniritika hīkaminiri hīsākire iaōka. Ipixini txineiro hītemoni auakaro hīsikako ninoamoni. ¹² Hīpoxokoniritika hinirekiniāri hīsikarauatini Teosomoni, iua apakapapitikari hīsikakiti. Poiāoka auiniāi, iniñā erekapitikari poiāonoka hīsikini Teosomoni. Iua apakapapitikari. Iua imarotari !apakata apikomoni hīsikiniri.

¹³ Kona ate nirekari hīte kaamoni hinini, ikinipoko ninoamoni auini īkapani. Erekari ninoa auakiti hīte auakitiitxikana. ¹⁴ Uatxa hīte txineirote auapitika ninoa hīsikini īkapani. Āti ōti hīte txineirote mauakanisaaki, atxiīti ninoa txineirote aua, iniñā ninoa sikai hīte. Ininiā hīte moianatinina atokotxikana, ninoa moianatai hīte. Ikara atoko inakari atāo. ¹⁵ Teoso sākire iōkatsopatakori txari:

Kiki kaiāopokori apakapakari itetakori !auari. Kiki poiāoka apakapakari !kaamoniri.

Txito Iokanatiko Korītomoni

¹⁶ “Peerekai,” atxari Teoso, kotxi iua sikanireōtari Txito itiretinii hīte, nota tiritinii atokotxikana. ¹⁷ Txito nirekapitikari ate paniātakiti ikamini, hītemoni isini. Apaniātiniiri apisapanika, inirekari hītemoni isini, iniñā ipoxokoniritika isa hītemoni. ¹⁸ Aiokanatarī āti āitari iuakata. Ikinimane Teoso misākiretikoātaā apotiitakaniua itene apokaerekatari iua, kotxi isāpiretari

Teoso iokanapirena erekari ikinimanemoni. ¹⁹ Ninoa mereëri iua aïtari atekata isini Xerosareëmoni, oa txineiro aanikasaaki. Oa txineiro asikakito oerekana Xerosareë auakani Apiananiri ereka inini. Oerekana apoxokoniritika amoianatinina.

²⁰ Oa txineiro kaiãopokoro aua, ininiã iua aïtari siniã atekata, iua imarotari atão asikiniro oa txineiro Xerosareë auakanimoni. ²¹ Anirekari atão akamini oa txineiro asikasaaki ninoamoni. Anirekari Apiananiri imarotiniri atão akamini. Anirekari kãkiti apaka imarotiniri atão akamini.

²² Iuaïkana aiokanatari ãtipekana aïtari hïtemoni. Aãtaerekatapækari iua. Ipoxononiritika imoianatari kãkiti. Apiapoxokonita iua, kotxi imarotari hïte kaminiri mitxi hïsäkire iaõka. ²³ Txitopekana, nota moianari itxaua. Iua miparïkatano nota, hïte amoianatini ïkapani. Xesosi säkire auiãkani mereëna aïtariakori Txitokata sikani hïtemoni. Kãkiti imarotakasaakina ninoa, "Peerekari Kristo," itxana kãkiti. ²⁴ Ininiãkara hõerekana ninoa kikiakori atão hïtoretinina, ininiã ikinimane Xesosi säkire auiãkani imarotari atão hïtiraõkiuatini. Iuasaakiko ninoa imarotari ate säkire atão inini ate iuikini hïte.

9

¹ Nisãpiretai hïte txineiro asikakito ñkane Teoso nakitiakorimoni, Xerosareë auakanimoni. Nimasãpiretakaniã hïte, iuaritika hïte nirekari hïtxineirote hïsikini ninoamoni. Nimarotari ikara. ² Nimarotari iteene hinirekari himoianatinina ninoa. Nitxapekana Masetónia tixini auakani: "Nota iuikana aïtariakori Korïto sitatxiti auakani, Akaia tixini auakani, kotxi kita anokanani ninoa iposope txineiro iokanatinina Xerosareëmoni," nitxana. Hïte poxokoni txineiro hïokanatini, sikanireõtana Masetónia tixini auakani apaka iokanatiniro txineiro. ³ Uatxa niokanatana ninoa aïtariakori ipi ãti pakini hïtemoni. Hïte iposope hininiã hïtxineirote hïokanatini, erekapitïkari, kotxi ikara nisãkire iaõka. Ininiã atão ate iuikini hïte. ⁴ Masetónia tixini auakani siniã notakata, hïtxineirote miposonitipanika, ininiã ate pëtauata, kotxi ate auikari hïsäkire. Hïtepekana apia pëtauata hïsäkire iaõka himakamakani xika. ⁵ Ininiãkara ninirekari ninoa aïtariakori sini hïtemoni nota ereë napokini apisapanika. Ninoa moianatai txineiro kaiãopokoro hïskaenetakito hãpotiitini ïkapani. Ininiã napokasaaki ereë, iposope hïsikakito nanikini. Ininiã iuasaaki aimarotariko kinirão sikaenetaka hinakito txineiro. Iuasaaki aimarotariko hïpoxokoniritika hïsikiniro hïtxineirote.

Takari Itori Auini

⁶ Ia nisãkire hïxinika. Poiãoka komiri pitakiniã pitakarauatakasaaki, poiãonoka iri pimaporoka. Kaiãopokori pitakiniã, kaiãopokori pimaporoka.

⁷ Ininiã pãkixinireë pixinikari atão pisikakiti ãtimoni. Kona erekari pimanirekasikatakiniti pisikini. ãti itapararitika paniãtiniã pisikarauatini, ! apakata. Teoso apokaerekatari kãkiti ipoxokoniritika isikarauatini ãtimoni.

⁸ Teoso posotari ikinipoko erekari isikini hïte, ininiã ikiniõtika ikini sereti hiamonitakiti auiniã, hãpakapari ikinika hinireëkiti. Ininiã ikinipoko erekari hïkama. ⁹ Teoso säkire iõkatsopatakorï txari:

Teoso sikari itori erekari matxineirotenimoni. Teoso kamakiti atão inakari ñixipoka. Auapikako.

¹⁰ Teosora sikari takariki katakarerimoni itakarauatini ïkapani, ininiã eereka iposope inakasaaki, auari kienatxi inikakiti ïkapani. Iua atokokana Teoso sikari kaiãopokori takariki hïtemoni. Iua anekakari hïtakare, ininiã eereka iposope inakasaaki, kaiãopokori auari, ininiã kaiãopokori hïkamakiti atão inakari apanakinimoni. ¹¹ Teoso sikai ikini sereti erekari, ininiã

ikinipoko auape hītemoni. Ininiākara kākiti mauarenimoni hīsikariko kaiāopokori. Ate anikasaakiro hīsikakito apanakinimoni, ninoa txariko: “Peerekari Teoso, kotxi ninoa sikaua ate aamonitakiti,” itxanako.

¹² Ikara atoko inakari hīkaminiā, hīsikari Teoso nakitiakori amonitakiti ninoamoni. Apaka hīsikasaakiri hīsikakiti ninoamoni, ninoa kaiāopokori txari: “Peerekari Teoso,” itxanako. ¹³ Ninoa poxokoniuatoko, kotxi hīte sikari kaiāopokori ninoamoni, apanakinimoni apaka. Ninoa txariko: “Peerekari Teoso,” kotxi imarotarina erekari hīte kamakiti. Imarotarina hīte kaminiri Kristo paniātakiti iaōka. Imarotarina hīte atāo auikiniri Kristo iokanapirena erekari. ¹⁴ Ininiā ninoa misākiretari Teoso hīte ikapani, kotxi iteene ninoa tiretai hīte, kotxi Teoso sikari ikinipoko erekari hītemoni. ¹⁵ Matxari Teoso: “Peerekai pite, kotxi pite sikaua pamarite. Āti pisikakiti iua atoko inakari ! auari.”

10

Paoro Apakapapiretari Apoītiko

¹ Kataparaxinireri Kristo, iuaritika ianaka otākikari kākiti, ininiā nota Paoro ianaka nōtākikai. Txamari apanakini hīte sauaki auakani txari: “Paoro itakoxiti auakasaaki, itapararitika itxitaua ate, atemoni iōkatsopatakasaaki. Txamari iua atekata auakasaaki, ipikarauata amaerekani isāpiretiniua,” itxana. Ikara apanakini sākire na atāo, kotxi itakoxiti nauanāta, iuaritika amaātiki nōtākikai hīte. ² Kona ninirekari noerekini hīte apanakini nitxitini ereē napokasaaki. Nipositapitikari nitapararitika nitxitiniri apanakini ereē napokasaaki, kotxi ninoa txari: “Paoro kamakiti Teoso sākire mauīākani kamakiti atokotxikana,” itxana. Txamari na atāo ninoa sākire. ³ Aīto tapara poiāoka, kotxi kākiti atxaua, ininiā aīto taparaā ! apakata anaiaitini maerekati. Teosora sikataparataua aākixinireē, maerekati anaiaitini ikapani. ⁴ Ate ikeeko kona Xesosī sākire mauīākani ikeeko atokoni. Teoso ikeeko isika atemoni. Kaposotireri Teoso ikeeko, ininiā aposotari Satanasi kamakiti axipokini aiko kaikori axipokini atokokana. ⁵ Kākiti iuikaua. ! Inirekarina auikinirina Teoso imarore. “Paimatireua ate,” itxanātana. Teoso sikaimaroretaraua ate, ninoa sākire paxirari inini aōerekini ikapani. Ikinipoko axinikakiti anireka Kristo nireēkiti iaōka axinikini, ininiā axinikakiti ātiāo auiniā, atxikitakari iua axinikakiti imamakini Kristo nireēkiti iaōka inini ikapani. ⁶ Hīte iteene kamakasaakiri Kristo nireēkiti iaōka, ate misiritariko kākiti ereē Kristo nireēkiti imakamakanisaaki.

⁷ Hīte xinikari hātamatakitinoka. Kona hīxinikari kākiti ākixinireē auakari. Kākiti ereē uākatiniāri Kristo nakiti ininiuana, erekari imarotinirina ate apaka Kristo nakitiakori aniniua, ninoa Kristo nakiti ininiuana atokotxikana. ⁸ Atxiiti iteene niuikari Apiananiri sikaposotiretiniua ate, iuaritika kona nipētauata niuikiniri ikara, kotxi Apiananiri sikaposotiiretaua ate, hīte akamataparaxiniretini ikapani. Kona ate nirekari hīte ākixinire tapara poiāoāpotini. ⁹ Kona ninirekari hīpikarauatini, iōkatsopari niokanatsopatakiti hātatsopatini xika. ¹⁰ Apanakini txari: “Paoro txitaua itapararitika iokanatsopatakitiā, txamari iua atekata auakasaaki, isākire ātiāo. Iuasaaki kona kataparaxinireri iua. Iuasaaki ipikarauata ate itxitini,” itxana apanakini. Na atāo ninoa sākire. ¹¹ Itakoxiti ate auakasaaki, asākire aiokanatsopatakiti iuatxikana asākireta, ereē hītekata aūauakasaaki.

¹² Ninoa ate misākirepiretani iteene iuikaua. Atauako ninoa apiaerekata? Atauako ! erekaua ate? ! Kiūkitena ninoa. Ninoa uākatari ninoa kamakitinoka erekari inini, ininiā ninoa iaōtari apanakini kamakiti. Apanakini kamakiti ninoa kamakiti atoko ininiā, ninoa uākatari apanakini kamakiti

apaka erekatxikana. Txamari na atâo. ¹³ Atepekana, kona ate iuikari ateka kamakiti. Ate iuikari parîkatxi Teoso sikakiti atemoni akamini ikapani. Iuanoka ate iuika. Iua paniâtaua aparîkauatini hîte ikapani. Iua aparîka ate iuikapitika. ¹⁴ Teoso paniâtakitinoka akama. Ia aparîka, ininiâ ate sari hîtemoni Kristo iokanapirena erekari asâpiretini ikapani. Ininiâ apakatapitika ate iuikiniri ikara aparîka. ¹⁵ Apanakini parîka Teoso ikapani ate kona txari: “Iua parîkatxi ate kamakiti,” kona atxa. Ate nirekari hîte auikaâpotiniri Kristo sâkire, Kristo sâkire iteene hâuikini ikapani, ininiâ ate nirekari aparîkauatini Teoso ikapani hîte auiniâtaâ, Kristo sâkire apanakini auikini ikapani. ¹⁶ Ate nirekari Kristo iokanapirena erekari asâpiretini kâkiti, hîte tixine apiko auakani Xesosi sâkire masâpiretakotipanika ininiâtaâ. Ininiâ kona aparîkauata apanakini parîkauatiniâtaâ. Ininiâ apanakini parîka: “Ate parîkakara iua,” kona atxari.

¹⁷ Teoso sâkire iôkatsopatakori txari:

Pinirekatari piuikarauatini? Pinirekiniâri, ininiâ piuikariko Apiananiri kamakitinoka.

¹⁸ Teoso kona apokaerekatari kâkiti iuaka, “Erekapitikano,” inakari. Teoso sâpiretiniâri: “Erekapitikari iua kâkiti,” ininiâ Teoso apokaerekatari iua.

11

Teoso Maiokanatakini

¹ Atxiîti mîkiteti sâkirauatini atoko nimisâkiretai hîte, iuaritika hâuiritano nota. ² Teoso nirekini hîte iua nakitiakorinani hininiua, iua atokotxikana nota nirekai hîte Teoso nakitiakorinani hininiua. Nisikaenetai Kristomoni hîtaniri atoko inini ikapani. Iuamoninani nisikaenetai. Ninirekari iuamoni nisikini, âtokoro kîkikata masirîkakato atoko inakaro. ³ Kitxakapirîka Satanasi auaitotari imini. Iua imini misirienetaro Eva, kotxi paimatireri Satanasi sâkire. Nipîkari Satanasi misirienetini hîte apaka, ininiâ ereka hîxinikakiti na atâoni. Nota pîkari Xesosi hîtakanapini. Mitxi iteene hîtoretari iua. Iuananira hîtreta. ⁴ Kotxi hîte apakapari hîpoxokoniritika ikinimane ereë apokakani, “Ate Xesosi sâkire sâpiretakaniua” inakani, txamari Xesosi pirena ninoa sâpiretakiti na atâoni. Konâ ate sâpiretari ikara atoko inakari, iuaritika hâuikari ninoa sâkire. Hâuikasaakiri ninoa sâkire, atxiîti hâpakapari matamatakoti, txamari kona hâpakapari Erekarî Matamatakoti ate sâpiretakiti. Ate sâpiretai hîte atâo Kristo iokanapirena erekari, txamari hîte auikari âtiâo.

⁵ Hîtemoni, Teoso iokanatana ninoa kâkitimoni. Hîtemoni, ninoa Teoso iokanatakini apiarini. Nota poiâo atxiîti? Ninoa apiata atxiîti? Konapitini.

⁶ Atxiîti kona nota iteene imarotari nisâkirauatini, iuaritika nimarotapitikari Teoso sâkire. Himarotapekari ikara atoko inakari, kotxi asâpiretapekai.

⁷ Teoso iokanapirena erekari nisâpiretakasaakii hîte, maxikatiika nisâpiretai. Kona ninirekari hîkitxitinino, ininiâ nota poiâotakaua, hîte atâo inakari himarotini ikapani. Ikara atoko nikerokatari atxiîti? ⁸ Hîtekata nîparîkauatakasaaki, kâkiti âtiâtaâ Xesosi sâkire auîâkani iokanataro txineiro notamoni, txamari kona nota moianatana ninoa iuasaaki. Hîtekara nimoianata iuasaaki. ⁹ Hîtekata nauakasaaki, nota nirekamaro txineiro. Txamari kona nota amanaâi hîtxineirote. Aîtariakori Masetônia tixinikini mininano itanapoko niamonitakiti. Iua atokotxikana kona namanaâpaniro hîtxineirote nota ikapani, kotxi atxiîti nota minari atoko nitxa hîporikiâ. Kona ninirekari ikara atoko inakari nininiua. ¹⁰ Kristo atâonoka isâkire. Isâkire nâkixinireë auape, ininiâ nota sâkire apaka atâo. Nisâpiretapanikari kâkiti hîtxineirote nimanirekakani pirena. !Auari ikara nisâkire iotokakakari ikinika Akaiata tixiniâ. ¹¹ Kinirepa ikara atoko nitxa sâkireta? Atxiîti kona nitiretai hîte? Teoso imarotari nota iteene tiretini hîte.

¹² Uatxa iuaïkana nisâpiretai hîtxineirote nimapakapakani. Nanera kâkiti uatxa hîtekata auakani Teoso maiokanatakini txari: “Ate kamari Paoro parîkatxikana,” itxana. Ikara atoko ininiã iuikauana. Txamari ninoa parîka âtiã, kotxi ninoa apakaparo hîtxineirote. Ate kona apakaparo hîtxineirote. ¹³ Teoso kona iokanataka nanera hîtemoni. Na atão Teoso iokanatakini ! itxauana. Imisirienetaina hîte, “Aparîkauata Teoso ïkapani,” inakasaakina. Nanera txari: “Kristo iokanatakini raua ate,” itxana. Txamari na atão nanera sâkire. ¹⁴ Ikara atoko inakari auapitika, kotxi Satanasi sari kâkitimoni. Itxari: “Nota Teoso nitiri nitxaua. Nota oerekai atão inakari.” Ininiã iua sâkire auiãkani auapitika. ¹⁵ Ininiãkara nanera kikiakori Satanasi nitiriakori txari: “Atão inakari kamakanuia ate. Teoso nitiriakori atxaua,” itxana. Xipokatxi ôtisaaki imisiritaãkanako ninoa maerekati ikamakitina xika.

Paoro Misiritiko Pirena

¹⁶ Iuaïkana nisâpiretai. Miïkiteti ! nitxaua, iuaritika hîte potxitari kâkiti miïkiteni, ininiã miïkiteti atoko niuikaua, kotxi nota posotari niuikiniua. ¹⁷ Apiananiri kona sâkirauata ia atoko. Miïkitetinoka sâkirauata ia atoko iuikiniua. ¹⁸ Nanera kikiakori iuikaua, Teoso sâkire mauïãkani iuikiniua atokokana, ininiã nota apaka sâpiretari niuikiniua. ¹⁹ Hîte auiritari kâkiti miïkiteni himoianarini ininiua, kotxi !kîikitei hîte. ²⁰ Nanera hîtekata auakani txîkitakai hîte iniritiakorina hininiua. Hîte auiritari ikara atoko inakari. Nanera amanaaãpotari ikini sereti hîte nakiti. Ikamarina inireëkitina hîtemoni. Ipaniãtaina ikiniôtika inireëkitina hîkamini. Imisiritaina hîte. Hîte auiritari ikara atoko inakari ikaminina. ²¹ Erekari nipêtauatini atxiïti? Kotxi kona kataparaxinireno nota nanera kamakiti atoko nikamini hîtemoni. Kataparaxinirena nanera.

Ikamakitina iuikana, ininiã miïkiteti atoko kataparaxinireno nota. Nikamakiti niuikako. ²² Nanera Epireoakorikani? Ari. Nota apaka Epireo nitxaua. Nanera Isaeo apaka mekaniriakorikani? Ari. Nota apaka Isaeo apaka mekaniri nitxaua. Nanera Apraão apaka mekaniriakorikani? Ari. Apraão apaka mekanirikanarano nota apaka. ²³ Nanera Kristo nitiriakorikani? Atxiïti. Miïkiteti iuikiniua atoko nitxa: “Kristo nitiri api-aerekatakari nitxaua nota.” Nota apia parîkauata Teoso ïkapani. Apiata nimisiritiko, kotxi kaiãokatani kateia âki nitakaãka. Kaiãokatani nota noropataãka aãpitsaã. Kaiãokatani nipinaarita. ²⁴ Ipi ipi âti pakinikata Xoteoakori noropatano aãpitsaã. Iuasaaki inoropatanona trita novi pakinikata. ²⁵ Ipi âti pakinikata Homanoakori noropatano aãkeë. Âtikata kai soroã nikiporonakaãka. Ipi âti pakinikata maporoã nisikasaaki, maporo sakika apanîkakiã. Âti ïkanôkati, âti pokamarariti pakini ninapa potxoari uiniti nipimakaãtini. ²⁶ Nianaxititapika. Natamonôkonitari uini torôkani. Natamonôkonitari kîitiririni. Natamonôkonitari ninirimane. Natamonôkonitari ninirimane minakanuia. Natamonôkonitari sitatxi nauakasaaki, kâkiti mauakaniãtaã nauakasaaki, potxoari uiniti nîpîriãtakasaaki pakini. Natamonôkonitari kâkiti, “Xesosi sâkire aãuika” inakanikata nauakasaaki, kotxi na atão ninoa sâkire. ²⁷ Kaiãokatani nisãpaka itori parîkatxi xika. Kaiãokatani nitsii aua. Kaiãokatani kona apakata nimakini ïkanôka. Kaiãokatani ninatxita, nîposonata. Kaiãokatani nipokori !auari. Kaiãokatani nimîteenekari katxîkareri. Kaiãokatani nimãka ! auari. ²⁸ Ikara atoko inakari monôkori auapika notamoni. Apaka nîparîka kasãpaniri aua, kotxi ikiniôtika nîparîkauata kâkiti Teoso misâkiretikoãtaã apotiitakanuia ïkapani. ²⁹ Âti iôkapetiniã, nota apaka niôkapeta. Âti txîkitakaãka maerekati ikamini, ininiã nota maerekaxiniretinoka nitxa.

³⁰ Hîte nirekiniâri niuikiniua, ininiâ niuikari niôkapere. ³¹ Aãuîte Xesosi Kristo iri, Teoso imarotari nisâkire atão inini. Âtipirika matxari: "Peerekai." ³² Tamásiko sitatxiti nauakasaaki, kãkiti auîte apiari Areta inakori auakasaaki, Tamásiko auakani auîte paniâtari sotatoakori kaikotini sitatxi kãkiti Ìronakiniãtaã nota imaïkinina Ìkapani. ³³ Txamari kona nota pokïka sitatxi toreãtaã. Niïroã kotari mitari ãki. Iuasaaki aïtariakori iokatxakano aapokotxi sonã sitatxi pirikere mapara. Ixitiþe apoka nitxa. Ikara atoko itxa nimitekini, ininiã kona ninoa maïkano iuasaaki.

12

Taponetxi Teoso Sikiniri Paoro

¹ Hinirekatari apikomoni niuikiniua? !Apakata, iuaritika hinirekiniâri, niuikapanikauako, kotxi Apiananiri sikano taponetxi peereri. Iua oerekano imarore. ² Akokaxiti katosi anokanani inakasaaki, nanikaãka Teoso tixinemoni iaxiti apiko nopinixiti. Iuasaaki nitaponeuataako? Atxiïti niïto atão anikaãkauako? Kona iteene nimarotari. Teosonokara imarotari. ³ Ianoka nimarota. Nanikaãka Teoso tixinemoni nitaponeë atxiïti, atão niïto anikaãka atxiïti. Teosonoka imarotari. ⁴ Iuaxiti nikenakotari sãkiretxi erekari. Ikara kona nimarota iuaïkana nisãpiretini. Apaka !auiritaãka nisãpiretiniri kãkiti. ⁵ Ninirekiniâri, niuikari nitapone ikara atoko inakari, txamari !apakata notaka niuikiniua. Niôkaperenoka niuika. ⁶ Ninirekiniâri niuikiniua, atãonoka nisãpireta, kotxi kona miïkiteti !nitxaua. Txamari kona ninirekari niuikiniua, kotxi atxiïti kãkiti uãkatari nota apiari nininiua. Ninirekari kãkiti atão imarotinino. Erekari kãkiti imarotinino nisãkireë, nikamakitiã pakini.

Paoro Misiritiko Inako Tsii Atoko Inini

⁷ Peerekari nitikakiti Teoso tixine nanikikosaaki, iuaritika Teoso kona nirekari niuikiniua, ininiãkara Teoso auiritari Satanasi misiritinino niïtoã. Katsiiri. Inako atoko itxa niïtoã, ininiã niuikiniua !auari. ⁸ Ipï ãti pakinikata namanaãri Apiananiri ia nitsii imakatsakini. ⁹ Txamari itxano: "Kona nikamakatsakari. Ikinipoko erekari nisikakiti sikataparatai. Iuanoka pinireka. Piôkapetakasaaki, nota tapara pãkixinireë apiata," itxano. Ininiãkara nipoxokoniritika niuikari niôkapere, kotxi iuasaaki nimarotari Kristo posotiire nãkixinireë auini. ¹⁰ Niôkapetakasaaki, nipoxokoniuata. Nixiniketikosaaki, nipoxokoniuata. Nimaxikikosaaki, nipoxokoniuata. Nimisiritikosaaki, nipoxokoniuata. Nikamakiti tïkane nimimarotakanisaaki, nipoxokoniuata. Ikara atoko inakari nimïteeneka nipoxokoniritika, kotxi Kristo nakiti nitxaua. Niôkapetakasaaki, nitapara nãkixinireë apiata.

Paoro Nirekari Erekari Korïto Auakanimoni

¹¹ Miïkiteti sãkirauatini atoko nisãkirauata, txamari hîte xika nisãkirauata miïkiteti sãkirauatini atoko, kotxi hîte iuikaãkamanoko nota, kona nota nirekamariko niuikiniua. Minakati nitxaua, iuaritika nanera Teoso maiokanatakini hïtekata auakani kona apiaerekata. ¹² Hïtekata nauakasaaki, nikamakiti oerekai atão Teoso iokanatakiti nininiua, kotxi iuasaaki noerekai Teoso oerekakiti kãkitimoni. Noerekai kãkiti maposotakiniti. Noerekai posotiiretxi iuasaaki. !Asãpaka ikara atoko inakari aõerekinii hîte. ¹³ Atxiïti apiata nitiretatari apanakini Teoso misãkiretikoãtaã apotiitakaniua ãtiãtaã auakani? Konapitini. Ninoa nitiretini atokotxikana nitiretai hîte. Namanaãna ninoa txineirote namonitakiti Ìkapani. Hîte txineirote kona xatiki namanaãni, ininiã nikerokotari atxiïti? Himaxinikaretariko ia nikerokakiti.

¹⁴ Ipikata nisipeka hïtemoni. Naiamatapeka iuaïkana hïtemoni nisini tïkane. Kona hïtxineirote kona namanaãpanii. Hïtxineirote kona ninireka. Hïtera

ninireka. Amarini kona nīkatana iri, inoro pakini. Iri, inoro pakinira nīkatana imiakori. Nota hīri atoko nitxaua. ¹⁵ Nipoxokoniuata ikinika nota nakiti nisikinii hīte. Notaka nisikaua hītemoni. Nipoxokoniritika nisikai. Txamari nota tiraōki hīte īkapani apiaāpotakasaaki, hīte tiraōki nota īkapani poiāōpota.

¹⁶ Atāokani ikara atxiīti? Iuaritika ia nimarota. Kona xatiki namanaāi hinakiti hīsikinino. Atxiīti āti ereē auakari txari: “Paoro misirienetaua ate. Paxirari isākire,” itxa atxiīti. Txamari ikara na atāo. ¹⁷ Natokopa nitxa nimisirienetini? Atauako kikiakori hītemoni nota iokanatakini misirienetai hīte? !Imisirienetaina. ¹⁸ Nōtākikari Txito hītemoni isini tīkane. Nipaniātari āti āitari iuakata isini. Atauako Txito misirienetai hīte? Konapitini. Erekarī Matamatakotira anikano nota. Iua apaka anikari Txito. Nota sari Xesosi nirekinimoni. Txito apaka sari iua nirekinimoni.

Paoro Pīkare

¹⁹ Atxiīti hīte xinikari ikara asāpiretai, ate ereka anini himarotini īkapani. Konapitini. Ate sākiraauata hītekata Kristo sākirauatini atokokana, kotxi Teoso atamataua. Ate tiretakini hītxaua hīte, ininiā ikinipoko akamakiti akaminii hīte, hīte ākixinire tapara auini īkapani. ²⁰ Nipīkarauata ereē napokini, kotxi atxiīti hīte kamari nimanirekakiniti. Atxiīti napokasaaki ereē, kona hīte apokaerekatano nota. Ereē napokasaaki, nipikari nimarotiniri hīte txitakakiniua, hīxikotakakiniua, homanatakakiniua, hīpotxinani auini, himisākirepiretakakiniua, aāpirena hīsāpiretini, hūiukiniua, hineenamauatini. Ikara nimarotini nipika, ereē napokasaaki. ²¹ Ininiā hītemoni napokasaaki, nipikari Teoso kamapētatinino nota hīte maerekani xika. Nipikari nitxiapatini maerekati hīkamakiti xika, kotxi kaiāopokori kamari maerekati akokaxiti, iuaritika !itakanapapanikari iua maerekati. Ixinikakitina maerekatinoka. Maerekati ikini sereti iītona nireēkiti aua. Ītanoro minakotokatika isirīkana. Ikara atoko inakari kona itakanapapanikana.

13

Paoro Sākire Imapotōkire Ōtākikare

¹ Ipikata nota sari hītemoni. Iuaīkana hītemoni nisako. Teoso sākire iōkatsopatakori txari:

Ipi āti pakini kākiti atamatiniāri maerekati āti kamakiti, ninoa sākire auikaāka, ininiā iua maerekati kamakari misiritaākako. Ipi kākiti atamatiniāri maerekati āti kamakiti, ninoa sākire apaka auikaāka, ininiā iua maerekati kamakari misiritaākako,

itxa Teoso sākire. ² Akokaxiti hītekata nauakasaaki, nōtākikapekai hi-maerekani hītakanapini. Iuasaaki nōtākikana mitxi maerekati kamakani, apanakini apaka. Nitxana: “Ātikata uai napokasaaki, nimisiritapitikari ikinimane maerekati kamakani,” nitxapekana. Iuaīkana uatxa itakoxiti nauakasaaki, ikara nisākiretxikana nisāpiretai hīte. ³ Hīte nirekari himarotiniri: “Atāokani atxiīti Paoro sāpiretari Kristo sākire?” hītxa. Napokasaaki ereē, himarotapitikariko atāo nisāpiretiniri Kristo sākire. Kristo !iōkapeta. Oerekapakai iposotiire hīte sauaki. ⁴ Kristo okikosaaki aamina ipiriāmitakari nopini, iīto iōkapere aua. Uatxa kataparari iua, kotxi Teoso sikataparitari iua. Ate iīto apaka iōkapeta, mitxi Kristo iīto iōkapetini atoko, iuaritika Teoso sikataparataua Kristokata aūini hīte amoianatini īkapani.

⁵ Hīxinikariko hākixinireē auakari. Atāokani hāuikatari Teoso sākire? Hīteka ataerekatauako. Himarotitari Xesosi Kristo hākixinireē auini? Teoso sākire hākixinireē mauakaniā, Kristo Xesosi !auari hākixinireē. ⁶ Ninirekari himarotiniri Kristo Xesosi auini ate ākixinireē. ⁷ Ate misākiretari Teoso, maerekati hīte makamakani īkapani. Kona ate nirekari kākiti sākire: “Peerekari Paoro.

Iua imarotapitikari Teoso sākire oerekini, kotxi Korīto sitatxiti auakani kamari Teoso sākire iaōka.” Ikara kona ate nireka, ate iuikiniua ikapani. Atxiīti kākiti uākatari Xesosi Kristo !auari ate ākixinireē, iuaritika ate nirekari hīte kaminiri atāonoka. ⁸ !Apakata aiotokakiniri atāo inakari. Atāo inakari auapika. Atāo inakari !ixipoka. Apakata aōrekiniri atāo inakari. ⁹ Atxiīti ate iōkapeta, iuaritika apoxokoniyata hītaparaxinire akenakoene-takasaaki. Ate misākiretari Teoso hīte atāonoka hīkamini ikapani ikiniōtika, Xesosi sākire iaōka hīkamini ikapani. ¹⁰ Ikara atoko inakari niōkatsopata hīte ikapani hītekata nimaukanisaaki, kotxi ereē napokasaaki, kona ninirekari nitxitinii hīte. Niposotapitikari nitxitinii, kotxi Apiananiri sikaposotiire-tapekano atāo nikamini hītemoni. Txamari kona ninirekari Xesosi sākire hītakanapini, nota txitinii xika. Ninirekari hīte kataparaxinire hinini, Xesosi sākire iteene hāuikini ikapani.

¹¹ Nitariakori, xipope niōkatsopare. Ereēpiko. Ikiniōtika atāonoka hīkamako. Xesosi sākire iaōka hīkamako. Hīkamariko nisāpiretakiti iaōka. Hīxinikakiti ātinoka itxauako. Kona hītxitakapeua. Ininiākara Teoso katiraōkiri, kauāireri, auapikako hītekata.

¹² Haōkitakakasaakia, hīpoxokoniritika hāpakapakakauako, kotxi Apiananiri nakitiakori hītxaua.

Ikinimane Teoso nakitiakori uai auakani xinikamanapitai hīte.

¹³ Apiananiri Xesosi Kristo sikari ikinipoko erekari hītemoni. Teoso iteene tiretai. Erekari Matamatakoti moianatai hīte hīkinika. Ameē.

KARÁSIA

Paoro Iokanatsopata Karásia Auakanimoni

¹ Nota Paoro iokanatsopata ia aätsopa hitemoni. Nota Teoso iokanatakinitino kãkitimoni Teoso iokanapirena nisãpiretini ïkapani. Kona kãkitini iokanatanano nota. Xesosi Kristora iokanatanano nota. Aïri Teoso, Xesosi ipinaãka atoko õkitikakarira, iuara iokanatanano nota kãkitimoni. ² Ikinika aïtariakori notakata auakani, nota apaka xinikanãtai hïte. Hïte ikini aikoti Teoso misãkiretkoãtaã apotiitakaniua Karásia tixini auakani axinikanãtapika.

³ Aïri Teoso, Xesosi Kristo aãũte pakini sikari ikinipoko erekari hitemoni. Ninoa kamaerekaxiniretai hïte.

⁴ Xesosi ipina amaerekani imakatzakini ïkapani. !Erekari uatxa auakani. Maerekati kamakani sauaki aãuakasaaki, Xesosi ipina ate imakatzakini ïkapani, amapinakani ïkapani. Xesosi ipïpe ate ïkapani, kotxi aïri Teoso nirekari Xesosi ipinini ate maerekani imakatzakini ïkapani. ⁵ Ikiniõtika: “Peerekai,” matxari Teoso. Ätipirika kãkiti txapikari Teoso: “Peerekai.” Ameë.

Äti Iokanapirena Erekari !Auari

⁶ Nikenakopiretari Teoso hïtakanapaãpotini. Iuasaaki nitsorïkaãnãta. Kinirepa hïtakanapari Teoso säkire? Kotxi mapa kasiritunoka hïte auikari Teoso iokanapirena erekari. Kristo iteene tïretai hïte, ininiã akiritai hïte inakitiakori hininiua ïkapani. Kinirepa hãuikatari äti iokanapirena? ⁷ Atão nisãpiretai hïte. Äti iokanapirena erekari !auari. Nikenakopiretari kãkiti hïte oereëkani. Ninoa nirekari ikoketinirina isãkirena Kristo iokanapirenakata. Uatxa !himarotaikari atão säpirenatxi. ⁸ Atão asãpiretapekai Teoso iokanapirena erekari. Ätião säkiretxiti asãpiretiniã, Teoso iokanataua ate kãkiti misiritikomoni, ätipirika misirikaretxi auiniãtaã. Teoso nitiri iax-itikiri apaka säpiretiniã ätião iokanapirenatxi, Teoso iokanataru iua iniriti imisiritikomoni ätipirika misirikaretxi auiniãtaã. ⁹ Hïte auikapekari Teoso iokanapirena erekari. Ätião iokanapirenatxi säpiretakari säpiretiniã Teoso iokanapirena atão minakati, iokanataãkako imisiritikomoni ätipirika misirikaretxi auiniãtaã. Asãpiretapekai ikara inakari säkiretxiti. Uatxa iuaãkana nisãpiretai.

¹⁰ Ikara atoko nitxai hïte, ininiã himarotari kona ninirekari: “Peerekari Paoro kamakiti,” niniko. Nota nirekari Teosonoka: “Peerekari Paoro kamakiti” ininino. Nanera atão minakati säpiretakani txai hïte: “Paoro nirekari kãkiti apokaerekatiniri iua.” Ikara na atãoni. !Ninirekari kãkiti apokaerekatinino nota. Ninirekiniãri kãkiti apokaerekatinino, kona Kristo nitiri !nitxaikaua.

Teoso Akiritari Paoro

¹¹ Nanera atão minakati säpiretakani hïte oereëkani: “Paoro iokanapirena kona Teoso iokanapirenani,” itxana ninoa säkire. Nitariakori atãopitikara nisãpiretai hïte. Iokanapirenatxi hitemoni nisãpiretakiti kona kãkiti säkireni. Teoso säkirena. ¹² Kona kãkitini säpiretano ia iokanapirenatxi. Kona kãkitini oerekano. Xesosi Kristora säpiretano nota iua iokanapirenatxi.

¹³ Hïte imarotari mitxi nauakasaaki, Xoteo kiomaneakorini oerekakiti naukasaaki, iuasaaki kona nitiretana Xesosi säkire auããkani. Iteene nimisiritana ninoa. Ninirekari nixipokiniri Xesosi säkire kïpitakani. ¹⁴ Iuasaaki nimarotari Xoteoakori kitxakapirïkarini paniãtakiti. Nikamari imakinika

ninoa paniätakiti. Iuasaaki nimoianariakori apaka kamari ninoa kitxakapiriikarini paniätakiti. Nota apiata kamari ninoa säkire iaõka. Iteene ninirekari nikaminiri kitxakapiriikarini paniätakiti.

¹⁵ Teoso iteene tiretano nota. Iua mereëno nota nauini apisapanika. Iuasaaki akiritano nota iniri nininiua tikane. ¹⁶ Teoso keto manapi apokasaaki, oerekari imi notamoni, imi Xoteo minakonimoni nisäpiretini ikapani. Iuasaaki kona nisäpiretari käkiti Teoso oerekakiti säkiretxiti, ininiã na käkiti nisäpiretano nikamakiti tikane. ¹⁷ Iuasaaki kona nisari Xerosareë sitatxitimoni, ininiã nota apisapanika Teoso iokanatakini kona õtäkikano. Kona käkitimoni nisa noerekiko ikapani. Arápia tixinimoni nisapitipo. Eereka nikanapiriã Tamásiko sitatxitimoni.

¹⁸ Ipi anokanani, äti anokanani pakinikanani napaäka atoko, nisa Xerosareëmoni Petro nimisäkiretini ikapani. Ipi semanati ninapa Petrokata. ¹⁹ Apanakini Teoso iokanatakini isäkire säpiretakani kona naõkita. Apiananiri itari Txiake inakorinoka naõkita. Ininiäkara kona käkiti säkireni nisäpiretai hite. Teoso iokanapirenakara nisäpiretai hite.

²⁰ Ia niõkatsopatakiti nisäpiretakiti hitemoni atão inakari. Teoso imarotari atão inakari nisäpiretini.

²¹ Xerosareëmoni nisaäka atoko, nisari Síria tixini, Sirísia tixini apaka. ²² Iuasaaki Kristo säkire auiakani, Xotéia tõpa auakani, !aõkitapanikano nota iuasaaki. ²³ Ninoa imarotari apanakini minapiretakiti. Apanakini säkire: “Kiki mitxi ate misiritakari, uatxa säpiretari Xesosi säkire. Mitxi iua nirekari ixipokiniri Xesosi oereëkiti säkiretxiti, iuaritika uatxa inirekari oerekiniri Xesosi oerekakiti säkiretxiti käkitimoni,” itxana apanakini säkire. ²⁴ Ininiäkara ninoa: “Peerekari Teoso,” itxana, kotxi nota auikapekari Xesosi säkire.

2

Xesosi Iokanatakini Apakapari Paoro

¹ Katosi anokanani napaäka atoko, nikanapiriã Xerosareëmoni nimoianari Panapee inakorikata. Nanikari nimoianari Txito inakori apaka notakata. ² Xerosareëmoni nisa, kotxi Teoso oerekano nisini iuamoni. Iuaã napokasaaki, nisäkirauata Xesosi säkire auiakani auiteakorikata. Ni-noakatanoka nisäkirauata. Teoso iokanapirena erekari Xoteo minakonimoni nisäpiretakiti nisäpiretana ninoa. Nota nirekari ninoa imarotiniiri nisäpiretakiti atão inini. Apaka ninirekari ninoa imarotiniiri iuaikana katana nisäpiretakiti atão inini ikapani. Nisäpiretakiti ikenakotakasaakina, ninoa: “Atãopitikara pisäpiretakiti Xoteo minakonimoni,” itxana. ³ Txito nimoianari na Xoteo ! itxaua. Krekora itxaua, ininiäkara Teoso takaõtxikare ! auari iuamoni, iuaritika Xesosi säkire auiakani auiteakori na paniätari it-siki mata kisauakiko. ⁴ Mitxi apanakini kikiakori apoka iuaã. Ninoa säkire: “Ate auikari Xesosi säkire,” itxana ninoa. Txamari na atão ninoa säkire. Ninoa apotiitaua Xesosi säkire auiakankata. Inirekarina Txito itoã Teoso takaõtxikare takiko. Ninoa nirekari imarotiniirina kitxakapiriikarini Xoteo kiomaneakorini paniätakiti atakanapini, kotxi atakanapapekari ipixini ninoa paniätakiti, kotxi Kristo Xesosi nakitiakori atxapekaua. Ninoa nirekari imarotiniiri ikinika ate oerekakiti säkiretxiti. Ninoa nirekari ate kaminiri ikinika kitxakapiriikarini Xoteo kiomaneakorini paniätakiti. Ninoa nirekari ikinika Xesosi säkire auiakani, Xoteo minakanuia apaka kaminiri Xoteo kiomaneakorini paniätakiti. Ninoa nirekari nitiritxi amotakoni atoko aniniua. ⁵ Kona xatikí akamari ninoa nireëkiti, kotxi inirekarina Teoso iokanapirena atão inakari akoketini Xoteo kiomaneakorini paniätakitikata. Ate nirekari Teoso iokanapirena atãonoka inakari asäpiretini.

⁶ Xesosi sáikire auíákani auíteakori txari notamoni: “Xoteo minakonimoni pisápiretakiti erekapitikari. Apikomoni ate sáikire !auari ninoa pisápiretini íkapani,” itxana. Ninoa auíteaxiakori itxauana, uaritika Teosomoni ninoa apanakini kákiti poiáorini atoktxikana itxauana, kotxi Teoso atamari aáixinire. Ininiákara nota !nipíkari auítetxi. ⁷ Ninoa Xesosi sáikire auíákani auíteakori apokaerekatari nipaírka. Ninoa imarotari Teoso sikano nota ia paríkatxi, ia iokanapirenatxi erekari nisápiretinina Xoteo minakaníua. Iua atoktxikana Teoso sikari paríkatxi Petromoni, iokanapirenatxi erekari Xoteoakori isápiretini íkapani. ⁸ Teoso iokanatari Petro Xoteoakorimoni, ininiá isikaposotiiretari iua ninoa sauaki ipaírkaauatakasaaki. Iua atoktxikana Teoso iokanatano nota Xoteo minakonimoni. Nota apaka isikaposotiireta ninoa sauaki nipaírkaauatakasaaki. ⁹ Iuasaaki ninoa auíteakori Txiako, Petro, Xoão pakini imarotari Teoso sikinino notamoni ia paríkatxi, ininiákara imaíkarina niuako, Panapee uako pakini, kotxi akinika aparíkauata Teoso íkapani. Akinika aápoaerekatari nota, Panapee pakini sápiretiniri Teoso sáikire Xoteo minakonimoni. Akinika aápoaerekatari Txiako, Petro, Xoão pakini sápiretiniri Teoso sáikire Xoteoakorimoni. ¹⁰ Ninoa paniátua ate matxineiroteni atiretini. Iuanoka ipaniátua. Napokaerekatari ninoa sáikire, kotxi ninirekapitikari matxineiroteni nitiretini.

Paoro Ótáikari Petro

¹¹ Eereka Petro motikaétaua ate Átxiokia sitatxiti aáuakasaaki. Iuasaaki Petro kamakiti na atáoni. Ininiákara nota sákirauata Petro apisatoó: “Petro, pite kerokari,” nitxari iua. ¹² Merepanika Petro nipokota ikiniótika aítariakori Xoteo minakonikata. Eereka átikaka kikiákiñi apoka Txiako iokanatakini. Iuasaaki Petro píkana ninoa, ininiá kona inikaika aítariakori Xoteo minakonikata, Xoteo kiomaneakorini sáikire xika, kotxi ninoa sáikire: “Kákiti Teoso takaótxikare ítoá mauakaniá, !pinipokotape ninoakata,” itxana ninoa sáikire. Petro píkana Txiako iokanatakini, kotxi ninoa nirekari Teoso takaótxikare auini aítariakori ítoá, Xoteo minakaníua ítoá. ¹³ Apanakini Xoteoakori Xesosi sáikire auíákani apaka kamari Petro kamakiti atókokana, ininiá ninoa apaka kerokari. !Inipokotaikana aítariakorikata, Xoteo minakonikata. Ninoa kerokiniri xika Panapee apaka kerokari. Iua apaka !inipokotaika aítariakorikata, Xoteo minakonikata. ¹⁴ Nimarotakasaakiri ninoa kerokiniri ikamakitina, nota misákirotari Petro ikinimane ókiátaá, kotxi ninoa !ikamari atáo inakari. Teoso iokanapirena erekari iaóka !ikamana. Nitxari iua: “Xoteokarai, uaritika pauanáta Xoteo minakaníua sauaki, ininiá Xoteo kamakiti atoko !pikamaika. Xoteo minakaníua atoko pitxaua. Ininiákara kinirepa pite paniátana Xoteo minakaníua: ‘Híkípitariko Xoteo kiomaneakorini sáikire?’ !Erekari,” nitxa Petromoni.

Xesosi Sáikire Auikiko Kamaerekatari Kákiti

¹⁵ Ate Xoteo atxaua, kotxi aírri, ainoro pakini Xoteo txaua apaka. Xoteo kiomaneakorini sáikire: “Xoteo minakaníua maerekati kamakani itxauana,” itxana isákirina. Xoteo minakaníua !atxaua ate. ¹⁶ Aimarotari, aáukiniári Xesosi Kristo sáikire, iua kamaerekatari aáixinire, ininiákara Teoso apakapaua. Kítxakapírka Teoso sápiretari Moisesi ipaniátakiti kákiti kamini íkane. Ininiákara Moisesi iókatsopatari ikara Teoso sáikire. Txamari !aposotari akaminiri imakinika Teoso paniátakiti, Moisesi iókatsopatakiti, ininiákara líka-maerekatari aáixinire. !Apakapaua ate. Ate auikari Xesosi sáikire ereka anini íkapani, ininiá Teoso apakapapitikaua ate. Teoso paniátakiti iókatsopatakori íkinika !aposota akamini, ininiá Xesosi kamaerekatari aáixinire Teoso

apakapiniua ikapani, Kristo sãkire aãuikasaaki. ¹⁷ Anirekasaakiri Teoso kamaerekatiniua, aãpoka Kristomoni. Iuusaaki aimarotari maerekati kamakani aniniua. Iuaritika Kristo makatzakari amaerekani Teoso apakapiniua ikapani. Ikara atoko ininiã, atxiiti Kristo nirekatari maerekati akamini, imakatzakiniri ikapani? Konapitini. ¹⁸ Atxiiti kãkiti imarotari Xoteo kiomaneakorini paniãtakiti kamiko na kamaerekatari kãkiti ãkixinire, ininiã itakanapari ninoã paniãtakiti ikamini. Atxiiti ãti õti iuaikana ikamari ninoã Xoteo kiomaneakorini paniãtakiti iaõka, ininiã iusaakiikarako ikerokari. ¹⁹ Moisesi iõkatsopatakiti oerekano nota ipikari atoko nininiua, kotxi nota kona posotari ikinika Moisesi iõkatsopatakiti iaõka nikamini, ininiã nimisiritiko auapitikako. Ininiã nimarotari Moisesi iõkatsopatakiti kona makatzakari nimaerekani. Ininiã nimarotari Xesosi sãkire auãkarinokara auapininiika. Ininiã uatxa ikiniõtika ninirekari Teoso nirekitinoka nikamini. ²⁰ Xesosi okaãka aamina ipiriãmitakari nopini. Aamina ipiriãmitakari nopini okakori atoko nitxaua, kotxi maerekati mitxi nikamakiti !ninirekaikari nikaminiri. Mitxi ninireekiti kona auaiika. Iuaritika auãkipanika nitxaua, kotxi Kristo aua nãkixinireã. Teoso ãkiri sãkire nauikiniã, auãkipanika nitxa. Iua turetano nota. Iua ipipe nota ikapani. ²¹ Moisesi iõkatsopatakiti kamiko kamaerekatiniãua ate, kinirepa Xesosi ipina? Moisesi iõkatsopatakiti kamiko na xatiki kamaerekataua ate. Teoso tiraõkinokara kamaerekatari aãkixinire.

3

Natokopa Itxa Teoso Kamaerekatiniua?

¹ Hite Karásia tixini auakanii kona kiikitei hite. Kipa misirienetai hite atão inakari himakamiani ikapani? Kotxi himarotapitikari atão inakari. Himarotari Xesosi Kristo ipina aamina ipiriãmitakari nopini amaerekani imakatzakini ikapani. Ate oerekepekai ikara atão inini. ² Ianoka nipimaãi hite: Kisaakipa hãpakapari Erekarã Matamatakoti? Hãpakapatari iua, Moisesi paniãtakiti hãkamakasaaki? Konapitini. Hãpakapatari Erekarã Matamatakoti Teoso iokanapirena erekari hãuikasaaki? Ari, Teoso iokanapirena erekari hãuikasaaki, iusaakiikara hãpakapari iua Erekarã Matamatakoti. ³ Kipa iomaãikitetai hite? Merepanika Teoso sikari Erekarã Matamatakoti hitemoni, ininiã Erekarã Matamatakoti sikaposotiiretai hite Teoso paniãtakiti hãkamini ikapani. Uatxa hixinikari Teoso paniãtakiti hãkamini hiteka posotiireekani? Konapitini. Kona hite posotari. ⁴ Himisiritapeãka Xesosi sãkire hãuikini xika. Kinirepa himiteenekatari himisiritiko? Atauako uatxa kona hãuikaikari mitxi hãuikakiti Xesosi sãkire? ⁵ Kirisaakipa Teoso sikari Erekarã Matamatakoti hitemoni? Kirisaakipa Teoso oerekari iposotiire hitemoni? Atauako ikara atoko itxa Moisesi paniãtakiti hãkamakasaaki? Konapitini. Isikai Erekarã Matamatakoti, oerekai iposotiire, Teoso iokanapirena hãuikasaaki.

⁶ Hixinikariko Apraãoni. Apraão auikari Teoso sãkire, ininiãkara Teoso kamaerekatari iua, ininiã Teoso apakapari iua. ⁷ Ininiã ninirekari himarotini, kãkiti Teoso sãkire auãkani Apraão apika mekaniriakori atão inakani itxauana ninoã. ⁸ Teoso kamaerekatari Xoteo minakanuia, kotxi ninoã auikari Xesosi sãkire. Kitxakapirika Teoso sãkire iõkatsopatakori sãpiretapekari ikara Teoso iokanapirena erekari Apraãomoni. Ikara iõkatsopari txari: “Nota sikariko erekari ikinimane kãkitimoni, kotxi pite Apraão auikari nota sãkire.” ⁹ Apraão kãpitari Teoso sãkire, ininiãkara Teoso takari erekari iuamoni. Iua atoktxikana Teoso takari erekari iua sãkire kãpitakanimoni.

¹⁰ Apanakini uãkatari Teoso apakapiniua ninoã, kotxi ikãpitari Teosini sãkire. Txamari Teoso misirikare pamonõkonipaniriko ninoamoni, kotxi Teoso sãkire iõkatsopatakori txari: “Teoso misiritariko kãkiti ikinika Moisesi

paniätakiti ikiniõtika imakamakanisaaki.” ¹¹ Teoso säkire iõkatsopatakori txari: “Teoso kamaerekatariko kãkiti, iua säkire auiäkani. Ininiã isãkire auiäkani auapininiika itxako Teosokata,” itxa Teoso säkire iõkatsopatakori. Ininiãkara aimarotari Moisesi paniätakiti kípitaku kona kamaerekatariko kãkiti. ¹² Moisesini iõkatsopatakiti kona paniätatau aũukiniri Xesosi ipinini amaerekani imakatzakini ikapani. Moisesi iõkatsopatakiti paniätatau akaminiri ikinika Teoso paniätakiti. Teoso säkire iõkatsopatakori txari: “Kãkiti, Teoso paniätakiti iõkatsopatakori ikinika makerokakatirako auapininiika itxako Teosokata,” itxa Teoso säkire iõkatsopatakori.

¹³ Txamari ätika Teoso paniätakiti Moisesi iõkatsopatakiti akerokiniã, amisir-itaãkako. Kristo makatzakaua ate ikara misirikaretxi monõkori, kotxi Teoso misiritari Xesosi Kristo aamina ipiriãmitakari nopini ate maerekani xika ate mapinakani ikapani. Teoso säkire iõkatsopatakori txari:

Kãkiti aamina nopini okakori Teoso misiritakiti itxaua.

¹⁴ Teoso sikaenetari erekari Apraãomoni. Kristo ipípe híte Xoteo minakanuia ikara erekari hãpakapini ikapani. Ininiã Xesosi Kristo säkire aũukisaaki, aãpakapari mitxi Teoso sikaenetakiti. Aãpakapari aãkixinireë Erekar Mata-matakoti, Teoso sikaenetakiti atemoni.

Teoso Sikaenetakiti Säkiiretxiti

¹⁵ Nitariakori, ikinimane kãkiti imarotakiti nisãpiretaiko híte, noereëkiti säkiiretxiti iteene himarotini ikapani. Ipi kãkiti aua itiina isikaenetakakana. Iuasaaki, iõkatarina iuãkana isikaenetakitina tsopaã. Eereka !auiritaãkana imaxinikaretinirina isikaenetakitina. Apaka !auiritaãka säkiiretxi apikomoni itakinina isikaenetakitina tsopaã. Teoso sikaenetakiti inakitiakorimoni ikara atoko itxa. ¹⁶ Himarotariko ia. Teoso sikaenetari erekari Apraãomoni, Apraão apika mekanirimoni apaka. Teoso säkire iõkatsopatakori na txari: “Apika mekaniriakori.” Teoso säkire iõkatsopatakori txari: “Apika mekaniri.” Ininiã ätika apika mekaniri. Kristo itxaua iua. ¹⁷ Ia ninireka nisãpiretinii. Kitxakapirika Teoso sikaenetakiti Apraãomoni apokapeka. Koatrosëtosi trita pakini anokanani Apraão auaka atoko, Teoso säpiretari Moisesi ipaniätakiti iõkatsopatinii ikapani kãkiti kamini ikapani. Moisesi iõkatsopatakiti kona xipokari Teoso sikaenetakiti Apraãomonikari. ¹⁸ Teoso sikari Kristo kãkitimoni, kotxi mitxi isãpiretari isikaenetakiti Apraãomoni. Teoso sikasaakiri ipaniätakiti säkiiretxiti Moisesimoni ikara iaõka kãkiti kamini ikapani, isikaenetakiti auapeka iuasaaki. Ipaniätakiti sikiko !ixipokari isikaenetakiti.

¹⁹ Ininiãkara kininiãpa Teoso sikari ipaniätakiti Moisesimoni kãkiti kamini ikapani? Teoso paniätakiti iõkatsopatakori oerekaua maerekati kamakanuia ate, kotxi !aposotari ikinika ipaniätakiti akamini. Kristo, Apraão apika mekaniri iõkorapokoriti apokini apisapanika, Moisesi iõkatsopatakiti oerekaua Teoso nireëkiti akamini ikapani. Teoso sikaenetakiti itxaua Xesosi Kristo. Teoso sikasaakiri ipaniätakiti säkiiretxiti Moisesimoni, Teoso nitiriakori aua iuaãtaã. Teoso säpiretari isãkire Moisesimoni. Eereka Moisesi säpiretari kãkiti. ²⁰ Teoso säpiretakasaakiri Apraão isikaenetakiti, !ipaniätari äti kãkiti säpiretiniri Apraão. Teosonokara säpiretari Apraão.

Moisesi Iõkatsopatakiti

²¹ Moisesi iõkatsopatakiti aũukiniã, atxiiti !anirekaikari Teoso sikaenetakiti? Anirekapitikari. Akiomaneakorini paniätakiti säkiiretxiti, kona txikitakaua aũuapininiika anini tũkane. Ininiãkara akiomaneakorini säkire kona kamaerekataua ate, ininiã Teoso kona apakapaua ate, ininiãkara kona

aãuapininiika !atxa Teosokata. !Auari mauritakoti sãkiretxiti kãkiti auapinini-ika inini txĩkitakakari. ²² Teoso sãkire iõkatsopatakori txari: “Ikininape kãkiti kamari maerekati.” Kateia ãki auakani atoko atxaua, kotxi !aposotari erekari akamini. Teoso sikaenetakiti sikaãka Xesosi Kristo sãkire auãkanimoni.

²³ Xesosi Kristo sãkire auikiko apisa, kãkiti kateia ãki auakani atokokana itxauana. Kãkiti moiaãkari atoko itxaua Teoso paniãtakiti Moisesimoni sikakori. ! Aposotari anirekinimoni asini. Uatxara aposotapitikari anirekinimoni asini, kotxi Xesosi apokapeka ìkorapokoriti. Ipinapeka kãkiti ìkapani, ininiã uatxa aãuikiniãri iua sãkire, kona Teoso misiritaikaua uatxa.

²⁴ Kristo mapokakani apisa, ate oerekakari atoko itxaua Teoso paniãtakiti iõkatsopatakori. Kristomoni anikakari atoko itxaua ikara. Kristo apokasaaki, Teoso kamaerekataua ate, kotxi aãuikari Kristo sãkire. ²⁵ Uatxa apokapeka Xesosi Kristo sãkire auikiko. Ininiãkara Teoso paniãtakiti iõkatsopatakori ! imoiaãikaua ate.

²⁶ Teoso anaakori hĩtxaua, kotxi hãuikari Kristo Xesosi sãkire. ²⁷ Hĩte patxisatapeãkaika, ininiãkara hĩpatxisatiko oerekari apanakini Kristo ãtipirika himoianatini ìkapani. Ininiãkara Kristo atokopeka hĩtxa. ²⁸ Ikara atoko aniniã, akinika Kristo Xesosi nakiti atxaua, kotxi akaikotapika iuakata. Xoteoakori, Xoteo minakanuia, nitiritxi, nitiritxi minakanuia, kiki, sito, amakinika Kristo nakiti atxaua. ²⁹ Kristo nakiti pininiãua, Apraão apika mekaniri pitxaua apaka. Ininiã pite apakapapitikariko Teoso sikaenetakiti.

4

Teoso Anaakori

¹ Apikomoni nisãpiretaiko hĩte ãti sãkiretxiti. Amarini !apakapari irini tii itakanapakiti iua ìkapani, kotxi xapitipanikari. Ikinipoko irini nakiti imi nakiti txapekautaua, iuaritika na apakapapanikari. Axapitipanika inakasaaki, nitiritxi atoko itxaua. ² Axapitipanika inakasaaki apanakini moiaãri iua. Ninoã nĩkatari itxineirote. Irini ketotiniri manapi apokasaaki, imi apakapari ìkinika irini tii itakanapakiti. ³ Mitxi iua eenetxi atoko atxaua ate. Nitiritxi atoko atxaua ate. Akiõmaneakorini paniãtakiti sãkiretxiti amoiaãkiri atoko itxaua, kotxi oerekaua akamakiti tĩkane. ⁴ Teoso iokanatarini imi kãkitimoni iketo manapisaaki. Sito ãto ãki aua merepanika, ìkinimane kãkiti atoko. Iua kĩpitari ìkinika Teoso paniãtakiti iõkatsopatakori. ⁵ Amakamakaniãri ìkinika Teoso paniãtakiti iõkatsopatakori, amisiritiko auapitika. Xesosi makatxakaua ate amamisiritakoni ìkapani. Ininiã Teoso anaakori atxaua.

⁶ Teoso anaakori aniniãua, Teoso iokanatarini Erekari Matamatakoti imi nakiti aãkixiniremoni. Ininiã iua Erekari Matamatakoti aãkixinireã uaniã, aãkiritari Teoso: “Papai, niri,” atxariko. ⁷ Ininiã nitiritxi atoko !atxaikaua. Teoso anaakori atxapekautaua. Iua anaakori aniniãua, ìkini isikaenetakiti isikaua atemonikari, kotxi Kristo makatxakapekari amaerekani.

!Erekaxinireri Paoro Karásia Auakani Xika

⁸ Mitxi hĩte !imarotari Teoso. Iuasaaki nitiritxiakori amotakoni atoko hĩtxaua. Hĩparĩkauata teoso minakanuia ìkapani. ⁹ Uatxa hĩte imarotari Teoso. Ari, uatxa Teoso imarotari hĩte. Ininiã kinirepa hĩte nirekari hĩkanapiriini mitxi hãuũteakorimoni. Kona kaposotiirena ninoã. !Kĩkitena ninoã. Kinirepa hĩte nirekari iuaĩkana ninoã nitiriakori amotakoni atoko hininiãua? Kinirepa hĩte nirekatari iuaĩkana hãuikiniiri ninoã oereẽkiti sãkiretxiti? ¹⁰ Hĩte nirekari Xoteo kamakiti atoko inakari hĩkamini. Hĩuãkatari Teoso apokaerekatinii hĩte, kotxi ninoã kiinirite atokotxikana hĩte apaka kama. ¹¹ Ininiã !erekaxinireno nota ikara nikenakoenetini. Atauako maxikatiĩka nota sãpiretari Teoso sãkire hĩtemoni?

¹² Nitariakori, nota iteene òtākikai hīte. Hītakanapariko Xoteo kiomaneakorini paniātakiti hīkamini. Nota atoko hītako, kotxi hīte sauaki nauakasaaki nota hīte atoko nitxaua. Xoteo minakanuia atoko nitxaua. Hītekata nauakasaaki, !himisiritano nota. Hīretano nota. ¹³ Hīxinikari merepiti-panika Teoso iokanapirena erekari hīte nisāpiretakasaaki, namianare xikara nisāpiretai hīte, hītekata nauakasaaki. ¹⁴ Iuasaaki namianatakasaaki, hīparīkauatapitipo nota ikapani. !Hinaiakakano. !Hīokanatanano nisini namianare xika. Hīte apakapano nota Teoso nitiri iaxitiki hīpakapini atokokana. Hīte apakapano nota, Kristo Xesosi hīpakapini atokokana. ¹⁵ Iuasaaki hīte iteene hīpoxokoniua. Nimarotari ereka hinini, kotxi noki amianatakasaaki, hīposotaākamariko, himakatzakamariko hīteka oki notamoni hīsikini ikapani. ¹⁶ Atauako uatxa himokaiakari nitxataua nota, atāo inakari nisāpiretini xika?

¹⁷ Ninoa kamisirienererini iteene tiretapitikamai hīte, txamari ninoa ākixinire nireēkiti !erekari hīte ikapani. Inirekarina hīte omanatinuia ate. Inirekarina hīte apokaerekatinina ninoanoka. ¹⁸ Erekari kākiti iteene tiritini hīte, ākixinire inireēkiti erekari inakasaaki. Nota hītekata nimauakanisaaiki apaka, erekari kākiti iteene tiritini, ākixinire inireēkiti erekari inakasaaki. ¹⁹ Hīte namariteni nota tiretakini atoko hītka. Hinoro atokotxikana nitxa nota. Kaiamapeka auanetakaro atoko nitxa, kotxi nota atatsirauata hīte xika. Kristo kamakiti atokotxikana hīkamakasaaki, iuasaakinoka nitsii nākixinire auakari iotoka. ²⁰ Kinirāo auaka nitxa hītekata uatxa. Ninirekari āāpisatoōtakakiniua, ininiā nixinikakiti ipinimonipo itxa atxiiti. !Erekaxinireno nota hīte xika.

Akaa, Sara Pakini

²¹ Hīte Xoteo kiomaneakorini paniātakiti nireēkani, himarotatari ninoa sākire? ²² Teoso sākire iōkatsopatakori sāpiretaua, ipi Apraōo anaakori aua. Sito niterotxi iamotakitokata aua imi āti. Niterotxi minakotokata itanorokata aua āti imi. ²³ Akaa inakoromoni, niterotxi iamotakitomoni imi aua, kotxi Apraōo sirīka oakata. Imi aua Saramoni niterotxi minakotomoni, kotxi Teoso sikaenetari iua imi. ²⁴ Apraōo anaakori oerekaua Teoso parīka kākiti ikapani. Iparīka ipi aua, naia sito ipi atoko. Akaa inakoro ākiri nitiritxi amotakori itxaua. Teoso parīka ōtanoxiratari Sinai inakori iua auakasaaki, niterotxi Akaa atoko itxa. Teoso paniātakiti iuasaaki amakamaniā, amisiritiko auapitikako, nitiritxi amotakori atokotxikana. Nitiritxi makamaniāri ipatrāote paniātakiti imisiritiko auapitikako. ²⁵ Ininiākara ōtanoxiratari Sinai inakori Arāpia tixini auakari Akaa atoko itxa. Apaka ikorasaaki Xerosareē sitatxiti oa atokokana itxa, kotxi Xerosareē auakani Akaa anaakori atoko itxana ninoa. Nitiritxiakori amotakoni atoko itxana. Ninoa Xerosareē auakani !ikamari ikinika Teoso paniātakiti, ininiā Teoso misiritapitikanako ninoa. ²⁶ Āti Xerosareē auapitika, iaxiti auakari Xerosareē, Teoso tixine. Xerosareē iaxiti auakari Sara atoko, kotxi Sara niterotxi amotakoro !otxaua oa. Ate inoro atoko otxaua oa. Sara ākiri atoko atxaua, kotxi amisiritiko !auaika. Aāuikiniāri Xesosi sākire, akiomaneakorini kona paniātaikaua ate ninoa nireēkiti akamini. ²⁷ Teoso sākire iōkatsopatakori txari:

Pite sito meenetoi pipoxokoniuaatoko. Pite sito pauākitakarauatini tsii mimarotakatoi, pixikarauata pipoxokoniritika, kotxi pite takanapakoroi, itori pamariteakori auako. Kitaniriro poiāoka oamariteakori auako,
itxa Teoso sākire iōkatsopatakori.

²⁸ Ininiā nitariakori, Sara ākiri, Isaki inakori atoko atxaua, kotxi Teoso sikaenetari Apraōo imi Saramoni auini. Iuatxikana Teoso sikaenetaua

Xesosi amaerekani imaktxakini ikapani, Teoso anaakori aniniua ikapani. ²⁹ Akaa ákiri Isimaeo inakori iponaniã, kotxi Apraão nirekari imi, ininiã iua siríka Akaakata. Sara ákiri Isaki inakori iponaniã Erekarí Matamatakoti posotiireë. Eereka Isimaeo misiritari Isaki. Iua atokokana itxa uatxa. Teoso anaakori minakaníua misiritari Teoso anaakori. ³⁰ Teoso sákire iókatsopatakori txari:

Híokanataroko niterotxi iamotakoro osipinini imikata, kotxi niterotxi ákiri kona apakapapaniri ipixini iri tii. Niterotxi minakoto ákirinoka apakapari iri tii,

itxa Teoso sákire iókatsopatakori. ³¹ Ininiã nitariakori, niterotxi amotakoro ákiri atoko !atxaua. Niterotxi minakoto ákiri atoko atxaua.

5

Takaótxikari !Ikamaerekatari Kákiti

¹ Nitiritxi kamari ipatrãote nireëkitinani. Ikara atoko uatxa !atxaika, kotxi aáuíkari Kristo sákire. Kristo makatxakapekua amisiritiko monókoni. Ininiãkara nitiritxi amotakoni atoko iuaíkana !hítxapeua. !Háuiritapiri kákiti paniãtinií ninoa auiãkiti háuíkini.

² Híkenakotako. Nota Paoro sápiretaiko híte. Háuiritiniári takaótxikari takiko hítoã Xoteo atoko, ininiã háuíkari takaótxikari kamaerekatinii híte Teoso apakapinií ikapani. Txamari na atão. Kristonoka kamaerekatari kákiti Teoso apakapinií ikapani. Erepaniko, pinirekiniári takaótxikari, !pinirekaikari Kristo. ³ Iuaíkana nota ótãkikai híte. Háuiritiniári takaótxikari takiko hítoã Xoteo atoko, ininiã Moisesi paniãtakiti ipixini híkamapeka. Ikara atoko hininiã, ikinika ipaniãtakiti híkamako. ⁴ Átikaka híte nirekari Moisesi paniãtakiti híkamini Teoso kamaerekatinii ikapani. Txamari ikara atoko hinirekiniã, hítakanapari Kristo. Ininiãkara Teoso !iposotari ikinipoko erekari isikinii. ⁵ Atepekana, ate auikari Xesosinoka txíkitakiniri kákiti ereka inini ikapani, Teoso apakapinií ikapani. Ikamaerekataua Erekarí Matamatakoti posotiireë, kotxi aáuíkari Xesosi sákire. ⁶ Takaótxikari hítoã auniã, iua takaótxikari !ikamaerekatai híte. Takaótxikari hítoã mauakaniã, takaótxikari mauakani !ikamaerekatai apaka. Kristo Xesosi nakitiakori aniniãua, Teosora kamaerekataua, kotxi aáuíkari Xesosi sákire, ininiã atiretari iua.

⁷ Merepanika híte auikapitikari Xesosi sákire. Kipa xipokatari atão inakari Teoso sákire háuíkini? Natokopa itxa Teoso sákire atão inakari hítakanapini?

⁸ Híte akiritakari itxaua Teoso. Kona iuani xipokari háuíkiniri atão inakari isákire. ⁹ Kákiti sákire txari: “Pão átikaãkari axapitiri ipani, iuaritika iãtikakakiti itori ipe.” Iua atokokana átika maerekati kamakari xika kaiãopokori kákiti kamari maerekati. ¹⁰ Teoso kamaimaroretano nota híte takanapiniri híkerokakiti, atão inakari híkamini ikapani. Híte nitariakori hítxaua, kotxi Apiananiri nakitiakori atxaua, ininiãrako nimarotari nota ótãkikinii iaóka híkamapanikako. !Nimarotari iua kiki himisirienetakiri. Ia nimarota. Teoso misiritapanikariko iua.

¹¹ Apanakini sápirenãtari: “Paoro paniãtari Xoteo minakaníua takiniri takaótxikari hítoãna.” Na atão ninoa sákire. Nipaniãtaãkamariko takaótxikari takiko, nimisiritiko !auamako. Kona nipaniãtari Xoteo minakaníua takiniri takaótxikari hítoãna. Ikara xika nimisiritãka. Nisápiretari ia: Kristo aamina ípiriãmitakari nopini ipípe amaerekani imaktxakini ikapani. Kristonoka kamaerekataua Teoso apakapiniua ikapani. Ikara noerekakiti xika nimisiritãka. ¹² Ninoa kamisirienererini nirekiniári itsiki mata kisauakiko, erekari itsikipati tsotatiko apaka. Nomanãkarauata, ninoa misirienetinií xika.

¹³ Nitariakori, Teoso akiritai h̄te iua nakitiakori hininiua ikapani, ininiākara uatxa h̄posotari h̄teka nireēkiti h̄kamini. Iuaritika !h̄kamapiri maerekati h̄ito nireēkiti. Ia h̄kamako: H̄tiretakakauako ātipirika. Ikara atoko hininiā, himoianatakakauako. ¹⁴ Teoso paniātakiti txari: “Pitiretana apanakini piteka pitiretiniua atokokana.” Ikara paniāretxi pikaminiā, pikamapekari ikinika Moisesi paniātakiti. ¹⁵ Kaxipiri itopa auakani atoko !h̄txape. Ninoa karotakakaua, okakakaua itxana. Erepaniko. Kaxipiri itopa auakani atoko hininiā, h̄xipokakauako.

Aïto Nireēkiti

¹⁶ Nōtākikare ia atoko itxapaniko: H̄auritariko Erekeri Matamatakoti oerekiniī iua kimapore ikiniōtika. Iua h̄kimapore oereēkari ininiāua, !h̄kamapiri maerekati h̄ito nireēkiti. ¹⁷ Aïto !inirekari Erekeri Matamatakoti nireēkiti. Iuatxikana Erekeri Matamatakoti !inirekari h̄ito nireēkiti. Erekeri Matamatakoti mokaiakari itxaua aïto. Ininiā aākixinire nireēkiti !aposota akamini aïto nireēkiti xika. ¹⁸ Iua Erekeri Matamatakoti oerekiniāi pikimapore ikiniōtika, pikaminiāri iua nireēkiti, ininiā Xoteo kiomanekarorini paniātakiti !oerekaikari pikimapore.

¹⁹ Aimarotapitikari kākiti ito nireēkiti. Inirekari itaniritxi minakotikatika osirīkini, itanorotxi minakotokatika isirīkini, mitxitakari ātokata isirīkini. Kākiti ito nirekari kākiti xinikaxititiniiri maerekati ito nireēkiti. Kākiti ito nirekari āti kākiti ito, maerekati ikaminina ikapani. ²⁰ Kākiti ito nirekari teoso kākiti kamakiti iteosone ikapani. Kākiti ito nirekari maerekani matamatakoni paniātakiti ikamini. Kākiti ito nirekari omanākaretxi, neenamatzxi, xikoretxi, norikaretxi, iuikaretxi. Kākiti ito nirekari kākiti omanatiniiri apanakini. ²¹ Kākiti ito nirekari āti kākiti tii. Inirekari okanitxi, poātakatzxi, maerekati kiiniriti ikamini. Ikara atoko inakari maerekati kākiti ito nireēkiti. Uatxa n̄pinitai h̄te, mitxi n̄pinitiniū atokotxikana. Ikara maerekati kamakani !aupani Teoso auñtetxi ininiātaāua.

Erekeri Matamatakoti Nireēkiti

²² Iua Erekeri Matamatakoti aākixinireē auiniā, !ikara atokoni itxa akamakiti. Iua Erekeri Matamatakoti aākixinireē auiniā, atiraōkiuata. Apoxokoniua. Ereaxinireua. !Katimari aomanākarauatini. Aamonīkarauata. Ereka. Akamaenetakiti akamapitika. ²³ Ate !iuikaua. !Akamari maerekati aïto nireēkiti. Ikara atoko atxa, Erekeri Matamatakoti aākixinireē auiniāua. Ikara atoko aniniā, amisiritiko !auari. ²⁴ Kristo nakitiakori aniniāua, !anirekaikari akaminiri maerekati aïto potxitakiti, aïto nireēkiti. Amanirekakiniti aōkini atokokana, aōkapekari maerekati aïto nireēkiti. ²⁵ Erekeri Matamatakoti tx̄ikitakari axinire auāki inini, ininiākara makamari ikinipoko iua nireēkiti ikiniōtika. ²⁶ !Apakata aūikiniua. !Apakata anenamauatini. !Apakata axikotakakiniua.

6

Himoianatakakiniua

¹ Nitariakori, h̄te Erekeri Matamatakoti nireēkiti kamakanii, himarotakasaakiri aitari kaminiri maerekati, h̄tākikariko iua imaerekani itakanapini ikapani. H̄tākikariko h̄tiraōkiritika. Iuusaaki erepaniko, kotxi atxiiti h̄te apaka nirekari iua maerekani atokotxikana h̄kamini. ² Himoianatakakauako h̄tapara poiāonoka inakasaaki. Ikara atoko hininiā, h̄kamari Kristo paniātakiti apanakini h̄tiretini. ³ !Erekeri ate iuikiniua. Kākiti minakiti: “Apiari nota,” inakari, iuanika misirienetaua. ⁴ Erekeri nataerekatiniiri notaka kamakiti. Erekeri atxiiti? Nikamakiti ereka ininiā, nipoxokoniua. !Apakata nākixinireē nixinikiniri: “Iua āti kamakiti

apiaerekata. Nota kamakiti poião erekari.” !Apakata ikara atoko ninini.
⁵ Ikininape kãkiti aua iparĩka kasãpaniri. Iuanoka posotari ikaminiri.

⁶ Teoso sãkire oereẽkari oerekiniãi pite Teoso sãkire, iuasaaki minakati auiniãi pisikari iuamoni. Nipokori atxiĩti, txineiro atxiĩti, pisika iuamoni, kotxi iua kikiote !auari. ⁷ Piteka !pimisirienetapeuako, kotxi !piposotari Teoso pimisirienetini. Teoso misirienetakari !auari. Pikikioteẽ mitxi pitakakiti iaõka papakapa. Iua atokokana pikamakiti ereka inini, papakapari erekari. Pikamakiti maerekati inini, papakapari maerekati. ⁸ Piĩto nireẽkiti pikaminiã, papakapari piĩto siãkitinoka. Piĩto sikai ipĩkitxinoka. Teoso misiritapitikai. Erekar Matamatakoti nireẽkiti pikaminiã, papakapari iua siãkiti. Iua siãkiti Teosokata ãtipirika pauini ĩkapani. ⁹ ! Apakata asãpakini erekari ikiniõtika akamini. Makamari erekari ikiniõtika, maiotokakanikaua anini. Erekar akamini amaotokakaniã, erekari Teoso sikakiti aãpakapini apokapitikako. ¹⁰ Ininiã aposotakasaakiri, makamari erekari ikininapemoni. Merepanika makamari erekari aĩtariakorimoni Xesosi sãkire auĩãkanimoni.

Imapotõkire Ôtãkikaretxi

¹¹ Hãtamatariko ia niõkatsopare mitari. Ia iõkatsopari imapotõkire nota niuakoã niõkatsopatakiti. ¹² Apanakini hĩte sauaki nirekari ninoaka apokaerekatiko, ininiã isãpiretari kãkiti potxitakitinoka. Ninoakara paniãtai hĩtakiniri takaõtxikari hĩtoã. Kininiãpa ninoa nirekatar takaõtxikari hĩtakini? Ninoa misiritiko monõkoni xika, ninoa paniãtari Xoteo minakanuia takiniri takaõtxikari ĩtoãna, ininiã Xoteoakori potxitari ninoa oereẽkiti sãkiretxiti. Inirekarina Xoteoakori apokaerekatinina ninoa. Txamari Kristonoka kamaerekatar kãkiti, kotxi ipĩpe aamina ĩpiriãmitakari nopini kãkiti maerekani imakatzakini ĩkapani. ¹³ Ninoa kamisirienenerini kamari Moisesi paniãtakiti takaõtxikari itakinina ĩtoãna. Txamari ikinika Moisesi paniãtakiti ! ikamana. Ninoa nirekari hĩte takiniri takaõtxikari hĩtoã, ininiã eereka ninoa iuikaua, kotxi hĩte kamari ninoa paniãtakiti. ¹⁴ Kona ninirekari niuikiniua. Teoso !nirekari niuikiniua. Nota iuikari aãũte Xesosi Kristo. Iuanokara niuika, kotxi iua ipina aamina ĩpiriãmitakari nopini ate ĩkapani. Ininiã nota !ninirekaikari Xesosi sãkire mauĩãkani nireẽkiti. Iuatxikana ninoa !nirekari nota nireẽkiti. ¹⁵ Takaõtxikari hĩtoã auiniã, iua takaõtxikari !ikamaerekatai hĩte. Takaõtxikari hĩtoã mauakaniã, takaõtxikari mauakani !ikamaerekatai. Teoso txĩkitakiniã iua anaakori hininiãua, iuasaaki ikamaerekatai hĩte. Ininiãkara hãkixinire amaneri itxaua. Ininiã mitxi hinireẽkiti !hinirekaika. ¹⁶ Teoso kamaerekaxiniretai hĩte, ikara sãkiretxiti hãuikasaaki. Iua amonĩkai hĩte. Ikara atoko Teoso kamari kãkiti iua nakitiakori ininiuana, atão Isaeo mekaniriakori ininiuana.

¹⁷ Ixipope ia iõkatsopari. Nipinitana nota kamamaxiretakani. ! Hĩkamamaxiretapeno, kotxi nimisiritaãkapeka. Nikaro mata auapeka niĩtoã. Auĩtetxi nitiri amotokori karo mata atoko itxa nikaro mata, kotxi Apiananiri Xesosi nitiri nitxaua.

¹⁸ Nitariakori, aãũte Xesosi Kristo sikari ikinipoko erekari hĩte ãkixiniremoni. Ameẽ.

ÉPESO

Paoro Iokanatsopatakiti Épeso Auakanimoni

¹ Nota, Paoro. Niõkatsopatari ia aãtsopa. Teoso nirekano Xesosi Kristo iokanatakiti nininiua. Ininiã niokanatsopata Teoso nakitiakorimoni Épeso sitatxiti auakanimoni. Kristo Xesosi sãkire auiãkanimoni, ipaniãtakiti kamakanimoni niokanatsopata. ² Aïri Teoso, Apiananiri Xesosi Kristo pakini sikari ikinipoko erekari hitemoni. Ninoa kamaerekaxiniretai hite.

Teoso Mereëua Itixi Kamiko Apisapanika

³ Masãpiretari Teoso, aãulte Xesosi Kristo iri: “Erekapitikai,” kotxi itakapekari ikinika erekari ate ãkixiniremoni, kotxi Kristo nakitiakori atxaua. Ikara erekari isikakiti Teoso tixinekiri. ⁴ Itakari ikara erekari ate ãkixiniremoni, kotxi itixi kamiko apisapanika Teoso mereëpekaua Kristo nakitiakori aniniua. Imereëua Teoso nireëkitinoka akamini ikapani, maerekatiki amakamankani ikapani, atiraõkiuatini ikapani. ⁵ Itixi kamiko apisapanika, Teoso mereëua iua anaakori aniniua ikapani. Xesosi Kristo ipïpe ate ikapani, ininiã iua txikitakaua Teoso anaakori aniniua. Teoso txikitakaua iua anaakori aniniua, kotxi iua potxitari ikara atoko ikamini. Inirekari ikara atoko ikamini. Erekaripotxitakiti ikamini tãkane.

⁶ Teoso txikitakaua iua anaakori aniniua, kotxi inirekari asãpiretiniri: “Peerekari ikinipoko erekari pisikakiti kãkitimoni.” Teoso sikaua ikara erekari, kotxi iua tiretakiti nakitiakori atxaua.

⁷ Xesosi iikixitari amaerekani, kotxi iarëka xiketa ate ikapani, ininiã Teoso maxinikaretari amaerekani. Uatxa !imisiritaikaua amaerekani xika. Teoso kamari ikara ate ikapani, kotxi ikinipoko erekari isika atemoni. !ixipoka ikara erekari Teoso sikakiti. Ikinipoko erekari aua iuamoni. ⁸ Kãkiti kona posotari iaõtiniri erekari Teoso sikakiti ate maerekatiki kamakanimoni. ! Kaiãtikoriri. Ikinipoko imaroretxi aua iuamoni. Atão inakarínoka imarota ikamini, ininiã ikara erekari ikaminiãua. ⁹ Mitxi !aimarotari Teoso inireëkiti ikamini tãkane. Uatxa ikamaimaroretãua. Ipotxitari oerekiniaua inireëkiti. Peerekari iua potxitakiti. ãkixinireë ixinikari ikara ikamini. ¹⁰ Teoso ketotini õti manapi, ikinipoko iposope inakasaaki, iua apotititariko ikinimane itixine auakani, itixiã auakani pakini.

¹¹ Xesosi Kristo nakitiakori atxaua, ininiã aãpakapari ate ikapani inikatakiti. Itixi kamiko apisapanika ixinikari ikamakiti ate ikapani. Ikamari ikinika inirekakiti iaõka. ¹² Iua mereëua ate, merepitipanika Kristo sãkire auiãkaniaua, ikinimane asãpiretini ikapani: “Peerekari Teoso. Erekapitikari ikamakiti.”

¹³ Hitepekana auikari Xesosi sãkire, atão inakari hïkenakotakasaaki. Ikara atão inakari Teoso iokanapirena erekari itxaua, kotxi iua iokanapirena oerekai himaerekani makatzakiko. Xesosi sãkire hãuikasaaki, Erekaripotxitakiti Matamatakoti apoka hãkixinireë. Iua Teoso takaõtxikare itxaua. Iua oerekai hite Teoso nakitiakori hininiua. Xesosi sikaenetapekari Erekaripotxitakiti Matamatakoti atemoni iokanatinari. ¹⁴ Isikaenetakiti Erekaripotxitakiti Matamatakoti atemoni auape, ininiã aimarotapitikari aãpakapiniri ikinika isikaenetakiti, inikatakiti ate ikapani. Iuasaaki Xesosi apakapaua ate iua nakitiakori, iua iamotakini, kotxi imakatzakapekari amaerekani. Ikara atoko ininiã, ikinimane kãkiti txari iua: “Peerekai pite. Erekapitikari ikinipoko pikamakiti.”

Paoro Misãkiretiniri Teoso

¹⁵ Ikara atoko ininiã, nota kenakopiretakasaakiri Apiananiri Xesosi sãkire hãuikini, ikinimane Teoso nakitiakori hõtiretini nikenakopiretakasaaki, ¹⁶ nimisãkiretapikari Teoso hite ikapani. Nitxari iua: “Erekapitikai, kotxi pite makatzakari ninoa Épeso sitatxiti auakani maerekani,” nitxa. ¹⁷ Teoso, aãũte Xesosi Kristo Teosone itxaua. Xesosi iri itxaua. Kaiotximereri iua Teoso. Nimisãkiretari Teoso hite ikapani ia atoko: “Pisikaimaroretana ninoa ãkixinire. Ninirekari Erekar Matamatakoti oerekinina pite iteene imarotinina ikapani. ¹⁸ Piopinikariko ninoa ãkixinire atão inakari imarotinina ikapani. Pite akiritana ninoa ikinipoko erekari apakapinina ikapani. Ikara poerekana ninoa imarotinirina ikapani, iãtapinirina ikapani. Pikamaimaroretana ninoa pite nĩkatakiti pite nakitiakori ikapani. Ikara pinĩkatakiti, pisikaenetakiti, peerekari. Itori pinĩkatakiti. !Ixipoka pinĩkatakiti. !Kaiãotikori pinĩkatakiti pinakitiakori ikapani. ¹⁹ Pikamaimaroretana ninoa kaposotiire pinini. Ininiã piposotari iteene pisikaposotiiretinia ate pisãkire auĩãkani. Ikara piposotiire !auari ãtimoni. Pataparari pite posotiire.” Ia atoko nimisãkiretari Teoso hite ikapani.

²⁰ Ikara Teoso posotiire õkitikari Kristo ipĩkani sauaki auakasaaki. Iposo atoko iposotiireẽ itakari Kristo apiari topãkiniãtaã, ikikomoni itixineẽ. ²¹ Ininiã Kristo Apiananiri itxaua. Iua posotiire apiata. Maerekani matamatakoni auĩteakori posotiire poiãoka. Ikorapokoriti auĩtetxiakori posotiire poiãoka. Kristo posotiire apiata. Ikorasaaki Kristo Apiananiri. Apaka katana Kristo atoko inakari !auari. !Auari ãti kaposotiireri Kristo atoko. Kristo apiata. ²² Teoso txĩkitakari Kristo ikinimane auĩte ininiua. Itakari ikinimane imokaiakariakori ikiti patapi, ininiã Xesosi paniãtakitinoka ikamana. Imokaiakari !auaika. Ininiã ikinipoko Teoso kamakiti auĩte itxaua Kristo. Teoso sikari iua isãkire auĩãkani auĩte ininiua. Inakitiakori kii atoko itxa Xesosi. ²³ Iua ito atoko itxa inakitiakori, ininiã ikinimane inakitiakori sauaki iua aua. Itxĩkitakari ikinipoko atão inini.

2

Mitxi Ipĩkani Atoko Atxaua

¹ Hitepekana, Xesosi txĩkitapekari hĩxinire auãki inini. Mitxi, isãkire hãuikini apisapanika, ipĩkani atoko itxa hãkixinire, Teoso manirekakiniti hĩkamini xika, himaerekani xika. ² Iuasaaki hite kamari ikini sereti maerekati, Ikorapokoriti auakani maerekani atokokana. Iuasaaki hĩkĩpitari Satanasi sãkire, maerekani matamatakoni auĩte sãkire. Iua, initiriakorikata aua ãtima auiniãtaã. Iua parĩkauata Teoso sãkire makĩpitakani xinire ãki. ³ Mitxipeka amakinika ate Teoso sãkire makĩpitakani atxaua, kotxi akamari maerekati aĩto paniãtakiti. Iuasaaki akamari maerekati aĩto nireẽkiti. Akamari maerekati axinikakiti iaõka iuasaaki. Ikinimane itixi auakani atoko, ate, apanakini apaka maerekati kamakani atxaua iuasaaki, ininiã Teoso omanãkarauata amaerekani xika. Iposope amisiritiko.

⁴ Iuaritika Teoso iteene amonĩkaua. Kaamonĩkareri Teoso atoko inakari ! auari. Iua iteene tiretaua. Ate maerekati kamakani atxaua, iuaritika itiretaua. ⁵ Ipĩkani atoko anakasaaki, maerekatinoka akamakasaaki, iuasaaki itxĩkitakaua auãki anini, Kristo auãki inĩkitakini atoko. Iuasaaki imakatzakari amaerekani, kotxi inirekari ikinipoko erekari isikiniua. ⁶ Ininiã Teoso õkitikaua ipĩkani sauaki aãuakasaaki, Kristo õkitikini atokokana. Ininiã itixineẽ Teoso takaua ate aĩtopãkino Kristo Xesosikata, kotxi iua nakitiakori atxaua. ⁷ Ininiã katanarako ãtipirika inirekari oerekiniri ikinipoko erekari atemoni. Erekar isikakiti !ixipoka. !Kamapotõkireri. Kona erekaua, iuaritika iteene itiretaua, kotxi Xesosi Kristo nakitiakori atxaua. ⁸ Atemoni erekari

isikakitinokara makatxakari amaerekani, isãkire aãuikasaaki. Ininiã !aposota ateka maerekani amakatzakini, kotxi maerekati kamakani atxaua. Teoso sikakitinokara makatxakari amaerekani. ⁹ Akamakiti erekari !iposotari amaerekani imakatzakini. Ininiã kãkiti iuikiniua !auari. Teosonokara posotari imakatzakiniri kãkiti maerekani. ¹⁰ Peerekari Teoso parïka aãkixinireë, kotxi ikamaua ate ereka anini. Ininiã Xesosi Kristo nakitiakori atxaua. Ikara iparïka amaneri. Ikamaua ate amaneri anini, erekari akamini ikapani. Ikara ikamini apisapanika Teoso xinikari ikara. Iuasaaki inirekari erekarinoka akamini.

Kristo Nakitiakori Ætika Nirimanetxi

¹¹ Xoteo minakanuia hïtxaua, kotxi ikara atoko hïponaniã. Teoso takaõtxikare auaitotakini takauãkatali hïte: “Teoso takaõtxikare mauaitotakini.” Xoteoakori auari ikara Teoso takaõtxikare, kotxi ikisauakarina amarini tsiki mata axapiti. Ikara oerekari Teoso nakitiakori ininiuana. ¹² Hïxinikariko mitxi, Kristo sãkire hãuikini apisa, Kristo ! auari hïtemoni. Iuasaaki maparakini atoko hïtxaua. Iseokini ! hïtxaua. Ætiã hïtxaua. Ikara xika kona hïte posotari hãpakapiniri Teoso sikaenetakiti iuasaaki. Iuasaaki ! himarotari Xesosi makatzakiniri himaerekani. Iuasaaki !himarotari Teoso.

¹³ Uatxa Kristo Xesosi apakapapekai hïte. Mitxi Ætakoxiti auakani atoko hïtxaua, iuaritika uatxa iua minai hïte Teosomoni, kotxi Kristo arëka xiketa hïte ikapani.

¹⁴ Iuanokara kamaerekaxiniretaua, ininiã ixipokari Xoteo, Xoteo minakanuia pakini omanatakiniua. Ikara omanãkaretxi paretxi atoko itxa. ! Auiritari Xoteo sini Xoteo minakonimoni. Uatxa Ætika nirimanetxi atxaua. ¹⁵ Kristo ipïkasaaki, ixipokari ikara omanãkaretxi, kotxi iuasaaki ikamari ikinika paniãtakori iõkatsopatakori ikinimane ikapani. Ikara Xoteoakorimoni sikakori. !Isikaãka Xoteo minakonimoni. Ininiã Kristo ipïkasaaki, itxïkitakana Xoteoakori, Xoteo minakanuia pakini Ætika kãkiti amaneri atoko inini. Neenamatzxi !auaika, kotxi Kristo kamaerekaxiniretaua amakinika. ¹⁶ Ipina aamina ipiriãmitakari nopini, ininiã iuasaaki iuaïkana iminana Xoteoakori, Xoteo minakanuia pakini Teosomoni. Ætika nirimanetxi atoko iminana Teosomoni. Iuasaaki ixipokari Xoteoakori, Xoteo minakanuia omanatakiniua. ¹⁷ Xesosi apoka Ækorapokoriti Teoso iokanapirena erekari isãpiretiniri kãkiti. Isãpiretari kãkiti, Teoso omanatiniri kãkiti imaerekani xika xipope, Xesosi sãkire auikasaakina. Isãpiretai hïte Xoteo minakanuia. Apaka isãpiretari Xoteoakori. Mitxi õtakoxiti auakani atoko hïtxaua, kotxi iuasaaki !himarotari Teoso sãkire. Mitxi Xoteoakori imarotari Teoso sãkire, ininiã Teoso takote auakani atoko itxauana. ¹⁸ Erekari Matamatakoti Ætinoka aua. Kristo sãkire aãuikasaaki, iua Erekari Matamatakoti anikaua aïri Teosomoni. Anikari Xoteoakori, Xoteo minakanuia pakini iuamoni.

Teoso Aapoko Atxaua

¹⁹ Uatxa Teoso mimarotakani !hïtxaikaua. Uatxa Æti uãka !hïtxaikaua. Teoso tixine auakani hïtxaua, apanakini Teoso sãkire auïãkanikata. Iua aapoko auakani hïtxaua.

²⁰ Teoso aapoko atoko atxaua. Aapokotxi kamaãka kaikori nopini imirikakani ikapani. Xesosi moianariakori tosi pakini, iua iokanatakini kãkitimoni, ninoã sãpiretakiti iua kaikori atoko itxa. Kitxakapirïka Teoso sãkire sãpiretakani sãpiretakiti apaka iua kaikori atoko itxa. Aapokotxi aua Ætika kai mitari, apanakini kai soro maïkakar. Xesosi Kristo iua kai mitari atoko itxa. ²¹ Ininiã iua maïkaua. Iuakata aãua, ininiã kãkiti itoãpotari auikiniri Xesosi sãkire. Apiananiri aapoko aneeãpotini atoko itxa. Iua Apiananiri aapoko atoko atxa. Imisãkiretiko aikoti atoko atxa. ²² Ininiã iua apotiitai hïte

hīkinika iua aapoko hininiua īkapani, kotxi Teoso auiniātaā hītḡxaua. Erekarī Matamatakoti auiniātaā hītḡxaua apaka.

3

Paoro Sāpiretari Teoso Sākire Xoteo Minakonimoni

¹ Ikara atoko ininiā, nota Paoro kateia āki naua, hīte Xoteo minakanīua Xesosi Kristo sākire nisāpiretini xika. Kateia āki naua, kotxi nauikari Xesosi sākire.

² Hīkenakopiretapekari parīkatxi Teoso sikakiti notamoni, isākire Xoteo minakanīua nisāpiretini īkapani. Ikinipoko erekari isika notamoni, hīte nisāpiretini īkapani. ³ Teoso oerekepekano kākiti mitxi mimarotakinīti. Mitxi axapitiki ikara Teoso oerekakiti niōkatsopatapeka hītemoni. ⁴ Uatxa ia hātatsopataksaaki, hīposotari himarotiniri nimarotakiti, kākiti mitxi mimarotakinīti, Kristo parīka kākiti īkapani. ⁵ Kitxakapirīka kākiti kona imarotari ikara Kristo parīka kākiti īkapani. Uatxa Erekarī Matamatakoti oerekari ikara Xesosi iokanatakinimoni. Apaka oerekari ikara Teoso sākire sāpiretanimoni. Teoso parīkanoka ikamana nīnoa. ⁶ Nisāpiretai hīte kākiti mitxi mimarotakinīti. Xoteo minakanīua apakapariko Teoso nīkatakiti itixineē, Xoteoakori apakapiniri atokotxikana. Xoteo minakanīua, Xoteoakorikata Kristo īto atoko itḡxauana. Xoteo minakanīua apakapariko Teoso sikaenetakiti, Xoteoakori apakapiniri atokotxikana. Teoso iokanapirena erekari sāpiretari kākiti isikaenetakiti, kotxi isikari Kristo, Xoteoakori maerekani, Xoteo minakanīua maerekani apaka imaktxakini īkapani. Ikara kākiti mitxi mimarotakinīti.

⁷ Teoso iokanatanō nota kākitimoni iua iokanapirena erekari nisāpiretini īkapani. Ikara parīkatxi isikano, kotxi ikinipoko erekari Teoso sikano nota iposotiireē. ⁸ Itomaneri Teoso nakitiakori poiāorini, iuaritika nota poiāori nininiua atoko inakari ! auari. Iuaritika Teoso sikano ikinipoko erekari, kotxi iokanatanō Xoteo minakonimoni erekari Kristo auakiti nisāpiretinina īkapani. Ikara erekari lixipoka. Itori. !Kimarotikori ikinipoko erekari Kristo auakiti. ⁹ Apaka Teoso nirekari noerekiniri ikinimane, ikara mitxi imimarotakinīti, Teoso nakitiakori tīretakakinīua. Itixi kamikosaaki, Teoso kipatari ikara kākiti mimarotakinīti. Ikipatiniritika uatxa ikara noerekari ikinimane. Teoso kamakasaakiri itixi, Xesosi Kristokata ikamari ikinipoko. Mitxi kona xatiki ! auari. ¹⁰ Uatxa Teoso nirekari imereēkini oerekiniri ikinipoko Teoso imarore auītetxiakori matamatakinimoni, Teoso tixine auakanimoni. ¹¹ Itixi kamiko apisapanika, ātipirika Teoso nirekari aūiḡte Kristo Xesosi kaminiri ikinika inirekakiti kākiti īkapani. ¹² Kristo kamakiti ate īkapani aūiḡkiniā, aposotapitūkarī aāpokini Teosomoni, ininiā !kapīkareua Teosomoni aāpokini. Ataparaxinireritika asari iuamoni. ¹³ Ininiākara nōtākikai hīte. !Himatina-nuatape nimisiritiko xika. Nimisiritāka hīte īkapani, Xesosi sākire hāiḡkini īkapani, ininiā hīuikariko nimisiritiko. Teoso auiritari nimisiritiko, kotxi iua iteene tīretai hīte.

Iuaīkana Paoro Misākiretiniri Teoso

¹⁴ Teoso nirekakiti kākiti īkapani nixinikasaaki, nikapotoreēkaua aūiḡte Xesosi Kristo iri apisatoō, nimisākiretiniri īkapani. ¹⁵ Ikinimane Teoso nakitiakori, itixine auakani, apaka ikinimane īkorapokoriti auakani apakapari iua uāka. ¹⁶ Ia atoko nimisākiretari Teoso hīte īkapani: "Peerekai pite. Ikinipoko erekari aua pitemoni. !Ixipoka ikara erekari. Ininiākara, pisikaposoti-iretana Épeso auakani ākixinire. Ninirekari Erekarī Matamatakoti iteene sikataratinina nīnoa ākixinire. ¹⁷ Ninirekari iteene auikinirina Kristo

säkire, ininiã Kristo auapika äkixinireëna. Ninirekari ninoa iteene imarotiniiri pite tiraõki. Takari kotsa kipatxi erekari äki auini atokokana, ninirekari ninoa kaikotini pitekata pitiraõki sikataparatinina ïkapani. Imarotiniãrina pitiraõki, lirikana. !Ikamarina maerekati. ¹⁸ Ninirekari ninoa, pinakitiakori, apanakini pinakitiakori pakini, imarotiniiri Kristo tiraõki kãkiti ïkapani, kotxi Kristo tiraõki lixipoka. !Kaiãotikori iua tiraõki. ¹⁹ Kãkiti kona posotari imarotiniiri ikinika Kristo tiraõki. Ninirekari ninoa Épeso auakani apakapiniiri ikini sereti erekari pisikakiti äkixinireëna, pite atão imarotiniina ïkapani.” Ikara atoko nimisãkiretari Teoso hïte ïkapani.

²⁰ Ininiã uatxa maxinikariko iua. Kaposotiireri apiatakari itxaua. Ikinipoko iposota ikamini. Imaposotakiniti ! auari, ininiã ikinika aamanaãkiti, ikinika axinikakiti pakini, iposota ikamini. Ari, apikomoni iposota ikamini ate ïkapani. Axinikakiti, aamanaãkiti polãoka. Apiata iposotiire. Iua posotiire parïkauata aãkixinireë. ²¹ Ininiã Teoso mereëkini kitxakapirïka auakani, uatxa auakani, katana auakani pakini ätipirika txariko Teoso: “Peerekai pite. Apiananiri pitxaua.” Ikara atoko itxana, kotxi Xesosi Kristo makatxakari amaerekani Teoso anaakori aniniua ïkapani. Ameë.

4

Xesosi Auiãkani Ätika Iïto Atoko Itxauana

¹ Kateia äki naua, kotxi nauikari Apiananiri sãkire. Ininiã nota iteene õtäkikai hïte ikiniõtika atão hïkamini, kotxi Teoso akiritai hïte iua anaakori hininiua ïkapani. Ikara atoko hininiã, iua kamakiti atokokana hïkamako. ² Ininiãkara !hïukaepua. !Hiniirekapiri hinirekakitinoka hïkamini. Hãuiritariko äti kaminiri iua nirekakiti. Katima homanãkarauatata !hïtxapeko. Himïteenekakauako hïkerokasaakiri hïkamakiti. Hïtiretakauako. ³ Erekari Matamatakoti txikitakari axinikakiti, anireëkiti pakini ätinoka inini, kotxi iua kamaerekaxiniretaua. Ininiãkara hïparïkauatako ikara atoko auini ïkapani. ⁴ Xesosi Iïto atoko atxaua. Ätika iïto, ininiã Iïtotxi ätika atoko atxaua. Erekari Matamatakoti ätinoka aua. Teoso akiritakasaakii inakitiakori hininiua, hiãtapariko hãpokini iua tixine iuakata hãuini ïkapani. Ininiã ätinoka hiãtapakiti. ⁵ Ätinokara Apiananiri aua. Ätinokara aãuiãkiti sãkiretxiti aua. Ätinokara apatxisatiko. ⁶ Ätika Teoso aua. Iua ikinimane iri ätika aua. Iua ikinimane apisatoõ apiatakari itxaua. Ikini itixiti iua aua. Amakinika aãkixinireë iua aua.

Teoso Sikakiti Atemoni

⁷ Kristo sikapekari iposotiire ate amakinimoni iparïka akamini ïkapani. Iposotiire isikaua aparïka akamini ïkapani. Aparïka pamimari, ininiã apiata isika iposotiire atemoni. ⁸ Kotxi Teoso sãkire kitxakapirïka txari: Ikanïkasaaki itixinemoni, imkanapiriãna kãkiti mitxi imokaiakari maïkakini. Iuusaaki isikari erekari kãkitimoni.

⁹ Iua kanïka, kotxi mitxipe iua katxaka itixi patapixiti ipïkani auiniãtaã. ¹⁰ Iua itixi patapixiti katxakakari, iuatxikana kanïka iaxiti apiko nopinixiti, ininiã uatxa iua aua ikini itixiti, iaxiti, Teoso tixine pakini. ! Auari iua mauakaniãtaã.

¹¹ Iposotiire isikasaaki isãkire auiãkanimoni, isikari ia atoko parïkauatakani ininiuana ïkapani: Kristo iokanatakini kãkitimoni, Teoso sãkire säpiretakani, Teoso iokanapirena erekari säpiretakani, Teoso nakitiakori õtäkikakani, Teoso sãkire oerekakani pakini isikaua. ¹² Ikara atoko isikaua, kotxi inirekari ninoa oerekiniua inakitiakori iparïka atão akamini ïkapani. Ikara atoko isikaua, kotxi ninoa sikataparaxiniretaua. ¹³ Ninoa sikataparaxiniretiniritika ätika

aãuiäkiti auako. Ipinimoni inakari aãuiäkiti !lauaika, kotxi atão aimarotariko Teoso äkiri säkire. Ininiã kiikiteua, kimaroreua iusaaki. Kristo atoko atxauako, kotxi paimatireri iua.

14 Ininiã iusaaki amarini atoko ! atxaikaua, kotxi amarini ! imarotari atão inakari. Tsakati anikakiti atoko, itima anikakiti atoko itxana käkiti kamisirienereri säkire auiäkani. ! Imarotarina atão Teoso säkire. Ninoa kamisirienereri xinikaxitita atão minakati oerekini ikapani. 15 Atão in-akarínoka asäpiretako käkiti atiraõkiritika. Ikara atoko akaminiã, aimarore aneëpota. Kristo säkire iteene aãuikaãpota. Erekarí akamakiti aneëpota. Ininiã Kristo atoko atxaua, kotxi iua ito atokotxikana atxaua. Até kii atoko itxaua Kristo. 16 Itotxi kamari ikii paniätakiti. Iua atokokana ate kamari Kristo paniätakiti. Ininiã aãpotiitaua. Amoianatakakaua Kristo paríka akamini ikapani, kotxi itotxi ätika atoko atxaua. Kristo sikataparataua amoianatakakiniua. Ininiã ikinika Kristo nakitiakori atão paríkauatiniã iua ikapani, apiaãpota aimarotari iua imarore atão akamini ikapani. Akinika atão aparíkauatiniã Kristo ikapani, ikamataparaxiniretaua. Iusaaki atiretakaua. Iusaaki itotxi erekari, mamianatakati atoko itxaua Kristo nakitiakori.

Aãuini Amaneri

17 Ikara atoko ininiã, ia nisäpiretai. Apiananiri imaroreë iteene nõtäkikai. ! Híkamapinikariko apanakini Xoteo minakaníua kamakiti atoko. ! Kiíkiteri ninoa kamakiti. ! Kiíkiteri ixinikakitina. 18 ! Imarotarina atão inakari. Mapiäri atoko itxa iikitenä. Ikara atoko ininiã, ! kimarorena. Teoso ! itxíkitakana auapininiika ininina, kotxi äkixinireña !nirekarina atão inakari imarotinina. 19 Ninoa äkixinire äpatapeka, ininiã !ipëtuatana maerekati ikamakasaakina. Ininiãkara ninoaka sikaua Satanasiimoni iitona nireëkitinoka ikaminina ikapani. Ininiã ikamarina ikinika maerekati. Itori maerekati inireka ikaminina. !Nirekarina iotokakinirina ikara maerekati ikaminina.

20 Hítepekana, ikara maerekati ! hõrekaäka, Kristo himarotakasaaki. 21 Iusaaki híkenakotapitikari iua säkire. Iua oerekai atão inakari, kotxi Xesosi imarotari ikinipoko atão inakari. 22 Hõrekaäka hitakanapiniri maerekati mitxi híkamakiti, híxinikakiti pakini. Himäka kitxakari hõkini atokokana hitxapaniko himaerekani hitakanapini. Hitakanapariko ikara kitxakari hinireëkiti, kotxi ikara maerekati hinireëkiti misirienetai. 23 Ininiã eereka hamanaäriko Teoso txíkitakiniri híxinikakiti, hinireëkiti pakini amaneri inini. 24 Ininiã himäka amaneri híeretakini atokokana, amanerinoka atão inakarínoka híkamako, kotxi Teoso txíkitakai híxinire amaneri inini, Teoso atoko hinini ikapani. Ininiã atão inakari himarota. Erekarínoka híkama. Teoso ikapaninanira híparíkauatako.

25 Ininiã aãpirena kona híkamape hitariakorimoni. Atão inakarínoka hísäkiretako, kotxi amakinika ate ätika itotxi atoko atxaua. 26 Hinaiatakasaakiua, ! háuiritapiri homanäkare txíkitakinii maerekati híkamini. Himakini apisapanika, hitokakariko homanäkarauatini. 27 Ikara homanäkare himatakanápanisaaki, háuiritari Satanasi txíkitakinii maerekati híkamini, ininiã !háuiritapiriko iua.

28 Atxiiti híitiriuatpeka, ininiã !híitiriuatpinikako. Híparíkauatako. Erekarí paríkatxi híuakoã híkamako, híparíka iki hápakapini ikapani. Ininiã eereka aua minakati hítemoni, käkiti minakati mauinakinimoni hísikini ikapani. 29 Maerekati säkirexti !hísäpiretapiri käkiti. Erekarínoka hísäpiretako, hísäkire kenakotakani hísikatapaxiniretini ikapani, ikinipoko erekari Teoso sikakiti ninoa apakapini ikapani. 30 Kona híkamamatinanitapiri Erekarí Matamatakoti Teoso nakiti himaerekani xika. Erekarí Matamatakoti Teoso takaõtxikare

itxaua. Teoso sikapekari iua atemoni, ininiã aimarotapitikari aãpakapiniri ikinipoko Teoso sikaenetakiti Kristo uai kanapiriãkasaaki. Iuasaaki imakataxakaua ikinika maerekati auiniãtaã. ³¹ !Hinikatapiri homanãkare hãkixinireẽ. Katima naiataka !hõtãpeko. Ätipirika apanakini homanadini, hõtakanapako. !Hõtxitapiri äti. !Himisãkirepiretapiri äti. Ikini sereti maerekati ikara atoko inakari hõtakanapako. ³² Erekarari hõkaminakakauako. Hiamonikakauako. Himaxinõkaretariko maerekati äti kamakiti hõtemoni, maerekati ate kamakiti Teoso maxinõkaretini atokotxikana. Teoso maxinõkaretari amaerekani, kotxi Kristo ipina ate ikapani.

5

Hõtiraõkiuatako Ikinioõtika

¹ Teoso anaakori itiretakini hõtãaua, ininiã hõkamariko Teoso kamakiti atokotxikana. ² Hõtiraõkiuatako ikinioõtika, Kristo tiretiniua atokotxikana. Iuaka isikaua Teosomoni, kotxi ipina ate ikapani. Teoso apokaerekatarari Kristo ipinini ate ikapani. Peerekari isikiniua Teosomoni.

³ Teoso nakitiakori hõtãaua, ininiã kona ninirekari nikenakopiretiniri pñtaniri minakotikatika, pñtanoro minakotokatika pisirõkini. ! Apakata maerekati hõtõ nireẽkiti hõkamini. ! Apakata maerekati hõtõ nireẽkiti hõxinikini, hõãpiretini. Ikara hõxinire txõkotakari hõtakanapako. Txineiro potxitakani ! hõtãpeuako. ⁴ !Hõãpiretapiriko sãkiretxi maerekati. Sãkiretxi mõiõkiti apaka !hõãpiretape. !Hinapetapiri äti. Hõãkirauatakasaaki, hõtãariko: “Peerekari Teoso, kotxi isikaua ikinipoko erekari.” ⁵ Aimarotari ia: Ätanoro minakotokatika sirõkakari, maerekati iõtõ nireẽkiti kamakari, txineiro potxitakani pakini !teosonetari Teoso. Teoso kamakori misãkiretakani atoko itxana. Ikara atoko inakani !apakapari Teoso sikaenetakiti iua anaakorimoni, Kristo, Teoso pakini auõtetxi ininiãtaãua.

⁶ Kona hõuiritapiri kãkiti misirienetini hõtõ mõiõkiti sãkiretxitiã. Kona ! hõuikapiri ninoã sãkire, kotxi ikara atoko inakari maerekati xika, Teoso misiritariko isãkire makõpitakani. ⁷ Ininiã ikara atoko inakani moianariakori !hõtãpeuako.

Pokamara Atoko Hõtãaua

⁸ Mitxi hõtõ mapiãri atoko hõtãa, kotxi !himarotari Apiananiri iuasaaki. Uatãa hõtõ imarotapitikari iua, ininiã pokamara atoko hõtãaua. Ininiãkara erekarinoka hõkamako ikinioõtika. ⁹ Erekarari Matamatakoti auakasaaki kãkiti ãkixinireẽ, erekarinoka inireka ikamini. Atãõnoka ikama. Atãõ inakaranoka isãpireta. Ikara atoko inakari Erekarari Matamatakoti sikakiti. ¹⁰ Hõnitariko Apiananiri nireẽkiti hõkamini ikapani. ¹¹ Ikara atoko ininiã, kona hõimõanatapiri kãkiti maerekati kamakani, kotxi ikara parõkatxi ipiaã potõrikakari. Ikara atoko inakari parõkatxi !iminari erekari atemoni. Ininiã maerekati ! hõkamape. Ia hõkamako. Hõerekariko kãkiti maerekati makamakani. ¹² Apõtãuata asãpiretiniri Teoso sãkire makõpitakani kamakiti ipiaã, kotxi apia maerekati ikora. ¹³ Ikinika tirikapi kamara auiniãtaã atamataãka, ¹⁴ kotxi tirikapi iopinikari ikinika. Ininiã äti txari: “Hõmerekã, imakakani atoko inakanõ. Hõõkitikauako ipõkani atoko inakanõ. Ininiã iuasaaki Kristo iopinikariko hãkixinire.”

Mõiõkiti !Hõtãpeua

¹⁵ Erepaniko. Atãõ inakari hõkamako ikinioõtika. ! Hõkamapiri mõiõkiti kamakiti atoko. Hõkamariko kãkiti kiõkiteri kamakiti atoko. ¹⁶ Hõkamariko erekari, kotxi poiãõnoka hõuini. Hõkamariko erekari ikinioõtika, kotxi maerekati

auapitika ikorasaaiki. ¹⁷ Ininiã miikiteti !hĩtxapeua. Himarotariko Apiananiri nireëkiti.

¹⁸ Kona hiãtapero iãriã kapoãro hĩpoãtini ikapani, kotxi itxĩkitakai maerekati hĩkamini. Hãuiritariko Erekar Matamatakoti txĩkitakini erekarinoka hĩkamini. ¹⁹ Hĩsãpiretakakaua xikari Teoso ikapani, xikari kitxakari, xikari ikorapokoriti auakari pakini. Hĩxikaretari ikara atoko inakari xikari Teoso ikapani. Hãixininireë apaka hĩxikarauata Teoso ikapani. ²⁰ Ätipirika hĩtxariko aĩri Teoso: "Erekapitikai pite, kotxi erekari ikinipoko pisikakiti atemoni." Xesosi Kristo aãũite ininiua, asãpiretari Teoso ikara atoko inakari.

Tanorotxi Pirena.

²¹ Hĩpaxitakakauako, äti nirekakiti hĩkamini, kotxi hĩpĩkariko Teoso manirekakiniti hĩkamini. ²² Ininiã hĩte sitoakoro hĩkamariko hĩtaniri nireëkiti. Apiananiri nireëkiti hĩkamini atokokana hĩkamariko hĩtaniri nireëkiti, ²³ kotxi pĩãniri pikii atoko itxaua. Ininiã iua piauĩte itxaua. Iua atokokana Kristo inakitiakori kii atoko itxaua Kristo. Iua ĩto atoko atxaua. Aãũite itxaua. Amaerekani makatxakakari itxaua. Ininiã sito kamariko oĩtaniri paniãtakiti. ²⁴ Ininiã kãkiti Kristo nakitiakori kamari Kristo nireëkiti. Iua atokotxikana sito kamariko ikinipoko oĩtaniri nireëkiti.

Taniritxi Pirena

²⁵ Hĩte taniritxi, hĩtiretaroko hĩtanoro. Kristo tiritinina inakitiakori atokokana, hĩtiretaroko hĩtanoro. Iua iteene tiritana, kotxi ipina inakitiakori ikapani. ²⁶ Iua ipina, kotxi inirekari itxĩkitakinia ate iua nakitiakori aniniua. Inirekari imaktxakiniri amaerekani. Äparaã makatxakiniri aĩto txiko atokokana, iua sãkire makatxakari amaerekani aãkixininireë auakari. ²⁷ Kristo ipina inakitiakori ikapani, kotxi inirekaua iposope anini ate apakapini ikapani. Iuasaaki peerekaua. Ätika amaerekani !auaika. Ätika akerokakiti !auaika. Ikara atoko inakari maerekati !auaika. Iuasaaki atão Teoso nakitiakori atxaua. Erekarinoka akama iuasaaki. ²⁸ Ikara atoko ininiã, kiki tiritaroko ĩtanoro, ĩto itiretini atokokana. ĩtanoro tiritakari iuaka itiretaua. ²⁹ Kãkiti !omanatari iuaka ĩto. Isikakienatari. Itiretari. Apiananiri tiritiniri inakitiakori atokokana, kãkiti tiritari iuaka ĩto. ³⁰ Apiananiri ĩto atoko atxaua. Ixini atoko atxaua. Api atoko atxaua. Ikanoke atoko atxaua. Iuako atoko atxaua. Itxããpota. ³¹ Iua ĩto atoko atxaua, ininiãkara kiki ĩtanorouatakasaaki, itakanapana ĩri, inoro pakini ĩtanorokata ikaikotini ikapani. Ininiã ätinoka ĩtotxi atoko itxauana. ³² Nĩsãpiretai mitxi !kimarotikori. Kristo inakitiakorikata ätika ĩtotxi atoko itxauana. Kãkiti !imarotari ikara mitxi. ³³ Ininiã pitiretaroko pĩãnoro piteka ĩto pitiretini atokokana. Pite tanorotxipekana, pipaxitariko pĩtaniri.

6

Amarini Pirena

¹ Hĩte amariniakori, hĩkĩpitanako hĩri, hinoro pakini sãkire, kotxi ikara Apiananiri paniãtakiti. Atão pikĩpitanako ninoa sãkire. ² Kitxakapirĩka Teoso sãkire paniãtaua:

Hĩpaxitanako hĩri, hinoro pakini.

Ikara Teoso paniãtakiti hĩkaminiã, Teoso sikaenetakiti isika hĩtemoni. Mitxi Teoso paniãtakiti !auari Teoso sikaenetakiti.

³ Hĩri, hinoro pakini sãkire hĩkĩpitiniã, ia isikaenetakiti apokapitikako hĩtemoni. Hĩkĩpitiniãri ninoa sãkire, erekari hãuini. Hĩkĩpitiniãri ninoa sãkire, hãuiniritika kiomãtxi hĩtxauako.

Irĩtxi Pirena

⁴ Hítepekana irĩtxiakori, kona hĩtxĩkitakapena hamariteakori omanãkarauatini atão minakati hĩkamini xika. Hõerekanako Apiananiri nireẽkiti ikaminina. Hõerekanako Apiananiri sãkire imarotinina.

Nitiritxi Pirena

⁵ Hítepekana nitiritxiakori amotakoni, hĩkamariko hĩauĩteakori ĩkorapokoriti auakani paniãtakiti. Hĩpaxitanako ninoa. Hĩpĩkariko ninoa manirekakiniti hĩkamini. Hãkixinireẽ hinirekariko ninoa nireẽkitinoka hĩkamini. Kristo paniãtakiti hĩkamini atokokana, hĩkamariko ninoa paniãtakiti. ⁶ ! Hĩparĩkauatapeko hĩparĩka erekari apanakini atamatini ĩkapani ĩkapani, kotxi iusaaki hinirekari ninoa poxokotinii. Kristo nitiriakori hĩtxaua, ininiã hĩparĩkauata Teoso nireẽkiti hĩkamini, kotxi hãkixinireẽ ikananoka hinireka hĩkamini. ⁷ Hĩkamariko hĩparĩka ikinika hĩpoxokoniritika, hinirekiniritika. Apiananiri ĩkapani hĩparĩkauatini atokokana, hĩparĩkauatako hĩauĩte ĩkorapokoriti auakari ĩkapani. ⁸ Kotxi himarotari Apiananiri sikariko parĩkatxi ĩki kãkitimoni, ĩkinipoko erekari ikamakiti ĩki. Nitiritxi iamotakoni, apaka nitiritxi miamotakoni Kristo nakitiakori apakapariko erekari ikamakitina ĩki.

Patrão Pirena

⁹ Hítepekana patrão, ia atoko inakari hĩkamako hinitiriakorimoni. !Hĩtxapiri hinitiriakori: "Īkinika nota paniãtakiti himakamakaniã, iteene nimisirĩtai hĩte," kotxi hĩte patrãote aua apaka iaxiti. Iua Teoso. Teoso kamakiti poiãorimoni, iua atokotxikana ikamakiti auĩtetximoni.

Kãkiti Xinire Tokapare

¹⁰ Nitiriakori, ia nisãkire mapotõkire: Katapara hĩtxako. Hĩkosekataparatariko Apiananiri tapara, kotxi kaposotiireri iua. ¹¹ Sotato ieretakari ĩto tokapare, neenamtxi ikamini apisapanika. Iua atokokana Teoso sikaua axinire tokapare, ininiã maeretakariko ikinika ikara axinire tokapare, kotxi neenamtxi auapitika Satanasikata. Iua paimatireri. Īxinikaxititapekari itxĩkitakinia maerekati akamini. ¹² !Aneenamauata kãkitikata. Aneenamauata maerekani matamatakoni auĩteakorikata, ikinika maerekani matamatakoni kaposotiirerinkata. Aneenamauata auĩtetxiakorikata ĩkorapokoriti ĩpiaã auakanikata. Aneenamauata ĩkinipoko maerekani matamatakoni iaxiti auakanikata.

¹³ Ininiãkara hĩretakariko ikinika Teoso sikakiti hĩxinire tokapare. Ininiã maerekati apokasaaki, !inokai. Kona hĩrika. Kona himiteka. Hĩokanataro Satanasasi isini. Hĩte kãiata.

¹⁴ Sotato iposope ineenamauatini atoko hĩtxako. Sotato takari ĩpakiomatare. Īpakiomatare maĩkari ĩkinipoko ĩto tokapare. Sotato pakiomatare atoko itxa hĩxinire tokapare maĩkiko. Atão inakari sãkiretxiti itxaua iua. Ininiã hĩtakariko ikara hĩpakiomatare.

Sotato takari itorota koana, itorota tokapare ĩkapani. Sotato torota koana atoko itxa hĩkamakiti atão inakaranoka. Ininiã hĩretakariko ikara hĩtorota tokapare.

¹⁵ Sotato kiti apaka iposope ineenamauatini, kotxi itakari ikiti mata ikiti tokapare ĩkapani. Sotato kiti mata atoko itxa Teoso iokanapirena erekari aanikapiretakiti kãkitimoni. Ikara iokanapirena sãpiretaua Teoso !imisiri-taikaua, isãkire aũuikasaaki. Ininiã hĩretakariko ikara hĩkiti mata.

¹⁶ Sotato maĩkari itokapare, ĩto imokaiakari xiripi minokakani ĩkapani. Xiripitxi tirinakari itokaparemoni apokasaaki, oaka. Iua tokaparetxi atoko itxa Teoso sãkire auikiko. Iteene hãuikiniãri Teoso sãkire Satanas! iposotari inokinii maerekatiã. Ininiã himaĩkariko ikara tokaparetxi.

¹⁷ Sotato takari ikii tokapare metao kamakori. Sotato kii tãta atoko itxa amaerekani makatxakiko aimarotini. Ikara imaroretxi axinikakiti akii tokapare itxaua. Ininiã hõtakariko ikara hĩkii tãta.

Sotato anikaro iouata mitaro. Oa iouata mitaro atoko itxa Erekaru Mata-matakoti sãpiretiniua Teoso sãkire. Ininiã himaĩkaroko oa iouata mitaro.

¹⁸ Himisãkiretari Teoso ãtipirika. Hamanaãriko, Erekaru Matamatakoti nireẽkiti iaõka hãpakapini. Araõkire hõtako. !Hõtakanapapiri hisãkirauatini Teosokata. Hamanaãriko Teoso, ikinimane inakitiakori nireẽkiti isikinina.

¹⁹ Himisãkiretari Teoso nota ikapani apaka. Hamanaãri Teoso, isãkire isikinino nisãkirauatakasaaki, nitaparaxinireritika nisãkirauatini ikapani, kotxi ninirekari Teoso iokanapirena erekari nisãpiretiniri kãkiti. Mĩtxi Teoso iokanapirena erekari !kimarotikori. ²⁰ Uatxa Teoso iokanatano nota kãkitimoni, iokanapirena erekari nisãpiretini ikapani. Ikara nisãpiretini xika, kateia ãki naua nota uatxa. Hamanaãri Teoso, isãkire nitaparaxinireritika nisãpiretini, kotxi ikara inakari niparĩka.

²¹ Niokanataru Txĩkiko inakori hĩtemoni. Aĩtari atiretakiti iua. Apiananiri nitiri itxaua. Atão iparĩkauata Apiananiri ikapani. Iua sãpiretaiko hĩte nota pirena. Ikara atoko himarotariko nauini, nikamakiti pakini. Iua sãpiretai ikinipoko nota pirena. ²² Ininiã niokanataru iua hĩtemoni ate pirena himarotini ikapani, isikataparaxiniretinii hĩte ikapani. ²³ Nitariakori, aĩri Teoso, Apiananiri Xesosi Kristo pakini kamaerekaxiniretai. Itiretaina hĩte. Itxĩkitakaina Teoso sãkire iteene hãuikini. ²⁴ Teoso sikari ikinipoko erekari aãũite Xesosi Kristo ãtipirika tiretanimoni. Ameẽ.

PIRIPOSI

Paoro Iokanatsopatakiti Piriposi Auakanimoni

¹ Nota Paoro, Tximótxio pakini, Kristo Xesosi nitiriakori iua amotakini atx-
aua. Niökatsopata ikini kākiti Kristo Xesosi nakitiakorimoni, Piriposi sitatxiti
auakanimoni aiokanapireta. Niökatsopata hīte kōtākikarerinimoni, kotxi hīte
ōtākikana Xesosi sākire auīākani. Hītepekana, kamiparīkarerini, niökatsopata
hītemoni, kotxi hīte moianatana Xesosi sākire auīākani.

² Ereēkai hīte. Aīri Teoso, Xesosi Kristo Apiananiri pakini sikai ikinipoko
erekari. Ninoa kamaerekaxiniretai.

Paoro Misākiretari Teoso Piriposi Auakani Īkapani

³ Hīte nixinikasaaki: “Erekapitikari aTeosone,” nitxa. ⁴ Teoso
nimisākiretakasaaki hīte himakinika Īkapani, nipoxokoniritika nimisākiretari
Teoso. ⁵ Nipoxokoniua, kotxi hīte miparīkatano nota Teoso iokanapirena
erekari nisāpiretini Īkapani, kotxi hīte iokanataro txineiro notamoni. Teoso
iokanapirena erekari hāuikasaaki, hīpotorika himiparīkatinino. Eereka kona
hīte iotokaika himiparīkatinino nota. Uatxa auapika himiparīkatinino nota.

⁶ Teoso sikari erekari hītemoni merepanika isākire hāuikasaaki, ininiā nota
imarotapitikari Teoso sikari erekari hītemoni ikiniōtika. Ikara Teoso parīka
hītemoni. Erekari isikiniritika Xesosi kanapiriā Īkorapokoriti. ⁷ Atāōpitika
nixinikinii hīte nipoxokoniritika, kotxi iteene nitiretai hīte himakinika.
Atxiiti kateia āki naua. Atxiiti mapara naua, kākiti Teoso iokanapirena
erekari atāo ininiua noerekini Īkapani. Atxiiti nisāpiretari Teoso iokanapirena
erekari, kākiti iteene imarotini Īkapani. Kateia āki nauakasaaki, mapara
nauakasaaki, ikiniōtika hīte notakata apakapari ikinipoko erekari Teoso
sikakiti. ⁸ Nota iteene tiretai hīte. Kristo Xesosi tiretini atokokana nitiretai
hīte. Teoso imarotari ikara nisākire atāo inini.

⁹ Nota misākiretari Teoso hīte Īkapani ia atoko: Ninirekari hītiraōkiuatini
apiaāpotini ikiniōtika. Hītiraōki aneeāpotakasaaki, ninirekari himarore apaka
aneeāpotini. Imarotexi himarōāpotakasaaki, ninirekari atāonoka himarotini.

¹⁰ Ikara atoko hininiā, himereēri apia erekari hīkamini. Ininiā maerekati
! hīkama. Maerekati na apanakinimoni ! hīkama. Ikara atoko hīhininiā,
iposomeka hītixa Kristo kanapiriākasaaki. ¹¹ Ikara atoko hininiā, ikinipoko
hīkamakiti erekari. Xesosi Kristonokara kamaerekatai hīte hīkamakiti ereka
inini Īkapani. Apanakini atamatakasaakiri erekari hīkamakiti, ninoa imarotari
Teoso posotiire, ininiā eereka ninoa: “Peerekari Teoso,” itxanako.

Paoro Misiritiko Pirena

¹² Nitariakori, himarotari nota iteene misiritaāka. Iuaritika Teoso
iokanapirena erekari iaripiretapeka. Ninirekari himarotini, nimisiritiko
xika apikomoni kākiti imarotari Teoso iokanapirena erekari. ¹³ Ininiā
nimisiritiko xika ikinika sotatoakori, Homanoakori auīte aapoko inīkatakani,
ikinimane kākiti mapara auakani apaka imarotari nota uai kateia āki
nauakasaaki Kristo sākire nisāpiretini xika. ¹⁴ Itori aītariakori Apiananiri
sākire auīākani, sikataparaxiniretaāka, kotxi imarotarina Teoso nīkatinino
nota kateia āki nauakasaaki. Ininiā ninoa sāpiretari Teoso sākire itaparax-
inireritikana. Mapīkaretika itxana.

¹⁵ Ninoa sāpiretari Kristo sākire, kotxi inirekarina erekari ikaminina.
Txamari apanakinipekana sāpiretari Kristo sākire nota xikotiko xika.
Inirekarina kākiti auikiniri ninoaka sākire, nota sākire poiāoka auikinina
Īkapani. Ninoa sāpiretari Kristo iokanapirena, kotxi ninoa potxitari kākiti

taparakienatakakiniua. ¹⁶ Aĭtariakori, erekarinani nirekakani, sãpiretari Kristo iokanapirena, kotxi ninoa turetano nota. Ninoa imarotari Teoso sikinino nota ia parĭkatxi, Teoso iokanapirena erekari atão inini noerekini ĭkapani. ¹⁷ Nota xikotakani sãpiretari Kristo sãkire, txamari inirekarina ninoaka nireĕkiti ikaminina. !Inirekarina Teoso nireĕkiti. Inirekarina nota apia atatsiitiniri nimisiritiko uai kateia āki nauakasaaki.

¹⁸ Atxiĭti Kristo iokanapirena sãpiretakani ākixinire erekari. Atxiĭti ninoa ākixinire kona erekari. Iuaritika erekapitikari, kotxi Kristo iokanapirena sãpiretapeĕkaika. Ininiākara nĭpoxokoniuaata nota. Ari, !niotokapani nĭpoxokoniuatini. ¹⁹ Nĭpoxokoniuaata, kotxi nimarotari nitakanapiniri kateia, kotxi hĭte misãkiretari Teoso nota ĭkapani. Nimakatzakaākako kateia āki, kotxi Erekarari Matamatakoti Xesosi Kristokata auakari moianatano nota. ²⁰ Kona ninirekari nĭpĕtauatini, Kristo iokanapirena nisãpiretakasaaki. Ninirekari kataparaxinire ninini, Kristo apanakini nisãpiretini ĭkapani. Ikara atoko nininiã, apanakini imarotari Kristo Apiananiri ininiua. Ikiniõtika nauapanika ninakasaaki, ninirekari kãkiti imarotiniri Kristo Apiananiri ininiua. Ari, nĭpĭkasaaki apaka, ninirekari apanakini imarotiniri Kristo Apiananiri ininiua. ²¹ Auapanika ninakasaaki, ninirekari Kristo nireĕkitinoka nikamini. Erekapitikari nipinini, kotxi eereka Kristokata nauapika. ²² Auapanika ninakasaaki, nĭparĭkauatapitipo Teoso sãkire nisãpiretini, ininiākara erekari nĭparĭka. Kipa ninireka? Nota auapanika nininikani? Nĭpininikani? ! Nĭmarotari ninireĕkiti. ²³ Ninirekari auapanika ninini. Apaka ninirekari nipinini. Apiata ninirekari nipinini Kristokata nauini ĭkapani. Ikara atoko apiaerekata. ²⁴ Txamari hĭte noerekini ĭkapani, ninirekari auapanika ninini, kotxi hĭte nirekapanikano nota. ²⁵ Ikara nimarotapitika, ininiã auapanika nitxa, himakinika noerekini ĭkapani, kotxi nota nirekari himarõãpotiniri Teoso sãkire. Ninirekari hãuikiniri hĭpoxokoniritika. ²⁶ Ininiã eereka hĭtxari: “Erekapitikari Kristo Xesosi, kotxi Paoro iuaĭkana apoka atemoni,” hĭtxapaniko. Ininiã iteene hĭpoxokoniuaata iusaaki.

²⁷ Atxiĭti auapanika nitxa, atxiĭti nipina, uaritika ikiniõtika ereka hĭtxako hãuini. Erekarari Kristo iokanapirena, ininiã hĭte apaka ereka hĭtxako hãuini. Atxiĭti nisa hĭtemoni. Atxiĭti kona nisa. Atxiĭti nikenakopiretai hĭte uai kateia āki nauakasaaki. Iuaritika, hãuini ereka inakasaaki, nimarotariko hĭte himakinika iteene auikiniri Kristo sãkire iua iokanapirena erekari. Hãuini ereka inakasaaki, nimarotari hĭte himakinika sãpiretiniri Kristo iokanapirena iaõka apanakinimoni. ²⁸ Hãuini ereka inakasaaki, na hĭpĭkana hĭte omanatakani. Hĭtaparaxinireritika hãuiniã, ninoa hĭte omanatakani imarotari ixipokinina āti õti. Hĭtaparaxinireritika hãuiniã, ninoa imarotari Teoso makatzakinii hĭte himapinakani ĭkapani. ²⁹ Ininiã Teoso sikari erekari hĭtemoni, kotxi iua auiritai hĭte auikiniri Kristo iokanapirena. Apaka erekari isikai hĭte, kotxi iua auiritai hĭte atatsiitiniri himisiritiko Kristo ĭkapani. ³⁰ Hĭte atamatapekari nota misiritiko, hĭte sauaki nauakasaaki. Hĭkenakopiretari nimisiritiko auapanika uatxa. Uatxa hĭte nota atoko, kotxi hĭte apaka misiritaãka.

2

Kristoka Poiãotakaua.

¹ Kristo sikataparaxiniretaua ate, iua nakiti aniniãua. Kristo mĭkapiritaua ate, amarini axapitiri inoro mĭkapiritini atoko itxa, kotxi iua turetana. Ātipirika iua Erekarari Matamatakoti amoiarari itxaua. Kristo iteene turetana. Iua amonĭkaua. ² Ininiãkara nota õtãkikai hĭte hĭkinika. Hĭxinikariko Teoso nireĕkitinoka hĭkamini, ininiã hĭxinikakiti ātinoka txauako. Hĭtoretakauako

Teoso turetiniua atokokana. Hinireēkiti ātinoka txauako. Ikara atoko hininiā, iteene hīkamapoxokonitano nota. ³ Kona kapotxinaniri hītxapeua. !Hīuikapeua. Hīteka minakati hītxauako. Hīxinikariko: “Apanakini apiata, nota poiāōka”. ⁴ !Hīxinikapiri pite nireēkitinani. Himiparīkatanako apanakini, ninoa nireēkiti ikaminina ikapani.

⁵ Xesosi Kristo xiniākitikanerako hīxinikako. Kristo kamakitikanerako hīkamako. ⁶ Teoso itxaua Kristo Xesosi, ininiā iposotari ipaniātiniiri ikinimane nireēkiti ikaminina. ⁷ Iuaritika itakanapari auītetxi ininiua. Nitiritxi atoko itxapekaua. Iuaka minakati itxīkitakaua, kotxi kākitipeka itxaua uai itixi iponaniākasaaki. ⁸ Iuasaaki kiki inakasaakiaua, iuaīkana iuaka ipoiōotakaua, kotxi ikīpitari Teoso sākire ipinini ikapani. Imarotari okiko tīkane, kokaniri okiko atoko inaākako aamina ipiriāmitakari nopini. Iuaritika ikīpitari Teoso sākire ipinini ikapani. ⁹ Ikara atoko ininiā, Teoso txīkitakari iua Apiananiri ininiāua. Āti iua atoko inakari !auari. Teoso takari iuāka. Āti uāka iua atoko inakari !auari, ¹⁰ kotxi kākiti ikininape kenakotakasaakiri iuāka Xesosi, ikapotoreēkauako Xesosi apisatoō. Ikinimane Teoso tixine auakani, ikinimane itixi auakani, ikinimane ipīkani auiniātaā pakini kapotoreēkauako Xesosi apisatoō, kotxi iauītena itxaua Xesosi. ¹¹ Ikinipoko kākiti txako: “Xesosi Kristo Apiananiri itxaua,” itxanako. Ikara atoko ininiā ikinimane: “Peerekari airi Teoso,” itxanako.

Iōriki Atoko Hītxako

¹² Ininiā nota turetakinini, hīkīpitariko nisākire uatxa, mitxi hītekata nauakasaaki nisākire hīkīpitini atokokana hītxako. Uatxa kona hītekataikano, iuaritika ninirekari apiata hīkīpitiniiri nisākire. Teoso makatxakapekari himaerekani itixine hīsini ikapani, ininiākara ikiniōtika hīparīkauatoko Teoso ikapani. Hīpīkariko maerekati hīkamini. Erekarinanira hīkamapikako. ¹³ Hīposotari ikara atoko hīkamini, kotxi Teosokara moianatai hīte. Iua kamanirekaretai hīte iua nireēkiti hinirekini ikapani. Iua sikaposotiiretai hīte iua nireēkiti hīkamini ikapani.

¹⁴ Hīparīkauatakasaaki, !hītsoatape, !hītxitakapeua. ¹⁵ Ikara atoko hīkaminiā, hīkerokiniri !auari, himaerekani !auari, ininiā erekarinoka hīkama apanakinimoni. Ininiā Teoso anaakori erekarini hītxaua. Kākiti kamisirienererini sauaki hāuanāta hīte. Kākiti maerekani sauaki hāuanāta. Iōriki iopinikari iaxiti ikanōka. Iōriki atoko hītxako. Hīopinikariko maerekati auiniātaā, atō inakari kākiti imarotini ikapani. ¹⁶ Hīte iopinikari ipiā, Teoso sākire apanakinimoni hīsāpiretakasaaki. Teoso sākire txīkitakari kākiti ātipirika auāki inini tīkane, Teosokata auini ikapani. Hīte Teoso anaakori erekarini hininiāua, nota iuikako hīte, Kristo uaimoni kanapiriākasaaki, kotxi hīte auikapekari Teoso sākire nisāpiretakiti. Kona maxikatūkani nīparīkauatapitipo hīte ikapani, kotxi hīte auikapekari Teoso sākire nisāpiretakiti.

¹⁷ Atxiīti nota okaāka Teoso sākire nisāpiretini xika. Atxiīti niarēka oxikepoakataāka, Teosomoni sikakori atoko inakari, Teoso sākire nisāpiretini xika, Teoso sākire hāuikini xika. Nokaāka atxiīti, iuaritika nipoxokoniuaata. Nipoxokoniuaata hītekata. ¹⁸ Ininiā erekari hīte apaka poxokoniuatini. Erekarini hīpoxokoniuatini notakata.

Tximótxio Pirena

¹⁹ Xesosi Apiananiri nirekiniāri nota iokanatiniri Tximótxio hītemoni, ininiā mapaōtipeka inakasaaki niokanatarini iua. Ininiā eereka iua minapiretari hīte pirena, nota apaka poxokoniuatini ikapani. ²⁰ Āti Tximótxio atoko inakari uai !auari, kotxi iua iteene turetai hīte. Iua nirekari hāuini ereka inini. ²¹ Apanakini kākiti xinikari ninoaka nireēkitinoka. !Ixinikarina Xesosi Kristo nireēkiti. ²² Himarotari iua Tximótxio parīkauatape notakata, imi

irikata parīkauatakari atoko itxa. Iparīkauata notakata Teoso iokanapirena erekari apanakini asāpiretini ikapani. Ininiākara himarotari Tximótxio atamakaākapeka, ininiā himarotari erekapitikari iua. ²³ Kiatokopa ninataāka? Uatxa !nimarotari. Nimarotakasaakiri, niokanatarari Tximótxio hītemoni. ²⁴ Apiananiri kamaimaroretano nota, Tximótxio tikinimoni nota apaka apoka ereē hītemoni.

Eparotxito Pirena

²⁵ Notamoni erekari iuaīkana niokanatiniri hīokanapirena mīkari, Eparotxito inakori. Hīte iokanatapekari iua notamoni nota itiretini ikapani. Iua nitari atoko itxa. Imiparīkatapitipono nota, Teoso iokanapirena asāpiretakasaaki. Iua, nota pakini sotato atoko atxaua, kotxi ate neenamauata Teoso ikapani. ²⁶ Iua ipiātai hīte hīkinika. Iua maerekaxiniretinoka itxa, kotxi ikenakopiretari hīte imaropiretiniri iua amianatini. ²⁷ Atāopitikara iua amianatapitika. Iua ipinaarita, iuaritika Teoso amonīkari iua. Itxikitakari iua iuaīkana ereka inini. Ininiā Teoso amonīkano nota apaka, kotxi Eparotxito ipinaākamako, apia maerekaxiniretinoka nitxamako. ²⁸ Ininiākara iteene ninirekari niokanatiniri iua hītemoni, hīpoxokoniuatini ikapani haōkitakasaakiri. Ikara atoko ininiā, nota maerekaxiniretinoka ninini !auaika. ²⁹ Ininiā hīpoxokoniritika hāpakapariko iua, kotxi iua Eparotxito aītari itxaua, kotxi Apiananiri nakītiakori atxaua. Hīpaxitariko kākiti Eparotxito atoko inakari, ³⁰ kotxi Kristo ikapani iparīkauatini xika ipinaarita. Iuaka monōkorimoni isa nota imoianatini ikapani, kotxi iua imarotari hīte nirekapitikamari himoianatinino, txamari !hīposota himoianatinino, ininiā iua iteene moianatano.

3

Kiatokopa Kākiti Atāo Ereka Inini?

¹ Nitariakori, apikomoni nisāpiretai. Hīpoxokoniuatoko, kotxi Apiananiri nakitiakori atxaua. !Nisāpaka iuaīkana nisāpiretakitipeka nisāpiretinii hīte. Iuaīkana nōtākikai hīte, atāo minakati himauikakani ikapani. ² Erepaniko kākiti maerekati kamakani, atāo minakati sāpiretakani, kotxi ninoa sāpiretari kākiti: “Teoso takaōtxikare piītoā mauakaniā, kona Teoso nakiti !pitxaua,” itxana. ³ Ninoa auapitika Teoso takaōtxikare iītoāna, txamari kona Teoso nakitiakori !itxauana. Atera Teoso nakitiakori, kotxi atemoni iua atāo inakari Teoso takaōtxikare ate ākixinireē, kotxi Erekarari Matamatakoti oerekaua amisākiretiniri Teoso. Kristo Xesosinokara ate iuika. Aimarotari ateka kamakiti !itxa. Teoso kamakitinokara apakata.

⁴ Hīuākatari atxiīti hīte kamakiti ereka inini Teoso apakapiniī ikapani? Konapitini. Nota kamakiti apiaerekata, iuaritika nikamakiti !txīkitakano Teoso apakapinino ikapani. Hīkenakotariko erekari nota kamakiti: ⁵ Teoso takaōtxikare niītoā takaāka oito ōti nauakasaaki. Nirini, ninoroni pakini Xoteo itxauana. Natokiri kitxakapirīka Pēxamiī inakori. Kitxakapirīka natokiriakorini, nakiroakoroni pakini ikinika Xoteoakori itxauana, ininiā atāo Xoteo nitxaua. Nota kīpitari aāuīteakori kitxakapirīkarini paniātakiti, kotxi nota pariseo nitxaua, ininiā Teoso sākire iōkatsopatakori oerekakari nitxaua. ⁶ Nota iteene nirekari Teoso nireēkiti nikamini, ininiā nimisiritari kākiti Xesosi sākire auiākani, kotxi niuākatari Teoso nirekari ikara nikamini. Aātokiriakorini paniātakiti ikinika nikīpita. !Nikerokari.

⁷ Mitxi niuākatari ikara atoko nininiā erekapitikari, ininiā, “Teoso apakapitikanono nota,” nitxa. Uatxa nimarotari Kristo, ininiā nimarotari mitxipe minakati nininiua nota. ⁸ Uatxa nimarotari niauīte Kristo Xesosi. Ikara

apiaerekata. Xesosi nimarotini apisapanika, nikamakiti !itxa xatiki. Nitakanapapekari mitxi nikamakiti. !Itxaika. Mitxi nikamakiti itiki atoko, kotxi !ninarekaikari. Kristo nakiti uatxa nitxaua. ⁹ Nitakanapapekari mitxi nikamakiti Kristokata ätipirika nauini ïkapani. Nota kïpitarï Moisesini paniätakiti. Ikara atoko inakarïnani kona ereka txïkitakano nota. Teosonokara kamaerekatano nota, kotxi nauikari Kristo säkire. ¹⁰ Ninirekari Kristo iteene nimarotini. Ninirekari nimarotïniri Teoso posotiire, kotxi iposotiireë ökitikari Kristo, iuaïkana auäki inini ïkapani. Kristo atatsiirauatape, ininiä nota apaka nirekari natatsiirauatini atöo imoianari nininiua ïkapani. Ninirekari nota nireëkiti ipinini, Kristo aamina ïpiriämitakari nopini ipinini atoko. Ninirekari Xesosi nireëkitinoka nikamini, ininiä iua atoko nitxaua. ¹¹ Ininiä itixi xipokini öti Teoso ökitikanoko, iuaïkana auäki ninini tïkane.

Mitekakari Atoko Nitxa

¹² Ikara ikinika !nimarotapanika. Nimaroöpotapanikariko. Teoso kamaapanikari iparïka nota äkixinireë. !Ixipokapanikari, ininiä !niotokakari nïparïka Teoso ïkapani. Nïparïkauatapitipo. Mitekakari mitekini atoko, !niotoka. Mitekakari nirekari mitekaxi mapotökire apokini. Iua atokokana nota nirekari nïparïka mapotökire napokini, kotxi Kristo Xesosi mereëno nota ikara atoko nikamini ïkapani. ¹³ Nitariakori, nïparïka mapotökire !napokapanika. Ia nikamako: !Nixinikaikari mitxi nikamakiti. Mitekakari masapotorikakati atoko nitxa. Nitapararitika nisa apikomoni, nïparïka mapotökire napokini ïkapani. ¹⁴ Mitekakari iteene nirekari mitekaxi mapotökire apokini imitekini ïki apakapini ïkapani, ininiä imitekapitipo. !Iotoka. Iua atokokana nota parïkauatapitipo Teoso ïkapani, nïparïka mapotökire napokini ïkapani, nïparïka ïki Teoso sikakiti napakapini ïkapani, kotxi Teoso pïkapiretano nota Kristo Xesosiä itixine nisini ïkapani, nïparïka ïki napakapini ïkapani.

¹⁵ Akinika ate Kristo iteene imarotakani xinikamariko nota oerekakiti atoko inakari. Ikara atoko himaxinikakanisaaki, Teoso oerekaiko hïte atöo inakari. ¹⁶ Mitekaxi kamakari paniätakiti iaöka mitekakari kama imitekasaaki. Iua atokokana makamariko Teoso paniätakiti. Uatxaika akamakiti atokokana makama.

¹⁷ Nitariakori, hïkamariko nota kamakiti atoko inakari, kotxi ate oerekepaki hïte ikara atoko inakari hïkamini. Hïkïpitariko nota kamakiti atoko inakari kamakani säkire. ¹⁸ Kaiäopokori käkiti !auikari Kristo ipinini amaerekani imaktxakini ïkapani. Kristo omanatakani itxauana ninoa. Itokatapeka ikara nisäpiretai hïte, ininiä iuaïkana uatxa ikara nisäpiretai. Itene nimatinaniuata ninoa xika. ¹⁹ Itixi mapotökire ötsaaki ninoa iokanataäkako maerekani misiritikoötaä. Iïtona iteosenena atoko itxana, kotxi iïtona nireëkitinoka ikamana. Ikamakitina !erekari, iuaritika iuikarina ikamakitina. !Ipëtauatana. Ninoa xinikapikari ïkorapokoriti. !Ixinikarina Teoso. ²⁰ Atepekana, Teoso tixine auakani atxapekaua. Aiätapari apoxokoniritika käkiti maerekani makatxakari iuaxitiki uaimoni apokini. Iua Xesosi Kristo Apiananiri itxaua. ²¹ Iuasaakiko inoäkari äito mataparati. Itxïkitakari äito iua ïto erekari atoko inini. Iposotari, kotxi kaposotiireri itxaua iua. Ikinimane kamapitikariko ipaniätakiti, kotxi kataparari iua Xesosi.

4

Ötäkipirenatxi

¹ Nitariakori, nota iteene tiretai hïte. Nipiätai hïte. Hïkamapoxokonitano nota. Niuikai hïte, kotxi nïparïka ïki atoko hïtxa. Nitiretakini, hïxinikariko ikara nota ötäkikinii uatxa. Nota ötäkikinii hïkïpitiniä, !hïtakanapari Apiananiri.

² Nota õtākikai hīte Epótxia inakoro, Sītxiki inakoro pakini. Hīkīpitariko Apiananiri sākire. Hīotokakariko hītxitakiniua. ³ Pitepekana nimoianari erekari, nota nirekai pite õtākikinina naia sito ipi, kotxi ninoa parīkauatapeka notakata Teoso iokanapirena erekari asāpiretakasaaki. Ninoa parīkauata notakata, Kremētxi inakori pakinikata, apanakini nimoianariakorikata apaka. Ninoa uāka Teoso aātsopateē iōkatapeēkaika, Teosokata auapininiika ininina tīkane.

⁴ Hienenīkapikako, kotxi Apiananiri nakiti hīttxaua. Iuaīkana nitxai. Hienenīkako.

⁵ Erekari hīkamako apanakinimoni. !Hīttxitapena. Erekari apanakini imarotiniri hīte ereka hinini. Apiananiri kaiamapeka ikanapiriini uaimoni. ⁶ Na xatiki maerekaxiniretika !hīttxape. Maerekaxinireti hinakasaaki, himisākiretariko Teoso. Hamanaāri hinireēkiti. Himisākiretakasaakiri Teoso, hīttxariko: “Erekapitikari notamoni pikamakiti,” hīttxariko. ⁷ Ikara atoko aniniā, Teoso kamaerekaxiniretaua. Kiātokopa ininiāpa Teoso kamaerekaxiniretaua? !Kimarotikori, uaritika peerekari. Hākixinire erekaxinirepeka ininiā, maerekati !iūroā hākixinireē. !Hininrekaikari maerekati hīxinikini. !Hininrekaikari maerekati, kotxi Kristo Xesosi nakiti hīttxapekaua.

⁸ Nitariakori, nisāpiretakiti xipokini apisa, nisāpiretapanikaiko hīte. Hīxinikariko atāo inakari sākiretxiti. Hīxinikariko atāo inakari hīsāpiretini. Hīxinikariko atāo inakari hīkamini. Hīxinikariko erekarinoka. Hīxinikariko tiraōkitxi. Hīxinikariko potxitakori. Ikara atoko inakarinoka hīxinikako, kotxi erekapitikari ikara. Peerekari ikara. ⁹ Hīkamapikariko noerekakiti iaōka. Hīsāpiretanako apanakini hītemoni nisāpiretakiti. Hīkamariko nota kamakiti hītiākiti atokokana. Ininiā Teoso kākiti kamaerekaxiniretakari kaikota hītekata.

Paoro Potxitari Ninoa Sikakiti

¹⁰ Apiananiri nakiti nitxaua, ininiā iteene nipoxokoniua. Iuaīkana hīte oerekari hītiretinino, txineiro hīsikakito hīokanatinano, ininiā nipoxokoniua. Ātipirika hīxinikano, kotxi iteene hītiretano. Txamari mitxi !hīposotari hīsikakiti hīokanatinini notamoni. ¹¹ !Namanaāi iuaīkana txineiro hīokanatinini notamoni. Ikinipoko ninireēkiti auakasaaki, nipoxokoniua. Ikinipoko ninireēkiti mauakanisaaki, uaritika nipoxokoniua. ¹² Nota napapekari nimamākani, nimanipokoreni, nimatxineiroteni pakini. Apaka nimarotari ātikataā ninireēkiti ikinipoko auinano. Teoso oerekapekano ikiniōtika nipoxokoniuatini. Nienenīka nipokori auakasaaki. Nienenīka ninatxitaakasaaki apaka. Nienenīka ikini sereti auinakasaakino. Nienenīka minakati mauinakanisaakino. ¹³ Ikinipoko niposota nikamini, kotxi Kristo sikano iposotiire.

¹⁴ Erekapitikai hīte, kotxi nimatxineirotenisaaki, hīokanataritari txineiro notamoni. ¹⁵ Teoso iokanapirena erekari merepitipanika hīkenakotakasaaki, ereē Masetónia tixini nosipikasaaki, hīte Piriposi auakaninokara iokanataro txineiro napakapini ikapani. Apanakini Xesosi sākire auīākani ātiātaā auakani, !iokanatinano nota. Himarotapekari ikara. ¹⁶ Tesarónika sitatxiti nauakasaaki, ninirekakiti auakasaaki, itokata txineiro hīokanatinano. ¹⁷ !Niātaparo txineiro hīsikinino. Niātapari Teoso sikinii erekari, kotxi hīte tīretapekano nota. ¹⁸ Napakapapekari ikinipoko hīokanatakiti. Kaiāopokori hīokanatakiti. Epararotxito inakori mininano hīsikakiti, ininiā ikinika ninireēkiti uatxa auinano nota. Teosomoni sikakori kamariri atoko itxa hīte sikakiti notamoni. Teoso potxitari hīsikakiti notamoni. ¹⁹ NiTeosone sikaiko hīte hinireēkiti ikini sereti, kotxi ikinipoko aua iuamoni. Isikaua,

kotxi Kristo Xesosi nakitiakori atxaua. ²⁰ Ātipirika matxari Teoso: “Peerekai aīri, aTeosone. Ameē.”

Takanapapirenatxi

²¹ Hisāpiretanako ikinimane ereē auakani Kristo Xesosi nakitiakori, nixinikamanapitinina ninoa. Aītariakori uai notakata auakani xinikamanapitai hīte apaka. ²² Ikinimane uai auakani Teoso nakitiakori iokanapireta hītemoni ixinikiniina. Homanoakori auīte aapoko auakani, Teoso nakitiakori, iokanapireta hītemoni iteene ixinikiniina.

²³ Xesosi Kristo Apiananiri sikari ikinipoko erekari hītemoni. Ameē.

KOROSO

Paoro Iokanatsopatakiti Koroso Auakanimoni

¹ Nota Paoro. Niokanatsopata hitemoni. Teoso mereëno nota, kotxi inirekari nota Xesosi Kristo iokanatakiti nininiua. Aĩtari Tximótxio apaka iokanapireta hitemoni. ² Ininiã aiokanataria ia iõkatsopari Teoso nakitiakorimoni, ikinika Teoso paniãtakiti kamakanimoni Koroso sitatxiti auakanimoni. Aĩtariakori hĩtxaua. Aĩri Teoso, Apiananiri Xesosi Kristo pakini sikari ikinipoko erekari hitemoni. Ninoa kamaerekaxiniretai hĩte.

Teoso Misãkiretiko Koroso Auakani Īkapani

³ “Erekapitakai,” atxari Teoso, aũũte Xesosi Kristo iri, iua amisãkiretakasaaki hĩte Īkapani. Ātipirika amisãkiretari Teoso hĩte Īkapani. ⁴ Ikara atoko atxari Teoso, kotxi ate kenakopiretari hĩte auikiniiri Kristo Xesosi sãkire. Apaka akenakopiretari hĩte tĩretiniri ikinika kãkiti Teoso nakitiakori. ⁵ Teoso iokanapirena erekari atão sãkiretixiti itxaua. Ikara hĩkenakotakasaaki, hĩkenakotari Teoso sikaenetakiti ipotetakiti itixineë hĩte Īkapani, ininiã hiãtapari hãpakapiniri Teoso sikaenetakiti. Himarotari hãpakapiniri, ininiã Teoso sãkire hãuikini aua, hĩtiraõkiuatini pakini aua. ⁶ Teoso iokanapirena erekari hĩkenakotakiti iaripiretapeka ikini itixitimoni. Ikinĩõtika apikomoni kãkiti kenakotari. Iuasaaki kãkiti auikaãpotari Teoso iokanapirena. Ikinĩõtika kãkiti apakapari erekari Teoso sikakiti. Iua atokokana hĩte kenakotari Teoso iokanapirena erekari. Iuasaaki himarotari ikinipoko erekari Teoso sikakiti. Iuasaaki himarotari Teoso atão sikiniri ikinipoko erekari kãkitimoni.

⁷ Amoianari, atiretakiti, Epãpara inakori, iuara oereka Teoso sikiniri ikinipoko erekari kãkitimoni. Iua Kristo nitiri itxaua. Ātipirika iparĩkauata Kristo Īkapani, ininiã Ātipirika iparĩkauata hĩte Īkapani. ⁸ Iua sãpiretaua ate hĩtiraõki, Erekarĩ Matamatakoti sãkiti hitemoni.

⁹ Hĩte pirena akenakopiretakasaaki, Ātipirika amisãkiretari Teoso hĩte Īkapani. Ate nirekari hĩte iteene imarotiniri Teoso nireëkiti hĩkamini Īkapani. Anirekari kiĩkiteni hininiãua. Anirekari himarotiniri Teoso imarore Erekarĩ Matamatakoti sãkiti.

¹⁰ Ininiã ate misãkiretari Teoso hĩte atão hĩkamini ikinĩõtika, kotxi Apiananiri anaakori hĩtxaua. Anirekari hĩkamakiti kamapoxokonitiniri Teoso. Ininiã hĩkamakiti ikinĩõtika erekarinoka, amãĩĩiri erekari atoko. Ininiã ikinĩõtika himarõãpotari apikomoni Teoso nireëkiti. ¹¹ Anirekari Teoso sikatapaxiniretinii hĩte iposotiireë, kotxi kaposotiireri iua. Ininiã iuasaaki hiãtapari himisirĩtiko xipokini. Iuasaaki !hinaiataua. Iuasaaki hĩposotari himĩteenekiniri himisirĩtiko hĩpoxokoniritika. ¹² Iuasaaki hĩtxariko aĩri: “Erekapitakai,” kotxi iua kamaerekataua. Ininiã aãpakapari iua potetakiti inakitiakori Īkapani Teoso tixineë, ipiã mauakaniãtaã. ¹³ Iua sikakaua ipiã posotiireë aũuakasaaki, maerekati posotiireë aũuakasaaki. Iua anikaua imi itiretakiti auiniãtaã. Iuaãtaã auakani aũũte itxaua imi. ¹⁴ Imi Kristo iĩkixitari Teoso amaerekani ĩki ipĩkasaaki, ininiã Teoso makatxakari amaerekani. !Ixinikaikari amaerekani.

Kristo Apiananiri

¹⁵ Kãkiti kona posotari atamatiniri Teoso. Teosotxikana itxaua Kristo, iuaritika aposotari Kristo aãtamatiniri. Ikinipoko kamiko apisa, Kristo aua Teosokata. ¹⁶ Iua kamari ikinipoko. Ikamari iaxiti auakani, uai itixi auakani apaka. Ikamari ikinipoko kãkiti atamatakiti, kãkiti matamatakiniti apaka. Ikamari ikinika kaposotiirerini, auĩtetxiakori matamatakoni, ikinika Teoso

nitiriakori pakini. Ikamari ikinika. Ikinika kamaãka iua ïkapani. ¹⁷ Kristo aua ikinipoko apisa. Iua maïkari ikinika imaxipokakani ïkapani. Ikara atoko ininiã, ikinipoko auapanika. Iua mauakaniã, ikinika iarika. Iua mauakaniã, ikinipoko xipoka.

¹⁸ Kãkiti Teoso mereëkini Kristo ïto atoko itxauana. Teoso mereëkini kii atoko itxa Kristo. Merepitipanika ipïkari õkitikakarua iua. Ininiã õkitikasaakua, oerekari kãkiti Apiananiri ininiua. Åti kaposotiireri iua atokokana inakari ! auari. ¹⁹ Teosotxikana iua. Ikinika Teosomoni auakari aua iuamoni. Ikara atoko Teoso apokaerekatari. ²⁰ Kristo arëka xiketakasaaki aamina ïpiriãmitakari nopini, iusaaki Kristo makatxakapekari imakinika omanãkarauatini kãkiti maerekani xika. Kotxi Teoso nirekari Kristo mininiri ikinipoko uaiãkana iuamoni, ïkorapokoriti auakani, iaxiti auakani pakini. Ininiã uatxa Teoso apakapari Kristo sãkire auiãkani.

Kristo Kamakiti Koroso Auakani ïkapani

²¹ Hïtepekana, mitxi ! himarotari Teoso. Iusaaki ! hãuari Teosokata. Maerekati hïkamakiti xika homanatarari Teoso hãkixinireë. Teoso mokaiakariakori hïtxaua iusaaki. Uatxa Teoso apakapai hïte, ²² kotxi Kristo ïto ipina hïte ïkapani. Ininiã iua anakai hïte Teosomoni iua makatxakakini hininiua ïkapani. Teosomoni himaerekani ! auaika, kotxi Kristo makatxakapekari imakinika himaerekani. Teoso apisatoõ hãpokasaaki, kona åti posotari apoïtinii himaerekani xika. ²³ Ikara atoko aua hïtemoni, iteene hãuikiniãri Kristo sãkire ikiniõtika, Kristo sãkirenoka hãuikiniã, isãkire himatakanapakaniã. Ikara atoko hïkaminiã, apanakini kona txïkitakai hïtakanapiniri hïatapaniri ikinika Teoso kamakiti hïte ïkapani. Teoso iokanapirena erekari sãpiretaua ikinika Teoso kamakiti inakitiakori ïkapani. Hïte kenakotapekari Teoso iokanapirena erekari. Isãpiretaãkapeka ikinika itixi auakanimoni. Nota Paoro Teoso nitiri, iua iokanapirena erekari ikinimane nisãpiretini ïkapani.

Paoro Parïkauata Kãkiti Teoso Mereëkini ïkapani

²⁴ Uatxa nïpoxokoniua hïte ïkapani natatsiirauatini, kotxi natatsiirauatini xika hïte auikari Kristo sãkire. Natatsiirauata niïtoã Teoso mereëkini ïkapani. Kristo ïto atoko itxauana kãkiti Teoso mereëkini. Natatsiirauat- apitika, iuaritika Kristo atatsiirauatini apiata. ²⁵ Teoso iokanatano nota imereëkini nitiri nininiua. Ipaniãtano nisãpiretiniri ikinika isãkire hïtemoni. ²⁶ Ipaniãtano nisãpiretinii mitxi kãkiti mimarotakiniti. Okananipeka Teoso ! oerekari ikara kãkiti mimarotakiniti. Kristo ipinini apisa ïkini itixiti auakani ïmarotari ikara. Mitxi kãkiti mimarotakiniti uatxa oerekaãka Teoso nakitiakorimoni. ²⁷ Uatxa Teoso nirekari inakitiakori Xoteo minakanuia ïmarotiniri mitxi kãkiti mimarotakiniti, kotxi peerekari. Natokopa itxa ikara kãkiti mimarotakiniti? Nisãpiretai. Kristo posotari kãkiti åkixinireë auini. Ia mitxi kãkiti mimarotakiniti. Kristo aua hãkixinireë. Ininiã himarotari hïsinu Teoso tixinemoni. ²⁸ Ininiã asãpiretari kãkiti Kristo pirena. Aõtãkikari ikinimane Teoso ïmaroreë. Aõerekari ikinimane Teoso ïmaroreë, kotxi Teoso sikaimaroretua. Iua aua ikinika ïmaroretxi. Ikara atoko aanikana Kristo nireëkitinoka kamakani Teosomoni. ²⁹ Ikara nikamini ïkapani, nïparïkauatipitipo. Pasãpaniri. Kristo posotiireë nïparïkauata, kotxi kaposotiireri iua. Iua iteene sikataparatarari nãkixinire, ininiã nïposotari iteene nïparïkauatini iua ïkapani.

¹ Ninirekari himarotiniiri iteene nimisiritiko hïte ïkapani. Apaka iteene nimisiritaãka Araotxisëia sitatxiti auakani ïkapani. Nimisiritaãka apanakini nimataõkitakini ïkapani apaka. ² Ninirekari ikinimane ninoa kataparaxinire ininina. Apaka ninirekana itiretakaniuana, ininiã ätika ninoa nireëkiti. Ikara atoko ininiãna, iteene imarotarina ikinika Teoso säkire. Iuasaaki imarotarina Kristo, mitxi kãkiti mimarotakiniti, mitxi aïri Teoso moerekakiniti. ³ Paimatireri Kristo. Iua mimarotakiniti !auari. Ikinipoko imarota. ⁴ Ikara atoko nisãpiretai hïte, apanakini mamisirienetakanii ïkane kãkiti imaroreë. ⁵ Niïto !auari hïtekata, iuaritika nixinikapikai hïte näkixinireë. Nipoxokoniuta, kotxi nimarotari hïkamakiti atão inini. Apaka nipoxokoniuta, kotxi hïte iteene auikari Kristo säkire.

Atão Kristo Säkire Auiãkani Kamakiti

⁶ Hãpakapapekari Kristo Xesosi hãauïte ininua ïkapani, ininiã hïkamariko inirekakiti ikiniõtika. ⁷ Iua taparanoka hïkosekako. Aãkotsa kosekiniri äparaã atoko hïtxako. Ikara atoko hininiã, kataparari hïxinire. Ininiã atão hãuikari Kristo säkire mitxi aõerekakiti atoko, ininiã kataparaiko. Ininiã iteene hïtxariko Teoso: "Ikinika pikamakiti ate ïkapani peerekari," hïtxako.

⁸ Erepaniko. Kona hãuiritapiri kãkiti makatzakinii Teoso kimaporeë. ! Hãuikapiri ninoa säkire, kotxi ätião ninoa säkire. Na atão isäkirena. Kãkiti imarorenoka imarotana. Kamisirienererini ninoa. Maxikatïlka isãkirauatana. Kitxakapirïka auakani säpiretakiti ninoa säkire. ïkrapokoriti auakani nireëkiti maerekati isãpiretana kãkiti. Kona Kristo säkireni.

Apiananiri Itxaua Kristo

⁹ Kristo aua iïto, iuaritika Teosotxikana iua. Kristo aua ikinipoko Teoso posotiire, ikinipoko itiraõki, ikinipoko imarore, txaãpokata, kotxi Teoso itxaua. ¹⁰ Kristo aua hãkixinireë, ininiã ikinipoko aua hïtemoni. ! Auari apikomoni hinirekakiti, kotxi auïtetxiakori iaxiti auakani auïte itxaua. Apiananiri itxaua. Kaposotiireri iua atoko inakari !auari.

Kristo Kamakiti Hïte ïkapani

¹¹ Hãpakapapekari Teoso takaõtxikare kãkiti mataãkiniti. Hãkixinireë Teoso takari itakaõtxikare. Kristo makatzakasaakiri himaerekani hïtto nireëkiti, iuasaaki hãpakapari Teoso takaõtxikare. ¹² Hïpatxisatikosaaki, Kristokata ikatakoni atoko hïtxaua. Eereka hõkitikaãka Kristo õkitikiko atoko. Hïte õkitikaãkako, kotxi hïte auikari Teoso posotiire Kristo õkitikini ipïkasaaki.

¹³ Mitxi ipïkani atoko hïtxaua himaerekani xika. Xoteo minakanuia hïte, ininiã mitxi kona himarotari Teoso nireëkiti. Hïponaniãkasaaki, maerekati auape hïtemoni. Iuaritika Teoso txïkitakai auãki hinini Kristokata. Teoso makatzakari ikinipoko himaerekani. ! Ixinikaikari himaerekani. ¹⁴ Iua oakari iõkatsopatakori amaerekani säpiretiko. Ikara iõkatsopatakori säpiretari amisiritiko amaerekani hïka. Amitekini ! auari. Amisiritiko auapitika. Iuaritika iua oakari ikara iõkatsopatakori. Imakatzakari ikara iõkatsopatakori. ïpiriãmitakari nopini Kristo tokakitikosaaki, ikara iõkatsopatakori tokakitaãka apaka iuaã, ininiã ! itxaika. Iuasaaki amisiritiko ! auai. ¹⁵ Kristo ïpiriãmitakari nopini ipïkasaaki, iuasaaki imakatzakari ikinika Satanasi posotiire, iniritiakori posotiire pakini. Iua oerekari ikinimane ! kaposotiirena ninoa. Iua õkitikasaakia, oerekari ikinimane iuananira Apiananiri ininua. Iuasaaki Kristo oerekari ikinimane ikãiatini.

¹⁶ Ininiã kona hãuiritapiri apanakini txitinii hinikakiti xika, hiãtakiti xika pakini. Kona hãuiritapiri apanakini txitinii kiiniri Teoso ïkapani hïkamini xika, kiiniri kasiri itopaïtakasaaki hïkamini xika, kiiniri tomatiko õti hïkamakiti xika pakini. ¹⁷ Kiiniri Teoso ïkapani ïkoraasaaki sanõkatxi atoko itxa. Oerekaua

atão inakari, txamari na iteene oerekaua. Iteene oerekaäka atemoni, Kristo aõkitakasaaki. ¹⁸ Erepaniko kãkiti ia atoko inakari: Ninoa iuikari imiuiakaniyuana. Ninoa teosonetari Teoso nitiriakori matamatakoni. Ninoa säpiretari kãkiti matamatakoni aõkitinina itaponeëna. Ixinikarina ninoaka nireëkitinoka. Ixinikarina kimarorerini ininiyuana, ininiã iuikauana. Erepaniko kãkiti ikara atoko inakani. Hãuikiniãri ninoa säkire, !auaika hãparika iki. ¹⁹ Kãkiti ikara atoko inakani !inirekari Kristo iauitena ininiua. Kotxi Kristo akii atoko itxa. Ate iua ito atoko atxaua. Ikara atoko ininiã, isikataparataua. Aãpotiitaua. Asikataparatakakaua. Ätika itotxi atoko atxaua. Ikara atoko aniniã, aimaroãpotari isãkire. Aaneë, kãkiti ito aneini atoko.

Apinini, Aãuini Pakini Kristokata

²⁰ Mitxi hinireëkiti itixi auakani nireëkiti atoko. Hãuikasaakiri Kristo säkire, mitxi hinireëkiti !auaika. Ipãpe. Txamari hãkamapanikari ïkorapokoriti auakani kamakiti atoko. Ninoa nireëkiti iaõka hãkamapanika. ²¹ Ninoa txari: “Kona pimaikapiri ikara. Kona pinikapiri ikara nipokori. Kona piouãtakapiri ikara.” Kinirepa hãkãpitari ikara isãkirena? ²² Ninoa paniãtakiti xipokapitakiko. Ikara atoko !itxa, kotxi ikara atoko inakari paniãtakori kãkitinoka paniãtakiti. Kãkiti oerekakiti säkirexitinoka ikara. ²³ Kãkiti uãkatari ninoa paniãtakiti kimarorerini paniãtakiti atoko. Ninoa xinikakiti iaõka inirekarina Teoso. “Ierekano,” itxana, txamari äkixinireëna itxana “Peerekano.” Ninoaka misiritaua iitõana. Ikamarina ikinika iitona nireëkiti.

3

Atão Hãkamakiti Erekarri Hãuini ïkapani

¹ Hãte õkitikaäka Kristokata hãuini amaneri inini ïkapani, ininiã hinirekariko hãkaminiri Teoso tixine auakani kamakiti iaõka. Iuaã Kristo topãkanãta Teoso kikomoni. Apiananiri itxaua Teoso kikomoni topãkakari. ² Hãxinikariko Teoso tixine. Kona hãxinikapiri ïkorapokoriti. ³ Ipãkani atokopeka hãtxa, kotxi hãuini kitxakari !auaika, ininiã kona hãxinikaikari ïkorapokoriti auakari. Teoso säkire mauãkani !imarotari hãuini amaneri Kristokata Teoso auiniãtaã. ⁴ Kristo txãkitakari aãuini amaneri inini. Iua uai apokasaaki iuaãkana atamataãka. Iuasaaki hãte apaka atamataãka iuakata. Iuasaaki hãtemoni auari Kristo iotximere atokokana. ⁵ Hãxipokariko hãito nireëkiti, kotxi ïkorapokoriti auakari nirekari itotxi nireëkitinoka. Hõkariko. Kipa aua aãkixinireë aõkini ïkapani? Auari anokaretxi. Auari aãto nireëkitinoka kamiko nirekiko. Auari äti ito nirekiko. Apaka auari äti nakiti nirekiko aãkixinireë. Iteene anirekiniãri äti nakiti, ateosone atoko itxaua anireëkiti. ⁶ Ikara maerekati xika, Teoso omanãkare apokapitakiko Teoso paniãtakiti makãpitakanimoni. ⁷ Mitxi hãte kamari maerekati ikara atoko inakari. Iuasaaki hãtotapekari ikara atoko inakari hãkamini. ⁸ Uatxa ia atoko inakari hãtakanapako: omanãkaretxi, äti iteene txitiko, Teoso misãkirepiretiko, maerekati säkirexiti pakini. ⁹ Kona himisirienetakapeua, kotxi hãtakanapapekari maerekati mitxi hãkamakiti. Himãka kitxakari hõkini atoko, hãtakanapapekari ikara maerekati.

¹⁰ Uatxa hãkamakiti amaneri. Himãka amaneri hãeretakini atoko, hãkamakiti uatxa amaneri. Teoso txãkitakari hãkamakiti amaneri inini, ininiã himarotari atão inakari imaroretxi. Ininiã Teoso kamakiti atokokana hãkama, kotxi hãte kamakari itxaua. ¹¹ Uatxa kãkiti apiari !auari. Kreoakori, Xoteoakori, Teoso takaõtxikare auãitotakini, Teoso takaõtxikare mauãitotakini, mïmarorenì, kãkiti itopa auakani, nitiritxi amotakoni, kãkiti miamotakoni pakini !auari kãkiti apiari. Äti kãkiti äti kãkititxikana, kotxi Kristonoka Apiananiri. Iua aua ikinimane isãkire auãkani äkixinireë.

¹² Ininiäkara hiamonikariko äti. Hikamariko erekari ätimoni. !Hüikaueua. Kaneenama !hütxape. !Katimari homanākarauatini. Ikara atoko häuako, kotxi Teoso mereëkini, iua nakitia kori, itiretakini hütxaua. ¹³ Himiteenekakakauako. Himaxinikaretariko apanakini kamakiti, hüte mapokaerekatakini. Kristo maxinikaretapekari maerekati hüte kamakiti, ininiä iua atokotxikana himaxinikaretariko maerekati apanakini kamakiti hütemoni. ¹⁴ Ikara erekari hikamako. Erekari apiari hikamini, hütiraökuiatini. Hütiraökuiatoko. Hütiraökuiatakasaaki, ininiä iuaasaaki ikinika hikamakiti atäo.

¹⁵ Kristo kamaerekaxiniretai, ininiä erekari häkixinire. Häuiritariko ikara erekari kaikotini. !Hikamapiri ikara erekari makatxakiko ikapani. Hikinika ätika itotxi atoko hütxaua. Teoso akiritai hüte häkixinire ereka inini ikapani. Hütxariko Teoso ätipirika: “Erekapitikari pikamakiti nota ikapani,” hütxako. ¹⁶ Häuiritariko ikinika Kristo säkire kaikotini häkixinireë, ininiä iuaasaaki himarore iteene aua. Höerekakakaua. Hötäkikakakaua. Hüxikaretari xikari Teoso ikapani. Hüxikaretariko xikari Teoso säkire iökatsopatakori xikariti. Hüxikaretariko xikari kitxakari, amaneri pakini Teoso ikapani. Hüxikarauatakasaaki, häkixinireë hütxariko Teoso: “Erekapitikari pikamakiti nota ikapani.” ¹⁷ Ikinika hikamakiti hikamako Apiananiri Xesosi ikapani. Hüsäkirauatakasaaki, hüsäkirauata Apiananiri Xesosi ikapani. Iuaasaaki hütxariko äiri Teoso: “Erekapitikari pikamakiti nota ikapani,” hütxariko.

Käkiti Aapoko Auakani Ötäkikiko

¹⁸ Hüte itanorotxi, hikipitariko hütaniri säkire, kotxi Apiananiri nakiti hütxaua, ininiä ikara atäo hikamini.

¹⁹ Hüte itaniritxi, hütiretaroko hütanoro. Kona hütxitapero oa. Kona homanatapero.

²⁰ Hüte amarini, hikipitariko hüri, hinoro pakini säkire. Ikinika ninoa paniätakiti hikamako, kotxi Teoso apokaerekatari ikara atoko inakari.

²¹ Hüte iritxi, kona hikamanaiamanetapena hamariteakori, kotxi eereka maerekaxinireti aua ninoamoni, ininiä !inirekaikarina hüte paniätakiti ikaminina.

²² Hüte nitiritxi, hüpaträote ikorapokoriti aua, ininiä hikamariko ikinika ninoa paniätakiti. Apanakini iteene hüparikauata ipaträote apisatoö, iua apokaerekatiniri ikapani. Iua mauakanisaaki apaka iteene hüparikauatoko. Ikiniki hüxinireritika hikamariko hüparika. Ikara atoko ininiä, atäo hüpaxitari Teoso. ²³ Ikinika hikamakiti hikamako hütaparaxinireritika. Hüparikauatakasaaki, hüparikaxi Apiananiri ikapani hikamini atokotxikana, hüparikauata käkiti ikapani. ²⁴ Hüparikauatoko ikara atoko, kotxi himarotari Apiananiri sikinii ipotetakiti iaxitiki hüparika iki. Itixine häpokasaaki, häpakapariko. Apiananiri Kristo nitiriakori hütxaua. ²⁵ Maerekati kamakari apakapariko imisiritiko. Teoso misiritari äti maerekati kamakari, äti maerekati kamakari imisiritini atokotxikana.

4

¹ Hüte paträo, hikamariko atäo inakari hinitiriakori ikapani. Kona himisirienetapena ninoa. Kotxi hüte apaka aua hüpaträote Teoso tixineë.

Apikomoni Paoro Ötakikakiti

² Kona hütakanapapiri Teoso himisäkiretini. Araökire hütxako maerekati mapokakani ikapani. Ätipirika hütxariko Teoso: “Erekapitikari ikinipoko pikamakiti nota ikapani,” hütxariko iua.

³ Apaka himisäkiretariko Teoso ate ikapani. Hamanaäriko Teoso, iua oerekiniua isäkire apanakinimoni asäpiretini ikapani, kotxi anirekari

asäpiretiniri kākiti Kristo pirena, mitxi kākiti mimarotakinini. Ikara nisäpiretini xika, kateia äki naua.

⁴ Himsäkiretariko Teoso, Kristo pirena atão nisäpiretini ikapani, kākiti atão imarotini ikapani.

⁵ Kimarorerini hïtxauako Teoso säkire mauiakani sauaki häuakasaaki. Aäuni poiäo, ininiä ikiniötika hinitari kākiti Teoso säkire hïsäpiretini ikapani.

⁶ Teoso sikapekai ikinipoko erekari, ininiä hïsäkirauatakasaaki, hõerekari kākiti hïsäkireë hïtoretinina. Iökira mauakaniä nipokoriä, !kaposeri. Iua atokotzikana erekari mauakaniä hïsäkireë, kākiti !inirekari ikenakotiniri hïsäkire. Erekari hïsäkire ininiä, himarotari häpakapapiretiniri kākiti.

Paoro Iokanapiretini Pirena

⁷ Txïkiko inakori säpiretaiko ikinika nota pirena. Aïtari, atiretakiti itxaua. Iua parïkauatapitipo Apiananiri ikapani. Apiananiri nitiri itxaua atekata.

⁸ Niokanataru iua hïtemoni, hïte imaropiretini ikapani, hïte isikataparaxiniretini ikapani. ⁹ Niokanataru Onésimo inakori apaka iuakata. Koroso sitatxitikiri iua, hïte atoko. Aïtari atiretakiti itxaua apaka. Ätipirika atão iparïkauata Kristo ikapani. Ninoa säpiretaiko hïte ikinipoko Kristo säkire auiakani kamakiti uai.

¹⁰ Arisitako inakori, notakata kateia äki auakari, xinikamanapitai hïte. Panapee itaro äkiri Marko, xinikamanapitai hïte apaka. Nisäpiretapekai hïte Marko pirena. Ininiä ereë iua apokasaaki, hïpoxokoniritika häpakapariko iua.

¹¹ Xosoe Xósito inakori xinikamanapitai hïte apaka. Ninoa ipi äti pakini Xoteoakori notakata parïkauatakani itxauana. Ninoa parïkauata notakata, Teoso auïtetxi ininiua pirena asäpiretini ikapani. Isikataparaxiniretanona nota.

¹² Epápara inakori apaka xinikamanapitai hïte. Ereëkiri iua. Kristo nitiri itxaua. Ätipirika imisäkiretari Teoso hïte ikapani, Teoso nireëkitinoka hïkamini ikapani, ikinika hïkamakiti atäonoka hïkamini ikapani. ¹³ Nota imarotari iteene iparïkauatini hïte ikapani. Apaka nimarotari iparïkauata kākiti Araotxiséia sitatxiti auakani ikapani. Apaka nimarotari iparïkauata Ierapori sitatxiti auakani ikapani.

¹⁴ Aïtari atiretakiti, amianari imarotakari Arókasi inakori apaka xinikamanapitai hïte. Témasi inakori apaka xinikamanapitai hïte. ¹⁵ Hïsäpiretanako aïtariakori Araotxiséia auakani nixinikinina ninoa. Hïsäpiretaroko Nïpa inakoro, Teoso mereëkini oaäpoko apotiitakaniua pakini, nixinikinina ninoa.

¹⁶ Ia niokanatsopatakiti hätatsopatakoko hïkinika hïkenakotini ikapani, eereka hïpaniätariko atatsopatiko Araotxiséia sitatxitiä, Kristo säkire auiakani kenakotiniri ikapani. Apaka hïte atatsopatariko Araotxiséia auakani iokanatsopatakiti. ¹⁷ Hïtxariko Akipo inakori: "Pikamariko ikinipoko parïkatxi Apiananiri paniätakiti pikamini." ¹⁸ Nota Paoro niökatsopataru ia niuakoä: Hïxinikariko kateia äki nauini. Teoso sikari ikinipoko erekari hïtemoni. Ameë.

1 TESARÓNİKA

Merepanika Paoro Iokanatsopatakiti Tesarónika Auakanimoni

¹ Paoro, Sírası, Tximótxio pakini iokanatsopata Teoso mereëkinimoni Tesarónika sitatxitiã. Aíri Teoso nakitiakori hıtxaua. Apiananiri Xesosi Kristo nakitiakori hıtxaua. Aíri Teoso, Apiananiri Xesosi Kristo pakini sikai ikinipoko erekari. Ninoa kamaerekaxiniretai hıte.

Paoro Misãkiretari Teoso Tesarónika Auakani İkapani

² Amisãkiretari Teoso hıte İkapani. Ātipirika atxari Teoso: “Peerekai pite, kotxi Tesarónika auakani auikari pisãkire,” atxari. ³ Aíri Teoso amisãkiretakasaaki, axinikapikari hıte parıka Teoso İkapani. Atão hıparıkauata, kotxi iteene hãuikari iua sãkire. Axinikari hıparıka Teoso İkapani, kotxi iteene hıtiretari iua. Axinikari himarotiniri Apiananiri Xesosi Kristo sãkire iaõka hıkamini. Hıpoxokoniritika hiãtapari isãkire iaõka apokini.

⁴ Nitariakori, Teoso tıretapitikai hıte. Iua mereëi hıte iua nakitiakori hininiua İkapani. Aimarotari İkara. ⁵ Teoso iokanapirena erekari hıtemoni asãpireta Teoso posotiireë. Ate sãkirenoka !kaposotiireri. Erekari Mata-matakoti oerekai asãkire atão inini. Hıte iteene imarotari asãkire atãonoka inini. Hãtamari aparıka hıte İkapani hıte sauaki aãuakasaaki, ininiã himarotapitikaua ate. ⁶ Ininiã hıte kamari ate kamakiti atokotxikana. Hıkamari Apiananiri kamakiti atokotxikana. Himisiritiko aua, iuaritika hãuikari Xesosi sãkire. Himisiritiko aua, iuaritika Erekari Matamatakoti kamapoxokonitai. ⁷ Ininiãkara Masetónia tixini auakani, Akaia tixini auakani pakini nirekari hıte atoko ininina. ⁸ Inirekarina hıte atoko ininina, kotxi hıte sãpiretari Apiananiri sãkire Masetónia auakanimoni, Akaia auakanimoni pakini. Apaka İkini itixiti iarıpireta hıte iteene auikiniri Teoso sãkire. Ininiã kona ate sãpiretari kãkiti iteene hãuikiniri Teoso sãkire, kotxi ikinimane imarotape. ⁹ İkinimane sãpiretari hıpoxokoniritika hãpakapiniua ate. Ninoa sãpiretari hıte takanapiniri teoso kamakori. Isãpiretarina hıparıkauatini uatxa Teoso atão inakari İkapani, auãkipika inakari İkapani. ¹⁰ Ninoa sãpiretari, hıte iãtapiniri Teoso ãkiri itixine auakari kanapiriini İkorapokoriti. Iua Xesosi. İpıkanı sauaki Teoso õkitikakiti iua. Iua makatxakapekari amaerekani, ininiã amisiritiko !auaika kãkiti misiritiko õti apokasaaki.

2

Paoro Parıka Tesarónika Sitatxitiã (Ātosi 17.1-9)

¹ Nitariakori, himarotari maxikatııka kona ate sari hıtemoni. ² Himarotari amisiritiko Piriپosi sitatxiti aãuakasaaki, hıtemoni aãpokini apısa. Iuaã auakani asokaua, kateia ãki taka itxauana. Iuaritika Teoso sikataparaxiniretaua asãpiretiniri Teoso iokanapirena erekari hıtemoni. İtori kãkiti linirekari asãkire, iuaritika ate sãpiretari Teoso iokanapirena erekari hıtemoni. ³ Ate oerekakiti !akeroka. Teoso nireëkitinoka anireka akamini. Āti anireëkiti !auari. !Anirekari amisirinetinii hıte.

⁴ Teoso auiritaua iua iokanapirena erekari asãpiretiniri kãkiti. Teoso auikari atão asãpiretiniri isãkire kãkitimoni, ininiã asãpiretari isãkire kãkitimoni.

Asâkirauata, kona kâkiti akamapoxokonitini îkapanini. Anirekari akamapoxokonitini Teoso, kotxi iua ataerekatari aâkixinire. ⁵ !Asâpiretai ereka hinini, ate nireêkiti hîkamini îkapani. Asâpiretari Teoso sâkire hîtemoni, kona hîte nakiti anirekari îkapanini. Ikara himarotape. Teoso apaka imarotari ikara nisâkire atâo inini. ⁶ Ate !anirekari kâkiti iuikiniua ate. !Anirekai hîte iuikiniua ate. !Anirekari apanakini iuikiniua ate. Kristo iokanatakini-
raua ate hîtemoni, ininiâ aposotari apaniâtinii ikinipoko anireêkiti hîsikiniua. Iuaritika !anirekari ikara atoko akamini. ⁷ Hîte sauaki aâuakasaaki iteene atiretai hîte. Sito tiritiniri oimi atokokana, ate tiretai hîte. ⁸ Iteene atiretai, ininiâ anirekari asikinii Teoso iokanapirena erekari. Kona iuananini anireka asikinii hîte. Axinire, atâo pakini anireka asikinii, kotxi ate tirketakini hîtxapekaua. ⁹ Nitariakori, hîxinikari aparîka hîte sauaki. Pasâpaniri. Îkanôka, pokamara pakini aparîkauatapitipo, akiena, anireêkiti pakini aâpakapini îkapani, kotxi !anirekari aamanainii hîte aamonitakiti îkapani. !Anirekari hîte parîka apiatini ate îkapani, Teoso iokanapirena erekari asâpiretakasaakii.

¹⁰ Hîte Kristo sâkire auiâkani sauaki aâuakasaaki, hîte itikari aâuini ikiniôtika. Teoso apaka itikari. Himarotari Teoso nireêkitinoka akama iusaaki. Himarotari erekarinoka akama iusaaki. Himarotari !akamari maerekati iusaaki. ¹¹ Hîri atoko atxaua iusaaki, kotxi aôtâkikai hîte. Amîkapiritai, imi iri mîkapiritini atokokana. Apaniâtai atâo inakarinnoka hîkamini. ¹² Ikara atoko akamini, kotxi Teoso anaakori hîtxaua, ininiâ anirekari hîte kaminiri hîri kamakiti iaôka. Iua akiritai hîte hîauîte inini îkapani. Inirekari hâtamatini iua iotximere itixine hâuakasaaki. ¹³ Ininiâ âtipirika amisâkiretari Teoso: “Erekapitikai, kotxi Tesarónika auakani auikari pisâkire, ninoamoni asâpiretakiti. Ninoamoni imarotari kona ate sâkireni asâpiretana. Ninoamoni imarotari asâpiretana atâo pite sâkire,” nitxari Teoso. Teoso sâkire parîkauata hîte Xesosi sâkire auiâkani âkixinireê isâkire hâuikini îkapani. ¹⁴ Xotêia tixini auakani, Kristo Xesosi nakitakori, Teoso sâkire auiâkani, ninoamoni kamakiti atoko hîkamako hîte nitariakori. Xoteakori misiritana ninoamoni. Iua atoktxikana hîte nirimane misiritapekai hîte. ¹⁵ Ninoamoni Xoteakori okari Apiananiri Xesosi. Ninoamoni apaka okana ninoamoni nirimane, Teoso sâkire sâpiretakani. Ninoatxikana misiritapekaua ate. Teoso !apokaerekatari ninoamoni kamakiti. Ninoamoni omanatari kâkiti. ¹⁶ Kotxi !auritarina Xesosi sâkire asâpiretini Xoteo minakaniua, imaerekanina makatxakiko îkapani. Uatxa ninoamoni maerekani xâpoka. Uatxa Teoso omanâkare apokapeka ninoamoni.

Paoro Ipiâtinina Tesarónika Auakani

¹⁷ Âtiâtaâ ate auakasaaki, âtipirika axinikapikai. Aitâo hîtekata mauakanisaaki, aâkixinire xinikapikai. Ate ipiâtai. Iteene anirekari iuaîkana aôkitinii. ¹⁸ Anirekapitikamari hîtemoni akanapiriini. Nota Paoro itokata nirekamari napokini hîtemoni, txamari Satanasi !auritaua asini hîtemoni. ¹⁹ Aâuîte Xesosi âti ôti ikanapiriâkasaaki, aâpotiitaua iua apisatoô. Iusaaki aiâtapakiti apokapeka. Kipa aiâtapakiti? Hîtera. Iusaaki iteene apoxokoniuatako. Kinirepa apoxokoniuata? Kotxi hîte aua iuaâ. Iusaaki aâpakapari aparîka îki. Kinirepa aâpakapari aparîka îki? Kotxi hîte auikari Xesosi sâkire ate sâpiretakiti. Ininiâ peerekari iusaaki. ²⁰ Atâopitikara nisâkire. Ate iuikai hîte. Hîte kamapoxokonitaua ate.

3

¹ Iusaaki !amîteenekari amimaropiretanii hîte, ininiâ axinikari atenoka kaikota uai Atena sitatxitiâ. ² Ininiâ iusaaki aiokanatarari aîtari Tximótxio hîtemoni. Teoso nitiri itxaua. Imoianataua Kristo iokanapirena erekari asâpiretakasaakiri kâkiti. Aiokanatarari iua hîtemoni, Xesosi sâkire iteene hâuikini

Īkapani, isikataparaxiniretinii Īkapani. ³ Ikara atoko ininiã, kona hĭxinikari Teoso sãkire hĭtakanapini, kãkiti misiritinii xika, kotxi himarotari amisiritiko apokapitikako. Teoso auiritari. ⁴ Hĭtekata aãuakasaaki, asãpiretapekai amisiritiko apokini. Uatxa himarotapitikari atão asãkire, kotxi uatxa apopeka sãkire iaõka. ⁵ Ininiã apikomoni !nimiteenekaikari nimimaropiretakanii hĭte. Ininiã iuasaaki niokanatarari Tximótxio hĭtemoni, Xesosi sãkire hãuikini nimarotini Īkapani. Nipĭkari Satanasi sikanireõtini hĭte, Xesosi sãkire hãuikini hĭtakanapini. Nipĭkari maxikatũka Xesosi sãkire asãpiretinii hĭte, hĭtekata aãuakasaaki.

Tximótxio Sãpiretakiti Ikanapiriãkasaaki

⁶ Uatxa Tximótxio kanapiripeka atemoni. Iua minapiretai hĭte. Erekarari isãpiretakiti. Iua txaua ate: “Tesarónika auakani iteene auikari Xesosi sãkire. Ninoã tiraõkiuatapika. Ipotxitarina ixinikiniina hĭte. Ipiãtaina hĭte, ninoã hĭpiãtini atokotxikana,” itxa Tximótxio atemoni. ⁷ Nitariakori, ate amaxikiko auapitika. Ate misiritiko auapitika, iuaritika hĭkamapoxokonitaua, kotxi iteene hãuikari Xesosi sãkire. ⁸ Uatxa peerekari ate auini, kotxi Apiananiri sãkire iaõka hĭkama. ⁹ Iteene apoxokoniua Teoso apisatoõ, kotxi hãuikari iua sãkire. Axinikasaakii, apoxokoni iteene auapitika. Ininiã ätipirika atxari aTeosone: “Peerekai pite, kotxi Tesarónika auakani iteene auikari pisãkire, ininiã ikamapoxokonitauana ate,” atxari. ¹⁰ Īkanõka, pokamara pakini iteene aamaanaãri Teoso hĭte iuaikana aaõkitini, kotxi anirekarari apikomoni Teoso sãkire himimarotakiniti aõerekinii.

¹¹ Anirekarari aĩri Teoso, aãũte Xesosi Kristo pakini oerekiniãua aãpokini hĭtemoni. ¹² Anirekarari Apiananiri txĭkitakinii himarotini hĭtiretakiniua. Anirekarari hĭtiraõki aneini. Anirekarari iteene hĭtiraõkiuatini. Anirekarari ikini-mane apaka hĭtiretini, ate tiretinii hĭte atokotxikana. ¹³ Anirekarari Apiananiri sikataparaxiniretinii hĭte. Ininiã Apiananiri Xesosi Kristo ikinika inakitiakorikata ĩkasaaki uai, iuasaaki maerekati !auaika hĭtemoni aĩri Teoso apisatoõ. Iuasaaki hĭte apoĩtakari !auari. Iuasaaki erekai hĭte.

4

Akamakiti Teoso Apokaerekatakiti

¹ Nitariakori, apikomoni nisãpiretai. Asãpiretapekai hĭkamakiti tũkane, hãuini Teoso apokaerekatini Īkapani. Ikara atoko inakari hĭkamapitika uatxa. Erekarari hãuini uatxa, ininiã nõtãkikai Apiananiri Xesosi posotiireẽ, apikomoni iua apokaerekatakiti ikiniõtika hĭkamini Īkapani. ² Himarotapitikari aõerekiti hĭkamini Īkapani. Apiananiri Xesosi paniãtaua ikara aõerekinii hĭte.

³ Teoso nirekari himaerekani xipokaãpotini hãkixinireẽ. Ininiãkara hĭtaniri minakotikatika, hĭtanoro minakotokatika, !hĭsirĩkape. ⁴ !Hãuiritapiri hĭto nireẽkiti ikamini. Hĭto auũte hĭtxauako, ininiã maerekati hĭto nireẽkiti !hĭkama. Atão hĭpaxitariko hĭteka ĩto, apanakini ĩto apaka. ⁵ !Apakata hĭxinikiniri ätipirika maerekati hĭto nireẽkiti äti ĩtokata hĭkamini. Xoteo minakaniua, Teoso mimarotakani, xinikari ikara atoko inakari. ⁶ !Apakata hĭtxĭkitakiniri äti aĩtari maerekati ĩtotxi nireẽkiti ikamini, kotxi Apiananiri misiritariko kãkiti ikara atoko inakari maerekati ikaminiã. Asãpiretapekai ikara. Apini-tapekai. ⁷ Teoso kona akiritaua iuamoni, maerekati aĩto nireẽkiti akamini Īkapani. Akiritaua iua nakiti aniniua Īkapani, erekarinoka akamini Īkapani. ⁸ Ininiã ikara asãkire manirekakati, !omanataua ate. Omanatarari Teoso. !Inirekarari Teoso sãkire, kotxi Teoso sikari Erekarari Matamatakoti kãkitimoni.

⁹ Hĭtariakori hĭtiretini pirena kona aiõkatsopata hĭtemoni, kotxi Teoso oerekepekai hĭtiretakiniua. ¹⁰ Nimarotari hĭtiretiniri ikinika hĭtariakori

Masetónia tixini auakani. Iuaritika nitariakori, aotãkikai apiata hõtiretiniri kãkiti ikiniõtika. ¹¹ Hãpaiaõkariko hõtiorikaãtini. Apanakini parïka ! hi-maãkatape. Hïkamariko hïteka parïka hãuini ïkapani. Ikara atoko asãpiretapekai hïte. ¹² Ikara atoko hïkaminiã, Xesosi sãkire mauïãkani paxitai. Ikara atoko hïkaminiã, !auari hiamonitakiti.

Apiananiri Kanapiriini

¹³ Nitariakori, anirekari himarotiniri atão inakari ipïkani pïrena. Kona anirekari himatinaniuatini Xesosi sãkire mauïãkani matinaniuatini atoko, kotxi ninoa ipïkasaaki, !imarotarina isinimonina. ¹⁴ Aãuikari Xesosi ipinini. Aãuikari iuaïkana õkitikiniua. Ininiãkara aãuikari ipïkani Teoso sãkire auïãkani apaka õkitikiniua. Teoso minana ninoa Xesosikata ikanapiriãkasaaki. ¹⁵ Iuasaaki ate auãkipanika inakanuia Apiananiri kanapiriãkasaaki, !asari ninoa mitxi ipïkani apisapanika. Mitxi ninoa sa. Iposõ atoko ate sa Apiananirimoni. Apiananirira sãpiretapekauri ikara. ¹⁶ Iuasaaki Apiananiri potorika itixine. Iuaka katxaka uaimoni. Iuasaaki akiripoakata iua apokasaaki, ininiã kãkiti kenakotariko Teoso nitiriakori auïte sãkire. Teoso trõpetane xõkiko kenakotaãka. Iuasaaki mitxi ipïkani, Kristo sãkire auïãkani, merepanika õkitikauako. ¹⁷ Eereka ate auapanika inakanuia anikaãkako ipïkanikata Apiananiri aaõkitini ïkapani. Aaõkitari iua itanoxiti katxiãriã. Ininiã eereka iuakata aãuapininiika. ¹⁸ Ikara sãkiretxiti hïsapiretakauako, ininiã hïkamataraxiniretakauako.

5

Apiananiri Kanapiriini Õti

¹ Nitariakori, kona asãpiretari Xesosi kanapiriini õti. !Asãpiretari apokini kasiriti, ikanapiriinikanani pakini. ² Kotxi atão himarotari, Apiananiri uai apokini, kiïtiriri ïkanõka apokini atokokana itxako. Ininiã kãkiti !imarotari Apiananiri apokini õti. ³ Iuasaaki kãkiti sãkire: “Neenamtxi !uari. Erekaua. Imonõkoni !uari,” inakasaaki, iuasaakipeka katimaritika Teoso xipokari ikinipoko. Katimari sito amarini tsiïkini atoko itxako. Oa sito tsiï apokasaaki, omitekini !uari. Iua atokokana kãkiti mitekini !uari iuasaaki Xesosi kanapiriãkasaaki. ⁴ Nitariakori, kãkiti ipiã auakani atoko !hïtxaua. Himarotapitïkari ãti õti Apiananiri uai kanapiriini, ininiã hiãtapari ikanapiriini õti apokini, himatikokakani ïkapani, kiïtiriri tikokakiniri kãkiti atoko himinakani ïkapani ikanapiriãkasaaki. ⁵ Hïte hïkinika kaiotximereri anaakori hïtxaua. Pokamarari anaakori atoko hïtxaua. !Akaikota ipiã. !Akaikota ïkanõka, kotxi !anirekaikari maerekati akamini. ⁶ Ininiãkara apanakini imakakani atoko !himapeko. Araõkire matxako, maerekati mapokakani ïkapani. Aïto auïte matxaua. ⁷ Imakakani imaka ïkanõka. Poãtakani poãta ïkanõka. !Iãtapari Xesosi kanapiriini. Ikara atoko !hïtxapeko.

⁸ Pokamarari anaakori atxaua, ininiã aïto auïte matxaua. Sotato takari itorota koana, itorota tokapare ïkapani. Sotato torota koana atoko itxa Teoso sãkire iteene hãuikini. Sotato torota koana atoko itxa apaka hïtiraõki. Ininiã hãuikasaakiri Teoso sãkire, hïtiraõkiuatakasaaki, hãkixinire tokapare auape. Sotato takari ikii tãta ikii tokapare ïkapani. Sotato kii tãta atoko itxa amaerekani makatxakiko aimarotini. Ikara imaroretxi axinikakiti akii tokapare itxaua. ⁹ Teoso mereëua ate kona imisiritiniua ïkapanini. Iua mereëua ate amaerekani aãuïte Xesosi Kristo makatxakini ïkapani. ¹⁰ Iua ipina kãkiti ïkapani. Ipinã iuakata aãuini ïkapani. Ikanapiriãkasaaki, isãkire auïãkani auãkipanika inakani, ipïkani pakini aua iuakata. ¹¹ Ininiã hïsikataraxiniretakauako.

Himoianatakakauako Teoso sākire iteene hāuikini ĩkapani. Uatxa ikara atoko inakari hĩkamapeka.

Paoro Ōtāĩkikare Mapotōkire

¹² Nitariakori, aōtāĩkikai himarotinina hĩte sauaki parĩkauatakani, Api-ananiri sākire sāpiretakani, hĩte ōtāĩkikakani. ¹³ Ininiā iteene hĩpaxitanako. Hĩtiretanako ninoa, kotxi ninoa iteene parĩkauata hĩte ĩkapani. !Hĩtxitakakapeua. !Hineenamauatape. ¹⁴ Nitariakori, iteene aōtāĩkikai hĩte ia atoko: Hĩpinitariko kākiti paniātakiti makĩpitakani. Hĩsikataraxiniretariko pĩkarauatakani. Himoianatariko mataparani. Katima ! hĩtxapeko homanākarauatini kākiti kerokasaaki. ¹⁵ Kona hāuiritapiri misiritakori misiritiniri imisiritakiri. Ātipirika hĩkamariko erekari hĩtariakorimoni, Xesosi sākire mauĩākanimoni apaka.

¹⁶ Ātipirika hĩpoxokoniuatako. ¹⁷ Himisākiretapikariko Teoso. ¹⁸ Hĩpoxokoniuatakasaaki, hĩtxariko Teoso: “Erekari pikamakiti nota ĩkapani,” hĩtxako. Himatinaniuatakasaaki, iuaritika hĩtxariko Teoso: “Erekari pikamakiti nota ĩkapani,” hĩtxako. Ikara atoko Teoso nĩrekari ātipirika hĩsāpiretiniri iua, kotxi Kristo Xesosi nakitiakori hĩtxaua. ¹⁹ ! Hĩotokakapiri Erekari Matamatakoti parĩkauatini hākixinireē. Hĩkamariko ipaniātakiti. ²⁰ ! Homanatapiri Teoso sākire kākiti sāpiretakiti. ²¹ Hātaerekatariko ĩkinika. Erekarinoka hĩkamako. ²² ! Hĩsipeko maerekati kamikoātaā, kotxi hĩsiniā, apanakini xinikari atāo maerekati hinireka hĩkamini.

²³ Anirekari Teoso, kākiti kamaerekaxiniretakari, iua iteene kamaerekatinii hĩte iua nakitiakorinoka hininiua ĩkapani. Nĩmisākiretari Teoso hĩte ĩkapani, hĩxinire, hākixinire, hĩto pakini ereka inini, ininiā aāuĩte Xesosi Kristo uai apokasaaki maerekati !auaika hĩtemoni, ininiā hĩte apoĩtiko !auari. ²⁴ Hĩte akiritakari kamari isākire iaōka.

²⁵ Nitariakori, himisākiretariko Teoso ate ĩkapani. ²⁶ Haōkitakakasaakiaua, hĩtiraōkiritika hāpakapakakauako, kotxi hĩtariakori itxauana. ²⁷ Apiananiri posotiireē nĩpaniātai hātatsopatiniri ia niokanatsopatakiti ĩkinika aĩtariakori kenakotini ĩkapani. ²⁸ Aāuĩte Xesosi Kristo sikari ĩkinipoko erekari hĩtemoni. Ameē.

2 TESARÓNİKA

Paoro İokanatsopatakiti İuaĩkana Tesarónika Auakanimoni

¹ Paoro, Sırasi, Tximótxio pakini iokanatsopata Teoso mereëkinimoni Tesarónika sitatxitiã. Aĩri Teoso nakitiakori hĩtxaua. Apiananiri Xesosi Kristo nakitiakori hĩtxaua. ² Aĩri Teoso, Apiananiri Xesosi Kristo pakini sikai ikinipoko erekari. Ninoa kamaerekaxiniretai hĩte.

Xesosi Kanapiriĩni Pirena

³ Nitariakori, ätipirika atxari Teoso: “Erekapitıkari pikamakiti Tesarónika auakani İkapani,” atxa. İkara atoko asãpiretari Teoso, kotxi ikiniötika Teoso säkire häuikini apiaãpota. Apaka hĩtoretakakiniua ikiniötika apiaãpota. ⁴ İniñã apanakini Teoso säkire auĩãkanikata aãuakasaaki, asãpiretana ninoa ate iuikini hĩte. Ate iuikari himisiritiko himĩteenekini. Ate iuikari häuikiniri Teoso säkire. İteene himaxikiko, himisiritiko pakini, iuaritika himĩteenekari. İteene häuikari Teoso säkire.

⁵ Himisiritiko himĩteenekini oerekari Teoso misiritiniri maerekati kamakani, kotxi ikara atão. Hĩte misiritaãka, kotxi hĩkamari häuĩte Teoso paniãtakiti, ininiãkara iuamoni apakatapitika häuini Teoso auĩtetxi ininiãtaãua. ⁶ Teoso kamari atão inakarinoka. İniñã imisiritariko hĩte misiritakani. ⁷ İxipokariko hĩte misiritiko, ate misiritiko apaka. İuasaaki hĩtomata atekata. İkara atoko inakari ikama, Apiananiri Xesosi oerekikosaaki Teoso tixine ipotarikasaaki, initiriakori kaposotiĩrerinikata. ⁸ Xamina tirinakariã imisiritanako Teoso mimarotakani, aãuĩte Xesosi Kristo iokanapirena erekari makĩpitakani. ⁹ Ninoa misiritaãkako ätipirika. İkinipoko xipope ninoa İkapani. !Auiritaãkana Apiananiri auiniãtaã apokinina. !Atamatarina iua iotximere. !Atamatarina iposotiĩre. ¹⁰ Ninoa misiritaãka, Apiananiri kanapiriĩni ötisaaki. İuasaaki inakitiakori, isãkire auĩãkani, txariko: “Peerekai. Peerekai. Äti kaposotiĩreri pite atoko inakari !auari,” itxanako. İkara atoko hĩte apaka säpiretari iua iuasaaki, kotxi hĩte auikari asãpiretakiti hĩtemoni.

¹¹ İniñã amisãkiretapikari aTeosone hĩte İkapani. İa atoko atxari iua: “Pite akiritari Tesarónika auakani pinakitiakori ininiuana İkapani, ininiã ninirekari pite apokaerekatiniri ninoa kamakiti pite İkapani. Pisikaposotiiretana ninoa ikinipoko inireëkitina erekari ikaminina İkapani. Ninoa auikari isãkire, ininiã iparĩkauatana pite İkapani. İniñã pisikaposotiiretana ninoa ikara iparĩkana ikaminina İkapani.” ¹² İkara atoko amisãkiretari Teoso, kotxi apanakini atamatakasaakiri erekari hĩkamakiti, itxarinako aãuĩte Xesosi Kristo: “Peerekai pite,” itxanako, ininiã Xesosi uãka iuikaãka. Apaka Xesosi txaiiko hĩte: “Peerekai hĩte,” itxaiko. İkara atoko aua, kotxi aTeosone, Apiananiri Xesosi Kristo pakini sikari ikinipoko erekari hĩtemoni.

2

Apia Maerekati Apokini

¹ Nitariakori, maxinikari aãuĩte Xesosi Kristo kanapiriĩni. Maxinikari iuakata aãpotiitiniua. İkara axinikasaaki, aötãkikai hĩte. ² Apanakini säpiretari: “Apiananiri kanapiriĩni öti apokapeka,” itxana. Maerekaxiniretika !hĩtxape. İkara atoko inakasaakina, !hĩpĩkarauatape. Paxirari ninoa säkire. Atxiĩti ninoa txari: “Erekari Matamatakoti säpiretano ikara.” Atxiĩti ninoa txari:

“Paoro sãpiretari ikara.” Atxiiti ninoa txari: “Paoro iõkatsopatarari ikara.” Paxirari ninoa sãkire. Kona hãuikapiri ikara atoko inakari. ³ Kona xatiki hãuiritapiri kãkiti misirienetini. Apiananiri kanapiriini apisapanika, kãkiti !inirekari Teoso sãkire ikãpitini. Iuasaaki maerekati kamakari apiatakari apoka. Xipokatxi ãkiri akiritaãka. Iua xipokaãkapitikako. ⁴ Iua apia maerekati !inirekari Teoso paniãtakiti ikamini. Iuikauako. “Kãkiti teosonetakini posotiire poiãoka. Nota posotiire apiata,” itxako. Iuasaaki iitopãka Teoso misãkiretiko aikoti ãki. “Teosorano nota. Notanokara Teoso txaua. Æti Teoso !auari,” itxako iuasaaki. ⁵ Hitekata nauakasaaki, nisãpiretapekai ikara. Atxiiti hite xinikapanikari nisãpiretakiti? ⁶ Uatxa kona apakatapanika iua apia maerekati apokini. Himarotari Teoso !auiritari iua apokini uatxa. Iketo õtinokara Teoso auiritari iua apokini. Iuasaaki iuaka oerekaua. ⁷ Maerekati kipatakori posotiire auape uatxa, iuaritika maerekati mauiritakati lauiritapanikari iteene maerekati iarikini. Æti õti maerekati mauiritakati makatxakaãka. ⁸ Iuasaaki iua apia maerekati oerekaua kãkitimoni. Apiananiri kanapiriãkasaaki, okari iua. Ixõkare, isinanirenani xipokari iua. Iotximere xipokari iua apia maerekati. ⁹ Iua apia maerekati apokasaaki, Satanasi posotiire aua iuamoni. Ikamariko ikini sereti posotiiretxi kãkiti maposotakiniti. Iua oerekari ikara, kãkiti imisirienetini ikapani, isãkire kãkiti auikini ikapani. ¹⁰ Ikini sereti maerekati ikama kãkiti pãpinanaãkani imisirienetini ikapani. Ninoa pãpinanaãkani xipokapitikako, kotxi !inirekarina atão inakari itiretinina, ininiã imaerekanina makatxakiko !auari. ¹¹ Ininiã iuasaaki Teoso txikitakana auikinirina ninoa misirienetakani sãkire, ininiã auikarina atão minakati apiatakari. ¹² Ininiã atão inakari mauikakati misiritaãkako, kotxi iteene iotxitari imaerekanini.

Iteene Hãuikariko Teoso Sãkire

¹³ Nitariakori, Apiananiri tiretakini, ãtipirika erekari amisãkiretiniri Teoso hite ikapani ia atoko: “Erekapitikai, kotxi pite mereẽna Tesarónika auakani imaerekanina pimakatxakini ikapani.”

Itixi kamiko apisapanika, iua mereẽi hite. Imakatxakari himaerekani, kotxi Erekari Matamatakoti txikitakai Teoso nakitiakori hininiua. Imakatxakari himaerekani, kotxi hãuikari atão inakari. ¹⁴ Teoso iokanapirena erekari asãpiretakiti hitemoni hãuikasaaki, iuasaaki Teoso akiritai hite. Ininiã aãuĩte Xesosi Kristo iotximere hite apaka apakapako. ¹⁵ Ininiã nitariakori, iteene kataparaxinire hitxako. Iteene hãuikariko Teoso sãkire asãpiretakiti, aiõkatsopatakiti pakini. !Hitakanapapiri.

¹⁶ Anirekari aãuĩte Xesosi Kristo, aĩri Teoso pakini sikataparaxiniretinii hite. Ninoa iteene tiretaua. Ætipirika isikataparaxiniretaua. Isikaua erekari aiãtapini ikapani. Aimarotari ikara erekari apokapitikako. Ikara atoko inakari ikama ate ikapani, kotxi isikaua ikinipoko erekari. ¹⁷ Erekari hĩsãkiretakasaaki, erekari hĩkamakasaaki, anirekari isikataparaxiniretinii hite apikomoni erekari hikamini ikapani.

3

Himisãkiretariko Teoso Ate Ikapani

¹ Nitariakori, nisãkire mapotõkire apoka. Himisãkiretariko Teoso ate ikapani Apiananiri sãkire katima iaripiretini ikapani. Himisãkiretariko Teoso Apiananiri sãkire auikiko ikapani, hite auikiniri atokotxikana. ² Himisãkiretariko Teoso imakatxakiniua ate amapinakanini ikapani, maerekati kamakani sauaki aãuakasaaki, kotxi apanakini !auikari Teoso sãkire. ³ Apiananiri kamari ikinika isãkire iaõka. Iua sikataparaxiniretai hite. Itokapakeẽtai, ininiã

Satanasi !inokai. ⁴ Apiananiri t̄x̄ikitakaua ate aimarotiniri ate paniātakiti h̄kamini. Ate imarotari, katana apaka h̄kamapanikariko as̄akire iaōka. ⁵ Anirekari Apiananiri oerekinii Teoso tiraōki. Anirekari himiteenekiniri ikinika himisiritiko, Kristo imisiritiko imiteenekini atokokana.

Kākiti Paniātakiti Mak̄ipitakani

⁶ Nitariakori, aāuīte Xesosi Kristo nireēkiti iaōka as̄apiretai h̄ite, ininiā apaniātai ia atoko. H̄itari kākiti paniātakiti mak̄ipitakati, aōereēkiti iaōka imakamakaniā, ininiā iua moianari !h̄itxapeuako. H̄itakanapariko iua. ⁷ H̄ite imarotari akamakiti iaōka h̄kamini, kotxi h̄itekata aāuakasaaki ate k̄ipitari kākiti paniātakiti. ⁸ Kona anikari nipokori amaīkitxitakiniti. Iuasaaki iteene apar̄ikauata. Īkanōka, pokamara pakini apar̄ikauata akiena aiamotini ĩkapani, kotxi !anirekari h̄ite kaamatini h̄ite kiena. ⁹ Apakatapitika kākiti ĩkitxitiniua apar̄ika ĩkapani, iuaritika !anirekari h̄iīkitxitiniua, kotxi anirekari h̄ite par̄ikauatini ate par̄ikauatini atokokana. ¹⁰ H̄itekata ate auakasaaki, ate paniātai h̄ite ia atoko: “Kākiti manirekakaniāri ipar̄ikauatini, ĩnikapani.”

¹¹ Ate kenakopiretari h̄ite sauaki auari kākiti paniātakiti mak̄ipitakani. ! Ipar̄ikauatana. Ātipirika ipotxtitarina imarotinirina āti kākiti kamakiti. ¹² Aāuīte Xesosi Kristo posotiireē, apaniātana kākiti ikara atoko inakani ipar̄ikauatinina. Aōt̄ākikana ipar̄ikanoka ĩkaminina ikienana apokinina ĩkapani. ! Himaākatapiri apanakini kamakiti. ¹³ Nitariakori, ! h̄is̄āpakape erekari h̄kamini.

¹⁴ Kākiti ereē makamakaniāri ate ōt̄ākikakiti ia iōkatsopariā, erepaniko iua. Iua moianari !h̄itxapeuako. H̄itakanapariko iua, ininiā iuasaaki atxiīti ipētauata. Iuasaaki atxiīti iuaīkana atāo ikama. ¹⁵ Imoianari ! h̄itxapeuako, iuaritika himokaiakari ĩtxaua. H̄ipinitariko iua, kotxi h̄itari itxaua.

Paoro Sākire Mapotōkire

¹⁶ Anirekari Apiananiri, kākiti kamaerekaxiniretakari, kamaerekaxiniretinii h̄ite ikiniōtika. Anirekari iua kaikotini h̄itekata.

¹⁷ Nota Paoro iōkatsopata nisākire mapotōkire niuakoā. Ia nitakaōtxikare, ininiā himarotari atāo ia nota iokanatsopatakiti. Ia atoko inakari niōkatsopata. ¹⁸ Aāuīte Xesosi Kristo sikari ikinipoko erekari h̄ite h̄ikinikamoni. Amē.

1 TXIMÓTXIO

Merepanika Paoro Iokanatsopatakiti Tximótxiomoni

¹ Nota Paoro iokanatsopata pite Tximótxiomoni. Xesosi Kristo iokanapirena säpiretakari nota. Teoso amaerekani makatxakakari itxaua. Aimarotari Xesosinoka anikaua Teoso tixinemoni. Apiananiri itxaua. Teoso, Xesosi Kristo pakini iokanatano nota kâkitimoni, iokanapirena nisäpiretini ikapani. ² Pite Tximótxio, nota äkiri atoko pitxaua, kotxi merepitpanika pauikari Xesosi säkire nota säpiretakasaakii. Äiri Teoso, aäuite Xesosi Kristo pakini sikai ikinipoko erekari. Iamonîkana. Ikamaerekaxiniretaina pite.

Atão Minakati Oerekakani

³ Masetónia tixinimoni nisikasaaki, nipaniätai pite Épeso sitatxiti pikaikotini. Uatxa iuaîkana nipaniätai ereë Épeso pikaikotini. Ikara ninireka, kotxi apanakini ereë auakani oerekari Teoso säkire kâkitimoni, txamari na atâoni ninoa oerekakiti. Ninirekai pite pinitinina ninoa atão minakati imoerekakanina ikapani. ⁴ kotxi ninoa säpiretapikari kitxakapirîkari pirena. Ninoa xinikapikari aätokiriakorini uâka, ininiâkara kâkiti taparakienatakakaua iuâkana ixinikasaakina. Pôtâkikanako ninoa ikara atoko inakari säkiretxiti itakanapinina, kotxi ikara säkiretxiti !oerekari kâkiti Teoso nireëkiti. Teoso säkire aäukiniâ, aimarotari Teoso nireëkiti. ⁵ Nipaniätai pite ikara atoko, kotxi ninirekari ereë Teoso säkire auîäkani tiretakakiniua. Kâkiti äkixinire maerekati mauakaniâ, ininiâ itiretakakaua. Kâkiti imarotakasaakiri ikamakiti ereka inini, itiretakakaua. Kâkiti ikara atoko inakari atão auikari Xesosi säkire. ⁶ Kâkiti, Teoso säkire atão masäpiretakani, takanapari ikara erekari kimaporiti. Pîpinanaâkani atoko itxauana, kotxi !imarotaikarina Teoso kimapore. Maxikatiika isâkirauatapikana. ⁷ Ninoa kâkiti nirekamari Teoso paniätakiti oerekakani ininiuana, txamari !imarotarina Teoso paniätakiti. !Imarotarina isäpiretakitina, iuaritika ninoa: “Atão pitika asâkire,” itxanâtana.

⁸ Kâkiti atão säpiretakasaakiri Teoso paniätakiti iôkatakori, iuasaaki aimarotari ipaniätakiti ereka inini. ⁹ Mauiritakoti aua, kona kâkiti atão inakari kamakani ikapanini. Mauiritakoti aua, kotxi maerekati kamakani auapitika. Aua mauiritakoti manireëkani. Aua Teoso manireëkani. Aua maerekati kamakani. Aua erekari manireëkani. Aua Teoso paniätakiti napetakani. Kâkiti aua iri okakani. Kâkiti aua inoro okakani. Aua kokanirini. Mauiritakoti aua, kâkiti ikara atoko inakari ikapani. ¹⁰ Aua kâkiti äti itanorokata sirîkakari. Aua kâkiti äto tanirikata sirîkakaroro. Aua kiki äti kikikata sirîkakari. Aua sito äto sitokata sirîkakaroro. Aua kâkiti äti kâkiti itiriäkani ivêtxitiniri ikapani. Aua aäpirenaâri. Aua kâkiti äti apoîtakani. Mauiritakoti aua ikara atoko inakari kâkiti ikapani. Ninoa !auikari Teoso säkire atão inakari. ¹¹ Ikara Teoso iokanapirena erekari säpiretaua. Peerekari Teoso. Peerekari iua iokanapirena. Iua paniätano nota iua iokanapirena nisäpiretini ikininapemoni.

Teoso Amonîkiri Paoro

¹² Nitxari aäuite Kristo Xesosi: “Erekari pite kaminano, kotxi pisikataparaxiniretano nota pite ikapani nîparîkauatini ikapani. Erekari pauikini nisäkire. Erekari pimereinino nota pisäkire ikininapemoni nisäpiretini ikapani,” nitxari Kristo Xesosi. ¹³ Meresaaki nota misäkirepitari iua Xesosi. Nasikatikinitana iua säkire auîäkani nokinina ikapani. Kaneenamari nitxaua iuasaaki. Iuaritika Teoso amonîkano. !Imisiritano nota, kotxi iuasaaki !imarotari nikamakiti Xesosi säkire nîmauikakani xika. ¹⁴ Iuasaaki !erekano.

Maerekati nitxaua. Iuaritika aãuïte Kristo Xesosi sikari ikinipoko erekari notamoni. Kristo Xesosi nakiti nitxapekaua, ininiãkara nauikari isãkire. Iua nakiti nininiãua, nitiretari iua. Nitiretari apanakini apaka. Mitxi !nimarotari nitiraõkiuati. ¹⁵ Nisãpiretaiko ia sãkiretxiti atão inakari, pauikiniri ïkapani, ikinimane auikiniri ïkapani. Nitxai: “Kristo Xesosi apoka ïkorapokoriti maerekati kamakani maerekani imakatzakini ïkapani,” nitxa. Maerekati apiata kamakari nitxaua nota. ¹⁶ Maerekati apiata kamakari nitxaua, iuaritika Teoso !imisiritano. Iamonïkano, kotxi inirekari apanakini imarotiniri Kristo matima omanãkarauatakani kãkiti maerekani xika. Xesosi nirekari nota eereka auakani, isãkire auiãkani imarotiniri Xesosi amonïkinina ninoa, kotxi iua amonïkano nota maerekati apiata kamakarino. Ninoa auikari isãkire, ininiãkara auapininiika Teosokata. ¹⁷ Nitxari Teoso: “Ari Teoso, peerekai. Åtipirika ikinimane auïte pitxaua. Pipinini !uari. Matamatakoti pitxaua. Pitenokara Teoso txaua. Pitenokara kimaroreri. Ikinimane paxitaiko åtipirika. Ikinimane åtipirika sãpiretaiko ereka pinini. Atãopitikara nisãkire. Amẽ.”

Xesosi Sãkire Iteene Auikiko

¹⁸ Tximótxio, namarite atoko pitxaua. Nisãpiretai noerekakiti sãkiretxiti pikaminiri ïkapani. Pixinikariko akokaxiti Teoso sãkire sãpiretakani sãpiretakiti. Ninoa sãpiretai Teoso nirekakiti pite kamini ïkane. Nota sãkire uatxa ninoa sãkire atokotxikana. Ikara ninoa oerekakiti sãkiretxiti pikamapikako, ininiãkara pite sotato erekari atoko pitxaua Satanasi pinaiatini. ¹⁹ Pauïkapikariko Xesosi sãkire. Ikara pikeeko atoko itxa. !Pikamapiri pãkixinire mapokaerekatakiniti. Ikara apaka pikeeko atoko itxa. Apanakini kamapekari åkixinirena mapokaerekatakiniti, ininiã eereka !auikaïkarina Xesosi sãkire. Kanaua sakikini atoko itxa ninoa auikiniri Xesosi sãkire. ²⁰ Imeneo inakori, Arexãtri inakori apaka ikara atokokana itxana. Ninoa misãkirepiretari Teoso, ininiãkara nota sikanapana ninoa Satanasoni. Satanasi misiritakasaakina ninoa, atxiiti itakanaparina Teoso imisãkirepiretinina.

2

Teoso Misãkiretiko Ikinimane ïkapani

¹ Merepanika nõtãkikai pimisãkiretiniri Teoso ikininape kãkiti ïkapani. Pimisãkiretariko Teoso ninoa nireẽkiti ïkapani. Pamanaãriko Teoso sikiniri erekari ninoamoni. Pitxariko Teoso: “Peerekai pite, kotxi erekari pisikakiti kãkitimoni.” ² Teoso pimisãkiretako auïtetxiakori apiari ïkapani, auïtetxiakori poiãori ïkapani apaka. Pamanaãriko Teoso ninoa ïkapani, aãuini ereka inini ïkapani, neenamãtxi mauakani ïkapani. Ikara atoko aniniã, akamari Teoso nireẽkiti erekarinoka. ³ Ikara akaminiã erekapitikari. Teoso, amaerekani makatzakakari, apokaerekatari asãkire ikara atoko inakari akamini. ⁴ Teoso nirekari imakatzakiniri ikinimane maerekani. Inirekari ikinimane imarotiniri atão inakari sãkiretxiti. ⁵ Åtinokara Teoso aua. Åti kikinokara mikanapiriãri kãkiti Teosomoni. Xesosi Kristonokara mikanapiriãri kãkiti Teosomoni, kotxi iuanoka misãkiretari Teoso kãkiti ïkapani. ⁶ Iua ipina ikinimane kãkiti ïkitxitini ïkapani. Teoso ketotini õti manapi Xesosi ipina. Xesosi ipinini oerekaua Teoso nirekiniri imakatzakiniri ikinimane maerekani. ⁷ Ininiãkara Teoso akiritano nota isãkire ikinimanemoni nisãpiretini ïkapani. Ininiã Teoso iokanatakiti kãkitimoni nitxaua nota. Ikara nisãkire atão. Kona paxirarinì. Teoso akiritano Xoteo minakanaua noerekini ïkapani. Akiritano atão inakari sãkiretxiti noekinina ïkapani. Akiritano noekinina Teoso sãkire auikinina ïkapani.

⁸ Ininiã ninirekari kikiakori erekarinoka kamakani, ikini itixiti auakani, misäkiretiniri Teoso. Ninirekari Teoso imisäkiretakasaakina, iusaaki ninirekari isäkire auikinina apaka, äti imomanatakanina.

Sitoakoro Xesosi Säkire Auiäkani

⁹ Ninirekari sito mäka atão inini, kiki paxitiniro ñkapani. ! Apakata oõuikiniua omäka ereka inini xika. !Erekari sifo ätipirika oeretiniri oiäko käkiti xikaueretiniro ñkapani. Oro, pérona pakini otakinia oïtoã käkiti xikaueretiniro ñkapani, !erekari. !Erekari mäkatxi kakaroneri oieretakini. ¹⁰ Sito Teoso nireëkiti nireëkaro kaminiãri erekari, erekapitikari. Mäkatxi peereri atoko itxa erekari okamakiti, kotxi käkiti atamatari okamakiti. ¹¹ Teoso säkire säpiretakari oerekarauatakasaaki, erekari sito kenakotiniri. !Apakata iusaaki osäkirauatini. Erekari opaxitiniri iua, isäkire okïpitini ñkapani. ¹² Nota !auiritaro sito oerekinina kikiakori, ikamakitina ñkane opaniätinina. Erekari masäkiretoka onini. ¹³ Ikara atoko itxa, kotxi merepitipanika Teoso kamari kiki Adão inakori. Eerekaikara ikamaro sito Eva inakoro. ¹⁴ Kona Adãoni misirienetaäka. Sitora misirienetapeëka. Oa kamari maerekati, kotxi !okamari Teoso paniätakiti, ininiãkara !apakata sito paniätiniri kiki ikamakiti ñkane. ¹⁵ Sito auikiniãri Teoso säkire, otiretiniãri apanakini, maerekati omakamakaniã, omasarauatakaniã, Teoso makatxakari omaerekani, kotxi äto sito eenetari Xesosi, amaerekani makatxaäkari.

3

Kõtäkikarerini Pirena

¹ Ia nisäkire atão. Kiki nirekiniãri kötäkikarerini ininiua, Teoso säkire auiäkani ötäkikini inirekiniã, iua nirekari parïkatxi erekari. ² Ia atoko kötäkikarerini txauako: !Ikamari maerekati, ininiã iua apoñtiko !uari. Ätonanirako ñtanoro. Kïikiteri itxauako. !Katimari omanãkarauatini. Ipaxitaäkako. Käkiti ätiätaã ñkani apapakapo aapoko. Imarotariko oerekarauatini. ³ !Ipoãtapeko. Kaneanamari !itxapeuako. Katiraökiri itxauako. !Ipotxitapiriko neenamtxi. Txineiro iteene !ixinikaperoko. ⁴ Iua nïkatanako aapoko auakani, ninõa auini ereka ininina ñkane. Itxïkitakanako imiakori ipaniätakiti ikïpitinina ñkapani, ininiã ninõa paxitari iua. ⁵ Ikara atoko itxako kötäkikarerini, kotxi aapoko auakani imamimatanïkaretakaniã, ininiã !imarotari käkiti Xesosi säkire auiäkani inïkatini. ⁶ Kiki mapaötinoka auikiniãri Xesosi säkire, !apakata iua Xesosi säkire auiäkani ötäkikakarini ininiua. Xesosi säkire auiäkani ötäkikakarini ininiãua, iuikaua atxiiti. Iuikiniãua, Teoso misiritari iua, kitxakapirïka Satanasi iuikasaakiaua imisiritini atokokana. ⁷ Kiki Xesosi säkire auiäkani ötäkikakarini paxitaäkako, Xesosi säkire mauïäkani apaka paxitari iua. Ikara atoko ininiã, !ikamapaniri käkiti kamapëtatakarini. Ininiã Satanasi !imaïkari iua itakapiremoni.

Kamiparïkarerini Pirena

⁸ Ätipekana, Xesosi säkire auiäkani miparïkatakanipekana nisäpiretaiko: Iua kamariko erekari, ipaxitiko ñkane. Ätika isäkire itxauako. !Ipoãtapeko. !Apakata txineironoka ixinikini. ⁹ Kamiparïkarerini iteene auikariko Teoso säkire atão inakari. Äkixinire imarotariko ikaminiri Teoso säkire iaöka. ¹⁰ Xesosi säkire auiäkani ataerekatariko kiki, kamiparïkarerini ininiua nireëkari. Erekarinoka ikaminiã, ininiã iua auiritaãka ninõa miparïkatakari ininiua. ¹¹ Iua atokokana kamiparïkarerini ñtanoro kamariko erekari opaxitiko ñkapani. Aãpirena !okamapeko. !Opoãtapeko. Okamariko okamaenetakiti iaöka. Ininiã käkiti aukari osäkire. ¹² Ätonanirako kamiparïkarerini ñtanoro. Inïkatariko

imiakori, kākiti iua aapoko auakani apaka, ninoa auini ereka ininina ĩkapani. ¹³ Kamiparĩkareri atāo parĩkauatiniā, iteene ipaxitaāka. Apanakini apokaerekatari iparĩka. Ininiā itaparaxinireritika isāpiretari Kristo Xesosi sākire auikiko kākitemoni.

¹⁴ Uatxa pitemoni nōkatsopatakasaaki, ninirekari paĩtiki nisini hĩtemoni. ¹⁵ Atxiĩti uai okanani nauapanika, ininiā ia iōkatsopari oerekaiko pite Teoso nakitiakori atāo auini ikiniōtika, kotxi Teoso aapoko atoko atxaua, iua auiniātaā ĩkapani. Teoso auāki itxapika. Kākiti iua nakitiakori nĩkatari iua sākire. !Auiritana apanakini koketiniri atāo minakati Teoso sākirekata. Isāpiretana ikinimane Teoso sākire atāo inakari. ¹⁶ Peerekari Teoso parĩka kākiti ĩkapani. Merepanika kākiti !imarotari, eereka Teoso oerekari iparĩka. Ia atoko Teoso kamināua ate:

Kākiti itxapekaua. Iua Xesosi. Erekari Matamatakoti oerekari kākiti Xesosi sākire atāo inini. Teoso nitiriakori iaxitikini atamatari iua. Isākire sāpiretaāka ikini itixiti auakanimoni. Kākiti auikari isākire. Eereka Xesosi anikaāka iaxiti Teoso tixinemoni. Ikara atoko inakari Teoso parĩka kākiti ĩkapani.

4

Atāo Minakati Oerekakani

¹ Iua Erekari Matamatakoti sāpiretaua, apanakini !auikaikari Xesosi sākire itixi mapotōkire ōti takote. Ikara atāo. Iuasaaki ninoa auikari maerekani matamatakoni misirienere. Auikarina Satanasi nitiriakori oerekakiti. ² Kākiti ikara atoko inakani sāpiretari atāo minakati. Ninoa sākire āti, txamari ninoa xinikakiti ipinimoni. Ninoa ākixinire sākire !auaika. ! Isāpiretaikarina maerekati imakamakanina ĩkapani. Kapatakari arikakiti atoko itxa ninoa ākixinire sākire. ³ Kākiti ikara atoko inakani ! auiritari kākiti ĩtanorouatini. “!Erekari kākiti ĩtanorouatini,” itxa ninoa sākire. Teoso kamari ikini nipokori kākiti nikinĩ ĩkapani. Txamari ninoa kamisirienererini ! auiritari kākiti apanakini nipokori inikinina. Teoso nirekari Xesosi sākire auĩakani, atāo inakari imarotakani, nikiniri ikara nipokori Teoso imisākiretaka atoko: “Erekapitikai ia nipokori pisikiniāua.” ⁴ ĩkinika Teoso kamakiti erekari. !Apakata kākiti mānirekakaniāri apanakini nipokori. ĩkinipoko nipokori hinikasaaki, himisākiretariko Teoso. Hĩtxariko: “Erekapitikai ia nipokori pisikiniāua.” ⁵ Teoso sākire sāpiretaua ikinipoko nipokori anikini. Nipokori anikasaaki, amisākiretiniāri Teoso, nipokori isikakiti ereka inini asāpiretiniāri, ininiā ikara nipokori erekari anikinĩ.

Kristo Xesosi Nitiri Erekari Inakari

⁶ Aitariakori pōtākikinĩ ikara atoko, Xesosi Kristo nitiri erekari pitxaua. Nipokori sikataparatarĩ kākiti ĩto. Teoso sākire aāuĩakiti, oerekaretxi atāo inakari, nipokori atoko itxa, kotxi isikataparatarĩ axinire. Pite auikapikari oerekaretxi atāo inakari. ⁷ !Pimaākatapiri mĩkiteti sāpiretakiti, sākiretxi Teoso mapokaerekatakinĩ. ĩkiniōtika piteka poerekauako Teoso paniātakinoka pikamini, ininiā Teoso nireēkĩtixikana pikama. ⁸ Pĩto parĩkauatakasaaki, pĩto tapara apiaāpota, ininiā erekari piparĩkauatini. Apiaerekata pixinire parĩkauatini pixinire auāki inini ĩkapani. Pixinire ĩkorasaaki auāki ininiā, pauapikako Teosokata ātipirika. ⁹ Ikara nisākire atāo. Erekari ikinimane auikiniri ikara. Erekari ikinimane kaminiri ikara. ¹⁰ Ininiākara iteene aparĩkauata Teoso ĩkapani. Pasāpaniri, iuaritika aparĩkauatipitipo, kotxi aāuikari Teoso sākire, Teoso mipĩkati sākire. Iua ikinimane kākiti maerekani makatxaākari itxaua. Iua makatxakari isākire auĩakani maerekani, maerekani misiritikoātaā imasikanina ĩkapani.

¹¹ Pipaniätariko kākiti noerekakiti sākiretxiti iaōka ikaminina. Poerekana noerekakiti.

¹² Pite ātokoripanika, iuaritika pimarotapitikari Teoso sākire, ininiā !pauir-itapiri kākiti napetiniri poerekakiti sākiretxiti. Atāo inakarinoka pikamako Xesosi sākire auīākani atamatini īkapani, ininiākara ninoa auīkapititariko pisākire, ininiā ninoa nirekari pite atoko ininina. Erekarinoka pisāpiretako. Erekarinoka pikamako. Kākiti pitiretako. Iteene pauikariko Teoso sākire. Maerekati ! pikamapeko. Ikara atoko pininiā, ninoa nirekari pite atoko ininina. ¹³ Ereē nimapokakanisaakipanika, patatsopatariko Teoso sākire iōkatsopatakorī, apanakini kenakotiniri īkapani. Pisāpiretanako Teoso sākire. Teoso sākireē pōtākikanako. Poerekana Teoso sākire atāo imarotinina īkapani. Ikara atoko pitxapikanako, ereē napokini apisapanika. ¹⁴ Akokaxiti kōtākikarerini sāpiretai piparīka Teoso īkapani. Iuusaaki ninoa takari uakona pite nopini, pite īkapani imisākiretakasaakirina Teoso. Ikara atoko ininiākara, pikamapikariko ikara piparīka Teoso īkapani. ¹⁵ Ātipirika pixinikariko ikara nōtākikini. Ikinioṭika pikamariko piparīka Teoso īkapani. Ininiā apanakini imarotari Teoso sākire apiaāpota pauikini. ¹⁶ Erepaniko pikamakiti ereka inini īkapani. Erepaniko poerekakiti sākiretxiti Xesosi oerekakiti iaōka inini. Ikara ātipirika pikaminiā, piteka makatxakaua pimapinakanani īkapani. Apaka pimakatxakana pisākire auīākani imapinakanani īkapani.

5

Ōtākipirenatxi Pirena

¹ ! Pitxitapiri kiki aneēkari. Pōtākikariko, piri pimisākiretini atokokana. Pōtākikariko kikiakori pite tikini auakani, pitariakori pimisākiretini atokokana. ² Pōtākikaroko sito aneēkaro pinoro pōtākikini atokokana. Pōtākikaroko ātokoro, pitaro pōtākikini atoko. Iuusaaki pipaxitaroko.

Sitoākini Tikinitakoni

³ Pinīkatanako sitoākini tikinitakoni onirimane matiretakini. ⁴ Tikinitakoro oimiakori auiniā, oītariakori anaakori auiniā, ninoa nīkatamaroko oa. Ikara ikaminiāna, erekari Teosomoni. Teoso poxokotana ninoa. Merepanika ninoa kaminiāri erekari ninoaka aapoko āki, aimarotari ninoa atāo auikiniri Teoso sākire, kotxi meresaaki irina, inorona pakini nīkatana ninoa. ⁵ Tikinitakoro manīkatakoto auikari Teoso inīkatiniro oa. Oa misākiretari iua pokamara, ikanōka pakini inīkatiniro īkapani. ⁶ Tikinitakoro osarauatininoka nireēkaro, ipīkaro atoko otxaua. ⁷ Pisāpiretanako ereē auakani, Xesosi sākire auīākani nīkatinina inorona, inorona itaro tikinitakoro pakini. Inīkatiniāna, !apoītaākana. ⁸ Xesosi sākire auīākani manīkatakaniāri inirimane, itakanaparina Teoso sākire auikinina. Apia maerekanita iua aapoko āki auakani imanīkatakaniā. Kākiti Teoso sākire mauīākati maerekati itxaua. Apia maerekati itxaua iua aapoko āki auakani manīkatakati.

⁹ Apanakini sito tikinitakoni moianatana Xesosi sākire auīākani. Pitakariko ninoa tikinitakoni uāka aātsopaā himoianatini īkapani. Sito ikara atoko inakaro sesēta ano apiko auakoro oa. Ātinoka oītanirini. ¹⁰ Oa imarotaāka, kotxi erekarinani okama. Atāo oōerekari oimiakori. Osikakienatana ātiātaā īkani. Oimarotaāka, kotxi oa arokakūtari kākiti Teoso nakitiakori. Oimarotaāka, kotxi kākiti maerekaxinireni otireta. Oimarotaāka, kotxi ikini sereti erekari ātipirika okama. Tikinitakoro ikara atoko inakoro uāka aātsopaā pitaka himoianatini īkapani.

Tikinitakoni Ātokoropanika Inakani Ōtākikiko

11 ! Pitakapiri tikinitakoro uāka iua aātsopaā, ātokoropanika inakaro, kotxi iuaīkana onirekari kīkikata osirīkini, ininiā onirekari iuaīkana oītaniriuatini, ininiā !onirekaikari Kristo. 12 Ikara atoko okaminiā, okamari maerekati, kotxi mitxi osākire: “Nikamariko parīkatxi Teoso Īkapaninani. ! Nītaniriuataikako,” otxama. 13 Tikinitakoro ātokoropanika inakaro uāka iua oiarinauatinini. Oianapokotapika. Apia maerekati okama, kotxi ototari aāpirena okamini. Onirekari ikinika apanakini kamakiti oimarotini, txamari ikara atoko !apakata. !Apakata āti kamakiti osāpiretini apanakinimoni. 14 Ikara atoko ininiā, ! pitakapiri tikinitakoro ātokoro inakaro uāka iua aātsopaā. Nota ōtākikana ātokoroakoro tikinitakoni iuaīkana taniriuatini. Erekarī keene ininina, aapokona iparīkauatinina. Ikara atoko ininiā, Xesosi sākire mauīākani kona misākirepiretana Xesosi sākire auīākani. 15 Nota ikara atoko nisāpiretai, kotxi ātikaka tikinitakoni ātokoroakoro inakani takanapapekari Xesosi sākire auīkinina, Satanasi paniātakiti ikaminina Īkapani. 16 Xesosi sākire auīākani inirimanena tikinitikoā, inīkatanako ninoā. !Erekarī imanīkatakanirina inirimanena tikinitakoni. !Erekarī inirekinirina apanakini Xesosi sākire auīākani nīkatinina inirimanena, kotxi ninoā nīkatana kaiāopokori tikinitakoni manirimaneni. Pasāpaniri ninoā parīka.

Kōtākikarerini Pirena

17 Kōtākikarerini atāo kaminiāri iparīka Xesosi sākire auīākani Īkapani, erekarī hīsikinina iparīkana Īki apiata. Teoso sākire isāpiretiniāna apanakinimoni, Teoso sākire oerekiniāna, ininiākara erekapitikari apiata iparīkana Īki hīikitxitinina. 18 Teoso sākire iōkatsopatakori txari:

! Hīaxirikanamatapiri kema auīe iparīkauatakasaaki, triko ikatxaratakasaaki. Pauiritariko inikiniri triko Īki, iparīkauanātakasaaki.

Teoso sākire iōkatsopatakori txari apaka:

Erekapitikari parīkauatakari apakapiniri iparīka Īki.

19 Āti apoītiniāri kōtākikarerini, ! pimaākatapiri isāpiretakiti. Ipi, atxiīti ipi āti pakini kākiti atamatiniāri kōtākikarerini kaminiri maerekati, isāpiretiniāna pite, pikenakotapitikari ninoā sāpiretakiti. 20 Pōtākikanako Xesosi sākire auīākani maerekati kamakani apanakini Xesosi sākire auīākani apisatoō, ininiākara apanakini pīkari maerekati ikaminina.

21 Tximótxio, nota paniātai ikara noerekakiti iaōka pikamini. Teoso apisatoō, Apiananiri Xesosi Kristo apisatoō apaka, Teoso nitiriakori iaxitikini imereēkini apisatoō apaka, nipaniātai ikara noerekakiti iaōka pikamini. Ninoā kenakotari nisākire pitemoni. Ātinokarako pisākire txauako ikininape kākitemoni. Erekarī pikamako ikininape kākitemoni, kākiti pipotxitakinimoni, kākiti pimapotxitakinimoni apaka. 22 Atxiīti aua Teoso sākire auīākari iteene pimimarotakiniti. Ininiā ! pimereēpiri iua Xesosi sākire auīākani ōtākīākari ininiua. Atxiīti ikamapanikari maerekati. Pimereiniāri iua, pite moianatari iua maerekati ikamini. Erepaniko maerekati pimakamakani Īkapani.

23 Pite itokata amianata. Pitsii iriko, ininiākara kona āparaānanini piāta. Ovaā poiāoka apaka piātako pipini Īkapani.

24 Apanakini !kipatari maerekati ikamakiti, ininiā ikinimane imarotari. Apanakinipekana maerekati ikamakitina !atamataāka ikamakasaakina. Ninoā kipatari. Okananixiti atokoikara imarotaāka ninoā maerekani. 25 Iua atokokana erekarī apanakini kamakiti atamataāka. Erekarī apanakini kamakiti !atamataāka ikamakasaaki. Iuaritika okananixiti atokoikara imarotaāka.

6

Nitiritxi Amotakoni Pirena

¹ Nitiritxi amotakoni, Xesosi sákire auiákani, iteenerako iparíkauatana ipatrötena íkapani. Ninoa paxitanako ipatrötena. Ikara atoko ininiána, Teoso uáka !imisákirepiretaáka. Iua sákire ate oerekakiti apaka !imisákirepiretaáka iuasaaki. ² Nitiritxi patröte Xesosi sákire auiákari ininiáua, initiri paxitariko iua, kotxi itari apaka itxaua iua. !Apakata poiáonoka ipaxitiniri ipatröte, itari ininiua xika. Erekarite iteene iparíkauatini ipatröte íkapani, kotxi ipatröte auikari Xesosi sákire. Teoso tiretakiti ipatröte. Tximótxio, ikara noerekakiti sákiretxiti poerekariko apanakinimoni. Pötákikanako ikara iaóka íkaminina.

Txineiro Potxitakani Pirena

³ Aua kákiti atáo minakati oereékani. Ninoa !auikari aáúte Xesosi Kristo sákire atáo inakari. !Auikarina atáo inakari oerekakori, Teoso sákire. ⁴ Kákiti ikara atoko inakari iuikaua, txamari !kimaroreri. Ipotxitari isákirauatini apanakinikata itaparakienatakiniuana íkapani. Ininiákara xikoretxi aua, neenamtxi aua, misákirepiretakatxi aua. Ininiá kákiti !auikari áti sákire. Iuákatari áti kaminiri maerekati. ⁵ Ninoa txitakakapikaua, kotxi ixinikak-itina maerekatina. !Imarotaikarina Teoso sákire atáo inakari mitxi imarotakitina. Ninoa oerekari Teoso sákire kákitimoni txineiro ito apakapinina íkapani. Txamari na atáo ninoa oerekakiti sákiretxiti. !Pimaákatapiri kákiti ikara atoko inakari.

⁶ Teoso nireékitinoka pinirekiniá, ikinipoko pinireékiti auape, ininiá pákixinire poxokoniua. Kipa apikomoni pinireka? !Auari. ⁷ Kiripa ate mina uai itixi aponaniákasaaki? !Kaminareua. Kiripa aanika atekata apíkasaaki? !Kanikareua. ⁸ Kamáka aniniá, kanipokore aniniá, apakatape. ⁹ Satanasi oerekari kákiti maerekati ikamini txineiro apakapini íkapani. Ininiá tiitxi nireékari mokatanitika kamari Satanasi oereékiti. !Erekari tiitxi nireékari nireékiti. !Kiiikiteri iua. Inireékiti txikatoro atoko, kotxi imáikari iua. Eereka !auaika itii, itxineirote, ipoxokoni pakini xipope. Inireékiti xika Teoso iokanataru iua kákiti misiritikomoni. ¹⁰ Kákiti iteene potxitiniári txineiro, ikamari maerekati. Takari aneé, kotxi ikotsa aua. Iua atokokana maerekati aua ikotsa. Txineiro potxitiko maerekati kotsa itxaua. Txineiro potxitiko auniá, ikini sereti maerekati aneé. Apanakini txineiro potxitakani takanapaápotari Teoso sákire, ininiákara txineiro potxitakari iuaka karotapekaua ákixinireé. Iuaka maerekaxinireti itxíkitakaua.

Paoro Ótákiniri Tximótxio

¹¹ Pitepekana Tximótxio, Teoso paniátakiti kamakari pitxaua, ininiákara ikara maerekati xatiki !pikamape. Atáo inakarinanirako ikiniótika pikamako. Teoso nireékitinoka pikamako. Itene pauikariko Teoso sákire. Katiraókiru pitxauako. Pimisiritiko auakasaaki, pimíteenekariko. Teoso nireékitinoka pinirekako. Kona pinirekapiri piteka nireékiti. ¹² Pineenamauatoko Teoso íkapani. Ikara neenamtxi erekari, Satanasi piokanatini, kákiti Teoso sákire auikini íkapani. Papakapariko Teoso sikakiti, kotxi iua akiritai iuakata pauapininiika pinini íkapani. Kaiáopokori kákiti imarotari Xesosi sákire iteene pauikini, kotxi ikenakotapekari pisápiretinina. Peerekari pisákire ninoamoni. ¹³ Tximótxio, nimisákiretai pite Teoso apisatoó, Kristo Xesosi apisatoó apaka. Ninoakara kenakotari nisákire uatxa. Teoso ikinimane auáki inini txíkitakari iua. Kristo Xesosi Homano aúte Pócio Pirato inakori apisatoó auakasaaki, isápiretari atáo Teoso sákire. ¹⁴ Nipaniátaí ikara noerekakiti sákiretxiti iaóka pikamini. !Pimamakapiri ikara noerekakiti. Ikara noerekakiti iaóka pikaminiritika aáúte Xesosi

Kristo kanapiriãko. ¹⁵ Teoso ketotari Xesosi kanapiriini õti. Iuasaaki Teoso akiritari Xesosi ìkorapokoriti ìkanapiriini ìkapani. Iuanokara kaposotiireri. Peerekari iua. Auítetxiakori auíte itxaua. Apiarini sauaki iuanokara Apiananiri txaua. ¹⁶ Iuanoka ! ipina. Iuanokara ìkinipoko auãki inini txìkitakakari. Iua auiniãtaã iotximere auapika, ininiãkara kãkiti ! iposota imatokotiniri Teoso. ! Katamatikori. Kãkiti ! iposotari atamatiniri iua. Iuanokara kaposotiireri ãtipirika. Ætipirika maãkiritari: “Peerekari Teoso.” Ameë.

Xesosi Sãkire Auiãkani Katxineiroterini

¹⁷ Pipaniãtanako kãkiti katxineiroterini: “Katii hininiã, ! hñuikapeuako. ! Hìpoxokotapero hìtxineirote, kotxi ãti õti atxiiti hìtxineirote ! auaika. Hìpoxokotariko Teoso, ãtipirika auãkiri, kotxi iuara sikaua ìkinipoko apotxitakiti. Kaiãopokori isikaua. ¹⁸ Erekarì hìkamako. Hìtxineirote kaiãopokoro auini atokokana, erekari kaiãopokori hìkaminanako apanakini. Kaiãopokori hìtii auiniã, hìsika kãkiti kaamonirimoni. Himarotakasaakiri, matxineiroteni amonitakiti hìsikanako ninoa. ¹⁹ Ikara atoko hininiã, hãpotiiãpotari erekari Teoso tixinekiri. Iuaã apotiitakori !ixipoka. Ipinaãkana atoko, auinapanikana. Ikara atoko hìkaminiã, hãpakapari Teoso sikakiti. Iua txìkitakai hãuapininiika hinini Teosokata.”

Ikara pisãpiretako katxineirotenimoni.

Paoro Iõkatsopare Mapotõkire

²⁰ Ari, Tximótxio, atão pikamariko parìkatxi Teoso sikakiti pitemoni pikamini ìkapani. ! Pimaãkatapiri sãkiretxi Teoso mapokaerekatakiniti. ! Pimaãkatapiri kãkiti, “Kimaroreno nota,” inakari, kotxi ìmarotari imaroretxi atão inakari. ²¹ Ninoa sãkire: “Imaroretxi auapitika notamoni,” itxa. Txamari na xatiki imarotari Teoso imarore. Ikara xika ninoa takanapaãpotari Teoso sãkire auikinina.

Teoso sikai ìkinipoko erekari. Ameë.

2 TXIMÓTXIO

Paoro Iokanatsopatakiti Iuaĩkana Tximótxiomoni

¹ Tximótxio, nota Paoro iokanatsopata pitemoni. Teoso mereẽno nota, Kristo Xesosi iokanatinino İkapani, isäkire nisäpiretini İkapani. Käkiti Kristo Xesosi nakiti ininiãua, Teoso txikitakari ixinire auãki inini, kotxi Teoso kamaenetapekari ikara ikamini.

² Pite Tximótxio namarite nitiretakiti atoko pitxaua. Aĩri Teoso, aãũite Kristo Xesosi pakini sikai ikinipoko erekari. İamonĩkaina. İkamaerekax-niretaina.

Paoro Ötãkikiniri Tximótxio

³ Nota parĩkauata Teoso İkapani. Ninirimane kitxakapirĩkarini parĩkauatini atokokana nıparĩkauata. Nãkixinireẽ nımarotari maerekati nımakamakani, Teoso İkapani nıparĩkauatakasaaki. Nota txari Teoso: "Erekapitikari pikamakiti Tximótxio İkapani," nıtxa. Nımisãkiretapikari Teoso pite İkapani, İkanõka, pokamara, İkanõka, pokamara nıtxapıka. ⁴ Nıpiãtai. Nıxinikari pite txıapatini nıtakanapakasaakii, ininiã nınirekari naõkitinii iuaĩkana nıpoxonınuatini İkapani. ⁵ Nıxinikari pite atão auikiniri Teoso säkire. Merepanıka pakıro Aróitxi inakoro, pinoro Eonisi inakoro pakini atão auikari Teoso säkire. Nımarotapitikari pite apaka auikiniri Teoso säkire nınoa auikiniri atokotxıkana. ⁶ İniniãkara nõtãkikai. Akoka niuako nitakasaakiri pikiiã, Teoso sikai parĩkatxi iua İkapani pikamini. İuasaaki isıkaposotıiretai ikara parĩkatxi pikamini İkapani. İteene pikamarıko ikara parĩkatxi iua İkapani. ⁷ Teoso sikapekaua Erekarı Matamatakoti, ininiã !kapıkarıua. İua Erekarı Matamatakoti sıkataparatarı aãkixinire. İua oerekaua atıraõkiuatini. Oerekaua maerekati aĩno nıreẽkiti amanırekakani.

⁸ İniniã !pipětatıpiri aãũite säkire pisäpiretini. Apaka !pipětatıpeno nota, kotxi kateia äki naua Xesosi säkire nisäpiretini xıka. Maãtatsıırauata, Teoso iokanapırena erekari asäpiretini xıka, kotxi Teoso sıkataparataua amisıritıko amıteenekini İkapani.

⁹ Teoso makatxakapekari amaerekani. İua akıritapekaua inakıtiakori anınıua İkapani. Aparıka kona txıkitakari Teoso makatxakiniri amaerekani. İmakatxakari amaerekani, kotxi inırekari ikara atoko ikamini. İmakatxakari amaerekani, kotxi inırekari ikinipoko erekari isikınıua. İtixi kamıko apisapanıka Kristo Xesosi sikari ikara erekari atemoni. İuasaaki imakatxakari amaerekani. İuasaaki akıritaua inakıtiakori anınıua İkapani. ¹⁰ Uatxa Teoso oerekari ikara erekari kãkitimoni, kotxi amaerekani makatxakakari Xesosi Kristo apokapeka İkorapokoriti. İua xıpokapekari ipıkitxi. İsapıretari Teoso iokanapırena erekari, kãkiti mapınakani İkapani, Teosokata ätipırıka auini İkapani.

¹¹ Teoso mereẽno nota ikara iokanapırenatxi säpiretakari ninınıua tıkane. İmereẽno iua iokanatakiti kãkitimoni ninınıua. İmereẽno Xoteo minakanıua oereẽkari ninınıua. ¹² Teoso iokanapırena erekari nisäpiretini xıka, natatsıırauata. İuarıtıka !nıpětıauata, kotxi nımarotari Xesosi. İteene nauikari iua säkire. Nımarotapıtikari iua nıkatınino nota. İnıkatınırıtıkanı İkanapırıãko.

¹³ Teoso säkire pitemoni noerekakiti iaõka poerekako apanakini, kotxi noerekakiti atão. Pauıkapıkarıko Kristo Xesosi säkire. Katıraõki pitxako, kotxi Xesosi nakiti atxaua. ¹⁴ Pımarotari Teoso iokanapırena erekari. !Paurıtıpiri ikoketıko. Teoso sikari ikara iokanapırena pitemoni, apanakini pisäpiretini İkapani. Erekarı Matamatakoti auaiõtota. İua posotıireẽ pınıkatarıko Teoso iokanapırena pitemoni isıkakiti.

15 Pimarotari kákiti Xesosi sáikire auiaákani Ásia tixine auakani takanapano nota. Áltariakori Pixero inakori, Emoxeni inakori pakini takanapano nota. 16 Onesíporo inakori ! itakanapano. Ninirekari Teoso tiritinina iua aapoko auakani. Itokata ikamaxokonitano nota. !Ipétatano kateia áki nauakasaaki. 17 Homa sitaxiti apokasaaki, initaápotano nota, eereka apokano. 18 Pite imarotari iua iteene moianatinino nota, Épeso sitaxiti nauakasaaki. Ininiá nitxari Apiananiri: “Ninirekari piamoníkiniri Onesíporo itixi xipokini óti manapisaaki.”

2

Misirikaretxi Míteenekiko

1 Pitepekana namarite Tximótxio, kataparaxinire pitxako. Kristo Xesosi nakitiakori atxaua, ininiá iua sikari ikinipoko erekari atemoni. Ikara erekari sikataparatarí axinire. 2 Pite kenakotapekari nisáikire noerekakiti kákitimoni. Ininiá poerekariko ikara iaóka apanakinimoni atáo inakari kamakanimoni. Eereka ninoa posotari oerekiniri nisáikire noerekakiti apanakinimoni apaka.

3 Sotato erekari míteenekari imisiritiko. Kristo Xesosi sotatone atoko atxaua, ininiá pimíteenekariko pimísiritiko sotato erekari míteenekiniri atoko. 4 Sotato paríkauatakasaaki, !ixinikaikari iparíka mitxi ikamakiti sotato iminakanisaaki. Ixinikapikari sotato auíte nireékiti ikamini, iauíte poxokotiniri íkapani. Ikaranokara ixinikanáta.

5 Átipekana nisápiretai. Míteékari mitekaxi mapotóikire merepanika apoákari apakapari imitekini íki. Mitekaxi paniátakari paniátini iaóka imitekiniá, apakapari imitekini íki.

6 Átipekana nisápiretai. Katarakeri poparíkarí nikari itakare merepanika, kotxi iteene iparíkauata. 7 Pixinikariko ikara nisáikire. Apiananiri kamaimaroretai íkara.

8 Pixinikariko Teoso iokanapirena erekari nisápiretakiti kákitimoni. Xesosi Kristo nisápireta ikinimanemoni. Iua ipinaka atoko, iuaíkana auáki itxíkitakaáka. Iua Taviini apika mekaniri. 9 Natatsiirauata Teoso iokanapirena erekari nisápiretini xika. Nota omanatakani iaxirikapekano kohétxiá, kokaniri iaxirikinina atoko, nota masikani íkapani. Teoso sáikire ! iaxiriáka. Iaripireta ikini tópati. 10 Teoso mereépekari kákiti, imaerekani imaktxakini íkapani. Ininiá nota míteenekari nimisiritiko Teoso iokanapirena ninoa kenakotini íkapani, imaerekanina Kristo Xesosi maktxakini íkapani, átipirika Teosokata auinina íkapani. Iuasaaki peerekari.

11 Nisápiretaiko ia sáikiretxi atáo inakari:

Xesosi Kristo ipina ate íkapani, ininiá amanirekakaniári mitxi anireékiti, Xesosi nireékitinoka anirekiniá, ininiá aáuapika iuakata átipirika.

12 Amíteenekiniári amisiritiko Xesosi sáikire aáuikini xika, auítetxi atxauako iuakata. Akipatiniári iua aimarotini, iua apaka kipatarí ate imarotini.

13 Atxiíti !akamari akamaenetakiti. Xesosi kamapitikari iua kamaenetakiti, kotxi iua liposotari maerekati ikamini.

Teoso Nitiri Atáo Inakari

14 Ikara nisáikire pikamaxinikaretana Xesosi sáikire auiaákani. Ninoa Apiananiri apisató apotíitakasaakiaua, pótáikikanako: “! Hítxitakapeua maxikatíika kákiti sáikire xika, kotxi ! erekari,” pitxako ninoamoni. Kákiti kenakotiniári hítxitakakiniaua, ininiá !nirekaikarinina Xesosi sáikire auikinina.

¹⁵ Tximótxio, pite Teoso nitiri pitxaua, ininiã iteene papaiaõkariko isäkire iõkatsopatakori Teoso apokaerekatinii ikapani. Ininiã !pipëtauaa, kotxi atão poerekari Teoso sãkire iõkatsopatakori apanakinimoni. Teoso sãkire iõkatsopatakori atão inakarinoaka itxa. ¹⁶ Apanakini sãkirauatasaaki, isãkiretarina sãkiretxi Teoso mapokaerekatakiniti. Ikara atoko !pisãkiretape. Kãkiti ikara atoko inakani takanapaãpotari Teoso. ¹⁷ Ninoa oerekakiti sãkiretxiti karõtxi arakakari atoko itxa. Ikara atoko inakari amianari iarikaãpota. Ikara amianari iarikini atoko, ninoa oerekakiti iarikaãpota. Itxikitakari kãkiti maerekati ikamini. Imeneo inakori, Pireto inakori pakini oerekakiti sãkiretxiti ikara atoko itxa. ¹⁸ Ninoa takanapapekari Teoso sãkire atão inakari. Ninoa sãkire: “Teoso õkitikapekana Xesosi sãkire auiaãkani ixinirena auãki inini ikapani. !Õkitikapanina iitona itixi xipokini õti,” itxana. Ikara ninoa sãkire xika, apanakini !auikaikari Xesosi sãkire.

¹⁹ Aapokotxi tsota paikori inakasaaki, itsota iriko pañtanori inakasaaki, iua aapokotxi !irika. Teoso sãkire ikara aãtsota atoko. Auapika. !Ixipoka. Teoso sãkire txari: “Apiananiri imarotari inakitiakori.” Apaka Teoso sãkire txari: “Kãkiti, !Nota Kristo nakiti” inakari takanapariko imaerekani.”

²⁰ Ikini sereti tiitxi aua aapokotxi mitari ãki. Aua apiata karonetakari oro kamakari, pirata kamakori pakini. Apaka aua poião ãki aamina kamakori, kipatxi kamakori pakini. Apanakini tiitxi ãki kaapokori takari nipokori kiiniri ikapani. Apanakini tiitxi ãki itakari nipokori ikiniõtika kãkiti nikini ikapani. ²¹ Ikara tiitxi atoko itxa kãkiti. Kãkiti takanapiniãri imaerekani, tiitxi apiata karonetakari atoko itxa iua. Teoso nirekari iua. Imereëri iua iparika erekari ikamini ikapani. Ininiã kãkiti iua atoko inakani iposope Teoso parika ikamini ikapani.

²² Ätokoripanika pinakasaakiaua, apanakini nirekiniã maerekati pikamini, pimitekako, maerekati pimamakani ikapani. Pinirekariko atão inakarinoaka pikamini ikiniõtika. Pinirekariko Xesosi sãkire iteene pauikini. Pinirekariko iteene katiraõki pinini. !Pinirekapiri neenamati. Ikara atoko kãkiti kaminiã, erekaxinireri. Iua akiritari Apiananiri imoianatiniri ikapani.

²³ Tximótxio, kãkiti txitakakasaakiaua sãkiretxi miikiteti mimaroreti xika, !pikamapiri ikara atoko inakari, kotxi eereka ninoa neenamauata isãkirena xika. ²⁴ Apiananiri nitiri atão inakari ia atoko itxako: “!Itxitari äti. Itiretari ikinimane. Koerekereri erekari itxaua. !Katimari omanãkarauatini. ²⁵ Ötãkikanako isãkire mauikakani momanãkaretika.” Ikara atoko Apiananiri nitiri ininiãua, atxiiti Teoso oerekana isãkire mauikakani atão inakari imarotinina ikapani, imaerekani itakanapinina ikapani. ²⁶ Ininiã iuaãkana kiikitepeka itxana. Teoso sikakana ninoa txikatoro Satanasi takakitiã, kotxi mitxi Satanasi maãkana, iua nireëkiti ikaminina ikapani.

3

Itixi Xipokini Öti Apisa

¹ Tximótxio, pimarotariko ia nisãkire. Itixi xipokini õti apisa pamonõkopaniriko. ² Iuasaaki kãkiti ia atoko inakari: Kapotxinaniri iua. Txineiro tirketakani iua. Isãpiretari iposotiire ikinimanemoni. Iuikaua. Imisãkirepiretari Teoso, kãkiti pakini. !Ikamari iri paniãtakiti. Inoro paniãtakiti apaka !ikama. Äti kamakasaakiri erekari iuamoni, !itxari: “Erekapitikari pikamakiti nota ikapani,” !itxari. !Inirekari Teoso. ³ !Itiretari inirimane. !Ikamari ikamaenetakiti. Imisãkirepiretari äti maxikatiika. !Iposotari erekari ikamini. Paneenamari. Omanatana erekari kamakani. ⁴ Imãkapiritari äti. Ikamakiti ikamini apisa, !ixinikari ikamakiti tũkane. Iuaka ixinikapikaua. Isarauatininokara itireta. !Itiretari Teoso. ⁵ Iua sãkire:

“Nauikari Teoso sākire,” txamari !auikari Teoso posotiire. !Pauikapiri kākiti ikara atoko inakari sākire.

⁶ Kākiti ikara atoko inakari ianapokota sitomoni oaāpokomoni. Sito ikara atoko inakaro miikiteto. Maerekatinoka okama. Oito nireēkiti maerekati onirekapika. Iua ianapokotapika oamoni, ininiā o auikaāpotari iua oerekakiti sākiretxiti. ⁷ Sito ikara atoko inakaro nirekari oimarotiniiri oerekaretxi, txamari !oimarotari oerekaretxi atāo inakari.

⁸ Kitxakapirīka Moisesi Exito tixine auakasaaki, Xani inakori, Xāpiri inakori pakini !inirekari auikiniirina Moisesi sāpiretakiti. Ninoa atokokana kākiti itixi xipokini ōti apisa auakani, !inirekari atāo inakari. Ixinikapikarina maerekatinoka. Teoso !inirekari kākiti ikara atoko inakari, kotxi iua kākiti !auikari Teoso sākire. ⁹ Poiāonoka kākiti auikari ikara atoko inakari sākire, kotxi imarotari miikiteti iua. Iua atokokana kitxakapirīka apanakini imarotari Xani, Xāpiri pakini miikiteni ininiua.

Teoso Nakitiakori Misiritiko

¹⁰ Pitepekana, pimarotapitikari noereēkiti sākiretxiti. Pimarotari nikamakiti ikiniōtika. Pimarotari ninireēkiti nikamini. Pimarotari iteene nauikiniiri Xesosi sākire. Pimarotari nimīteenekiniiri nimisiritiko. Pimarotari nitiretiniiri āti. Pimarotari !katimari nomanākarauatini. ¹¹ Pimarotari nimisiritiko. Pimarotari natatsiirauatini. Pimarotari nimīteenekiniiri nimisiritiko. Ātxiokia sitatxiti nauakasaaki, Ikónio sitatxiti apaka nauakasaaki, Arisitara sitatxiti apaka nauakasaaki. Iteene natatsiirauata, iuaritika Apiananiri makatxakano ikinika nimisiritiko. ¹² Ari, ikininape kākiti nirekiniāri Kristo Xesosi nakiti ininiāua, inirekiniāri Teoso nireēkitinoka ikaminiā, atatsiitariko imisiritiko. ¹³ Iuasaaki maerekati kamakani maerekani, kamisirienererini maerekani, apiaāpotako. Ninoa misirienetari apanakini. Apaka apanakini misirienetana ninoa.

Teoso Sākire Iōkatsopatakori

¹⁴ Pitepekana Tximótxio, pauikapikariko atāo inakari poerekiko. Ikara pauikapitika, kotxi pimarotana pite oerekakani. Pimarotari atāonoka ninoa oerekakiti. ¹⁵ Pite axapitipanika pinakasaaki, pimarotari Teoso sākire iōkatsopatakori. Iua sākire iōkatsopatakori txīkitakaua kimatire anini. Isākire iōkatsopatakori oerekaua Teoso makatxakiniri amaerekani Kristo Xesosi sākire aāuikasaaki. ¹⁶ Teoso oerekana isākire iōkatsopatakani atāonoka iōkatsopatinina, ininiā ikinika Teoso sākire iōkatsopatakori atāonoka. Ininiā apakata Teoso sākire iōkatsopatakori oerekiniua atāo Teoso sākire aāuikini ikapani. Oerekaua ikinipoko Teoso sākire iōkatsopatakori atāo inini. Isākire iōkatsopatakori ōtākikaua amaerekani atakanapini. Oerekaua atāo inakarinoka akamini. ¹⁷ Ininiā kākiti Teoso nakiti imarotiniāri Teoso sākire iōkatsopatakori, iposotari ikinika parīkatxi Teoso paniātakiti ikamini. Erekariparīka.

4

Tximótxio Ōtākikiko

¹ Tximótxio, nōtākikai Teoso apisatoō, Apiananiri Xesosi Kristo apisatoō apaka, kotxi āti ōti Kristo Xesosi kanapiriāksaaki, isāpiretari ikininape kākiti sinimoni. Isākire auīākani sari Teosomoni ikaikotinina ikapani. Isākire mauīākani sari kākiti misiritikomoni ikaikotinina ikapani. Isāpiretari kākiti auapanika inakani, kākiti mitxi ipikani apaka. Xesosi kanapiriā ikininape auīe ininiua ikapani, ininiākara nipaniātai ia: ² Pisāpiretariko Teoso sākire kākitimoni. Iposope pitxako Teoso sākire ikiniōtika pisāpiretini kākitimoni, piito tapara auakasaaki, pisāpakasaaki apaka. Pōtākikanako imaerekani

itakanapinina, erekarinoka ikaminina İkapani. Pisikataparaxiniretanako, Teoso sākire poerekinina. Pisākirauatakasaaki, İkatimari pomanākarauatini. ³ Āti ōti apokako. İuasaaki kākiti İinirekaikari oerekaretxi atāo inakari ikenakotinina. Ninoaka nireēkitinoka inirekana, ininiā apotiīāpotana ninoakata koerekarerini ninoa pōxtitakiti oerekaretxiti oereēkani. ⁴ İnirekaikarinana atāo inakari. Auikarina sākiretxi atāo minakati.

⁵ Pitepekana, ikinika pikamako pūikiteritika. Pimīteenekariko pimisiritiko. Pikamariko piparīka Teoso iokanapirena erekari pisāpiretini kākitimoni ninoau iukiniri İkapani. Teoso nitiri pitxaua, ininiā pikamariko ikinika piparīka Teoso paniātakiti.

⁶ Notapekana, nipinini ōti manapi apokaāpotape. Nipinako Teoso İkapani. Pirātxi Teoso İkapani okiko atokokana, notaka sikauako Teosomoni. Niketo apokapeka itixi nosipikini İkapani. ⁷ Neenamatchi erekari inakari nikamapeka Şatanasi ninaiatini. Miteēkari mitekatxi mapotōkire apokini atokokana, nota apokapeka niparīka mapotōkire. İnitakanapari Xesosi sākire nauikini. ⁸ Uatxa Teoso nīkatari niparīka İki nota kāiatakiti napakapini İkapani. Miteēkari merepanika mitekatxi mapotōkire apokakari apakapari imitekini İki. Apakapari saporieġta. İua atokokana Apiananiri sikanoko niparīka İki, kotxi nota nirekari atāo inakarinoka nikamini. Apiananiri imarotari atāo, ininiā imarotari parīkatxi İki apakapani. İmarotari imisiritiko apakapani apaka. Niparīka İki isikano notamoni uai ikanapiriini ōtisaaki. Na notananini apakapari. Isikari parīkatxi İki ikininapemonei ikanapiriini nirekakanimonei.

Paoro İōkatsopatakiti Mapotōkire

⁹ Piposotiniā, katima pitxako notamoni papokini. ¹⁰ Tēmasi inakori asikapekano, kotxi itiretari Xesosi sākire mauīākani nireēkiti. İsipeka Tesarōnika sitatxitimonei. Kiresētxi inakori sari Karāsia tixinimonei iparīkauatini İkapani. İxito inakori sari Taomāsia tixinimonei iparīkauatini İkapani. ¹¹ Arókasinokara moianatano uatxa. Pakiritariko Marko. Piminari İua pitekata. İua posotari imiparīkatinino, Xesosi sākire nisāpiretakasaaki kākitimonei. ¹² Txikiko inakori nipaniāta Épeso sitatxitimonei isini. ¹³ Tóatxi sitatxiti nauakasaaki, nitakanapari nimāka āti nimāka nopini nitakakiti. Nitakanapari İua nimāka Kapo inakorikata. Pite uai İkasaaki piminariko. Apaka piminariko atatsopari ninakiti aātsopa kamakori. Apia ninirekari pimininiri atatsopari ninakiti aamata kamakori.

¹⁴ Arexātri inakori iteene misiritano. İua Arexātri tiitxi kamakari İua. Tiitxi metao kamakorinoka ikama. İua misiritinino xika, Teoso misiritari İua. ¹⁵ Erepaniko İua. Pamonōkoniri İua, kotxi İua iteene misākirepiretari aōereēkiti sākiretxiti.

¹⁶ Merepitipanika nota apoİtakani anikasaakino auİtetxiakori apisatoō, nisākire ikenakotinina İkapani, na āti nimoianari kaikota notakata İuasaaki. İkinimane nimoianariakori takanapano, İuaritika na ninirekari Teoso misiritinina itakanapinino xika. ¹⁷ Ninoa takanapano, İuaritika Apiananiri kaikota notakata. İua sikataparaxiniretano, ininiā nipoanari Teoso iokanapirena ikinika nisāpiretinina ninoa Xoteo minakanıua ikenakotinirina İkapani. İniniā ākiti namaā takote nauakasaaki, Teoso tokapakeġtano nota. ¹⁸ Nimarotapitikari Apiananiri tokapakeġtapanikano nota ikini sereti maerekati auakasaaki. İua nīkatano. Anikano itixinemonei, İua auİtetxi ininiātaāua. İkinimane ātipirika sāpiretari İua: “Peerekai. Pitenokara erekari.” Ameē.

¹⁹ Pisãpiretana Pirisira inakoro, Ákira inakori pakini nixinikamanapitana. Apaka Onesíporo inakori aapoko auakani nixinikamanapita. ²⁰ Erásito inakori kaikota Koríto sitatxiti. Tópimo inakori nitakanapa Mireto sitatxitiã, kotxi iua amianata.

²¹ Tximótxio, piposotiniã, mitaã apisapanika papokako uaimoni. Eoporo inakori, Porotêtxi inakori, Arino inakori, Karáotxia inakori pakini ikini aítariakorikata iokanapireta pitemoni ixinikamanapitiniina.

²² Apiananiri Xesosi Kristo átipirika kaikota pitekata pãkixinireẽ. Ikinipoko erekari isika pitemoni. Ameẽ.

TXITO

Paoro Iokanatsopatakiti Txitomoni

¹ Nota Paoro. Teoso nitiri amotakori nitxaua. Xesosi Kristo iokanatakiti nitxaua. Iua iokanatanano kăkitimoni Teoso mereekini auiaakiti săkiretxiti nisăpiretini İkapani. Iokanatanano kăkitimoni atăo inakari imarotininina İkapani. Atăo inakari imarotiko oerekaua Teoso nireekiti akamini İkapani. ² Aăuikari aăuapiniika anini Teosokata, kotxi kitxakapirika itixi kamiko apisa Teoso kamaenetari ikara. Ininiă apokapitikako, kotxi atăonoka iua săkire. İposotari atăo minakati isăpiretini. ³ İketotiniri manapi oerekari isăkire. Isăkire săpiretakani săpiretari isăkire. Ininiă Teoso săkire notamoni isikakiti nisăpiretai, kotxi Teoso amaerekani makatxakakari paniătano nota nisăpiretiniri isăkire.

⁴ Niokanatsopata pite Txitomoni. Namarite atăo inakari atoko pitxaua, kotxi pite auikari Xesosi săkire nota auikiniri atoktxikana. Airi Teoso, aăuıte Xesosi Kristo amaerekani makatxakakari pakini, sikari ikinipoko erekari pitemoni. Ninoa iamoniakai. Ikamaerekaxiniretaina.

Kôtăkikarerini

⁵ Nitakanapai pite Kreta pokomiriıti, kotxi aparika iuaatăa kona xipokapanika, ininiă ninirekari pite kaminiri ikara parıkatxi. Pimereena kôtăkikarerini ikini sitatxtiă Teoso săkire auiaakani ôtăkikakani tıkane. Pimereena mitxi nisăpiretakiti iaôka. ⁶ İa atoko inakari kăkiti pimereê kôtăkikarerini İkapani: Iua kamari erekari, ininiă maerekati auakasaaki, kona iua xikani maerekati apoka. Atonokara İtanoro aua. İmiakori auikari Xesosi săkire. Ninoa İneenamauata. İkamarina iri paniătakiti iaôka.

⁷ Teoso sikari iparika kôtăkikarerimoni ikamini İkapani, ininiă kôtăkikarerini kamari erekarinoka. Maerekati auakasaaki, kona iua xikani maerekati apoka. İluikaua. İKatimari omanăkarauatini. İPoăta. Kona kaneenamari. İtiretaro txineiro. ⁸ Kôtăkikarerini atăo inakari potxitari apakapiniri kăkiti iua aapoko aiki. İpotxitari kăkiti erekari kamakani. İKatima omanăkarauatini. Erekarinoka ikama. İkamari maerekati. Erekarini imarotakiti İtakanapari ikamini. ⁹ Kôtăkikarerini atăo inakari oerekaăkapeka Teoso săkire. İmarotari Teoso kaminiri isăkire iaôka, ininiă iteene inıkatari Teoso săkire. İImamakari Teoso săkire. Ininiăkara imarotari ôtăkikiniri apanakini. İteene imarotari Teoso săkire, ininiă imarotari oerekiniri apanakini Teoso săkire manirekakani, Teoso săkire auikinina İkapani.

Erepaniko, Atăo Minakati Oerekakani

¹⁰ Kaiăopokori kăkiti kona nirekari Teoso nireekiti ikaminina. Maxikatiika isăkirauatapika. Kamisirienererini ninoa. İkara atoko inakani nirekari Teoso takaôttxikare Xoteo minakanıua İtoă auini. ¹¹ Matxıkitakari ninoa İotokakiniri atăo minakati isăpiretinina, kotxi kăkiti aapoko aiki auakani naiatakakaua ninoa oerekakiti săkiretxiti xika. İApakata ninoa oerekakiti săkiretxiti. İuaritika ninoa oerekari atăo minakati, txineiro apakapinina İkapani. ¹² Ninoa atokirinı kitxakapirika, koerekari, uai Kreta pokomiriıti auakarini, txari: “Kreta auakani aıtipirika misirienetari kăkiti. Maerekati kamakani itxaua. Kaneenamari İtopa auakari atoko ikamana. İarinouatana. Paixonina,” itxa iua.

¹³ Isăpiretakiti atăopitikara. Ininiă pitaparaxinireritika pipinitana ninoa imasăpiretakanirina ikara atăo minakati, Xesosi săkire atăo auikinina İkapani. ¹⁴ Ininiă pisăpiretana: “İHimaăkatapiriko Xoteoakori kiomaneakorini săkire atăo minakati. İHimaăkatapena atăo inakari manirekaăkani paniătakiti.”

15 Kākiti Teoso kamaerekatakiti, ikamakiti erekari. Ikinipoko ikamakiti erekari, kotxi Teoso makatxakapekari imaerekani. Kākiti imaerekani auapanika inakari, Teoso sākire iaōka makamakati, ikinipoko ikamakiti aua imaerekani. Imaerekani txikotari ixinikakiti. Imaerekani txikotari iua ākixinire, ininiā ākixinire !ōtākikari iua maerekati imakamakani ikapani. 16 Ninoa txa: “Ate imarotari Teoso,” txamari ikamarina Teoso manirekakiniti, ininiā !imarotarina Teoso. !Inirekarina Teoso. Arakakani atoko itxana, maerekati ikamatitina xika. !Ikamarina Teoso nireēkiti, ininiā !iposotarina erekari ikaminina.

2

Txito Ōtākikiko

1 Ininiā poerekariko ikinika atāo inakari Teoso oerekiko sākiretxiti.

Kiki Aneēkani Ōtākikiko

2 Ia atoko pōtākikana kiki aneēkani: “Hixinikariko hīkamakiti tīkane hīkaminiri apisapanika. Erekarī hīkamako apanakini paxitinii ikapani. Kona hīkamaipiri hīto nireēkiti. Iteene himarotariko hāuiākiti. Iteene hītiraōkiuatako. Katima omanākarauataka !hītuxe.” Ikara atoko pōtākikana kiki aneēkani.

Sito Aneēkani Ōtākikiko

3 Ia atoko pōtākikana sito aneēkani: “Hīkamariko Teoso pīkakani kamakiti atoko. Maxikatīka !hāpoītapiri āti. Kona iteene hīatapiri iāriā kapoāro. Erekarinoka hōerekako.” Ikara atoko pōtākikana ninoa. 4 Apaka pōtākikana sito aneēkani ōtākikinina ātokoroakoro ia atoko: “Hītiretanako hītaniri, hamariteakori pakini. 5 Kona hīkīpitapiri hīto paniātakiti. Erekarinānira hīkamako. Hīkamariko hīparīka haāpoko āki. Erekarī hīkamako apanakini ikapani. Hītaniri nireēkiti hīkamako, ininiā iuasaaki Teoso sākire mauīākani !imisākirepiretari Teoso sākire.” Ikara atoko sito aneēkani oerekanako ātokoroakoro.

Ātokoriakori Ōtākikiko

6 Ininiā iua atokokana pōtākikana ātokoriakori ia atoko: “!Apakata hīkaminiri hīto nireēkiti.”

Txito Ōtākikiko

7 Txito, ikini pikamakiti pikamako kākiti erekari kamiko imarotini ikapani. Poerekarauatakasaaki, poerekari kākiti pitiretiniri atāo inakari sākiretxitinoka. Poerekanako Teoso sākirenoka apiari inini. Poerekarauatakasaaki, poerekariko kākiti pimakoketakaniri atāo minakati pisākirekata. 8 Poerekariko atāo inakarinoka, ininiā !auari papoītiko, kotxi !pikerokari pisākire. Ikara atoko ininiā, pimokaiakarini pētauata, kotxi !iposotarina imisākirepiretinii.

Nitiritxi Amotakoni Ōtākikiko

9 Ia atoko poerekanako nitiritxi amotakoni: “Hīkīpitariko hīpatrāote sākire. Hīkamariko hīpatrāote apokaerekakitinoka. Kapakapaenere !hītuxe. 10 !Hīitirīkapiri hīpatrāote tū. Hōerekariko hīpatrāote pisākire atāo inini. Ininiā hīpatrāote nirekarī imarotininirina Teoso oerekiko, amaerekani makatxakakari oerekiko.”

Ikinipoko Erekarī Teoso Sikakiti

11 Ikinimanemoni Teoso oerekapekari erekari isikakiti kākiti maerekani imaktxakini. 12 Teoso sikakiti erekari oerekaua atakanapiniri Teoso manirekakiniti. Teoso sikakiti erekari oerekaua amanirekakaniri ikorapokoriti auakani ito nireēkiti. Teoso sikakiti erekari oerekaua aīto

paniätakiti atakanapini, atão inakarinoka akamini, Teoso nireëkiti akamini Ìkorapokoriti aãuakasaaki. ¹³ Ìkorapokoriti aãuakasaaki, aiätapari poxokonitxi òti Apiananiri aTeosone apokini òti. Iuasaaki Xesosi Kristo, amaerekani makatxakakari, motika atemoni. ¹⁴ Iuaka sikaua Teosomoni ate Ìkapani ipìkasaaki. Iuasaaki ìikitxitari Teoso, ininiã Teoso makatxakaua ikinika maerekanitxi sauaki. Ikara atoko ininiã, ikamaerekataua ate. Ininiã itxìkitakaua inakitiakori aniniua, ininiã anirekari erekari akamini.

¹⁵ Auítetxi pininiua atoko pipaniätariko kãkiti kípitiniri ikara nisãpiretakiti. Põtãkikana nisãkire makípitanani. Kona paupiritapiri kãkiti sãpiretiniri pisãkire atão minakati inini.

3

Teoso Nireëkiti Kamiko

¹ Txito, ia atoko poerekariko kãkiti: “Hìpaxitariko Ìkorapokoriti auítetxiakori paniätakiti, poiãori auítetxiakori paniätakiti apaka. Iposope hìtxako ikinika erekari hìkamini. ² Kona himisãkirepiretapiri apanakini. !Hineenamauatape. Merepanika hìxinikariko apanakini, eereka hìteka hìxinika. Hõerekariko kãkiti, hìxinireë hinirekiniri erekari hìkamini ikinimanemoni.” Ikara atoko poerekana.

³ Teoso aimarotini apisapanika mükiteni atxaua. Kona akípitari kãkiti sãkire, Teoso sãkire apaka. Iuasaaki ate misirienetaãka. Iuasaaki akamari aãto nireëkitinoka. Ìkini sereti maerekati akama apoxokoniuatini Ìkapani. Iuasaaki ikiniõtika axinikari maerekati akamini. !Apakata akamakiti. Kaxikorerini atxaua iuasaaki. Ate omanataãka. Apaka ate omanatari apanakini iuasaaki.

⁴ Ininiã eereka Teoso tiraõki, amaerekani makatxakakari tiraõki, iua amonìkare, apoka atemoni. ⁵ Ateka parìka erekari !imakatxakari amaerekani. Iua amonìkarenokara makatxakari amaerekani. Iuasaaki na atão akama, iuaritika imakatxakari amaerekani, kotxi itiretaua. Iuasaaki iua arokari aãkixinire. Itxìkitakaua ate aponaniini iuaìkana. Iuasaaki Erekari Matamatakoti kamari ikinika amaneri axinireë. ⁶ Teoso iokanatari Erekari Matamatakoti kaposotiireri atemoni, kotxi Xesosi Kristo, amaerekani makatxakakari, ipina ate Ìkapani. ⁷ Iua sikari ikinipoko erekari atemoni, ininiã ikamaerekataua. Ininiã itxìkitakaua Teoso anaakori aniniua, ininiã aãpakapariko ipotetakiti ate Ìkapani. Iua atoko ininiã, aiätapari ätipirika Teosokata aãuini Ìkapani. ⁸ Atãopitikara ia nisãpiretakiti.

Ininiã ninirekari ätipirika pisãpiretiniri ikinika nisãpiretakiti Teoso sãkire auiãkanimoni. Ikara atoko Teoso auiãkani itaparaxinireritika kamariko erekari apanakini Ìkapani. Kona maxikatitika ikamarina erekari. Teoso atão ìkitxitariko kãkiti. Ikara atoko kãkiti kaminiã, ininiã erekari ikinimane Ìkapani.

⁹ Kona pimaãkatapiri mükiteti sãkire. !Hìtaparakienatakakapeua kitxakapirìkarini uãka xika. Kona himaãkatapenako kãkiti kiomãtxiakori oerekakiti xika tsoatakani. Ikara sãkiretxiti !itxìkitakai erekari hininiua. !Itxa ikara sãkiretxiti.

¹⁰ Kãkiti oerekiniãri atão minakati Teoso manirekakiniti, põtãkikari iua ipikata. Iposo atoko !pimaãkataakari. ¹¹ Ikara atoko inakari atão ìkite !auari. Maerekati ikama. Ikamakiti oerekari apanakini, maerekati kamakari ininiua. Iuaka imaerekani xika imisiritiko apokako.

Paoro Sãpiretakiti Mapotõkire

¹² Niokanatari Atemasi inakori, atxiiti Txìkiko inakori apaka pitemoni. Ninoa apokasaaki, paiamata pisini Ìkapani, katimari notamoni Nikópori sitatxitiã hãpokini Ìkapani. Ninirekari ia mitaãti nikaikotini iuaã.

¹³ Pimoianatari Sena inakori, Aporo inakori pakini. Auñtetxiakori paniãtakiti imarotakari iua Sena. Pimoianatanako ninoa aiamatini. Iamonitakitina pisikanako. ¹⁴ Aĩtariakori Xesosi sãkire auiãkani apaiaõkariko erekari ikaminina, kãkiti minakati mauakiniti imoianatinina ĩkapani. Makamaretika hinini !apakata.

¹⁵ Notakata auakani xinikapikai pite. Pisãpiretanako ate tiretakani ereẽ Xesosi sãkire auiãkani nixinikãmanãpitana ninoa.

Ikĩnika erekari Teoso sikai hĩte hĩkinika. Ikara atoko niõkatsopata pitemoni. Ameẽ.

PIREMÕ

Paoro Iokanatsopatakiti Piremõmoni

¹ Nota Paoro. Kateia äki naua, Kristo Xesosi säkire nauikini xika. Nota, aĩtari Tximótxiokata aiokanatsopata pitemoni Piremõmoni. Ate iteene tiretai pite. Atekata parĩkauatakarı pitxaua. ² Aiokanapireta Xesosi säkire auĩäkaniimoni, paapoko apotiitakanimoni. Aiokanapireta aĩtaro Ápıamoni, Akıpo pakinimoni. Iua Akıpo Xesosi sotatone itxaua, ate Xesosi sotatone atokotxıkana.

³ Aĩri Teoso, Xesosi Kristo Apıananiri pakini sikai ikinipoko erekari. Ika-maerekaxıniretaina.

Piremõ Tıraõkiuatini Pirena

⁴ Nıtari Piremõ, Teoso nimisäkıretakasaaki, ätipirika nisäkırauata pite İkapani. Nısäpiretari Teoso ereka inini, kotxi iua kamaerekatai pite. ⁵ İkara atoko itxa nisäkıre, kotxi nıkenakopıretari iteene pauıkiniri Apıananiri Xesosi säkire. Nıkenakopıretari ikinımane käkıti Teoso nakıtiakori pitıretini. ⁶ Nımisäkıretari Teoso pite İkapani, kotxi nınırekari pisäpiretiniri pauĩäkıti säkıretxıti ikınıõtika apanakinimoni, inınıäkara pımarotari ikını sereti erekari Teoso sıäkıti Kristo nakıtiakorımoni. ⁷ Ate poxokonuata, kotxi pite tiretana käkıti Teoso nakıtiakori. Pitıraõki iteene sıkataparaxıniretaua ate. Pite aĩtari kamapoxokonıtana Teoso nakıtiakori äkixınıre.

Paoro Amanääkıtı Säkıretxıtı

⁸ Kristo sıkaposotııretano, inınıä nitapararıtıka nıposotapıtıkarı nıpanıätınıı atäo inakari pikamını. ⁹ İuarıtıka nitapararıtıka na nıpanıätai atäo inakari pikamını. Nõtäkıkai Kristo tıraõkiä pikamınırı atäo inakari. Nota Paoro kıomätxıpekanı. Kateia äki nauanäta, Kristo Xesosi säkire nauıkinı xıka. Notakara ötäkıkai pite atäo pikamını. ¹⁰ Nota amanaäı pınıtırı Onésımo inakori pıamonıkıni İkapanı. Namarıte atoko inakari iua, kotxi iua kıpıtari nisäkıre uai kateia äki nauakasaaki. Uatxa iua auıkarı Xesosi säkire. ¹¹ Nımarotari İuäka poparıkarı uäka itxaua. Mıtxı İparıkauata, pıtekata auakasaaki. Paıarınırı. Uatxa poparıkarı itxapekaua İuäka atokokana. Uatxa İparıkauatapıtıkako pite İkapanı, nota İkapanı İparıkauatını atokokana.

¹² Nıokanatarıko Onésımo, İkanapırıını pıtemoni. Inınıä papakaparıko iua. Nıtıretari iua nota nııto nıtıretını atokokana. ¹³ Nınırekamari notakata uai İkaıkotını, nota İmoıanatını İkapanı, kotxi pite kona posotari pımoıanatınıno uai kateia äki nauakasaaki, kotxi pite auını maıoakari. Nota uai aua Teoso İokanapırena erekari nısäpiretını xıka. ¹⁴ Nınırekamari Onésımo uai, txamari !nınırekari nıkamınırı pite mauırtıkınıtı. !Nınırekari nitapararıtıka nıpanıätınıı pauırtınırı Onésımo notakata İkaıkotını. Pite nırekınıäri, İmoıanatanı.

¹⁵ Akokaxıtı Onésımo mıteka. Mapakananı İtakanapai. Atxııti Teoso auırtarı poläoka İtakanapını, ätipırıka pıtekata İuäıkana İkaıkotını İkapanı. ¹⁶ İua pınıtırı pıamotakıtı İtxapanıka. Uatxa apıaerekata İua. Pıtari pıtıretakıtı İtxapekaua, kotxi İua auıkarı Kristo säkire. İteene nota tıretarı İua. Pıte apıa tıretarıko İua, kotxi İua pınıtırı İtxaua. Apaka İua pıtari İtxaua, kotxi Apıananırı nakıtı hıtxaua.

¹⁷ Nota pımoıanarı nınınıäua, nota papakapını atokokana pıtıxarıko papakapınırı İua. ¹⁸ Akokaxıtı maerekatı İkamınıä, İtırıuatınıä, pisäpiretano. Nota İkıtxıtıaıko. ¹⁹ Nota Paoro, uatxa nıuakoä nıõkatsopatarı İa säkıretxıtı.

Notakarako ĩkitxitai pite. Pite imarotari pite xinire auāki inini, kotxi notara akokaxiti nisāpiretai Xesosi sākire pauikini ĩkapani. Ininiā atxiīti erekape pite ĩkitxitinino nota? ²⁰ Ininiākara nitari, pikaminano ninirekakiti, kotxi Api-ananiri nakitiakori atxaua. Pikamapoxokonitariko nākixinire, kotxi Kristo nakitiakori atxaua. ²¹ Niōkatsopatari pite ĩkapani, kotxi nimarotapitikari pikaminiri namanaākiti. Ari, nimarotari apiata pikaminano.

²² Apikomoni nitxai. Poeretari ereē nimakiniātaā ĩkapani. Hīte misākiretapekari Teoso kateia nitakanapini ĩkapani, ininiā nimarotari Teoso auiritano iuaīkana nikanapiriini hītemoni.

Itakapiretanapini Pirena

²³ Epápara inakori notakata kateia āki aua, kotxi iua parīkauata Kristo Xesosi ĩkapani. Iua xinikamanapitai hīte. ²⁴ Markoma, Arisitakoma, Témasima, Arókasima pakini notakata parīkauatakani, ninoa apaka xinikamanapitai hīte.

²⁵ Aāuīte Xesosi Kristo sikari ikinipoko erekari hākixiniremoni. Ameē.

EPIREO

Teoso Ākiri Apiatini Pirena

¹ Teoso kitxakapirīka sāpiretari isākire kaiāokataikani, isākire sāpiretakanimoni. Ininiā ninoa sāpiretana aātokiriakorini Teoso sāpiretakiti. Kiriāpa Teoso misākiretana ninoa? Kaiāopokoriā imisākiretana ninoa: Itaponeēna, ixinireēna, isākire iōkatsopatakoriā, initiri itixine auakari sākireē, txaāpota imisākiretinina ninoa.

² Uatxa ikorasaaki, Teoso misākiretaua iua ākiri sākireē. Teoso mereēri iua ākiri ikinipoko apakapini ikapani. Teoso ākiri kamari ikinipoko. Ikamari itixi, ikinipoko iaxiti apiko nopinixiti auakari apaka. ³ Iua iotximere Teoso iotximeretxikana. Teosotxikana iua. Kaposotiireri iua, kotxi isākireēnoka imaikari imakinika auini ikapani. Iuanokara makatzakari amaerekani. Amaerekani imakatzakasaaki, iusaaki iitopāka ikinimane auite Teoso kikomoni itixineē.

Teoso Ākiri Apiata, Initiriakori Poiāoka

⁴ Ininiā Teoso ākiri iteene apiaerekata. Apiananiri iua. Teoso nitiriakori iaxitikini poiāorini. Teoso mereēri iuāka apiari. Ninoa uāka poiāorini itx-auana.

⁵ Teoso !isāpiretari initiriakori ia isākire kitxakapirīkari: Pite nota ākiri pitxaua. Uatxa pite iri nitxaua nota, !itxa initiriakorimoni.

Apaka Teoso !isāpiretana ninoa ia isākire kitxakapirīkari: Nota iua iri nitxauako. Iua nota amarite itxauako, !itxa initiriakori itixine auakanimoni.

⁶ Ātipekana. Teoso mīkasaakiri iua ākiri imatonōkari ikorapokoritimoni, iponaniini ikapani, iusaaki Teoso txari initiriakori: Ninitiriakori, hīkapotoreēkauako iua apisatoō. Hīteesonetariko iua, itxa. Ikara atoko Teoso paniātari initiriakori.

⁷ Teoso sākire iōkatsopatakori, initiriakori pirena txari: Itxīkitakana initiriakori matamatakoni ininiuana, itima atoko ininiuana.

Xamina tirinakari atoko itxauana ninoa, kotxi kaposotiirerini ninoa, itxa. ⁸ Iua amaritemoni Teoso txari: Teoso pitxaua. !Ixipoka auītetxi pininiāua. Ātipirika pite atāo mīkiikari pite auītetakani.

⁹ Pite tiretari atāo inakari. Pomanatari maerekati. Ikara atoko ininiā, nota piTeosone mereēi pite apiari pininiua ikapani, pimoianariakori poiāorini ininiuana ikapani, kotxi apiata nikamapoxokonitai pite. Iitxiā nimereēkiti nopini nitakini atokokana, nitakari poxokonitxi pite nopini. Nimereēi pite auītetxi pininiāua.

Ikara atoko itxa Teoso kitxakapirīka. ¹⁰ Iuaikana Teoso sākire iōkatsopatakori txari:

Apiananiri, merepitipanika pite kamari itixi. Apaka pikamari iaxiti pi-uakoā.

¹¹ Ikorapokoriti, iaxiti pakini xipokapitikako. Iuaritika pite auapanika. Mākatxi kitxakariāpotakari atoko itxa ikinika.

¹² Mākatxi atoko piapirikariko iaxiti, itixi pakini. Ininiā ipinimoni itxako. Iuaritika pite mitxi atoko pitxapikako. !Pixipoka.

Itxa Teoso sākire.

¹³ Teoso txari imi:

Nota kikomoni piitopākiniritika nixipokariko pimokaiakariakori. Nika-mariko ninoa pikiti pitakiniātaā atoko ininiua. Ikara atoko !itxari initiriakori iaxitikini.

¹⁴ Ininiā kipa Teoso nitiriakori iaxitikini? Ninoa erekari matamatakoni. Iparīkauatana Teoso ikapani. Teoso iokanatana ninoa imoianatinirina kākiti iua sākire auiākani, kotxi Teoso makatzakari ninoa kākiti maerekani.

2

Erepaniko

¹ Ininiā iteene mamixinikari ikinika atāo sākiretxiti mitxi akenakotakiti. Amakamakaniāri ikara atoko, kanaua tiokaāpotakari atoko atxaua. Ininiā iuasaaki !aimarotaikari atāo. Maxinikari atāo inakari. ² Kitxakapirīka Teoso nitiriakori iaxitikini sāpiretari atāo inakari ate apiko atokiriakorimoni. Kākiti makamakaniāri ninoa paniātakiti, ininiā ninoa kākiti apakapari Teoso misirikare. Atāo ninoa apakapiniri imisiritikona. ³ Ininiā uatxa amitekini !auari, amanirekaniāri amaerekani makatzakiko. Peerekari Teoso makatzakiniri kākiti maerekani. Merepitipanika Apiananiri sāpiretari ikara maerekanitxi makatzakiko. Iua sākire kenakotakani apaka sāpiretaua ate iua sāpiretakiti atokotxikana. ⁴ Teoso apaka oerekaua ninoa sākire atāo inini, kotxi oerekari itakaōtxikare. Ikamari kākiti mimarotakinini. Ikamari ikini sereti posotiiretxi. Erekari Matamatakoti siākiti isika inirekakinimoni. Kākiti isika inirekaka iaōka. Ikara atoko Teoso oerekaua ninoa sākire atāo inini.

Xesosi Kākiti Atoko Itxa

⁵ Teoso litxīkitakana initiriakori iaxitikini itixi amaneriā auakani auiteakori ininiuana. Iua itixi amaneri ikari asāpiretai hūte. ⁶ Kitxakapirīka Teoso sākire iōkatsopatakori Xikari oitoātaā txari:

Kipa kākiti? Kinirepa pite xinikana ninoa? Ate minakati. Kinirepa aītari iaxitikiri maākatatari kākiti?

⁷ Mapakanani pikamari kākiti itari iaxitikiri poiāori ininiāua. Iuasaaki pinitiriakori iaxitikini apiatakani txaua. Ēreka pitxīkitakari iua auītetxi ininiua. Pitxīkitakari iua kaiotximereri ininiua. Pitxīkitakari ikinimane paxitiniri iua. Pitxīkitakari iua ikinipoko auīte ininiua.

⁸ Pitxīkitakari ikinimane kaminiri iua paniātakiti. !Auari ātika iua paniātakiti makamakati.

Ikara atoko Teoso sāpiretaua ate itxīkitakiniri ikinipoko auītetiniri iua. !Auari ātika iua maaūītetakati. Txamari kona ate atamatapanikari iua ikinipoko auīte ininiua. ⁹ Iuapitikara aātamatakiti Xesosi. Mapakananinoka Teoso txīkitakari iua poiāori ininiua. Iuasaaki Teoso nitiriakori iaxitikini apiata. Teoso txīkitakari iua poiāori ininiua, kotxi iuasaaki Xesosi atatsiirauata. Iuasaaki ipina. Uatxa Teoso txīkitakari iua auītetxi ininiua. Itxīkitakari iua kaiotximereri ininiua. Itxīkitakari ikinimane paxitiniri iua. Teoso kamari ikara atoko inakari, kotxi Xesosi ipina kākiti mapinakani ikapani. Iuasaaki Teoso oerekari ikinipoko erekari isikini kākitimoni.

¹⁰ Ikinika Teoso nakiti. Ikinika iua kamakiti. Apakata iua txīkitakiniri kākiti maerekani makatzakakari atatsiirauatini, kotxi iuasaaki iposope kākiti maerekani makatzakiko, kotxi iuasaaki Xesosi kamari ikinipoko iri paniātakiti. Ininiākara Teoso anikari iua anaakori iotximere auiniātaā. Kaiāori ninoa. ¹¹ Kākiti kamaerekatakari iritxikana iua kamaerekatakini iri. Ikara atoko ininiā, Xesosi !ipētatari iua itiriakori akiritiniua ate. ¹² Itxari Teosomoni:

Nisāpiretariko piuāka nitariakorimoni. Pitemoni apotiitakanuia sauaki nixikaretari ereka pinini.

¹³ Iuaĩkana kitxakapirĩka Teoso sãkire iõkatsopatakori txari: Nauikariko Teoso sãkire.

Iuaĩkana Xesosi txari Teoso:

Uai nota aua pamariteakorikata. Pite sikana ninoa notamoni. itxa.

¹⁴ Kaĩtori Teoso anaakori. Ninoa aua ixini, iarẽka pakini. Ininiã kaĩtopekari Xesosi ninoa atokokana. Ininiã ipĩkasaaki ixipokari ipĩkitxi posotiire auakiti. Satanasi inakori iua. ¹⁵ Ikara atoko inakasaaki, isikakari kãkiti ipĩkitxi pĩkakani. Mitxi ninoa iaxirikakoni atoko itxana. ¹⁶ Aimarotari, iusaaki !moianatana initiriakori iaxitikini. Iusaaki imoianatana Apraõ apika mekaniriakori. ¹⁷ Ikara atoko ininiã, Xesosi txĩkitakaãka itariakori atokokana ininiua, ininiã iposotari sasetotxi auite apiatakari ininiua kãkiti ikapani. Iparĩkauatakasaaki Teoso ikapani, ikamari ikinipoko ikamaenetakiti. Maerekati kamakani kãkiti, iuaritika iamoniakari kãkiti. Kãkiti itxapekua Xesosi, ininiã iua ipina kãkiti maerekani imaktxakini ikapani, iuaĩkana kãkiti imikanapiriini Teosomoni ikapani. ¹⁸ İkorapokoriti Xesosi auakasaaki, imarotari Satanasi atamakaerekatini iua. Ininiã Satanasi atamakaerekatakasaakina kãkiti, iua posotari isikataparatinina ninoa.

3

Xesosi Apiatakari, Moisesi Poiãori

¹ Ininiã nitariakori, Teoso mereẽkini, hĩte akiritaãka Teoso tixine hãuini ikapani. Iteene hĩxinikariko Kristo Xesosi, kotxi iua Teoso iokanatakiti itxaua. Apaka iua sasetotxi auite apiatakari itxaua. Iuara asãpiretari apanakini.

² Moisesi kamari ikinika Teoso paniãtakiti inirimane apisatoõ, Teoso aapoko aamata kamakori ikamakasaaki. Iua atokokana Xesosi kamari ikinika iua mereẽkari paniãtakiti. ³ Apiaerekata Xesosi, ininiã iua apakapari apiata ipaxitiko, Moisesi poiã, kotxi aapokotxi kamakari apakapari apiata ipaxitiko. Poiã aapokotxi paxitiko aua. Iua atokokana, Xesosi aapokotxi kamakari atoko itxaua. Moisesi aapokotxi atoko itxaua. ⁴ İkinika kãkiti aapokona kamakani auapitika, iuaritika Teoso ikinipoko kamakari itxaua. ⁵ Moisesi Teoso nitiri itxaua. Iua ãtipirika kamari ikinipoko Teoso nirekakiti inirimane apisatoõ. Ikara erekari ikamakiti oerekari Teoso sãkire iua sãpiretakiti atã inini.

⁶ Kristo Teoso ãkiri itxaua. Iua ãtipirika kamari ikinipoko Teoso paniãtakiti Teoso aapoko inĩkatini. Teoso aapoko atoko atxaua ate, iteene aũikiniãri iua sãkire, apoxokoniritika ãtipirika aĩãtapiniãri Xesosi kanapiriini õti.

Erepaniko, !Hĩtakanapapiri Hãuikakiti

⁷ Ininiã Erekarı Matamatakoti txari:

Uatxa õti hĩkenakotakasaakiri nisãkire,

⁸ kona hĩkamapiriko hĩxinire paikori inini hãtokiriakorini atoko hinini. ãparaã makipakaniãtaã auakasaakina, iuaã ninoa !auikari nota sãkire. ! İkamarina nipaniãtakiti. Iusaaki ninoa ataerekatapikano nota.

⁹ Koarẽtakanani, ikiniõtika hĩte apika atokiriakori ataerekatapikano nota. Ninoa atamatarı nıposotiire. Txamari ikiniõtika ninoa ataerekatano nota. !Auikarina nisãkire.

¹⁰ Ikara xika nomanatana ninoa. Iusaaki nitxa: “ãtipirika ninoa sapika apanakini sãkire tikini. !Imarotarına nıxinikakiti, nikamakiti pakini.”

¹¹ Nomanatakasaakina ninoa imaerekanına xika, iusaaki nitxako: “Atã nisãpiretana ninoa. Ninoa maĩroãpekanııkarako nikamakiti tomatikoãtaã,”

itxa Erekarı Matamatakoti.

¹² Ininiã nitariakori, erepaniko. Atxiiti âtikaka hïte aua hïxinire maerekati mauikareti. Ikara atoko inakasaaki, hïtakanapapekari Teoso âtipirika auâki inakari, maerekati tikini hïsini ïkapani.

¹³ Ininiã ikiniõtika hïkamataraxiniretakauako. Uatxapanika inakasaaki hõtâkikakauako. Ininiã maerekani txi kona misirienetai. !Ikamari kaikoxinire hinini. ¹⁴ Aãuini mapotökire manapi iteene aãukiniãri Kristo sãkire merepiti-panika aãukiniri atokotxikana, atão iuakata parïkauatakani atxaua. ¹⁵ Uatxa nisãpiretai kitxakapirïka iökatsopatakiti:

Uatxa ia õti hïkenakotakasaakiri iua sãkire, kona hïkamapiriko hïxinire paikori inini, hãtokiriakorini atoko hinini, âparaã makipakaniãtaã auakasaakina. Ninoa !auikari nota sãkire.

¹⁶ Ninoa kenakotari Teoso sãkire, txamari ! inirekarina ikaminirina isãkire iaõka. Kipa ninoa? Exito tixini Moisesi makatzakakinira ninoa. ¹⁷ Kikãkiritipa kamari Teoso naiatinuia koarëtakanani? Ninoa maerekati kamakani. Ikara xika ninoa ipïpeka âparaã makipakaniãtaã. ¹⁸ Kirimonipa Teoso txari ia? “Atão nisãpiretai hïte. Kona himaïroãpekaniiarako nikamakiti tomatikoãtaã.” Teoso sãpiretari ikara iua sãkire mauikakanimoni. ¹⁹ Ininiã aimarotari, ninoa !ïroã iuaã, Teoso sãkire imauikakanina xika.

4

Tomatikoãtaã Aua Teoso Nakitiakori ïkapani

¹ Auapitika Teoso kamaenetakiti kãkiti tomatiniãtaã Teoso kamakiti aïroini tïkane, ininiã erepaniko. Atão inakari hïkamako iuaã hiïroini ïkapani. ² Teoso iokanapirena erekari sãpiretaãka atemoni, kitxakapirïka Moisesi auakasaaki auakanimoni apaka. Txamari maxikatïka ninoa kenakotari Teoso sãkire, kotxi ninoa !auikari ikenakotakitina. ³ Ate, Teoso sãkire auïãkanuia, ïroã ikara Teoso kamakiti tomatikoãtaã. Ininiã Teoso sãpiretakiti iaõka auapeka. Ia atoko Teoso txari:

Nomanatakasaakina ninoa imaerekanina xika, iusaaki nitxako: “Atão nisãpiretana ninoa. Ninoa maïroãpekaniiarako nikamakiti tomatikoãtaã,”

itxa Teoso. Ikara atoko itxama, iuaritika ikara tomatikoãtaã iposope iparïka ixipokasaaki, itixi ikamakasaaki. Ikara atoko ikama ate ïkapani. ⁴ Teoso sãkire iökatsopatakori sãpiretari itomatini õti pirena. Itxari:

Iparïkauata seisi õti, ininiã eereka apikomoni âti õti inakasaaki itomata. Iusaaki itakanapari ikinika iparïka,

itxa Teoso sãkire iökatsopatakori. ⁵ Teoso sãkire iökatsopatakori txari: Ninoa maïroãpekaniiarako nikamakiti tomatikoãtaã.

⁶ Iuaritika apanakini ïroãpanikako iua tomatikoãtaã. Txama apanakini kitxakapirïka auakani ! ïroã. Ninoa merepitiapanika sãpiretaãka Teoso iokanapirena erekari, txamari !ïroãna, kotxi !ikamarina Teoso paniãtakiti.

⁷ Ininiã Teoso kamari iketo õti apanakini iuaãtaã apokini ïkapani. Iusaaki Teoso akiritari iketo õti “uatxa.” Ikara atoko Teoso misãkiretari Tavii: Uatxa õti hïkenakotiniãri nisãkire, ininiã kona hïkamapiriko hïxinire paikori inini.

⁸ Aãtokiri kitxakapirïka auakari Xosoe inakori, iuara anikari kãkiti itixi Teoso sikaenetakitimoni. Txamari !ïroãna atão inakari tomatikoãtaã Teoso sikakiti, kotxi eereka Teoso sãpiretari âti õti tomatikoãtaã ïroïko õti. ⁹ Ikara atoko ininiã, auapanikako Teoso kamakiti tomatikoãtaã inakitiakori ïkapani.

¹⁰ Ininiã kãkiti ïroãkasaaki Teoso kamakiti tomatikoãtaã, iotokakari iparïka, Teoso iparïka iotokakini atokokana. ¹¹ Ininiã nitariakori makamariko ikinika atão inakari iua tomatikoãtaã aïroini ïkapani. Erepaniko, kotxi

apanakini !İroã, Teoso sãkire imauikakanina xika. Ininiã !hĩkamapiri ninoa kamakiti atokokana.

¹² Teoso sãkire kaposotiireri. Isãkire auãki itxapika, kotxi Teoso ätipirika auãki inakari sãpiretakiti. Saasara ipi auanaro auakaro, iteene kauanaro, ininiã iposotari ikisauakiniri inirekiniãtaã. Iposotari ikisauakiniri kãkiti pakaki, iua äki auakari axiþe imakatzakini ikapani. Apiata Teoso sãkire, kotxi Teoso sãkire posotari apokini kãkiti iikite kãkiti xinirekata apotiitiniãtaãua. Teoso sãkire imarotari ikinika axinikakiti, anireëkiti pakini aãkixinireë. Teoso sãkire atamakaerekatari ikara aãkixinireë auakari. ¹³ Teoso atamatari ikinipoko akamakiti, ininiã !auari iomaãtakori. Ikinipoko !ipataãka. Aãuïte Teoso apisatoõ ikinipoko kasarori.

Xesosi Sasetotxi Auïte Apiatakari

¹⁴ Ininiã atemoni auari sasetotxi auïte apiatakari, Xesosi, Teoso äkiri. Apiananiri iua. Iua sari iaxiti Teoso auiniãtaã. Ininiã iteene maãuikari iua sãkire. ¹⁵ Ate nakiti sasetotxi auïte apiatakari imarotari ate äkixinire iõkapetini. Imarotari ate maposotakiniti. Imarotari ate tsii. Ikara atoko inakari imarota, kotxi Satanasi iteene atamakaerekatari iua, ate atamakaerekatiko atoko. Iuaritika maerekati !ikama. ¹⁶ Ininiã ataparaxinireritika masa Teosomoni. Aãuïte topãkiniãtaã masa ikinipoko erekari isikakiti aãpakapini ikapani, iamoniãkari ikinipoko ikapani. Isikaua ikinipoko erekari. Isikataparataua amaxikiko auakasaaki.

5

Xesosi Sasetotxi Auïte Apiatakari Mereïko

¹ Ikinimane sasetotxi auïte apiatakari mereëka kãkiti sauaki. Iua misãkiretari Teoso kãkiti ikapani. Isikari kãkiti sikakiti iuamoni. Kitxakapirika iua okari pirãtxi Teoso apisatoõ kãkiti maerekani iikixitini ikapani. ² Iamonikari mimaroreni, Teoso takanapakani pakini, kotxi imarotari kãkiti äkixinire iõkapetini, kotxi iua apaka kãkiti itxaua. ³ Sasetotxi apaka maerekati kamakari itxaua. Ikara xika merepanika iua okari pirãtxi Teoso apisatoõ iua maerekani iikixitini ikapani. Eereka iua okari pirãtxi kãkiti maerekani iikixitini ikapani.

⁴ Kãkiti paxitari sasetotxi, iuaritika ninoa kona mereëri sasetotxi parika. Teosonoka mereëri kãkiti sasetotxi ininiua ikapani, sasetotxi Arão inakori Teoso mereini atokokana kitxakapirika.

⁵ Xesosi iua!a !ikamaua sasetotxi auïte apiatakari ininiua. Kona itxari: "Apakatapitika sasetotxi nininiua." Iuaritika Teoso txari iua: Pite namarite. Uatxa noerekariko kãkiti nota pite iri nininiua, itxa Teoso.

⁶ Iuaikana Teoso txari:

Ätipirika sasetotxi pitxaua. Sasetotxi Meokisiteki inakori atoko inakari pitxaua,

itxa Teoso Xesosimoni. ⁷ Xesosi İkorapokoriti auakasaaki, iua iteene misãkiretari iri. Ipinini apisapanika iteene amanaãri iri imapinakani ikapani. Imisãkiretakasaakiri iua, iteene itxiãta. Irinokara posotari itxiãtakiniri imapinakani. Iri kenakotari isãkire, kotxi Xesosi txari: "Pinirekakitinokara ninireka." ⁸ Xesosi Teoso äkiri, iuaritika atatsiirauatakasaaki, imaroãpotari Teoso nireëkiti iaõka ikamini. ⁹ Iua kamari ikinipoko iri paniãtakiti. Ikara atoko ininiã, kãkiti maerekani makatzakakari itxapekaua. Imakatzakari ipaniãtakiti kamakani maerekani, ininiã ninoa auapininika itxanako Teosokata. ¹⁰ Teoso mereëri iua sasetotxi auïte apiatakari ininiua, Meokisiteki inakori sasetotxi ininiua atokokana.

Erepaniko, Atão Sãkirextiti !Hítakanapape

¹¹ Aua apikomoni kaiãopokori ikara atoko inakari asãpiretinii híte, txamari pamimari ikara asãpiretinii híte, kotxi !katimari himarotiniiri Teoso sãkire.

¹² Akokaxiti híte auikari Xesosi sãkire, ininiã uatxa apiaerekata Xesosi sãkire oereëkani hininiua. Txamari híte nirekari äti oerekinii iuaikana merepitipanika atão inakari Teoso sãkire iõkatsopatakoriã auakari. Híte eenetxi xapitikiri atoko. Hinirekari Teoso sãkire tinitxiã atoko inakari. Teoso sãkire nipokori atoko inakari !híposotapanika hãpakapini. ¹³ Teoso sãkire imarotakari tinitxiãnoka nirekakari atoko inakari, iteene !imarotapanikari Teoso sãkire. !Imarotari atão inakarínoka ikamini, kotxi iua eenetxi xapitiri atoko inakari.

¹⁴ Kãkiti aneëkari nikari xinitxi. Kataparaxinireri nirekari Teoso sãkire, xinitxi aneëkari nirekini atokokana. Kãkiti ikiniõtika kenakotiniãri Teoso sãkire, ininiã imarotari atão inakari. Imarotari atão minakati apaka.

6

Maãpaiaõkarauata Apikomoni

¹ !Apakata ikiniõtika merepitipanika Kristo sãkire oerekakorinoka axinikini, kotxi aimarotapekari. Aimarotapekari atakanapiniiri maerekati akamakiti. Aimarotapekari ateka kamakiti txíkitakaua apinini. Aimarotapekari Teoso sãkire aãuikini. ² Aimarotapekari apatxisarauatini. Aimarotapekari atakauakotiniua äti nopini. Aimarotapekari ipíkani iuaikana õkitikiniua. Aimarotapekari Teoso misiritinina maerekati kamakani ätipirika. !Apakata ikara ätipirika aõerekini. ³ Apikomoni uaupitika, ininiã maãpaiaõkarauata apikomoni. Teoso auiritiniãua, apikomoni maxinika.

⁴ Kãkiti takanapiniãri Teoso sãkire auikini, !apakataika ikanapiriinina Teosomoni. Mitxi ninoa imarotari Teoso sãkire atão inakari. Mitxi ninoa imarotari erekari iaxitikiri. Mitxi imarotari Erekarí Matamatakoti paríka äkixinireëna. ⁵ Mitxi imarotarina Teoso sãkire ereka inini. Mitxi imarotarina Teoso posotiire itixi amaneri apokasaaki. ⁶ Ikara atoko ninoa imarota, iuaritika ninoa takanapari Teoso. Ininiãkara !apakata iuaikana ikanapiriinina Teosomoni, kotxi iuaikana imisiritarina Teoso äkiri aamina ipiriãmitakari nopini imisiritiko atoko. Iuasaaki ninoa txíkitakari kãkiti iuaikana napetiniri Xesosi.

Kikio Atoko Anini Pirena

⁷ Teoso takari erekari itixi ia atoko inakari nopini: Äparaã ikipa kaiãokatani iuaã, ininiã iminaua kienatxi katakareri nirekakiti. ⁸ Txamari itixi inako, aanaia pakini auiniã, litxa. Ikara xika atxiiti imisiritãka. Ininiã arikaãkako. Ikara atoko inapeëkanako kãkiti. Maerekati aniniãua, ininiã pamonõkoniri atemoni. Ikara atoko ininiã, imapotõkire õti Teoso !nirekaikaua ate. Ixipokaua aanaia xipokiko atoko.

⁹ Nitariakori, ikara atoko asãpiretai híte, iuaritika ate imarotari kona híte ikara atokoni. Aimarotari hãpakapiniiri erekari, kotxi Teoso makatxakapekari himarekani. ¹⁰ Teoso kamari ikinika atão. Iua !imaxinikaretari hãparíka iua íkapani. Hítiraõki iuamoni !imaxinikareta, kotxi himoianatapekari iua nakitiakori. Uatxa himoianatapanikana ninoa. ¹¹ Ate nirekari ikinika hĩkaminiritika Teoso íkapani imapotõkire õti manapi apokini. Ikara atoko ininiã, himarotari hiãtapakiti apokapitikako hĩtemoni. ¹² Kona apakata hĩarinuautini. Apanakini Teoso sãkire auíãkani kamakiti atoko hĩkamako, kotxi ninoa iãtapari Teoso sikaenetakiti apakapinina.

Teoso Sikapitikariko Isikaenetakiti

¹³ Kitxakapirîka Teoso sâpiretari isikaenetakiti Apraãomoni. Apiatakari Teosonokara aua. Âti apiatakari iua atoko inakari !auari, ininiã iuaka uãkaã isâpiretari isikaenetakiti isikini Apraãomoni. ¹⁴ Ininiã Teoso txari Apraão: “Nîtakapitikari erekari pitemoni. Nisikaiko itomaneri papika mekaniriakori,” itxa. ¹⁵ Ininiã Apraão kenakotakasaakiri ikara, iteene iãtapari Teoso sâpiretakiti apokini. Eereka Apraão apakapari Teoso sikaenetakiti.

¹⁶ Kâkiti sâpiretakasaakiri isikaenetakiti âti kâkitimoni, iuasaaki ninoa apoka âti apiatakari apisatoõ isikaenetakiti isâpiretinina îkapani. Ininiã iuasaaki kâkiti imarotapitikari isâkire atão inini. Ikara atoko ininiã, aãpirena ! auari isikaenetakiti xika. ¹⁷ Teoso nirekari inakitiakori iteene imarotiniri imatanapakaniri isikaenetakiti isikinina ninoa. Ininiã isikaenetakiti isâpiretakasaaki, isikari isâkire iuaka uãkaã. ¹⁸ Ininiã ipi aua: Teoso, Teoso sâkire pakini. Teoso mitxi atoko itxapikako. Teoso sâkire mitxi atoko itxapikako. Ininiã Teoso ! iposotari atão minakati isâpiretini. Amiteka iuamoni, iua nîkatiniua îkapani, aiãtapakiti aãpakapini îkapani. Ininiã asikataparaxiniretaãka.

¹⁹ Ikara atoko inakasaaki, aposotari iteene aãuikiniri Teoso sâkire. Aiãtapari ikinipoko iua sâkire iaõka apokini. Teoso sâkire aãuikini, minari maporo maïkakari atoko itxa. Maporo maïkakari !auritari maporo tiokini. Teoso sâkire aãuikini maïkari axinire. Isikataparatar axinire. !Auiritaua atiokini maerekanitximoni. Teoso sâkire aãuikini anikaua Teosonani Auini Pakitaãtaã, mãktxi mata arõkakari apikomoni auakari pakitamoni. Kitxakapirîka sasetotxiakori auite apiatakarinoka îroã iuaã. ²⁰ Iuaã Xesosi îroã ate îroini apisa. Iuaã imisâkiretari iri ate îkapani. Sasetotxiakori auite apiatakari itxapekaua âtipirika ate îkapani. Meokisiteki inakori sasetotxi ininiua atoko itxa Xesosi.

7

Meokisiteki Pirena

¹ Meokisiteki inakori Sareë tixini auakani auite itxaua. Iuasaaki sasetotxi itxaua apaka. Teoso, Apiananiri, kamari iua sasetotxi ininiua. Kitxakapirîka Apraão kamari neenamtxi âti tixini auakani auiteakorikata. Iua kanapiriãkasaaki, aõkitari Meokisiteki. Iuasaaki Meokisiteki takari erekari Teoso sikakiti iuamoni. ² Iuasaaki Apraão sikari iua tiitxi imaktxakakiti ipixini. Tesi tiitxi auiniã, isikari âti Meokisitekimoni. Meokisiteki akiritããka “Auïtetxi Atão Inakari Kamakari.” Apaka akiritããka “Auïtetxi Kâkiti Kamaerekaxiniretakari.” ³ !Kimarotikori Meokisiteki iri, inoro pakini. !Kimarotikori apika atokiriakori. !Kimarotikori iponanini, ipinini pakini. Teoso âkiri atoko itxa. Sasetotxi âtipirika itxaua.

⁴ Hîxinikariko iua Meokisiteki. Apiatakari iua. Apraão iteene paxitari iua, ininiã isikari ipixini tiitxi iua maktxakakiti iuamoni. ⁵ Eereka âti õti Apraão tikini Teoso paniãtari Arevii apika mekaniriakori, sasetotxiakori, apakapiniri ipixini kâkiti apakapakiti, txineiro, tiitxi pakini. Ninoa apakapari kâkiti sikakiti Teoso îkapani. Ikinimane ninoa Apraão apika mekaniriakori itxauana. Iuaritika sasetotxiakori apakapari inirimane sikakiti. ⁶ Iua Meokisiteki Arevii nirimane !itxaua. Iua aua kitxakapirîka Arevii apisapanika. Iuaritika iua apakapari ipixini Apraão maktxakakiti. Eereka Meokisiteki takari erekari Teoso sikakiti Apraãomoni, Teoso sikaenetakiti apakapakarimoni. ⁷ Iua Apraão poiãori. Apiatakari Meokisiteki, kotxi apiari takari erekari Teoso sikakiti poiãorimoni. ⁸ Ikinika Arevii apika mekaniriakori, Teosomoni kâkiti sikakiti apakapakani, ipinanipeka. Âtipirika auakari atoko itxa Meokisiteki. ⁹ Atxiiti aposotari asâpiretiniri ia atoko: “Arevii sikari

isikakiti Meokisitekimoni Teoso ikapani, kotxi iua ina Apraão ðto åki.”¹⁰ Kotxi Apraão aokitakasaakiri Meokisiteki, iuasaaki Arevii kona auapanika. Ininiå iua auini apisapanika Apraão ðtoå aua, kotxi Apraão apika mekaniri itxaua Arevii.

Xesosi Meokisiteki Atoko Inini

¹¹ Arevii apika mekaniriakori sasetotxiakori itxauana. Iua apika mekaniri Aråo inakori. Aråo apika mekaniriakori apaka sasetotxiakori itxauana. Teoso sikari ipaniåtakiti iøkatsopatakori ninoamoni, isåkire kåkiti imarotini ikapani. Iuaritika ninoa sasetotxiakori parika !oerekari kåkiti kamaerekatiko. Ininiå åtiåo sasetotxi nirekaåka. Sasetotxi Aråo atoko inakari !inirekaåkaika. Sasetotxi Meokisiteki atoko inakari nirekaåka.

¹² Åtiåo sasetotxi auakasaaki, åtiåo Teoso paniåtakiti iøkatsopatakori aua iuasaaki. ¹³ Xesosi kona Arevii apika mekanirini. Iua Xotaa apika mekaniri. Xotaa mekaniriakori kona sasetotxiakorini. Ninoa kona okari piråtxi Teoso ikapani. Kona iparikauatana Teosomoni sikakori takikoåtaå. ¹⁴ Ikinimane imarotari aåuåte Xesosi Xotaa nirimane ininiua. Moisesi iøkatsopatakiti ! auiritana ninoa sasetotxi ininiuana. ¹⁵ Ate såpiretapekari Meokisiteki pirena. Aimarotari auapitika åti sasetotxi, Meokisiteki atoko inakari. Uatxa aimarotari Xesosi Meokisiteki atoko itxaua.

¹⁶ Kitxakapirika sasetotxi pitxaua, kotxi pikiomaneakori sasetotxi apaka itxauana. Teoso kamari Xesosi sasetotxi ininiua, kotxi iua auapikako. Kaposotiireri iua. !Ixiþoka. ¹⁷ Teoso txari Xesosi isåkire iøkatsopatakoriå: Åtipirika sasetotxi pitxaua. Sasetotxi Meokisiteki atoko inakari pitxaua, itxa.

¹⁸ Ininiå mitxi auakari sasetotxiakori parika !auaika, kotxi itapara !auari. Xipope ikara. ¹⁹ Moisesi paniåtakiti iøkatsopatakori !ikamari kåkiti ereka inini. Uatxa apiaerekatakari åiåtapakiti apokapeka !korapokoriti. Ininiå iua anikaua Teosomoni.

²⁰ Teoso isåkireå txikitakari Xesosi sasetotxi ininiua. ²¹ Teoso !isåkirauata ikara atoko kåkiti sasetotxiþeka inakasaaki. Teoso txikitakari Xesosi sasetotxi ininiua isåkireå, kotxi itxari Xesosi:

Nota Apiananiri såpiretapekari nikamaenetakiti. Ikara nikamapitikako, ininiå åtipirika sasetotxi pitxaua, sasetotxi Meokisiteki atoko inakari pitxaua,

itxa Teoso. ²² Ininiå ikara Teoso såkireå, aimarotari Teoso kamapitikariko ikamaenetakiti apiari, kotxi iposope isikiniua Xesosi.

²³ Auapeka itori sasetotxiakori. Ninoa kona posotari åtipirika iparikauatina, kotxi ikoriåþekana. ²⁴ Xesosi auapikako, ininiå åtipirika sasetotxi itxaua. ²⁵ Ininiå iposotari imaktxakiniri ikinika amaerekani, Teosomoni anikasaakiaua, kotxi åtipirika aua, ininiå åtipirika imisåkiretari Teoso ate ikapani.

²⁶ Ininiå ikara atoko inakari sasetotxi auåte apiatakari anirekapitika. Apiaerekatakari iua. !Kaneenamari. Ikerokakiti !auari. Itxiko ixinireå ! auari. Maerekati !ikama. Iaxiti apiko nopinixiti auakari, auåtetxi Apiatakari itxaua. Ikara atoko inakari sasetotxi anirekapitika. ²⁷ Apanakini sasetotxi auåte apiatakani !korapokoriti auakani atoko !itxaua. Ninoa ikiniõtika okari piråtxi, merepanika ninoaka maerekani makatxakiko ikapani. Eereka ninoa okari piråtxi kåkiti maerekani makatxakiko ikapani. Kona ikara atokoni itxa Xesosi. Åtikatanokara Xesosi oxiketari iaråka kåkiti ikapani. Iuaka ipina kåkiti ikapani. ²⁸ Mitxipe sasetotxi auåte apiatakani mereååka Moisesi paniåtakiti iøkatsopatakori iaoka. Ninoa tapara !auari. Moisesi såkire tikini Teoso mereåri imi åtipirika sasetotxi ininiua ikapani. Åtipirika erekarinoka kamakari iua.

8

Xesosi Sasetotxi Auñte Apiatakari

¹ Ia atoko asãpiretakiti: Atemoni auapitika atão sasetotxi auñte apiatakari. Iaxiti iua topãka aũñte Teoso kikomoni, auñtetxi auiniãtaã. ² Iuaã Teoso auiniãtaã, imisãkiretari iua ate ìkapani. Iuaã aua atão inakari Teoso aapoko, Apiananiri kamakiti. Kona kãkiti kamakitini.

³ Ikinika sasetotxi auñte apiatakari auri iparìka. Isikari kãkiti siãkiti Teosomoni. Isikari pirãtxi okakori Teosomoni. Ininiã Xesosi parìka apaka aua isikarauatini. Iuaka isikaua Teosomoni. ⁴ Ìkorapokoriti Xesosi auakasaaki, sasetotxi !itxaua, kotxi auape ìkorapokoriti sasetotxiakori kãkiti siãkiti sikakani Teosomoni. Moisesi iòkatsopatakiti atokotxikana ikamana. ⁵ Sasetotxi ìkorapokoriti auakani kamakiti atão, txamari ninoa parìka !inirekaãkaika. Ninoa parìka sanõkatxi atoko itxa, Xesosi parìka iaxitikiri aimarotini ìkapani.

Kitxakapirìka Teoso paniãtakasaakiri Moisesi Teoso aapoko aamata kamakori ikamini ìkapani, Teoso txari Moisesi: Pikamariko naapoko nipaniãtakiti iaõka ixirata auñte nopini aũuakasaaki no-erekakiti. Ipinimoni inakari !pikamape, itxa Teoso.

⁶ Xesosi parìka Teoso sikakiti apiaerekata. Kitxakapirìka sasetotxiakori parìka poião erekari. Iua atokokana Teoso kamaenetakiti amaneri apiaerekata. Kitxakapirìka ikamaenetakiti poião erekari. Xesosi txìkitakari Teoso kamaenetakiti amaneri apokini kãkiti ìkapani, kotxi iua ipina kãkiti ìkapani. Teoso kamaenetakiti amaneri apiaerekata, kotxi ikamaenetari kaiãopokori erekari apiaerekatakari.

⁷ Teoso kamaenetakiti Moisesimoni apakatiniã maerekati imaktxakini ìkapani, ininiã kona ikamari ãti ikamaenetakiti apiatakari. ⁸ Txamari Teoso !apokaerekatari kãkiti, kotxi kãkiti kamapanikari maerekati. Ininiã Apiananiri txari kãkiti:

Àti õti nisãpiretariko nikamaenetakiti amaneri Isaeo nirimanemoni, Xotaa nirimanemoni pakini.

⁹ Kitxakapirìka nisãpiretari mitxi nikamaenetakiti ninoa atokiriakorinimoni. Iuasaaki nota maktxakana ninoa imisiritikosaakina Exito tixiniã. Txamari ninoa !ikamari nisãkire iaõka. Ininiã nitakanapana ninoa. Nikamaenetakiti amaneri kona mitxi nikamaenetakiti atokoikani.

¹⁰ Æti õti ìkari nikamaenetakiti amaneri nisãpiretariko Isaeo tixini auakani. Ia atoko inakari nikamaenetakiti amaneri: Nitakariko nipaniãtakiti kãkiti iikiteẽ. Niõkatariko nipaniãtakiti ninoa ãkixinireẽ. Iuasaaki ninoa Teosone nitxauako. Iuasaaki ninoa nota nakitiakori nitxauako.

¹¹ Iuasaaki kãkiti kona oerekari ãti imarotiniri Apiananiri. Kona kãkiti oerekari itari imarotiniri Apiananiri, kotxi iuasaaki ikinimane imarotanoko nota. Poiãoka inakani, apiatakani pakini imarotanoko nota.

¹² Nimaxinìkaretariko ikinika maerekati ikamakitina. Kona nimisiri-taikanako ninoa. Kona nixinikaikariko maerekati ikamakitina, itxa Apiananiri. ¹³ Teoso kamakasaakiri ikamaenetakiti amaneri, iuasaaki oerekari kãkiti mitxi ikamaenetakiti Xoteoakorinoka ìkapani ikamape, ininiã inapape. Tiitxi kitxakari patimari xipokini atoko, ikara mitxi Teoso kamaenetakiti xipoka.

9

Teoso Aapoko Aamata Kamakori

¹ Kitxakapirīka Teoso kamaenetakiti isāpiretakasaakiri Moisesi, Teoso oerekari Moisesi oerekiniri kākiti Teoso apisatoō apokini. Iua apaka sāpiretari kākiti iua aapoko İkorapokoriti ikaminina İkapani. ² Ininiā ninoa kamari Teoso aapoko aamata kamakori. Sasetotxiakori İroiniātaā aua tirikapi takiko tiitxiti. Iuaā aua apaka komiri Teosomoni siākori amesa nopini. Iua pakita ninoa takauākatari “Teoso Auini Pakitaātaā.” ³ Apanīkaki mākatxi mata kasipiri arōkakari aua. Iua mākatxi mata apikomoni auakari pakita ninoa takauākatari “Teosonani Auini Pakitaātaā.” ⁴ Iuaā aua kamariāro arikiko amesati oro kamakoro. Iuaā aua Teoso kaixane. Iua kaixa akiritaāka “Teoso kamaenetakiti kaixati.” Iua kaixa nopini mapara itaāka oronokara. Iua āki itakaāka kopitipaki oro kamakoro. Iua kopitipaki āki itakaāka xapitiri komiri manaa inakori. Iua kaixa āki aua apaka Arāo tsonareke. İkora mitxi pitxaka iuaīkana. Apaka iua kaixa āki aua ipi kaita. İkora kaita nopini aua Teoso paniātakiti iōkatakori. ⁵ Iua kaixa nopini aua ipi Teoso nitiriakori iaxitikini atoko inakani. Oro kamakori ninoā. Akiritaāka Keropiī inakoni. Keropiī matameēkari imīkita iua kaixa tore nopini. Iuaā Teoso maxinīkaretari kākiti maerekani.

Uatxa !apakata apikomoni noerekinii ikara pirena.

⁶ Teoso Auini Pakitaātaā sasetotxiakori İroā ikiniōtika iparīkana ikaminina Teoso İkapani. ⁷ Sasetotxi auīte apiatakarinoka İroā Teosonani Auini Pakitaātaā. Ātikanani ātikatika İroā. Iua anikari arēkatxi uakata. Arēkatxi imanikaniā, ! İroā. Iua arēkatxi isika Teosomoni merepanika iuaka maerekani Teoso makatxakini İkapani. Eereka ikamari ikara apanakini kākiti maerekani Teoso makatxakini İkapani. ⁸ Iuasaaki Teoso kona auiritari kākiti İroini Teosonani Auini Pakitaātaā. İkara atoko Erekarī Matamatakoti oerekaua ate, kotxi kona Teoso oerekapanikari ikinimane kākiti İroini Teoso apisatoō. Teoso aapoko aamata kamakori auapanika inakasaaki, Teoso kona oerekari kākiti iuamoni apokini. ⁹ İkara Teoso aapoko kitxakapirīka auakari ate oerekiko itxaua uatxa. Oerekari ia. Kākiti sikakiti Teosomoni, pirātxi okiko Teoso İkapani apaka, kona posotari oeretiniri Teoso teosonetakani ākixinire. ¹⁰ İkara Teoso oerekakiti kitxakapirīka oerekari kākiti iniākiti atāo inakari, İatakiti atāo inakari pakini. Oerekari kākiti İto arokiko, itii arokiko pakini Teoso apisatoō apokini iposope inini İkapani. Teoso kamaenetakiti amaneri apokasaaki, kona akamaikari ikara mitxi Teoso oerekakiti.

Kristo Arēka

¹¹ Kristo apokapeka. Sasetotxi auīte apiatakarī itxaua. Oerekaua erekari Teoso sikakiti. İparīkauata Teoso aapoko apiaerekatakari āki. Iua Teoso aapoko kākiti makamakiniti. Iua aapoko !auari İkorapokoriti. ¹² Iua İroāksaaki iuaātaā, ! anikari potxi arēka, kema auīte ākiri arēka İroini İkapani. Iua İroāksaaki Teosonani Auini Pakitaātaā iaxiti auakariātaā, anikari iuaka arēka, kotxi ikitakari iarēka ātikatika ikinimane kākiti İkapani. Ininiā İkitxitari Teoso ātikatika kākiti maerekani İki, ininiā kākiti iua Teosokata ātipirika. ¹³ Potxi arēkaā, kema auīte arēkaā, kema auīte ākiri ariākori paniā pakiniā, kitxakapirīka sasetotxi tseētari maerekati kamakani Teoso apisatoō apokinina İkapani. Ininiā iuasaaki maparanoka oeretaāka. Ākixinirena !oeretaāka.

¹⁴ Apiaerekata Kristo arēka, kotxi iua posotari oeretiniri ākixinire. Maerekati ! auari Kristomoni. Iuaka sikaua Teosomoni Erekarī Matamatakoti posotiireē, ātipirika auakari posotiireē. Iuara oeretari ākixinire. İmakinika akamakiti apinini txīkitakakari imakatxaka. Ininiā uatxa aposata aparīkauatini Teoso ātipirika auāki inakari İkapani.

¹⁵ Ininiã iua Kristo txikitakari Teoso kamaenetakiti amaneri apokini. Ininiã kãkiti Teoso akiritakini posotari apakapiniri âtipirika Teoso sikaenetakiti iua anaakori ikapani. Kristo ipikasaaki, isikakana ninoa imaerekanina itakanapinina ikapani. Iuasaaki iikixitari Teoso imaerekanina iki. Ikara imaerekanina ikamana Teoso kamaenetakiti mitxipe auakari auakasaaki.

¹⁶ Kãkiti ipinini apisa, iõkatsopatarari itii apakapakani uãka, ininiã ipikasaaki itii apakapakani imarotaãka. Ininiã iua ipinini imarotiko tsopa auiniã, iuasaaki itii apakapakani apakapari ipikari tii. ¹⁷ Ipikari tii apakapakani imarotiko tsopa nirekaãka kãkiti ipikasaakinokara. Ikara !inirekaãka ipinini apisa. Iua auãkipanika inakasaaki, kãkiti !apakapari itii. ¹⁸ Ininiãkara mitxi Teoso sikaenetakiti isika kãkitimoni, arëkatxi auakasaaki, ipikari auakasaaki. ¹⁹ Kitxakapirika Moisesi merepitipanika sãpiretari kãkiti ikinika Teoso paniãtakiti iõkatsopatarokari. Eereka ikosekari kema auite ãkiri arëka, potxi arëka pakini. Ikara ikoketa ãparaãkata. Iposo atoko itseõtari Teoso sãkire aãtsopate, ikinimane kãkiti pakini isopo inakori poriaã, soti auite piti põkamarariã pakiniã. ²⁰ Iuasaaki itxari: “Ia arëkatxi oerekaua Teoso kaminiri ikamaenetakiti. Teoso paniãtai hãkipitiniri iua sãkire.” ²¹ Iua atokokana Moisesi tseõtari Teoso aapoko aamata kamakori, ikinika iua ãki auakari pakini arëkatxiã. ²² Teoso sãkire iõkatsopatarokari paniãtari kãkiti, tiitxi pakini oeretiko arëkatxiã. Okakori mauakaniã, arëkatxi kitaãkori mauakaniã, Teoso !imaktxakari kãkiti maerekani.

²³ Ininiã Moisesi takari pirãtxi arëka ikinika Teoso aapoko ãki auakari nopini oeretiniri ikapani. Ikinika Teoso aapoko ãki auakari ïkorapokoritikiri, iaxitikiri oerekiko ikapani itxa. Sanõkatxi atoko itxa. Pirãtxi arëka kona apakata iaxiti ikapani. Teoso nirekakari arëkatxi apiatakari. ²⁴ Kristo iparika ikamakasaaki ate ikapani, kona ïroã Teoso aapoko kãkiti kamakitiã. ïkorapokoriti kãkiti kamari Teoso aapoko atoko inakari, txamari na atão iua aapoko. Kristo ïroã atão Teoso aapoko Teoso tixineë. Uatxa iuaãtaã Teoso apisatoõ iua misãkiretari Teoso ate ikapani. ²⁵ Sasetotxiakori auite apiatakari ïroã Teosonani Auini Pakitaãtaã ikinikanani. Iuasaaki anikari pirãtxi arëka. Kristo !ikamari ikara atoko. Ætikatika Kristo oxiketari iarëka. ²⁶ Iua ninoã atoko inaãkamako, itokata imisiritaãkamako itixi kamikosaakipekamako. Uatxa imapotõkire õti takote iua apokapeka maerekati Ætikatika imaktxakini ikapani. Iuaka isikaua ipinini ikapani, amaerekani ixipokini ikapani. ²⁷ Teoso kamari ikinimane kãkiti Ætikatika koriini. Eereka ikinimane sari Teoso apisatoõ. Iuasaaki apanakini apakapari imisiritiko. Apanakini apakapari iparicana iki. ²⁸ Ininiã Kristo okaãka Ætikatika kaiãopokori kãkiti ikapani, imaerekanina imaktxakini ikapani. Iuaikana iua kanapiriã. Iuasaaki !imisiritããkaikako kãkiti maerekani xika. Iua ikasaaki, imaktxakariko iua iãtapakani, maerekani sauaki auakani. Anikana itixinemoni âtipirika Teosokata auinina ikapani.

10

Pirãtxi Arëka Kona Apakata

¹ Kitxakapirika Teoso paniãtakiti Xoteoakorimoni sanõkatxi atoko itxa. Ikara oerekari kãkiti iuasaaki auakani atão inakari apokini ãti õti. Ikinipoko atão inakari !apokapanika ninoamoni. Ininiã pirãtxi okiko âtipirika kona txikitakari kãkiti iposope Teosomoni apokini. !Ikamaerekatana ninoã. ² Pirãtxi arëka maktxakiniãri kãkiti maerekani, ininiã ninoã takanapamariõ pirãtxi okinina, kotxi Teosomoni apokakani oeretapeãkaika, ininiã imarotamarina ãkixinireëna imaerekanina mauakani. ³ Txamari pirãtxi arëka !imaktxakari kãkiti maerekani. Ininiã ikinikanani pirãtxi okakori

oerekari kākiti imaerekani auapanika. ⁴ Kema auñte arēka, potxi arēka pakini kona posotari imaktxakiniri kākiti maerekani.

⁵ Kristo apokasaaki İkorapokoriti, itxari Teoso: Pirātxi okakori pitemoni siākori kona pinireka. Ininiā pite kamari İtotxi nota İkapani.

⁶ Pirātxi arikiko pite İkapani, pite !apokaerekatari. Kākiti sikiniri isikakiti pitemoni imaerekani pimaktxakini İkapani, pite !apokaerekatari. ! İkamapoxokonitai.

⁷ İuasaaiki nitxai. “Uaıkarano nota. Paātsopateē iōkatapeēkaika nota pirena. NiTeosone uai napoka pinireēkiti nikamini İkapani,” itxa Xesosi.

⁸ Merepanika Xesosi txari iri: “Pirātxi okakori pitemoni siākori kona pinireka. Pirātxi arikiko pite İkapani, pite !apokaerekatari. Kākiti sikiniri isikakiti pitemoni, pite !apokaerekatari. !İkamapoxokonitai,” itxa. İuaritika Teoso sākire iōkatsopatakori kitxakapirİka paniātari ikara kamiko. ⁹ Eereka Kristo txari iri: “Uaıkarano nota. Uai napoka pinireēkiti nikamini İkapani,” itxa. İkara atoko inakasaaki, Xesosi xipokari pirātxi okiko, kotxi iua apoka uai Teoso nireēkiti ikamini İkapani.

¹⁰ Teoso nireēkiti iaōka ikamini kamaerekataua ate, kotxi Xesosi Kristo İpina ātikatika İkinimane İkapani.

¹¹ Sasetoxiakori İkorapokoriti auakani sapika İkiniōtika Teoso apisatoō İparİkana ikaminina İkapani. Ātipirika iua okari pirātxi Teoso isikini İkapani. İtxama, ikara ! İposotari maerekati imaktxakini. ¹² İuaritika Kristo, ate sasetoxine, iuaa sikapekaua İkoriini kākiti maerekani imaktxakini İkapani. İkamari ikara ātikatika. İposo atoko, İitopāka Teoso kikomoni. İkara atoko ininiā, İxipokari İparİka. ¹³ İuaā İātapari İkinika imokaiakari xipokini. İkiti itakiniātaā atoko ninoa. ¹⁴ Ininiā ātikatika okaāka kākiti ereka inini İkapani. İua kamaāpotana ninoa erekaāpo İninina İkapani.

¹⁵ Erekari Matamatakoti apaka txaua ate ikara atāo inini. Merepanika itxari:

¹⁶ Apiananiri txari: “İa nikamaenetakiti nikamako ninakitiakori İkapani āti ōti. İa nikamaenetakiti: Nİpaniātakiti nitakako ninoa ākixinireē. Nİpaniātakiti niōkatoko İlİkteēna.”

İtxa Erekari Matamatakoti. ¹⁷ Apikomoni itxa: Kona nixinikaikari maerekati İkamakitina. Apaka nİpaniātakiti ninoa takanapakiti, !nixinikaikako.

¹⁸ Teoso maktxakasaakiri maerekati akamakiti, ininiā amaerekani maktxakaākapeka. Ininiā !auaika okakori kākiti maerekani maktxakini İkapani.

Maāpoka Teosomoni

¹⁹ Ininiā nitariakori uatxa !hİpİkarauatape hİİroini Teosonani Auini Pakİtaātaā, kotxi Xesosi İİkitxitapekari aİroini İkapani İuaka arēkaā. ²⁰ Xesosi İpİkasaaki, İua kamari kimapori amaneri, maxipokati, Teosomoni asini İkapani. İpİkasaaki, imaktxakari mākaxi mata Teosonani Auini Pakİtaātaā arōkakari, Teosomoni aİroini İkapani.

²¹ Atemoni aua sasetoxi apiatakari Teoso aapoko nİkatakari. ²² Ininiā maāpoka Teosomoni. Maāİuritari atāo inakarınoka kaikotini aākixinireē. Maāİukari İkinika İua sākire. Kākiti kitxakapirİkarini tseİrauata arēkatxiā, maerekati maktxakiko İkapani. Ininiā maamanaāri Xesosi tseİtiniri aākixinire oeretiniri İkapani. Kitxakapirİka kākiti kİpaātaua Teoso aapoko İroini İkapani. İua atokokana maamanaāri Xeosi aİto arokini āparaā ereriā. İkara atoko aniniā, maāpoka Teosomoni. ²³ İteene maāİukari aimarotakiti

asãpiretakiti, kotxi Teoso kamapitikariko ikamaenetakiti. ²⁴ Maxinikariko ia. Natokopa itxa aõtäkikakakiniua atiraõkiuatini İkapani, erekari akamini İkapani apaka? ²⁵ !Apakata atakanapiniri aãpotiitiniua Teoso İkapani. Apanakini ! itotaikari apotiitiniua Teoso İkapani. Masikataparaxiniretakakaua. Apiata masikataparaxiniretakakaua, kotxi aãũte kanapiriĩni İkorapokoritimoni kamapeka.

²⁶ Atão inakari aimarotiniã, atão inakari aãpakapiniã, eereka maerekati akamapika, kotxi anirekari maerekati akamini. Iuasaaki ! auaika amaerekani İkitxitiko. Iuasaaki ! auaika amaerekani makatxakiko. ²⁷ Iuasaaki aimarotari kãkiti ikara atoko inakani misiritaãkako, kotxi Teoso mokaiakariakori itxauana. Arikatxi apiatakari xipokanako ninoa. Pıkaretxinoka aua ninoa İkapani. ²⁸ Kitxakapirıka kãkiti makıpitakaniãri Moisesi paniãtakiti okapeẽkaika. İpi, atxiĩti ipi ãti pakini kãkiti atamatiniãri iua kaminiri maerekati, ininiã okaãka. ! Auiritaãka imitekini. ²⁹ Ininiã natokopa itxa kãkiti misiritiko Teoso ãkiri sãkire imakıpitakaniã? Apiata iua misiritiko, kotxi Teoso ãkiri ikatxaratini atoko itxa imakıpitakaniri iua sãkire. Iuasaaki ! ipaxitari iua arẽka amaerekani makatxakakari Teoso sikaenetakiti. Iuasaaki imisãkirepiretari Erekarı Matamatakoti, ikinipoko erekari sikakari. ³⁰ Aimarotari ia sãpiretakari. Iua txari: Notanoka xikatxirauata. Notanoka misiritanako ninoa imaerekanina xika, itxa Teoso.

Apaka Teoso sãkire iõkatsopatakori txari:

Apiananirinoka sãpiretari kãkiti inakitiakori misiritiko.

³¹ Kãkiti maerekati kamakani apokasaaki Teoso ãtipirika auãki inakari apisatoõ, iuasaaki pamonõkoniri, kotxi kãkiti misiritakari itxaua.

³² Hıxinikariko merepitipanika Teoso sãkire hãuikini õti. Hıĩkite iopinikiko atoko itxa iuasaaki. Iuasaaki himarotari Teoso sãkire. Iuasaaki iteene hãtatsirauata Xesosi sãkire hãuikini xika. Iuaritika iuasaaki hıtaparaxinireritika hãua. Iuasaaki !hıtakanapari Xesosi sãkire hãuikini. ³³ Iuasaaki kãkiti apisatoõ apanakini napetai. Ninoa misãkirepiretai hıte. İmisiritaina hıte. Iuasaaki hıte moianatari apanakini Teoso sãkire auĩãkani, kãkiti misiritakini. Ininiã iuasaaki hıte apaka misiritaãka. ³⁴ Hıtiretana apanakini Teoso sãkire auĩãkani kateia ãki auakani. Apanakini mixirikari hıtii Kristo sãkire hãuikini xika, iuaritika hıpoxokoniua, kotxi iuasaaki himarotapekari auapitika iaxiti hıtii Teoso sikakiti. İkora tiitxi kona xipoka. Apiaerekata tiitxi iuaxiti auakari.

³⁵ Ininiã kona hıtakanapapiri hıtaparaxinire, kotxi ãti õti Teoso iıkitxitai hıtaparaxinire auiniã. ³⁶ Himıteenekariko ikinika Kristo İkapani. Hıkamariko ikinika hıtaparaxinireritika. Ininiã Teoso paniãtakiti hıkamakasaaki, hãpakapariko isikaenetakiti. ³⁷ Teoso sãkire iõkatsopatakori txari: Apikomoni mokatanitika iua kanapiriãko. İketo õti ikanapiriãpitika.

³⁸ Kãkiti atão inakari kamakari auini erekari, kotxi auikari nota sãkire. Kãkiti sipikapapiretiniãri nisãkire, nota !apokaerekatari iua, itxa Teoso. ³⁹ Ate kona sipikapapiretari Teoso sãkire. Ininiã ! axipokaãka. Teoso sãkire auĩãkani atxaua ate. Iua makatxakari amaerekani aãkixinireẽ auakari.

11

Teoso Sãkire Auikiko Pirena

¹ Atão aũuikasaakiri Teoso sãkire, iuasaaki aimarotapitikari aãpakapiniri aiãtapakiti. Atão aũuikasaakiri Teoso sãkire, iuasaaki aimarotari amata-matakiniti auapitika. ² Kitxakapirıka Teoso apokaerekatana isãkire auĩãkani, kotxi iteene auikarina isãkire.

³ Teoso sākire aūuikasaaki, aimarotari iua kamari itixi, iaxiti pakini isākireēnokara. Aātamatakitiā ! ikamari itixi, iaxiti pakini. Isākireēnokara ikamari ikinipoko.

Teoso Sākire Auiākari Apeo Inakori

(Xénesisi 4.2-12)

⁴ Apeo inakori auikari Teoso sākire, ininiā Teosomoni isikakiti apiaerekata, kotxi Apeo sikari Teosomoni Teoso sākire iaōka. Itari Kai inakori sikakiti poiāo erekari. Apeo auikari Teoso sākire, ininiā Teoso apokaerekatari iua sikakiti. Teosomoni atāo inakari kamakari itxaua Apeo. Kitxakapiriāka Apeo koriā, iuaritika iua iuakiniri Teoso sākire oerekapanikaua Teoso tiretiniri kākiti isākire auiākani.

Teoso Sākire Auiākari Enoki Inakori

(Xénesisi 5.21-24)

⁵ Enoki inakori apaka auikari Teoso sākire. Ininiā Teoso anikari iua iaxiti. Kona ipina. Mapīkatipanika anikaāka Teosomoni. Iuasaaki kākiti ! apokaikari iua, kotxi Teoso anikapekari iua. Isini apisa kākiti imarotari Teoso apokaerekatiniri iua. Iua kamapoxokonitari Teoso. ⁶ Teoso sākire amauiakaniā, kona akamapoxokonitari Teoso. Kākiti Teosomoni apoākari, merepanika auikariko Teoso auini. Apaka ninoa auikariko Teoso sikiniri erekari kaiāopokori iua nitakarimoni.

Teoso Sākire Auiākari Noee Inakori

(Xénesisi 5.28-9.29)

⁷ Noee apaka auikari Teoso sākire. Teoso sāpiretari iua kākiti mimarotakiniti monōkoni. Iuasaaki iua pīkarauata, ininiā ikamari maporo mitari iua aapoko āki auakani mapinakani ikapani. Noee auikari Teoso sākire, ininiā isāpiretari Teoso misiritiniri kākiti imaerekani xika. Teoso txīkitakari iua atāo inakari ikamini, kotxi iua auikari Teoso sākire.

Teoso Sākire Auiākari Apraão Inakori

⁸ Apraão apaka auikari Teoso sākire, Teoso paniātakasaakiri iua ātiātaā isini. Iua kīpitari Teoso sākire, ininiā iua sari, txamari kona imarotari isinimoni. ⁹ Iua auikari Teoso sākire, ininiā iua aua Teoso sikaenetakiti tixitiā. Iuaā iua aapoko aamata kamakori, kotxi āti tixinikiri itxaua. Apaka Isaki, Xakoo pakini aua aapokotxi aamata kamakori. Ninoa apaka apakapari itixi Teoso sikaenetakiti. ¹⁰ Apraão iātapari Teoso sitatxine apokini, kotxi Teoso kamari ikara sitatxi. Ixinikakiti iaōka ikamari. Ikara sitatxi kamaāka kaikori nopini, ininiā lixipoka.

¹¹ Apraão auikari Teoso sākire. Iua imarotari ikiomaneēpeka inini. Apaka imarotari itanoro Sara kona posotaikari keene onini. Iuaritika auikari Teoso sākire irītxi ininiua ikapani. Imarotari Teoso sikapitkariko isikaenetakiti. ¹² Ininiā iua kiki iteene kiomātxi inakariua, iuaritika irītxi itxaua. Iua aua itomaneri imekaniriakori, itomaneri apika mekaniriakori pakini. Itomaneri apika mekaniriakori iōriki iaxiti auakani atoko itxanako. Ikipatxite atoko itxanako apika mekaniriakori. Kaiāopanina ninoa.

Teoso Sākire Auiākani Iātapakiti

¹³ Ikinika ninoa kākiti Apeo, Enoki, Noee, Apraão pakini auikari Teoso sākire. Ikorīākasaakina, ninoa kona apakaparina ikinika Teoso sikaenetakiti. Ninoa imarotari Teoso sikaenetakiti ōtakapanikari apokini tīkane. Ninoa-moni ikorapokoriti kona atāo ninoa tixine. Maraparikini atoko itxauana. ¹⁴ Kākiti ikara atoko inakani oerekari ninoa nitiniri ninoaka tixine. ¹⁵ Itixi itakanapakitina ixinikaākamanako, ininiā iuaīkana ikanapiriāmanako iuaātaā. ¹⁶ Ninoa kona kanapiriā, kotxi inirekarina apiaerekatakari itixiti, iaxiti

auakari. Ininiã Teoso !ipëtauata ninoa Teosone ininiua ikapani, kotxi iua kamapekari sitatxi ninoa ikapani.

Apraão Okaaritiniri Imi

¹⁷ Apraão auikari Teoso säkire, Teoso ataerekatakasaakiri iua. Iuasaaki iposope okiniri Isaki Teoso ikapani. Teoso sikaenetakiti apakapakari iua Apraão. Iposope imatonökari imi okini Teoso ikapani. ¹⁸ Teoso säpiretapekari iua: "Isakimoni auako pimekaniriakori, papika mekaniriakori pakini," itxari. ¹⁹ Iuasaaki Apraão xinikari Isaki ipininiã, Teoso ökitikari iua iuaikana. Iuasaaki Isaki ipinaarita, ininiã käkiti ipikari iuaikana ökitikiniua atoko itxa Isaki iuasaaki.

Isaki, Xakoo, Xosee Pakini Auikiniri Teoso Säkire

²⁰ Isaki apaka auikari Teoso säkire, kotxi itakari erekari imi Xakoo, Isaoo pakinimoni, Teoso nireëkiti iaöka ikaminina tükane. ²¹ Xakoo apaka auikari Teoso säkire. Ikoriini apisa itakari erekari Xosee anaakorimoni. Iuasaaki isäpiretari Teoso iua ereka inini. Iuasaaki iioitekaua itsonarekeë. ²² Xosee apaka auikari Teoso säkire. Ipinini apisa isäpiretana Isaeokini Exito osipikinina ikapani. Ininiã iua paniätana ninoa anikiniri iua api Teoso siäkiti itixitimoni.

Moisesi Auikiniri Teoso Säkire

²³ Moisesi iri, inoro pakini auikari Teoso säkire. Iponaniäka atoko, ninoa kipatari iua ipi äti pakini kasiriti. Iuasaaki imarotarina Moisesi kona äti eenetxi atokoni. Ipinimoni itxa. Ninoa imarotari Paraoo paniätiniri amarini okiko, iuaritika !ipikarina Paraoo paniätakiti.

²⁴ Moisesi auikari Teoso säkire. Mitapeka inakasaaki, kona inirekari käkiti akiritiniri iua Paraoo äkero äkiri ininiua. ²⁵ Iua mereëri imisiritiko Teoso nakitiakorikata. Ininiã iua sari ninoakata. !Inirekari poxokonitxi maerekati kamakiti, kotxi ikara poxokonitxi mokatanitika xipoka. ²⁶ Iuamoni apierekata ninoa xinitiniri iua Kristo säkire auikari xika. Kona iua nirekari katiiri ininiua Exito auakanikata, kotxi imarotari äti öti Teoso sikiniri iua iparika iki.

²⁷ Exito ipotorikasaaki, iua auikari Teoso säkire. Iuasaaki Exito auakani auite omanäkarauata. Iuaritika !ipikari iua. Imiteenekari ikinipoko, kotxi auikari Matamatakoti säkire. Atamatakiti säkire auikini atokotxikana, auikari amatamatakiniti säkire. ²⁸ Iua auikari Teoso säkire, ininiã ipaniätari käkiti okiniri soti auite. Eereka ipaniätari itakiniri iarëka Ironakikoätaä tinikata. Ininiã Teoso nitiri ipikitxi mikari iaxitikiri ninoa nopini inapaäpotakasaaki, kona okari Isaeokini merepanika auakani, kotxi atamatari arëkatxi.

²⁹ Käkiti Isaeokini auikari Teoso säkire, ininiã ipiriätarina potxoari uiniti Pökamarariä inakori sonäkakari kimaporiti nopini. Käkiti Exitokini apaka nirekari inapinina ninoa napini atoko. Txamari iuasaaki äparaä kanapiriäpe iua kimaporiti nopini, ininiã ikinika ninoani axäpoätape.

Teoso Säkire Auiäkani Käiatini

³⁰ Isaeokini auikari Teoso säkire, ininiã Xerikoo sitatxiti iakirokana setxi pakini öti. Iuasaaki pirikeri sitatxi äkitakari irikapoakata, kotxi ninoa kamari Teoso säkire iaöka.

³¹ Haapi inakoro kanokarero otxaua mitxi. Eereka oäukari Teoso säkire, kotxi oäpakapana käkiti iuaäthä apokakani, Teoso iokanatakini, ininiã kona okoriä käkiti Teoso säkire mauäkkanikata.

³² Kiripa apikomoni nisäpiretai? Auapitika apikomoni itomaneri käkiti Teoso säkire auiäkani. Kona apakata uatxa nisäpiretinii hite Kitxião pirena,

Paraki pirena, Sāsão pirena, Xepitee pirena, Tavii pirena, Samoeo pirena, apanakini Teoso sãkire sãpiretakani pirena pakini. ³³ Ninoa kãkiti auikari Teoso sãkire. Ininiã inaiatakasaakina Teoso sãkire mauiaãkani, ninoa kãiata. Ninoa kamari atão inakarínoka. Iuasaaki apakaparina Teoso sikaenetakiti. Ninoa okaãka ãkitimoni. Iuaritika kona ãkiti okana. ãkiti nama totaãka iuasaaki. ³⁴ Xaminamoni okapeẽkana, iuaritika xamina !arikana. Kona apakata okikona iouata mitarõã. Ninoa mataparani, iuaritika kataparax-inirepeka itxana, kotxi auikarina Teoso sãkire. Neenamatchi auakasaaki, pataparana ninoa, ininiã ãti uãka sotatoakori miteka.

³⁵ Sitoakoro Teoso sãkire auiaãkani iuaãkana aua imiakori, kotxi Teoso õkitikana ninoa ipkasaakina. Apanakini Teoso sãkire auiaãkani noropataãka. Imatakanapakaniãrina Teoso sãkire auikinina, okaãkana, iuaritika ninoa ! inirekarina itakanapinirina, kotxi ninoa imarotari ãti õti Teoso õkitikana ninoa. Iuasaaki apiaerekata ninoa apakapakiti.

³⁶ Apanakini Teoso sãkire auiaãkani napetaãka. Inoropataãkana aãpitsaã. Apanakini Teoso sãkire auiaãkani iaxirikaãka, kateia ãki taka inaãkana. ³⁷ Apanakini kiporonakaãka kai soroã. Apanakini kãkiti sehotxiã kitxirãkaãka apanikaki iĩtona, auãkipanika inakasaakina. Apanakini okapeẽka iouata mitarõã. Apanakini mãka soti auĩte mata, potxi mata pakini. ! Kamãkana. ! Katiina. Maerekati kamakani nitana ninoa okinina iãapani. Imisiritapeẽkana. ³⁸ !Apakata iãrapokoriti ninoa iãapani, kotxi ninoa iteene erekari.

Ninoa miteẽkata ãparaã makipakaniãtaã, õtanoxirataru auiniãtaã apaka. Aariko itixiãkiriã, kai iriko ãki apaka apanakini Teoso sãkire auiaãkani aua, kotxi aapokona !aui.

³⁹ Teosomoni peerekana ninoa, kotxi iteene auikarina iua sãkire. Iuaritika ninoa !apakapanikari Teoso sikaenetakiti iuasaaki. ⁴⁰ Teoso nirekari apiari erekari ate iãapani. Inirekana ninoa atekata aãpakapiniri isikaenetakiti.

12

Teoso Oerekari Atão Iua Anaakori Aniniua

¹ Ininiã kaiãopokori Teoso sãkire auiaãkani itixine apokakani atamataua ate uatxa. Ininiã matakanapari ikinika ate iomakotetakari. Matakanapari maerekati akamakiti, kotxi ikara patimari iaxirikiniri axinire. Ataparax-inireritika maãuako. Mamĩteenekari ikinipoko. Mitekakani mitekinĩ atoko mamitekako Teoso oerekinimoni. ² ãtipirika maãtamataru Xesosi. Maãuikari iua sãkire, kotxi iuanoka amaerekani makatzakakari. Iua txĩkitakaua ate atão aãuikiniri Teoso sãkire. Xesosi xinikari poxokonitxi apokini õti, ininiã iuasaaki imĩteenekari aamina ipiriãmitakari nopini ipinini. !Imãkatari pẽtatxi ikara atoko ipinini. Ikinipoko iposo atoko iitopãka iri kikomoni, kotxi iparĩka ate iãapani iposope. ³ Hĩxinikariko Xesosi. Iteene imĩteenekari maerekati kamakani manirekakaniri iua. Hĩxinikariko iua, ininiã kataparaxinirei hĩte. Iuasaaki !hiõkapeta.

⁴ Hĩarẽka kona xiketapanika maerekati hĩtakanapini xika. Ininiã hĩte kona naiataru maerekati iua Xesosi naiatiniri atoko. ⁵ Atxiĩti himaxinĩkaretari Teoso sãpiretakiti ate isikataparaxiniretini iãapani. Iua akiritaua iua anaakori aniniua. Ia isãkire:

Namarite, Apiananiri auiritai pite atatsiiruatini atão inakari pimaronitini iãapani, ininiã kona pimatinaniuatape iua misiritakasaakii pimaerekani xika.

6 Kotxi Apiananiri misiritana itiretakini maerekati ikamakasaakina, imaerekani itakanapinina ikapani. Imisiritana ikinimane iua anaakori atão inakari imarotinina ikapani.

7 Ininiã himiteenekariko hãri iaxitiki misiritini himaerekani zika. Ikara himisiritiko oerekati Teoso anaakori hininiua, kotxi inĩkatai hite amarini irĩtxi nĩkatini atokokana. Ikini irĩtxi ikorapokoriti auakari misiritari iua anaakori atão erekari ikaminina ikapani. 8 Teoso mamisiritakaniã hite maerekati hĩkamakasaaki, ininiã iua anaakori atão inakani !hĩtxaua. Teoso hõri !itxaua iuasaaki. Ikinimane Teoso sãkire auĩãkani misiritaãka, maerekati ikamakasaakina. 9 Akinika ate irĩtxi auã ikorapokoriti. Ninoã misiritauã maerekati akamakasaaki. Iuaritika ate paxitana ninoã. Apiata apaxitari aĩri iaxiti auakari imisiritakasaakia ate, maerekati akamakasaaki, kotxi axinire iri itxaua. Ininiã akamakasaakiri aĩri iaxiti auakari nireẽkiti, aãuapininiika atxako. 10 Ikorapokoriti auakani irĩtxi misiritauã maerekati akamakasaaki. Mapakananinani ikara atoko ikamana. Imarotakitina iaõka ikamana. Teoso misiritauã maerekati akamakasaaki ereka anini ikapani iua atoko anini ikapani. 11 Amisiritikosaaki, kona apoxokoniua, kotxi patsiiri. Iuaritika eereka akamari atão inakarinoa. Iuasaaki erekaxinireua, kotxi Teoso oerekapekauã atakanapiniri amaerekani imisiritakasaakia.

12 Ininiã hõkitikari hũuako sãpakakari. Hĩkamataratari hĩpotoriki iõkapetakari.

13 Hõeretariko kimapori atão hĩsini ikapani. Ikinika himaerekani hĩtakanapako. Ininiã hĩkamakiti atão inakari aua. Ininiã apanakini hõite atamatakani !rika hite maerekani zika. Ininiã maerekati !ikamana, kotxi hite oerekapekana erekari imarotinina ikapani. Ininiã erekapekana ninoã.

14 Ikinipoko hĩkamako apanakinikata himaneenamauatakani ikapani. Ikinipoko hĩkamako erekarinoka hĩkamini ikapani. Kãkiti makamakanisaakiri erekari, kona atamapananiri Apiananiri. 15 Erepaniko, kotxi atxĩti kona hãpakapari ikinipoko erekari Teoso siãkiti. Kona hãuiritapiri kapixi inakari aneini hãkixinireẽ, kotxi ikara maxikari kaiãõri kãkiti. Itxikotari ninoã ãkixinire. 16 Kona hãuiritapiri anokaretxi kamakani auini hitekata. Kona hãuiritapiri Teoso manirekakiniti kamakari Isaoõ atoko inakari auini hite sauaki. Merepitipanika iponaniãkari iua Isaoõ, txamari isikari iri sikaenetakiti itarimoni axapitiki nipokori apakapini ikapani. 17 Eereka iuaĩkana inirekamari ikara iri sikaenetakiti. Inirekari iri takiniri erekari iuamoni, txamari ! apakataika iua apakapiniri. Itxiapata, kotxi mitxi ikamakiti inirekari imamakini, txamari iposope itarimoni iri sikaenetakiti isikini.

18 Kitxakapirĩka kãkiti Isaeokini sari ixirata Sinai inakorimoni Teoso paniãtakiti apakapinina ikapani. Iuasaaki ixirata arika. Ipiã, itima kataparari apaka aua iuasaaki. Ikara atoko inakari ixiratamoni kãkiti maãtakakitimoni !haãpoka. 19 Ixirata Sinai inakoriãtaã kãkiti kenakotari trõpeta. Ikenakotari iaxitiki sãkire. Iuasaaki iteene ipĩkarena auana, ininiã ! inirekaikarina ikenakotinirina apikomoni ikara sãkiretxi. 20 Kotxi iuasaaki !imiteenekarina ia Teoso paniãtakiti, kotxi iuasaaki Teoso txari: "Kãkiti, pirãtxipeka apaka maãtakiniãri oxiratari, ikiporonakaãkana kai soroã ipininina ikapani." 21 Iua xirata auite kamarini kãkiti ipikarauatini. Iuasaaki Moisesi txari: "Nitinanaka. Iteene nipĩkarauata," itxa.

22 Hite kona apoka oxiratari Sinai inakorimoni. Hite apokapeka ixirata auite iaxitiki Siao inakorimoni. Hãpokapeka Xerosareẽ sitatxiti iaxitikirimoni, Teoso ãtipirika auãki inakari sitatxineãtaã. Hite apokapeka Teoso nitriakori iaxitiki apotiitiniãtaãua. Ninoã iaõtiko !auari, kotxi kaiãopokori. 23 Hite apopeka Teoso mereẽkini apotiitiniãtaãua. Ipoxxokoniuatana. Teoso anaakori itxauana. Iuãkana iõkatsopatapeãkaika Teoso aãtsopateẽ itixineẽ. Hite

apopeka Teosomoni. Iuara sãpiretari kãkiti misiritiko. Apaka iua ìkitxitana atão inakari kamakani erekari ikamakiti ìkapani. Hìte apopeka erekari kamakanimoni. Teoso txìkitakana ninoa atão inakari ikaminina. ²⁴ Hìte apoka Xesosimoni. Iuara txìkitakari Teoso kamaenetakiti amaneri apokini. Xesosi arëka xiketakasaaki, hìte apoka Teosomoni. Apeo oxiketari pirãtxi arëka imaerekani makatzakiko ìkapani. Kristo oxiketari iuaka arëka àtikatika amaerekani imakatzakini ìkapani, ininiã Kristo arëka apiaerekata.

²⁵ Ininiã erepaniko. Hìkenakotariko Teoso sãkire isãkirauatakasaaki. Kitxakapirìka kãkiti manirekakaniãri Teoso sãkire sãpiretakari ìkorapokoriti auakari, imisiritaãkana. Imitekinina ! auari. Teoso tixine auakari sãkire amanirekakaniã, apiata amisiritiko. Amitekini ! auari, ininiã erepaniko.

²⁶ Teoso misãkiretakasaakiri Moisesi, itixi iakeka. Uatxa Teoso sãpiretari ikamaenetakiti. Itxari: “Iuaìkana niõkokariko itixi. Niõkokariko iaxiti apaka,” itxa. ²⁷ Isãkire “iuaìkana,” kotxi iõkokariko ìkinipoko ikamakiti. Ninoa makatzakaãkako. Auapitikako maiõkokaetãkoni. Ikara kaikotako.

²⁸ Teoso auìtetxi ininiãtaãua, ate sinimoni, !iõkokaãka. Iuaãtaã ixipokini ! auari. Ininiã mapoxokoniuata. Masãpiretari iua: “Peerekai pite.” Atão maparìkauata Teoso ìkapani. Makamari iua apokaerekatakiti. Mapaxitari iua. Mapìkari iua manirekakiniti akamini. ²⁹ Kotxi aTeosone xipokari imanirekakiniti, xamina tirinakari xipokiniri atokokana.

13

Iõkatsopari Mapotõkire Pirena

¹ Ininiã hìtiretakakauako. Itaritxi atoko hìtxako, kotxi Teoso anaakori hìtxaua. ² Àtiãtaã ìkani apokiniã, hãpakapanako ninoa haãpoko. Apanakini apapakapasaakina àtiãtaã ìkani, apakapana Teoso nitiriakori itixinekini. Iuasaaki ìmarotarina ninoa Teoso nitiriakori ininiuana. ³ Hìtìretanako Teoso sãkire auiaãkani kateia ãki auakani. Kateia ãki ninoakata hãuini atokokana, hìxinikanako ninoa. Ininiã hìtìretanako misiritakoni. Kãkiti misiritiniã hìte, iuasaaki hinirekari apanakini tiretini. Iua atokotxikana hìtìretanako misiritakoni.

⁴ Hìpaxitaroko àti ìtanoro. Hìpaxitariko àto ìtaniri. Pìtanirikatanani pisirìkako. Pìtanorokatanani pisirìkako. Teoso misiritanako ìkinika kanokarero, kanokareri pakini.

⁵ Txineiro !hìtìretepe. !Hinirekapiri àti kãkiti nakiti. Hìpoxokotariko hìteka tii, hìteka txineirote pakini. Apikomoni !hinirekape, kotxi Teoso txari: Nimatakanapapekaniikaraiko hìte. Nimasikapekaniikaraiko hìte, itxa. ⁶ Ininiã ia Teoso sãkire iõkatsopatakori aãuika:

Apiananiri nimoianari itxaua, ininiã kona nipìkari kãkiti kaminiri maerekati notamoni.

⁷ Hìxinikariko hãuìteakori Teoso sãkire hìtemoni sãpiretakani. Hìxinikariko ninoa auini, ninoa ipinini apaka. Hãuikariko Teoso sãkire ninoa auikiniri atokotxikana. ⁸ Xesosi Kristo kitxakapirìka atokotxikana uatxa. Xesosi Kristo uatxa atokotxikana àtipirika.

⁹ Kona hãuikapiri apanakini oerekakiti atão minakati, kotxi ikini sereti oerekakori atão minakati auapitika. Hãuiritariko ìkinipoko erekari Teoso sikakiti sikataparatiniri hãkixinire. Anikakiti ! isikataparatarari aãkixinire, ininiã !hãuikapiri kãkiti sãpiretini apanakini nipokori erekari hìxinire ìkapani, apanakini nipokori !erekari hìxinire ìkapani.

¹⁰ Sasetotxiakori Teoso aapoko aamata kamakori ãki parìkauatakani Teosomoni sikakori takikoãtaã !apakaparina erekari Teoso sikakiti ate apakapiniri atokokana.

¹¹ Teoso aapoko aamata kamakori auakasaaki, sasetotxiakori auïte api-atakari anikari pirãtxi arëka Teosonani Auini Pakitaãtaã. Iuaã isikari pirãtxi arëka Teosomoni kãkiti maerekani Teoso makatxakini ïkapani. Iua pirãtxi ïto anikaãka aapokotxi mapotökire. Iuaã arikaãka. ¹² Xesosi pirãtxi okakori atoko itxa, kotxi anikaãka sitatxi mapotökire okiko ïkapani. Ininiã iua arëkaã imakatzakari kãkiti maerekani, ikamaerekatina ïkapani. ¹³ Ininiã masa iuamoni ipininiãtaã. Iua napetiko atokokana maãpakapa. ¹⁴ ïkorapokoriti kona aua sitatxi maxipoãkati. Aiãtapari sitatxi iaxiti ïkari.

¹⁵ Kipa asika Xesosimoni Teoso ïkapani? Ætipirika masikari asãkire erekari. Matxari: “Peerekari Teoso.” Ikara asikakiti Teosomoni, kotxi asãpiretari kãkiti iua aãuïte ininiua. ¹⁶ !Himaxinïkaretapiri erekari hïkamini apanakini-moni. !Himaxinïkaretapiri himoianatakiniua. Ikara atoko akaminiã, Teosomoni asikakiti inireëkiti atoko itxa, ininiã ikara atoko inakari akaminiã, ikamapoxokonitari Teoso.

¹⁷ Hïkïpitariko hïauïteakori sãkire. Hïkamariko ninoa paniãtakiti, kotxi ninoa nïkatari hïxinire. Teoso sikari ikara parïkatxi ninoamoni, ininiã ãti òti ninoa sãpiretari Teoso ikamakitina. Ininiã hïkamariko ninoa paniãtakiti, ininiã iusaaki ninoa poxokoniuaa iparïkauatakasaaki. Himakamakaniãri ninoa paniãtakiti, ninoa matinaniuata, ininiã ikara atoko inakari !erekari hïte ïkapani.

¹⁸ Himisãkiretariko Teoso ate ïkapani. Aimarotari aãkixinire ereka inini, kotxi anirekari ikiniõtika atão inakarinoa akamini. ¹⁹ Iteene namanaã himisãkiretiniri Teoso, iua païtiki iokanatinino iuaïkana hïtemoni.

Teoso Misãkiretiko

²⁰ Nimisãkiretari Teoso, kãkiti kamaerekaxiniretakari. Aãuïte Xesosi ipïkaripeka inakasaaki, Teoso õkitikari iua. Soti auïte atoko atxaua. Soti auïte nïkatakari apiari atoko itxa Xesosi, ininiã iua iteene nïkataua. Xesosi ipïkasaaki, iusaaki kãkiti apakapari Teoso sikaenetakiti. Ætipirika Teoso sikari ikara isikaenetakiti kãkitimoni. ²¹ Nimisãkiretari Teoso isikiniri ikinika erekari hinireëkiti hïtemoni, iua nireëkiti hïkamini ïkapani. Namanaãri iua Xesosi Kristo uãkaã, ikaminaua ate iua apokaerekatakiti. Ætipirika kãkiti txari Xesosi: “Erekai pite.” Ameë.

²² Nitariakori, iteene hïkenakotariko ikara nisãpiretakiti. Ia niõkatsopatakiti xapitinoka.

²³ Ninirekari himarotiniri aïtari Tximótxio kateia ãki auakari sikakaãka. Mokatanitika iua apokiniã uai, nota sari iuakata hïtemoni. ²⁴ Hïãpiretari hïauïteakori ate xinikamanapitinina ninoa. Hïãpiretari ikinimane Teoso nakitiakori axinikamanapitinina. Xesosi sãkire auïãkani uai Itãria tixini auakani xinikamanapitai hïte. ²⁵ Ikinipoko erekari Teoso sikakiti aua hïtemoni.

Ameë.

TXIAKO

Txiaiko Iokanatsopatakiti

¹ Nota Txiaiko. Teoso nitiri nitxaua. Apiananiri Xesosi Kristo nitiri nitxaua apaka. Niökatsopataria aätsopa hitemoni, Xoteoakori tosi nirimanetximoni Xesosi säkire auläkanimoni. Hite iarikape ikinika itixiti.

Ereëkai hite.

Auiäkori Ataerekatikoi

² Nitariakori, ikini sereti maerekati apokasaaki hitemoni, hieneniäkako, kotxi ikara ataerekatai hite. ³ Kotxi himarotari häuiäkiti ataerekatikosaaki, hitparaxinireritika häua. Himiteenekari imakinika himisiritiko hipoxokoniritika. ⁴ Ininiä imakinika himiteenekasaaki, hixinikakiti, hisäkire, hikamakiti pakini erekari. Kona apikomoni pinireka ereka pinini ikapani.

⁵ Himarore mauakanisaaki, hamanaäri Teoso imarore isikiniä ikapani. Ininiä isikaiko hite hamanaäkiti. Itori Teoso sikakiti ikinimanemoni. ! Isäpaka ate ätipirika aamanainiri iua. ! Itxitai. Isikapitkari hamanaäkiti. ⁶ Hamanaäkasaakiri, häuikariko Teoso sikiniä hamanaäkiti. ! Erekaru hixinikiniri: "Atxiiti iua sikano namanaäkiti. Atxiiti kona isikano namanaäkiti." Ikara atoko ! hixinikape. Ikara atoko xinikakari, tsakati potxoari uinitikiri atoko itxa. Itima anikari tsakati itano, eereka ixitika. Käkiti ikara atoko inakari, äti öti auikari Teoso säkire, äti öti kona auikari Teoso säkire. Itxaäpota.

⁷ Käkiti ikara atoko inakari kona xatiki apakapari Apiananiri siäkiti, ⁸ kotxi ipi ixinikakiti aua, ininiä apanakini ! auikari isäkire ikamakiti tikane.

Matiiti, Katiiri Pakini Poxokoniuatini

⁹ Pite äitari Teoso säkire auiäkari, atxiiti poiäori pitxaua, iuaritika pipoxokoniuatako, kotxi Teoso txikitakai pite apiari pininiua. ¹⁰ Pite katiirii, pipoxokoniuatako, kotxi Teoso kamapoiäotakai pite, kotxi katimari pixipokini äui katimari xipokini atoko. ¹¹ Atokatxi kanikasaaki, kapatakari itxaua. Iuasaaki katsotati txiaroka. Iiui katxaka. ! Erekaikaro. Iua atokokana käkiti katiiri xipokini. Päitiki ipinako, ininiä itakanapariko imakinika itii, iparika pakini.

Misirikaretxi Miteenekakani

¹² Teoso takari erekari käkitimoni imisiritiko miteenekakarimoni, Teoso säkire matakapanakatimoni. Ikinipoko imiteenekasaaki, Teoso txikitakari iua ätipirika auini Teosokata. Apiananiri sikaenetari ikara iua tirketanimoni.

¹³ Pinirekasaakiri maerekati pikamini, kona pitxapiri: "Teoso sikanireötano maerekati nikamini," kotxi Teoso kamanireötiko maerekati ikamini ikapani ! auri. Apaka kona Teoso sikanireötari käkiti maerekati ikamini ikapani. ¹⁴ Käkiti sikanireötaäka maerekati ikamini, kotxi iua ito nireëkiti kosekari iua maerekati ikamini. Iuasaaki iteene inirekari inireëkiti ikamini. ¹⁵ Maerekati piito nireëkiti pikamakasaaki, maerekati itxaua. Ininiä eereka maerekati pikamapika. Eereka iua maerekati txikitakari pixinire ipinini.

¹⁶ Nitariakori nota tirketakini, kona häuiritapiri äti misirienetini. ¹⁷ Ikinipoko sikakori erekari atäo inakari, iaxitikiri itxaua. Äiri sikakiti ikara. Iuara kamari atokatxi, kasiri, iöriki pakini ponikini. Iua ätipirika kamari erekarinoka. Kita, uatxa, katana pakini, iua atokotxikana äiri Teoso. ¹⁸ Aponaniä iuaäkana ääkinireë, kotxi äauikari iua säkire. Iua nirekari aponaniäni ikara atoko. Teoso kamari ikinipoko. Ikamakini, merepanika iuaäkana ponaniäkani, atxaua ate.

Teoso Sākire Kīpitiko Pirena

¹⁹ Ininiā nitariakori nota tiretakini, iteene himixinikariko āti sākire. Eereka iteene hixinikariko hikenakotakiti, hīsākirauatini apisapanika. Katima ! hītxape hinaiatiniua. Hinaiatiniua apisa hixinikariko hīkamakiti tīkane, ²⁰ kotxi kākiti omanākarauatakasaaki, !ikamari atāo inakari Teoso paniātakiti iaōka. ²¹ Ininiā hōkariko ikinika maerekati hāixixinire txikotakari. Hītakanapariko ikinipoko maerekati. Hāuikariko Teoso sākire hāixixinireē takakori. Himarotariko iuanoka makatxakiniri himaerekani.

²² Teoso sākire akenakotakanani atxa, !hītxape. Hīkamariko isākire iaōka apaka. Teoso sākire kenakotakani makamakaniāri ipaniātakiti, ninoaka misirienetaua. ²³ Teoso sākire kenakotakari makamakaniāri isākire iaōka, kiki ātakaāriā atamatoōtakari atoko itxa. ²⁴ Iua itoō atamataka atoko, isa. Iuasaakipeka imaxinīkaretōōtapekautau. Isanōka !ixinikaika. ²⁵ Ikinika Teoso paniātakiti erekari. Maerekati kamakani iaxirikakoni atoko. !Iposotarina erekari ikaminina. Ininiā kākiti kamakasaakiri Teoso paniātakiti, Teoso paniātakiti sikakari kākiti erekari ikamini īkapani. Kākiti iteene imarotiniāri Teoso paniātakiti, imamaxinīkaretakanianāri, ātipirika ikaminiāri, ininiā Teoso takari erekari iuamoni, ikamakitimoni.

²⁶ Kākiti sāpiretiniāri: “Nota auikari Teoso sākire. Nikamari iua sākire iaōka,” txamari kākiti nini iauīte atoko itxa. !Iposotari iotokakiniri maerekati isāpiretini. Iuaka misirienetaua. Iua auīākiti na atāo. Ikamakiti na atāo apaka. ²⁷ Kākiti auīākiti atāo inakari auakasaaki, ikamakiti atāo inakari auakasaaki, aīri Teoso apokaerekatari. Iua kākiti kamari ia atoko: Itiretana imenōkariakori, tikinitakoni pakini, kotxi mauareni ninoa. !Auiritari īkorapokoriti maerekati txikotiniri iua āixixinire.

2

Hīpaxitana Ikinī Kākiti

¹ Nitariakori, Xesosi Kristo aūiute Apiananiri itxaua. Iua sākire atāo auīākani hininiāua, ininiā hīpaxitariko ikinimane kākiti. !Apakata hīpotxitakininani hītiretini. ² Maxinikariko. Atxiīti hāpotiitakasaakiaua, kiki apoka eremākari. Iuakokiā aneo oro kamakoro aua. Apaka iuasaaki apoka āti kiki matiiti. Kitxakari imāka. ³ !Apakata hīpaxitiniri eremākarinoka. Hīsāpiretiniāri: “Uai iitopanatxi ereri nopini piitopāka,” pitxari. Txamari hīsāpiretari matiiti: “Ikiraā pitima.” Atxiīti hīsāpiretari iua: “Uai iixiti nikiti takote piitopāka,” pitxari. Ikara atoko hīkaminiā, !apakata. ⁴ Ikara atoko hīkamakasaaki, hīxinikari katiiri apiaerekatini, matiiti poiāo ereka inini. Iuasaaki hīxiniākiti na atāo itxaua. Hāixixinire maerekati itxaua.

⁵ Nitariakori nota tiretakini, hīkenakotariko nisākire. Teoso mereēpekari matiini īkorapokoriti auakani isākire iteene auikinina īkapani. Ininiā ninoa Teoso tiretakani sariko Teoso auītetxi ininiātaāua. Ikara isikaenetapeka iua tiretanimoni. ⁶ Txamari hīte kona paxitana matiini. !Apakata. Katiirinira misirienetai hīte. Ninoa anikai hīte kākiti misiritiko mereēkanimoni. ⁷ Ninoa katiirinī misākirepiretari Teoso. Peerekari iua uāka, iuaritika ninoa kona paxitari iuāka. Ninoa misākirepiretakiti nakitiakori hītxaua hīte.

⁸ Kitxakapirīka Teoso sākire iōkatsopatakori txari: Piteka pitiretiniua atokokanera, pitiretanako pite takote auakani. Ikara ikinimane auīte paniātakiti hīkaminiā, hīkamari atāo inakari. ⁹ Hītiretiniāri hīpotxitakininani, maerekati hīkama. Ikara Teoso paniātakiti oereka maerekati kamakani hininiāua. ¹⁰ Ikinika Teoso paniātakiti hīkaminiā, txamari ātinoka Teoso paniātakiti himakamakaniā, ininiā ikinika ipaniātakiti makamakani atoko hītxaua. ¹¹ Teoso txari:

Kona pisirĩkape pĩtanoro minakotokatika.

Apaka itxari:

Kona pokaniuatape.

Atxiĩti kona pisirĩka pĩtanoro minakotokatika, txamari pokaniuata, ininiākara !pikamari ikinika Teoso paniātakiti. Ātika Teoso paniātakiti pimakamakaniā, !apakata. Ikara atoko ininiā, Teosomoni maerekati kamakari pitxaua.

¹² Teoso sākire iaōka akaminiā, aposotari erekari akamini. Ōpoĩkakoni atoko atxaua. Maerekati !imaĩkaikaua. Ininiākara atāo hīsākiraauatakō. Atāo inakari hĩkamako, kotxi Teoso kamariko hĩtemoni isākire iaōka. ¹³ Himaamonĩkakaniāri āti, Teoso kona amonĩkai hĩte. Imereēri himisiritiko. Apiaerekata hiamonĩkiniri āti, maerekati ikamakasaaki. Poiāo erekari himisiritiniri iua imaerekani xika.

Kākiti Sākire, Kākiti Kamakiti Pakini Pirena

¹⁴ Nitariakori, kākiti txari: “Nota Teoso sākire auĩākari nitxaua,” itxamari, !ikamari Teoso nirekaākiti. Atauako iua auikari Teoso sākire? Atauako, iua sākire posotari imaktxakiniri imaerekani Teosomoni isini ĩkapani? Konapitini. ¹⁵ Atxiĩti hĩtari, atxiĩti hĩtaro Teoso sākire auĩākari imākana !auari. Atxiĩti nipokori !auari ninoamoni. ¹⁶ Iuasaaki atxiĩti hĩtxana: “Hĩsipiniikaua, erekaxinire hinini. Kamākaiko. Iteene hinikako,” hĩtxana atxiĩti. Txamari iuasaaki mākatxi !hĩsikana, nipokori !hĩsikana. Ikara atoko hĩkaminiā, !apakata hĩkamakiti. Hīsākirenanira hĩsikiniā, ininiā maxikatiĩka hīsāpiretakiti. ¹⁷ Atxiĩti ikara atoko atxa. Asāpiretari aũuikiniri Xesosi sākire. Txamari kona akamari ipaniātakiti. Ikara atoko aniniā, asākire kona itxa. Aũuĩakiti sākiretxiti ipinakari atoko itxa. !Kakamareri iua.

¹⁸ Kākiti atxiĩti txari: “Pite auikari Teoso sākire. Nota parĩkauata Teoso ĩkapani.” Puposotari atxiĩti poerekinino pauĩakiti, Teoso paniātakiti pimakamakaniisaaki? Kona piposota, kotxi atāo pauĩakiti !auari. Notapekana, nota posotari noerekiniri nisākire nauĩakiti nikamakitiā Teoso paniātakiti nikamakasaaki. Ikara atoko nininiā, kākiti imarotapitikari atāo nauikiniri Xesosi sākire. ¹⁹ Pite auikari ātinani Teoso auini. Ininiā erekapitikari pauikakiti. Txamari ikara !imakatzakari pimaerekani Teosomoni pisinĩ ĩkapani, kotxi Satanasi nitiriakori apaka auikari ātinani Teoso auini. Iua xika ninoa titinanaka ipikarauatiniāna. Ninoa imarotari āti ōti ixipokinina.

²⁰ !Kĩkĩteite pite. Pinirekatari noerekinii !apakata pisākireē pauikiniri Xesosi sākire, iua paniātakiti iaōka pimakamakaniisaaki. Iuasaaki pisākire na atāo. Ipihari atoko itxa. ²¹ Maxinikariko ate apika atokirinĩ, Apraāo. Kitxakapirĩka isikasaakiri amarite Isaki inakori Teosomoni sikakori takikoātaā, iuasaaki Teoso apokaerekatari ikamakiti, kotxi ikamakiti oerekari Teoso, iua auikiniri isākire, ininiā Teoso kamaerekatari iua. ²² Ininiā himarotari atāo iua auikiniri Teoso sākire. Ikamakiti oerekari isākire atāo inini. Hĩxinikari iua. Atāo ikamari Teoso paniātakiti, ininiā atāo iua auikari Teoso sākire.

²³ Ininiā Teoso sākire iōkatsopatakori apokapeka. Itxari:

Apraāo auikari Teoso sākire, ininiā Teoso txĩkitakari iua atāo inakari ikamini, Teoso apakapiniri ĩkapani.

Ininiā iua akiritaāka Teoso moianari. ²⁴ Ininiākara ia himarota. Teoso kamaerekatari kākiti ākixinire isākire iaōka ikamakasaaki. Kona Teoso kamaerekatari kākiti ākixinire, isākirenoka auakasaaki. Inirekari atamatiniri kākiti parĩka apaka.

²⁵ Āto atāo Teoso sākire auĩākaro nisāpiretai hĩte. Kitxakapirĩka kanokarero Haapi inakoro aua. Teoso kamaerekatari oa ākixinire, kotxi oa apakapanā Xosoe iokanatakini otixine apokasaakina. Oaāpoko okipatana ninoa. Iuasaaki oa oerekana āti kimaporitĩ imitekinina ĩkapani.

²⁶ Käkiti itoã ixinire mauakanisaaki, iua ipïpe. Iua !kakamareri. Ininiã iua atokokana iua säkire iua auiäkiti ipinakari atoko, erekari imakamakanisaaki. Iua auiäkيتينani, isäkirenani, !imakatzakari imaerekani.

3

Käkiti Nini Pirena

¹ Nitariakori, !apakata itori hïte Teoso säkire oerekakani hininiua, kotxi ate Teoso säkire oerekakani maerekati akamakasaaki, apiata Teoso misiritaua ate. ² Amakinika ate kerokapanikari. Käkiti makerokakaniãri isäkire, ininiã erekari iua. !Auiritari iïto kaminiri maerekati.

³ Anirekasaakiri kavaro kïpitiniri anireëkiti, atakari inamaã metaoke ïpiriãketakari. Ininiã iuasaaki ikamariko anireëkiti. Ia metaoke axapitikeri, iuaritika aposotari akakiriokiniri kavaro, ininiã isari anirekinimoni.

⁴ Apaka hïxinikaroko maporo. Maporo mitaro. Itima kataparari anikaro. Maporo oerekakire axapitiki, iuaritika käkiti kakiriokaro maporo oerekakireë, ininiã maporo sari käkiti nirekinimoni.

⁵ Iua atokokana, aïtoã auakari anini apaka axapitiki, iuaritika iposotari iteene maerekati ikamini. Hïxinikariko. Xaminaminiki axapitiki, iuaritika iposotari iotikiniri itori kikio. ⁶ Iua atokokana ninitxi. Xamina tirinakari atoko itxa, ininiã kona erekari. Maerekati ninitxi säpiretakiti. Iarika käkiti xinireë ikinika, xamina itopa iarikini atoko. Ininiã iua maekatinoka itxa, ininiã ikinipoko ikamakiti maekatinoka. Maerekani misiritikoãtaã ikari itxa asäkire maerekati. Xamina tirinakari iuaãtaäkiri atoko itxa asäkire maerekati.

⁷ Käkiti piratari ikini sereti kaxipiri itopakiri, kotipiriki, imini, iaã auakari pakini. Itori käkiti piratapeka. ⁸ Txamari ninitxi paneenamari. Käkiti ! iposotari imïkapiritiniri inini. Kona ikamari anireëkiti. Imini katsiiri atoko itxa. Imini tsii posotari okiniri käkiti. Iua atokokana, käkiti säpiretakiti posotari okiniri käkiti.

⁹ Anini posotari isäpiretiniri erekari aïri aäuïtemoni. Apaka iposotari maerekati isäpiretini käkitimoni. Itora atoko !erekari, kotxi Teoso kamari käkiti iuaka atoko inakari ikapani. ¹⁰ Anamaã potorika erekari, maerekati pakini. Nitariakori, ia koketakori na atão. !Apakata. ¹¹ Amomo !oposotari äparaã ponikoãri, posiãri pakini otxïkitakini. ¹² Nitariakori, atauako mäka mina iritari iöpetã? Atauako iöpetã mina iritari mäka? Konapitini. Apaka amomo äparaã ponikoãri !auari äparaã maxiãri pakini. Iua atokokana käkiti säkire. !Apakata käkiti äti öti isäkire ereka inini, äti öti isäkire maerekati inini.

Imaroretxi Pirena

¹³ Kiripa kimaroreri hïte sauaki auakari? Käkiti atão kimaroreri inakari, oerekari imarore ikamakiti erekari ikamakasaaki. Erekari ikamakasaaki, !iuikaua, kotxi atão imaroretxi auiniã käkitimoni, !auiritari iua iukiniua. ¹⁴ Txamari pinïkatiniãri xikoretxi papixiri päkixinireë, piteka nireëkitinani pinirekinia päkixinireë, kona pitxape. "Kimaroreno nota." Iuasaaki kona pikipatapiri atão inakari. ¹⁵ Itora pimarore !iaxitikirini. Itorapokoritikirinokara ikara pimarore. Ikara pimarore piïto nireëkitikara. Imaroretxi ikara atoko inakari Satanasi oerekakiti. ¹⁶ Xikoretxi auakasaaki, piteka nireëkitinani pinirekini auakasaaki, ikara atoko inakasaaki, neenamatinoka aua, ikini sereti maerekati aua apaka.

¹⁷ Imaroretxi iaxiti ikari kona ikara atokoni itxa. Iua imaroretxi imarotakari, erekarinoka ikama. !Inirekari neenamati. Merepitipanika ixinikari apanakini käkiti nireëkiti. Apiananiri nireëkiti ikama. Iamonïkari

āti. Erekarinoka ikama ātimoni. Apiarimoni isākire atokotxikana isākire poiāorimoni. Ikamakiti isākire iaōka itxa. ¹⁸ Kauaīreri ōtākikari apanakini imaneenamauatakani, ininiākara itori kākiti kamari atāo inakarinoka.

4

Īkorapokoriti Auakani Nireēkiti !Hinirekape

¹ Neenamatzī auakasaaki hītemoni, hītixitakakasaakiaua, nāpa ikara atoko inakari potorika? Hākixinireē ipotorika neenamatzī. Hinireēkiti maerekati xika hineenamauata. ² Hinireēkiti kona hāpakapa, ininiā hōkari āti. Iteene hinirekari āti nakiti, txamari !hāpakapari hinireēkiti. Hītixitakakaua. Hineenamauata. Txamari kona hāpakapari hinireēkiti. Kona hamanaāri Teoso hinireēkiti hāpakapini ĩkapani. Ikara xika kona hāpakapari hinireēkiti. ³ Atxiīti Teoso hamanaākasaaki, kona hāpakapari hinirekakiti, kotxi hamanaākasaaki, maerekati hīxinikapanika. Hinirekari hāpakapiniri hamanaākiti hītenani ĩkapani, hītenoka poxokoniuatini ĩkapani. Ikara xika Teoso lisikai hinireēkiti.

⁴ Kanokarero, kanokareri pakini atoko hītchaua. Hīte takanapari Teoso, ĩkorapokoriti auakaninoka hītiretini ĩkapani. Hītiretiniāri ĩkorapokoritinoka, iusaaki homanatarī Teoso. Hinirekiniāri ĩkorapokoriti auakani nireēkiti, ininiā Teoso mokaiakari hītchaua. ⁵ Kona maxikatīlka Teoso sākire iōkatsopatakori sāpiretaua ia atoko inakari: Erekarī Matamatakoti aākixinireē auakari nirekari iteene anirekiniri Teoso tīretiniua. Iua !inirekari anirekiniri ĩkorapokoriti auakaninoka tīretiniua.

⁶ Teoso sikari iteene erekari atemoni, kotxi Teoso sākire iōkatsopatakori txari: Teoso !apokaerekatari kākiti iuikakaniua. !Imoianatana nīnoa. Kākiti miuikakaniua, ikinipoko erekari isika ninoamoni.

⁷ Ininiā hāuiritariko Teoso hīlauīte ininiua. Iua nireēkitinoka hīkamako. Kona hīkamapiri Satanasi nireēkiti. Kona hīkīpitapiri iua sākire, ininiā eereka iua miteka. ⁸ Teosomoni hāpokako, ininiā iua apoka hītemoni. Maerekati kamakani hininiāua, hītakanapariko himaerekani. Kona hāuiritapiri hīuako kaminiri maerekati. Hītepekana, hīte sākire ipinimoni itxa. Hākixinire xinikakiti ipinimoni itxa. Ininiākara hīokanatariko maerekati hākixinire auakari, erekarinoka kaikotini ĩkapani. ⁹ Himatinaniuatoko, hītxiapatoko iteene, maerekati hīkamakiti xika. Hītakanapariko hīsīroatini hītxiapatini ĩkapani. Hītakanapariko hīpoxokoniuatini himatinaniuatini ĩkapani. Ikara atoko hīkamako, maerekati hīkamakiti xika. ¹⁰ Apiananirimoni hītchariko: “Nīmaerekani xika !erekano nota. Minakati nītchaua. !Niposotari erekari nikamini. Piamonīkano,” hītchariko Teoso. Eereka iua sikataparaxiniretai hīte.

!Himisākirepiretapiri Hītari

¹¹ Nitariakori, !himisākirepiretakapeua. Āti misākirepiretiniāri āti, kona ipaxitari Teoso paniātakiti. Āti akiritiniāri āti: “Maerekati kamakarii,” akiritari Teoso paniātakiti: “maerekati.” Ikara atoko inakasaaki, iuamoni iuaka sākire apiata, ininiā iua !ikamari Teoso paniātakiti iaōka. ¹² Teosonokara atāo inakari imarotakari aua. Iuanoka posotari isāpiretiniri kākiti: “Pīte kamakiti kona erekari. Pītepekana kamakiti erekari.” Iuanoka posotari ikara atoko inini, kotxi iuanoka posotari kākiti maerekani imaktxakini. Iuanoka posotari iokanatiniri kākiti imisiritikomoni. !Apakata ikara atoko hīte ininiri apanakini.

Katana Kamaenetakori

¹³ Atxiīti hīte txari: “Atxiīti uatxa, atxiīti katana asa sitatximoni. Anapariko ātikanani iuaātaā. Aparīkauata itomane txineiro aāpakapini ĩkapani,” hītchama.

¹⁴ Txamari kona himarotari katana auakari tġkane. Kanatokopa itxa kġkiti? Ianiġ atoko itxa kġkiti. Ianiġ apoka, eereka patimari ixipokini. Ikara atoko kġkiti auini. ¹⁵ Apiaerekata hġsġkire ia atoko hinini: “Teoso nirekiniġari, nauapanika ninakasaaki, nikamariko ikara parġkatxi,” hġtxako. ¹⁶ Ikara atoko himasġkirauatakaniġ, hġuikaua, kotxi hġuikari hġkamakiti tġkane. Maerekati ikara atoko inakari. ¹⁷ Ininiġ erepaniko. Kġkiti erekari imarotakani makamaniġari ikara erekari imarotakiti, ikamari maerekati.

5

Katiiri Pirena

¹ Hġkenakotariko nisġkire. Ikinika katiirini kapotxinanirini hġkenakotariko nisġkire. Hġtxiapatako. Hġkiripoatako, kotxi itori hġtatsiire apokako hġtemoni. ² Hġtii paiakapeka. Kapite nikapekari himġka. ³ Hinakiti oro kamakori, pirata kamakori pakini oereġkatapeka. Ikara oerekari hġkamakiti !apakata. Hġtii xipokini atoko, hġte apaka xipokako. Apiata himisiritiko. Maxikatġka hġpotiitari hġtii, kotxi itixi xipokini ōti apokanapanoka. ⁴ Himarotariko ia. Kġkiti hġte kikioteġ parġkauatakasaaki, himisirienetana ninoa. Na atġo hġkitxitana iparġkana ġki. Ininiġ ninoa akiritari Teoso. Iuasaaki Apiananiri kaposotiireri kenakotari ninoa sġkire. ⁵ ġkorapokoriti hġuakasaaki, ikinipoko aua hġtemoni. Hiamotari ikinika hġto potxitakiti. Kġkiti sikari kema auġte ito kienatġi, okiko ōti manapi paġperi inini ġkapani. ⁶ Hġte iokanatapekari kġkiti erekarini ipininimoni. Hġkapekana ninoa maxikatġka. Ninoani kona naiatai hġte, iuaritika hġkana ninoani.

Apiananiri Kanapiriini Hiġtapini

⁷ Nitariakori, atxiġti hġtemoni !katimari Apiananiri kanapiriini, iuaritika hiġtapariko hġpoxokoniritika, kotxi himarotapitikari ġti ōti iua kanapiriini. Hġxinikariko katakareri. Iua iġtapapikari ġtakare aneini, ikiena iposope inikini ġkapani. Iġtapari ġparaġ kipini ġtakare aneini ġkapani. Iua imarotapitikari ikiena aneini, ininiġ iġtapari. ⁸ Iua atokokana hiġtapariko Apiananiri kanapiriini. Hġtaparaxinireritika hiġtapari, kotxi Xesosi kaiaameka ġkanapiriini. ⁹ Nitariakori, kona hġtxitakakapeua. Hġtxitakakiniġua, hġpakapariko himisir-itiko. Kġkiti misiritiko mereġkari kaiaameka apokini hġtemoni.

¹⁰ Nitariakori, hġxinikariko Teoso sġkire sġpiretakani, kitxakapirġka auakani, sġpiretari Teoso sġkire Teoso posotiireġ. Ninoa misiritaġka, iuaritika ninoa mġteenekari imakinika. Ninoa oerekaua amġteenekiniri imakinika. ¹¹ Ari, aimarotari Teoso takari erekari misirikaretxi mġteeneġkanimoni. Hġxinikari Xo inakori. Iua iteene atatsiirauata, iuaritika, !itakanapari Teoso. Atatsiirauata atoko, Apiananiri sikari ikini sereti erekari iuamoni, kotxi katiraġkiri, kaamonġkareri ġtxaua iua.

¹² Nitariakori, “Ari,” hinakasaaki, “Kona,” hinakasaaki, kona maxikatġka hġsġkirauatape. Hġkamariko hġsġpiretakiti iaġka. Hġkamaenetakiti hġsġpiretakasaaki, kona hġkiritapiri Teoso tixine auakani uġka, kona hġkiritapiri itixi auakani uġka, hġsġpiretakiti apanakini atġo imarotini ġkapani. Na atġo hġsġkire ininiġ, Teoso misiritapitikai.

Teoso Misġkiretiko Kġkiti ġkapani

¹³ Hġtatsiirauatakasaaki, himisġkiretariko Teoso. Hġpoxokiniuatakasaaki, hġxikarauata Teoso ġkapani. ¹⁴ ġti amianatakasaaki, hġġkapiretanako kġtġkikarerini Xesosi sġkire auġġkani Teoso imisġkiretinina amianatakari ġkapani. Iuasaaki itakarina ġtxi iua amianatakari nopini Apiananiri uġkaġ. ¹⁵ Hġuikiniġari Teoso posotiire himisġkiretakasaakiri Teoso, iua makananitapitikari iua amianatakari. Ininiġ Apiananiri ōkitikariko iua.

Maerekati ikaminiã, Teoso makatzakari imaerekani apaka. ¹⁶ Ininiã hïkerokakiti hïsapiretakakauako. Himisãkiretariko Teoso ãti ïkapani. Ininiã apanakini misãkiretariko Teoso hïte ïkapani. Iua atokokana, Teoso txïkitakari hãkixinire ereka inini. Atão inakarínoka kamakari sãkire kataparari, Teosokata isãkirauatakasaaki, kotxi Teoso kamapitikari iua amanaãkiti iaõka.

¹⁷ Kitzakapirïka Eriasi inakori, ate atoko inakari iua. Iua misãkiretari Teoso itapararitika ãparaã makipakani ïkapani. Ikara atoko inakasaaki, ãparaã ! ikipa ipi ãti pakini anokanani, seisi kasiriti. ¹⁸ Iuaïkana imisãkiretari Teoso ãparaã iuaïkana ikipini ïkapani. Ininiã ãparaã kipa. Iuaïkana itixi iriuata.

¹⁹ Nitariakori, ãti takanapiniãri atão inakari Teoso sãkire, hõtãkikariko iua Teosomoni ikanapiriini ïkapani. ²⁰ Maerekati kamakari takanapiniãri imaerekani, iua põtãkikasaaki, ininiã pite makatzakapekari iua ipinini. Teoso makatzakari ikinipoko maerekati ikamakiti.

1 PETRO

Merepanika Petro Iokanatsopatakiti

¹ Petro nitxaua nota. Xesosi Kristo iokanatakiti nitxaua. Niokanatsopata hīte Xesosi sākire auīākanimoni. Hīte iarikape Pōto tixiniā, Karásia tixiniā, Kapatósia tixiniā, Ásia tixiniā, Pitxínia tixiniā pakini. Hītakanapari hīteka tixine Xesosi sākire hāuikini xika. Áti uākakata hāuanāta.

² Aīri Teoso mereēi hīte iua nakitiakori hininiua ĩkapani. Itixi kamiko apisa, iua imarotapekari hīte iua anaakori hininiua. Erekarī Matamatakoti parĩkauata hākixinireē Teoso nireēkitinoka hīkamini ĩkapani. Ininiā uatxa hīposotiire aua Xesosi Kristo paniātakiti hīkamini ĩkapani, kotxi Xesosi Kristo arēka xikepoata hīte ĩkapani. Teoso sikari ikinipoko erekari hītemoni. Itori isikai. Itene ikamaerekaxiniretai.

Kākiti Maerekani Makatxakiko

³ Mamisākiretari Teoso: "Peerekai pite. Aāuīte Xesosi Kristo Teosone pitxaua. Iua iri pitxaua," matxari. Maerekati kamakanuia, iuaritika iteene iamoniākaua. Itxĩkitakari axinire iuaĩkana iponaniini, kotxi Xesosi Kristo ipina, iuaritika iuaĩkana ōkitikaua. Ininiā ikinĩōtika aimarotari Teoso kaminiri ikinipoko ikamaenetakiti. ⁴ Iuaĩkana axinire iponaniā, ininiā iua anaakori atxaua. Ininiā aīri potetakiti erekari aua itixineē aāpakapini ĩkapani. Ikara ipotetakiti !ixipoka. !Oerēkata. Auapika. Teoso nĩkatari ikara hīte ĩkapani.

⁵ Hīte auikari Teoso sākire, ininiā iposotiire tokapakeētai hīte. Hīte itokapakeētirinirika Xesosi kanapiriāko xipokatxi ōtisaaki. ⁶ Ikara himarota, ininiā iteene hīpoxokoniua. Uatxa atxĩti !erekaxinirei hīte, kotxi ikini sereti maerekati apoka hītemoni. ⁷ Ikini sereti himaxikiko apoka hītemoni, kotxi iuasaaki Teoso imarotari atāo hāuikiniri iua sākire, himīteenekiniāri himaxikiko. Iuasaaki Teoso ataerekatai hīte, oro ataerekatiko atokokana. Kākiti axitaro oro otxiko makatxakiko ĩkapani, oronoka kaikotini ĩkapani. Iuasaaki peerekaro. Pakaronero. Iuaritika āti ōti oxipokaākako. Erekaro oro, iuaritika apiaerekata hāuikiniri Teoso sākire, kotxi isākire hāuikini !ixipoka. Xesosi Kristo kanapiriākasaaiki ĩkorapokoriti, Teoso sāpiretaiko hīte: "Erekari hāuikiniri nisākire, kotxi himīteenekari ikinipoko. Peerekai hīte," itxaiko hīte. Iuasaaki hīto iotximere auape Xesosi iotximere atokokana.

⁸ Hīte kona aōkitapanikari Teoso, iuaritika hītiretari iua. Kona hātamatapanikari, iuaritika hāuikari iua sākire. Ininiā hīte iteene poxokoniua. Kākiti sākireē ! apakata hīsāpiretiniri hīpoxokoni.

⁹ Hīpoxokoniua, kotxi himaerekani makatxakaākapeka. Ininiā hīxinire ! ipinaika, kotxi hāuikari Xesosi sākire.

¹⁰ Kitxakapiriāka Teoso sākire sāpiretakani nirekamari imarotininina kākiti maerekani makatxakiko. Initarina ikara imarotininina Teoso sākire iōkatsopatakoriā. Itene apaiaōkarauatana ikara imarotininina ĩkapani. Ninoā sāpiretari ikara erekari, Teoso āti ōti sikiniri kākiti. ¹¹ Inirekarina imarotininina ikara erekari apokini ōti. "Kisaakipa apoka atxĩti? Natokopa itxa apokini?" itxanātana. Iuasaaki Erekarī Mātamatakoti oerekana ninoā ākixinireēna Kristo atatsiirauatini tĩkane. Oerekana ninoā Kristo atatsiirauatini xipoka atoko, ikinimane auīte itxauako. Peerekari iuasaaki.

¹² Kitxakapiriāka Teoso sāpiretari ikamakiti tĩkane isākire sāpiretanimoni, kona ninoanoka imarotini ĩapanini. Ninoā sāpiretari Teoso kamakiti tĩkane hīte ĩkapani, kotxi uatxa apokapeka ninoā sākire iaōka. Kitxakapiriāka Teoso sāpiretari ikamakiti tĩkane ninoamoni, ate uatxa imarotini ĩkapani. Teoso

iokanapirena erekari sãpiretakani sãpiretapekai uatxa ikara Teoso sãpiretakiti kitxakapiriika. Teoso paniãtari Erekaru Matamatakoti potorikini itixine uai apokini ikapani. Erekaru Matamatakoti posotiiree ninoa sãpiretari Teoso iokanapirena erekari. Teoso nitiriakori iaxitikini iteene nirekamari imarotirinina hite imarotakiti.

Ereka Hixako

¹³ Ininiã iposope hixako hixinikini atão inakari hikamini. !Hikamapiri maerekati hũto nireekiti. Iteene hãuikariko hãpakapiniri ikinipoko erekari Teoso sikakiti Xesosi Kristo kanapiriãkasaaki. ¹⁴ Amarini kaminiri iri paniãtakiti atokotxikana, hikamariko Teoso paniãtakiti. Xesosi sãkire himimarotakanisaaki, hikamari maerekati hinireekiti. Uatxa !hikamapinikariko. ¹⁵ Hite akiritakari kamari erekarinoka, ininiã iua atokokana erekarinoka hikama ikiniõtika. ¹⁶ Teoso sãkire iõkatsopatakori txari: Erekarinoka hikamako, kotxi nota kamari erekarinoka, itxa Teoso kitxakapiriika.

¹⁷ Himisãkiretari hiri iaxiti auakari. Atãonoka ikaminana ikinimane kãkiti ipariikana atamatakasaaki. Ininiã kãkiti kamakasaakiri maerekati, airi misiritiniri ãti atokotxikana, imisiritari ãti. Himitekini !auari. Hixinikariko, haãpoko atão inakari ikorapokoriti !auari. Teoso tixinee aua haãpoko. Ininiã ikorapokoriti hãuakasaaki, iteene hãpaxitariko Teoso. Hipikariko iua manirekakiniti hikamini. ¹⁸ Mitxi !apakata hãuini, kotxi iuasaaki hikamari hãtokiriakorini sãkire iaõka. Uatxa Xesosi oerekaã atão hãuini, kotxi iamotai hite, iua nakitiakori hininiua ikapani. Himarotari iamotinii. !Iamotai pirataã. !Iamotai oroã. !Iamotai txineiroã, kotxi pirata, oro, txineiro pakini xipokako. ¹⁹ Kristo arẽkaã iamotai hite, kotxi ipiãkasaaki iamotai hite. Peerekari iua arẽka, kotxi iua arẽka makatxakari amaerekani. Soti auite erekari atoko itxa Kristo. Kona maerekati aua iuamoni. ²⁰ Itixi kamiko apisa, Teoso mereeri iua. Iua apoka uai himaerekani imaktxakini ikapani. ²¹ Xesosi txikitakai hite auikiniri Teoso auini, kotxi Teoso iuaikana õkitikari Xesosi ipikani sauaki. Iuasaaki isãpiretari Xesosi ikinika ikamakiti ereka inini. Ikara atoko ininiã, hãuikari Teoso sãkire. Himarotari isãkire iaõka ikamini. ²² Erekaru Matamatakoti oerekapekai atão inakari, ininiã uatxa hikamari atão inakari. Ikara atoko ininiã, hãkixinire erekari. Ininiãkara atão hãtaretari hãtariakori. Ininiã iteene hãtaretakauako hãkixiniree.

²³ Hite xinire iuaikana iponaniãpeka. Teoso sãkiree hixinire iponaniã iuaikana. Teoso sãkire auapika. !Ixipoka. Ininiã iua anaakori hixxaua. Hiri ikorapokoriti auakini xipoka. Hiri iaxiti auakari !ixipoka, ininiã hite iua anaakori !ixipoka apaka. ²⁴ Teoso sãkire iõkatsopatakori txari: Kãkiti katsotati atoko itxa. Katsotati paãtiki ipinini. Iua atokokana patimari kãkiti ipina. Ikinika erekari ikamakiti, aãui atoko itxa. Aãui patimari ipinini. Iua atokokana patimari kãkiti kamakiti xipokini.

²⁵ Iuaritika Teoso sãkire auapika. !Kaxiporeri, itxa Teoso sãkire iõkatsopatakori. Teoso sãkirepitikara sãpiretaãkapeka hitemoni, hikenakotakasaakiri Teoso iokanapirena erekari.

2

¹ Ininiãkara hãtakanapariko ikinipoko maerekati hikamakiti. !Himisiriene-tapiri ãti. Hikamariko hãsãkire iaõka. !Hixikotapiri ãti. !Himisãkirepiretapiri ãti. Ikinu sereti maerekati kãkiti kamakiti hãtakanapako.

² Hinirekariko Teoso sãkire makoketakoti. Tinitixã imi axapitiri nirekini atokokana, hinirekariko Teoso sãkire. Teoso sãkire hãpakapakasaaki, himaroãpotari iua, ininiã apiaãpota hãuikiniri iua sãkire. ³ Kotxi uatxa himarotapekari Apiananiri ereka inini.

Kai Atoko Itxa Xesosi

⁴ Ininiã h̄sako Xesosimoni, kotxi auapika inakari itxaua. Kai aapokotxi kamakari manirekakiniti atoko itxa Xesosi. Kãkiti !inirekari iua. Iuaritika Teoso mereëri iua. Teoso tiretakiti itxaua Xesosi. ⁵ H̄ite apaka kai atoko h̄txaua Teoso aapoko ikapani. Itx̄ikitakari h̄xinire auãki inini, kotxi iua naki-tiakori h̄txaua. Ininiã, Teoso aapoko atoko h̄txaua. Ininiã iua aapoko ãki sasetotxi h̄txaua, iua ikapani h̄par̄ikauatini. Ininiã h̄sikariko iua amanaãkiti, iua nireëkiti. Iua apakapariko h̄sikakiti, kotxi Xesosi Kristo makatxakapekari himaerekani. ⁶ Teoso sãkire iõkatsopatakori txari:

H̄tamata. Nitakari kai Sião sitatxitiã. Iua kai apiari, Teoso mereëkiti. Apiaerekata iua. Iua kai atoko inakari sãkire auãkani !ip̄tauata, itxa Teoso sãkire.

⁷ Iua kai atoko inakari itxaua Xesosi. Peerekari Xesosi h̄temoni, kotxi h̄ite auikari iua sãkire. ãti iua atoko inakari !auari. Txamari isãkire mak̄ipitakani !inirekari iua. Teoso sãkire iõkatsopatakori txari:

Aiko kamakani txari: “!Apakata ia kai. !Anirekari.” Iuaritika iua kai apiari. Itakaãka aiko kamikosaaki, apanakini kai soro maãkari ininiua ikapani.

⁸ Iuaãkana Teoso sãkire iõkatsopatakori txari:

Iua kai xika kãkiti mãkitita. Iua kai xika kãkiti irika, itxa Teoso sãkire. Imãkititana, kotxi !auikarina Teoso sãkire. Teoso tx̄ikitakana ninoa irikini, kotxi !auikarina iua sãkire.

⁹ H̄itepekana, Teoso mereëkini h̄txaua. Sasetotxi h̄txaua. H̄ipar̄ikauata Api-ananiri ikapani. H̄ite makatxakaãka maerekani sauaki erekarinoka h̄kamini ikapani. Teoso nakitiakori h̄txaua. Imereëi h̄ite iua ereka inini kãkiti h̄õerekini ikapani, kotxi ipiã h̄auakasaaki, iuara akiritai h̄ite ipiã h̄itakanapini ikapani. Itakai ikamaraã atão inakari himarotini ikapani. Peerekari iua kamara.

¹⁰ Mitxi Teoso nakitiakori !h̄txaua. Uatxa Teoso nakitiakori h̄txapekava. Mitxi Teoso !amonikapanikai. Uatxa Teoso amonikapekai.

Teoso Nitiriakori Iamotakoni Pirena

¹¹ Nitiretakini, uai itixi h̄auakasaaki, ãti tixinikini atoko h̄txa. Atão h̄apoko Teoso tixine aua. Ìkorsaaki h̄saãpota h̄apokomoni. Ininiã ikini nixinireritika nõtãkikai h̄ite himakamakaniri maerekati h̄ito nireëkiti. H̄ito nireëkiti h̄xinire mokaikari atoko itxa. H̄ito !inirekari h̄xinire nireëkiti.

¹² Teoso sãkire mauãkani sauaki h̄auakasaaki, ikiniõtika erekarinoka h̄kamako. Atx̄iiti ninoa maxikat̄iika apoitai maerekati h̄kamini, iuaritika iusaaki ninoa imarotari erekarinoka h̄kamini. Ininiã Teoso ketotini õti manapi iua oerekariko atão inakari ninoamoni. Ininiã iusaaki ixinikarinako erekari h̄kamakiti. Ininiã itxarinako Teoso: “Peerekai pite,” itxana.

H̄ikamariko H̄iauõte Paniãtakiti

¹³ H̄ikamariko kãkiti auõtetakini paniãtakiti, kotxi Apiananiri nirekari ikara atoko h̄kamini. Ikinimane h̄iauõteakori paniãtakiti h̄kamako. H̄iauõte apiari paniãtakiti h̄kamako. ¹⁴ H̄iauõte poiãori paniãtakiti apaka h̄kamako, kotxi h̄iauõte apiari paniãtana h̄iauõte poiãorini maerekati kamakani imisiritinina ikapani. Ipaniãtana ninoa isãpiretinina erekari kamakani: “Erekapitikari h̄kamakiti.” ¹⁵ Teoso nirekari h̄kaminiri erekari, ininiã iusaaki miãkiteni !iposotari imisãkirepiretinii h̄ite. !Kasãkirena iusaaki, kotxi apanakini imarotari erekarinoka h̄kamini. ¹⁶ H̄iposotari ikinipoko hinireëkiti h̄kamini, kotxi Teoso sikakai h̄ite. Iuaritika kona hinirekapiri maerekati h̄kamini.

Teoso nitiriakori h̄txaua, ininiã iua paniãtakitinoka h̄kamako. ¹⁷ H̄ipaxitariko ikinimane. H̄itiretanako ikinimane ãtariakori Teoso sãkire auãkani. H̄ip̄kariko Teoso. H̄ipaxitariko h̄iauõte apiari.

Hīkamariko Hīpatrāote Paniātakiti

¹⁸ Nītrixiakori, hīkamariko hīpatrāote paniātakiti. Hīpaxitariko iua. Atxiīti iua tiretai. Atxiīti imisiritai. Iuaritika hīpaxitariko iua. ¹⁹ Erekapitikari himīteenekiniri kākiti misiritinīi maxikatīka. Himīteenekiniāri, Teoso nireēkiti hīkamini ikapani, erekapitikari. ²⁰ Erekarī hīpatrāote misiritinīi hīte, maerekati hīkamakasaaki. Iuasaaki himīteenekiniri himisiritiko kona txīkitakari Teoso apokaerekatinīi. Erekarī hīkamakasaaki, himīteenekiniāri himisiritiko, iuasaaki Teosomoni erekapitikai.

Kristo Misiritiko

²¹ Teoso akiritai hīte inakitiakori hininiua ikapani, himisiritiko himīteenekini ikapani. Kristo misiritaāka hīte ikapani, ininiā iua nirekari amīteenekiniri amisiritiko iua misiritiko imīteenekini atokokana.

²² Maerekati !ikama. !Imisirienetari āti.

²³ Ninoa misākiireporetakasaakiri iua, !apakapaenetana. Imisiritakasaakirina iua, !itxitana. !Isāpiretana imisiritinina imaerekanina xika. Iua auikari iri nīkatiniri iua, kotxi atāonoka kamakari itxaua Teoso. Atāo imarotari kākiti kamakiti. ²⁴ Aamina ipiriāmitakari nopini Xesosi ito misiritaāka ate maerekani xika. Ipina ate ikapani, apikomoni maerekati akamini amanirekakani ikapani. Inirekari anireēkiti maerekati ipikari atoko inini. Itxīkitakari axinire auāki inini atāo inakarionka akamini ikapani. Xesosi karo txīkitakaua erekape anini. ²⁵ Xesosi himarotini apisapanika, soti auīte pīpīnanakakani atoko hītxa. Uatxa hīkanapiriāpeka hīpitikirimoni. Hīxinire nīkatarimoni hāpokapeka uatxa.

3

Taniritxi, Tanorotxi Pakini Ōtākikiko Pirena

¹ Nītrixi kaminiri ipatrāote paniātakiti atokokana, hīte tanorotxi hīkamariko hītaniri nireēkiti. Atxiīti hītaniri !auikari Teoso sākire, ininiā erekarinoka hīkamako. Atamatakasaakirina erekarī hīkamakiti, ninoa auikari Teoso sākire. Hīkamakiti erekarī txīkitakana auikinirina Teoso sākire. Hīsākirenoka !itxīkitakana auikinirina. ² Maerekati himakamakanisaaki ikiniōtika, Teoso iteene hīpaxitinīā ikiniōtika, iuasaaki ninoa auikari Teoso sākire atāo inini.

³ Apanakini sito xinikapikari oiāko oōeretini, oro oiōā otakini, omāka ereri oieretakini, oiō ere inini ikapaninani oxinika. Sito erero !oxinikari ikaranani.

⁴ Sito erero oākixinire ereri apaka. Hākixinire ereri inakasaaki, ikara ereri !ixipokapani. Hākixinire ereri inakasaaki, !hītxitapiri hītaniri. Hīkamari iua nireēkiti. Teosomoni apiaerekata hākixinire ereri inini.

⁵ Kitxakapiriāka sitoākini ererini, Teoso sākire auīākani, ikara atoko inakani. Ninoa ākixinire erekarī, kotxi ikūpitarina itanirina sākire. ⁶ Sara inakoro kamari Apraāo sākire iaōka. Oa kamari Apraāo paniātakiti, kotxi oamoni oa auīte itxaua Apraāo. Sara anaakoro atoko hītxaua atāonoka hīkaminiā, himapīkarauatakaniā.

⁷ Hīte taniritxi, iua atokokana hīxinikariko erekarī hīkaminana hītanoro. Hīpaxitaroko hītanoro, kotxi !katapararo. Oa apaka hītekata apakapariko Teoso sikakiti erekarī. Iua txīkitakai hāuapininīika hinini uakata. Hītiretaroko hītanoro, ininiā Teoso kenakotariko himisākiretiniri iua.

Himisiritiko Pirena

⁸ Ia nisākire mapotōkire nisāpiretai. Hīxinikakiti ātika xinikakiti atoko hītxako. Hiamonīkakauako. Hītiretariko āti, hītari hītiretini atokotxikana. Hīkamariko erekarī ātimoni. !Hīuikapeua. ⁹ Āti kaminiāri maerekati hītemoni, !hīkamapiri maerekati iuamoni. Āti misākiireporetakasaakii, kona hīte misākiireporetapiri iua.

Äti kaminiäri maerekati hitemoni, iusaaki hamanaäri Teoso sikiniri erekari iuamoni, kotxi Teoso paniätai ikara atoko inakari hïkamini, erekari Teoso sikakiti hïte apaka apakapini ïkapani. ¹⁰ Teoso säkire iökatsopatakori txari: Pinirekiniäri pauini ereka inini, pinirekiniäri ikiniötika pipoxokoniuatini, ! pauiritapiri pisäkire maerekati inini. !Pimisirienetapiri äti.

¹¹ Pinirekiniäri pauini ereka inini, pitakanapariko maerekati pikamini. Erekarinoka pikamako. Pitakanapariko pineenamauatini. Pinirekariko käkiti auini ereka inini.

¹² Apiananiri nïkatari käkiti atäo inakari kamakani. Teoso imisäkiretakasaakina, Teoso kenakotapitikari isäkirena. Txamari Apiananiri misiritari maerekati kamakani, itxa Teoso säkire kitxakapirïka.

¹³ Erekarï hïkamakasaaki, käkiti ! inirekari imisiritinï. ¹⁴ Atäo inakari hïkamakasaaki, käkiti misiritinïäi, häpakapariko erekari Teoso sikakiti. Ininiä ! hïpïkapena ninoa. Maerekaxiniretinoka ! hïtxape. ¹⁵ Häkixinireë hïtxako: "Teosonoka nïauïte. Apiananiri itxaua. Iua nireëkitinoka nikamako." Ikara atoko hïtxako. Häpaiaökariko Teoso säkire, isäkire iteene himarotini ïkapani. Ininiä käkiti pimainïä: "Kinirepa häuikari Teoso säkire?" Iusaaki himarotari häpakapapiretiniri iua. Häpakapapiretakasaakiri iua, ! hïtxitapiri. Hïpaxitariko iua iusaaki. ¹⁶ Hïsäkirauatakasaaki, ! hïsäpiretapiri häkixinire manirekakini. Hinirekariko erekari häkixinire nireëkiti hïkamini. Apanakini misäkirepiretai. Ninoa atamatakasaakiri erekari hïkamakiti Kristo paniätakiti, ipëtari imisäkirepiretinï. ¹⁷ Teoso nirekiniäri hätatsïrauatinï erekari hïkamini xika, ininiä erekari, kotxi iusaaki hïkamari erekari. Txamari hätatsïrauatinïä himaerekani hïkamini xika, ! erekari, kotxi iusaaki hïkamari maerekati.

¹⁸ Xesosi Kristo ipina käkiti maerekani imaktxakini ïkapani. Iusaaki iposope imaktxakini käkiti maerekani. Iuaïkana !atatsïrauataika käkiti maerekani imaktxakini ïkapani. Erekarinoka kamakari ipïpe maerekati kamakani ïkapani. Ipïpe, Teosomoni ate anikini ïkapani. Iïto ipïpe, iuaritika Erekarï Matamatakoti txïkitakari iua iuaïkana auäki inini. ¹⁹ Iusaaki Erekarï Matamatakoti posotïireë isari ipïkani auiniätaämoni. Iuaä kateia äki ipïkani aua. Iuaä isäpiretana Teoso misiritinina ninoa, kotxi iuaka käiata. ²⁰ Kitxakapirïka ninoa ipïkani, auäkipanika inakasaakina, !inirekarina Teoso paniätakiti ikaminina. Iusaaki Noe kamanätari maporo. Teoso iätapana imaerekanina itakanapinina ïkapani. Txamari !itakanaparina. Iusaaki poiäonoka !ipina. Oitonoka !ipina, xirataätxi apokasaaki. Teoso nïkatana ninoa imapinakani ïkapani. ²¹ Ikara xirataätxi hïpatxisatiko atokokana. Hïpatxisatiko oerekarï käkiti, Teoso makatxakapekäi himapinakani ïkapani. Hïpatxisataäka hïtoäkiri txiko makatxakiko !ïkapani, kona maerekati hïkamakiti makatxakiko ïkapanini. Hïpatxisatikosaaki, hïtxari Teoso: "Näkixinireë ninirekari nikaminiri ikinika pïte nireëkiti iaöka," hïtxariko. Xesosi iuaïkana ökitikasaakïua, imaktxakai himapinakani ïkapani. ²² Iua kanapiriä Teoso tixinemoni. Uatxa iri kikomoni iïtopäka. Iuaä Teoso nitiriakori, auïtetxiakori, kaposotïrerini pakini auïte itxaua. Ninoa ikinika kamari Xesosi paniätakiti.

4

Hïkamariko Ikinipoko Teoso Nireëkiti

¹ Xesosi atatsïrauata iïtoä hïte ïkapani. Ininiä hinirekariko Xesosi xinïkakiti iaöka hïkamini. Ikara atoko hinirekiniä, hïxinïkakiti sikataparatarï häkixinire. Käkiti atatsïrauatakasaaki iïtoä, !inirekaikari maerekati ikamini.

² Ininiäkara ïkorapokoriti auakasaaki, !inirekaikari maerekati iïto nireëkiti

ikamini. Ikamari Teoso nireēkiti iaōka ikiniōtika. ³ Mitxi maerekati hīkamakiti iaōpe. Mitxi Teoso sākire mauīākani nireēkiti iaōka hīkama. Ikini sereti maerekati hīkama iusaaki. Iusaaki hīkamari ikini sereti hīto nireēkiti. Hinirekari āti kākiti īto. Hīpoāta. Ikinipoko maerekati hīkama hīpoātakasaaki. Hīkamari kiiniri maerekati. Hīteosonetari kākiti kamakiti, Teoso mauiritakiniti.

⁴ Ninoa Teoso sākire mauīākani txai: “Kinirepa kona hīpotxitari ate kamakiti iaōka hīkamini? Peerekari akamakiti,” itxaina. Ininiā ninoa nireēkiti iaōka himanirekakani xika, ninoa misākirepiretai hīte. ⁵ Txamari āti ōti ninoa apakapapiretariko Teoso, kotxi Teoso iposope isāpiretiniri maerekati kamakani misiritiko. Isāpiretari kākiti auākipanika inakani, apaka kākiti mitxi ipīkani. ⁶ Ininiā Teoso iokanapirena erekari sāpiretaākapeka kākiti. Uatxa ninoa ipīpe. Auākipanika inakasaaki, isāpiretaāka ninoamoni kākiti misiritiko imaerekani xika. Isāpiretaāka ninoamoni kākiti kaminiri Teoso nireēkiti ākixinireē ikiniōtika.

⁷ Imakinika xipokini ōti imatokotapeka. Ininiā kona hāuiritapiri hīto kaminiri inireēkiti. Araōkire hītxako, ininiā hīposotari himisākiretiniri Teoso. ⁸ Iteene hītiretakakauako. Ia apiata Teoso nirekakiti. Iteene hītiretakakauako, kotxi iteene hītiretiniāri āti, poiāo hīxinikari maerekati ikamakiti. ⁹ Kākiti apokasaaki hāapoko, hīpoxokoniritika hāpakapanako. Kona hītsoatape hākixinireē ninoa apokini xika. ¹⁰ Hīkinika hāpakapapekari imaroretxi Teoso parīka hīkamini ikapani. Ikara Teoso sikakiti hītemoni. Ininiā ikara himaroreē hīparīkauata apanakini ikapani. Iusaaki Teoso nītiriakori erekarini hītxaua. Hīsikariko ātimoni ikini sereti erekari Teoso sikakiti. ¹¹ Hīsākirauatakasaaki, hīsāpiretariko Teoso sākire kākitimoni. Himoiاناتakasaakiri āti, himoiاناتariko Teoso posotiireē, ininiā iusaaki kākiti txari Teoso: “Peerekai pite, kotxi Xesosi Kristo nakitiakori atxaua,” itxari Teoso. Ātipirika ikinimane txapikari Teoso: “Peerekai pite. Ikinipoko posotiiretxi aua pitemoni.” Ameē.

Xesosi Sākire Auiākani Misiritiko

¹² Nitiretakini, !hītikokape himisiritiko apokasaaki, kotxi ikara ataerekatai. Iteene himisiritaākakako, kotxi ikara atoko inakari apokapitikako. ¹³ Iusaaki hīpoxokoniuatoko, kotxi Xesosi atatsiirauatape, ininiā hīte apaka atatsiirauatoko. Xesosi kanapiriākasaaki, peerekari iusaaki. Hīte atamatariko ikara, ininiā iusaaki iteene hīpoxokoniuata. ¹⁴ Kākiti xinitakasaakii hīte, Kristo nakitiakori hininiua xika, hīpoxokoniuatoko, kotxi iusaaki himarotari Teoso aua hītekata. Himarotari Erekari Matamatakoti aua hākixinireē. ¹⁵ Kokaniri, kiitiriri, maerekati kamakari, aāpirena kamakari pakini !hītxapeuako. Ikara atoko inakari hininiāua, apakatapitika hātatsiirauatini, kotxi hātatsiirauata maerekati hīkamini xika. ¹⁶ Iuaritika hātatsiirauatiniā Xesosi sākire hāuikini xika, ininiā iusaaki erekapitikari. !Hīpēttauatape. Hītxariko Teoso: “Peerekai pite, kotxi Xesosi nakiti nītxaua,” hītxako. ¹⁷ Apokapeka Teoso anaakori misiritiko ōti. Merepanika Teoso misiritari iua anaakori imaerekanina xika. Teoso misiritiniāua ate isākire auiākani amaerekani xika, ininiā Teoso iokanapirena erekari manirekakani mitekini !auari. Iteene imisiritana ninoa. ¹⁸ Kitxakapiriāka Teoso sākire iōkatsopatakori txari:

Pamimari atāo inakari kamakani sini Teoso tixinemoni. Ininiākara Teoso manirekakani mitekini, maerekati kamakani mitekini !auari. Imisiritaākapitikanako,

itxa Teoso sākire. ¹⁹ Apanakini atatsiirauata, kotxi Teoso nirekari atatsiirauatini. Ikara atoko hātatsiirauatiniā, iuaritika erekari hīkamapanikako. Hāuikariko ikinipoko kamakari sākire, kotxi iua kamari ikinipoko isākire iaōka.

5

Kõtäkikarerini, Ätokoriakori Pakini

¹ Kõtäkikarerini nitxaua nota, ininiä nõtäkikai hïte kõtäkikarerini. Nota atamatarï Kristo misiritiko. Ikanapiriäkasaaki, natamatari iua iotximere ikinimane auïte inakasaakïua. ² Ininiä nota õtäkikai hïte. Hinïkatanako Teoso säkire auïäkani ereë. Soti auïteakori ipitikiri nïkatini atokokana, hinïkatana. Hïsäpiretanako Teoso säkire, kotxi ikara sikakienatarï ninoa äkixinire. Teoso sikana ninoa hïtemoni hinïkatinina ïkapani. Atão hinïrekariko hinïkatinina ninoa. Kona hïtxape häkixinireë: “! Ninïrekarï ninïkatinina ninoa, iuaritika ninïkatana, kotxi ikara nïparïka.” Kona hïxinikapiri ikara atoko inakari. !Hïparïkauatape txineiro häpakapini ïkapani. Hïparïkauatako apanakini himoianatini ïkapani. ³ Ninoa auïte atoko ! hïtxapeua. Teoso sikana ninoa hïtemoni hinïkatinina ïkapani, soti auïteakori ipitikiri nïkatini atokokana, ininiä erekari hïkamako, hïte kamakiti iaõka ninoa kamini ïkapani. ⁴ Ininiä ipitikiri apïari apokasaaki, Xesosi apokasaaki, häpakapariko hïparïka ïki. Iuasaaki häpakapariko saporïëta atoko inakari. Ikara Teoso sikakiti peerero, ininiä ikara apakapakanï auapininiika. Atamatapikarina Teoso iotximere. Iuasaaki erekari häpakapakiti !ixipoka.

⁵ Hïte ätokoriakoripekana, hïkamariko aneëkani paniätakiti. Hïkinika, himoianatakauako. !Hïuikapeua, kotxi Teoso säkire iõkatsopatakorï txari: Teoso iotokakari iukakanïua kaminiri inireëkitina. Iua sikari ikinipoko erekari miuïkakanïuamoni.

Itxa Teoso säkire. ⁶ Ininiä hïteka poiõtakauako, kotxi Teosonoka kaposotirerï. Iketo manapï Teoso iuikai hïte, erekari hïkamakiti isäpiretinirï ikinimane. ⁷ Maerekaxiniretinoka hinakasaaki, imakinika himaerekaxinire hïsäpiretariko iua. Hïsikariko himaerekaxinireni uamoni, kotxi iua tiretai.

⁸ Kona hïkamapiri hïïto nireëkiti. Araõkire hïtxako, kotxi himokaiakari Satanasi inakori äkiti monõkori atoko itxa. Isaãpota initiniri ikiena. ⁹ Satanasi apokasaaki hïtemoni, iteene häuïkariko Teoso säkire. Iuasaaki hïtparaxinireritika häuako. !Himitekape. !Hïkamapiri inireëkiti. Himarotari hïtariakori ikini itixiti auakani atatsiutiniri imisiritikona hïte atatsiirauatini atokotxikana. ¹⁰ Hïte atatsiirauatako poiãonoka, eereka Teoso parïka häkixinireë iposope ikamini. Iua sikataparaxiniretai. Iteene häuïkari Teoso säkire iuasaaki. Satanasi !iposotari itxïkitakinii maerekati hïkamini iuasaaki. Teoso, ikinipoko erekari sikakari, kamari ikara atoko inakari hïte ïkapani. Iua akiritai itixine hïsini, ätipirika häuini ïkapani, iua iotximere ätipirika hätamatini ïkapani, kotxi Kristo Xesosi nakitiakori hïtxaua. ¹¹ Ätipirika ikinimane txari iua: “Peerekai pite.” Ätipirika ikinimane auïte itxaua. Ameë.

Petro Takapiretanapini

¹² Sïrasi moianatano ia niõkatsopatakiti axapitiri niõkatsopatini hïte ïkapani. Iua äitari. Iua iteene auïkari Xesosi säkire. Niõkatsopata hïte nisikataparaxiniretini ïkapani. Ninïrekarï himarotinirï atão asäpiretinii erekari Teoso sikakiti pïrena. !Hïtakanapapiriko erekari Teoso sikakiti hïtemoni. ¹³ Teoso nakitiakori, Papirõnia sitatxiti auakani, xinikamanapitai hïte. Teoso mereëna ninoa hïte imereini atokotxikana. Marko, namarite atoko inakari, xinikamanapitai hïte apaka. ¹⁴ Haõkitakakasaakïua, himaratakauako, kotxi hïtïretakakaua. Teoso kamaerekaxiniretai hïte Kristo Xesosi säkire auïäkani. Ameë.

2 PETRO

Petro Iuaĩkana Iokanatsopatakiti

¹ Nota Simão Petro nitxaua. Xesosi Kristo nitiri, iua iokanatakiti nitxaua. Niokanatsopata hitemoni, kotxi hite auikari Xesosi Kristo sãkire, ate auikiniri atokotxikana. Peerekari iua sãkire aũuikini. Aũuikari iua sãkire, kotxi atãonoka kamakari itxaua. ATeosone, amaerekani makatxakakari itxaua Xesosi Kristo.

² Himaroãpotakasaakina Teoso, aũũte Xesosi pakini, hãpakapari ikinipoko erekari ninoa sikakiti. Itori hãpakapa. Ninoa iteene kamaerekaxiniretai hite.

Erekari Akamini

³ Teoso posotiireẽ isikaua imakinika anireẽkiti İkorapokoriti aũuini İkapani, Teoso paniãtakiti akamini İkapani. Aãpakapari iua posotiire, iua aimarotakasaaki. Iua akiritaua iua nakitiakori aniniua İkapani. Aãpoka iuamoni akiritakasaakia, kotxi peerekari iua. Aãpoka iuamoni, kotxi erekarinoka ikama. ⁴ Ikara atoko ininiã, isikaua apia erekari isikaenetakiti. Isikaenetakiti anirekakiti apiari. Ikamaenetari ikamakiti erekari ikaminoua. Teoso nirekari ikara atoko ikaminiãua, atão inakaranoka akamini İkapani, atão inakarınoka Teoso kamini atokotxikana. Kristo sãkire mauĩakani nirekari maerekati iĩtona nireẽkiti ikaminina. Hite !nirekaikari ninoa nireẽkiti iaõka hikamini, ininiã ikara maerekati !nokai hite.

⁵ Ininiã ikinika hãkixinire taparaã hãuikariko Teoso sãkire. Hãuikiniãri Teoso sãkire, hikamariko erekarinoka. Erekarinoka hikaminiã, hinirekariko Teoso sãkire iteene himarotini. ⁶ Iteene himarotiniãri Teoso sãkire, hiũto aũũte hĩtxauako. Hiũto aũũte hininiãua, himĩteenekariko himisiritiko. Himisiritiko himĩteenekiniã, hikamariko erekari Teoso kaminiri atokokana. ⁷ Hikaminiãri erekari Teoso kaminiri atokokana, hĩtiretanako hĩtariakori, Teoso sãkire auĩakani. Hĩtariakori, Teoso sãkire auĩakani, hĩtiretiniã, hĩtiretari ikinimane. ⁸ Ikara atoko hininiã, ikara atoko apiaãpotiniã, aũũte Xesosi Kristo himarotakasaaki, erekari hĩparĩka iua İkapani. Iuasaaki makamareti atoko !hĩtxapeuako. Himinariko ito kãkiti Kristomoni isãkire auikinina İkapani. ⁹ Ikara erekari mauakaniã hitemoni, mõiãreni atoko hĩtxaua. !Himarotari atão inakari. !Hĩxinikari Teoso kamakiti katana. Himaxinĩkaretapekari Xesosi makatxakiniri himaerekani mĩtxi hikamakiti.

¹⁰ Ininiã nitariakori, ikara atoko !hĩtxapeko. Hikamariko ikinipoko Teoso paniãtakiti, ininiã iteene himarotari Teoso akiritiniĩ inakitiakori hininiua İkapani. Iuasaaki himarotari Teoso mereiniĩ hite iua anaakori hininiua İkapani. Ikara atoko inakari hikaminiã, !hĩkamari maerekati. ¹¹ Ikara atoko hikaminiã, Teoso ipoxokoniritika apakapai hite aũũte Xesosi Kristo aũũtetxi ininiãtaãua hãuini İkapani. Iuaã Xesosi, amaerekani makatxakakari, atipirika ikinimane aũũte itxauako.

Atão Inakari Teoso Sãkire

¹² Ninirekari ikara noerekakiti atipirika nisãpiretiniĩ. Himarotapekari ikara noerekakiti, iuaritika iuaĩkana nisãpiretai. Hite imarotari ikara noerekakiti atão inini, iuaritika kona nitakanapari ikara nisãpiretiniĩ. ¹³ Nota aua-panika ninakasaaki, notamoni atãopitika nitxĩkitakinii hite ikara noerekakiti hĩxinikini. ¹⁴ Kotxi nimarotari paĩtiki nipinini. Aũũte Xesosi Kristo oerekapekano paĩtiki nipinini. ¹⁵ Ininiã uatxa Teoso sãkire nisãpiretapikai, ininiã kona himaxinĩkareteri noerekakiti nipĩkasaaki.

¹⁶ Asãpiretai aũũte Xesosi Kristo posotiire. Asãpiretai iua iuaĩkana kanapiri-
ini. Ikara asãpiretakiti hitemoni kona kãkiti sãkireni. Kona kãkiti kimarorerini

xinikakitini asāpiretai. Atāo inakari ate sāpiretai hīte, kotxi ateka atamatari Xesosi ikinimane auīte ininiua. ¹⁷ Aīri Teoso oerekari iuikiniri iua. Oerekari iua ereka inini, kotxi itxari iua: “Ere namarite, nitiretakiti. Iua iteene kamapoxokonitano,” itxa Teoso kaposotiireri. ¹⁸ Ateka kenakotari ikara Teoso sākire, itixineē isākirauatakasaaki. Iuasaaki ate aua Xesosikata ōtanoxiratarari Teoso nakiti nopini.

¹⁹ Ininiā aimarotapitikari Teoso sākire sāpiretakani sāpiretakiti kitxakapirīka atāo inini. Himixinīkariko ninoa sāpiretakiti. Ninoa sāpiretakiti tirikapī ipiā iopinikini atoko itxa, kākiti sinimoni atamatini Īkapani, kotxi axinikasaakiri ninoa oerekakiti, aimarotari atāo inakari, atāo minakati pakini. Teoso sākire sāpiretakani sāpiretakiti hīxinikiniritika Xesosi kanapiriāko. Iuasaaki iua txīkitakai Teoso iteene himarotini. Iuasaaki atokatxi ponikini atoko itxa Xesosi apokini. Iōriki ikanōkapanika pokīkini atoko itxa iuasaaki Xesosi apokini. ²⁰ Merepanika ninirekari iteene himarotiniri Teoso sākire sāpiretakani sāpiretakiti Teoso sākire iōkatsopatakoriā. Kona ninoa sākireni. Kona ninoa xinikakitini. ²¹ Kitxakapirīka Teoso sākire sāpiretakani kona iōkatsopatarari kākiti nireēkiti sākiretxiti. Erekari Matamatakoti txīkitakari kākiti Teoso nakitiakori sāpiretiniri atāo inakari Teoso sākire.

2

Atāo Minakati Oerekakani

¹ Kitxakapirīka Teoso sākire sāpiretakani auakasaaki, auari apaka atāo minakati oerekakani. Iua atokotxikana uatxa aua atāo minakati oerekakani hīte sauaki. Kākiti mimarotakanisaakiri, oerekari atāo minakati. Kona erekari ninoa oerekakiti. Na atāo ninoa oerekari Teoso sākire. Ninoa !auikari Apiananiri ipinini kākiti Īkapani Teoso iikixitini Īkapani. Ikara xika mokatanika Teoso xipokanako ninoa. ² Itori kākiti auikari isākirena, ininiā ikamarina ninoa kamakiti atokokana. Ikamarina maerekati iītona nireēkiti, maerekati ninoa kamini atokotxikana. Ininiā ikara xika, apanakini misākirepiretari Teoso sākire atāo inakari auikiko. ³ Kapotxinanirini ninoa atāo minakati oerekakani. Isākirena atāo minakati xika, imisirienetai. Ninoa nireēkiti iaōka ikaminiina hīte. Kitxakapirīka Teoso sāpiretapekari imisiritinina ninoa imaerekanina xika. Ixipokinina ōti paītiki apokapitikako. Teoso !imaka. Ninoa xipokini ōti apokapitikako.

⁴ Teoso nitiriakori iaxiti auakani kamakasaakiri maerekati, imisiritana. ! Auiritana imitekinina. Iokanatana maerekani misiritikoātaā. Iuaā itakana kateia āki ipiā. Iuaā iātaparina Teoso misiritinina ninoa imaerekanina xika.

⁵ Kitxakapirīka Teoso xipokari ikinimane kākiti iua nireēkiti manirekakani xirataātxiā. Teoso ! auiritana ninoa mitekini. Noee, apikomoni setxi kākitikata nīkataāka. Ninoanoka ! xipokaāka. Iua nīkatari Noee, kotxi atāo inakari sāpiretakari itxaua.

⁶ Apaka ixipokari Sotoma sitatxiti auakani, Komoha sitatxiti auakani pakini arikatxiā. Atapaninoka kaikota iuasaaki. Ininiā ikara pinitari kākiti Teoso nireēkiti manirekakani. ⁷ Iuasaaki Teoso makatxakari Aroo inakori imapinakani Īkapani, kotxi erekari kamakari itxaua. Maerekati kamakani txīkitakari Aroo matinaniuatini, kotxi ikiniōtika iua atamatari maerekati ninoa kamakiti, maerekati ninoa īto nireēkiti. Itxiko atoko itxa ninoa kamakiti. ⁸ Aroo, atāo inakari kamakari, aua ninoa sauaki. Ikiniōtika atamatari maerekati ninoa Teoso paniātakiti manirekakani kamakiti. Ikiniōtika ikenakotari maerekati ninoa sāpiretakiti. Ininiākara ākixinireē Aroo maerekaxiniretinoka itxa ninoa maerekani xika, kotxi iua ākixinireē inirekari atāo inakaranoka ikamini.

⁹ Ikara atoko ininiã, Apiananiri imarotari iua nireëkiti nirekakani imaktxakini imisiritikosaakina. Iua apaka imarotari imisiritiniri atão minakati kamakani uatxa. Apaka imarotari imaïkinina ninoa, kãkiti misiritiko sãpiretiko õtisaaki imisiritinina ïkapani. ¹⁰ Itene Teoso misiritari kãkiti, maerekati iito nireëkiti kamakani. Ninoa maerekani txikotari ninoa ãkixinire. Apaka itene imisiritari auïtetxi paniãtakiti makamakani.

Ninoa atão minakati oerekakani iteene iuikaua. !Ipaxitarina ãti. !Ipiakarina imisãkirepiretinirina iaxiti auakani. ¹¹ Teoso nitiriakori iaxitikini iteene kaposotiireni. Apiatararatana ninoa. Iuaritika Teoso nitiriakori !apoïtana ninoa atão minakati oerekakani. !Imisãkirepiretana Teoso apisatoõ.

¹² Ninoa atão minakati oerekakani misãkirepiretari ikinika imimarotakininina. Kaxipiri ïtopa auakari atoko itxana, kotxi ikamarina ïtona nireëkitinoka. Kaxipiri ïtopa auakari iponaniã, eereka imaïkaãka, oka inaãka. Iua atokokana ninoa atão minakati oerekakani xipokaãkako imaerekanina xika.

¹³ Ininiã ninoa misiritaãka, kotxi na atão ninoa kamakiti. Kona ïkanõkananini ikamarina maerekati. Ipotxitarina maerekati ïtona nireëkiti ikaminina pokamara, ikinimane atamatini ïkapani. Ninoa kamapikari maerekati, iuaritika apotiïtauana hïtekata kiiniri Teoso ïkapani hïkamakasaaki. Ininiã apanakani !auikari hïte sãkire ninoa maerekani xika. Itxiko mãkatxi kasarini nopinikiri atoko itxana ninoa. Karõtxi kãkiti toõã auakari atoko itxana ninoa. ¹⁴ Inirekapikarina sito ïtanoro minakotokatika isirïkinina. Kona iposotarina iotokakinirina maerekati ikaminina. Anikarina kãkiti mataparaxinireni, maerekati ikaminina ïkapani. Kapotxinanixinirena ninoa. Ininiã Teoso misiritapitikanako ninoa. ¹⁵ Ninoa osipikari kimapori atão inakari. Ippinanakana. Ikamarina maerekati Paraão inakori maerekani atokokana. Iua Paraão, Peo inakori ãkiri. Kitxakapirïka aua. Iua nirekaro txineiro maerekati ikamini ïkapani. ¹⁶ Txamari ipira txitari iua imaerekani xika, kotxi Teoso txïkitakari poho sãkirauatini kãkiti sãkirauatini atokokana. Ininiã ipira iotokakari iua atão minakati sãpiretakari kaminiri maerekati miïkiteti.

¹⁷ Ninoa atão minakati oerekakani !iposotari ikaminirina ikamaenetakitinina. Aariko ãparaã mauakiniti atoko itxana. Kãkiti nirekari ãparaã, txamari !auari. Katxiãri ïtima anikakiti atoko itxana ninoa. Kãkiti nirekari ãparaã kipini, txamari !kipa. Teoso mereëri ipiaãtaã ninoa ãtipirika kaikotini ïkapani. Kãkiti atamarauatini iuaãtaã !auari. ¹⁸ !Kiïkiteri ninoa sãkire. Iuikauana isãkirauatakasaakina. Isãpiretarina kãkiti, erekari akaminiri aïto nireëkiti. Ininiã isikanireõtari kãkiti ikara maerekati ikamini. Imisirienetarina Teoso sãkire poiãopanika auiaãkani. Ninoa !okananipanikani auikari Teoso sãkire. !Okananipanikani imarotarina atão inakari. Atão minakati oerekakani sikanireõtana ninoa ikara maerekati ikaminina.

¹⁹ Itxana: “Kateia ãki auakani atoko hïtxaua. !Erekari ikara atoko hinini. Hïkamariko hinirekakiti. Ininiã ikara atoko hïkaminiã, hïsikakaãka,” itxana. Txamari ninoaka kateia ãki auakani atoko itxauana, kotxi ninoa !iposotari itakanapinirina imaerekanina. Imaerekanina iauïtena itxaua, kotxi ikamarina imaerekanina paniãtakitinoka. ²⁰ Mitxi ninoa imarotari Apiananiri Xesosi Kristo sãkire, kãkiti maerekani makatxakakari sãkire. Iuasaaki ninoa iotokakari ikaminirina Xesosi sãkire mauiaãkani kamakiti, kãkiti xinire maerekati inini txïkitakakari. Txamari eereka iuaïkana ikamarina ikara maerekati. Eereka !iposotaikarina ikara maerekati itakanapinina. Ininiã uatxa apiata imisiritikona. ²¹ Erekamariko atão inakari kamiko ninoa mimarotakanimako, kotxi ninoa imarotari, iuaritika !inirekaikarina Teoso

paniätakiti, iua iokanatakini säpiretakiti. Uatxa ninoa misiritiko apiata. ²² Atäöpitikara kitxakapiriäka säkiretxiti: Anäpa kanapiriä okanakakitimoni onikiniri ikapani. Irari ipitikiri arokakito kanapiriä iäropemoni osiriäkini ikapani. Ininiä iuaikana ninoa atäo minakati oerekakani kamari maerekati, mitxi ninoa takanapakiti.

3

Apiananiri Kanapiriini

¹ Nitiretakini, mitxi niokanatsopatapeka hitemoni. Iuaikana niökatsopatari ia aätsopa. Imakinika niökatsopata, kotxi ninirekari hite iuaikana hixinikiniri erekari mitxi himarotakiti. ² Ninirekari hixinikiniri Teoso säkire säpiretakani säkire kitxakapiriäka, kotxi Teoso nakitiakori itxauana. Apaka ninirekari hixinikiniri ate paniätakiti, kotxi Apiananiri iokanatakini atxaua. Käkiti maerekani makatzakakari iokanatakini atxaua.

³ Merepanika himarotariko ia: Imapotökire öti takote auako käkiti Teoso säkire napetakani. Ninoa kamari maerekati iitona nireäkiti. ⁴ Ia atoko itxanako: "Itapari iua? 'Nikanapiriäko,' itxa iua. Txamari kona apoka. Aätokiriakorini ipikasaakipanika, itixi kamikosaakipanika iuatxikana. Mitxi itixi, uatxa iuatxikana," itxana.

⁵ Ninoa nirekari imaxinikaretinirina Teoso kamakiti kitxakapiriäka auakari, kotxi Teoso txikitakari iaxiti apiko nopinixiti auini isäkireë. Apaka ikamari itixi äparaä kamakori. Ikamari itixi äparaä sauaki. ⁶ Apaka ninoa maxinikaretari ia: Teoso iokanatarari iua äparaä, ininiä xirataätxi xipokari itixi mitxi auakari, ikinimane käkiti iuasaaki auakani apaka. ⁷ Uatxa isäkireë inikatarari iaxiti apiko nopinixiti, itixi pakini arikatxi xipokiniri ikapani. Imakinika inikatiniritika Teoso manirekakani misiritiko isäpiretako. Iuasaaki ninoa xipokaäkako. Iuasaaki ixipokari iaxiti apiko nopinixiti, itixi pakini.

⁸ Nitiretakini, kona himaxinikaretapiri ia nisäkire: Teosomoni äti öti, mio anokanani atokotxikana itxa. Iuamoni mio anokanani, äti öti atokotxikana itxa. ⁹ Apiananiri kamapitikari ikamaenetakiti. Apanakini käkiti xinikari !katimari ikaminiri ikamaenetakiti. Kona ikara atokoni. Iätapari käkiti auikiniri isäkire, kotxi !nirekari käkiti sini imisiritikomoni. Inirekari ikinimane takanapiniri imaerekani.

¹⁰ Apiananiri kanapiriäkasaaki, kiitiriri ikanöka apokini atokokana. Iua apoka käkiti mimarotakanisaakiri. Iuasaaki iaxiti apiko nopinixiti ereëkoka itaparakieneritika. Iuasaaki ikinipoko xipokaäka arikatxiä. Iuasaaki iteene ipataka aua. Imakinika itixi xipokako iuasaaki.

¹¹ Ikara atoko itxako ikinipoko xipokini, ininiäkara natokopa itxa häuini ikiniötika ereka hinini? Erekarinoka hikamako ikiniötika, kotxi iua nakitiakori hitxaua. Teoso nireëkitinoka hikamako ikiniötika. ¹² Iuasaaki hiätapari hipoxokoniritika Teoso keto apokini. Iteene hinirekariko ikara öti apokini. Iuasaaki iaxiti apiko nopinixiti xipokaäka arikatxiä. Ikinika iäkokako katarakari xika. ¹³ Iuaritika aiätapari iaxiti apiko nopinixiti amaneri, itixi amaneri apaka atäo inakari kamakani ikapani. Ikara atoko inakari Teoso sikaenetakiti.

¹⁴ Ininiä nota tiretakini, hinirekasaakiri Xesosi kanapiriini öti apokini, iteene hiparikauatoko maerekati himakamakani ikapani. Ininiä iua kanapiriäkasaaki, iua imarotari himakamakaniri maerekati. Iuasaaki imarotari hikerokiniri !auari. Iuasaaki imarotari erekaxinire hinini. ¹⁵ !Katimari iua kanapiriini, kotxi iätapari käkiti takanapiniri maerekati ikamakiti, imisiritiko mapokakani ikapani. Iua atokokana aitari

atiretakiti Paoro iōkatsopata hītemoni Teoso imaroreē. ¹⁶ Ikinika Paoro iokanatsopatakitiā isāpiretari Apiananiri kanapiriini ōti Teoso imaroreē. Ipixini iua iōkatsopatakiti pamimari kākiti imarotiniri ikapani. Aua kākiti miikiteni. !Apakata aāuikiniri ninoā sākire. Kākiti ikara atoko inakani oerekari Paoro iōkatsopatakiti, apanakini Teoso sākire iōkatsopatakori pakini, txamari na atāo ninoā sāpiretakiti. Ipinimoni ninoā oerekakiti. Imamakarina Teoso sākire, ininiā ikara xika ixipokaākanako.

¹⁷ Nitiretakini, himarotapekari pamonōkoniri ninoā atāo minakati oerekakiti. Ininiā araōkire hītxako. Kona hāuikapiri Teoso sākire kerokakani sākire, kotxi Teoso paniātakiti makamakani itxauana. Kona hītakanapapiri Teoso sākire atāo inakari, uatxa iteene hāuikakiti. ¹⁸ Ikinioṭika himarotariko ikinipoko erekari aāuīte Xesosi Kristo sikakiti hītemoni, amaerekani makātxakakari sikakiti hītemoni. Ikinioṭika himaroāpotariko iua. Ninirekari ikinimane uatxa sāpiretiniri iua: “Peerekai pite.” Ninirekari ikinimane ātipirika sāpiretiniri iua: “Peerekai pite.” Ameē.

1 XOÃO

Merepanika Xoão Iokanatsopatakiti

Xesosi "Teoso Säkire" Inakori

¹ Nota iökatsopata hïte ïkapani, iua "Teoso säkire" inakori asäpiretini ïkapani. Ätipirika auakari itxaua. Itxïkitakari ikinipoko auäki inini. Itixi kamiko apisa iua aua. Atera kenakotari isäkire. Aökiä ate atamatari iua. Auakoã amaätakari iua. Ininiä atäöpitika ate imarotari iua. ² Iua ikinipoko auäki inïkitaäkari. Iuaka oerekaua atemoni. Ate imarotapekari iua, ininiä asäpiretai aätamatakiti, akenakotakiti pakini. Ate säpiretai hïte iua ätipirika auakari, käkiti auäki inïkitaäkari, ininiä käkiti auapikako Teosokata. Iua Xesosi Kristo inaäka akiritiko. Iua aua irikata, Teosokata. Iuaka oerekaua atemoni. Aätamatar iïto. ³ Ate säpiretai hïte aätamatakiti, akenakotakiti pakini, amoianatakiniua ïkapani. Atäo nisäpiretai. Amoianatakakaua Teosokata, Xesosi Kristo pakinikata. ⁴ Ia säkiretxiti aiokanata hïtemoni, iteene hïpokoniuatini ïkapani.

Teoso Pokamara Atoko Itxa

⁵ Teoso pokamara atoko itxa, kotxi maerekati !ikama. Ipiä !uari Teoso auiniätaä, kotxi maerekati !ikama. Ikara iokanapirena imi säpiretaua ate. Ininiä ate säpiretai hïte. ⁶ Maerekati akamakasaaki, ipiaä auakani atoko atxa. Iuasaaki, "Teoso amoianata," aniniä, paxirari asäkire. Kona atäo akamakiti iuasaaki. ⁷ Teoso aua ikamaraä, kotxi erekarinoka ikama. Ate ikamaraä aäüiniä Teoso atoko aniniä, erekarinoka akaminoka, ininiä ate Teoso säkire auïäkani moianariakori atxaua, ininiä amoianatakakaua. Ikamaraä aäüiniä, Teoso arokaua Xesosi arëkaä. Imakatzakari ikinika maerekati akamakiti, kotxi imi Xesosi Kristo ipina ate ïkapani. Iarëka xikepoakata ate maerekani imakatzakini ïkapani.

⁸ "Na nota kamari maerekati," aniniä, teka misirienetaua. Ikara atoko aniniä, ate !imarotari atäo Teoso säkire aäixinireë. ⁹ Amaerekani Teosomoni asäpiretiniä, iua makatzakapitikari amaerekani. Oeretari ate äixinire. Imakatzakari ikinipoko amaerekani. Ikamari ikara atoko, kotxi imakatzakaenetari amaerekani. Ikamapitikari ikamaenetakiti. Ikamapikari atäo. ¹⁰ "Uatxapiima maerekati !nikama," pininiä, pitemoni Teoso säkire paxirari atxiiti? Kotxi Teoso txapekari käkiti: "Maerekati kamakari käkiti." "Maerekati !nikama," pininiä, !pimarotari Teoso säkire päixinireë. !Pikamari Teoso säkire iaöka iuasaaki.

2

Käkiti Teoso Atäo Imarotakari

¹ Namariteni nota turetakini atoko hïtxaua hïte. Ikara niökatsopata, maerekati himakamakani ïkapani. Maerekati akamakasaaki, masäpiretari Xesosi Kristo. Aïri Teoso misäkiretakari itxaua Xesosi. Atäo inakarinoka kamakari itxaua iua. Iua misäkiretari Teoso ate ïkapani, amaerekani imakatzakini ïkapani. ² Iua makatzakari maerekati akamakiti. Kona ate maerekaninanini imakatzaka. Ipina ikini itixiti auakani maerekani imakatzakini ïkapani.

³ Teoso paniätakiti akïpitiniä, atäo aimarotari Teoso. ⁴ Teoso paniätakiti makïpitakiti, "Nota imarotari Teoso," inakari, paxirari isäkire. Äixinireë !imarotari atäo inakari Teoso säkire. ⁵ Teoso säkire kïpitakari iteene turetari

Teoso. Kininiãpa aimarotatari iua nakiti aniniãua? ⁶ Akamakiti ikiniõtika Xesosi kamakiti atokokana akaminiã, iuasaaki aimarotari Teoso nakiti aniniãua. “Teoso nakiti nitxaua,” pininiã, pikamariko Xesosi kamakiti atokokana.

Iteene Matiretakaua

⁷ Nitiretakini, Apiananiri paniãtaua atiretakiniua. Ia paniãtxi niõkatsopatakiti hĩtemoni, kona amaneriikani. Hĩkenakopiretapekari ikara paniãtxi merepitiapanika Xesosi sãkire hĩkenakotakasaaki. Iuasaaki hĩkenakotari ikara paniãtxi hĩtiretakiniua tĩkane. Ikara paniãtxi kitxakapirĩkari itxaua. Hĩkenakotapekari ikara paniãtxi. ⁸ Iuaritika ikara paniãtxi amaneri itxaua. Xesosi kĩpitari ikara paniãtxi, kotxi itiretari kãkiti. Hĩte apaka tiretari kãkiti, ininiã aimarotari ikara paniãtxi ereka inini. Ininiã ipiã napaãpota, kotxi kãkiti imaroãpotari atão Teoso sãkire. Atão inakari kãkiti imarotakasaaki, pokamarari atoko itxa kãkiti ãkixinireẽ.

⁹ “Pokamara naua,” pininiã, txamari iuasaaki pomanatari pitari Xesosi sãkire auiãkari, ikara atoko pininiã, uatxapiima ipiãã pauapanika. ¹⁰ Pitari Xesosi auiãkari pitiretiniã, pokamara pauapitika. Ininiã erekari pãkixinire, ininiãkara pãkixinireẽ auakari kona txikitakai maerekati pikamini. ¹¹ Pitari Xesosi sãkire auiãkari pomanatiniã, ipiãã auakari atoko pitxaua. Iuasaaki pitĩpokotapika ipiãã. !Pimarotari pisinimoni. Mõsiãreti atoko pitxaua, kotxi !apakata patamarauatini ipiã xika.

¹² Namariteni nota tiretakini, niõkatsopata hĩte ĩkapani, kotxi Xesosi makatxakapekari himaerekani, kotxi kãkiti maerekani makatxakakari itxaua.

¹³ Hĩte irĩtxiakoripekana, niõkatsopata hĩte ĩkapani, kotxi hĩte iteene imarotari Xesosi, itixi kamikosaaki auapeka inakari.

Hĩte ãtokoriakoripekana, niõkatsopata hĩte ĩkapani, kotxi homitikapekari Satanasi hĩtapararitika.

Namaritenipekana, niõkatsopata hĩte ĩkapani, kotxi himarotari aĩri Teoso.

¹⁴ Hĩte irĩtxiakoripekana, niõkatsopata hĩte ĩkapani, kotxi himarotari Xesosi. Itixi kamikosaaki auakaripeka itxaua.

Hĩte ãtokoriakoripekana, niõkatsopata hĩte ĩkapani, kotxi pataparari hãkixinire. Teoso sãkire auapika hãkixinireẽ. Homitikapekari Satanasi hĩtapararitika.

!Hinarekapiri Itixi Auakani Nireẽkiti

¹⁵ Itixi auakani nireẽkiti atoko inakari !hinirekape, kotxi ninoa nirekari maerekati ikaminina. Hĩtiretiniãri ninoa kamakiti, !hĩtiretari aĩri Teoso.

¹⁶ Maerekati kãkiti kamakiti ia atoko itxapaniko: Inirekarina maerekati ĩtona nireẽkiti ikaminina. Inirekarina maerekati okina nireẽkiti ikaminina. Iuikauana, katii ininiãuana. Iuikarina ikamakitina. Ikara maerekati kãkiti kamakiti potorika ĩkorapokoriti. Kona Teosomonikirini ikara. ¹⁷ Itixi xipokako. Ikinipoko tiitxi kãkiti nireẽkiti apaka xipokako. Kãkiti Teoso nireẽkiti kamakarirako lixipoka. Auapininiika Teosokata.

Kristo Omanatakani

¹⁸ Namariteni nota tiretakini, itixi xipokini õti katanapanoka apoka. Kristo omanatakani auĩte apokako itixi xipokini õti apisa. Ikara himarotapeka. Uatxa Kristo omanatakani itomanẽ apokapeka. Ikara atoko ininiã, aimarotari itixi xipokini õti takotepeka inini. ¹⁹ Ninoa Kristo omanatakani, mitxi atekata apotiãtaua, Teosokata aãpotiitakasaakiua. Txamari ninoa !auikari Xesosi sãkire ate auikiniri atokokana, ininiã ninoa sipe. Ninoa atão Xesosi sãkire auikaãkamako, atekata ikaikotapikamanako. Itakanapaua, kotxi ate auikari Xesosi sãkire. Ninoa !auikari.

²⁰ Teoso, erekarinoka kamakari, sikapekai hĩte Erekarini Matamatakoti himoianari tĩkane. Ininiã hĩte imarotari atão inakari Xesosi sãkire. ²¹ Hĩte

imarotari atão inakari Xesosi sākire, iuaritika niōkatsopata hītemoni. Niokanatsopata hītemoni, kotxi himarotari atão inakari. Paxiene kamakari !imarotari atão inakari sākiretxiti.

²² Natokopa itxa iua paxiene kamakari? Paxiene kamakari txari: “Xesosi kona Teoso mereēkitini.” Kākiti ikara atoko inakari Kristo omanatakari itxaua iua. Iua !inirekari aīri Teoso. Imi apaka !inireka. ²³ “Xesosi kona Teoso ākirini” inakari, na kaikota Teosokata. “Teoso ākiripitikara Xesosi” inakarirako kaikotapitikako Teosokata.

²⁴ Hāuiritariko merepitipanika Xesosi sākire hīkenakotakiti kaikotini hākixinireē. Ikara kaikotiniā hākixinireē, Teoso ākirikata hīkaikotapikako. Aīri Teosokata hīkaikota apaka. ²⁵ Xesosi sikaenetapekua aūapininiika anini Teosokata.

²⁶ Niōkatsopata hīte nōtākikini ĩkapani, kotxi aua kākiti Xesosi hītakanapini nireēkani. ²⁷ Erekar Matamatakoti, Xesosi sikākiti, auapanika hīte ākixinireē, ininiā hīte na nirekari āti koerekareri. Iua Erekar Matamatakoti oerekai ĩkniipoko. Iua oerekakiti atāopitika. Kona paxieneni iua. Ininiā hīkaikotako Xesosikata, Erekar Matamatakoti oereēkiti hīkīpitini.

²⁸ Ininiā namariteni nota tiretakini, himoianatapikariko Xesosi. Ininiā uaimoni ĩkanapiriākasaaki, hīpīkarauatini ! auari. Ininiā na hīpētaua haōkitakasaakiri iua. ²⁹ Xesosi kamari atão inakarinoka. Ikara himarotapeka. Ininiākara himarotari, kākiti atão inakarinoka kamakani Xesosi anaakori ininiuana.

3

Teoso Anaakori

¹ Aīri Teoso iteene tirtetaua ate. Hīxinikariko iua tiraōki. Iua iteene tirtetaua ate, ininiā, “Namariteni,” itxaua ate. Ari, atāopitikara Teoso anaakori atxaua. Ninoa Teoso anaakori minakanīua !auikari Teoso anaakori anīniua, kotxi ninoa !imarotari Teoso. ² Nitiretakini, Teoso anaakori atxapekua uatxa. Eereka !aimarotari kanatokoako atxapaniko. Ia aimarotapitika. Xesosi kanapiriākasaaki, Xesosi atoko atxapekauako, kotxi iusaaki aātamariko iua. ³ Kākiti ikara auiākani, !inirekarina maerekati ikaminina, kotxi Xesosi ! ikamari maerekati.

⁴ Maerekati kamakari !ikamari Teoso paniātakiti. Amakamakanisaakiri Teoso paniātakiti, iusaakipeka akamari maerekati. ⁵ Himarotari Xesosi apokapeka ĩkorapokoriti maerekati akamakiti imaktxakini ĩkapani. Xesosi ! ikamari maerekati. ⁶ Kākiti Xesosi ātipirika moianatakari !inirekaikari maerekati ikamini. Iua ātipirika maerekati kamakari !aōkitapanikari Xesosi. !Imarotapanikari Xesosi.

⁷ Namariteni nota tiretakini, !hāuiritapiri apanakini misirienetini hīte. Atão inakarinoka kamakari kamapitikari Teoso nireēkitinoka, Xesosi kaminiri atokokana, kotxi Xesosi kamari atão inakarinoka. ⁸ Ātipirika maerekati kamakari Satanasi nakiti itxaua, kotxi Satanasi kamapikari maerekati. Itixi kamikosaakipekara ikamaāpokatapitiporiri maerekati. Uatxa ikamapanikari. Teoso ākiri apoka ĩkorapokoriti maerekati Satanasi parīka ĩxipokini ĩkapani.

⁹ Teoso anaakori !inirekaikari maerekati ikaminina, kotxi Teoso aua ākixinireēna. Ininiā !iposotarina maerekati ikamaāpotinina, kotxi iritarina Teoso. ¹⁰ Ininiā kipa Teoso anaakori txataua? Atão inakarinoka kamakanira Teoso anaakori txaua. Āti tirtakanira Teoso anaakori txaua. Ininiā kipa Satanasi anaakori txataua? Erekar makamakanira Satanasi anaakori txaua. Āti matirtakanira Satanasi anaakori txaua.

Käkiti Tiretakakiniua Pirena

¹¹ Matiretakakaua. Merepitipanika Xesosi säkire hïkenakotakasaaki, hïkenakotari ikara ôtâkipirenatxi, hïtiretakakiniua. ¹² Kaiï inakori atoko !hïtxape. Maerekatinoka kamakari nakiti itxaua iua Kaiï. Satanasi nakiti itxaua. Kaiï okari atão itarika. Kixikapa okari? Ixikotiniri xika okapiri, kotxi itari kamari erekarinoka. Kaiï kamari maerekatinoka.

¹³ Nitariakori, Xesosi säkire mauïäkani omanatakasaakii hïte, ! hïtsorïkaätapeko. “Kixikapa ninoa omanataua ate?” !hïtxapeko, kotxi ikara atoko inakari apokapitikako. ¹⁴ Atiretiniäri aïtariakori Xesosi säkire auïäkani, aimarotari !apinaika. Aäupininiika Teosokata. Matiraökiti äkixinire ipïkari atoko itxa. ¹⁵ Käkiti itari omanatakari, Xesosi säkire auïäkari omanatakari, kokaniri atoko itxaua. Himarotari kokaniri !auari ätipirika Teosokata.

¹⁶ Xesosi Kristo ipina amaerekani imaktxakini ïkapani, ätipirika Teosokata aäüni ïkapani. Ikara oerekaua atão tiraökitxi. Ininiä erekari aïtariakori atiretini. Xesosi tiretiniua ate atokokana, erekari atiretiniäri aïtariakori. Atxiïti apina aïtari mapinakani ïkapani. ¹⁷ Pitii, pikiena pakini auiniäi, pitari, Teoso säkire auïäkari tii, ikiena pakini mauakaniä, pisikariko iuamoni. Pïmasikakaniäri iuamoni, Teoso tiraöki päkixinireë !auari. ¹⁸ Namariteni nota tiretakini, “Apanakini ate tireta,” atxaua, txamari kaamoni inakasaakina na asikana minakati, ininiä na atão atiretana. Atão matiretana apanakini. Kaamoni inakasaakina, masikana ninoa amonitakitina.

Teoso Säkire Kïpitakari

¹⁹ Ikara atoko akaminiä, aimarotari Teoso anaakori aniniäua. Aimarotari atão inakari säkiretxiti akïpitini. Ikara atoko akaminiä, erekapitïkari aäkixinire. Ikara atoko akaminiä, ! apïkari Teoso amisäkiretini. ²⁰ “Kona erekano,” pininiä päkixinireë, mitxi pïmaerekani pikamini xika, ! pipïkarauatape, kotxi Teoso iteene imarotai, iuaritika iteene iamoniäi. Poiäoka aimarotari aäkixinireë auakari. Teoso imarotari ikinipoko.

²¹ Nitiretakini, päkixinireë: “Namanaäpekarï Teoso imakinika nïmaerekani imaktxakini,” pininiä, kataparaxinirepitikai Teoso pïmisäkiretini.

²² Ininiä iua sikaua aamanaäkiti, kotxi ate kamari ipaniätakiti iaöka. Iua apokaerekatakatinoka akama. ²³ Teoso paniätaua ate: “Häuikariko namarite Xesosi Kristo säkire.” Apaka Teoso paniätaua: “Hïtiretakakauako.” Teoso paniätaua ikara akamini. ²⁴ Teoso säkire iaöka kamakari kaikotapika Teosokata ätipirika. Teoso kaikotapika iuakata ätipirika apaka. Aimarotari Teoso kaikotini atekata, kotxi iua sikaua Erekarï Matamatakoti aäkixinireë auini ïkapani.

4

Atamakaerekarauatini

¹ Nitiretakini, !häuikapiri ikinimane käkiti säkire, “Erekari Matamatakoti aua nota äkixinireë,” inakani. Hätaerekatanako ninoa. Atão Erekari Matamatakoti auatana atxiïti äkixinireëna? Atxiïti matamatakoti äkixinireëna auakari kona Teosomoni ïkarini. Itomaneri käkiti, “Nota Teoso säkire säpiretakarino,” inakani, txamari na atão ninoa säkire. Käkiti ninoa atoko inakani aua ikini itixitika. !Isäpiretarina atão Teoso säkire. Imisirienetarina käkiti. ² Käkiti säpiretiniäua: “Teoso äkiri Xesosi Kristo apokapeka ïkorapokoriti. Käkitipeka itxaua,” ininiä iuaasaaki aimarotari Erekari Matamatakoti auapitika iua äkixinireë. Ikara atoko aimarotari Erekari Matamatakoti Teoso sikakiti auafotiniri käkiti. ³ Käkiti säpiretiniäua: “Xesosi na atão käkiti ! itxaua,” ininiä iuaasaaki aimarotari Erekari Matamatakoti !auari iua käkiti äkixinireë. Matamatakoti iua käkiti äkixinireë auakari Satanasi nakiti itxaua.

Kristo omanatakari nakiti itxaua. Iua Erekar Matamatakoti Teoso nakiti itxaua. Hikenakopiretapekari: “Maerekati Matamatakoti Kristo omanatakari iokanatakiti apokapitikako ikorapokoriti,” itxa. Uatxa apokapeka.

⁴ Hite namariteni, Teoso nakitiakori hïtxaua. Ininiã hite !auikari atão minakati sãpiretakani sãpiretakiti, kotxi Erekar Matamatakoti hite ãkixinireë auakari apia posotiireri itxaua iua. Maerekati matamatakoti, Xesosi sãkire mauïãkani ãkixinireë auakari, kaposotiireri itxaua, iuaritika Erekar Matamatakoti hite ãkixinireë auakari apia sikaimaroretai hite. ⁵ Ninoa atão minakati sãpiretakani xinikakiti, itixi auakani xinikakiti atokotxikana, ininiãkara itixi auakani auikari ninoa sãkire. ⁶ Atepekana, Teoso nakitiakori atxaua. Teoso imarotakari auikari asãkire. Teoso nakiti minakatiua !auikari asãkire. Ininiãkara aimarotari kãkiti Erekar Matamatakoti auaãkixiniretakini. Iua Erekar Matamatakoti atãonoka isãkirauata. Aimarotari kãkiti ãti matamatakoti auaãkixiniretakini. Iua ãti matamatakoti kamisirienereri itxaua.

Teoso Tiraõki

⁷ Nitiretakini, matiretakakaua, kotxi tiraõkitxi Teosomoni potoricakari itxaua. Katiraõkirini Teoso anaakori itxauana. Ninoa atão imarotari Teoso. ⁸ Matiraõkiti !imarotari Teoso, kotxi Teoso tiraõkiuatapika. Tiraõkitxi Teosomoni potoriãkari itxaua. ⁹ Teoso iokanatar imatonõkari imi atemoni, Teosokata ãtipirika aãuini ikapani. Ikara atoko ininiã, Teoso oerekaua itiretiniua. ¹⁰ Ikara tiraõkitxi atão inakari itxaua. Mitxi ate !atiretari Teoso. Iuaritika iua tiretaua ate, ininiã iokanatar imi atemoni ipinini ikapani, maerekati akamakiti imaktxakini ikapani.

¹¹ Nitiretakini, ikara atokorako itxa Teoso tiretiniua, ininiã matiretakakaua. ¹² !Auari Teoso atamatakari, iuaritika Teoso auari aãkixinireë, atiretakakiniãua. Ininiã Teoso oerekaua atão atiraõkiuatini.

¹³ Aimarotari Teosokata akaikotini ãtipirika. Aimarotari Teoso ãtipirika kaikotini atekata. Aimarotari ikara atoko inakari, kotxi iua sikari Erekar Matamatakoti atemoni. ¹⁴ Aãtamatapekari Xesosi kamakiti. Akenakotapekari isãpiretakiti. Ininiã asãpiretari ikinimane, aïri Teoso iokanatar imi kãkitimoni, amaerekani maktxakakari ininiua ikapani, kãkiti ãtipirika Teosokata auini ikapani. ¹⁵ “Xesosi Teoso ãkiripitikara,” ina sãkiretakani, Teoso kaikotapika ninoakata. Apaka ninoa kaikota Teosokata ãtipirika. ¹⁶ Aimarotari Teoso tiretiniua. Aãuikapiretapitikari Teoso tiretiniua.

Teoso tiraõkiuatapika. Kãkiti katiraõkiri kaikota Teosokata ãtipirika. Teoso kaikota ãtipirika iuakata apaka. ¹⁷ Teoso oerekapekua atão atiraõkiuatini iua tiraõkiuatini atokokana. Ininiã kataparaxinireua Kristo apisatoõ aãpokasaaki, kãkiti misiritiko õtisaaki. Aimarotari !imisiritaua iuasaaki, ininiã kataparaxinireuako, kotxi ikorapokoriti aãuakasaaki Kristo atoko atxaua. ¹⁸ Atiraõkiuatakasaaki, !apikarauata. Atão atiraõkiuatiniã, !auari apikare. Apikarauatakasaaki, amaãkua.

¹⁹ Atiretari Teoso, kotxi mitxipeka iua tiretaua ate. ²⁰ Iua itari omanatakari, “Nota tiretari Teoso” ina sãkiretakari, paxirari isãkire. !itiretari itari iuakata auakari. Ininiã !iposotari itiretiniri Teoso imaõkitakiniti. ²¹ Ininiã Teoso paniãtaua: “Teoso tiretakari tiretariko itari apaka.”

5

Teoso ãkiri Auikiko

¹ Xesosi Teoso mereëkiti itxaua. Ikara auiaãkani Teoso anaakori itxauana. Aïri Teoso atiretiniã, aïtariakori apaka atireta, kotxi Teoso anaakori ninoa apaka txaua. ² Teoso atiretiniã, inireëkiti iaõka akaminiã, aimarotari Teoso

anaakori apaka atiretini. ³ Teoso atiretiniã, akîpitari ipaniâtakiti. Aposotari akaminiri ipaniâtakiti, kotxi na kamimari ipaniâtakiti. ⁴ Aposotari akaminiri iua paniâtakiti, kotxi iua anaakori atxapekaua, ininiã isikataparataua, maerekati itixi auakani nireêkiti amakamakani îkapani. Kininiãpa isikataparataua maerekati ninoã nireêkiti amakamakani îkapani? Isikataparataua, kotxi Xesosi sâkire aũuka. ⁵ Kipa posotatari maerekati itixi auakani nireêkiti imakamakani? Kâkiti auikiniãri Xesosi Teoso âkiri ininiãua, iuanokara posotari maerekati imakamakani.

⁶ Xesosi Kristo Teoso âkiri itxaua. Teoso oerekepekaua Xesosi iua âkiri ininiãua. Kãuaãriã Xesosi patxisatikosaaki isâpiretaua. Iuaikana Teoso sâpiretaua Xesosi iua âkiri ininiãua, Xesosi ipîkasaaki iarêka ixikepoatakasaaki. Teoso sâpiretaua kona Xesosi patxisatikosaakinanini. Iua oereka Xesosi Teoso âkiri ininiãua ipîkasaaki apaka. Erekarî Matamatakoti sâpiretaua Xesosi Teoso âkiri ininiãua. Iua atãonoka isâkire. ⁷ Teoso tixini auakani ipi, âti pakini oereka Xesosi Teoso âkiri ininiãua, aãri Teosoma, "Teoso Sâkire" inakorima, Erekarî Matamatakotima pakini. Naia ipi, âti pakini âtinoka. ⁸ Îkorapokoriti auakani ipi, âti pakini, Erekarî Matamatakotima, Xesosi patxisatikoma, Xesosi ipininima pakini oereka Xesosi Teoso âkiri ininiãua Xesosi. ⁹ Kâkiti erekarini sâpiretakiti aũuikapitika, ininiã apiata maũuikari Teoso sâpiretakiti, kotxi atãonoka isâkire. Iuara sâpiretaua Xesosi iua âkiri ininiãua. ¹⁰ Teoso âkiri auãkari âkixinire imarotari ikara Teoso sâpiretakiti atão inini. Teoso sâpiretakiti mauãkati txari: "Paxirari Teoso sâkire," kotxi ! auikari Teoso sâpiretakiti Xesosi iua âkiri ininiãua. ¹¹ Kiripa Teoso sâpiretaua? Iua sâpiretaua: "Nitxîkitakai auãki hinini notakata hãuapininika hinini tîkane. Ikara atoko nitxîkitakai namarite nakitiakori hinakasaakiaua." ¹² Iua Teoso âkiri nakiti Teosokata âtipirika auako. Iua Teoso âkiri nakiti minakatiua, ! auapani âtipirika Teosokata.

Aũuini Âtipirika Anini Tîkane

¹³ Hite auikari Xesosi Teoso âkiri ininiãua. Niokanatsopata hîtemoni, Teosokata âtipirika hãuini himarotini îkapani. ¹⁴ Teoso nireêkiti atoktxikana aamanainiãri Teoso, aimarotari ikenakotari amisâkiretiniri, ininiã kataparaxinirepitikaua amisâkiretiniri, kotxi aimarotari iua apakapapiretapitikaua. ¹⁵ Ikara atoko aniniã, aimarotari ikenakotari aamanaãkiti, ininiã isikapitikaua.

¹⁶ Himarotakasaakiri pitari kaminiri maerekati, himisâkiretari Teoso iua îkapani. Ininiã Teoso makatxakari maerekati ikamakiti. Teoso kamari iua âtipirika iuakata auini îkapani. Ikara maerekati makatxakiko auapitika, ininiã kona itxîkitakari iua xinire ipinini. Âtião maerekati kâkiti kamakiti aua. Ikara maerekati makatxakiko ! auari, ininiã itxîkitakari kâkiti xinire ipinini. Nota !õtãkikai himisâkiretiniri Teoso ikara atoko inakari maerekati kamakari îkapani. ¹⁷ Teoso paniâtakiti amakamakaniã, iuara maerekati txaua. Iuaritika aamanainiãri Xesosi ikara maerekati imakatxakini, ininiã ikara maerekati ! itxîkitakari kâkiti xinire ipinini.

¹⁸ Teoso anaakori atão inakani ! inirekaikari maerekati ikaminina. Aimarotari ikara. !Inirekaikarina maerekati ikaminina, kotxi Teoso âkiri nîkatana ninoã. Ininiã maerekati auite Satanasi !iposotari imisiritinina.

¹⁹ Ikini itixiti auakani auite itxaua Satanasi, maerekati kamakari. Iuaritika aimarotari Teoso anaakori aniniãua ate.

²⁰ Aimarotari, Teoso âkiri apokapeka îkorapokoriti. Aimarotari iua sikaua imare, ininiã aimarotari Teoso atão inakari. Akaikota iua atão inakarikata. Ari akaikota imi Xesosi Kristokata. Teoso atão inakari itxaua iua. Itxîkitakaua iuakata âtipirika aũuini.

²¹ Namariteni, nota tirketakini, !hĩteosonetapiri Teoso minakatiua. Aměě.

2 XOÃO

Iuaĩkana Xoão Iokanatsopatakiti

¹ Nota Xoão, mitxipe Xesosi imarotakarino nota. Niokanatsopata hĩte Xesosi sãkire auĩãkanimoni, hamariteakorimoni apaka. Teoso mereẽpekai hĩte inakitiakori hininiua ikapani. Nitiretai, kotxi hĩtaretari Teoso sãkire atão inakari. Kona notananini tiretai hĩte. Ikinimane atão inakari imarotakani tiretai hĩte apaka. ² Atiretai hĩte, kotxi atão inakari aua aãkixinireẽ. Atão inakari kaikotapika atekata ãtipirika.

³ Aĩri Teoso, imi Xesosi Kristo pakini sikari ikinipoko erekari hĩtemoni. Amonĩkai hĩte. Ikamaerekaxiniretaina hĩte. Ininiãkara himarotari atão inakari. Himarotari Teoso tiraõki.

⁴ Iteene nipoxokoniua, kotxi nimarotari apanakini hĩte kĩpitapikari Teoso sãkire. Atão inakarinoka hĩkama, kotxi aĩri Teoso paniãtaua ikara atoko inakari akamini. ⁵ Nota tiretakini, ia napaniãtai: “Matiretakakaua.” Ikara Teoso paniãtakiti !amanerini. Akenakopiretapekari ikara Teoso paniãtakiti, merepitiapanika Xesosi sãkire akenakotakasaaki. ⁶ Kisaakĩpa atiraõkiuata? Teoso paniãtakiti ikiniõtika akĩpitakasaakira, iuasaaki atiraõkiuata. Merepitiapanika pikenakotapekari ia Xesosi paniãtakiti: “Matiraõkiuata ikiniõtika.”

Kristo Omanatakani

⁷ Kaiãopokori kamisirienererini aua ikini itixiti. Ninoa sãkire: “Na kãkiti !itxaua Xesosi Kristo,” itxana isãkirena. Ikara atoko inakani misirienetari kãkiti. Kristo omanatakani itxauana ninoa. ⁸ Erepaniko. !Hãuikapiri isãkirena atão minakati, kotxi ninoa nirekari ixipokinirina hĩparĩka Teoso ikapani. Hinirekapitikari Teoso sikinii ikinipoko hĩparĩka ĩki.

⁹ Kãkiti takanapiniãri Kristo oerekakiti sãkiretxiti, ikamari maerekati. Teoso nakiti !itxaua. Kãkiti ãtipirika auikiniãri Kristo oerekakiti, imoianatari aĩri Teoso, imi pakini. ¹⁰ Kãkiti apokiniã paapoko, Kristo oerekakiti mauĩkakati, sãkiretxi atão minakati oerekakari, kona pauiritapiri ikaikotini paapoko. !Papakapapiri iua. ¹¹ Iua apakapakari apaka kamari maerekati iuakata, kotxi auiritari atão minakati isãpiretini.

¹² Ninirekari ito nisãpiretinii, txamari !ninarekari aãtsopaã nisãpiretakiti nitakini. Ninirekari naõkitinii hĩte. Iuasaaki asãkirauatako aãpisatoõtakiniiua, ininiã iteene apoxokoniua iuasaaki.

¹³ Hĩtariakori Teoso mereẽkini uai auakani iokanapireta hĩtemoni. Ixinika-manapitaina hĩte. Ameẽ.

3 XOÃO

Iuaĩkana Xoão Iokanatsopatakiti

¹ Nota Xoão, mitxi Xesosi imarotakarino, niõkatsopata pite nitiretakiti Kaiomoni. Nitiretai pite, kotxi pite tiretari atão inakari Teoso sãkire.

² Nitiretakiti, ninirekari ereka pinini pauini. Nimarotari pãkixinire ereka inini. Iua atokotxikana ninirekari piito ereka inini pimamianareni ikapani.

³ Aĩtariakori mitxi hĩtemoni nota iokanatakini, apokapeka uai. Isãpiretanona pite iteene auikiniri atão inakari Teoso sãkire. Ikinĩõtika pikamari Teoso sãkire iaõka. Atãonoka pikama. Ininiã ninoa minapiretakiti iteene kamapoxokonitano. ⁴ Namariteni atoko hĩtxaua, ininiã nikenakopiretakasaakiri ikiniõtika hĩkaminiri atão inakari Teoso sãkire iaõka, nipoxokoniuaata. Ikara atoko inakari minapirenatxi, ninoa minapiretakiti, apiã kamapoxokonitano nota.

⁵ Nitiretakiti peerekai pite, kotxi ikiniõtika pimoianatana aĩtariakori ereẽ apokakani. Mitxi !pimarotana ninoa, iuaritika pimoianatana. ⁶ Ninoa aĩtariakori sãpiretapekari pitiraõki Xesosi sãkire auiaĩkanimoni uai auakanimoni. Paapoko iuaĩkana ipotorikasaakina, erekari ninoa amonitakiti pisikinina, kotxi Teoso apokaerekatari ikara atoko pitiretinina. ⁷ Ninoa takanapari aapokona Xesosi sãkire isãpiretinina ikapani. Xesosi sãkire mauiaĩkani ! isikana iamontakitina ninoamoni. ⁸ Ininiãkara maãpakapana Xesosi sãkire sãpiretakani aãuapokoã. Ininiã amoianatana Teoso sãkire atão inakari iaripiretini ikapani.

Txiótepi, Temétxio Pakini

⁹ Niõkatsopatapeka Xesosi sãkire auiaĩkanimoni ereẽ pauiniãtaã auakanimoni. Txamari Txiótepi inakori !ikĩpitari nõtãkikare. Iua iuikapikaua. Inirekari ninoa auĩtetiniri iua, ininiã !imaãkatari nisãkire. ¹⁰ Iua kamapiretapikaua ate. Kona ikarananini ikama. Apaka !apakapana aĩtariakori, hĩtemoni sikani. Apaka !auiritana apanakini apakapinina ninoa. !Auiritaikari aĩtariakori nirekaãkani apotiitiniua Teoso misãkiretiko aikotiã. Ereẽ napokasaaki, iuaasaakiko nisãpiretai hĩte iua apisatoõ ikinika maerekati ikamakiti.

¹¹ Nitiretakiti, !pikamapiri maerekani kamakiti atoko. Erekarini kamakiti atoko inakarinanira pikamako. Erekarini kamakari Teoso nakiti itxaua. Maerekati kamakari !imarotari Teoso.

¹² Temétxio inakoripekana, ikinimane sãpiretari iua ereka inini. Atão inakari Teoso sãkire oerekaua Temétxio kamakiti atão inini. Ate apaka sãpiretari iua ereka inini. Himarotari atão inakarinnoka asãpireta.

¹³ Ninirekamari ito nisãpiretinii, txamari !ninirekari aãsopaã nisãpiretakiti nitikini. ¹⁴ Ninirekari paĩtiki naõkitinii pite. Iuaasaaki asãkirauatoko aãpisatoõtakakauako.

¹⁵ Ninirekari Teoso kamaerekaxiniretinii. Aĩtariakori uai auakani sãpiretai ixinikamanapitinii. Pisãpiretana ikinikana aĩtariakori ereẽ auakani, axinika-manapitinina ninoa.

XOTA

Xota Iokanatsopatakiti

¹ Nota Xota. Xesosi Kristo nitiri amotakori nitxaua. Txiako itari nitxaua. Niokanatsopata kăkitimoni, Teoso akiritakinimoni, Teoso aïri turetakinimoni. Xesosi Kristo nĭkatakiniimoni niokanatsopata.

² Teoso iteene amonĭkai. Iteene ikamaerekaxiniretai. Iteene itiretai.

Atăo Minakati Oerekakani

³ Hĭte nota turetakini, Xesosi makatxakapekari himaerekani, nota maerekani apaka. Ninirekamari niokatsopatini amaerekani makatxakiko pirena hĭtemoni. Iuanoka ninireka niokatsopatini, txamari nixinikari erekape atĭăo niokatsopatini. Ninirekari nôtăkikinii. Teoso oerekakiti săkiretxiti inakitiakorimoni isikakiti hinĭkaenetariko. Teoso oerekakiti ikinika isikapekari inakitiakorimoni. ! Hăuiritapiri apanakini koketini iĭkara ninoa oereekitkata. ⁴ Hĭte Xesosi săkire auĭăkani sauaki aua Teoso mapaxitakani. Merepanika ninoa apotiitakasaakĭua hĭtekata, ! himarotari kamisirienereni ininiuana. Ninoa koketari isăkirena Teoso săkirekata. Ninoa săkire: "Ate sirĭka anireekitokata, kotxi Teoso katiraokiri, ininiă iua ! imisiritaua." Ikara atokora itxana ninoa. Xesosi Kristonokara aăuĭte. Apiananiri itxaua. Iuaritika ninoa ! inirekari Xesosi. Kitxakapirĭka Teoso săkire iokatsopatakori săpiretari Teoso misiritiniri kăkiti ninoa atoko inakani.

⁵ Kitxakapirĭka Exito tixini auakani misiritana Xoteoakori. Himarotapekari ikara inakari. Ninirekari iuaĭkana hĭxinikiniri ikara inakari pirena. Teoso moianatana Xoteoakori, ininiă ninoa miteka, Exito tixini osipikinina ĭkapani. Hĭxinikariko ia: Teoso makatxakana ninoa iuasaaki imapinakanina ĭkapani, iuaritika mapa kasiriti napa atoko Teoso okana ninoa iua săkire mauĭăkani.

⁶ Atipekana nisăpiretai. Hĭxinikariko Teoso nitiriakori iaxitikini kitxakapirĭka. Teoso txĭkitakana ninoa auĭttxi ininiuana, txamari ! inirekaikarina Teoso paniătakiti ikaminina, ininiă itakanaparina auiniătaăna Teoso tixineĕ. Hĭxinikariko ia: Teoso paniătana ninoa ipiaă iĭkaiĭkotinina atipirika. Itixi xipokini otĭsaaki Teoso misiritanako ninoa.

⁷ Atipekana nisăpiretai. Hĭxinikariko Sotoma sitatxiti, Komoha sitatxiti, apanakini sitatxiti apaka iuaătaă takote auakari. Iuaă auakani ! inirekari Teoso paniătakiti ikaminina, ninoa Teoso nitiriakori atokokana. Maerekatinoka inirekapikana, kiki sirĭkini atĭ kĭkĭkata. Ininiă Teoso xipokari iuaă auakari sitatxiniri. Ninoa maerekani xika Teoso iokanatana ninoa arikatxi maxipokatimoni. Iuaă imisirităăkapikana. Ikara otăkĭkua maerekati amakamankani tĭkane.

⁸ Ninoa maerekati kamakani, kamisirienereni hĭte sauaki auakani, kitxakapirĭkarini atokokana itxana. Ixiniăkitina maerekati xika ninoaaka ĭto imisiritauana. ! Inirekarina Teoso ninoa auĭte ininiua. Imisăkirepiretarina Teoso nitiriakori iaxiti auakani. ⁹ Mikeo inakori Teoso nitiriakori auĭte itxaua, iuaritika ! imisăkirepiretari atĭ Teoso nitiri iaxitikiri. Kitxakapirĭka iua Mikeo Satanaskata itaparakienatakakaua, kotxi Mikeo nirekari Moisesini ĭto ikatini, txamari Satanasi nirekari Moisesini ĭto iua inakiti ĭkapani. Iuasaaki Mikeo ! imisăkirepiretari Satanasi. Ianoka isăkire: "Teoso misiritapanikaiko pite," itxari Satanasi. ¹⁰ Txamari ninoa kamisirienereni hĭte sauaki auakani misăkirepiretari ikinika imimarotakinina. Ninoa ĭĭkite kaxipiri ĭtopa auakani ĭĭkite atokokana, kotxi ikamarina ĭtonani nireekiti. Ikara ĭĭkitena xipokanako ninoa.

¹¹ Teoso misiritanako ninoa. Kitxakapirika Kaii inakori kamari maerekati. Iua maerekani atokokana ninoa maerekani. Kitxakapirika Paraão inakori kamari maerekati txineiro apakapini ikapani. Iua maerekani atokokana ninoa maerekani. Kitxakapirika Koree inakori !inirekari Moisesi iauite ininua. Iua atokokana ninoa !inirekari Teoso iauitetini. Ininiã ix-pokaãkanako Koree xipokiko atokokana.

¹² Hãpõititakasaakia hinipokotini ikapani, ninoa kamisirienererini apaka nipokota hãtekata. !Ipêtauatana. Itxikotarina iua kiiniri imaerekanina xika. Ninoaka itiretaua. !Itiretarina apanakini. Ītima anikari katxiãri iaxitikiri, ininiã katxiãri napiniãtaã ãparaã kipa, takari aneini ikapani. Txamari ninoaka kamisirienererini katxiãri ãki ãparaã mauakiniti atoko itxa. !Erekana kãkiti ikapani. Mitaãsaaki aua txipokori, txamari ninoa kamisirienererini mitaãsaaki aamina mariti atokokana ninoa. Aamina mariti ipikari atoko, kotxi !iminaua. Ninoa iua atokokana, kotxi !ikamari erekari. Aamina mariti tokaãka. Ikotsa maporokaãka, ininiã atão ipikari itxaua. Ninoaka kamisirienererini ikara aamina atoko, kotxi ipinanako. !Ikaikotana Teosokata ãtipirika.

¹³ Potxoari uiniti tsakati pamonõkoniri atoko itxa ninoa kamisirienererini. Tsakati sori txiko atoko itxa ninoa maerekani. Iõriki atoko itxana. Iua iõriki sinimoni !kimarotikori. Ninoa sariko ipiãmoni ãtipirika ikaikotinina ikapani. Teoso mereeri ikara ipiãtaã ninoa auini ikapani.

¹⁴ Kitxakapirika Enoki inakori sãpiretapekari kamisirienererini pirena. Iua Enoki Adão apika mekaniri apika mekaniri itxaua. Enoki txari: Hãtamatariko. Apiananiri apokako itiximoni itomaneri inakitiakorikata. Mio, apikomoni mio, apikomoni mio, itxaãpokata inakitiakori iuakata ikani.

¹⁵ Iua ikinipoko misiritiko sãpiretakari itxaua. Iua apokasaaki, isãpiretanako maerekati kamakani misiritiko, Teoso manireekani misiritiko, kotxi Teoso !ipotxtari ninoa kamakiti. Ninoa misãkirepiretapikari Teoso. Ninoa maerekani xika, Teoso imanirekakanina xika, imisiritãkanako, itxa Enoki sãpiretakiti kitxakapirika.

¹⁶ Ninoa kamisirienererini ãtipirika tsoatapika. ãtipirika apoïtapikana apanakini. Itona nireekitinanira ikamana. Iuikauana. "Peerekai pite," itxana ãtimoni inireekitinani apakapinina ikapani.

Õtãkipirenatxi

¹⁷ Nãtãretakini hãxinikariko aãuïte Xesosi Kristo iokanatakini sãpiretakiti akokaxiti. ¹⁸ Ninoa txai: "Xipokatxi õti kaimapeka inini manapi apokanako kikiakori hãte napetakani ãkane. Ninoa kamariko ninoaka nireekiti, Teoso manireekiniti," itxana Xesosi Kristo iokanatakini sãpiretakiti. ¹⁹ Ninoa maerekani xika kãkiti txitakakaua. Ninoa kamisirienererini kamari iïtona nireekitinoka. Erekar Matamatakoti !auinana ninoa.

²⁰ Hãtepekana nota tãretakini, iteene hãuikapikariko Teoso oereekiti. Ikara atoko hininiã, kataparaxinireiko hãte. Hãuikariko Teoso oereekiti, kotxi Teoso sãkire itxaua. Himisãkiretariko Teoso. Erekar Matamatakoti oerekai atão hãsãkirauatini ikapani. ²¹ Maerekati kamakani, iuaritika aãuïte Xesosi Kristo !imisiritai. Iua anikai ãtipirika iuakata hãuini ikapani. Ikara hiãtapakasaaki, ãtipirika hãxinikapikariko Teoso tiraõki hãte ikapani. !Hãtakanapapiri iua.

²² Apanakini !auikapanikari ikinika Teoso oereekiti, iuaritika !hãxitapena. Himoianatanako ninoa iteene auikniri ikapani. ²³ Pamonõkoniri, kãkiti kamakasaakiri maerekati. Xamina tirinakari atoko itxa imisiritikona imaerekanina xika. Ininiã hãsãpiretanako Teoso sãkire, imisiritikona apokini apisapanika. Xamina tirinakari ãki katxakakari pimakatxakini atokokana

itxa, pisāpiretakasaakiri Teoso sākire ninoamoni. Apanakinipekana hiamonikako. Hiamonikasaakina, erepaniko, kotxi pamonōkoniri ninoa maerekani. Homanatariko maerekati ninoa kamakiti, hīte makamakaniri ĩkapani.

Peerekari Teoso

²⁴ Teoso kaposotiireri nĳkataua maerekati amakamakani ĩkapani. Iua anikaua iua apisatoō apoxokoniritika. Iuasaakiko amaerekani !auaikako. Peerekari aāuini iua apisatoō. ²⁵ Āti Teoso !auari. Iuanokara Teoso txaua. Iuanokara kimaroreri. Amaerekani makatxakakari itxaua, kotxi aāuĳte Xesoĳi Kristo ipina ate ĩkapani. Iua iotximere aua, kotxi imaerekani !auari. Auĳtetxiakori auĳte itxaua iua. Kaposotiireri iua. Iposotari ikinipoko ikamini. Itixi kamiko apisapanika ikara atoko itxa Teoso. Uatxa ikara atoko itxapanika Teoso. Ikara atoko itxapikako ātipirika Teoso. Ameē.

APOKORÍPISI

Xesosi Kristo Iuaka Oerekinuia Pirena

Ia Aätsopa Oerekaua Xesosi Kamakiti

¹ Ia aätsopa oerekari Teoso nakitiakori Xesosi Kristo paítiki kamaenetakiti. Teoso iokanitari inítiri iaxitikiri Xoõmoni Xesosi Kristo kamaenetakiti oerekini íkapani. ² Ikinika Xoõo atamatakiti, ikinika ikenakotakiti pakini isäpireta ia aätsopaã. Ikara atoko isäpiretaua ate Teoso säkire, Xesosi Kristo säpiretakiti iuamoni. ³ Ia aätsopa atatsopatakani Teoso takariko erekari ninoamoni. Teoso takariko erekari ia isäkire kenakotakanimoni, ia isäkire kípitanimoni, kotxi ikinika Xoõo iõkatsopatakiti okatapaniiri apokini.

Xoõo Iõkatsopare

⁴ Nota Xoõo. Niokanitari ia niõkatsopare Teoso mereëkinimoni. Setxi sitatxiti Ásia inakori tixini auakanimoni niokanata niõkatsopare.

Teoso sikari ikinipoko erekari hitemoni. Ikamaerekaxiniretai hite. Uatxa iua aua. Merepitipanika kitxakapirika iua aua. Iua ätipirika auapikako. Setxi matamatakani iaxitikini Teoso topãkiniãtaã apisatoõ auakani sikari erekari hitemoni. ⁵ Xesosi Kristo apaka sikari erekari hitemoni. Atão inakarínoka säpiretakari itxaua iua. Iua merepitipanika õkitikaua ipíkani sauaki. Apaka itixi auakani auíteakori auíte itxaua iua.

Iua ate tiretakari. Ipina ate íkapani amaerekani imakatxakini íkapani, ininiã isikakaua erekari akamini íkapani. ⁶ Itxíkitakaua auítetxiakori aniniua. Itxíkitakaua sasetotxiakori aniniua, kotxi asãkirauata Teosokata. Ininiã atxari Xesosi:

“Ätipirika peerekai pite. Ätipirika pitenokara kaposotiireri. Ameë.”

⁷ Hätamata, Xesosi napani. Iua inako katxiäríkata. Iuasaaki ikinimane kãkiti atamatariko. Aamina ipiriãmitakari nopini iua tokakitakani apaka atamatariko iua. Iuasaaki ikini uãkati kãkiti atapariko iua. Ninoa atapakasaakiri iua, itxiapatana, akiripoakatana maerekati ikamakitina xika. Ikara atoko apokako. Ameë.

⁸ Apiananiri txari:

–Iõkatxi merepitipanika auakari Aopa inakori atoko nitxaua. Iõkatxi imapotõkire auakari Ómika inakori atoko nitxaua. Uatxa naua. Merepitipanika naua. Katana nota auapikako. Ikini posotiiretxi aua notamoni –ítxa.

Xoõo Atamatarí Äitari Iaxitikiri

⁹ Nota Xoõo, hítari. Nikamari Xesosi Kristo nireëkiti, ininiã himoianari nitxaua, kotxi ätipirika nimíteenekari nimisiritiko, hite misiritiko himíteenekini atoko. Ikara misirikaretxi apokapitika atemoni, kotxi aãuíte Xesosi Kristo nakitiakori atxaua. Nota aua Patamosi inakori pokomiriiti. Nitakaãka uai, kotxi Teoso säkire nisäpireta apanakinimoni. Ikinipoko nimarotakiti Xesosi Kristo pirena nisäpiretini xika kãkiti takano nota uai. ¹⁰ Kãkiti Apiananiri xinikini õtisaaki, Erekari Matamatakoti sikaimaroretano nota. Iuasaaki nikenakotari säkiretxi nitikinimoni. Säkiretxi apiaenetakari, trõpetata atoko nikenakota. ¹¹ Itxari:

–Kãkiti apisapanika naua nota. Nota auapanika ikinipoko xipokaãka atoko. Piõkatsopata aätsopaã patamatakiti tíkane. Eereka piokanataria iua aätsopa kãkiti Teoso mereëkinimoni setxi sitatxiti auakanimoni Ásia tixineë. Piokanatsopata Épeso sitatxiti auakanimoni, Esimina sitatxiti auakanimoni,

Pékamo sitatxiti auakanimoni, Txiatxira sitatxiti auakanimoni, Satxima sitatxiti auakanimoni, Piratéopia sitatxiti auakanimoni, Araotxiséia sitatxiti auakanimoni pakini –itxa notamoni.

¹² Ininiã eereka nikirioka notakata sãkirauatakarari natamatini ïkapani. Nikiriokasaaki, natamatari setxi tirikapi topãkini oro kamakori. ¹³ Tirikapi topãkiniãtaã, natamatari kãkiti itari iaxitikiri, iuaritika ipinimoni itxaua. Iua mãka õtanori. Ikitiãpeka apoka. Ipakiomatare atoko oro kamakoro aua itorotamoni. ¹⁴ Iãko iteene kasarori mapoa atoko itxa. Xamina tirinakari atoko itxa oki. ¹⁵ Ikiti mẽkorïka pirõsi xamina ãki imẽkorïkini atoko. Isãkire ene ãparaã torõkani atoko. ¹⁶ Iuako ikikomoni imaïkaro setxi iõriki. Inamaã iouata mitari pokïka. Iua iouata ipi uanaro aua. Atokatxi iotximere atoko itxa itoõ.

¹⁷ Natamatakasaakiri, nirika ikitimoni. Koriãkari atoko nitxa. Ininiã iusaaki itakari iuako ikikomnikiri nota nopini. Itxano:

–Kona pipïkaruatape, kotxi ikinipoko auini apisapanika nota aua. Ikinipoko xipokaãka atoko nota auapanika. ¹⁸ Nota auãkipika inakarino. Nota koriãkaripekano, iuaritika hãtamatano. Ætipirika auãki inakarino nota. Ameẽ. Kaposotiireno nota, kotxi nipaniãtari kãkiti ipinini. Niposotiire aua niokanatiniri kãkiti maerekati kamakani misiritikoãtaã. ¹⁹ Piõkatsopatari mitxi patamatakiti, uatxaika patamatakiti pakini. Apikomoni noerekakiti apaka piõkatsopata, kotxi noerekaiko katana itiximoni ïkari. ²⁰ Kiripa ninoa iõriki setxi pakini niuako nikipomoni auakani? Teoso nitiriakori itxauana. Ninoa anikari nota sãkire nisãkire auãkanimoni ninoa setxi sitatxi auakanimoni. Kiripa ninoa setxi tirikapi topãkini oro kamakori? Nisãkire auãkani ninoa setxi sitatxi auakani itxauana –itxa Xesosi Xoãomoni.

2

Xesosi Iokanapirena Êpeso Auakanimoni

¹ Xesosi misãkiretari Xoão:

–Piokanatariko ia nisãkire Teoso nitirimoni, Teoso sãkire auãkanikata auakarimoni Êpeso sitatxitiã:

Ninoa setxi iõriki maïkakarino nota. Nimaïkari ninoa iõriki niuako nikipomoni. Ninoa setxi tirikapi topãkini oro kamakori sauaki tïpokotakarino nota. Ia nota sãkire. ² Nimarotari ikinika hïkamakiti. Nimarotari itori parïkatxi pamimari hïkama. Parïkatxi kamimari inakasaaki, kona hïtakanapari. Maerekati kamakani apokasaaki hitemoni, kona hïte apakapana. Apokapeka apanakini kãkiti hitemoni. Itxana: “Teoso iokanatakiniraua ate.” Txamari, kona atão ninoa sãkire. Nimarotari kona hïte auiritana ninoa kaminiri maerekati. Hïte atamakaerekatana. Eereka himarotari kona atão ninoa sãkire. ³ Himisiritaãka nisãkire hïsãpiretini xika, iuaritika himiteenekari ikinipoko nota ïkapani. Kona hïsãpaka hïparïkauatini nota ïkapani.

⁴ Ikara hïkamakiti erekari, txamari hïtakanapari hïtoretinino. Merepanika hïtoretano. ⁵ Hïxinikariko merepitipanika hïtoretinino. Uatxa poiãoka hïtoretano. Iuaïkana hïkamariko merepitipanika hïkamakiti atoko. Hïmatakanapakaniãri ikara himaerekani, patimari napokini hitemoni. Nïmakatzakariko hïtirikapite topãkini. Ininiã Teoso sãkire auãkani !auaika ereẽ, himatakanapakaniãri ikara himaerekani. ⁶ Auapitika atão hïkamakiti, kotxi hïte omanatari Nïkoraito inakoni kamakiti. Nota apaka omanatari ninoa kamakiti.

⁷ Kakenakokii hïte, ininiã hïkenakotariko Erekari Matamatakoti sãkire Teoso sãkire auãkanimoni. Maerekati makamakati nauritako amãitiiri

Teoso tixine apanikaki auakari itximini. Iua amātiiri tximakari auapika ātipirika Teosokata,

—itxa Xesosi Épeso auakanimoni.

Xesosi Iokanapirena Esimina Auakanimoni

⁸ —Piokanatariko ia nisäkire Teoso nitirimoni, Teoso säkire auiañkanikata auakarimoni Esimina sitatxtiä:

Ikinipoko auini apisapanika nota aua. Ikinipoko xipokaäka atoko, nota auapanika. Nipiçe, iuaritika iuaikana nõkitikaua. Uatxa !nipinaika. Ia nota säkire. ⁹ Nimarotari hātatsiire. Nimarotari hite minakati !auari. Iuaritika ikinipoko erekari aua hitemoni. Nimarotari apanakini misäkirepiretini hite. Ninoa txa: “Xoteoakorira ate.” Txama kona atão Xoteoni !itxauana. Ninoa apotiitiñatãua Satanasi nakiti. ¹⁰ Kona hĩpĩkapiri himisiritiko ĩkapani ĩkari. Satanasi takari apanakini hite kateia äki ataerekatinii ĩkapani. Himisiritatãkako tesi pakini õti. Atxiiti hĩpina nisäkire hãuikini xika, iuaritika kona hĩtakanapapiri nisäkire hãuikini, ininiãkara nisikai ätião saporietã. Iua saporietã apakapakari auapika ātipirika Teosokata.

¹¹ Kakenakokii hite, ininiã hĩkenakotariko Erekari Matamatakoti säkire Teoso säkire auiañkanimoni. Maerekati makamakati kona iuaikana ikoriãika, —itxa Xesosi Esimina auakanimoni.

Xesosi Iokanapirena Pékamo Sitatxti Auakanimoni

¹² Eereka Xesosi iuaikana misäkiretari Xoão:

—Piokanatariko ia nisäkire Teoso nitirimoni, Teoso säkire auiañkanikata auakarimoni Pékamo sitatxtiä:

Notamoni auari oa iouata ĩpi uana auakito. Ia nota säkire. ¹³ Nimarotari ikinika hĩkamakiti. Nimarotari hãuiniãtaã. Ereë Satanasi kãkiti auite itxaua. Iuaritika hite auikari nota säkire. Kona hite takanapari nisäkire hãuikini. Ätxipa inakori auama hite sauaki. Iua säpiretapikari nisäkire kãkitimoni. ĩkara xika okapeëka ereë Satanasi auiniãtaã. Iuaritika kona hãsikano. ! Hĩtakanapari nisäkire hãuikini.

¹⁴ Txamari auapitika hĩkerokakiti. Aua kãkiti hite sauaki Paraão inakori säkire auiañkani. ĩtxakapirĩka iua oerekari Paraki inakori kãkiti Isaeo auakani imisirienetini. Iua Paraki xika ikamarina maerekati, kotxi inikarina xinitxi teoso kamakorimoni sikakori. Oerekana kãkiti kaminiri maerekati ĩto nireëkiti äti kãkiti ĩtokata. !Apakata kãkiti auikiniri Paraão säkire. ¹⁵ Hite sauaki aua kãkiti Nikoraito inakoni säkire auiañkani. Nota omanatari ninoa auiañkiti säkiretixiti. ¹⁶ Hĩtakanapariko ikinika himaerekani. Hĩkanapiriãko notamoni. ĩkara atoko himakamakaniã, patimari hitemoni napokini. Ininiã nineenamauata maerekati kamakanikata mitaro iouataã ninamaã auakaroã.

¹⁷ Kakenakokii hite, ininiã hĩkenakotariko Erekari Matamatakoti säkire Teoso säkire auiañkanimoni. Maerekati makamakati nisikariko komiri iaxitikiri kipatakori. Apaka nisikariko kai kasarori maerekati makamakanimoni. Iua kai nopini iõkataãka kãkiti uãka amaneri apanakini mimarotakiniti. Apakakarinarini imarotari iuãka amaneri, —itxa Xesosi Pékamo auakanimoni.

Xesosi Iokanapirena Txiatxira Auakanimoni

¹⁸ Eereka Xesosi iuaikana misäkiretari Xoão:

—Piokanatariko ia nisäkire Teoso nitirimoni, Teoso säkire auiañkanikata auakarimoni Txiatxira sitatxtiä:

Teoso äkirirano nota. Noki xamina tirinakari atoko itxa. Nikiti mẽkorĩka pirõsi atoko itxa. Ia nota säkire. ¹⁹ Nimarotari ikinika hĩkamakiti. Nimarotari hĩtiraõki. Nimarotari iteene hãuikari nisäkire. Nimarotari

iteene hīparīkauata nota īkapani, apanakini īkapani apaka. Hīparīka nota īkapani pasāpaniri inakasaaki, uaritika hīkamapanikari nota īkapani. Uatxa apiaāpota hīparīka nota īkapani.

²⁰ Itxama, nisāpiretaiko hīkerokakiti. Hīte auiritaro sito, Xesapeo inakoro, maerekati okamini hīte sauaki. Oa txa: “Teoso sākire sāpiretakarono nota.” Otxama, omisirienetana ninitiriakori. Oa xika, ninoa kamari maerekati iitona nireēkiti apanakinikata isirīkinina. Apaka ninoa nikari nipokori teoso kamakori sikakori. ²¹ Niātapari otakanapiniri omaerekani, txamari kona onirekari otakanapiniri omaerekani. ²² Ininiā nota kamariko oa amianatini. Oakata sirīkakani matakanaapaniāro, iteene ninoa atatsirauata. ²³ Oa anaakori nokapitikako. Ikara atoko inakasaaki, ikini mane Teoso sākire auīākani imarotariko nimarotari ikinika kākiti ākixinire, ikinika ixinikakiti pakini. Ininiā erekari nisikako erekari kamakanimoni. Apaka nimisiritari maerekati kamakani. Hīkamakiti iaōka nīkitxitai hīte.

²⁴ Uatxa nimisākiretai hīte apanakini Txiatxira sitatxiti auakani. Hīte auikari Teoso sākire. Hīte !auikari Xesapeo sākire. Hīte kona apaiaōkari Satanasi oerekakiti, iua imarore. Kona ninirekari nisikini apikomoni parīkatxi nota īkapani, kotxi uatxa iteene hīparīkauata nota īkapani. ²⁵ Ianoka ninireka hīkamini. Hīte auikari nisākire, ininiā hāuikiniiritika nisākire, nikanapiriāko.

²⁶ Iua maerekati makamakati, ātipirika nipaniātakiti kamakari, iuamoni nisikariko niposotiire itixi auakani auite ininiua. ²⁷ Teoso sākire kitxapirīkari txari:

Auītetxi itxauako. Itapararitika ipaniātana ninoa nireēkiti ikaminina. Imakamakaniārina inireēkiti, imisiritana ninoa, tūtxi kamakari tii imanirekakiniti ipakauanakini atoko.

Niri posotiire napakapakiti atoko iua apakapa. ²⁸ Apaka nisikariko iōriki īkanōkapanikero iuamoni, ininiā notaka nisikaua iuamoni, kotxi iua iōriki atoko nitxaua. ²⁹ Kakenakokii hīte, ininiā hīkenakotariko Erekarī Mata-matakoti sākire Teoso sākire auīākanimoni, –itxa Xesosi Txiatxira auakanimoni.

3

Xesosi Iokanapirena Satxi Auakanimoni

¹ Iuaīkana Xesosi misākiretari Xoāo:

–Piokanatariko ia nisākire ninitirimoni, Teoso sākire auīākanikata auakari-moni, Satxi sitatxitiā:

Notamoni aua ninoa setxi Matamatakoni Teoso nakiti. Notamoni aua ninoa setxi iōriki. Ia nota sākire. Nimarotari hīparīka. Apanakini sāpiretai hīte auāki hinini hīxinire, txamari Teosomoni koriākanipekarai hīte. ² Himereka. Araōkire hītapaniko. Hīsikataparitari erekari hākixinireē auakari, kotxi iua erekari ipinaariāpota. Ininiā hītākitakari iua erekari auāki inini iuaīkana. Notamoni hīparīka Teoso apisatoō na atāo. ³ Hīxinikariko hāpakapakiti, apaka hīkenakotakiti. Hīkīpitariko hīkenakotakiti. Hītakanapariko maerekati. Erekarī hīkamako, kotxi kītiriri apokini atoko napokako uai. Kākiti kona imarotari kītiriri apokini manapi. Ikara atokokana nitxako nikanapiriākasaaki.

⁴ Hīte Satxi sitatxiti auakani sauaki auapanika apanakini maerekati makamakani. Ninoa auikapitikari nisākire. Ninoa kākiti imāka matxikotakani atoko itxana. Ininiā notakata isanako. Imākana kasarori. Ikara atoko nikaminana, kotxi ninoa kamari erekari nipaniātakiti.

⁵ Maerekati makamakani ieretakariko mākatxi kasarori. Kona noakaniriko iuākana naātsopateē. Kākiti iuākana ikara aātsopaā auakani

ãtipirika auapikako Teosokata. Ikara atoko ininiã, nisãpiretari iuãkana nirimoni, iniritiakori iaxitikini pakinimoni. Nitxana: “Nota nakitiakori itxauana ninoa.”

⁶ Kakenakokii hïte, ininiã hïkenakotariko Erekarî Matamatakoti sãkire Teoso sãkire auïãkanimoni,
—itxa Xesosi Satxi auakanimoni.

Xesosi Iokanapirena Piratéopia Auakanimoni

⁷ Iuaïkana Xesosi misãkiretari Xoão:

—Piokanatariko ia nisãkire Teoso nitirimoni, Teoso sãkire auïãkanikata auakarimoni Piratéopia sitatxtiã:

Nota maerekati makamakatarano. Atão inakaranani sãpiretakarîkarano nota. Kaposotiireri auïtetxi Tavii inakori atoko nitxa, kotxi nota matakakakiti, kona ãti totari. Nota totakiti kona ãti matakakari.

⁸ Nimarotari hïte parïka. Hãtamata. Hïparïka nota ïkapani aapokotxi tore matakakakori atoko itxa. Kona ãti posotari ïsetiriniri. Ininiã kãkiti ! iposotari iotokakinii hïte nisãkire hïsapiretini. Ikara atoko nikaminii hïte, kotxi kona kataparai hïte. Ikara atoko nikaminii hïte, kotxi hïkïpitari nisãkire. Kona hïkipatari nisãkire apanakini apisatoõ. ⁹ Apanakini txari: “Atão Xoteoakori atxaua.” Txamarî Satanasî nakitiakori itxauana. Paxirari ninoa sãkire. Nikamariko ninoa kapotoreëkiniãua hïte apisatoõ. Iuasaaki ninoa txako: “Atãopitikara Xesosi tïretapitikai.” ¹⁰ Hïkïpitapekari nisãkire. Kamonõkoniri inakasaaki, kona hïtakanapari nisãkire, ininiãkara apia maerekati ikini itixiti apokasaaki, iuasaaki ninïkataiko hïte. Iua maerekati kona misiritai hïte. Iua maerekati apokako itixi auakani atamaerekatini ïkapani.

¹¹ Erepaniko, patimapaniriko napokini ereë. ãtipirika hïkamariko erekarî. Hïtakanapapikariko maerekati. Ininiã iuasaaki ãti kona posotari imaktxakiniri auïtetxi saporïëtane hïtemoni nisikakiti. !Imaktxakarina ikara hïparïka ïki. ¹² Nikamariko maerekati makamakati itïkare mina atoko inini niTeosone misãkiretiko aikoti ãki. Auapika Teoso misãkiretiko aikoti ãki, ininiã !itakanapari Teoso sãkire. Niõkatariko niTeosone uãka iua nopini. Apaka niõkatariko Teoso sitatxine uãka iua nopini. Ininiã apanakini imarotari Teoso nakitiakori ininiuana ninoa. Iua Teoso sitatxine Xerosareë amaneri iua tixine katxakakari. Iua maerekati makamakati nopini niõkatariko apaka nota uãka amaneri.

¹³ Kakenakokii hïte, ininiã hïkenakotariko Erekarî Matamatakoti sãkire Teoso sãkire auïãkanimoni,
—itxa Xesosi Piratéopia auakanimoni.

Xesosi Iokanapirena Araotxiséia Auakanimoni

¹⁴ Iuaïkana Xesosi misãkiretari Xoão:

—Piokanatariko ia nisãkire Teoso nitirimoni, Teoso sãkire auïãkanikata auakarimoni Araotxiséia sitatxtiã:

Niuãka “Ameë.” Nota atão sãkiretxiti sãpiretakarîkarano. Nikamarî ikinika nisãpiretakiti. Merepanika nikamarî ikinipoko. Ininiã ikinipoko auïte nitxaua nota. ¹⁵ Nimarotari ikinika hïparïka. Hïtxari: “Nauikapitikari Xesosi sãkire.” Txamarî kona iteene hinirekarî hïkaminiri nïpaniãtakiti. Apaka kona iteene hinirekarî hïtakanapiniri nisãkire. Kona kapatakari atokoni hïtxaua hïte. Kona katxïkareri atokoni hïtxaua hïte. Poomari atoko hïtxaua. Notamoni apiaerekata kapatakari atoko hininiua hïte. Iuasaaki iteene hinirekarî hïparïkauatini nota ïkapani. Iteene himanirekakaniãri hïparïkauatini nota ïkapani, apiaerekata katxïkareri atoko hininiua hïte, nisãkire ikinika hïtakanapini. ¹⁶ Notamoni hïte ãparaã poomari atoko

h̄itxa. Ininiã kona ãparaã kapatakaãri atoko !h̄itxa. Apaka kona ãparaã katxikareëri atoko !h̄itxa. Ikara atoko inakasaaki !ninierekai. Ininiã mapara nikanakai h̄ite. ¹⁷ H̄ite txa: “Katxineiroteua ate. Katiuua ate. Apikomoni anirekakiti !auari,” h̄itxa. Txama kona himarotari h̄ãkixinireë iteene himatinaniuatini. H̄ãkixinireë minakati !auari. H̄ãkixinireë mokiri atoko h̄itxaua. Kasarari atoko h̄itxaua h̄ãkixinireë. Ikara atoko hininiã, kona himarotari Teoso. ¹⁸ Nõtãkikai h̄ite hiamotiniri notamoni auakari oro atoko inakari. Oa oro xamina oeretakito. Ikara atoko h̄ikaminiã, ikinika hinirekakiti auako h̄itemoni. Hiamotariko mãkatxi kasarori notamonikiri h̄eretakini ìkapani, ininiã kona h̄ipëtauata kasara hinini xika. Ikara atoko h̄ikaminiã, h̄ãkixinire !auari maerekati. Hiamotariko apaka pinĩtxi notamoni auakari h̄õki ìkapani, ininiã atão h̄iposota h̄atamarauatini.

¹⁹ Nitiretakini nõtãkika, apaka noerekana. Ininiã ikinipoko atão h̄ikamako maerekati h̄itakanapini ìkapani. ²⁰ H̄ãtamatako. H̄ãkixinire toreë nota auapeka. Nota haãpoko maparakiri akiritakari atoko. H̄ikenakotiniãri nakiritiniã, h̄õsereiniãri h̄ãkixinire tore, nõiroã h̄itekata nikaikotini ìkapani. Iuasaaki ninipokota h̄itekata. H̄ite nipokota notakata.

²¹ Nauiritari maerekati makamakati topãkini notakata auĩtetxi topanere nopini. Iua auĩtetxi topanere nota nakiti. Iua atokotxikana nota topãka nirikata auĩtetxi topanere nopini iua nakiti nopini, kotxi maerekati makamakati nota apaka txaua. ²² Kakenakokii h̄ite, ininiã h̄ikenakotariko Erekarì Matamatakoti sãkire Teoso sãkire auĩãkanimoni, –itxa Xesosi Araotxisëia auakanimoni.

4

Iaxiti Auĩtetxi Topanere

¹ Eereka natamatari iaxiti tore. Itore imatakakaãka. Merepanika nikenakotari trõpeta atoko inakari. Kãkiti sãkire atoko itxa. Imisãkiretano:

–Uai pina notamoni. Noerekaiko katana auakari t̄ikane.

² Iuasaakipeka Erekarì Matamatakoti anikano. Iuasaaki natamatari auĩtetxi topanere iaxiti. Topãkakari aua iua nopini. ³ Iuaã topãkakari kai peereri pomëkoriri atoko itxa. Iua kai satõnia inakori atoko. Apaka ãti kai sãtxio inakori atoko itxa iua topãkakari. Kisi ãkitari iua auĩtetxi topanere. Iua kisi kai esimerãota inakori atoko itxa.

⁴ Iua ìtinikata aua v̄itxi koatro pakini topaneretxi. V̄itxi koatro pakini totiakori topãka iua topaneretxi nopini. Ninoã mãka kasarori. Ikiina aua saporieã oro kamakori. ⁵ Auĩtetxi topanereãtaã atamataãka ito mẽkokari. Iotxira, iokaamori aua iuaãtaã. Iteene poenixitiri. Iua auĩtetxi topanere apisatoõ aua setxi tirikapi. Setxi Matamatakoni Teoso nakitiakori itxauana ninoã setxi tirikapi.

⁶ Iua auĩtetxi topanere apisatoõ ipoa ãtakaãri atoko itxa. Auĩtetxi topanere ìtinikata aua koatro Teoso tixine auakani. Ninoã okĩtxinoka xãpokaĩtotakini. Auana okina ikini iũtoãna. Itorotaãna aua okina. Iporikiãna apaka aua okina.

⁷ Okĩtxinoka xãpokaĩtotakiti ãti, ãkiti atoko itxa. ãtipekana kema auĩte atoko itxa. ãtipekana aua kiki toõ atoko. ãtipekana kokoi araãkari atoko itxa. ⁸ Ninoã ikininape aua imĩkitana seisi pakini. Imĩkitana nopini, ipatapi apaka okina aua. Kona itomatana. Ikinì pokamarariti, ikini ìkanõkati itxana:

“Erekaì. Erekaì. Erekaì. Kexo Apiananiri pitxaua. Kaposotiireri pitxaua.

Àtipirika auakarii. Itxakapirika auakarii. Uatxa auakarii. Katana apaka pite auapanika,”
itxana àtipirika.

⁹ Ninoa okĩtxinoka xāpokaĩtotakini xipoātakasaaki, ixikaretarina Teoso paxitiko pirena. Ixikaretarina: “Ikinipoko ikamakiti ate ĩkapani erekarinoka. Peerekari iua auĩteti topanere topākakari, ātipirika auapika inakari.” Ninoa xikaretari ikara Teoso ĩkapani. ¹⁰ Ninoa vĩtxi koatro pakini totiakori xikarauatakasaaki, ikapotoreēkauana ixitimoni iua auĩteti topanere nopini topākakari apisatoō. “Ateosone,” itxana iua ātipirika auapika inakarimoni. Itakarina isaporiētane Apiananiri apisatoō, kotxi Teosonokara ikinimane auĩte. Iuasaaki itxana:

¹¹ “Apiananiri, aTeosone pitxaua. Erekaĩ pite, ininiā apakatapitika apaxitini. Apakatapitika ikinimane sāpiretinii: ‘Peerekaĩ.’ Apakatapitika pite apakapiniri ikini posotiiretxi. Ikara atāo, kotxi pite kamari ikini. Pite kamari ikini, kotxi pite nirekari pikaminiri. Pite nirekari ikinipoko auini,” itxana ninoa vĩtxi koatro pakini totiakori.

5

Aātsopa Iapiriākori Pirena

¹ Iuasaaki natamatari aātsopa iapirikakori iua auĩteti topanere nopini topākakari uakoā. Iuako ikikomokiriā aua. Iua aātsopa auari iōka ākiriko, inopinimoni pakini. Iua aātsopa aua setxi popitari kākiti makatamēkakaniri ĩkapani. ² Iuasaaki natamatari āti Teoso nitiri iaxitikiri. Kataparari iua. Itaparasākiritika itxa:

–Kiripa apakata imaktxakiniri ia popitari? Kiripa posotari ikatamēkiniri ia aātsopa? –itxa.

³ Itxama, kona auari iaxiti auakari, kona auari itixi auakari, apaka kona auari itixi patapi auakari, iua aātsopa katamēkakarĩ !auari. Ninoa !iposotari ikatamēkinirina iua aātsopa. !Iposotarina atamatinirina iua aātsopa āki.

⁴ Ininiā iteene nitxiapata, kotxi iua aātsopa iapiriākori katamēkakarĩ !auari. Erekarĩ kamakarĩ ! apokaāka ikatamēkiniri ĩkapani, atatsopatiniri ĩkapani.

⁵ Iuasaaki ninoa totiakori āti txari notamoni:

–Kona pitxiapatape. Patamata ikiraā. Ākiti atoko inakari iua. Xotaa apika mekaniriakori auĩte iua. Tavii apika mekaniri iua. Oerekapekari Satanasi poiāori inini. Iua apiata. Ininiā iuanani posotari ikatamēkiniri iua aātsopa iapiriākori. Iuanani posotari imaktxakiniri ninoa setxi popitari –itxa iua toti.

⁶ Iuasaaki natamatari soti auĩte okakori atoko. Iua itima iua auĩteti topanere apisatoō. Ninoa ipi ipi pakini okĩtxinoka xāpokaĩtotakini, ninoa totiakori pakini ākitari iua. Setxi iko, setxi oki pakini aua iuamoni. Setxi oki aua iuamoni, kotxi setxi Matamatakoni Teoso nakitiakori aua. Teoso iokanatana ninoa ikini itixitimoni. ⁷ Iua soti auĩte atoko inakari sari iua auĩteti topaneremoni. Imaĩkari aātsopa topaneretxi nopini topākakari uakoā auakari. Iuako ikikomokiriā aua. ⁸ Imaĩkasaakiri, ninoa koatro okĩtxinoka xāpokaĩtotakini, ninoa vĩtxi koatro totiakori pakini patimari ipamakinina soti auĩte apisatoō. Ikinikana auari arpa inakori xikari ikaminina ĩkapani. Imakinikana auari kopitipaki oro kamakori. Naia kopitipaki xāpoka koria atoko inakari peeremari. Ia kamariāro Teoso sākire auiākani sākire iuamoni.

Amaneri Xikariti

⁹ Iuasaaki ninoa xikaretari amaneri xikariti. Ixikaretarina:

“Pitenani apakata papakapiniri iua aātsopa iapiriākori. Pitenani apakata pimaktxakiniri popitari, kotxi pitenanira erekari. Pite okaāka. Piarēkaā piamotaua ate Teoso ĩkapani. Piamotapekaua ikini uākati

kākiti sauaki. Ikini āti uāka sākire sākiretakani sauaki piamotapekaua. Ikinika itixiti auakani sauaki piamotapekaua ate.

¹⁰ Pite txīkitakaua ate auītetxiakori aniniua, sasetotxiakori apaka aniniua, Teoso īkapani aparīkauatini. Ininiā itixi auakani auīte atxauako ate.”

¹¹ Iuasaaki natamatari itomaneri Teoso nitiriakori. Nikenakotari ninoa sākire. Kaiāopokori ninoa. Seī mio, apikomoni seī mio, apikomoni seī mio itxaāpokatana. !Apakata ninoa iaōtiko. Ninoa ākitari iua auītetxi topanere, okītxinoka xāpokaītotakini, totiakori pakini. ¹² Itapasākireritika ixikarauatana. Itxana:

“Soti auīte okaāka kākiti īkapani. Ininiā ātipirika apakata iua apakapiniri posotiiretxi, ikinika erekari, imaroretxi, taparātxi pakini. Apakata ikinimane paxitiniri iua. Apakata ikinimane sāpiretiniri iua ereka inini. Apakata ikinimane iukiniri iua.”

Ikara atoko ninoa xikarauata.

¹³ Ikara eereka nikenakotari ikinika iaxiti auakani, ikinika īkorapokoriti auakani, ikinika itixi patapi auakani, ikinika potxoari uiniti nopini auakani, ikinika potxoari uiniti āki auakani pakini xikarauatini. Itxana:

“Ikinika erekari ātipirika aua iua auītetxi topanere topākakarimoni, iua soti auīte pakinimoni. Ikinika ātipirika paxitana. Ikinika ātipirika txari: ‘Peerekana ninoa.’ Ikinika taparātxi ātipirika aua ninoamoni.”

¹⁴ Ininiā ninoa koatro, okītxinoka xāpokaītotakini txana:

—Ameē.

Iuasaaki ninoa vītxi koatro totiakori patimari pamakini.

—ATEosone pitxaua —itxana iua ātipirika auakarimoni.

6

Soti Auīte Makatxakari Popitari

¹ Natamatari soti auīte makatxakiniri āti popitari. Ikara natamatakasaaki, nikenakotari okītxinoka xāpokaītotakiti sākire. Isākire ikarokirauatini atoko itxa.

—Uai pinako. Patamata —itxa.

² Iuasaaki natamatari kavaro kasarori. Kiki aua oporikiā. Iua tapotxi aua. Auītetxi saporietane sikaāka iuamoni. Iua sari ikini itixitimoni kākiti auīte ininiua īkapani.

Āti Popitari Makatxakiko

³ Eereka soti auīte makatxakari āti popitari aātsopaā, ininiā ipi auape. Iuasaaki nikenakotari ātipekana, okītxinoka xāpokaītotakiti sākire:

—Uai pinako. Patamata —itxa.

⁴ Ikara eereka natamatari kavaro pōkamarari. Kiki aua oporikiā. Iua kiki sikaāka posotiiretxi neenamatzxi ikamini ikini itixitiā, ininiā neenamatzxi mauakaniātaā !auari. Itxīkitakari kākiti okakakinia. Isikaāka iouata mī-tapoari ineenamauatini īkapani.

Āti Popitari Makatxakiko

⁵ Eereka soti auīte makatxakari āti popitari, ininiā ipi āti auape. Iuasaaki ātipekana, okītxinoka xāpokaītotakiti txari:

—Uai pina. Patamata —itxa.

Ininiā iuasaaki natamatari kavaro pomamari. Kavaro nopini topākakari aua minari iaōtiko iuakoā. ⁶ Eereka nikenakotari āti sākirauatini okītxinoka xāpokaītotakini sauaki. Itxa:

—Ipixini kiro triko iiki, āti ōti kākiti parīka ikitxikana. Āti, ipixini pakini kiro atarokiri atoko inakari iiki, āti ōti kākiti parīka ikitxikana. Iitxiā iiki, ovaā iiki pakini poiāopanikako.

Āti Popitari Makatxakiko

⁷ Eereka soti auite makatxakari āti popitari, ininiā ipi ipi pakini auape. Iuasaaki nikenakotari imapotōkirekiri, okītixinoka xāpokaītotakiti sākire. Itxari: —Uai pina. Patamata —itxa.

⁸ Iuasaaki natamatari kavaro posētakari. Inopini topākakari uāka “Ipīkitxi” inaāka. Āti iua tikini sa. Iua akiritaāka “Maerekani Misiritikoātaā” inaāka. Isikaākana posotiiretxi kaiāopokori itixi auakani okiniua ikapani, ininiā koatro kākiti auiniātaā āti okaāka. Ninoa okana kākiti neenamatiā, natxiā, amianariā, kaxipiri kaneenamariā pakini.

Āti Popitari Makatxakiko

⁹ Ininiā soti auite iuaikana makatxakari āti popitari, ininiā ipi ipi āti pakini auape. Iuasaaki natamatari Teosomoni sikakori takikoātaā patapi kākiti okakoni. Ninoa okaāka Teoso sākire isāpiretinina xika. Kona itakanaparina isāpiretinina Teoso kamakiti ninoa ikapani, ininiā ikara xika okaākana.

¹⁰ Itapasākireritika akirikatarina Teoso. Itxana:

—Apiananiri, ātipirika erekari kamakari pite. Atāonoka pisākire. Kirisaakipa pimisiritari itixi auakani? Kirisaakipa pixikatxitaua ate, kotxi ninoa okaua ate? —itxana.

¹¹ Ininiā mākatxi kasarori sikaāka ninoamoni. Eereka isāpiretaākana:

—Hiātapariko apikomoni. Teoso nirekari apanakini hītariakori, initiriakori okiko hite atoko iniko. Hītariakori okaāka atoko, Teoso xikatxitai hite. Hiātapariko ikara ōti —itxa.

Āti Popitari Makatxakiko

¹² Eereka nitikari soti auite makatxakiniri āti popitari, ininiā seisi pakini auape. Iuasaakipeka itixi iteene iakeēkata. Atokatxi mamāka, sako mata pomamari potxi iāko kamakori atoko. Kasiri kamarāka arēkatxi atoko.

¹³ Iōriki itori iaxiti auakaro irika ikorapokoritimoni. Amātiiri itima iokatxaākiti atoko otxa. ¹⁴ Natamatari iaxiti aātsopa iapirikiniua atoko. Ikinika ixirata mitari, ikinika ipokomiriī pakini makatxakaāka. Ātiātaā itakaāka.

¹⁵ Iuasaaki ikorapokoriti auītetxiakori, kākiti kaposotiirerini, katiirini, soto auiteakori, kākiti katapararini, nitiritxi amotakoni, nitiritxi minakanuia pakini kipataua aarikoā, kai mitari sauaki ixirataā. ¹⁶ Iuasaaki itxana ixirata auitemoni apaka kai mitarimoni:

—Hirikako ate nopini. Hikipataua, kotxi topaneretxi nopini topākakari, soti auite pakini nirekari imisiritiniua ate. ¹⁷ Soti auite misirikare ōti manapi apopeka. Kona kākiti miteenekari ikara misirikaretxi.

7

Sēto Koarēta Koatro Mio Teoso Nitiriakori Itixi Auakani

¹ Eereka natamatari Teoso nitiri iaxitikiri timini atokatxi pokīkinimoni, āti atokatxi ereēkokinimoni, āti atokatxi kimapore sanaremoni, āti atokatxi kimapore kikomoni. Ininiā ipi ipi pakiniue ninoa. Ninoa maikari itima ipi ipi pakini itixi auakari itimati. Ininiā itima kona inapaika itixiā. Kona kāuaāriā !inapaika itima. Kona aaminaā !inapaika itima. ² Natapari āti Teoso nitiri iaxitikiri inaāpotini atokatxi pokīkinimoni. Teoso ātipirika auakari takaōtxikare aua iuamoni. Itapasākireritika akiritana ninoa ipi ipi pakini

Teoso nitiriakori. Ninoa parīka itixi, potxoari uiniti pakini imisiritinina.

³ Iua Teoso takaōtxikare auakiti txari ninoamoni:

—Uatxa kona himisiritapiri itixi, potxoari uiniti, aamina pakini. Himisiritinina apisa, ate takari Teoso takaōtxikare initiriakori itixi auakani teētaā.

⁴ Eereka nimarotari Teoso takaōtxikare apakapakani. Itakaōtxikaākana sēto koarēta koatro mio kākiti. Ikini uāka Isaeo tixinikini takaōtxikaākana.

⁵ Tosi mio Xotaa apika mekani takaōtxikaākana.

Tosi mio Hopē apika mekani takaōtxikaākana.

Tosi mio Katxi apika mekani takaōtxikaākana.

⁶ Tosi mio Asee apika mekani takaōtxikaākana.

Tosi mio Natarii apika mekani takaōtxikaākana.

Tosi mio Manasee apika mekani takaōtxikaākana.

⁷ Tosi mio Simiāo apika mekani takaōtxikaākana.

Tosi mio Arevii apika mekani takaōtxikaākana.

Tosi mio Isakaa apika mekani takaōtxikaākana.

⁸ Tosi mio Seporō apika mekani takaōtxikaākana.

Tosi mio Xosee apika mekani takaōtxikaākana.

Tosi mio Pēxamiī apika mekani takaōtxikaākana.

Itomaneri Kākiti Teoso Apisatoō

⁹ Ikara eereka natamatarī itomaneri kākiti apotiitakaniua. !Apakata kākiti iaōtiniri ikinikana. Aua kākiti ikini itixitikini, kākiti ikini serefi. Aua ikini uāka sākire sākiretakani. Ikinikana ninoa timanāta Apiananiri apisatoō, soti auīte pakini apisatoō. Ninoa māka kasarori. Aātape aua iuakoāna.

¹⁰ Itaparasākireritika itxana:

—Ateosone topāka auītetxi topanere nopini. Iuara, soti auīte pakini makatxakapekari amaerekani.

¹¹ Iuasaaki ikinika Teoso nitiriakori iaxiti auakani tima. Ninoa ākitana auītetxi topanere, totiakori, ninoa ipi ipi okītxinoka xāpokaītotakini pakini. Ikapotoreēkauana itoōna xitimoni, auītetxi topanere apisatoō. “Ateosone pite,” itxana Teosomoni. ¹² Ixipoātana Teosomoni:

—Ameē. Ātipirika ikinimane sāpiretai ereka pinini. Peerekai. Kimarorei. Erekarī pikamakiti ate ikapani. Ikinimane paxitai. Kaposotiirei. Pataparai. Ātipirika ikara atoko atxai. Ameē.

¹³ Ininiā eereka ninoa totiakori āti pimaāno nota:

—Kirīpa ninoa kākiti mākatxi kasarori ieretakakani? Namonipa inana ninoa? —itxa iua.

¹⁴ Ininiā nota txari iua:

—Pitera imarotari.

Ininiā iua txano:

—Ninoa iteene misiritaākapeka. Uatxa ixipope ninoa misiritiko. Soti auīte makatxakapekari imaerekanina. Ininiā imākana soti auīte arēkaā arokakori atoko itxauana. Uatxa kasarori imākana, kotxi itxiko !auari. Soti auīte makatxakapekari kākiti maerekani ipīkasaaki, ininiā mākatxi kasarori atoko itxa ninoa ākixinire.

¹⁵ —Ininiā ninoa aua Teoso topanere apisatoō. Imisākiretiko aikoti āki iparīkauatana Teoso ikapani ikiniōtika pokamara, ikanōka pakini. Ininiā iua auītetxi topanere nopini topākakari auapikako ninoa sauaki. ¹⁶ Ninoa kona natxitaika. Kona iposonataikana. Atokatxi kona arikana ninoa. Kona kapatakari kona arikana. ¹⁷ Kotxi soti auīte auītetxi topanereātaā auakari nīkatanako ninoa. Iua anikana ninoa sōtoārimoni. Iuaā auakari sōtoāri iātakani ātipirika auapikako. Teoso makatxakariko ikinika iātsaāna. !Itxiapataikana.

8

Imapotōkire Popitari Makatxakiko

¹ Imapotōkire popitari imakatzakasaaki, ikinipoko tsorīkaxitita Teoso tixineē. Ikara atoko ipixini oara. ² Eereka natamatana setxi Teoso nitiriakori, iua apisatoō timakani. Isikaākana setxi xikari kamiko trōpeta inakori.

³ Eereka āti Teoso nitiri apoka. Itima Teosomoni sikakori takikoātaā. Kamariāro arikiko koanati oro kamakori iuamoni aua. Kamariāro ito sikaāka iuamoni, Teosomoni isikini īkapani, ikinika Teoso nakitiakori amanaākiti sākiretxitikata. Ininiā arikari iua kamariāro Teosomoni sikakori takikoātaā nopini. Oro kamakori iua Teosomoni sikakori takikoātaā auītetxi topanere apisatoō. ⁴ Ininiā iuakoā kamariāro txiā, Teoso nakitiakori amanaākiti sākiretxitikata kanīka Teoso apisatoō. ⁵ Ininiā eereka iua Teoso nitiri kosekari okoana. Ixāpokakari xaminaminiki mēkorīkakariā, Teosomoni sikakori takikoātaā nopini auakariā. Eereka okari itiximoni. Iuasaakipeka aua karokirauari, mēkokari pakini. Apaka iuasaaki itixi iakeēkata.

Koatro Trōpeta Pirena

⁶ Ininiā ninoo setxi Teoso nitiriakori setxi trōpeta auakini iposope itrōpetane ixōkinina īkapani.

⁷ Ininiā ninoo Teoso nitiriakori āti xikarauata itrōpetaneē. Iuasaaki katxīkareri kai soro atoko inakari, apaka xaminaminiki mēkorīkakari arēkatxiā koketakori okaāka itiximoni. Ikara xika apanakini aamina itixi auakari arika, ininiā ipi āti pakini aamina auiniātaā ātika arikaāka. Ikinika katsoati arika apaka.

⁸ Eereka āti Teoso nitiri xikarauata itrōpetaneē. Ininiā ixirata auīte atoko inakari arikatzikata okaāka potxoari uinitimoni. Ininiā ipixini potxoari uiniti arēkatxi itxapekaua. ⁹ Ininiā apanakini potxoari uiniti āki auakani ipīpe, ininiā ipi āti pakini potxoari uiniti auakani auiniātaā ātika ipīpe. Iuasaaki apanakini maporonni apaka xipokaāka, ininiā ipi āti maporo auiniātaā ātoka xipokaāka.

¹⁰ Eereka āti Teoso nitiri xikarauata itrōpetaneē, ininiā ipi āti pakini iniriakori xikarauatape. Iuasaaki iōriki mitari iaxitikero katxaākata. Otirika tirikapi atoka. Oīrika ipixini uini nopini. Oīrika ipixini sōtoāri nopini apaka.

¹¹ Iōriki uāka, “Kapixiro,” otxaua. Ininiā ipixini āparaā kapixiā. Ipi āti pakini sōtoāri auiniātaā, ātinoka sōtoāri kapixiā. Ito kākiti iātari iua āparaā, eereka ikoriāna, kotxi kapixiāri āparaā.

¹² Ininiā āti Teoso nitiri xikarauata itrōpetaneē, ininiā ipi ipi pakini iniriakori xikarauatape. Iuasaaki atokatxi ponikare, kasiri, iōriki pakini kona iteene !iponikaika. Imamākapeka. Ininiākara pokamara ipi ipi pakini oara atokatxi liponikaika. Iua atokotxikana ikanōka ipi ipi pakini oara kasiri, iōriki pakini !iponikaika. ¹³ Ininiā eereka nitikarauatakasaaki, nikenakotari āti Teoso nitiri sākire. Iua araaāpota Teoso tixine. Itaparasākireritika itxari:

—Erepaniko. Erepaniko. Erepaniko itixi auakani. Auapanika apikomoni ipi, āti pakini trōpeta Teoso nitiriakori xōkini īkapani.

9

Āti Trōpeta Xōkiko

¹ Ininiā āti Teoso nitiri xikarauata itrōpetaneē. Iuasaaki nitikari āto iōriki iaxitikero katxakini itiximoni. Iōrikimoni osikaāka xavi aariko mamapotōkire irikoti tore īkapani. ² Ininiā iōriki atoko inakari mataakari iua aariko. Eereka katxiāri kaiāopoko pokīka. Katxiāri tokori arikikosaaki atoko itxa. Eereka iaxiti, atokatxi pakini piāka itxiā xika. ³ Iposo atoko txītxiri atoko inakari pokīka

itxiã. Posotiiretxi isiãkana, ininiã kaxapiro itixi auakari posotiire atoko aua txĩtxirimoni, kãkiti ioãkini ìkapani. ⁴ Ipaniãtaãkana katsotati imokakanina, apaka takari, aamina pakini imokakanina. Ipaniãtaãkana imisiritinina Teoso takaõtxikare iteãtaã mauakini. ⁵ Kona isikaãkana posotiiretxi kãkiti okinina ìkapani. Siko kasiritinanira ninoa paniãtaãka imisiritinina ninoa. Imisiritarina kaxapiro ioãkini atoko. ⁶ Iuasaaki kãkiti nirekariko ipinini. Itxama, kona iposotarina ikoriinina. Initarina ipĩkitxi, txamari iuasaaki ipĩkitxi mitekapeka.

⁷ Iua txĩtxiri kavaro atoko itxana. Kavaro neenamatchi kamakani atoko itxana. Ikiãna aua saporieãta atoko oro kamakori. Itoõna kãkiti toõ atoko itxana. ⁸ Ninoa iãko sito iãko atoko itxana. Itsiriãna ãkiti tsiriĩ atoko itxana. ⁹ Itorota ipatinina koana metao kamakori atoko. Imĩkitana ene kavaro ito-maneri miteẽkani ene atoko. Mitekaĩ ene atoko itxana. ¹⁰ Ninoa xipi kaxapiro xipi atoko itxana. Oko aua ixipiãna. Ninoa posotari kamatsitĩniri kãkiti siko kasiriti. ¹¹ Ninoa auĩte aua. Iua Satanasi nitiri. Mitxi aariko mamapotõkire irikoti ãki auakari iua. Xoteo sãkireẽ iua uãka Apatõ itxaua. Kreko sãkireẽ iua uãka Aporioõ itxaua. Popĩkari sãkireẽ “Ikinipoko Xipokakari,” itxaua.

¹² Æti misirikaretxi napapeka. Txama auapanikako apikomoni ipi misirikaretxi.

Æti Trõpeta Xõkiko

¹³ Æti Teoso nitiri xikarauata itrõpetaneẽ. Iuasaaki seisi trõpeta xõkapeẽkaika. Teosomoni sikakori takikoãtaã oro kamakori aua ipi ipi pakini iko. Ikara Teoso apisatoõ. Nikenakotari iko takote auakari sãkirauatini. ¹⁴ Ininiã iua txari Teoso nitiri iua trõpetaã xikarauatakari:

–Pisikakanako ipi ipi pakini Teoso nitiriakori iaxirikakoni Eoparatxi inkakori uiniti auakani.

¹⁵ Naia ipi, ipi pakini Teoso nitiriakori iposopekana ia anokanani, ia kasiriti, ia õti, ia oara manapi ìkapani. Ininiã ninoa sikakaãka kaiãopokori kãkiti okinina ìkapani. Ininiã ipi ãti pakini kãkiti auiniãtaã auiritaãka ãtika okinina. ¹⁶ Æti sãpiretano ninoa sotatone kavaro nopini auakani tosẽtosi mirão aua. Kaiãopokori.

¹⁷ Natamatari ninoa sotatoakori kavaro nopini nitaponemoni. Natamatakasaakina ia atoko ninoa. Itorotana koana metao kamakori auana. Apanakini torota koana põkamarari xamina tirinakari atoko itxa. Apanakini poporeri. Apanakini posẽtakari ãxõpĩri atoko. Ikiina ãkiti kii atoko. Inamaãna ipokĩka xamina tirika, katxiãri, ãxõpĩri pakini. ¹⁸ Ikara xamina tirinakari, ìkara katxiãri, ìkara ãxõpĩri pakini inamaãna pokĩkakari, okari kaiãopokori kãkiti itixi auakani. Ininiã ipi ãti pakini kãkiti auiniãtaã ninoa okari ãtika. ¹⁹ Kavaro posotiire inamaã, ixipiã pakini aua. Ninoa xipi imini atoko itxa. Ixipiãna aua ito kiiri. Ninoa kii misiritari kãkiti.

²⁰ Ininiã itomane kãkiti koriã ia misirikari xika. Iuaritika kãkiti mokakoni maerekati kamakani ìnirekari itakanapinirina imaerekani. Ninoa kapotoreẽkapanikaua Satanasi nitiriakorimoni. Ikamapanikarina ninoa amanaãkiti. Iteosonetari aamina kamakori, oro kamakori, pirata kamakori, pirõsi kamakori, kai kamakori pakini. Ninoa teosone kona posotari atamarauatini. Kona iposotarina ikenakorauatini. Kona iposotarina itõpokotinina. ²¹ Ninoa kãkiti okapanikari apanakini. Ikamapanikarina mĩti parĩka. Isiriãkapanikana apanakinikata. Iitiriãkapanikarina apanakini kãkiti tii. Kona inirekarina maerekati itakanapinina.

10

Aātsopa Axapitiri Iapirikakori

¹ Iuasaaki natamatari Teoso nitiri iaxitikiri katxakini ĩkorapokoritimoni. Kataparari iua. Iua katxiāri iaxitikiri āki. Katxiāri imāka atoko itxa. Kisi ikii nopini aua. Itoō atokatxi atoko itxa. Itapike aātsota tirinakari atoko itxa. ² Imaīkanātari aātsopa iapirikakori axapitiri. Iuakoā aātsopa ikatamēka. Itakari ikiti ikikomnikiri potxoari uiniti nopini. Isanaremonikiri ikiti itakari imiriī. ³ Akiripoakata ākiti atoko. Iuasaaki setxi iokaamori kenakotaāka. ⁴ Iuasaaki niōkatsopaaritari ninoa setxi iokaamori sākire. Txamari nikenakotari āti iaxitikiri sākire. Itxano:

—Kona piōkatsopatapiri ninoa setxi iokaamori sākire —itxa iaxitikiri.

Aātsopa Axapitiri Nikiko

⁵ Iuasaaki Teoso nitiri aua āti ikiti imiriī. Potxoari uiniti nopini āti ikiti aua. Iua ōtanōkari iuako iaxiti. ⁶ Iuasaaki itxa:

—Uatxa nisāpiretakiti Teoso ātipirika auakari sākire. Ikamari ikinika iaxiti, iaxiti auakani pakini. Ikamari ikinika ĩkorapokoriti, ĩkorapokoriti auakani pakini. Ikamari potxoari uiniti, ikinika iua āki auakani pakini. Teoso misiritinina maerekati kamakani !okananiikari apokini. ⁷ Apikomoni āti trōpetaxikarautapanika. Iuasaaki kitxakapirika Teoso kipatakiti oerekaākako. Teoso sāpiretakiti initiriakori ĩkorapokoritimoni, isākire sāpiretakanimoni paītiki oerekaākako —itxa Teoso nitiri.

⁸ Eereka iuaīkana nikenakotari iaxitikiri sākirauatini:

—Pisa. Papariko aātsopa iapirikakori, Teoso nitiri uakoā auakari. Iua āti ikiti imiriī, āti ikiti potxoari uiniti pakini aua kititakari.

⁹ Ininiā nisa iuamoni, ininiā nitxari iua:

—Pisikano ere aātsopa iapirikakari.

Iuasaaki itxano:

—Papakapariko, nika pitxari ia aātsopa. Pitikakoā kapixiriko ia pinikakiti, iuaritika pinamaā potxoariko. Mapa atoko itxako —itxano nota.

¹⁰ Ininiā nimaīkari ĩkora aātsopa, nika nitxari. Ninamaā potxoari. Mapa atoko itxa. Txamari nitikakoā kapixiri iua aātsopa ninikakiti. ¹¹ Iposo atoko isāpiretano:

—Iuaīkana pisāpiretariko apikomoni Teoso sākire, kaiāopokori kākitimoni, kaiāopokori āti uākamoni, kaiāopokori āti uāka sākire sākiretakanimoni, kaiāopokori auītetxiakorimoni pakini pisāpiretariko nisākire —itxano.

11

Ipi Teoso Sākire Sāpiretakani

¹ Aāke niaōruatini ĩkapani nisikaāka. Iuasaaki Teoso nitiri txano:

—Pisa. Piaōtariko Teoso misākiretiko aikoti. Piaōtariko Teosomoni sikakori takikoātaā. Piaōtana Teoso misākiretakani iuaā auakani. ² Kona piaōtapiri Teoso misākiretiko aikoti pirikere, kotxi Xoteo minakanuia apotiitiniātaāua iuaā. Iuaā ninoa ĩkapani. Ninoa misiritariko Teoso sitatxine koarēta toisi kasiriti. Ikara Teoso sitatxine, Xerosareē inakori. ³ Nisikaposotiiretanako ipi kiki. Teoso sākire sāpiretakani ninoa. Ninoa ieretakariko sako mata. (Sako mata kākiti ieretakasaaki oerekari imatinaniuatini.) Ininiā mio tosetosi sesēta ōti pakini ninoa sāpiretariko nisākire.

⁴ Ninoa ipi oriva mina atoko itxana. Apaka ipi tirikapi topākini atoko itxana. Ikini itixiti auakani auīte apisatoō, Teoso apisatoō ninoa aua.

⁵ Kākiti nirekasaakiri imisiritinina ninoa, iuasaaki xamina tirinakari pokīka inamaāna. Ininiā iuasaaki imokaiakarini xipope. Kākiti nirekasaakiri

imisiritinina, ikara atoko itxa okikona. ⁶ Teoso sākire isāpiretakasaakina, iposotarina iaxiti itotini. Ininiā iuasaaki āparaā kona ikipaika ikorapokoriti. Ninoa posotari āparaā arēkatxi inīkitakini. Iposotarina itxīkitakiniri ikini sereti maerekati apokini ikorapokoriti auakanimoni. Inirekasaakina, ninoa posotari ikara ikinika ikaminina.

⁷ Teoso sākire isāpiretinina xipoka atoko, monōkori aariko mamapotōkire irikoti āki potoriākari pokika. Iuasaaki iua kamari neenamati ninoa ipi Teoso sākire sāpiretananikata. Eereka iua okapena ninoa. ⁸ Ininiā ninoa ito sirīkako kimaporiātaā, mitari sitatxitiā. Iua sitatxitiā Apiananiri tokakitaāka aamina ipiriāmitakari nopini. Iua sitatxi akiriūākataāka Sotoma, Exito pakini, kotxi Sotoma, Exito pakini atoko itxa Xerosareē. ⁹ Ininiā iuaā ikini kākiti, ikini inirimane, ikinimane āti uāka sākire sākiretakani, ikini āti uāka atamatanako ninoa ito kimaporiātaā. Iuaā ikaikototano ipi ōti, āti ōti, ipixini ōti pakini. Kākiti kona auiritari ikatikona. ¹⁰ Ininiā ikini kākiti atamatariko ninoa koriākani ito. Ininiākara ikinimane enenīkako. Ninoa kamari kiiniri. Ninoa iokanatariko isikakitina apanakinimoni ipoxokoniuatini ikapani. Ninoa kamariko ikara atoko inakarī, kotxi ninoamoni naia ipi Teoso sākire sāpiretakani misiritana ninoa. Ininiā ninoa enenīka, kotxi Teoso sākire sāpiretakani koriāpeka.

¹¹ Iuaritika ipi ōti, āti ōti, ipixini ōti pakini napaka atoko, Teoso txīkitakana ninoa iuaīkana auāki ininina ikapani. Ōkitakuana. Iuasaaki kākiti atamatana, ininiā ipikarauatana. ¹² Ikara eereka ninoa ipi Teoso sākire sāpiretakani kenakotari iaxitiki sākirauatini:

—Uaimoni hina.

Ininiā ninoa kanika katxiāriā Teoso tixinemoni. Ninoa mokaiakariakori itikana ninoa kanikaāpotini Teoso tixinemoni. ¹³ Iuasaakipeka itixi iteene iakeēkata. Ininiā iua sitatxitiā kaiāopokori aapokotxi irika. Tesi aapokotxi auiniātaā ātika irika. Iuasaaki setxi mio kākiti ipina. Kākiti auapanika inakani pikarauata. Iuasaaki itxana:

—Teoso iaxiti auakari apiatakari itxaua —itxana.

¹⁴ Īkora misirikaretxi xipopeka. Iuasaaki ipi misirikaretxi apiari napapeka. Iuaritika erepaniko, kotxi paītiki āti misirikaretxi apiari apokapanikako.

Trōpeta Imapotōkirekiri Xōkiko

¹⁵ Iuasaaki Teoso nitiri mapotōkirekiri xikarauata itrōpetaneē. Itomane iaxiti auakani iteene akiritari:

—Ikini itixiti auakani auite itxapekua aāuīte Teoso, Kristo pakini. Ātipirika iua ikinimane auite itxauako —itxana.

¹⁶ Iuasaaki vītxi koatro totiakori Teoso topākiniātaā apisatoō topākakani pakama Teoso apisatoō. Itxana:

¹⁷ “Erekapitakari ikinipoko pikamakiti. Apiananiri pitxaua. Kaposotiirei pite. Uatxa pite auapitika. Pite kitxakapirīka aua. Katana ātipirika pauapika. Erekapitikai, kotxi kaposotiirei, ininiā ātipirika ate auite pitxaua.

¹⁸ Kākiti ikini itixiti auakani omanākarauata. Uatxa piteka omanākarauatini manapi apope. Uatxa apokapeka ipīkani misiritiko mereīko ōti. Pinitiriakori, pisākire sāpiretakani, apaka pinakitiakori pite paxitakani pakini ikitxitiko ōti apokapeka. Ikinimane kākiti poiāorini, kākiti kaposotiirerini pakini apakapariko ikamakitina iki. Iuasaaki pixipokariko ikorapokoriti xipokakani,” itxana.

¹⁹ Eereka natamatari iuaā Teoso tixineē imisākiretiko aikoti tore imataakaāka. Iua aiko āki natamatari Teoso kaixane, iua apokiniātaā.

Iuasaaki natamatari ito mēkokari. Nikenakotari ito okaratxirari, ito iokaamori pakini. Itixi iakeēkata. Ito āparaā kai soro katxīkareri atoko katxaka.

12

Imini Mitapoari, Sito Pakini

¹ Eereka nitaponeē nitikoka. “Kipa atxīliti?” nitxa nākixiniereē. “Natokopa itxa Teoso oerekiniri kākiti?” Kotxi sito tokiā Teoso tixine. Atokatxi iotximere iakirokoro oa omāka atoko inakari. Kasiri aua okiti patapi. Okiiā aua auūtetxi saporietane, tosi iōriki kamakori. ² Oa kamixiro. Oa akiripoakata oūtetsiirauatini xika, kotxi kaiamapeka amarini oāuākitakani.

³ Eereka iuaākana nitikoka, kotxi imini mitapoari tokiā Teoso tixineē. Pōkamarari. Iua setxi ikii aua. Aua tesi iko. Ikininape ikii aua auūtetxi saporietane. ⁴ Ixipiā ikosekari kaiāopokori iōriki iaxitikero, uai ixiti oka itxaro iōriki. Itima oa sito apisatoō, kotxi paītiki amarini oāuākitaka. Inirekari iixirākiniri amarini, amarini auakasaaki. ⁵ Eereka oa sito auākitakari amarini, kiki. Oa sito ākiri aneēkasaaki ikini itixiti auakani auite itxauako. Auūtetxi kataparari itxauako iua amarini. Auakasaaki, imini !ixirākari amarini. Patimari maikiko iua amarini. Teoso auinimoni anikaāka amarini. Iuaātaā Teoso topākanāta auūtetxi itopanere nopini. ⁶ Oa sito miteka āparaā makipakaniātaā. Teoso oerekatapekari iuaā okaikotini ikapani. Iuaā oiniākaākako mio tosetosi sesēta ōti. Ipi anokanani, āti anokanani ipixini pakini itxa.

⁷ Eereka aua neenamatzxi Teoso tixine. Teoso nitiri Mikeo inakori apanakinikata naiatari imini mitapoari initiriakorikata. Imini initiriakori pakini neenamauata apaka. ⁸ Teoso nitiriakori tapara apiata, ininiā imini initiriakorikata !auiritaākaika Teoso tixine ikaikotinina. ⁹ Iua imini mitapoari iokanataāka maparamoni. Iua imini kitxakapiriīkaripekara. Iua Txiaipo inakori. Iua Satānasi inakori. Iua misirienetari kākiti ikini itixiti auakani. Maparamoni iokanatikosaaki, iua, initiriakori pakini okaākana uai ikorapokoritomoni.

¹⁰ Eereka nikenakotari Teoso tixinekiri sākire kataparakieneri:

—Kākiti maerekani makatxakiko apokapeka uatxa. Teoso makatxakari kākiti maerekani. Uatxa Kristo posotiire oerekaāka. Uatxa oerekari ikinimane auite ininiua. Teoso mereēkiti ikinimane auite itxaua uatxa, kotxi aītariakori kamapiretakari iokanatapeēkaika mapara. !Ikaikotaika Teoso tixine. Mītxi ikamapiretari aītariakori Teoso apisatoō. Pokamara, ikanōka ikamapiretana. ¹¹ Aītariakori iokanatapekari Satānasi isini. Ninoa posotari iokanatiniri Satānasi, kotxi Teoso Sofi Auītene ipina ninoa ikapani. Iarēka xiketa ninoa ikapani. Ninoa posotari Satānasi iokanatinina, kotxi ninoa sāpiretari atāo inakari Teoso sākire. Ninoa iposope okikona Teoso ikapani. ¹² Hīte Teoso tixine auakani hīpoxokoniuatoko. Txamari hīte itixi auakani, potxoari uiniti auakani, erepaniko, kotxi Satānasi apopeka ereē hīte sauaki. Iua iteene naiataua, kotxi imarotari paītiki Teoso !auiritaikari iua maerekati apikomoni ikamini —itxa iua Teoso fixinekiri sāpirena.

¹³ Uai itiximoni okikosaaki, imini mitapoari asikatikinitaro oa sito amarini auākitakakaro okiniro ikapani. ¹⁴ Oa osikaāka ipi mīkitatxi kokoi mitari mīkita, oārainsi ikapani. Oa araā āparaā makipakanimoni. Teoso oerekinimoni osa. Iuaā Teoso nīkataro oa ipi anokanani, āti anokanani, ipixini pakini. Iuaā imini mitapoari !iposotari oamoni apokini. ¹⁵ Oa araākasaaki, imini mitapoari koporikaātari āparaā inamaākiri oa tikini. Uini atoko itxīkitakari āparaā, oa sito axāpoātini ikapani. ¹⁶ Kipatzxi !auiritari āparaā sini oamoni. Ixoreka. Ixorekasaaki, ikinika āparaā imini namaākiri kipatzxi āki isa.

17 Ininiã imini iteene omanataro oa sito. Ininiã asikatikinitana apanakini oa anaakori inaiatinina Ikapani. Kãkiti Teoso paniãtakiti kamakani oa anaakori itxauana. Kãkiti Xesosi Kristo sãkire auĩãkani oa anaakori itxauana.

13

Monõkori Potxoari Uiniti Pokĩkaãtakari

1 Ininiã nitaponeẽ nitima ikipatxite nopini. Iuaã nitikari monõkori potxoari uiniti pokĩkaãtini, kanĩkĩta itxa. Iuamoni auari iko tesi pakini. Apaka ikii setxi aua. Ikinika iko aua auĩtetxi saporĩetane. Ikini ikii aua uãkatxi Teoso misãkirepiretakari. 2 Iua monõkori nitikakiti ãkiti kaiõkari atoko itxa iito. Ikiti oso kiti atoko itxa. Inama ãkiti nama atoko itxa. Iua imini mitapoari sikari iposotiire maerekati, iua potxoari uinitikirimoni. Ininiã iua auĩtetxi itxaua. Imini auĩtetxi ininiua atoko itxa. Imini txĩkitakari iua potxoari uinitikiri sãkire kaposotiire inini, isãkire kãkiti aukini ikapani. 3 Nota atamataro ikiiniri. Ikii ãti ipipe ikaro mitari xika. Eereka ikaro tximõka. Iuaĩkana auãki itxa ikii ipinãkari. Kãkiti ikini itixitikini atamatakasaakiri, itsoriãkaãtana. Ininiã auikarina isãkire. Ikamarina iua nireẽkiti. 4 Ikinimane auikari imini mitapoari sãkire. Iteosonetarina iua, kotxi iua sikari iposotiire iua potxoari uinitikirimoni. Apaka ninoa auikari iua potxoari uinitikiri sãkire. Ninoa teosonetari iua apaka. Ninoa sãkire:

— ãti kaposotiireri potxoari uiniti pokĩkaãtakari atoko inakari !auari. Kãkiti liposotari inaiatiniri iua —itxana.

5 Iua potxoari uinitikiri auiritaãka isãpiretiniri maerekati sãkiretxiti. Imisãkirepiretari Teoso. Auiritaãka auĩtetxi ininiua koarẽta toisi pakini kasiriti. 6 Iua misãkirepiretari Teoso. Imisãkirepiretari Teoso uãka. Imisãkirepiretari Teoso auiniãtaã. Imisãkirepiretari Teoso tixine auakani. 7 Iua auiritaãka inaiatiniri kãkiti Teoso nakitiakori. Apaka auiritaãka ninoa imaĩkini. Auiritaãka kãkiti ikini uãkati auĩte ininiua, ikini itixiti auakani auĩte ininiua, ikini kãkiti sãkire sãkiretakani auĩte ininiua. Ikinimane auĩtetari iua maerekati kamakari. 8 Ikini itixiti auakani, Teoso nakitiakori minakanua, auikariko iua potxoari uiniti pokĩkaãtakari sãkire, kotxi iteosonetarina iua. Itixi kamiko apisapanika ninoa uãka liõkatakãka Soti Auĩte okakori aãtsopateẽ. Iua aãtsopaã auauãkatakani auapikako Teosokata mapĩkaninoka ininina.

9 Hĩte, ia atatsopatakani kakenakokii, ininiã hĩkenakotariko nisãkire. 10 Teoso nirekiniãri kateia ãki pitakiko, ininiã erekapitikari kateia ãki pauini. Teoso nirekiniãri pokiko iouata mitariã, erekapitikari pokiko. Ininiã pokaãkako iouata mitariã. Ininiã hĩte Teoso nakiti inakanua himĩteenekariko himisiritiko. Kona hĩtakanapapiri Teoso kimapore. ãtipirika hĩkamariko Teoso nirekakiti.

Monõkori Itixiãkiri

11 Eereka nota itikari ãti monõkori. Itixiã ipokĩka. Aua ipi iko. Soti auĩte ãkiri iko atoko itxa, iuaritika isãkirauata imini sãkire atokokana. 12 Potxoari uiniti pokĩkaãtakari nitiri itxaua iua itixiã pokĩkakari. Potxoari uinitikiri sikaposotiiretari iua, ininiã isari ikini itixitimonĩ. Itxĩkitakana ikinimane teosonetiniri potxoari uinitikiri. Iua potxoari uinitikiri mitxi mita karori, eereka ikaro tximõka. 13 Iua itixiã pokĩkakari kamari posotiiretxi mitxi mĩmarotakoti. Ipaniãtari xamina tirinakari iaxiti auakari iõrapokoriti apokini ikinimane atamatiniri ikapani. 14 Iua potxoari uinitikiri auiritari itixiãkiri kaminiri posotiiretxi iua ikapani. Posotiiretxi xika itixiãkiri misirienetari ikinimane itixiã auakani. Itxĩkitakari kãkiti kaminiri potxoari uinitikiri iõto atoko inakari kai kamakori. Ikara atoko ipaxitarina potxoari uinitikiri, kotxi ikarotaãka iouata mitariã, iuaritika iuaĩkana auapanika ikii.

¹⁵ Itixiã pokĩkakarĩ auiritaãka itxĩkitakiniri potxoari uiniti pokĩkaãtakari atoko inakari kai kamakori kosekasinaniretiniua, ininiã iua kai kamakori posotari isãkirauatini kãkitikata. Ipaniãtari kãkiti okiko imanirekakanisaakiri iteosonetiniri iua. ¹⁶ Itixiã pokĩkakarĩ paniãtari ikinimane kãkiti apakapiniri Satanasi takaõtxikare iuakoãna ikikomoni, minakaniã iteãtaãna. Ipaniãtari ikinimane kãkiti auãttxi inakanuia, auãttxi minakanuia, katiini, matiini, nitiritxi, nitiritxi minakanuia pakini, apakapiniri Satanasi takaõtxikare. ¹⁷ Kãkiti iua takaõtxikari mauakiniti ! auiritaãka iamotiitinina. ! Auiritaãkana ivẽtxirauatinina. Iua takaõtxikari potxoari uinitikiri uãka. Iuãka mauakanisaaki, aua nõmero iua nakiti.

¹⁸ Kimarore hĩtxako, ikara himarotini ĩkapani. Kimarore hininiã himarotari potxoari uinitikiri nomerone kiki uãka itxa. Nõmero 666.

14

Soti Auĩte Sẽto Koarẽta Koatro Mio Kãkitikata

¹ Eereka nionakaãta nitaponeẽ. Natamatari Soti Auĩte. Ôtanoxiratarĩ nopini auanãta. Ixirata uãka Sião inããka. Kãkiti sẽto koarẽta koatro mio pakini aua iuakata. Kaiãopokori kãkiti. Iteãtaãna Soti Auĩte iri uãka iõkatsopatapeẽkaika. ² Eereka nikenakotari ninoa xikarauatini. Itorõkani ene atoko itxa, kotxi ama eneeneri. ĩkarokirauatini ene atoko itxa ninoa xikare. Viorão ene atoko itxa iua xikari ene. ³ Ninoa kãkiti sẽto koarẽta koatro mio pakini tima auãttxi topanere apisatoõ, okĩtxinoka xãpokaĩtotakini ipi ipi pakini apisatoõ. Totiakori vĩtxi koatro pakini apisatoõ apaka itimana. Ninoa sẽto koarẽta koatro mio xikaretari xikari amaneri. Apanakini ! imaĩkari iua xikari amaneri. Ninoa sẽto koarẽta koatro mio ĩkorapokoriti Teoso amotakini, ninoanoka posotari ixikaretiniri iua amaneri xikariti. ⁴ Ninoa kiki ! isirĩkana sitokata. ! Auiritarina iĩtona kaminiri maerekati. Soti Auĩte sinimoni ninoa apaka sa. ĩkorapokoriti auakasaakina, Teoso amotana ninoa. Ninoa merepanika sikaãka Teosomoni, Teoso Soti Auĩtene pakinimoni. ⁵ !Ikamarina maxikatĩika isãkirena. Atão inakarĩnoka isãpiretana. !Ikerokarina isãkirena Teoso iauĩtena apisatoõ.

Ipi Āti Pakini Teoso Nitiri Sãkire

⁶ Eereka nitikari Teoso nitiri araaãpotini iaxiti itanoxiti. Iua sãpiretari Teoso iokanapirena erekari kãkitimoni ikini itixiti auakanimoni. Iua iokanapirenatxi kona xipoka. Isãpiretari Teoso iokanapirena erekari ikini uãkatimoni. Āti uãka sãkire ipinimoni. Āti uãka sãkire ipinimoni. Itxaãpota, itixi auakani sãkire, iuaritika isãpiretari Teoso iokanapirena ikini uãkatimoni.

⁷ Itapasãkĩreritika itxari:

—Hĩpĩkariko Teoso. Hĩsãpiretariko, iua Apiananiri ininiua. Apokapeka kãkiti maerekati kamakani misiritiko õti. Hĩteosonetariko Teoso, kotxi iua kamari iaxiti, ĩkoraxiti, potxoari uiniti, sõtoãri pakini —itxa iua Teoso nitiri araãkari sãkire.

⁸ Iua sãkirauataka atoko, ãti Teoso nitiri txari:

—Papirońia sitatxiti xipokapeka. Iuaã auakani kaposotiirerini, iuaritika ixipokapena. Papirońia sitatxiti auakani paniãtari imakinika itixi auakani maerekati ikaminina, maerekati itotxi nireẽkiti. Ininiã ninoa kamari maerekati Papirońia auakani paniãtakiti.

⁹ Ninoa Teoso nitriakori ipi sãkirauataka atoko, ãti Teoso nitiri txari itapasãkĩreritika:

—Teoso misiritanako kãkiti potxoari uinitikiri teosonetakani, potxoari uinitikiri atoko inakari kai kamakori teosonetakani. Teoso misiritanako

kākiti Satanasi takaõtxikare iteētaāna takakani, iuakoāna takakani. ¹⁰ Kākiti iua atoko inakani misiritaākako, kotxi Teoso iteene omanākarauata maerekati ninoa kamakiti xika. Teoso misiritanako ninoa, ininiā atatsiirauatana xamina tirinakariā. Ēxõpiri arikanako ninoa. Teoso nitiriakori erekarini, itixine auakani, Teoso Soti Auítene pakini itikariko ikara kākiti misiritiko. ¹¹ Iua xamina txĩkitakari kākiti atatsiirauatani. Iua xamina tirinapikako. !Ixipoka. Itirinapika. Itxiākapika. Ninoa misiritiko !iotoka. Pokamara, İkanõka auapika ninoa misiritiko. Kākiti iua potxoari uinitikiri teosonetakani, potxoari uinitikiri atoko inakari kai kamakori teosonetakani, iuāka İitoāna auaitotakini misiritaākako ikara atoko –itxa iua Teoso nitiri sākire.

¹² Ininiā hġte Teoso nakitiakori, hġte İpaniātakiti kġpitakani, hġte Xesosi nireñkiti ātipirika kamakani, kataparaxinire hġtxako. Himġteenekariko kākiti misiritini.

¹³ Eereka nikenakotari Teoso tixine auakari sākire. Itxano:

–Nisāpiretakiti piõkatsopata. Kākiti ipġksaaki Apiananiri İkapani iparġkauatakasaaki, Teoso sikari erekari iuamoni.

Iua Erekari Matamatakoti txari:

–Ia atāo. Mġtxi pasāpaniri Teoso parġka ikaminina. Uatxa itomatana, kotxi Teoso imarotapekari erekari ikamakitina.

Takari Amiko Pirena

¹⁴ Eereka nitaponeē nionakaāta iaxiti. Iuasaaki natamatari katxiāri kasarori iuaā. Aġtari iaxitikiri atoko inakari topāka iua katxiāri nopini. İkiġā aua auġttxi saporietane oro kamakori. Iuakoā saasara ātoiāo aua. Pauanaro.

¹⁵ İposo atoko āti Teoso nitiri pokġka Teoso aapoko. Iua itaparasākireritika akiritari iua katxiāri nopini topākakari:

–Pikosekariko pisaasarate. Pamariko takari, kotxi takari amiko manapipekara. Takari İkini itixitikiri amiko manapipekara.

¹⁶ Ininiā iua katxiāri nopini topākakari isaasarateē isauakari İkini itixiti nopini auakari. Amari takari imakinika.

¹⁷ İposo atoko nitikari āti Teoso nitiri pokġka Teoso aapoko Teoso tixineē. İuamoni apaka aua saasara ātoiāo iuakoā. Pauanaro.

¹⁸ Iuaġkana āti Teoso nitiri apoka. Teosomoni sikakori takikoātaā ipotorika iua. İñkatari xamina tirinakari iuaā. Iua itaparasākireritika akiritari Teoso nitiri saasara auakiti:

–Pimaġkaroko pisaasarate. Pimakatxakaroko ova İkini itixitikero, kotxi ova oionapeka –itxa.

¹⁹ Ininiā Teoso nitiri isaasarateē isauakaro ova İkini itixitikero. Itsotakitataro ovatsa. İposo atoko okaro ova ori ova iopetiko mitari āki. Okatsonakaāka. Teoso omanākare iua ova iopetiko atoko itxa, kotxi Teoso iteene omanākarauata kākiti maerekani xika. ²⁰ Ova ori kākiti kitiā iopetikoātaā sitatxi mapotõkire. Txamari na ovapeēni ikara atoko itxa. Arġkatxiāra ikara atoko itxa. Iua arġkatxi uini panaā atoko itxa. Tresġtosi kirõmetro arġkatxi aua. Arġkatxi İpanaā kavaro namaāpeka apoka arġkatxi. Ąti metro ipixini İpanaā arġkatxi.

15

Teoso Misirikare Mġkani Setxi

¹ Eereka nitaponeē nitikoka iuaġkana.

–Kipa atxiġti? –nitxa iuaġkana nākixinireē, kotxi natamatari Teoso nitiriakori setxi itixineē.

Ninoa minari misirikaretxi setxi pakini kãkitimoni. Apikomoni misirikaretxi !auaika. Ia misirikaretxi setxi inokasaakiri kãkiti, Teoso misiritana ninoa imaerekanina xika.

² Eereka natamatari ipoa atoko inakari. Ātakaãri, xamina tirinakarikata koketakori atoko itxa ipoa. Kãkiti tima ipoa itinikata. Ninoa iokanatapekarì Satanasi sini, kotxi ! ikamarina iua põtxoari uinitikiri paniãtakiti. Iua potxoari uinitikiri atoko inakari kai kamakori paniãtakiti likamana. !Apakaparina Satanasi takaõtxikare, iuãka nomerone. Ikininape aua viorão atoko inakari Teoso sikakiti. ³ Ninoa xikaretari Moisesi xikare, Teoso nitiri uai itixi auakari xikare. Ixikarenãtari Teoso Soti Auĩtene xikare. Ia ixikaretana. Itxana:

“Teoso Apiananiri, ikini posotiiiretxi auakiti pite. Peerekari piparĩka. Pite kaposotiireri. Pite atãonani pikamakiti. Ikini uãkati auĩte pitxaua pite.

⁴ Ikinimane paxitaiko pite ipĩkareritika, kotxi pite Apiananiri pitxaua. Ikinimane txaiko pite: ‘Peerekai,’ itxaina. Kotxi pitenoka !uari maerekati. Kãkiti ikini uãkati apokako pitemoni. Ninoa txaiko: ‘Ate teosone pitxaua,’ itxana kotxi ikinimane itikari erekari pikamakiti.” Ikara atoko itxa ninoa xikaretakiti.

⁵ Eereka natamatari Teoso aapoko ãki. Natamatari iua auiniãtaã. ⁶ Iposo atoko ninoa Teoso nitiriakori setxi, misirikaretxi setxi mĩkani, pokĩka Teoso aapoko. Ninoa mãka katsopiri, pomẽkoriri. Ninoamoni aua oro kamakori. Itinimaĩ nopini inapa. ⁷ Ninoa ipi ipi pakini okĩtxinoka xãpokaĩtotakini iuaã aua. Okĩtxinoka xãpokaĩtotakiti sikari iãtatxi setxi pakini oro kamakori ninoa setxi Teoso nitiriakorimoni. Teoso auapininiika inakari xãpokakapekari iua setxi pakini iãtatxi omanãkareẽ. ⁸ Teoso iotximere xãpoka iua aapoko ãki. Katxiãri kasarori atoko itxa. Iuasaaki kãkiti !auritaãka Teoso aapoko ĩroni, ninoa Teoso nitiriakori, misirikaretxi mĩkani setxi pakini, misiritakasaakina kãkiti.

16

Iãtatxi Teoso Omanãkare Auakiti

¹ Eereka nikenakotari Teoso aapoko ãki auakari sãkire. Itaparakieneritika imisãkiretana ninoa Teoso nitiriakori setxi. Itxana:

–Hĩsa. Hĩkitakari Teoso omanãkare iãtatxi ãki auakari itixi auakanimoni – itxa.

² Ininiã ninoa Teoso nitiriakori sari. Merepanika ãtika initiri kitakari iãtatxi ãkikiri itixi auakanimoni. Iuasaaki kimiti mitari, katsiiri, apoka kãkiti Satanasi takaõtxikare auakini ĩtomoni. Potxoari uinitikiri atoko inakari kai kamakori teosonetakani ĩtomoni apoka ikara atoko inakari amianari.

Āti Iãtatxi

³ Iposo atoko ãtipekana Teoso nitiri kitakari iãtatxi ãkikiri potxoari uinitimoni. Iuasaaki ãparaã arẽkatxi itxapekaua. Kãkiti ipĩkari arẽka atoko itxa iuasaaki. Ininiã ikinipoko potxoari uiniti auakani iuasaaki xipoka.

Āti Iãtatxi

⁴ Iposo atoko ãtipekana Teoso nitiri kitakari iãtatxi ãkikiri uinimoni, sõtõãri pakinimoni. Iuasaaki ãparaã arẽkatxinoka itxapekaua. ⁵ Iuasaaki nikenakotari Teoso nitiri ãparaã nĩkatakari sãkire. Itxari Teosomoni:

–Pite maerekati makamakatii. Ātipirika auakari pite. Atão pikamakiti pimisiritinina maerekati kamakani ĩkora atoko. ⁶ Kotxi ninoa okari kãkiti pite nakitiakori. Okarina pisãkire sãpiretakani. Ninoa oxiketari ninoa arẽka.

Ininiã uatxa pite sikana arēkatxi iātinina. Atão imisiritikona kotxi maerekati ikamana –itxa Teoso nitiri.

⁷ Iposo atoko nikenakotari āti sākire. Teosomoni sikakori takikoãtaã auakari iua. Itxari Teoso:

–Pite Teoso Apiananiri, Kaposotiireri pitxaua. Erekapitikari maerekati kamakani pimisiritini. Pite kona kerokari pikamakiti, kotxi atão inakari-noka pikama –itxa.

Āti Iātatxi

⁸ Eereka ātipekana Teoso nitiri kitakari iātatxi ākikiri atokatximoni. Iuasaaki atokatxi apiata patakata. Auiritaãka kākiti arikini itaparapatakaã.

⁹ Ininiã kākiti arikaãka atokatxi patakaã. Iuaritika !inirekarina maerekati ikamakitina itakanapinina. “Peerekari Teoso,” kona itxana. Teosonoka posotari iotokakiniri iua misirikaretxi, txamari ninoa maerekati pirenaã akiritari Teoso uãka.

Āti Iātatxi

¹⁰ Ininiã ipi ipi pakini Teoso nitiriakori kitakapekari iātatxi ākikiri itiximoni. Eereka iuaãkana āti Teoso nitiri kitakari iātatxi ākikiri auñtetxi topaneremoni iua potxoari uiniti pokĩkaãtakari topaneremoni. Iuasaakipeka iua potxoari uinitikiri auñtetxi ininiãtaãua patimari ipiãkini. Kākiti iuaãtaã auakani akatsaninitaua itsii xika. ¹¹ Iuaritika !inirekarina maerekati ikamakitina itakanapinina. Imisãkirepiretarina Teoso iaxiti apiko nopinixiti auakari, atatsiirena xika, kimiti xika.

Āti Iātatxi

¹² Eereka iuaãkana Teoso nitiri āti kitakari iātatxi ākikiri mitari uunitimoni Eoparaxi inakorimoni. Iuasaaki uini uuaã. Isonãka. Kimapori itxaua, auñtetxiakori atokatxi pokĩkinimoni ĩkani inapinina ĩkapani. ¹³ Iposo atoko nitikari maerekani matamatakoni ipi āti pakini. Atiniro atoko itxana. Āto pokĩka mitapoari imini namaã. Āto pokĩka iua potxoari uiniti pokĩkaãtakari namaã. Āto pokĩka iua itixi pokĩkakari namaã. Iua itixi pokĩkakari iua Satanasi sākire sãpiretakari itxaua. Na atãoene isãkire. Poxirari ikama. ¹⁴ Ninoa maerekani matamatakoni ipi āti pakini Satanasi nitiriakori. Ninoa kamarari posotiiretxi. Isana auñtetxiakorimoni, ikini itixiti auakanimoni. Akiritana kākiti apotiitiniua inenamauatinina ĩkapani. Teoso kaposotiireri naiatanako ninoa itixi xipokini õtisaaki.

¹⁵ Hite ia atatsopatakani, Apiananiri txai hñte:

–Erepaniko. Napokako kñtiriri apokini atoko, kākiti mimarotakinipatika. Napokasaaki ereẽ, pikoatiniã, kamãka pininiã, pipoxokoniuaata. ĩkara atoko pininiã, kona kasarai ikinimane apisatoõ pisini, ininiã kona kapẽtai –itxa Apiananiri sākire.

¹⁶ Eereka ninoa ipi āti pakini Satanasi nitiriakori maerekani matamatakoni, apotiitari auñtetxiakori Amaketõ inakoriãtaã. Iuaãtaã akiritaãka Amaketõ Xoteo sākireẽ.

Imapotõkire Iātatxi

¹⁷ Ninoa setxi Teoso nitiriakori, seisi kitakapekari iātatxi ākikiri. Ātinoka !ikitakapanikari. Iuasaakiika iua kitakari iātatxi ākikiri ĩtimamoni. Iuasaaki nikenakotari auñtetxi itopanereãtaã auakari sākire:

–Ixipokapeka –itxa itaparakieneritika.

¹⁸ Iposo atoko iotxira mẽkoãkata. Ikarokirauata. Pataparaeneri. Itixi iakeẽkata. Mitxi ! auari itixi iakeẽkatini ĩkora atoko inakari. Iuasaaki-ikarako apiatako. ¹⁹ Iua sitatxi apiari Papirõnia inakori xoreka. Iplikata

ixoreka, ininiã ipi äti pakini sitatxiti atoko itxaua. Ikini itixiti auakari sitatxi xipokaãka iuasaaki. Teoso !imaxinïkaretari Papirónia sitatxiti auakani kamakiti, ininiã iteene imisirritana ninoa, kotxi iteene omanãkarauata imaerekanina xika. ²⁰ Iuasaaki ikini ipokomiríi !auaika. Ôtanoxiratarari ikinipoko xipoka iuasaaki. ²¹ Katxïkareri iaxiti auakari, kai mitari atoko inakari, katxaka itiximoni. Apanakini kai minani koarëta sïko kiro. Iua irika kãkiti nopini. Ikara katxakakari pamonõkonipaniri. Iua xika kãkiti iteene misãkirepiretari Teoso.

17

Sito Potxoari Uinitikiri Nopini Topãkakarø

¹ Ninoa Teoso nitiriakori setxi pakini iãtatxi setxi auakini, seisi kaikota. Ätika ina notamoni. Itxano nota:

–Notakata pisa. Noerekai sitatxi miramaneri. Sito kanokarero kaposotirero atoko itxa iua sitatxi. Oa topãkanãta uini itori nopini. Iuaã auakani misiritiko noerekaiko pite. ² Auïtetxiakori ikini itixiti auakani kamari maerekati iua sitatxiti auakanikata isirïkinina. Iua sitatxi auakani txïkitakari kãkiti ikini itixiti auakani maerekati ikaminina. Kapoãroã poãtakari nirekini atokokana, ninoa nirekari iua maerekati iua sitatxiti auakani kamakiti – itxa notamoni.

³ Eereka iua Erekari Matamatakoti paniãtano iua Teoso nitirikata nisini. Iua Teoso nitiri anikano äparaã makïpakaniãtaã. Iuaã natamataro sito topãkanãta iua potxoari uinitikiri nopini. Põkamaraïtori iua. Iïtoã aua iõkatakori kaiãopokori Teoso imisãkirepiretini iõka. Ikii setxi aua. Iko tesi aua. ⁴ Oa sito mãka pomamari ipixini. Põkamarari itxa omãka. Pakaroneri omãka. Oïtoã aua oro, përorra, kai soro pomëkoriri pakini aua. Omaïkari iãkoanatxi oro kamakori. Iua iãkoanatxi äki aua maerekati okamakiti itxiko atoko inakari. Maerekati oïto kamakiti ikara atoko itxa. ⁵ Oteëtaã aua säkiretxi iõkatakori. Itxari: “!Kimarotikori. Kanokareroakoro inoro itxaua Papirónia sitatxiti miramaneri. Maerekati kamakani inoro itxaua Papirónia.” ⁶ Nitikaro oa sito opoãtini, Teoso nakitiakori arëka oãtini xika. Xesosi säkire auikinina xika, okaãkana. Natamatakasaakiro nitikoka.

–Kipa atxïiti? –nitxa.

⁷ Iua Teoso nitiri txano:

–Kininiãpa pitikoka? Nisãpiretaiko oa sito pirena. Apaka nisãpiretaiko iua potxoari uinitikiri pirena, ikii setxi, iko tesi auakiti pirena, oa porik-itakari pirena nisãpiretai, kotxi kona pimarotari. ⁸ Iua potxoari uinitikiri patamatakiti mitxi aua, txamari uatxa !auaika. Iua eereka ipokïkapanikako aariko mamapotõkire irikotiã. Eereka anikaãkako ixipokikomoni. Ikini itixiti auakani Teoso aãtsopateë iuãkana maiõkatakoni tikokako iua potxoari uinitikiri atamatakasaakinako. Itixi kamiko apisa iuãkana !iõkatsopataãka Teoso aãtsopateë. Iua aãtsopaã iõkauãkatakonioka ätipirika auapikako Teosokata. Kãkiti tikokako iua potxoari uinitikiri atamatakasaakina, kotxi mitxi auãki itxa, eereka !auaika, eereka iuãkana auãkipeka itxa.

⁹ –Ikara inakari pimarotini ïkapani, iteene pimixinikariko. Kinirepa ikii setxi aua? Kotxi õtanoxiratarari setxi apaka aua. Oa sito topãkanãta iua õtanoxiratarari nopini. ¹⁰ Kinirepa ikii setxi aua? Kotxi auïtetxiakori setxi apaka auako. Auïtetxi !itxaikauana ninoa sïko. Ätinoka auïtetxi txapanikaua. Äti kona apokapanika. Iua apokasaaki mapaõtinoka auïtetxi itxauako. ¹¹ Iua potxoari uinitikiri mitxi auãki inakari, iposo atoko !auaika inakari,

ia apokako. Iuara auñteti txauako. Iua mitxi apotiitua ninoa setxi auñtetiakorikata. Æti õti iua xipokaãkako.

¹² —Patamatarari iko tesi pakini. Kinirepa iko tesi aua? Kotxi auñteti tesi aua. Ninoa auñtetiakori kãkiti auñteakori !itxapanikauana. Ninoa sika-posotiiretaãkako auñteti ininiuana iua potxoari uinitikirikata. Ninoa auñteti itxauanako ãti oaranoka. ¹³ Ikininape ninoa tesi auñtetiakori parĩkauata iua potxoari uinitikiri ïkapani. Iposotiireña, itaparaña iparĩkauatana iua potxoari uinitikiri ïkapani. ¹⁴ Inaiatarinako Teoso Soti Auñtene. Teoso Soti Auñtene iokanatana ninoa isinina, kotxi iuanani Apiananiri itxaua. Auñtetiakori auñte itxaua. Ætipirika iuakata sikani, iua akiritakini, imereëkini, ãtipirika iua nireëkiti kamakani, ninoa moianatari iua Soti Auñte ineenamauatini —itxa Teoso nitiri sãkire.

¹⁵ Iua Teoso nitiri apikomoni txari notamoni:

—Pite atamataro oa kanokarero topãkanãta kãuaãri nopini. Kinirepa kãuaãri nopini oãua? Kotxi iuaãtaã kãkitipokoni, ikini uãka, ikini itixiti auakani, ikini ãti uãka sãkire sãkiretakani pakini. Iua kãuaãri mitari atoko itxana. ¹⁶ Iua potxoari uinitikiri, ninoa tesi auñtetiakori pakini omanataroko oa kanokarero. Ninoa makatzakariko ikinipoko oa nakiti. Imakatzakarinarako omãka. Kasarapeka otxako. Oxini inikanako. Ninoa xipokaroko oa xaminaã. ¹⁷ Teoso txĩkitakari Teoso nireëkiti ikaminina, kotxi ninoa auñtetiakori parĩkauata iua potxoari uinitikiri ïkapani Teoso nireëkiti iaõka. Ininiã Teoso sãkire mitxi auakari auapeka. Isãkire iaõka ikamana. Ininiã ninoa nirekari iparĩkauatinina iua potxoari uinitikiri ïkapani. Ininiã ninoa auñtetiakori itxauana iua potxoari uinitikiri ïkapani.

¹⁸ —Oa sito kanokarero patamatakito kona atão sitoni. Sitatxi miramaneriã auakani oa sito kanokarero atoko itxana, kotxi iua sitatxiã auakani paniãtana ikini auñtetiakori itixi auakani maerekati inireëkitina ikaminina.

18

Papirõnia Sitatxiti Xipokini

¹ Ikara inaãka atoko nitikari ãti Teoso nitiri Teoso tixine auakari katxakaãpotini ïkorapokoriti Teoso tixine potoriãkari. Iua kaposotiireri. Iotximere iopinikari imakinika itixi. ² Iua sãkirauata itaparasãkireritika. Itxari:

—Ixipokapeka Papirõnia sitatxiti miramaneri. !Auaika. Uatxa Satanasi nitiriakori aua iuaã. ïkini sereti maerekani matamatakoni aua iuaã. Araãkari ikini sereti arakakari nikakani, kãkiti mapokaerekatakiniti, iuaã apoka. ³ Oa sito kanokarero atoko itxa iua sitatxi, kotxi iua sitatxi auakani txĩkitakana ikini itixiti auakani maerekanitxi ninoa kamakiti iaõka ikaminina. Papirõnia sitatxiti auakani kamari maerekati iitona nireëkiti. Itixi auakani nirekari ikara maerekati ikaminina kapoãroã poãtakari nirekani atokokana. Auñtetiakori ikini itixiti auakani kamari ikara maerekati Papirõnia sitatxiti auakanikata. Tiitxi vëtxitakani apakaparo txineiro kaiãopokoro, kotxi Papirõnia sitatxiti auakani amotari tiitxipokoni —itxa Teoso nitiri sãkire.

⁴ Eereka nikenakotari ãti Teoso tixine auakari sãkire. Itxari:

“Hite nota nakitiakori inakani takanapariko iua sitatxi. !Hikamapiri maerekati ninoakata. Ininiã !himisiritaãka ninoakata.

⁵ Kotxi maerekati ninoa kamakiti apiaãpota. Tiitxi tsorinatakori atoko itxana ninoa maerekani. Iaxitipeka apokaãpota ninoa maerekani. Teoso xinikari ninoa maerekani, ininiã iua misiritanako ninoa.

⁶ Himisiritanako ninoa. Hīte imisiritinina atokokana, hīte misiritana ninoa. Ipikata himisiritanako ninoa, ninoa maerekani xika. Ninoa misiritapekari apanakini, ininiā ia imisirikarena xika ipikata himisiritanako ninoa.

⁷ Hīt̄x̄ikitakanako ninoa atatsiirauatinina. Hīt̄x̄ikitakanako ninoa maerekaxiniretinoka ininina. Ikara atoko ninoamoni hīkaminiā, at̄āopitikara hīkamakiti, kotxi iteene iukauana ninoa. Itomaneri itiina, ininiā ninoa iarinouata. Ninoa sākire: 'Ate uai topākanāta, kotxi auīt̄etxi kaposotiireni atxaua. Tikinitakoro atoko !atxaua, ininiā maerekaxiniretika !atxa,' itxana ākixinireēna.

⁸ Ikara isākirena xika āti ōti ninoa misiritaākako. Amianari, maerekaxinirenitxi, natxi pakini apokako ninoamoni. Arikatxi xipokanako ninoa, kotxi Teoso iuasaaki misiritanako ninoa. Imisiritanako ninoa, kotxi Teoso Apiananiri Kaposotiireri itxaua,"

itxa iua Teoso tixine auakari sākire.

Kākiti Txiapatini Sitatxi Xipokini Xika

⁹ Auīt̄etxiakori ikini itixiti auakani, Papirōnia sitatxiti auakanikata sirīkakani, ninoakata tiitxi apokaerekatakani, itikasaakirina iua sitatxi misiritiko, iteene itxiapatana. Ninoa auīt̄etxiakori txiapata iua sitatxi arikasaaki, xamina txiā itikasaakina. ¹⁰ Ōtakoxiti itimana, kotxi ipīkarina sitatxi auakani xipokini. Iuasaaki itxanako:

—!Erekari. !Erekari. Ia sitatxiti miramaneri !auaika. Papirōnia sitatxiti !auaika. Kākiti kaposotiirerini xipokapeka. Āti oaranoka arikatxi xipokapena ninoa imaerekanina xika.

¹¹ Ikini itixiti tiitxi vēt̄xitakani apaka txiapatako. Ninoa maerekaxiniretinoka itxanako sitatxi auakani xipokasaaki.

—Kiripa amotatari atii uatxa? —itxana.

¹² Mitxi ninoa vēt̄xitari oro, pirata, kai soro pomēkoriri, kai soro kasarori pērora inakori. Mitxi ivēt̄xitarina mākaxi mata arfīnio inakori, mākaxi mata seta inakori, mākaxi mata pōkamarari, mākaxi mata pomamari pakini, ivēt̄xitana. Ivēt̄xitarina ikini sereti aamina eremari inakori. Ivēt̄xitarina ikini sereti tiitxi iko kamakori, aamina pakaroneri kamakori, pirōsi kamakori, metao kamakori, kai kamakori. ¹³ Ivēt̄xitarina kanera, koketxi pakini. Ivēt̄xitarina kamariāro miha inakori. Ivēt̄xitarina kamariāro pirākīsēsi inakori. Ivēt̄xitarina iāriā, aseitona iī, triko, triko pani pakini. Ivēt̄xitarina kema auite, soti auite, kavaro, mitekaī kavaro anikakiti pakini. Kākiti apaka ivēt̄xitana, nitiritxi ikapani. Kākiti iō, kākiti xinire apaka inirekana ivēt̄xitinina. ¹⁴ Ninoa tiitxi vēt̄xitakani sākire sitatximoni:

—Ikinika hīti erekari hinireēkiti xipokaākapeka. Ikinika hīt̄x̄ineirote !auaika. !Auaika hāpokaerekatakiti. Hīti arikapeka —itxana ninoa sākire.

¹⁵ Ninoa tiitxi vēt̄xitakani katxineiroterini itxauana, kotxi kākiti iua sitatxiti auakani mitxi amotari ninoa tii. Iua sitatxi xipokasaaki, ninoa tiitxi vēt̄xitakani timanāta ōtakoxiti, kotxi ipīkarina sitatxi arikini. Itxiapatana. Imatanianuatana. ¹⁶ Itxana:

—!Erekari. Sitatxi miramaneri !auaika uatxa. Mitxi ia sitatxi peerepokori sito erero atoko itxa. Oia sito māka pakaroneri, pomamari, pōkamarari pakini. Oitoā aua oro, kai soro pomēkoriri. Pērora pakini aua. Oia sito atokokana ia sitatxi. ¹⁷ Āti oara napa atoko ia sitatxiā auakani tii kakaroneri xipokapeka —itxana.

Sitatxi arikasaaki, maporo auakini, maporo āki sikani, maporo āki parīkauatakani apaka ōtakoxiti atamatarina iua sitatxi arikini. ¹⁸ Ninoa itikasaakiri katxiāri iua sitatxi arikini, itxana:

—Ja sitatxi miramaneri atoko inakari !auari —itxana ninoa.

¹⁹ Iuasaaki itakarina atapani ikiiāna imatinaniuatiniāna. Itxiapatana iuasaaki. Imatinaniuatana iuasaaki. Itxarina:

—! Erekarǵ. ! Erekarǵ. Kamatinanipitikari sitatxi miramaneri xipokini. Mitxi iuaā ikinimane maporo auakini apakapari kaiāopokoro txineiro, kotxi iuaā auari txineiropokoni. Eereka āti oara napaka atoko ixipokapeka ikinika —itxana isākirena.

²⁰ Hitepekana Teoso tixine auakanii h̄ipoxokoniuatoko iua sitatxi xipokiniā. Hite Teoso nakitiakori h̄ipoxokoniuatoko. Hite Xesosi moianariakorii, hite Teoso sākire s̄apiretakanii pakini h̄ipoxokoniuatoko, kotxi Teoso arikapekari iua sitatxiā auakani hite imisiritinina xika.

Kai Miramaneri Potxoari Uunitimoni Okiko

²¹ Eereka āti Teoso nitiri kataparari maikari kai meraminapoari. Kai triko kamiriākari atoko itxa iua kai. Ōkari potxoari uunitimoni. Iua txari:

—Itapararitika kai nokini atoko, Papirónia sitatxiti miramaneri xipokini. ! Atamataākaika sitatxi iuaā —itxa isākire.

²² Itxari iua sitatximoni:

—Xikari ! ikenakotaākaika ereē. ! Auaika xikari viorāokata, koitxikata, trōpeta pakinikata. Ereē kākiti parīkauatini !auaika. Atarokiri kamiko ene ! kakenakotikoikari. ²³ Tirikapǵ kamara ! katamatikoikari ereē. Taniriu-atakani kiinirite ene ! kakenakotikoikari. Ereē mitxi vētxirauatakani apiari itxauana. Ninoa atoko inakari ! auari ikini itixiti. Kākiti ereē auakani misirienetana ikini kākiti ikini itixiti auakani, kotxi ninoa sākire maerekatinoka —itxa Teoso nitiri sākire.

²⁴ Papirónia sitatxiti misiritaāka, kotxi iuaā auakani okapena Teoso sākire s̄apiretakani kākiti Teoso nakitiakori. Ikinimane kākiti itixi okakoni xika Papirónia sitatxiti xipokaāka.

19

Areroia, Peerekari Teoso

¹ Eereka nikenakotari kākiti sākire, kaiāopokori kākiti Teoso tixine auakani. Itapasākireritikana itxana:

—Areroia. Peerekari Teoso. Ate Teosone makatxakari kākiti maerekani. Kaiotximereri aTeosone. Kaposotiireri. ² ! Ikerokari ikamakiti, kotxi atāo inakarinoka ikama, ininiā atāo imisiritinina maerekati kamakani. Erekarinoka ikama aTeosone. Iua misiritari Papirónia sitatxiti. Kanokarero kaposotiirero atoko itxa iua sitatxi, kotxi iua sitatxi auakani iomatari kākiti xinire ikini itixiti auakani xinire, kotxi oerekarina maerekati itotxi nireēkiti ikaminina. Teoso misiritana Papirónia auakani, kotxi okana Teoso nitiriakori itixi auakani —itxana ninoa sākire.

³ Iuaikana itxana itaparakieneritikana:

—Areroia. Peerekari Teoso. Iua sitatxi miramaneri arikapikako. Katxiāri iuaākiri itimatxiātapikako ātipirika —itxana.

⁴ Iuasaaki ninoa totiakori v̄itxi koatro pakini, ninoa ok̄itxinoka x̄apokaītotakini ipi ipi pakini apaka, ipamakana Teoso apisatoō. Iuasaaki Teoso topākanāta aūt̄etxi topanere nopini. Ninoa misākiretari iua:

—Pite aTeosone. Peerekaǵ pite. Ameē, areroia —itxana ninoa.

Soti Aūte Ītanorouatini Kiiniriti

⁵ Eereka nikenakotari Teoso topanereē auakari sākire. Itxari:

—Hite Teoso nitiriakori ikini itixiti auakanii, “Peerekari aTeosone” h̄itxako. Hite aūt̄etxi inakanii, aūt̄etxi minakanii apaka, h̄ip̄kiniāri Teoso, “Peerekari aTeosone,” h̄itxako —itxa.

⁶ Iposo atoko nikenakotari itomaneri kākiti sākire ene atoko itxa, āparaā kai auiniātaā auakari ene atoko itxa, ikarokirauatini ene atoko itxa. Nikenakotari ninoa sākire:

—Areroia, perekari Teoso, kotxi aTeosone, Apiananiri, kaposotiireri, ikinimane auite itxaua —itxana ninoa.

⁷ —Mapoxokoniuata. Apoxokoniritika masākirauata. Matxari: “Perekari Teoso.” Teoso Soti Auītene Itanorouatini iketo apokapeka. Itaniriuatarkaro iua ikapani oāiamatapeka. ⁸ Osikaāka mākatxi ereri, kasarori oieretaākiti tīkane —itxana ninoa sākire.

Teoso nakitiakori kamakiti atāo inakari oa māka atoko itxa.

⁹ Iposo atoko iua Teoso nitiri txano nota:

—Ia piōkatsopata. Iua Soti Auīte Itanorouatini kiiniriti kemaītxitakoni poxokoniuata —itxa notamoni.

Iuaīkana itxano:

—Ia nisāpiretakiti Teoso sākire atāo itxa.

¹⁰ Ikara nikenakotakasaaki nipamaka iua Teoso nitiri apisatoō, Teoso apisatoō pamaākarino atoko nitxaua. Txamari iua txano:

—Kona pipamakape nota apisatoō. Nota Teoso nitiri pite atoko, pitariakori Xesosi sāpiretakiti auīākani atoko. Teoso apisatoōnani pipamakako. Xesosi sāpiretakiti iopinikari Teoso sākire sāpiretakani ākixinire. Inīniā ninoa sāpiretari kākiti atāo Teoso sākire —itxa.

Kavaro Kasarori Nopini Topākakari

¹¹ Eereka natamatari Teoso tixineē auakari. Natamatari kavaro kasarori. Iua kavaro nopini topākakari ikamaenetakiti kamakari itxaua. Isākire atāonoka. Atāo imereēri kākiti misiritiko imaerekani xika, kotxi iua imarotari ikinipoko kākiti kamakiti, ininiā ikamari atāo. Inaiatana maerekati kamakani, kotxi iua kamari atāo. ¹² Oki xamina tirinakari atoko itxa. Ikiā ito auītetxi saporīētane aua. Iuāka iōkatakori iītoā aua. !Kimarotikori iua uāka. Iuanoka imarotari iuāka. ¹³ Arēkatxinoka imākaā aua. Iua akiritaāka, “Teoso Sākire” inakori. ¹⁴ Isotatoneakori, Teoso nitiriakori Teoso tixine auakani, saāpota iuakata. Iua iikiika. Ninoa apaka topāka kavaro kasarori nopini. Imākana peereri, kasarori. ¹⁵ Iua “Teoso Sākire” inakori namaā opokīka iouata mitaro neenamati ikamini ikapani. Kuanaro. Iua iouataneē okanako imokaiakarini ikini āti uāka, ininiā ikini āti uāka auite kataparari itxauako iua. Imisiritanako ninoa imaerekanina xika. Ova katxaratiko atoko itxako imisiritikona. Teoso kaposotiireri omanākare ova katxaratiko atoko itxako. Teoso itene omanākaruata iusaaki kākiti maerekani xika.

¹⁶ Iua “Teoso Sākire” inakori mākaā, itapikeē apaka iōkatakāka: “Auītetxiakori auite. Apiananiri,” iōkatakāka.

¹⁷ Iposo atoko natamatari āti Teoso nitiri. Atokatxi iotximereē itima. Iua itaparakieneritika akiritari ikinika itano araākani:

—Hina. Hāpoka Teoso kiiniritemoni. Mitari ikinirite —itxa.

¹⁸ —Hina. Auītetxiakori xini hinika. Sotatoakori auiteakori xini hinika. Sotato xini apaka hinika. Kavaro xini hinika. Hinikari kikiākini kavaro nopini topākakani xini apaka. Hinikari ikini kākiti xini, nitiritxi iamotakoni xini, nitiritxi minakanua xini, kākiti apiatakani xini, kākiti mapiatakani xini apaka hinika —itxari itano araākani.

¹⁹ Eereka nitikari iua potxoari uinitikiri. Iuakata aua itixi auakani auiteakori, isotatoneakori apaka. Ninoa apotiitaua, iua kavaro kasarori nopini topākakari isotatoneakorikata inaiatinana ikapani. ²⁰ Iua neenamati xipoka atoko, iua potxoari uinitikiri maīkaāka. Isākire sāpiretakari, atāo minasākiretakati, imākaāka apaka. Mitxi iua kamari posotiiretxi iua potxoari uinitikiri ikapani. Ikara posotiiretxi xika imisirienetana ninoa

potxoari uinitikiri takaõtxikare auaiõtatakini. Imisirienetana ninoa iua kai kamakori teosonetakani. Iua potxoari uiniti pokikaatakari, isäkire säpiretakari pakini, auäkipanika okaäka ipoa atoko inakarimoni, êxõpiri arikiniätaã. ²¹ Isotatoneakori okapeëka iouataã, kavaro kasarori nopini topäkakari namaãkeroã. Iuasaaki ikinika maiori nikapena ninoa xini. Kamitopekana. ! Iposotaikarina ikinika okakoni xini inikinina.

20

Mio Anokanansaaki

¹ Eereka nitikari Teoso nitiri katxakaãpotini Teoso tixine ikari. Iuakoã iua minaro xavi iua mamapotõkire irikotimoni. Apaka iminari kohëtxi mitari. ² Iuasaaki imaïkari iua imini mitapoari. Kitxakapirïkarikara iua imini. Iua maerekani matamatakoni auïte, Satanasi inakori. Iua maïkari Satanasi. Iaxirikari kohëtxiã, mio anokanani imatïpokotakani tikane. ³ Iua Teoso nitiri okari Satanasi iua aarikoã, tota itxari itore. Ikakiriokari oa xavi itore sonaã, ininiã !apakata itore matakakiko. Ininiã mamapotõkire irikoti äki ikaikota Satanasi. !Iposotaikari imisirienetiniri ikini itixiti auakani. Mio anokanani auako iriko äki iua Satanasi. Mio ano napaäka atoko auiritaäka ipokikini. Mapaõtinoka auiritaäka mapara auini.

⁴ Eereka natamatari auïtetxiakori topanere. Kaiãopokori auari iuaã. Natamatari iua topaneretxi nopini topäkakani. Ninoa txïkitaäka auïtetxi ininiuana. Iuasaaki natamatari apanakini kãkiti. Mitxi sauakanopitakoni. Okapeëkana Xesosi iokanapirena, Teoso säkire pakini isäpiretinina xika. !Iteosonetarina iua potxoari uinitikiri. Iua kai kamakori !iteosonetana. Iua potxoari uinitikiri takaõtxikare litakana iteëtaãna, iuakoãna pakini. Iuaïkana auapekana. Auïtetxi itxapekauana Kristokata. Mio anokanani auïtetxi itxauana. ⁵ Ikara ipïkani õkitikiko merepanika ipïkani õkitikiko. Iua mio anokanani napaäka atoko apanakini ipïkani õkitikaäka. ⁶ Ipïkani merepanika õkitikiko iuaïkana auäki ininina ikapani, Teoso nakitiakori itxauana ninoa. Teoso sikari erekari ninoamoni. !Atatsiitarina ätião ipïkitxi Teoso misiritakasaakina maerekati kamakani. Sasetotxi itxauana, kotxi Teoso nireëkiti ikamana. Kristo nireëkiti apaka ikamana. Mio anokanani auïtetxi itxauana Teosokata.

Satanasi Xamina Mitapoarimoni Okiko

⁷ Mio ano napaäka atoko, Satanasi kateia äki auakari, sikakaäkako. Ipokika mapara. ⁸ Iuasaaki Satanasi ïpirixititari itixi kãkiti ikini äti uäka imisirienetini ikapani. Iua misäkiretari äti uäka Koki inakori, Makoki inakori pakini. Txamari na atão isäkire. Inirekari ninoa neenamauatini iuakata. Apitiitana ninoa Teoso nakitiakori inaiatinina ikapani. Itori kãkiti Satanasi apotiitakini. Uini ikipatxite atoko itxana.

⁹ ïpirixitarina itixi. Iakirokarina Teoso tirketakiti sitatxiti, kãkiti Teoso nakitiakori auiniätaã. Iuasaaki xamina iaxitikiri katxaka. Ixipokana ninoa ikinikana. ¹⁰ Iuasaaki Satanasi, kãkiti misirienetakari, okaäka arikatxi mitapoarimoni êxõpiri arikikoãtaã. Iua potxoari uinitikiri, isäkire säpiretakari pakini okapeëkaika iuaã. Iuaã ninoa atatsiirauatapikako pokamara, ïkanõka ätipirika. !Ixipoka ninoa atatsiirauatini.

Ipinakani Apakapari Iparïkana Ìki

¹¹ Eereka natamatari auïtetxi topanere kasarori mitari. Natamatari iua inopini topäkakari. Iuasaaki patumari iaxiti, itixi pakini ereëkokini iua topäkakari apisatoõ. Iaxiti, itixi pakini kona katamatikoikari. ¹² Ipoço atoko natamatari kãkiti mitxi ipinakani timini Teoso topanere apisatoõ. Kãkiti apiarini, kãkiti poiãorini pakini tima Teoso apisatoõ. Ipoço atoko itori

aätsopa katamëkitataãka. Iua aätsopaã aua ikinika kãkiti kamakiti. Apaka äti aätsopa katamëkaãka. Kãkiti uãka aua iua aätsopaã Teosokata auakani ïkapani. Iuasaaki ninoa mitxi ipinakani apakapari ikamakitina ïki uai itixiã auakasaakina. ¹³ Ninoa mitxi potxoari uiniti äki ipinakani apoka iuaã. Mitxi kipatxiã ikatakoni apaka apoka iuaã. Ikini kãkiti ipïkani auiniãtaã auakani apoka iuaã. Ikinika apakapari ikamakitina ïki, ikamakitina itixiã auakasaakina. ¹⁴ Eereka ipïkitxi, ipïkani auiniãtaã pakini okaãka iua arikatxi mitapoarimoni. Iua arikatxi mitapoarimoni iuaïkana kãkiti ipina ätião ipïkitxi maxipokatimoni. ¹⁵ Kãkiti ätipirika Teosokata auakani uãka aua Teoso aätsopateë. Kãkiti iuaã mauauãkatakani okaãka iua arikatximoni.

21

Iaxiti, Itixi Pakini Amaneri Txapekaua

¹ Eereka natamatari iaxiti amaneri, itixi amaneri pakini. Iaxiti mitxiri ereëkokape. ïkora itixi mitxiri ereëkokape. Potxoari uiniti ! auaika. ² Natamatari Teoso sitatxine Xerosareë amaneri. Iua sitatxi Teoso tixinekiri. Teoso paniãtari iua sitatxi ïkorapokoriti apokini. Natamatari ikatxakaãpotini. Iua sitatxi peereri. Sito ïtaniriuatakasaaki, omãka peereri oïtanirimoni osini ïkapani. Oa sito erero atoko itxa iua sitatxi. ³ Nikenakotari Teoso topanereë auakari säkire. Itaparäsäkireritika itxari:

–Uatxa Teoso kamari iua auini kãkiti sauaki. Iua ninoakata aua. Iua nakitiakori itxauana. Teosora aua ninoakata. Ninoa Teosone itxaua. ⁴ Iuasaaki iua kaxipokariko ninoa oki ätsaã. !Itxiapataikana. Ipïkitxi !auaika.

Matinanitxi !auaika. Ätsaãtxi !auaika. Katsiiri !auaika. Ikinipoko mitxiri ereëkokapeka uatxa –itxa.

⁵ Iua auütetxi topanere nopini topãkakari txari:

–Uatxa nikamari ikinipoko amaneri –itxa.

Apikomoni itxari notamoni:

–Piökatsopataris nisãkire, kotxi nisãkire atão. Nisãpiretakiti apokapitikako.

⁶ Apikomoni itxano:

–Uatxa niparïka xipopeka. !Auaika. Merepitipanika iõka Aopa inakori atoko nitxa, kotxi nota merepitipanika aua. Imapotökire iõka Ómika inakori atoko nitxa, kotxi ikinipoko mapotökire nitxaua apaka. Nisikari kãkiti posonatakani iãtini ïkapani. Na ninirekari ïlki. Iãtarinako äparaã amomoãkiri. Iua äparaã txïkitakari kãkiti ätipirika Teosokata auini. ⁷ Nisikariko iua äparaã kãkiti Satanasi nireëkiti makamakanimoni. Ninoa Teosone nitxaua nota. Nota anaakori itxauanako ninoa. ⁸ Kãkiti mataparaxinireni okaãkako xamina mitarimoni. Teoso säkire mauikakani apaka okaãkako iua xaminamoni. Maerekati potxitakani, kokanirini, maerekati iïtoãna potxitakiti kamakani apaka okaãkako xamina mitapoarimoni. Miiti apaka okaãkako iuamoni. Teoso kamakori teosonetakani okaãkako iuamoni. Ikinika kãkiti maxikatïlka säpiretakani apaka okaãkako xamina mitarimoni. Ninoa kãkiti ikinikana misiritaãkako arikatxi mitariã, ëxöpiri arikikoãtaã. Iuaã kãkiti iuaïkana ipina, ätião ipïkitxi maxipokatimoni –itxa iua auütetxi topanere nopini topãkakari säkire.

Xerosareë Sitatxiti Amaneri

⁹ Ninoa Teoso nitiriakori setxi, iãtatxi setxi auakini, äti ina notamoni. Iua txari:

–Uai pina. Noerekaiko pite iua Soti Auüte tirketakito ïtanoro ïkapani –itxa.

¹⁰ Iua Erekari Matamatakoti anikano nota. Itxïkitakari Teoso nitiri anikinino oxiratari nopini. Mitaxiratariã oerekano sitatxi Teoso nakiti

Xerosareë inakori. Natamatari iua sitatxi Teoso tixine potorikakari katx-akaäpotini ìkorapokoritimoni. ¹¹ Teoso iotximeretxikana aua iua sitatxi. Kai pomëkoriri kakaroneri xásipi inakori mëkorìkini atoko itxa iotximere. Iua sitatxi iotximere peereri. Kristao mëkori atoko itxa. ¹² Pirikeri kai kamakori piriketari iua sitatxi. Iua pirikeri mitapoari, pañtanori. Iua pirikeri tosi itore aua. Teoso nitiriakori iaxitìkini tosi nìkatarì iua tosi itore. Ikinika itore nopini iòkataäka Isaeo anaakori uäka, kotxi Isaeo tosi imiakori aua. ¹³ Ipi äti pakini iua itore atokatxi pokìkinimoni. Ipi äti pakini iua itore atokatxi pokìkini sanaremoni. Ipi äti iua itore atokatxi pokìkini ikikomoni. Ipi äti pakini iua itore atokatxi ereëkokinimoni. ¹⁴ Iua sitatxi pirikere tosi kai mitari nopini ikamaäka. Ikinika iua kai nopini Soti Auïte moianariakori uäka iòkataäka, kotxi Soti Auïte moianariakori tosi aua.

¹⁵ Iua Teoso nitiri notakata säkirauatakari aua aäke oro kamakori iuaokö. Iua aäke iua sitatxi, itore, ipirikere pakini iaõtiko. ¹⁶ Sitatxi tore atokatxi pokìkinimoni ipotorika. Itore atokatxi ereëkokinimoni apoka. Iaõtari ipi mio, koatrosëtosi pakini kirómetro. Maioakari. Iuaikana ipotorika sitatxi itore atokatxi pokìkini sanaremoni. Itore atokatxi pokìkini ikikomoni apoka. Iaõtari iua atokotxikana ipi mio, koatrosëtosi pakini kirómetro. Eereka iaõtari sitatxi itano timakari. Iua atokotxikana ipi mio, koatrosëtosi pakini kirómetro. Iua Teoso nitiri iaõtari iua sitatxi iua aäkeë. ¹⁷ Iua Teoso nitiri iaõtari pirikeri timakari. Sesëta metro itano. Teoso nitiri iaörauata kãkiti iaörauatini atokokana. ¹⁸ Iua pirikeri kai kamakori xásipi inakori. Iua sitatxi oro kamakori. Kristao erero atoko itxa oa oro. ¹⁹ Iua kai mitari pirikeri patapi auakari ipataäka ikini sereti kai soroä. Pomëkoriri, kakaroneri iua kai soro.

Äti iua kai mitari aua kai soro xásipi inakori.

Äti iua kai mitari aua kai soro sapira inakori.

Äti aua äkata inakori.

Äti aua esimeráota inakori.

²⁰ Äti kai mitari aua kai soro satónia inakori.

Äti kai mitari aua kai soro sátxio inakori.

Äti aua krisórito inakori.

Äti aua periro inakori.

Äti aua topásio inakori.

Äti aua krisópraso inakori.

Äti aua xasíto inakori.

Äti aua ametxísita inakori.

²¹ Iua tosi itore tosi kai kasarori kamakori. Iua kai kasarori pérora inakoro. Iua itore ätika, pérora ätoka kamakori. Oro kamakori itxaua kimapori. Peereri. Pomëkoriri. Kristao atoko itxa ahoa.

²² Kona natamatari Teoso misäkiretiko aikoti. !Auari iua aiko iua sitatxiä, kotxi Teoso Aplananiri kaposotireri, iua Soti Auïte apaka iuaä auapikana.

²³ Iuaä ! inirekaäka atokatxi, kasiri pakini sitatxi iopinikini ìkapani, kotxi Teoso iotximere iopinikari ikinipoko. Iua Soti Auïte sitatxi tirikapite atoko itxaua.

²⁴ Kãkiti maerekanitxi mauakini ikini äti uäka auari iua kama-
raä. Kãkiti ikini itixiti auakani auïteakori apokako iuaä Teoso ipaxitin-
ina ìkapani, inirekakitina Teosomoni isikinina ìkapani. ²⁵ Iua sitatxi tore
imatakakaäkapika. Ìroäpikana kãkiti. !Itotaäka, kotxi ìkanökari ! auari iuaä.

²⁶ Kãkiti ikini itixiti auakani anikariko ikinipoko erekari iua sitatximoni
Teoso ipaxitinina ìkapani. ²⁷ Kãkiti maerekati kamakani !auritaäkana Ìroinina.
Ìtotxi nireëkiti kamakani !auritaäkana Ìroinina. Atäo masäpiretakani apaka

! auiritaākana ĩroinina. Kākiti Teoso iōkauākatakini aātsopateē, ninoanokara auiritaāka ĩroinina iua sitatxitiā. Iua Soti Auīte aātsopateē auauākatakani auapikako Teosokata.

22

Iua Āparaā Iātakari Aua Teosokata Ātipirika

¹ Eereka iua Teoso nitiri oerekano sōtoāri. Iua sōtoāri mapotōkire ikiitā Teoso itopanere aua. Apaka iua Soti Auīte itopanere aua iuaā. Iua āparaā peereeri. Kristao mēkori atoko itxa iua āparaā. Iua āparaā iātakari !ipina. Ātipirika auapika. ² Iua sitatxi apanīkaki aua ahoa mitapoari. Iua sōtoāri sa ahoa apanīkaki. Sōtoāri ĩtinikata aua amātiirinape. Iua amātiiri tximakani ! ipina. Auapikana. !ipinaikana. Kasiri iaōka iriuata iua amātiiri. Āti kasiriti iri ātiāo, eereka āti kasiriti ātiāo. Iuaikana āti kasiriti ātiāo. Itxaāpota iua amātiiri iriuatini iuaxiti. Tosi pakini kasiriti amātiiri iriuata. Amātiiri tsopa sikatarparatari kākiti ĩto, ikinimane kākiti itixi auakani ĩto.

³ Teoso misiritiniri kākiti !auaika. Teoso, Soti Auīte pakini auītetxi itxauana iuaā. Teoso nitiriakori itixi auakani kamari iua nireēkiti. ⁴ Ninoa atamarariko itoō. Teoso uāka iteētaāna auako. ⁵ ĩkanōka !auaika iuaxiti. Kākiti iuaā kona nirekaikari tirikapi, atokatxi kamara pakini, kotxi Teoso Apiananiri iopinikari ikinika iuaā. Kākiti iuaā auakani auītetxiakori itxauana ātipirika.

⁶ Eereka iua Teoso nitiri txari notamoni:

—Atāo nisākire. Ia iaōka apokapitikako. Teoso Apiananiri sikari Erekari Matamatakoti isākire sāpiretakanimoni. Iua paniātari initiri itixine auakari oerekinina initiriakori itixi auakani Teoso kamakiti apokini apisapanika — itxa iua Teoso nitiri sākire.

Xesosi Kanapiriini Pirena

⁷ —Hīkenakota —itxa Xesosi. —Patimariko napokini ereē. Ia aātsopa sāpiretari ereē nikanapiriini pirena. Kākiti auikiniāri Teoso sākire ia aātsopa sāpiretakiti, apakapari erekari Teoso sikakiti —itxa Xesosi.

⁸ Nota Xoāo sāpiretai hīte nitiākiti. Nikenakotakiti apaka nisāpiretai hīte. Ikinika nikenakotaka atoko, ikinika natamataka atoko, iusaaki nipamaka iua Teoso nitiri apisatoō, kotxi iua oerekari ikinipoko notamoni. Nipamaka iua apisatoō Teoso apisatoō nipamakini atokokana. ⁹ Txamari iua Teoso nitiri txari notamoni:

—Kona pipamakape nota apisatoō. Nota Teoso nitiri pite atokokana nitxa. Pitariakori Teoso sākire sāpiretakani Teoso nitiriakori itxauana. Ninoa atokokana nitxa nota. Ikini kākiti ia aātsopa sāpiretakiti auīākani Teoso nitiriakori itxauana. Ninoa atokokana nitxa nota. Teoso apisatoōnoka pipamakiniā atāo —itxa Teoso nitiri sākire.

¹⁰ Iuaikana itxano nota:

—Ia aātsopa sāpiretari Teoso kamakiti apokini apisapanika. Na pikipat-
apiri ia aātsopa sāpiretakiti, kotxi paītiki Teoso sākire iaōka apokapitikako.

¹¹ Maerekati pikamapanika pinakasaaki, ininiā apikomoni maerekati pikama. Maerekati piīto nireēkiti pikamapanika pinakasaaki, ininiā apikomoni pikama. Atāo inakari pikaminiā, apikomoni atāo inakari pikama. Teoso nireēkitinoka pikaminiā, ininiā apikomoni Teoso nireēkitinoka pikama —itxa.

¹² —Hīkenakota —itxa Xesosi. —Patimapaniriko napokini ereē. Niminariko ikinimane parīka ĩki ninoa apakapini ĩkapani. ¹³ Iōkatxi merepitipanika auakari Aopa inakori atoko nitxaua. Iōkatxi imapotōkire auakari Ōmika

inakori atoko nitxaua. Ikinipoko auini apisapanika nota aua. Ikinipoko xipokaãka atoko nota auapanika. Itixi kamiko apisapanika naua. Itixi xipoka atoko nauapanika nota –itxa Xesosi.

¹⁴ Teoso sikari erekari iua nireëkiti kamakanimoni. Ninoa kãkiti auiritaãkako Teoso amãtiirite itxminina auapika ininina tãkane. Auiritaãkanako ïroinina Teoso sitatxineë. ¹⁵ Kãkiti maerekati iïtona nireëkiti kamakani ! auiritaãka ïroinina iua sitatxitiã. Miiiti, Itanoro minakatokatika sirikakani, kokanirini pakini !auiritaãka ïroinina iua sitatxitiã. Apaka kãkiti ikamakitika teosonetakani ! auiritaãka ïroinina iua sitatxitiã. Aãpirena potxitakani, atão minasãkiretakani pakini !auiritaãka ïroinina iua sitatxitiã.

¹⁶ –Nota, Xesosi txaua. Nota paniãtari ninitiri nitixine auakari sãpiretiniri ia nisãkire pitemoni, ininiã ikara pite sãpiretanako Teoso misãkiretikoãtaã apotiitakanua. Tavii apika mekanirirano nota. Iõriki mitaro pokamara iatokopeka inakasaaki ikaro atoko nitxa nota –itxa Xesosi.

¹⁷ Erekari Matamatakoti txari Xesosi:

–Uai pina.

Xesosi nakitiakori txari iua:

–Uai pina.

Hïte ia nisãkire kenakotakanii, hïtxariko:

–Uai pina.

Hïte posonatakani, uai hina. Hinirekiniãri, ia ãparaã hiãtako, kotxi ia ãparaã kãkiti auapininiika inikitaãkari. Ia ãparaã Teoso sikakiti kãkitimoni. Na piikitxitari.

¹⁸ Nota, Xoão, õtãkikari kãkiti ia Teoso sãkire iõkatsopatakori kenakotakani. Ia Teoso sãpiretakiti apokini apisapanika, isãpiretaua. Ia aãtsopa sãpiretari kãkiti misiritiko. Ninoa misiritiko atokotxikana Teoso misiritai hïte, hïkoretiniãri hïteka sãkire Teoso sãkirekata. ¹⁹ Kãkiti kipatiniãri ipixini ia Teoso sãpiretakiti iõkatsopatakori, Teoso !auiritari iua tximiniri iua amãtiiri kãkiti auapininiika inikitaãkari. !Auiritari iua ïroini isitatxineë. Ia aãtsopa sãpiretapekari iua amãtiiri, iua sitatxiti pakini.

²⁰ Xesosi txari:

–Ia niokanapirena atão. Iposopeka napokini tãkane.

Atxari iuamoni:

–Ameë. Ari, uai pina Xesosi, Apiananiri.

²¹ Xesosi Apiananiri sikari ikinipoko erekari ikinimane Teoso nakitiakorimoni. Ameë.